


Lerérún Búngiu To
Lánina Iséri Darádu



New Testament in Garifuna (HO:cab:Garifuna)

Lerérun Búngiu To Lánina Iséri Darádu

New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
df8e4807-f4f9-5f4a-ab14-d1f7ffe98b0a

Contents

SAN MATEO 1
SAN MARCOS 60
SAN LUCAS 97
SAN JUAN 158
HECHOS 203
ROMANOS 256
1 CORINTIOS 280
2 CORINTIOS 305
GÁLATAS 321
EFESIOS 330
FILIPENSES 338
COLOSENSES 344
1 TESALONICENSES 349
2 TESALONICENSES 354
1 TIMOTEO 357
2 TIMOTEO 364
TITO 369
FILEMÓN 372
HEBREOS 374
SANTIAGO 392
1 PEDRO 398
2 PEDRO 405
1 JUAN 409
2 JUAN 415
3 JUAN 416
JUDAS 417
APOCALIPSIS 419

UGÁNU BUÍTI LE LABÜRÜJABEI MATÉO LUÁGU JESÚSU

Linébaanfaangu Jesúsu (Lc 3.23-38)

¹ Niján jíri linébaanfaangu Jesucrístu le jádaangiñebei meja ladügawagun David lúma Abrahám.

² Abrahám lúguchibei Isáac, Isáac lúguchi Jacób, Jacób lúguchi Judá jáu lamúlenu, ³ Judá lúguchi Fáres lúma Zára, Tamar tugúya jáguchu, Fáres lúguchi Esróm, Esróm lúguchi Arám, ⁴ Arám lúguchi Aminadáb, Aminadáb lúguchi Naasón, Naasón lúguchi Salmón, ⁵ Salmón lúguchi Booz, Raháb lúguchu, Booz lúguchi Óbed, Rut lúguchu, Óbed lúguchi Isai, ⁶ Isai lúguchi urúei David, urúei David túma tó meja lúmari Urías, jagía lagübürigubaña Salomón.

⁷ Salomón lúguchibei Roboám, Roboám lúguchi Abías, Abías lúguchi Ása, ⁸ Ása lúguchi Josafát, Josafát lúguchi Jorám, Jorám lúguchi Uzías, ⁹ Uzías lúguchi Jótam, Jótam lúguchi Ácaz, Ácaz lúguchi Ezequías, ¹⁰ Ezequías lúguchi Manasés, Manasés lúguchi Amón, Amón lúguchi Josías, ¹¹ Josías lúguchi Jeconías jáu lamúlenu lídan dan le janáanwagunbei Israelítagu adáürawagua Babilónia.

¹² Lárigiñe le, Jeconías lúguchibei Salatiél, Salatiél lúguchi Zorobabél, ¹³ Zorobabél lúguchi Abiúd, Abiúd lúguchi Eliaquím, Eliaquím lúguchi Azór, ¹⁴ Azór lúguchi Sadóc, Sadóc lúguchi Aquím, Aquím lúguchi Eliúd, ¹⁵ Eliúd lúguchi Eleázar, Eleázar lúguchi Matán, Matán lúguchi Jacób, ¹⁶ Jacób lúguchi José le túmari María, tugúyati lúguchuboun Jesúsu le gíribei Crístu.

¹⁷ Catóurusuñanu lubeíti linébaanfaangu Jesúsu lúmagiñe Abrahám lúmoun David, catóurusu lúmagiñe David lúmoun janáanwagúniwa Israelítagu Babilónioun, catóurusu lúmagiñe dan ligía lúmoun lagúriajouñ Crístu.

Lagúriajouñ Crístu (Lc 2.1-7)

¹⁸ Ítara líña ligáburi lagúriajouñ Jesucrístu. María to lúguchu, gadáraduñoun lúma José lun tamárieidun lúma, lubáragiñeti jaganouñ jámagua, lubáragiñe lasúbudirunun quei wúri, ába tadáriragun túngua láu dagáñu tíña lan láu lubáfu Sífiri Sándu. ¹⁹ Quei ában lubei wügüri buidu tigáburi José le tadári, májati lasúbudirúniwa le asúseredubei tun María, busénrügüti lígirunun, míchugunga tidúnrun. ²⁰ Dan le niján lubei arítagua luágu cátei le, ligía larúfudagun ában láni Wabúreme Búngiu ánjeli lúngua lun lídan luwénedi, ába laríñagun lun.

—José, ladügawagun David, manúfudebá lun berésibirunun María queísi búmari, ladüga irájü le lúnbei tagáraüdni, lúmagiñe Sífiri Sándu liábin. ²¹ Tagáraüduba ában irájü, ábame bíchuguni líri Jesúsu. Ítara lúba líri ladüga lasálbarubaña lan lumútuniña lídaangiñe jafígoun.

²² Lasúseredunbei sun cátei le lun lagúnfulirun dimúrei le laríñagubei Wabúreme Búngiu liyúmulugugiñe proféta.

²³ Tadágeinaduba ában irájü, ábame tagáraüdn ában irájü, Emanuél, ligíaba líri, líla líri ligía, “Búngiu wáma”.

²⁴ Dan le lagágudunbei José lídaangiñe uwénedi ligía, ába ladügüni le lubeíbei ánjeli ligía lun, ába lerésibirunun María queísi lúmari, ²⁵ masúbudirungalóun queísi würi darí tagüriajani furúmiñeti tiraü, ába líchuguni líri Jesúsú.

2

Jachülürün chu táu aríjei Jesúsú

¹ Lídan fulásu le gíribei Belén, lumúanrugu Judéa, ñi lagüriajouá Jesúsú dán meja le Heródes lan urúeíbei lídan jageíra juríu. Ábati jachülürün fiú wügüriña chu táu ubúrugin Jerusalén lueígiñe oúbaü le ñígiñe lubeí laboucha wéyu. ² Ába jalügüdajan.

—¿Jageísan jarúeite juríu le agüriajoubei? Aríja wamáaru luwáruguman le ñígiñe lubeí láfuara wéyu, wayábiñati lun wájuduragun lun.

³ Dan le lagáambuni urúei Heródes cátei le, ába medéraguagüdünjaali lan, jáu sun Jerusalénna. ⁴ Ábati lagúarun joun sun jábutigu fádirigu lídan jaffínen juríu, jáma ja arúfudajabalin lilúruden Moisés joun gürígia, ába lálügüdaguniña jalíabei lan libíti fulásu lagüriajouá Crístu. ⁵ Ába jaríñagun lun.

—Belén, le lumúanrugubei Judéa, ladüga ítara líña labürüdüni proféta.

⁶ Amürü Belén, lumúanruguna Judéa, amürü ában lídaangiñe ubúrugu weírigutimaati lídan múa le, láu sun biñúraü, ladüga láfuriduba ában ábuti bídaangiñe le lúnbei loúnigiruniña numútuniña ja Israelítagu.

⁷ Ábati lagúarun Heródes joun chu táu arámudaguarügü, ába lálügüdüniña luágutima dan le tarúfudaguagüle warúguma túngua joun. ⁸ Ábati loúnajaniña Belén, laráñaga joun.

—Jeíba, ábame jáluajani irájü le buídu, dánme le darí jumaali, jawísaraname, ñüdüñ námuga gíñe ájuduragua lun.

⁹ Lárígiñe jagáambuni chu táu lerérun urúei, ába jóudin. Warúguma bugáti to jaríjuboun le ñígiñe lubeí láfuara wéyu, ába tídin jabá jabá, darí taráramun loúgiñe fulásu le ñi lubeí irájü le. ¹⁰ Dan le jaríjinun chu táu ja warúguma, ába jagúndaaragun sarágu. ¹¹ Dánti le jebélurun tídoun múna, ába jaríjini irájü le túma lúguchu to María. Ábati jájuduragun, ába jabúluchagun lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gífti. ¹² Lárígiñe, ába jawísarúniwa lídan jawénedi lun magíríbudun jamá ñígiñe lubeí Heródes, ába jagíríbudun jageíroun lídaangiñe ámu úma.

Anúrajani lun Ejíptoun

¹³ Lárígiñe jóudin chu táu jagía, ába larúfudagun ába láni Búngiu ánjeli lúngua lun José lídan luwénedi, ába laríñagun lun.

—Sarába, barúbei irájü le táu sun lúguchu, anúrabá Ejíptoun, ábame beréderun ñi daríme nawísarunibu, ladüga láluaajaali Heródes irájü le lun láfaruni jilágubei.

¹⁴ Ábati lásaarun José, ába lanügüni irájü táu sun lúguchu árieub ligía, ába lídin jáu Ejíptoun. ¹⁵ Ába jeréderun ñi darí loúnwen Heródes. Lasúseredunbei sun le lun lagúnfulirun le laríñagubei Búngiu liyúmulugugiñe proféta. “Sagá numuti Niraü Ejíptogiñe.”

Láfaraguágüdüniña Heródes irájüñü

¹⁶ Dan le ladáriragun Heródes lúngua luágu yéegua jamá lan chu táu, ába lagañidun, ába loúnajan áfaraguaña sun irájüñü ja biáma tíña irúmu jáu lun únabun, ja aganóubaña Belén lúma sun fulásu geyéguá láu, según dan le jariñagubei chu táu luágu lagúriajouñiwa irájü ligía. ¹⁷ Ítara líña lagúnfulirun le labürüjabei proféta Jeremías.

¹⁸ Agaambúati lagúarajan ában umálali Ramá láu oúnwenbun igárigu, umálali ligía tumálali Raquel, to ayájuboun járigi tirájüñü, mabúseeruntu lun támalijóun ladüga jilágu jamá.

¹⁹ Lárigiñe loúnwen Heródes, ába liábin ába láni Búngiu ánjeli lun José lídan luwénedi yágüta Ejipto, ába lariñagun lun.

²⁰ —Sarába, barübei irájü le táu sun lúguchu, giríbu jumá jageíroun Israelítagu ladüga jilágu ja abúseerubaña meja jáfaruni irájü le.

²¹ Ába lásaarun José, ába lanügüni irájü táu sun lúguchu jageíroun Israelítagu.

²² Dan le lasúbudiruni José luágu Arqueláo lan agúmadijabei Judéa lewéñegua Heródes le lúguchi, ába lanúfudedun lídin ñjin, ába lariñawagúniwa lun lídan uwénedi lun lídin Galiléoun. ²³ Lachülürün ñi, ába lídin agánawa lídan fulásu le giríbei Nazarét, le lumúanrugubei Galiléa. Lasúseredunbei sun cátei le lun lagúnfulirun le jariñagubei profétagu luágu Nazarétna lan Jesúsu.

3

Lapúrichijan Juan le abásteragüdjabei lídan fulásu mageírawati (Mr 1.1-8; Lc 3.1-9, 15-17; Jn 1.19-28)

¹ Lídoun dan ligía, ába liábin Juan le abásteragüdjabei apúrichija lídan fulásu mageírawati, Judéa, ² ába lariñagun lídan lapúrichijan.

—Sáansi jumei jóuserun, ladüga yaráfaali larúeijan Búngiu.

³ Juan le, ligía le uágubei meja labürüja proféta Isaías ítara.

Agaambúati lumálali ában gürígia agúaraja lídan fulásu mageírawati ítara.

“Aráanse jumóun janígi lubá liábin Wabúreme, queísi ladárarúniwa üma surúti.”

⁴ Lanáangun Juan, láutu lúra caméyu, liábin lagürüga liránaagua, guéru, chigángaru leígubaña lúma síruudu le áraabuna. ⁵ Ábaja jayábin ubúrugugiñe Jerusalén, lúma Judéagiñe, lúma lubádugiñe dúna Jordán agáambe lapúrichijan, ⁶ dántija le jagúfeseeruni jafígoun, ába labásteragüdüniña lídan dúna le giríbei Jordán.

⁷ Dan le laríjin Juan luágu sarágu jáña lan gürígia lídaangiñetiña jadámurin fariséogu jáma saduséogu ñübintiña lun jabásterun, ába lariñagun joun.

—¡Jarásan jéwe jugúya le! ¿Ca awísarubadün lun janúrajan luei lanárame afáyeiragülei luágu figou le lúnbei liábin? ⁸ Oúsera jumá buidu, arijúa lámuga furáangu luágu sáansigua lan ligáburu jóuserun. ⁹ Mapántajan jugúyame, aríñaga jídaangua. “Linébaanfaangu Abrahám wagiá”, ladüga nariñajare jun luágu gayára lan ladügün Búngiu linébaanfaangu Abrahám lídaangiñe dübü le. ¹⁰ Madíseeli lagúnfulirun le lariñagubei Búngiu, luágu yaráfaali lan lidáni abeichúni luágu figou, aráanseeru jaráwa lun lánchujóun wéwe, áni sun wéwe le mabuídunti lin, chaünwati, ába lagudún. ¹¹ Áu, láu dúna nabásteragüdaün, arúfudei luágu sáansi jumáali lan ligáburu jóuserun, ánjeinti le lúnbei liábin nárigi, labásteragüdübadün láu Sífiri Sándu, áni lafáyeiragüdübadün luágu figou queísi láu wátu geméti. Gabáfuti nuei darí lun madúna nan ni lun narágachunun ligeidin. ¹² Nújeinjaru lichóbulin lújaburugu, larúmadagüdübei türígu, ábame

lanúadiruni lídaangiñe sagádi mábejjali. Ábame lareíduni türígu, ábame láguduni sagádi le mábejjali lídan wátu geméti le méñeguchadibi.

Labásterun Jesúsu
(Mr 1.9-11; Lc 3.21-22)

¹³ Dan le liábin Jesúsu Galiléagiñe, ába lachülürün luágun dúna le gíribei Jordán le ñí lubei Juan lun labásteragüdüni. ¹⁴ Májati yebéti Juan labásteragüdüni, ába laríñagun lun Jesúsu.

—Nugúya lúnbei babásteragüdünina, ¿amürü lubei ñübin nun lun nabásteragüdünibu?

¹⁵ Ába laríñagun Jesúsu lun.

—Ítara lúba guetó, ladüga lúnti wadügüni le lubeíbei Búngiu.

Ába labásteragüdüni Juan Jesúsu, ¹⁶ larígiñe labásterun Jesúsu, ába láfuridun dúnarugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun. ¹⁷ Ába lagaambún ába umálali siéluigiñe le aríñagubei.

—Niraü le jinsiñebei nun le, le áubei oúnwenbun lan nugúndan.

4

Louçhaguni Máfia Jesúsu
(Mr 1.12-13; Lc 4.1-13)

¹ Ába lanügüni Sífiri Sándu Jesúsu lídoun fulásu mageírawati lun louçhaguni Máfia.

² Lárigiñe leréderun Jesúsu bián-wein wéyu lúma bián-wein áriebu meíginga, ába lalámachun. ³ Ábati liábin Máfia lubádun, ába laríñagun lun lun louçhaguni.

—Ánjein liraü hubei Búngiu, salíguagüdabeí dübü le feínme.

⁴ Ába louñabun Jesúsu.

—Tariñajare Lerérun Búngiu. “Mámarügübei táu fein labágarida gürígia, labágariduba giñe láu sun dimúrei le laríñagubei Búngiu.”

⁵ Ábati lanügüni Máfia Jesúsu Jerusaléoun, ubúruge le sándubei joun juríu, ába laweínragüdüni tábulugun témpulu, ⁶ ába laríñagun lun.

—Ánjein liraü hubei Búngiu, chubába yágiñe lun ünabun, ladüga tariñajare Lerérun Búngiu.

Laríñaguba Búngiu joun láni ánjeligu lun joúnigirunibu.

Janügübadibu jájaburugu lun machúgeragun lan bugúdi luágu dübü.

⁷ Ába louñabuni Jesúsu.

—Aríñagatu giñe Lerérun Búngiu. “Mouçhaguabeí Babúreme Búngiu.”

⁸ Ába lanügüni Máfia Jesúsu luágun ában wübü íñuti, ába larúfuduni sun arúejiani le ubouágubei lun, lúma buri luweírigin, ⁹ ába laríñagun lun.

—Níchugubei sun le bun ánjabu ájuduragua nun.

¹⁰ Ábati laríñagun Jesúsu lun.

—¡Beíba nueí, Máfia! ladüga tariñajare Lerérun Búngiu. “Lúnrügüba Babúreme Búngiu bájuduragua, lúnrügüba giñe besériwida.”

¹¹ Ábati ladísedun Máfia lueí, ába jayábin ánjeligu esériwidei.

Lagúmeseruni Jesúsu luwádigimari, Galiléa
(Mr 1.14-15; Lc 4.14-15)

¹² Dan le lagáambunbei Jesúsu luágu níjein lan Juan furísunrugu, ába lídin lárigoún Galiléoun. ¹³ Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabulón lúma Neftalí. ¹⁴ Lasúseredunbei sun le lun lagúnfulirun le labürüjabei meja Isaías, lé meja proféta.

¹⁵ Lageíra Zabulón lúma Neftalí, lídan úma lubádu barána, lueigiñe oúbaü le ñigiñe lubeí láfuara wéyu libíti Jordán,

Galiléa le ñí lubei jagánawa ja mámabaña juríu.

¹⁶ Jugúya lé meja lídaanbei lubúriga aríjaadün ában oúnwenbun larúgounga, jugúya lé meja lídaanbei lamúñounga le lánina oúweni, jarúgoungagüdawaali jáu.

¹⁷ Lúmagiñe dan ligía, ába lagúmeserun Jesúsu apúrichija ñi ítara.

—Sáansi jumeí jigáburí, ladüga yaráfaali larúeijan Búngiu.

*Lagúarun Jesúsu joun gádürü esénijatiña lun lánime disípulugu
(Mr 1.16-20; Lc 5.1-11)*

¹⁸ Eíbugeina líña Jesúsu láru láru dúna Galiléa, ligía laríjin bián gamúlenuguátiña, ában jádaangiñe, Simón le méme gíribei Pédro, le ában, Andrés. Esénijani jabágaríbei, jáguruñati. ¹⁹ Ábati lariñagun Jesúsu joun.

—Falá jumana, ábame mesénijanjadün lan úduraü, anáajarügaadünme gürígia nun lun nánigume.

²⁰ Furése furése ába jígirunun jasénin, ába jóúdin lúma.

²¹ Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedéo. Tídaañanu ában ugúnein lúma jáguchi arámadañoun jasénin. Ába lagúarun Jesúsu joun lun lánime disípulugu, ²² lídan óra ligía ába jígirunun ugúnein, ígira jáguchi, ába jóúdin lúma Jesúsu.

*Larúfudajan Jesúsu joun sarágu gürígia
(Lc 6.17-19)*

²³ Ábajei leíbuguni Jesúsu sun Galiléa arúfudajeina tídan buri jalígílisin juríu to lídaanboun ságü fulásu. Ábaja lapúrichijani ugánu buíti luágu larúeijan Búngiu, areídaguagüda ligía sun luwúyeri sándi le jawáguti gürígia.

²⁴ Ába lagaambúniwa luágu Jesúsu lídan sun Síria, ába janügüniña sun ja asúfurirubaña láu ámuñegueinarügü sándi, igárigu, ja gawágubaña lagübüri espíritu, ja gouwejadibaña, jáma ja derégüdaaña úgubu, ába lareídaguagüdüniña.

²⁵ Sarágu jána gürígia afálaruti Galiléagiñe, lídaangiñe buri fulásu Decápolisna, Jerusaléngiñe, lotúbawagiñe Judéa, lúma lueigiñe oúbaü le ñigiñe lubeí laboucha wéyu libíti Jordán.

5

Lapúrichijan Jesúsu wübüwaügügiñe

¹ Dan le laríjnbaliña Jesúsu sun gürígia jagía, ába laweínrun luágun ában wübü, ába lañúurun ñi. Ábati jóúndaragun láni disípulugu geyégua láu, ² ába lagúmeserun arúfudaja joun ítara.

³—Fuleiseiwatün jugúya le asúbudirubalin luágu mégei jumáni lídejan Búngiu lun jadügüni le labúserubei, ladüga méreengunbei jun lun jebélurun lídoun larúeijan Búngiu siélu.

⁴ Fuleiseiwatün jugúya le jírubei, ladüga líchuguba Búngiu gurásu jun.

⁵ ‘Fuleiseiwatün jugúya le ünabugubei, ladüga jerésibirubei le uágubei laríñaga Búngiu luágu líchugubei lan jun.

⁶ ‘Fuleiseiwatün jugúya le weírubei jabúseerun lúaradagun jabágaridun, ladüga líderagubadün Búngiu lun jadügüni.

⁷ ‘Fuleiseiwatün jugúya le gudémebabubei, ladüga gudémebadün gíñe lun Búngiu.

⁸ ‘Fuleiseiwatün jugúya le jarúmabei anígi, ladüga jaríjubei Búngiu.

⁹ ‘Fuleiseiwatün jugúya le áfaagubei lun jámalijan sun cátei, ladüga lagúarubadün Búngiu queísi lirájüñü.

¹⁰ ‘Fuleiseiwatün jugúya le asúfurirubei eíbaajoüni luágu lúaragun jibágari, ladüga jebéluruba lídoun larúeijan Búngiu siélu.

¹¹ ‘Fuleiseiwatün dan le janábagonün gürígia, eíbaaja jamaün, aríñaga jagía sun luwúyeri iyéeni juágu, nueígíñe. ¹² Gúndaañu jumá, ladüga jerésibiruba ában oúnwenbun fáyeiti siélu, ítara líñá meja gíñe jeíbaajoüniwa profétagu ja ñübinbaña jubáragíñe.

Ítara jíña queísi sálu lúma lámpu lun ubou
(Mr 9.50; Lc 14.34-35)

¹³ Ába lasígirun Jesúsu aríñaga.

—Ítara jíña quei sálu joun lílana ubou le lun jeréderuniña luei jagádeirun, ánjein lefériDIRA sálu lubásuan, ¿cábagi un ju lan? Úaalime ju lan ni ca un lueídügüya lun lágurúniwa, ábame jadügüraguni gürígia.

¹⁴ ‘Ítara jíña quei lámpu joun lílana ubou le. Ában ubúругu le luáguti ában wúbü siñáti larámudagun, furáanguti larijoüniwa. ¹⁵ Mebedúnti gíñe ában lámpu lun líchugúniwa tábugíñe ában gáfu, luágu dábula líchugúa lun larúgoungadágüdün jáu sun ja múnadabaña. ¹⁶ Ítara jumá gíñe, durúnguagüda jumei jílámpun jádan gürígia, lun dánme lan jaríjini buíti le jadügübei, ábame gíñe jadímurejan buíti luágu Wáguchi Búngiu le siélubei.

Larúfudajan Jesúsu luágu lilúrudun Moisés

¹⁷ ‘Marítagu jumátia luágu niábiña lan agídarei lilúrudun Moisés, ni le jarúfudajabei profétagu, máma niábiña agídarei, niábiña arúfudei líla le tímátimaati. ¹⁸ Ninárün lubeiti jáu luágu níjeingua rügáali ligía lan siélu lúma ubou, magídaránwabei ni ában púntu, ni ában létüra lídaangiñe lilúrudun Moisés daríme suséreeli le lúnbei lasúseredun. ¹⁹ Ligía, le lubei íchuguti mebéreseni luágu furúmierügü gumádi lídaangiñe lúrudu, íbini le lan ñúraütimaabei lídaangiñe, arúfudaja ligía joun gürígia lun jadügüni líbe le ladügübei, ñúraüraübei lanügüniwa yágüta siélu lídan larúeijan Búngiu. Ánjeinti le ñüdüñbei láu sún buri gumádi lídan lúaragun, ítara gíñe larúfudajan, weírubei lanügüniwa yágüta siélu. ²⁰ Naríñajare jun luágu ánjein lan mabuídun ligáburi jóuserun sarágu weíyaasu jawei arúfudajatiña lilúrudun Moisés, jáma fariséogu, mebélubadün lídoun larúeijan Búngiu siélu.

Larúfudajan Jesúsu luágu igáñi
(Lc 12.57-59)

²¹ ‘Agáamba jumáali luágu aríñawagúa lán meja joun binádu jagübürigu lun máfarajan jamá, ladüga furúmieguarügü lan le áfarajati, lagúseragüdüwaba. ²² Wel, naríñajare jun luágu furúmieguarügü lan le agáñiduti lúma gürígia

líledi lagúseragüdúwaba. Le anábuti gürígia líledi lagúseragüdúbei luweírin-ágei lúrudu, le aríñaguti lun gürígia líledi, “ibídiougua táu”, luáguñein ūma lun máfiougatin. ²³ Ítara líña lubeíti, ánjein banüga bedéweejan luágun láni Búngiu latárü, báu ñi ába barítaguni luágu ñjein lan cátei lídan furúmieguaügü gürígia bubá, ²⁴ ígirabel le lúnbei bedéweejani ñi ligíbugiñe latárü, ábame bídin aráandara lúma gürígia ligía. Lárigiñemeti, gayáraajalíme bagíribudun luágun latárü íchigei bedéweejan.

²⁵ ‘Ánjein abúseera ában gürígia lanügünibu ligíbugiñoun lúrudu, belúba lídoun úarani lúma luágu jeíbuguniwagu lueí ledégerunibu lun agúseragüdüti, ledégerabume agúseragüdüti lun polisía, ábame badaürün. ²⁶ Ninárün báu, máfuridunbadibu ñigiñe darí bafáyeiruni lagúmujoún gáwanün.

Larúfudajan Jesúsu luágu adultériu

²⁷ ‘Agáambaadün luágu aríñawagúa lán meja. “Magámarida jumá jámari ámu, adultériu líra.” ²⁸ Áu nariñajare jun luágu furúmieguaügü lan le awámadirutu ában würi, adügaali adultériu túma tidan lanigi.

²⁹ ‘Ánjabu lubeíti lafígoungüda bágu le lueígiñebei boúnwenren, sagábei, fíbei díse, buítimaati lun beféridirun ában lídaangiñe umégeguni le buágubei sügü láu bídin láu sun búgubu máfiougatin. ³⁰ Ánjein bújabu lubeí le boúnwenren afígoungüdúbadibu, dūrúbei, fíbei díse, buítimaati lun leféridirün ában lídaangiñe umégeguni le buágubei sügü láu bídin láu sun búgubu máfiougatin.

Larúfudajan Jesúsu luágu ígiraguni

(Mt 19.9; Mr 10.11-12; Lc 16.18)

³¹ ‘Aríñawagúati meja giñe luágu furúmieguaügü lan le ígirutu lúmari lúnti líchugun gárada lánina ígiraguni tun. ³² Áu nariñajare jun luágu furúmieguaügü lan wügüri ígirutu lúmari, ánjein máma lubeí ladüga tagámaridun ligíbuagun, ába taganoún lúma ámu wügüri, adügagüda lumútu furúmiñeti wügüri adultériu. Le giñe agámaridutu würi ígiraguaaru ladügüña giñe adultériu.

Larúfudajan Jesúsu luágu áfiñuruni

³³ ‘Agáambaadün giñe luágu aríñawagúa lán meja joun binádu agübürigu lun jagúnfulirun láu le jaríñagubei láu áfiñuruni ligíbugiñe Búngiu. ³⁴ Áu nariñajare jun luágu moún lumuti lan jáfiñurun ni ca uágu—ni luágu siélu ladüga ñi lan lañúura Búngiu, ³⁵ ni luágu máa ladüga ñi lan líchigei Búngiu lugúdi, ni luágu Jerusalén ladüga ligía lubúrutebei Warúeite Búngiu le weírigubei, ³⁶ ni luágu jichügü ladüga siñáti ni jájarudagüdün ni jáuridagüdün ában ídiburi. ³⁷ Aríñagarügü jumá “ánja” o “uá”, máfiñurunga ni ca uágu, ámu cátei lueí líra lúmagiñeti Máfia.

Larúfudajan Jesúsu luágu láguyugüdüniwa wuríbani

(Lc 6.29-30)

³⁸ ‘Agáambaadün luágu aríñawagúa lán meja. “Águu luágu águu, ári luágu ári.” ³⁹ Áu nariñajare jun lun máguyugüdün jumá wuríbani luágu wuríbani, lubáragiñe líra, ánjein íchiga mútu agúfudein luágu ában loúba jigibu, rúya jumeí le ában oúbaü lun. ⁴⁰ Le áluguti lanügünun ligíbugiñoun lúrudu tueígiñe jisimisin, ígira jumeí lun giñe lanügünun jabíte. ⁴¹ Ánjaün lafósura ában gürígia lun janügün ában anügüni ában máili, barújumei bián máili. ⁴² Furúmieguaügü le amúriajati ában cátei júma, rújumei lun, míchiga jumeí giñe janágan luágun le afúredejati júma.

Ísiñejabuni joun áganifiñu
(Lc 6.27-28, 32-36)

⁴³ 'Agáambaadün giñe luágu aríñawagúa lán meja. "Jinsiñelá bumáda bun, liyéeregudame bágani bun." ⁴⁴ Áu nariñajare jun. Jinsiñe jamá jáganiñu jun, buídulá jayúmajan jabá ja wuríbabei jayúmajan jubá, adüga jumá buíti joun ja iyéreejabúbaña jun, ayúmurgua jumá lun Búngiu jawágu ja anábagubadün, ja wuríbabei ouuserunün. ⁴⁵ Ítara lúba jagáburiduña lan queísi lirájüñü Júguchi Búngiu le siélubei, ligía oúnaja lumúti wéyu joun buítiña jáma wuríbatiña, oúnajalei júya dándu joun múaraantiña queísi joun úaratiña. ⁴⁶ Ánjein já rügúbaña lubei jinsiñejabúbaña jun ínsiñeda jun, ¿cábagi fáyeiti jerésibira luágu líra? Adüga jamúti giñe ja agúburajabalin liseínsuna gumádi itara. ⁴⁷ Ánjein jóun rügúñein lubei jumádagu jayóuragua, ¿ca buíti jadügúbei láu líra? Íbini ja ibídiñejabubaña lun Búngiu adüga jamúti líra. ⁴⁸ Úaragua jumá le gumúti queísi úaragua lan Júguchi Búngiu le siélubei.

6

Larúfudajan Jesúsu luágu ladügün cátei buíti

¹ Ába lasígirun Jesúsu arúfudaja joun gürígia wübüwaügügiñe, laríñaga. —Tóunigi jumá luei jadügün cátei buíti jagíbugiñe gürígia lúnrügü jaríjinün. Ánjein jadüga itara, míchubei Júguchi Búngiu le siélubei fáyeiti buíti jun. ² Ligía, dánme lubei jideragun ában gudémeti, masúbudiragüda jumei lun sun ubou quei jadüga ja biánguabaña igibu ligílisirugu lúma úmadarugu. Jagía, jadügüni líra lúnrügü jadímurejan gürígia buídu jawágu. Ninárün jáu luágu láu lan jadügüni líra, ibíja jamáli jafáyeiruája. ³ Dan le jíchugun ában cátei lun gudémeti, masúbudiralei ni lubúidun-ágei jumáda, ⁴ adüga jumei lábugiñe libídiñewa. Júguchi Búngiu le aríjubalin le jadügúbei lábugiñe libídiñewa, líchuguba jafáyeiruája.

Larúfudajan Jesúsu luágu ligáburi ayúmuraguni lun Búngiu
(Lc 11.2-4)

⁵ 'Dan giñe le jayúmuragun lun Búngiu, mítaran jumá quei ja biánguabaña igibu ja jinsiñebei joun lun jayúmuragun rára tídan jalígílisin jurfu lúma lídan legéyedun úma lun jaríjiniña gürígia. Ninárün jáu luágu láu lan jadügüni líra ibíja jamáli jafáyeiruája. ⁶ Dan le jayúmuragun lun Búngiu, belújuma jírúmuragun, darú jumeíne jubéneri, ábame jayúmuragun lun Júguchi Búngiu le lábugubei júma ñi. Júguchimeti Búngiu, le aríjubalin le jadügúbei lídan límanin, líchuguba jafáyeiruája. ⁷ Lídan le jayúmuragun, mágyuyaguagüda jumá luágu dimúrei le málati quei jadüga ja ibídiñejabubaña lun Búngiu, jarítaguatiñati luágu lagáambubaña lan Búngiu ladüga líbe jadímurejan. ⁸ Mítaran jumá lubeíti quei jagía, ladüga lubáragiñe jayúmuragun lun Búngiu subúdi láali ca lan jabúseerubei. ⁹ Ítara lúba lubeíti jayúmuragun. Wáguchi Búngiu le siélubei, inébewalá bíri.

¹⁰ Nübinlá bidáani lun barúeijan ya ubouágu, adügúwalá bugúndan ubouágu quei ladügüniwa bugúndan siélu.

¹¹ Rúba fein buídurügütu woun lun wéyu le ugúñebei,

¹² ferúdnabeí wuríbati le adüga wamáalibeí quei ferúduna wamániña ja adügúbaña wuríbati woun.

¹³ Mígira báwa lun wáburujan lídoun wuríbani, dísegüdarügü báwa luei, ladüga amürü le arúejabei, amürü le Súntibei Gabáfu, amürü le weírigubei lun sun dan. Ítaralá.

¹⁴ Ítara líña lubeíti, ánjaña ferúduna jumá ámu luágu wuríbati le adüga jamáalibei jun, ferúduna lubádün giñe Júguchi Búngiu le siélubei, ¹⁵ ánjein úa ferúduna jumá ámu, úabei giñe ferúduna láani Júguchi Búngiu jifígoun.

Larúfudajan Jesúsu luágu ayúnaruni

¹⁶ Ába laríñagun Jesúsu.

—Jugúya, dánme le jayúnarun, marúfuda jumá lírun igíbu quei jadüga biángua tigíbu, jagía jadügünbalin ítara lun jaríjini gürígia luágu jayúnaruña lan. Ninárün jáu luágu láu lan jadügüni líra íbíja jamáali jafáyeiruája. ¹⁷ Ánjein jugúya, dan le jayúnarun, amúriga jumei jídiburi, chibá jumeíme jigíbu, ¹⁸ mefeén jamámuga gürígia luágu jayúnaruña lan. Júguchirügüba Búngiu le júmabei ñi gefeén luágu jayúnaruña lan, ábameti líchugun jafáyeiruája.

Irisini siélu

(Lc 12.33-34)

¹⁹ ‘Mouñdaragua jumá irisini ya ubouágu le ñí lubei gayára lan jájüchün jamútiri áni gayára ligía lagájüdün ámu luwúyeri irisini, le giñe ñíjin lubei gayára lan jebélurun jíwerutiña lun jíwerujan. ²⁰ Oúndaragua jumá irisini siélu, le ñí lubei siñá lan jájüchün jamútiri, magájüdadi ni cáta, mebélu jagía jíwerutiña íweruja ñi. ²¹ Le ñí lumuti jírisin, ñíñoun giñe janígi.

Lilámpun úgubu

(Lc 11.34-36)

²² Ítara líña bágu quei ában lámpu lun búgubu, ánjein lubeíti buídu lubei bágu, aríja ligía luágun irisini siélu, camá jamuga jarúgoungabei giñe láu sun búgubu, áni buídubei giñe sun bigáburi. ²³ Ánjein sándi lubei bágu, aríja ligía luágun irisini ya ubouágu, camá jamuga lídaanbei lubúriga sun búgubu, áni wuríbabei giñe bigáburi. Ánjein ñúbin larúgounga le bídaanbei lun lubúrigame, ¡luweírin méfuna líwurin lubúriga ligía!

Búngiu lúma seínsu

(Lc 16.13)

²⁴ Úati ni ában gayáraati lesériwidun joun biáma iyúbudirigu, ladüga lísiñeduba ában jádaangiñe lun, liyéreegudáme le ában lun, úaraguabei lúma ában jádaangiñe, líchigame mebéreseni luágu le ában. Siñáti lesériwidúniwa lun Búngiu lúma lun seínsu.

Toúnigi lumútiña Búngiu lirájüñü

(Lc 12.22-31)

²⁵ ‘Naríñajare lubeíti jun, madíjeri jumá luágu cába lan jeíga o cába lan játa lun jabágaridun, ni tuágu anáanguni to lúnboun jadáurunun. ¿Máfunagi gebégitimaati íbágarí sügü láu eígini, gebégi úgubu sügü táu anáanguni? ²⁶ Aríja jumá joun dunúru ja ájamajabaña garábalirugu. mábunagun jáña, malúbajan, mareidun Jamei alúbajani lídan lágei, láu sun líra, rúti Júguchi le siélubei eígini joun. ¡Sarágu gebégitima jumá sügü jáu dunúru! ²⁷ ¿Cáteigi jádaangiñe gayáraabei líchugun bián ugúdi lánwoun lúgubu, ca lan lanárimebei láfaagun luágu?

²⁸ ‘¿Ca uágu jadíjerida tuágu anáanguni? Aríja jumá ída líña lan lawéinamudun fulúri. láu sun mawádigimari lan, madügün ligía gamísa, ²⁹ ni méja urúei Salomón láu sun luwéndegun, mawéndentí meja ladáúragun quei fulúri. ³⁰ Ánjeinti daúguagüda lubálin Búngiu jíduru ítara le ugüñbebei lájücha, jarúgabei yebe lagudúña, ¿gübumésan líderaguajün lougua tafiñen jugúya le? ³¹ Madíjerida jumá lubeíti aríñaga. “¿Cába weíga?” o “¿Cába wáta?” o “¿Cába wadáúra?” ³² Gürígia ja lánigu ubou le, luágu rügüñein buri cátei le jarítagua, ánjein jugúya, níjein jüguchi Búngiu siélu le subúdíjabúbei cátei lan jemégeirubei. ³³ Seríwi jumá lun Búngiu furúmiñe, áluaja jumeí íbágari surúti le áubei lagúndaara, ábame líchuguni sun le jemégeirubei jun. ³⁴ Madíjerida jumá lubeíti luágu jarúga, ladúga barú lumuti gíñe jarúga lídíjeridüna lúmagua. Ságu ában wéyu gíbeti cátei lun.

7

Míchiga jumá jadúnrun ámu (Lc 6.37-38, 41-42)

¹ Ába lasígirun Jesúsu aríñaga joun gürígia wübüwaügügiñe.

—Míchiga jumá jadúnrun ámu, míchugun lámuga gíñe Búngiu jídurunrun, ² ladúga quei ligáburi jíchugun jadúnrun ámu, ítara lúba gíñe líchugun Búngiu jídurunrun, le áubei jamísuraja, láuba gíñe lamísurajaün Búngiu. ³ ¿Ída lubásan gayára lan jaríjini liraúraü ífei le lídaanbei lágu jamúlen áni masándi jumúti durúsu le lídaanbei jágu? ⁴ ¿O ída lúba gayára lan jaríñagun lun jamúlen. “Sagánei liraúraü ífei le lídaanbei bágu,” áni níjein ában durúsu lídan jágu? ⁵ ¡Biángua tigíbu jugúya le! Sagájumei durúsu le lídaanbei jágu furúmiñe, ítara lúba gayára lan jaríjin buídu lun jaságaruni liraúraü ífei le lídaanbei lágu jamúlen.

⁶ ‘Míchiga jumeí arúfudajani luáguti asálbaruni joun gürígia ja gáñitiña, garábagua jáñein juágun quei oúnli lun jágürünün. Míchiga jumeí gíñe arúfudajani ligía le gebégíbei sarágu joun gürígia ja búirujuduátiña, dügúgua jañálin.

Agáamba lumúti Búngiu wamúriajan lúma (Lc 11.9-13, 6.31)

⁷ ‘Jamúriaja lúma Búngiu, ábame líchugun jun, jáluaja, ábame jadárirun, daúnjuma luágu béna, ábame lánjunrenchún jun. ⁸ Ladúga le amúriajati, abjati, le áluguti, daríti, le adaúnjati luágu béna, jurénwati lun.

⁹ ‘¿Níjein funági ában jídaangiñe gayáraati líchugun ában dübü lun lisáni dan le lamúriajan fein lúma? ¹⁰ ¿o líchugun lan ában jéwe lun dan le lamúriajan úduráü lúma? ¹¹ Ánjein lubeíti láu lubei sun wuríba jumá, gíchigaditün cátei buíti joun jisánigu, ígübuméti líchiga Jüguchi Búngiu le siélubei cátei buíti joun ja amúriajatiña lúma!

¹² ‘Súnwandanlá lubeíti jadügün joun ámu quei le jabúseerubei lun jadügüni jun, ladúga ligía lariñagubei lílúruden Moisés túma jalíburun profétagu.

Bürüraüti lubéneri siélu (Lc 13.24)

¹³ ‘Belújuma lídaangiñe béna le бүрүрәүбәи. Béna lúma üma le anügübei gürígia lídoun féridi, tuléburi líña, gabáranouga ñi, áni sarágu jáña ebélurutiña

lídaangiñe. ¹⁴ Ánjeinti béna lúma ũma le anügübei güriǵia lídoun ibágarí le magúmuchaditi, búrüraü líña, murúgua, míbetiñati adáriruti.

Luágu cátei le wadügübei lasúbudirúa cátawa lan

(Lc 6.43-44)

¹⁵ “Tóunigi jumá jawei yéetiña ja aríñagubaña luágu lerérun lan Búngiu jadímureja. Jayábin jun quei mudún bouǵudigiñe jabíti, ánjein múnadagiñe, ítara jáña quei anímaalu gáñitiña. ¹⁶ Jugúya, gayáraabei jasúbudiruniña luágu le jadügübei, malúbajoúntu beíbei lídaangiñe jíyu, ní igo lídaangiñe guríbiyuwa. ¹⁷ Sun lubeíti wéwe le buíti, buíti lin, wéwe le wuríbati, wuríbati lin. ¹⁸ Wéwe le buíti, siñáti wuríba lan lin, wéwe le wuríbati, siñáti giñe buídu lan lin. ¹⁹ Sun wéwe le mabuídunti lin, chaünwati, ába lágudúniwa. ²⁰ Jasúbudirubaña lubeíti yéetiña jagía luágu le jadügübei.

Másubaña ebélura lídoun arúejani le siélubei

(Lc 13.25-27)

²¹ “Máma sun ja aríñagutiña nun. “Nabúreme, Nabúreme,” jebéluruba lídoun arúejani le siélubei,” líña Jesúsu. “Ja rügübaña adügübalin lugúndan Núguchi Búngiu le siélubei ebélura. ²² Dánme lachúlürün wéyu lánina agúseragüdüni, sarágubaña aríñagutiña nun. “Wabúreme, Wabúreme, apúrichijatiwa mejátia luágu bíri, sagá wagía espíritugu wuríbatíña lídan bíri, adüga wagía sarágu miláguru lídan bíri.” ²³ Ábamei naríñagun joun. “Íbidiñegubeiñadün nun, díse jumá nuei, jugúya le adüga jumáalibei le wuríbabei.”

Jawúyeri güriǵia ja agáambubalin lerérun Búngiu

(Lc 6.47-49; Mr 1.22)

²⁴ “Le agáambutina, adügalei le nubeíbei, ítara líña quei ában wügüri gun-faráandati le adügübei lúban ligíbuagu dübü. ²⁵ Ába liábingua júya, ába liñúrún düna, fúgua garábali tuágun múna tugúya, meíguaduntu ladüga luáguñein lan dübü tuágaburi. ²⁶ Ánjeinti le agáambutina, madügün lumúti le nubeíbei, ában wügüri ibídiougua táu ligía, le ábunagubei ligíbuagu ságoun. ²⁷ Ába liábingua júya, iñúra düna, fúgua garábali tuágun múna tugúya, jma lanárimé táburujan!

²⁸ Dan lásurun ladímurejan Jesúsu, jma luweírin janígi güriǵia láu le larúfudajabei! ²⁹ ladüga láu lan ubáfu larúfudaja, máma quei arúfudajatiña lílürudun Moisés.

8

Lareídaguagüdüñ Jesúsu ában gawágu gumeín le mareídaguadibei

(Mr 1.40-45; Lc 5.12-16)

¹ Dan le larárirunbei Jesúsu lueigiñe wübü, sarágu jáña güriǵia afálaruti. ² Ába liábin ában wügüri gawágu gumeín le mareídaguadibei, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguagüdüñina.

³ Ábati lagúurun Jesúsu luágu láu lújabu, aríñageina ligía.

—Buséntina, areídaguagüda numútibu.

Quei laríñagun ítara, ába lareídagun sánditi ligía. ⁴ Ába laríñagun Jesúsu lun.

—Maríñaga beítia ní ca un, ñüdünrügüba arúfudagua búngua lun fádiri, rúbeíme edéweejani le uágubei laríñaga Moisés, lun jaríjini güriǵia luágu areídaguadibu lan.

Lareidaguagüdüni Jesúsu lumúsun ában gumándan Rómána
(Lc 7.1-10)

⁵ Dan le lebélurun Jesúsu lídoun fulásu le giribei Capernaúm, ába liábin ában gumándan Rómána lubároun, ⁶ ába layúmuragun lun ítara.

—Nabúreme, níjein numúsun roun láu sándi le derégüdaü, lúma sarágu gáriti luágu.

⁷ Ába lariñagun Jesúsu lun.

—Neíbuga agáranija lun.

⁸ Ába loúnabun gumándan.

—Nabúreme, madúnatina lun bebélurun núbiñoun, aríñagarügübeí dimúrei, ábame lareidagun numúsun. ⁹ Nariñagubaalin líra ladüga nugúya lábugiñeñadina giñe gumádi le íñutimaati, áni añájein giñe súdaara lábugiñe nagúmadijan. Dan le nariñagun lun ában jádaangiñe lun lídin, ñüdünti, dan le nariñagun lun ában lun liábin, ñübinti, dan le nariñagun lun numúsun lun ladügün furúmieguarügü cátei, adüga lumúti. Ítara lúba, luágu berérun mósu lídin sándi lueí numúsun.

¹⁰ Dan le lagáambunbalin Jesúsu le lariñagubei gumándan ligía ába laweíridun lanígi, ába lariñagun joun ja afálarubalin.

—Ninárün jáu luágu madárigidina lan wügüri weíri tafiñen ni jádan numútuniña Israelítagu quei wügüri le. ¹¹ Nariñajare jun luágu sarágujaba lan já meja ibídiñejabubaña lun Búngiu ñübintiña lueigiñe oubau le ñígiñe lubei laboucha wéyu, jáma le ñígiñe lubei lálüda, ábame jañúurun eíga lúma Abrahám, Isác lúma Jacób lídan arúejani le lánina siélu. ¹² Ánjeinti já yebe lúnbaña lídan jamá arúejani ligía jaságarúba bougudín, ábame jádarúniwa lídoun luweírin-ágei lubúriga, ábame jayájuaian, ábame lacúnrinjan jári le luweírin jagárigu.

¹³ Ába lariñagun Jesúsu lun gumándan ligía.

—Beíba búbiñoun, le uágubei baffíñera, ladügüba bun.

Ába lareidagun músu ligía lídan óra ligía.

Lareidaguagüdünun Jesúsu límenidi Pédro
(Mr 1.29-31; Lc 4.38-39)

¹⁴ Ába lídin Jesúsu lúbiñe Pédro, ába ladárirunun límenidi Pédro roun láu abíruaü. ¹⁵ Ába lagúurun luágu tújabu, ába lagídarun abíruaü tueí, ába tásaarun, ába tagúmeserun esériwidaña.

Lareidaguagüdüin Jesúsu sarágu sánditiña
(Mr 1.32-34; Lc 4.40-41)

¹⁶ Dan le lagúñedunbei, ába janügün sarágu güri-gia ja gawágutiña espíritugu wuríbatiña lun Jesúsu, ába laságajaniña espíritugu wuríbatiña jagía jawei láurügü ában dimúrei, areidaguagüda láña sun ja sándibaña. ¹⁷ Lasúseredunbei sun le lun lagúnfulirun lé meja uágubei ladímureja proféta Isaías dan le lariñagunbei luágu Jesúsu. “Barü lumuti wadébilin, gidálei wasándigu.”

Já yebe abúseerubaña jafálaruni Jesúsu
(Lc 9.57-62)

¹⁸ Dan le laríjin Jesúsu luágu sarágu jáña lan güri-gia geyégu láu, ába líchugun dimúrei lun jájiñuragun ligía jáma lání disípulugu loubáfurugun dúna. ¹⁹ Ába layárafadun ában arúfudajati lilúrudun Moisés lun Jesúsu, ába lariñagun lun.

—Maésturu, buséntina nafálarunibu le ñíjin lumúti bídin.

²⁰ Ába loúnabuni Jesúsu.

—Darítiña gasígamu júyu lun jaganouñ ñi, gádibutiña giñe dunúru, ánjeinti áu le Wügüri Garaüwarügüti, madáritina ni jalába lan nabálachagüdei nichügü.

²¹ Laríñaga ában jádaangiñe láni disípulugu lun.

—Nabúreme, buséntina nafálarunibu, lárigiñeme loúnwen nóguchi, buná neíme, ábame nafálarunibu.

²² Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburu.

Lagálumaruni Jesúsu garábali lúma lugúdi barána
(Mr 4.35-41; Lc 8.22-25)

²³ Ába ladinun Jesúsu tídon ugúnein, ába jóudin láni disípulugu lúma. ²⁴ Sódini ába láfuragun ában garábali jéreti, ába lebelujan lugúdi barána tídon ugúnein. Larúmuguñati Jesúsu. ²⁵ Ába jagágudajani láni disípulugu, ába jariñagun lun.

—¡Wabúreme, séfu báwa! ¡Wadíbiragua!

²⁶ Ába loúnabuniña.

—¿Cásan uágu janúfudeda? ¡Loúgua tafíñen jugúya le!

Ába lásaarun, ába ladeínjan lun garábali lúma barána, ába lagálumadun. ²⁷ Ába laweíridun janígi, ába jariñagun.

—¿Cáteisan wügüri le, agáamba lubálin garábali lúma barána?

Laságarun Jesúsu espíritugu wuríbatiña jádaangiñe bián wügüriña Gadárana
(Mr 5.1-20; Lc 8.26-39)

²⁸ Dan le lachülürün Jesúsu loubáfurugu dúna, jageíroun Gadárana, ába jáfuridun bián wügüriña lídaangiñe buri umúajaü achigíti luágu dübü, ába jayábin luágun. Biángubei jagía, jáuñanu espíritugu wuríbatiña áni janárimetiti jagáñi darí lun siñá lan jásügürün gürígia lídaangiñe úma ligía. ²⁹ Ábati jagúarajan ítara.

—¿Cásan uágu bemétera wámoun, Jesúsu Liraü Búngiu? ¿Biábiña asúfuriragüdwara lubáragiñe dan le lánina asúfuriruni?

³⁰ Ñiñanu sarágu büíruju eíga madíse ñígiñe, ³¹ ába jayúmuragun espíritugu wuríbatiña ja lun Jesúsu, jariñaga lun.

—Ánjawa baságara, ígirabá lun webélurun jádoun büíruju ja.

³² Ába laríñagun Jesúsu joun.

—¡Jeíbati jádoun!

Ába jáfuridun espíritugu wuríbatiña jagía jádaangiñe wügüriña jagía, ába jebélurun jádoun büíruju, ába jáguragun büíruju jagía jóungua lueígiñe ában gudúungu, ába jáburujan dúnarugun, ába jañáradagun.

³³ Ába janúfudedagun ja oúnigirubaliña büíruju, ába jeíbaagun, jachülün aüdübü, ába jabájüdaguni le asúseredubei joun büíruju lúma joun wügüriña já buga jáubaña espíritugu wuríbatiña. ³⁴ Ábati jayábin sun lílana fulásu ligía lúmoun Jesúsu, ába jayúmuragun lun lun láfuridun jageíragiñe.

9

Lareidaguagüdüñ Jesúsu ában wügüri derégüdaali
(Mr 2.1-12; Lc 5.17-26)

¹ Ábati ladinun Jesúsu tídon ugúnein tugúya, ába lánjiñuragun loubáfurugun dúna, ába lachülürün lageíroun. ² Ába janügün ában wügüri derégüdaali lun,

roun tídan lubárari. Dan le laríjnbalin Jesúsu luweírin jafíñen, ába laríñagun lun sánditi ligía.

—Ragüba gurásu, niraü, ferúdunawati bifígoun.

³ Níñanuti jádaangiñe arúfudajatiña lilúrudun Moisés, aríñagutiña jóungurügü. “Lanábaguñeigan wügüri le Búngiu láu dimúrei le laríñagubei.”

⁴ Queíti subúdi lubálin Jesúsu le uágubei jasáminara, ába laríñagun joun.
 —¿Cásan uágu luríbanbei jisáminan ítara? ⁵ ¿Cátimasan ménreengúnbei laríñawagúniwa. “Ferúdunawati bifígoun”, ódi “Sarába, beíbuga”? ⁶ Narúfudaaliti jun luágu gabáfu nan, áu le Wügüri Garaüwarügüti, lun ferúduna nan figou.

Ába laríñagun lun sánditi ligía.

—Sarába, budáboun bubárari, beíba búbiñoun.

⁷ Ába lásaarun sánditi ligía, ába lídin lúbiñoun. ⁸ Dan le jaríjnbalin gürígia cátei le, ába laweíridun janígi, ába jadímurejan buíti luágu Búngiu luágu líchuguni ubáfu le joun wügüriña.

Lagúarun Jesúsu lun Matéo lun lánime disípulu

(Mr 2.13-17; Lc 5.27-32)

⁹ Ába lídin Jesúsu ñígiñe, ába laríjinina, áu le gíribei Matéo, le abürüjbarun líburu to. Agúburajatina meja liseínsuna gumádi, ñun níña lídan nubára lánina agúburajani wéyu ligía dán le lásügürünbei Jesúsu ñígiñe. Ába laríñagun nun.

—Falábana, queímoun núma queísi náni disípulu.

Ába násaarun, ába nafálaruni.

¹⁰ Lárigiñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gafígountiña eíga lúma úara jáma láni disípulugu. ¹¹ Dánti le jaríjini fariséogu cátei le, ába jaríñagun joun láni Jesúsu disípulugu.

—¿Ída liñásan leíginbei jumáesturun jáma agúburajatiña liseínsuna gumádi lúma jáma ámu gafígountiña?

¹² Ába lagáambuni Jesúsu, ába laríñagun joun.

—Ja magádiebaña mabúseeruntiña surúsia, ja sándibaña, jagía busénbaña surúsia. ¹³ Furéndeí jumeí ca lan laníchigubei le uágubei laríñaga Búngiu tídan Lerérun. “Buséntina lun gudémejabu jumá, máma lun jadágaragüdün anímaalu nun.” Máma niábiña áluajaña ja magádiebaña ligíbugiñe Búngiu, niábiña áluajaña gafígountiña lun jasáansiruni ligáburi jóuserun.

Jálügüdüni Jesúsu libügürü ayúnaruni

(Mr 2.18-22; Lc 5.33-39)

¹⁴ Abati jayábin ja láni Juan le abásteragüdajabei disípulugu, ába jaríñagun lun Jesúsu.

—¿Ánsan wagía jáma fariséogu ayúnara wabeí sarágu, ánjaña báni disípulugu mayúnaruntiña?

¹⁵ Ába líchuguni Jesúsu jémpulu le joun luágu iséri larúfudajan lúma binádu, laríñaga.

—¿Gayáraati funági jíruñu jamá ja amísurajóubaña lídoun ában maríei dan le niján lan adári jáma ñi? Lachúlürüba wéyu lun lúadun adári jáma, ligíaalime jayúnarun.

¹⁶ Siñáti táfadajoún gamísa ñulújaru táu murúsun to derégiru ladúga dánme le tacháwaragun to derégiruboun ábame tajeíridagun to ñulújaruboun, ábatimámeti laweíridun jeíriti. ¹⁷ Siñáti giñe léserúniwa bínu le isérigili lídoun guéru le binádujali, ánjein adügüwa ítara, ábame lafaüñchün guéru dánme le liñúrun

bínu, féridiwa ligíameti gúeru, féridiwa bínu. Ligía lúnti lubéi léserúniwa bínu iséri lídoun guéru iséri, ítara lúba lesériwidun biángubei.

Liraiú Jáiro túma würi to agúurubarun lanáangun Jesúsu

(Mr 5.21-43; Lc 8.40-56)

¹⁸ Dan ñíñein lan Jesúsu arúfudajei sún buri cátei le, ligía liábin ában ábuti jádaangiñe juríu, ába lájuduragun ligíbugiñe, ába laríñagun lun.

—Sun líña toúnwen nisáani, ánjabu ñúdün lun bíchuguni bújabu tuágu, táguyuguba.

¹⁹ Ába lásaarun Jesúsu, ába lídin lúma ñi jáma láni disípulugu. ²⁰ Ñíñounti ában würi úmada sánditu, dúusu irúmu táu láu lésejan jitaü tídaangiñe, ába tayárafadun lun Jesúsu lanágangiñe, ába tagúurun luágu táru lanáangun, ²¹ tariñaga túnguarügü. “Láurügü nagúurun tuágu lanáangun nareídaguba.”

²² Ába lagáraragun Jesúsu, ába laríjinun, ába laríñagun tun.

—Ragúba gurásu niraü, areídaguaadibu ladúga baffínen.

Lúmagiñe óra ligía ába tareídagun.

²³ Dan le lachúlürün Jesúsu lúbiñoun buga ábuti ligía, dan le laríjiniña íñaajatiña aráanseña lun ábanajani, añája gürígia areíncha, ²⁴ ába laríñagun joun.

—Furíjuma yágiñe, móunwengiru irájü to, tarúmuuguña.

Ába jéjerajan láu. ²⁵ Dan le furígüda láaña sun gürígia, ába lebélorun, ába lárügüdüni tújabu irájü tugúya, ába tásaarun. ²⁶ Ába labúruchagun luágu le asúseredubei lídan sun fulásu ligía.

Lareídaguagüdün Jesúsu bián maríjintiña

²⁷ Dan láfuridun Jesúsu ñígiñe, ába jóudin bián wügüríña maríjintiña lárigi, agúarajeina ítara.

—¡Gudéme wamá bun, amürü le ladúgawagun David!

²⁸ Dan lebélorun Jesúsu múnadoun, ába jachúlürün maríjintiña jagía lúmoun, ába laríñagun joun.

—¿Afiñetün luágu gayára lan nareídaguagüdünün?

Ába jaríñagun.

—Ánja, afiñetiwa, Wabúreme.

²⁹ Ába lagúuruni Jesúsu jágu, ába laríñagun joun.

—Ítaralá quei ligáburu jafiñen.

³⁰ Ába léfegechun jágu, ába léredun Jesúsu jawágu lun jóuchun lun masúbudirúniwa lan luágu ligía lan agáranijabei joun.

³¹ Quei jáfuridun ñígiñe, ába jabájüdaguni le ladúgübei Jesúsu lídan sun fulásu geyégua láu.

Lareídaguagüdün Jesúsu ában meréngaditi

³² Dan le áfurideina jamá, ligía jayábin fiú gürígia láu ában wügürí meréngaditi, gawáguti ában espíritu wuríbati, ába jayábin láu lun Jesúsu.

³³ Lárigiñe laságaruni Jesúsu espíritu wuríbati ligía luei meréngaditi ligía, ába lagúmeserun adímureja. Ába laweíridun janígi gürígia, ába jaríñagun.

—Maríjiniñajági diwa líbe le jageíra Israelítagu.

³⁴ Jaríñagaídan sun fulásu geyégua ti fariséogu luágu láu lan lubáfu Máfia le jábuti espíritugu wuríbatiña laságaja Jesúsu espíritugu wuríbatiña.

Lugúdemejabu Jesúsu joun gürígia

³⁵ Eíbuga lumúti meja Jesúsu sun fulásu arúfudajeina tídan jalígílisin juríu, apúrichijeí ugánu buíti luáguti arúejiani le lánina siélu, areídaguagüdeina sun luwúyeri sándi lúma gáriti. ³⁶ Dan laríjiniña gürígia, ába jagúdemedagun lun, ladúga nidíjeri jamá, magúraasun jagía, camá mudún ja moúniritiña. ³⁷ Ába laríñagun joun láni disípulugu jabúgürü gürígia jagía.

—Sarágu jáña gürígia buséntiña jagáambuni ugánu luáguti asálbaruni, ítara jáña quei nádü lun lalúbajoún, áni loúguatiña ñadágimeintiña. ³⁸ Lúnti lubeíti jamúriajan lúma Labúreme nádü lun loúnajan ñadágimeintiña lun japúrichijan joun.

10

Láni Jesúsu dúusu disípulugu (Mr 3.13-19; Lc 6.12-16)

¹ Ába lagúarun Jesúsu joun dúusu láni disípulugu, ába líchugun ubáfu joun lun gayára lan jaságajan espíritugu wuríbatíña jawei gürígia lúma lun jareídaguagüdün sun luwúyeri sándi lúma gáriti. ² Niján jíri dúusu láni Jesúsu disípulugu jagía. Furúmiñeti, Simón le méme gíribei Pédro, lúma Andrés le lamúlen, Jacóbo lúma Juan le lamúlen—lirájüñü Zebedéo, ³ Felipe, Bartolomé, Tomás, núma, áu Matéo le agúburajabei meja liseínsuna gumádi, Jacóbo le liraü Álfeo, Lébeo, le méme gíribei Tadéo, ⁴ Simón—ában meja wügüri áfaaguti lun jawáanserun juríu, lúma Júdas Iscarióte, le alúgurubalin Jesúsu.

Loúnajaniña Jesúsu disípulugu apúrichija (Mr 6.7-13; Lc 9.1-6)

⁵ Dan loúnajabaliña Jesúsu dúusu ja apúrichija, ába lariñagun joun ítara. —Mídin jumá le ñí jamuti ja mámabaña juríu, mebélu jugúyame lídoun buri fulásu le láni Samária, ⁶ jabúgürülá gürígia féridijaña ja Israelítagu jídin. ⁷ Jeíba, apúrichijeina luágu yaráfaaali lan larúeijan Búngiu. ⁸ Areídaguagüda jumáña ja gawágutiña gumeín luágu jára, jáma ja gawágutiña ámu luwúyeri sándi, sarágüda jumá jílaña, sagá jumaña espíritugu wuríbatíña. Mafáyeijántün lun jibíjini ubáfu le, magúburaja jumá gíñe luágu.

⁹ Manúga jumá seínsu, ¹⁰ manügün jugúyame lágei ni cáta. Ábanrügütá simísi janúga, manügün jugúyame sabádu ni bádu, ladúga le ñadágimeinbei garíchatí lun leígin lídaangiñe luwádigimari.

¹¹ Dánme le jachülürün lídoun ában ubúruugu o ában lan liraúraü fulásu, ábame jálugun gürígia ja ánjatiña lun jerésibirunün ñí, ábame jeréderun jáma jábiñe darí jídin. ¹² Dánme jebélurun tídoun ában múna, ábame jabúsurun, ayúmuragueina magádiei jawágu tílana múna tugúya. ¹³ Ánjaün jerésibira tílana múna tugúya, ígira jumei jabúsurun jáma, ánjaün merésibirun jamá, giríbugüda jumei busúguaü ligía lun úa lan magádiei joun. ¹⁴ Ánjaünti merésibirun jamá, mája jagía jagáambunün, ábame jáfuridun tídaangiñe múna tugúya o lídaangiñe lan fulásu ligía, ábame jáfuruduni calíqui lueígiñe jugúdi lun jarúfuduni luágu mabuídun lan jagáburi gürígia jagía, ígira jumáña quei jadáriragun jotúnga. ¹⁵ Ninárün jáu luágu dánme lan le lachülürün wéyu lánina agúseruni, weírítimaabei jasúfurirun lílana fulásu ligía sügü láu jasúfurirun lílana Sodóma lúma Gomórra.

Eíbaajoúni le lúnbei jasúfuriruni láni Jesúsu disípulugu

16 ‘Nounajaadüntia quei mudún jagánaguóun anímaalu gáñitiña. Aráanseñu jumá lubeíti itara quei jéwe, áni itara jumá quei únjun madügünga wuríbani. 17 Tóunigi jumá ladúga j juríu. 18 Janügüwaba jagíbugiñoun gumádimatiña lúma jagíbugiñoun urúeigu lueígiñe jesériwidun nun, itara lúba gayára lan jadímurejan nuágu jagíbugiñe, lúma jagíbugiñe ja mámabaña juríu. 19 Dánme le jedéregériuniwa joun lúrudugu, májuchüra jumá luágu cába lan jariñaga o ida lúba lan jariñaguni, ladúga dánme lachülürün óra lun jadímurejan, lichugubei Búngiu le lúnbei jariñaguni jun. 20 Mámaba jugúya adímureja, láni Júguchi Búngiu Espíritu, ligiaba adímureja jídaangiñe.

21 ‘Jalúgurubaña wügüriña jabíriña guánarü lun jafarún jilágubei, alúgura jamáñame agübürigu jasáanigu, garábagua jagíame isáanigu jawágun jagübürigu lun jafaragudüniña. 22 Jeyéregudüba lun sun ubou nueígiñe, áni le derégüdaguati darí lúmoun lagúmuchun libágari, lebelüruba siélun. 23 Dánme le jeibaajotún lídan ában fulásu, ábame janúrajan lídoun ámu, ninárün jáu, niábinyaba, áu le Wügüri Garaüwarügüti, lubáragiñe jeíbuguni sún buri jabúrugute Israelítagu.

24 ‘Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti giñe jasúfurirun. 25 Lúnti gúndan lan disípulu láu lachülürün ítarada quei lumáesturun, lúma músu quei liyúbudiri. Ánjein aríñawagúa lubei nuágu luágu jábutiná máfianu, gúbume janábawagua ja afálarubalina.

Cába lan ueí lanífudedúa

(Lc 12.2-9)

26 ‘Ligía manúfudeda jumá lubei jawei gürígia,’ líña Jesúsu joun láni disípulugu lubáragiñe lounajaniña apúrichija. ‘Úati cátei darúguati láu lun machúlaagunbei lan, úa ni cáta le arámudagúati lun masúbudirünwabei lan. 27 Le naríñagubei jun lídan lubúriga aríñaga jumei lídan larúgounga, le naríñagubei jun ibídiñoun joun ámu, wágua jumei íñugiñe tibíti múna. 28 Manúfudeda jumá jawei ja gayáraabei jafaruni úgubu jilágubei áni siñáti jafarunun uwáni, Búngiu le gayáraabei lasúfuriragüdüni úgubu túma uwáni máfiougati lun sun dan, ligía lúnbei janífudedun lueí.

29 ‘¿Malúgurúntiña funági bián jarájüñü dunúru luágu ában liraüraü seínsu? Áni máburujantu ni ában jádaangiñe múarugun ánjein mabúseerun lubei Júguchi Búngiu. 30 Ásta ídiburi le jábulugubei, abájüdüwati ában ában. 31 Manúfude jumá lubeíti, gebégitün sügü jáu dunúru.

Ja mayéedagúnbaña láu Jesúsu jagíbugiñe gürígia

(Lc 12.8-9)

32 ‘Sun ja arúfudagutiña jóungua jagíbugiñe gürígia luágu númagiñeñánu lan, naríñaguba giñe ligíbugiñe Núguchi Búngiu le siélubei luágu nánigu jamá. 33 Ja ayéedagutiña náu jagíbugiñe gürígia, nayéedaguba giñe jáu ligíbugiñe Núguchi Búngiu le siélubei.

Le busénbei lun lafálaruni Jesúsu

(Lc 12.51-53, 14.26-27)

34 ‘Marítagua jumátia luágu niábiña lan lúnrügü níchugun gáluma ubóuagu, máma niábiña íchiga gáluma, niábiña íchiga wuríbu. 35 Láu niábin, jafánreinraguba ja maffínebaña nuágu jáma ja afíñeña nuágu, lawúrribujaba wügüri lúma lúguchi, isáani túma túguchu, ídiñu túma tágürü, 36 lagáganiraguba cáda ában jáma lidújeñu.

³⁷ Le jínsiñejabuti lun lúguchi o lúguchu sügü láu nísíñe lun, madüna lumúti nánigu lan, le jínsiñejabuti joun lirájüñü sügü láu nísíñe lun, madüna lumúti gíñe nánigu lan. ³⁸ Le mawándunti asúfuriruni líbe lasúfurirúniwa luágu gurúwa lun lafálarunina, madüna lumúti nánigu lan. ³⁹ Le busénbei leséfuragun lúngua ya ubouágu leféri-dirubei ibágari le magúm-muchadibei siélu, ánjein le ánjabei leféri-diragun lúngua ya ubouágu nueíñe, libíjubei ibágari magúm-muchaditi siélu.

Ja lúnbaña jerésibiruni jafáyeiruaja lúmagiñe Búngiu

(Mr 9.41)

⁴⁰ Le erésibirutün resibi lumútina, le erésibirutina resíbi lumúti le ouñajabalina. ⁴¹ Le erésibiruti ában proféta ladüga liábin láu líri Búngiu, lerésibirubei afáyeiruajaü le libíjubei ában proféta, le erésibiruti ában wügüri buíti ladüga lubuidun, lerésibirubei afáyeiruajaü le lerésibirubei ában wügüri buíti. ⁴² Furúmieguarügü le íchuguti ában wéru dúna dílíti lun ában jádaangiñe ünabugutiña ja ladüga nánigu jamá, libíjuba lafáyeiruaja lúmagiñe Búngiu.

11

Ja loúnajabaña Juan le abásteragüdjabei adímureja lúma Jesúsu

(Lc 7.18-35)

¹ Dan le lásurunbei lariñaguni Jesúsu le lúnbei jadügüni láni dísi-pulugu, ába lídin ñígiñe lun larúfudajan, apúrichija ligíame lídan buri fulásu geyégua láu ubúrugü le Capernaúm.

² Dan ligía, furísunrugüñein Juan, ába lagáambun luágu sun le ladügübei Crístu. ³ Ába loúnajan biáma jádaangiñe láni dísi-pulugu aríjei Jesúsu lun jalügüdüni ítara.

—¿Amürü Crístubei le lúnbei liábin ódi lúnti wagúrabajan ámu?

⁴ Ába lariñagun Jesúsu joun.

—Jeiba jariñageime le jaríjubei lúma le jagáambubei lun Juan. ⁵ Jabájüdagüame lun luágu aríjaaña lan já meja maríjinbaña, eíbuga já meja meíbugunbaña, areídagua jagía já meja gawágubaña gumeín luágu jára, agáamba já meja magáambubaña, sará jagía jiláaña, apúrichijoua luágu ugánu buíti le lánina asálbaruni joun gudémetiña. ⁶ Áni fuleiseiwati le meféri-dirunbalin lafiñen nuágu.

⁷ Dan le jóudin, ába lagúmeserun Jesúsu adímureja joun güri-gia luágu Juan, ába lariñagun.

—¿Cásan jídinbei meja aríja lídan fulásu le mageírawati? ¿Ában wügüri le medéraguagüdünti laritagun queísi ában mabúru le lánjingichun garábali?

⁸ Ánjein máma lubei líña, ¿cáti jídinbei aríja? ¿Ában wügüri wéndeti ladáüragun? Subúsiti jun luágu ja lan wéndebaña adáüragun, tídaañanu lan jában urúeigu.

⁹ ¿Cáteiti jídinbei aríja? ¿Ában proféta? Ánja, ligía, áni ában wügüri weíriguti sügü láu ában proféta Juan. ¹⁰ Ligía le uágubei tariñaga Lerérun Búngiu.

Noúnajañein nouñagüle bubáragiñe, lun laráansejani üma bubá.

¹¹ Ninárün jáu, jádan sun güri-gia, úgali ni ában weíriguti lueí Juan le abásteragüdjabei, láu sun líra, le ünabutimaabei lídan arúejiani le siélubei weíritimaati luei le anügarügübalin ugánu luágu arúejiani ligía.

¹² Lúmagiñe dan le liábinbei Juan le abásteragüdjabei darí lúmoun dan le, murúgu jáña güri-gia áluga jebélurun lídoun larúejian Búngiu. Ja ebélurubaña, ragü jamuti jabára ñi queísi ában cátei le gebégiti sarágu. ¹³ Lilúrudun Moisés

jáma sun profétagu, adímurejatiñá meja luágu larúeijan Búngiu, láu liábin Juan, ába lagúmeserun jerérun profétagu jagía luágu larúeijan Búngiu agúnfulira. ¹⁴ Ánjeinti busén jubei jafiñerun, Juan ligía proféta Elías lé meja lúnbei liábin lubáragiñe liábin arúeijani ligía. ¹⁵ Ja garigeirugubaña lun jagáambun, agáamba jamá.

¹⁶ ‘¿Cábasan úma núaradaguágúdaña gürígia ja lánina dan le? Magúndaatiña ni ca áu, ítara jáña quei irájüñü ja añúurubaña adíbirija mágidirugu, ába jagúarajan joun jíbirigu ítara. ¹⁷ “Íñaajatiwa fídu jun, mabínajantün, erémuja wagía urému jírutu jun, mayájuntün.” ¹⁸ Ladüga liábin Juan meigin líña buídu quei leigin furúmieguarügü, mátun, ába jariñagun luágu níjein lan espíritu wuribati lídan. ¹⁹ Lárigiñe, ába niábin, áu le Wügüri Garaüwarügüti, jou áu quei leigin furúmieguarügü, gurá, ába jariñagun luágu geigadi nan, gátadi, jamáda áu gafígountiña jáma agúburajatiña liseínsuna gumádi. Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

*Lílana buri fulásu ja magáambadibaña
(Lc 10.13-15)*

²⁰ Ábati lagúmeserun Jesúsu adeínja joun gürígia lídan fulásu buri le ñi lubei meja ladügei líbe-ágei láni miláguru, ladüga masáansirun jamágili lan jóuserun. Ába lariñagun.

²¹ —¡Fugiábu jugúya Corazínna! ¡Fugiábu jugúya Betsáidana! Lun jamúga lídan lan ubúruge le giríbei Tíro lúma Sidón ladügüwa miláguru buri le adügübei jagánagua, binárü jamúga lasáansiragua jagáburi lílana, ába jamúga jarúfuduni láu jadáuragun lúdu lúma balígi. ²² Naríñajare jun luágu dánme lan lachülürün wéyu lánina agúseraguni, weíritimaabei jabeichún sügü jáu ja Tírobaña jáma ja Sidónbaña. ²³ Amürüti ubúruge le Capernaúm, ¿jarítaguatibu luágu weírigubadibu lan queisi siélu? Maweírigünbadibu ítara quei maweírigun lan máfiougati. Ladüga lun jamúga lídan lan ubúruge Sodóma ladügüwa miláguru le adügübei bidan, níjeingua jamúga fulásu ligía lúmoun dan le. ²⁴ Naríñajare jun luágu lídan lánme wéyu lánina agúseraguni, weíritimaabei jabeichún sügü jáu Sodómana.

*Jigoúgu lun Jesúsu, eméraqua jumámuga
(Lc 10.21-22)*

²⁵ Lídan dan ligía, ába lariñagun Jesúsu lun Búngiu.

—Adímurejatina buíti buágu, Núguchi le Labúremebei siélu lúma ubou, ladüga barámuduni buri cátei le jawei chu táu jáma gunfaráandatiña, ába barúfuduni joun ja mafúnrendeirungiñábaña queisi irájüñü. ²⁶ Ánja, Núguchi, ladüga ítara líña lan babúseeruni.

²⁷ Derége láali Núguchi sun cátei nun. Ibídiñeti Búngiu Irájü ni ca un buídu buídu lueídügüya lun Búngiu Úguchili, ibídiñeti gíñe Búngiu Úguchili ni ca un buídu buídu lueídügüya lun Búngiu Irájü jáma ja únbaña labúseera Búngiu Irájü lasúbudiragüdüni. ²⁸ Jigoúgu númoun, sun jugúya ja bucháañabaña uágu lárigei juwádigimari lúma lijürü janügün, eméraquagüda námugañ. ²⁹ Resibi jumei narúfudajan, furéndeí jugúyame númagiñe, láu gagúraasun nan, ñulú tugúya nanígi, ábame jadárirun eméraquni tun juwáni. ³⁰ Ménreengunti lun jesériwidun nun, juáliti gíñe anügüni le níchugubei jun lun janügüni.

12

Játúnjan disípulugu türígu lídan wéyu le eméraaguagülei
(Mr 2.23-28; Lc 6.1-5)

¹ Luágu ában wéyu le eméraaguagülei eíbugeina líña Jesúsu jáma láni disípulugu labádinagua nádü. Ába jalámachun láni disípulugu, ába játúnjan lílewe türígu, ába jeígini líla. ² Dan le jaríjini fariséogu cátei le, ába jaríñagun lun Jesúsu.

—Añájatia báni disípulugu adüga wadágimanu le mouñ lumuti ladügün lídan wéyu le eméraaguagülei.

³ Ába laríñagun joun.

—¿Malíjangidün luágu lé meja ladügübei David luágu ában dan, dan le lálámachunbei, ligía jáma ja úarabaña lúma? ⁴ Ába lebélorun tídoun lúban Búngiu, ába leígin tídaangiñe fein to sagraúboun to moun luboún yebe leíginun, ni ligía ni ja úarabaña lúma, fádírígu rügüñanu lun jeíginun fein tugúya segün lilúrudun Moisés, áni mámati figóu le ladügübei David ligíbugiñe Búngiu. ⁵ ¿Ódi malíjangidün lídan lilúrudun Moisés luágu ñadágimein jamá fádírígu tídan lúban Búngiu lídan wéyu le eméraaguagülei áni máma figóu? ⁶ Nariñajare jun luágu njein lan ában weíríguti sügü táu lúban Búngiu ya, áu. ⁷ Jugúya, úagili gunfaráanda jumáni le laríñagubei Búngiu tídan Lerérun. “Jímein numúti lun gudémejabu jumá sügü láu jadágaragüdün anímaalu nun.” Lun jamúga gunfaráanda jumáni, madímurejaantün jamúga wuríbati jawágu gürígia ja madügünbaña ni cáta wuríbati. ⁸ Gabáfutina giñe, áu le Wügüri Garaúwarügüti, lun naríñagun cába lan gayára ladügüniwa lídan wéyu le eméraaguagülei.

Wügüri le jiláalíbei ában lújabu
(Mr 3.1-6; Lc 6.6-11)

⁹ Ába lídin Jesúsu ñígiñe, ába lebélorun tídoun jalígílisin juríu. ¹⁰ Ñíñein ában wügüri jiláali ában lújabu, queíti busén jamá fariséogu jáma arúfudajatiña lilúrudun Moisés jadárirun lichára Jesúsu, ába jaríñagun lun.

—¿Gayáraatisan lagáranijoun lun ában sánditi lídan wéyu le eméraaguagülei?

¹¹ Ába laríñagun Jesúsu joun.

—¿Ca jídaangiñe, ánjein galügün lubei ában mudún, ába teíguadun lídoun ában wélu wéyu le eméraaguagülei, lun mídinbei lan aságaroun? ¹² ¡Ma gebégitimaati ában wügüri sügü táu ában mudún! Gayáraati lubeiti ladügün buíti lídan wéyu le eméraaguagülei.

¹³ Ába laríñagun lun wügüri ligía.

—Tulébei bújabu.

Dan le látuleruni, ába lareídagun quei le ában. ¹⁴ Ába jáfuridunga fariséogu, ába jagúmeserun áluaja ída lúba lan jáfaruni Jesúsu jilágubei.

Lé meja laríñagubei Isaías luágu Jesúsu

¹⁵ Dan lasúbudirunbalin Jesúsu cátei le, ába lídin ñígiñe, ába jafálaruni sarágu gürígia, ába lareídaguagüdúniña sun sánditiña. ¹⁶ Ábaja laríñagun joun lun maríñagun jamáni cáteíñein lan. ¹⁷ Lasúseredunbei líra lun lagúnfulirun lé meja laríñagubei proféta Isaías.

¹⁸ Niján numútun le nanúadirubei lun lesériwidun nun, le jínsiñebei nun, le áubei nagúndaara, líña Búngiu.
Níchugubei náni Espiritu luágu,

ábame larúfudajani joun ja mámabaña juríu ída lúba lan gayára lan júaradun nigíbugiñe.

¹⁹ Mageíndagunbei, magúaragun, mareínjabei úmada.

²⁰ Gudémejabubei joun gürígia ja gudémebaña queísi ában mabúru le barúguaali, lúma joun ja débilibaña lídan jafiñen queísi ában lámpu le ñegúmemeeli.

Ítara méme lúba daríme adúga láali larúeijan le úaraguabei.

²¹ Ábame jíchuguni ja mámabaña juríu jeménigi luágu.

*Lariñawagún luágu lubáfu lan Máfia lúmabei Jesúsu
(Mr 3.19-30; Lc 11.14-23, 12.10)*

²² Ábati lanügúniwa ában wügüri lun Jesúsu, marijín líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába larijín, adímureja ligía. ²³ Ába laweíridun janígi sun ja ñíbaña, ába jariñagun.

—¿Niján funásan ladügawagunbei David?

²⁴ Dan le jagáambunbalin fariséogu cátei le, ába jariñagun.

—Wügüri le, láu lubáfu Beelzebú, le Máfia, le jábuti espíritugu wuríbatíña laságajaña.

²⁵ Quei subúdi láani Jesúsu le jariñagubei, ába lariñagun joun.

—Furúmieguaarügü arúejiani le afánreinraguti lun jageíndagun jámagua, lagünrinchaguba, ánjaña giñe afáreinragua lílana ában ubúru o ában lan familia ladúga wuríbu, siñábei jadúrarun. ²⁶ Ítara líña giñéti, ánjein laságara Máfia máfia guánarügü, ligía guánarügü afánreinragubei, áni ¿ída lubáti ladúrarun lubáfu ítara? ²⁷ Jugúya, aríñagatún luágu láu lan lubáfu Beelzebú, o Máfia, naságaja espíritugu wuríbatíña, ánjein ítara líña lubei, ¿cáti íchugubei ubáfu joun ja jánigu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulíeigua jumá. ²⁸ Au, láu lubáfu láni Búngiu Espíritu naságaja espíritugu wuríbatíña. Arúfuda lumúti líra luágu chúlújali lan larúeijan Búngiu jídoun.

²⁹ ¿Ída lubági gayára lan lebéllurun ában gürígia lúbiñoun ában wügüri jéreti lun lanügüni lílaga ánjein magúragun lan furúmiñe? Ítara rügüñein lun gayára lan lanügüni lílaga.

³⁰ Le mámabei númagiñe, náganiñein, le míderagun lumútina, güríngua lumúti le nadügübei.

³¹ Jugúya aríñagatún luágu láu lan lubáfu Máfia naságaja espíritugu wuríbatíña, áni láu lubáfu Sífiri Sándu naságajaña. Ligía nariñagunbei jun luágu gayára lan ferúdnawa lan sun figou lúma sun wuríbati le jariñagubei gürígia, ánjein lun jadímurejan wuríbati luágu Sífiri Sándu, siñábei ferúdnawa lan figou líra. ³² Furúmieguaarügü giñe le aríñaguti furúmieguaarügü cátei wuríbati nuágu, áu le Wügüri Garaúwarügüti, gayáraati ferúdnawa lan, ánjeinti le adímurejati wuríbati luágu lubáfu Sífiri Sándu le nídaanbei, úabei ferúdnawa lan ni lídan ubou le, ni lídan le ában.

*Luágu lin ídibu lasúbudirúa ca lan luwúyeribe
(Lc 6.43-45)*

³³ Ánjein buídu lubei ídibu, buídubei giñe lin, ánjein mabuídnun lubei ídibu, mabuídnunbei giñe lin. Luágu lin ídibu lasúbudirúa ca lan luwúyeribe. ³⁴ Jarásan jéwe jugúya le! Siñáti jadímurejan cátei buíti, wuríbatúngan. Cátei le

buínbei tídan anígi, ligía laríñagubei iyúmaü. ³⁵ Wügüri le buídubei, cátei buíti laríñagubei ladüga tídaañein lan lanígi ubuíduni, wügüri le wuríbabei, cátei wuríbati laríñagubei ladüga tídaañein lanígi wuríbani. ³⁶ Naríñajare jun luágu dánme lan lachülürün luwéyuri agúseruni, sun gürígia geféenbaña luágu sun dimúrei málati le jariñagubei, ³⁷ ladüga luáguba le bariñagubei bagúseragüdüwa, ligiaba arúfudei ánjein gadúnrun bubei lúmoun madúnrun ban.

*Jamúriajan gürígia wuríbatiña seíni láuti miláguru
(Mr 8.12; Lc 11.29-32)*

³⁸ Ába jariñagun jádaangiñe fariséogu jáma arúfudajatiña lilúrudun Moisés lun Jesúsu.

—Maésturu, buséntiwa waríjin badügün ában seíni le láuti miláguru luágu lúmagiñe lan Búngiu biábin.

³⁹ Ába laríñagun Jesúsu joun.

—Gürígia wuríbatiña áni magúnfuliruntiña amúriajatiña seíni láuti miláguru, míchugúnbei ámu seíni joun luei le asúseredubei lun proféta Jonás. ⁴⁰ Ladüga quei leréderun Jonás ürüwa wéyu ürüwa árieibu lurágeirugu údu, ítara lúba giñe neréderun, áu le Wügüri Garaúwarügüti, lídan numúaja ürüwa wéyu, ürüwa árieibu, según ligáburi jabájüdüni juríu dan. ⁴¹ Já meja aganoúbaña Nínive jásaaruba lídan luwéyuri agúseruni dánme jagúseragüdüniwa gürígia ja lánina dan le, ábame jíchugun jadúnrun ladüga sáansiguati jagáburi Nínivena dan le lapúrichijanbalin Jonás lugánute Búngiu joun, áni anája áu, ában weiríguti sügü láu Jonás, áni májatün jagáambunina. ⁴² Tásaaruba giñe lurúeítana Súru lídan luwéyuri agúseruni dánme le jagúseragüdüniwa gürígia ja lánina dan le, ábame tichugun jadúnrun, ladüga ñübintu lídaangiñe lidíse-ágei ubóu lun tagáambuni lichú láu Salomón, áni anája áu, ában weiríguti sügü láu Salomón, áni májatün jagáambunina.

*Espíritu wuríbati le agíribuduti
(Lc 11.24-26)*

⁴³ ‘Dan le láfuridun ában espíritu wuríbati lídaangiñe ában gürígia, ába eíbugañaja lan lídan fulásu mábeiti áluaja leméraagun, dan madári láani, ába laríñagun lúnguarügü. ⁴⁴ “Nagíribuda tídoun núban to ñigiñe lubei náfurida.” Dan le lagíribudun, ába ladáriruni gürígia buga ligía queísi ában múna to málatu, abuídajoáaru, aráanserúa. ⁴⁵ Ábati lídin, ába liábin jáu sédü espíritugu wuríbatimaatiña sügü láu, ába jebélurun sun jagía agánawa lídan gürígia ligía, wuríbatimájalti le gádaanbalin sügü láu meja furúmiñe. Ítara lúba giñéti lasúseredun joun gürígia wuríbatiña ja lánina dan le.

*Lúguchu Jesúsu jáma lamúlen
(Mr 3.31-35; Lc 8.19-21)*

⁴⁶ Ñígili Jesúsu adímureja joun gürígia, ligía tíabin lúguchu jáu lamúlenu. Ába jeréderun bougudi, buséntiña yebe jadímurejan lúma. ⁴⁷ Ába laríñawagún lun Jesúsu.

—Nuján búguchu jáma bamúlenu ya bougudi, buséntiña jadímurejan búma.

⁴⁸ Ába laríñagun Jesúsu lun le awísarubalin.

—¿Ca nóguchouboun, ca namúlenubaña?

⁴⁹ Ába larúfudun jawágun láni disípulugu, ába laríñagun.

—Añája nóguchubaña, jagía giñe namúlenubaña, ⁵⁰ladüga furúmieguarügü le adügüti lugúndan Nóguchi le siélubei, ligía namúlenbei, nítu, nóguchu.

13

Jémpulu luáguti ábunaguti (Mr 4.1-9; Lc 8.4-8)

¹Wéyu ligía, ába láfuridun Jesúsu múnadagiñe, ába lañúurun lárú dúna. ²Quei jagíbedagun güriía le ñí lubei, ába ládinin tídoun ában ugúnein, ába lañúurun, ába jeréderun sun güriía lárú dúna. ³Ába larúfudajan sarágu cátei joun láu jémpulu, ába lariñagun.

—Ñíñein ában ábunaguti, ába láfuridun ábunagua. ⁴Lídan afúrujeina láani líla nádü, ába lábúrujan lídaangiñe luágun üma, ába jayábin dunúru, ába jeígini. ⁵Líbiri, ába lábúrujan labádinaguouñ dúbü le ñí lumuti úa lan sarágu múa, ába labouúchun furése ladüga majúlilin lan múa. ⁶Dan le lásüdüñ wéyu, ába lásaurün queiti málágüle lan, ába loúnwen. ⁷Líbiri ílaü, ába lábúrujan labádinaguouñ jíyu, ába laweínamudun jíyu úara lúma, ába láfaruni. ⁸Ñíñein lídaangiñe, áburujati lídoun múa buíti, alúbajoúati buídu, níjein lídaangiñe, íchuguti san águu luágu cáda ában águu, líbiri rúti úrúwa-wein, líbiri darándi. ⁹Jugúya le garígeirugubei lun jagáambun, agáamba jumána.

Ca lan laníchigubei jémpulu le (Mr 4.10-12; Lc 8.9-10)

¹⁰Ábati jayábin disípulugu, ába jariñagun lun Jesúsu.

—¿Cásan uágu badímureja joun güriía láu jémpulu?

¹¹Ába lariñagun joun.

—Jugúya, subúdigüda láali Búngiu sun cátei arámudaguati le lánina larúeijan jun, ánjein jagía, siñáti jasúbudiruni. ¹²Le agúnfuliruti lúma inárüni le lagáambubei, líchugúba lánwoun lun, ánjein le maténirunti lun, gidáwarügübei murúsun larúgounga le lúmabei lueí. ¹³Ligía nadímurejanbei joun láu jémpulu ladüga aríja jamáni le nadügübei, ába jeréderun camá maríjintiña, agáamba jamei le naríñagubei, ába jeréderun úaga gunfaráanda jamá camá jamuga magáambuntiña. ¹⁴Jawágu lagúnfulira lé meja lariñagubei proféta Isaías dan lariñagunbei.

Jugúya, jagáambuba, úabei gunfaráanda jumá, jaríjuba, íbídiñebei jun ca lan lílabei le jaríjubei,

¹⁵ladüga deréeru janígi,

wuríbaaliti jagáambun,

murúñu líña jágu,

lun maríjin jumá láu,

magáambun láu jarígeirugu,

úa gunfaráanda jumá táu janígi,

magáararagun jugúyame nun lun nareídaguagüdünün.

¹⁶‘Anjeinti jugúya le nánigubei, fuleíseiwatün ladüga aríjatün láu jágu, agáamba jugúya láu jarígeirugu. ¹⁷Ninárün jáu, sarágu jañá meja profétagu jáma ámu güriía gúnfulitiña lúma Búngiu abúseerutiña jamúga jaríjinina quei jaríjinina jugúya guetó, maríjin jamútina, buséntiña jamúga meja jagáambuni le jagáambubei jugúya, magáambun jamúti.

Lafínraanguagüdüni Jesúsu jémpulu luáguti ábunaguti
(Mr 4.13-20; Lc 8.11-15)

¹⁸ ‘Agáamba jumeiti le lílabei jémpulu luáguti ábunaguti. ¹⁹ Ja agáambubalin ugánu luáguti arúejiani le lánina siélu áni úati gunfaráanda jamáni, ítara jáña quei úma le ídounei láburuja lídaangiñe líla nádü, ába liábin Máfia, ába agáagaruni ugánu buíti le ábunúbei tídaangiñe janígi. ²⁰ Dübü le ñíjin lubei láburuja ílaü, ítara líña quei gürígia ja agáambubalin ugánu, ába jerésibiruni láu ugúndani, ²¹ quei márügüdün lubei buídu tídan janígi, madúrati jádan. Dánti le lachülürün dan lun jóuchawagún lúma jeíbaajoún lueígiñe ugánu ligía, ába leíguadun jarúna. ²² Jíyu le ñíjin lubei láburuja ílaü, ítara líña quei gürígia ja agáambubalin ugánu, weíritimaati jafúudun luágu cátei le lánina íbágari le, ába leyéeduniña írisini. Sun le, ába láfaruni ugánu tídaangiñe janígi, mígiruntiti lun lalúbajoún jádan gürígia jagía. ²³ Múa buíti le ñíjin lubei láburuja ílaü, ítara líña quei gürígia ja agáambubalin ugánu, ába gunfaráanda jamáni, ába jíchugun ában alúbajoúni buíti. Añájein, ítara jáña quei ílaü le íchugubei san águu luágu ában, jíbiri quei le íchugubei ürüwa-wein, jíbiri quei le íchugubei darándi.

Jémpulu luáguti jíduru wuríbati labádinagua türígu

²⁴ Ábaya líchuguni Jesúsu jémpulu le joun.

—Arúejiani le lánina siélu, ítara líña quei ában wügüri le ábunagubei ílaü buíti lídan lufúlasun, ²⁵ dan añája lan sun ja ñíbaña arúmuga, ába lebéllurun ában lágani labúreme fulásu ligía, ába lábunun jíduru wuríbati labádinagua türígu, ába lídin. ²⁶ Dan le laweínamudun türígu ába legélewejan, ába giñe lachúlaagun jíduru wuríbati. ²⁷ Ába jóúdin músu, ába jaríñagun lun jayúbudiri. “Wayúbudiri, ánjein buídu lubei ílaü le bábnagubei bumúanrugu, ¿jalíagiñésan lasálira jíduru wuríbati le?” ²⁸ Ába laríñagun iyúbudiri joun. “Ladüga ában ágani le.” Ábati jaríñagun músu lun. “¿Buséntibu lun wájulajani jíduru wuríbati le?” ²⁹ Ába laríñagun joun. “Uá, ladüga dánme jájulajani jíduru wuríbati, julá jíñein lín giñe türígu úara lúma. ³⁰ Ígiragubei jumei lun laweínamudun úara daríme lídáani alúbajani, ábame naríñagun joun ñadágimeintiña lun jájulajani jíduru wuríbati furúmiñe, ábame jagüraguni lun lágudúniwa, lárigiñeme, ábame jareíduni türígu tídan lágei.”

Jémpulu luáguti tíla mostása
(Mr 4.30-32; Lc 13.18-19)

³¹ Rúlumuti giñe Jesúsu jémpulu le joun.

—Ítara líña arúejiani lánina siélu quei ában tíla mostása le lábunubei ában wügüri lufúlasunrugu. ³² Tíla mostása, ligía ílaü ñúraütimaabei lídaangiñe sun ílaü, áni dan laboučhun, ligía weíritimaabei lídaangiñe sun nádü, ába liábin lun ábanbei lan wéwe weíríti darí lun jayábin dunúru adüga jádibu luágu lílímun.

Jémpulu luáguti ísi
(Lc 13.20-21)

³³ Rúlumuti giñe jémpulu le joun.

—Ítara líña arúejiani le lánina siélu quei ísi le tagúbudubei ában würi tídan ürüwa líburu fulúwaaru, ába terésirun sun fulúwaaru tugúya.

Ca lan lébunabei líchuguni Jesúsu jémpulu buri le
(Mr 4.33-34)

³⁴ Láu jémpulu laríñagei Jesúsu sun cátei le joun gürígia, maríñagunti ni cáta joun mayúsurunga jémpulu. ³⁵ Sun cátei le, lun lagúnfulirun le laríñagubei meja Búngiu liyúmulugugiñe proféta. Nadímurejaba láu jémpulu jun, nafúnraanguagüdubei cátei lé buri meja arámudaguabei jun lúmagiñe nadügüni ubouú.

Lafúnraanguagüdüni Jesúsu jémpulu le luáguti jíduru wuríbati labádinagua türiгу

³⁶ Ába loúnajaniña Jesúsu gürígia jábiñoun, ába lebélorun múnadoun, ába jayábin láni disípulugu, ába jariñagun lun.

—Furáanguagüdebei jémpulu le luáguti jíduru wuríbati woun.

³⁷ Ába laríñagun Jesúsu joun.

—Áu le Wügüri Garaüwarügüti, áu le ábunagubalin ílaü buíti, ³⁸ múa, ligía ubouúbei, ílaü buíti, jagía gürígia ja lílana larúejan Búngiu, jíduru wuríbati, jagía gürígia ja lánigu Máfia, ³⁹ áganiti le ábunubalin jíduru wuríbati, Máfia méme, alúbajani, ligía lagúmuchunbei ubouú, ja alúbajabaña, ánjeligu. ⁴⁰ Ítara quei labúdajouñiwa jíduru wuríbati ába lágurún wáturugun lun lágudun, ítara lúba giñe lasúseredun dánme lagúmuchun ubouú, ⁴¹ áu le Wügüri Garaüwarügüti, nouñajabaña náni ánjeligu aságaraña sun ja afígoungüdübaña ámu, jáma ja adügübaña wuríbati, lídaangiñe narúejan, ⁴² ábame jácharaguniña lídoun wátu geméti lánina máfiougati. Ábame jayájuajan ñi, ábame lacünrinjan jári. ⁴³ Jámeti adügübalin le lubeíbei Búngiu, ábame jámiridun quei wéyu lídan larúejan Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti írsini le arámudúañubei

⁴⁴ Ítara líña arúejani le lánina siélu quei írsini le arámudúañubei lábugiñe múa. Ladárierei ában wügüri írsini ligía, ábaya larámuduni ñi méme, le luweírin lugúndan, ába lídin, ába lálúguruni sun le lúmabei, ába lagáñijani fulásu ligía.

Jémpulu luáguti pérla le weíríbei ebégi

⁴⁵ Ítara líña giñe arúejani le lánina siélu quei ában alúgurajati le eíbugañajabei áluaja pérla finuti, ⁴⁶ dánti ladárirun ában le weíríti lebégi, ába lídin, ába lálúguruni sun le lúmabei, ába lagáñijani pérla ligía.

Jémpulu tuáguti séni

⁴⁷ Ítara líña giñe arúejani le lánina siélu quei ában séni to agurúboun baránaja, ába tañúgun sun jawúyeri úduraü. ⁴⁸ Dan tabuínchun, ába jacháwarunun esénijatiña lárún béya, ába jañúurun ñi anúdajaña úduraü, ába jareíduniña ja buídubaña, ába jachágaruniña ja wuríbabaña. ⁴⁹ Ítara lúba dánme lagúmuchun ubouú, jayábiba ánjeligu lun jafánreinruniña ja buídubaña jádaangiñe ja wuríbabaña. ⁵⁰ Ábame jádaruniña ja wuríbabaña lídoun wátu geméti lánina máfiougati, ñíba lubei jayájuaja, acünrijame jári.

Írsini buri iséri lúma binádu

⁵¹ Ábati lálügüdüniña Jesúsu, laríñaga joun.

—¿Gunfaráanda jumútisan sun cátei le?

Ába jariñagun.

—Ánja, Wabúreme.

⁵² Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúejiani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirísin lun líchuguni joun tílana lúban dan le jemégeiruni, queígubeirügü, gayáraati larúfudajan joun gürígia luágu lilúrudun Moisés lúma giñe luágu cátei le narúfudajabei, áu le Jesúsu.

Jesúsu lídan fulásu le gíribei Nazarét

(Mr 6.1-6; Lc 4.16-30)

⁵³ Dan lagúmunchunbei líchuguni Jesúsu jémpulu buri le, ába lídin ñígiñe, ⁵⁴ ába lachúlürün lageíroun. Ába lagúmeserun arúfudaja tídan jalígílisin juríu to lídaanboun fulásu ligía, ába laweíridun janígi gürígia, ába jariñagun.

—¿Jalíasan lafúnrendeirei wügüri le sun líchú áu le? ¿Ída liñásan gayára láani miláguru buri le adüga? ⁵⁵ Liraüga saráfangei le, María lúguchuboun, líbugaña Jacóbo, José, Simón lúma Júdas, ⁵⁶ ya giñe jagánawa lamúlenu jáma lítunu wádan. ¿Jalíagiñeti lasúbudirei sun le?

⁵⁷ Ába jamájarun lun jerésibiruni. Ába lariñagun Jesúsu joun.

—Sun gürígia jínsiñeti ában proféta joun, mámarügaali ligía lídaangiñeti fulásu le ñi jabei o tílana lan jában.

⁵⁸ Madügüntiti sarágu miláguru ñi ladüga maffínen jamá luágu.

Loúnwen Juan le abásteragüdajabei

(Mr 6.14-29; Lc 9.7-9)

14

¹ Lídan dan ligía, ába lagáambun Heródes, le gumándan lídan fulásu le gíribei Galiléa, luágu Jesúsu, ² ába lariñagun joun ja lúmabaña.

—Juan le abásteragüdajabei le, sará jádaangiñe jiláaña, ligía gabáfu lubei lun ladáagun miláguru.

³ Lé meja suséeelibei, daúlumuti meja Heródes Juan, ába lagüraguágüdüni láu güriñgüri tueígiñe Heródias tó meja lúmari Felipe, le lamúlen. ⁴ Aríñagaali meja Juan lun Heródes luágu moun láni lagámaridunun lúmari lamúlen, madügünti Heródes gásu láu.

⁵ Busénti yebéti Heródes láfaruni Juan jilágubei, ladüga lanúfude jawei gürígia, madügun lumúti ladüga sun lan gürígia afíñetiña luágu proféta lan Juan. ⁶ Dánti le efédujani luágu lagúnfulirun Heródes irúmu, ába tiábin tiraü Heródias, ába tabínajan jagíbugiñe amísurajoútiña, léti línsiñe tabínajan lun Heródes, ⁷ ába lariñagun tun láu fiñún luágu líchugubei lan furúmieguarügü cátei le tamúriajan lúma tun. ⁸ Ábati tariñagun tóguchu tun lun tamúriajani lábulugu Juan le abáste jilágubei, ladüga, lun jichuguni tun lídan ában asiedu, ába tamúriajani lúma ítara.

⁹ Ába lírudagun Heródes lueígiñe cátei le, quei aríñaga láali lan láu fiñún, agáamba jamei amísurajoútiña, ába lariñagun lun líchugúniwa tun. ¹⁰ Ábati lariñagun lun ladürürüniwa lábulugu Juan furísunrugu, ¹¹ ába janügüni lídan ában asiedu, ába líchugúniwa tun irájú tugúya, ába tíchuguni tun tóguchu.

¹² Ábati jayábin líñagun tun láu fiñún luágu lanigu Juan, ába janügüni lúgubu, ába jábununi, lárigiñe, ába jóúdin awísarei Jesúsu.

Líchugun Jesúsu eígini joun seíngü mílu wügüriña

(Mr 6.30-44; Lc 9.10-17; Jn 6.1-14)

¹³ Dan lagáambuni Jesúsu cátei le, ába lídin ñígiñe jáurügü láni disípulugu tídan ában ugúnein lídoun ában fulásu mageírawati. Ába jasúbudiruni gürígia, ába jáfuridun lídaangiñe buri aüdü, ába jóudin lárigi, eibu. ¹⁴ Dan larárirun Jesúsu tídaangiñe ugúnein, ába laríjin luágu sarágu jaña lan gürígia jagía, ába jagümededagun lun, ába lareídaguagüdüniña ja sándibaña jádan. ¹⁵ Queíti agüñedeinaali lubeí, ába jaríñagun láni Jesúsu disípulugu lun.

—Dárüjalitia áni úatiña gürígia aganoútiña lídan fulásu le. Oúnaja báña gürígia ja, ñüdüñ jamámuga lídoun buri lirájüñü fulásu yaráfa agáñija eígini lun jeigin.

¹⁶ Ába laríñagun Jesúsu joun.

—Mídinbaña, rújuma eígini joun.

¹⁷ Ába jaríñagun lun.

—Seíngü rügüñoun fein wáma ya, jáma bián úduraü.

¹⁸ Ába laríñagun Jesúsu joun.

—Barüjumoun nun ñájoun.

¹⁹ Ába laríñagun joun gürígia lun jañúurun luágu jíduru. Ába lanügünun seíngü fein jáma bián úduraü jagía lújaburugu, ába laríjin siélun, ába leteíngiruni Búngiu tuágu. Ábati lagúbachagunun fein, ába líchugunun joun láni irun Jesúsu tídaangiñe ugúneidisípulugu, ába jafánreinjanun jádan gürígia. ²⁰ Sun jagía jóútiña quimúle, lárigiñe, ába jabaúinchagüdüñ dúusu faníñe táu to ígiragutu. ²¹ Seíngüñanu mílu wügüriña eígitiña, mabájüdünga würiña jáma irájüñü.

Leibugun Jesúsu ligíbuagu dúna
(Mr 6.45-52; Jn 6.16-21)

²² Ába louñajaniña Jesúsu láni disípulugu lubá tídan ugúnein tugúya lun jánjiñuragun loubáfurugun sun niján lan oúnajaña gürígia ágyuyu. ²³ Lásun louñajaniña, ába laweínrun lábugua luágun wübü ayúmuragua lun Búngiu. Dan le lagüñedunbei, ñíñein Jesúsu lábugua, ²⁴ sun núnguran tan ugúnein lamídan dúna. Ába láfarajan lugúdi barána tuágu ugúnein ladüga tubárouñein lan garábali. ²⁵ Ába liábin Jesúsu jawágun lubá larúgan, eibugeina ligíbuagu dúna. ²⁶ Dan jaríjini láni disípulugu eibugeina ligíbuagu dúna, ába janúfudedagun, ába jagúaragun láu anúfudei.

—¡Úfiaü!

²⁷ Ába ladímurejan Jesúsu joun, ába laríñagun joun.

—¡Ragújuma anígi, áu le, manúfudeda jumá!

²⁸ Ába laríñagun Pédro lun.

—Nabúreme, ánjein amürü lubeí, eíbugagüda bána gíñe ligíbuagu dúna chülü le ñí bubei.

²⁹ Ába laríñagun Jesúsu lun.

—Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubeí Jesúsu ligíbuagu dúna. ³⁰ Dan le lasándiruni lére garábali ába lanúfudedagun, ába lagúmeserun abúlucha, ába lagúaragun.

—¡Séfu bána Nabúreme!

³¹ Ába lárügüdüni Jesúsu lújabu, ába laríñagun lun.

—¡Louguati gíñe bafíñen! ¿Ca uágu laloúguada bafíñen?

³² Dan jádinun tídoun ugúnein, ába lagálumadun garábali. ³³ Játi buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraü ban Búngiu.

Lareídaguagüdüniña Jesúsu sánditiña Genésaret
(Mr 6.53-56)

³⁴ Ába jánjiñuraguni dúna, ába jachülürün Genésaret. ³⁵ Dan le jíchugunbei lílana fulásu fe luágu Jesúsu lan, ába jabúrchaguagüdüni lídan sun fulásu ligía, ába janügüniña sun sánditiña le ñjin lubeí. ³⁶ Ába jayúmuragun lun lun lígirun lúnrügü jagúuruni táru lanáangun, sun ja agúurubarun, areídaguátiña.

15

Cátei le marúmadagüdünbaliña gürígia ligíbugiñe Búngiu
(Mr 7.1-23)

¹ Ába jayábin fiú fariséogu jáma arúfudajatiña lilúrudun Moisés, ñübintiña ubúrugugiñe Jerusalén lúmoun Jesúsu, ába jaríñagun lun.

² —¿Ánsan jájalachagunbalin báni disípulugu binádu jagáburi weíyaaña mútu? Magúnfuliruntiña láu lachibúniwa újabu lubá eígini, según wagáburi.

³ Ába laríñagun Jesúsu joun.

—¿Ánti giñe jájalachagunbalin lerérun Búngiu lun jafálaruni binádu jigáburi?

⁴ Laríñajare Búngiu. “Inébe jamá bagübürigu bun, le anábagubaliña lagübürigu, jílála.” ⁵ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchi. “Siñáti níderagunibu ladúga sun le nómabei, aríñagaadina luágu lun lan níchuguni lun Búngiu”, ⁶ luágu furúmieguarügü lan le aríñaguti ítara, mámaali lan lúnti lideraguniña lagübürigu. Láu líra mebégigüda jumáli lagúmadijan Búngiu lun jafálaruni binádu jigáburi. ⁷ ¡Biángua tigibu jugúya le! Linárün proféta Isaías laríñagunbei juágu ítara.

⁸ Jayumárurügü gürígia ja jíchiga inébesei nun, líña Búngiu, ánjein tídan janígi, mebéresentiña náu.

⁹ Málati jájuduragun nun,

ladúga le rügüñein jagúmadijan wügüriña jarúfudaja.

¹⁰ Ábati lagúarun joun gürígia, ába laríñagun joun.

—Agáamba jumá, gunfaráanda jugúyame. ¹¹ Máma eígini le leígubei gürígia adügübalin lun marúman lan ligíbugiñe Búngiu, dimúrei wuríbatí le laríñagubei wügüri, ligía adügübalin lun marúman lan.

¹² Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jiggu wuríba lan láburuhan dimúrei le baríñagubei joun fariséogu?

¹³ Ába laríñagun joun.

—Furúmieguarügü nádü to máma lábunun Núguchi Búngiu le siélubei, lájulúba láu sun lílagüle. ¹⁴ Ígira jumáña, marijintiña ja adúndejetiña marijintiña jáledi jagía. Áni ánjein adúndeja ában marijinti ában marijinti líledi, jeíguaduba biángubei jagía lídoun ában júyu.

¹⁵ Ábati laríñagun Pédro lun Jesúsu.

—Furáangugüdabeí jémpulu le woun.

¹⁶ Ába laríñagun Jesúsu.

—¿Úati giñe gunfaráanda jumá? ¹⁷ ¿Úati gunfaráanda jumá luágu sun lan le ebélurubei lídoun iyúmaü, ába lídin lídoun urágei, lárigiñe ába láfuridun lídaangiñe úgubu? ¹⁸ Ánjein dimúrei le áfuridubei lídaangiñe iyúmaü, tídaangiñe anígi

liábin, ligiati ádügübalin wügüri lun marúman lan ligíbugiñe Búngiu, ¹⁹ ladüga tídaangiñe anígi láfurida samínaü wuríbati, áfarajani, adultériu, salúfuri, íweru, iyéeni, marásualugu. ²⁰ Ligia buri cátei le adügübalin wügüri lun marúman lan, ánjeinti leigíniwa machibúnga újabu segün jagáburi juríu marúmadagüdün lumúti ligíbugiñe Búngiu.

*Ában würi teréncha to afñeruboun luágu Jesúsu
(Mr 7.24-30)*

²¹ Ába láfuridun Jesúsu ñígiñe, ába lídin lídoun buri fulásu geyégua láu fulásu le Tíro lúma Sidón. ²² Ñíñoun ában würi jádaangiñetu Cananítagu aganoúti lídan fulásu ligía, ába tiábin luágun Jesúsu agúarajeina.

—¡Nabúreme, ladügawagun David, gudémená bun! Níjein ában espíritu wuríbati tuágu nisáani, weírítu tasúfurirun lurúma.

²³ Moúnabun lumútu Jesúsu. Ábati jayábin disípulugu, ába jayúmuragun lun, ába jariñagun.

—Adügabei le tamúriajabei búma, ladüga nuteíntia agúarajeina wárigi.

²⁴ Ába lariñagun Jesúsu.

—Joun rügüñein güriáa féridijaña ja Israelítagu louñajana Búngiu lun níderaguniña.

²⁵ Ába tiábin würi tugúya, ába tájuduragun ligíbugiñe, ába tariñagun.

—¡Nabúreme, íderagua bána!

²⁶ Ába lariñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa feín jaweí isáanigu lun tíchugúniwa joun oúnli.

²⁷ Ába tariñagun.

—Ánja, Nabúreme, láu sun líra, gayáraati jeígini oúnli ífei le áburujati lueígiñe jadábulan jabúriña.

²⁸ Ábati lariñagun Jesúsu tun.

—Würi, ¡weírítu giñe baffíten! Susérelá le babúseerubei.

Lúmagiñe óra ligía, ába tareídagun tisáani.

Lareídagugüdüni Jesúsu sarágu sánditiña

²⁹ Ába láfuridun Jesúsu ñígiñe, ába lachülürün lárún dúna Galiléa, lárigiñe, ába laweínrun luágun ában wübü, ába lañúurun ñi. ³⁰ Ába jayábin sarágu güriáa le ñíjin lubeí barúina jagía meibuguntiña, marijintiña, mariñaguntiña, danimaati jarúna, jáma sarágu jawúyeri sánditiña. Ába jíchuguniña lubádu lugúdi Jesúsu, ába lareídagugüdüniña. ³¹ Ába laweíridun janígi güriáa láu jaríjin adímurejaña jamá já meja mariñagadibaña, areídagua ja danímaabaña arúna, eíbuga ja meibugúñajabaña, aríja ja marijñajabaña. Ába jagúmeserun adímureja weírígu luágu jabúngiute Israelítagu.

*Líchugun Jesúsu eígini joun gádürü mílu wügüriña
(Mr 8.1-10)*

³² Ábati lagúarun Jesúsu joun láni disípulugu, ába lariñagun joun.

—Gudémetiña güriáa ja nun ladüga úrúwaali wéyu jáu núma ya áni úaali ní cáta jáma lun jeígin. Mabúseeruntina nouñajaniña jábiñoun meíginga, dagá líñein falálaü jawágu úmada.

³³ Ábati jariñagun láni disípulugu lun.

—¿Ída lubáti wadárirun eígini joun sarágu gürígia ya lídan fulásu le ñí lumuti úa jamá aganoútiña?

³⁴ Ába lálügüdüniña Jesúsu.

—¿Átiriñoun fein júma?

Ába jariñagun.

—Sédü, jáma biánraü úduraü.

³⁵ Ába laríñagun joun gürígia lun jañúurun múarugu, ³⁶ ába lanügünun sédü fein jáma úduraü jagía lújaburugu, ába leteíngiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun gürígia. ³⁷ Jouítiña súngebui quimúle, buíngüda gíñe sédü faniñe táu to ígiraguboun. ³⁸ ¡Gádüríñanu mílu wügüríña eígitiña, mabájüdünga würíña jáma irájüñü! ³⁹ Lárigiñe, ába loúnajaniña Jesúsu gürígia águyu, ába ládinun tídoun ugúnein, ába lídin loúbawagun Mágdala.

16

Jamúriajan fariséogu jáma saduséogu ában seíni le láuti miláguru
(Mr 8.11-13; Lc 12.54-56)

¹ Ába jouéin fariséogu jáma saduséogu aríjei Jesúsu. Lun jáburugüdüni tídoun sádara, ába jariñagun lun lun larúfudun ában seíni láuti miláguru le siéluñeti joun, afiñe jamámuga luágu lúmagiñe lan Búngiu liábin. ² Ába laríñagun joun.

—Rábounwéyu, ába jariñagun. “Buidubei dan ladüga funáti siélu.”

³ Bináafin, ába jariñagun. “Wuríbabei dan ugúñe ladüga funáñu líña siélu áni jamúñounga.” ¡Biángua tigíbu jugúya le! Subúdiri luágu ti ligáburi dan jun, áni ibidiñeti jun luágu chúlújali lan lídáni asálbaruni. ⁴ Gürígia wuríbatíña, múaraantiña ja, amúriajatiña seíni láuti miláguru lun jafiñerun luágu áu lan anügübei asálbaruni joun gürígia. Wel, marúfudünbei ámu seíni joun lueí liseíni Jonás.

Ába lígiruniña, ába lídin.

Ítara líña jarúfudajan fariséogu quei ísi
(Mr 8.14-21)

⁵ Dan le jájiñuragunbei disípulugu lúma Jesúsu loubáfurugun dúna, bulíei jamúti janügün fein. ⁶ Ábati laríñagun Jesúsu joun.

—Touñigüa jumátia júngua lueí jísite fariséogu jáma saduséogu.

⁷ Ába jagúmeserun disípulugu aríñaga jámagua.

—Ladügatia manügün wamá fein laríñagunbei ítara.

⁸ Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma? ¡Louguati gíñe jafiñen! ⁹ ¿Úagili gunfaráanda jumá, marítangun jugúya tuágu seíngü fein to nafánreinjaboun jádan seíngü mílu wügüríña lúma átiriñein lan faniñe táu ígiragutu? ¹⁰ ¿Bulíeiguatün funásun tuágu sédü fein to nafánreinjaboun jádan gádürü mílu wügüríña lúma átiriñein lan faniñe táu ígiragutu? ¹¹ ¿Ída líñági mefeén jubeí luágu máma lan tuágu fein nadímureja dan le naríñagunbei jun lun jouñigiragun júngua lueí jísite fariséogu jáma saduséogu?

¹² Ába gunfaráanda jamáni luágu máma lan luágu tísitena fein laríñaga joun, lueí lan arúfudajani le jáni fariséogu jáma saduséogu lawéridiraña.

Lariñaguni Pédro luágu Jesúsu lan Crístubei
(Mr 8.27-30; Lc 9.18-21)

¹³ Dan le lachülürün Jesúsu ubúruge Cesaréa le Filípo ába lálügüdüníña lání disípulugu.

—¿Cátanasan lídan jarítangun gürígia, áu le Wügüri Garaüwarügüti?

¹⁴ Ába jariñagun.

—Añájein aríñagutiña luágu Juan lan lé meja abásteragüdajabei amürü, jíbiri aríñaga luágu Elías ban, añájeingua aríñagutiña luágu Jeremías ban o ámu lan proféta.

¹⁵ Ábati lariñagun joun.

—Ánti jugúya, ¿cátanati lídan jarítangun?

¹⁶ Ába lariñagun Simón Pédro lun.

—Crístu le Liraü Búngiu le wíwanbei amürü, le ñübinbei asálbaraña gürígia ubouágu.

¹⁷ Ába lariñagun Jesúsu lun.

—Fuleiseiwatibu Simón, liraü Jonás, ladüga máma lasúbudiragüdün ni ába gürígia cátei le bun, lasúbudiragüdün Nüguchi Búngiu le siélubei bun.

¹⁸ Naríñajare bun luágu Pédro lan amürü, líla íri ligía, “dübü”, luáguba ébuu le nábuaguoun nilígílisin, áni ni íbini ouweni mabáfubei tuágu. ¹⁹ Níchugubei ligélen arúejiani le lánina siélu bun, le cátei le uáguti bariñaga luágu moun lan jadügüni afíñetiña, ligía giñe uágubei lariñaga Búngiu luágu siñá lan ladügüniwa, le cátei le uáguti bariñaga luágu gayára lan ladügüniwa, ligía giñe le uágubei lariñaga Búngiu luágu gayára lan ladügüniwa.

²⁰ Ábati lariñagun Jesúsu joun lání disípulugu lun mariñagun jamá ni ca un luágu ligía lan Crístubei.

Ladímurejan Jesúsu luágu loúnwen
(Mr 8.31-9.1; Lc 9.22-27)

²¹ Lúmagiñe dan ligía, ába lagúmeserun Jesúsu aríñaga joun lání disípulugu furáangu luágu lúnti lan lídin Jerusalén, luágu giñe jasúfuriragüdübei lan wügüriña weirigutiña lídan jafíñen juríu, jáma jábutigu jafádirigun juríu, jáma arúfudajatiña lilúruden Moisés. Aríñagati joun luágu láfarúba lan jilágubei, áni lásaaruba lan luágu lürüwan wéyu. ²² Ába ladiñurun Pédro láu Jesúsu ñígiñe murúsun, ába lariñagun lun táu sun lanígi.

—¡Mabúseeraleí Búngiu líra, Nabúreme! ¡Siñáti lasúseredun cátei le bun!

²³ Ába lagáragun Jesúsu, ába lariñagun lun Pédro.

—¡Dísebá nuel, Máfia! Babúseerúña beréderuni ladügüniwa lugúndan Búngiu. Masáminaruntibu quei Búngiu, basáminarun quei wügüri.

²⁴ Ábati lariñagun Jesúsu joun lání disípulugu.

—Le busénti lafálarunina, bulíleleí cáteiñein lan, awándaleí sun luwúyeri asúfuriruni le lúnbei liábin lun nueígiñe queisi lanügüni ában wügüri lugúruwan, falálana. ²⁵ Ladüga le abúseeruti leséfuragun lúngua ya ubouágu lefériDIRUBEI íbágarí le magúmuhaditi, ánjein le ánjabei lefériDIRUNI libágarí ya ubouágu nueígiñe, libíjubei íbágarí le magúmuhaditi siélu. ²⁶ ¿Cági ju lan lun gürígia lagañeiruni sun le lánina uboué le, lefériDIRIEME lubára siélu? Úati ni cáta lánina uboué le áuti gayára lan lagañijan gürígia ubáraü siélu. ²⁷ Nagríbuduba, áu le Wügüri Garaüwarügüti, úara jáma náni ánjeligu, niábinba láu uweiriguni le meme lání Nüguchi. Ábameti nafáyeiruniña gürígia quei ligáburi le adüga

jamáalibei. ²⁸ Ninárün jáu luágu añájein lan jádaangiñe ja yábaña guetó, mouñwenbaña daríme jaríjini liábin narúejan, áu le Wügüri Garaüwarügüti.

17

Lámuñedagun larijín Jesúsu

(Mr 9.2-13; Lc 9.28-36)

¹ Sísi wéyu lárigiñe, ába lanügüniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wübü íñuti, jagía rügüñanu ñi. ² Ába lámuñedagun larijín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga. ³ Sódini ába jaríjini Moisés lúma Elías (já meja abágaridubaña lídan dan le sügüjalibei) ayánuja lúma Jesúsu. ⁴ Ába lariñagun Pédro lun Jesúsu.

—Nabúreme, lídan dan awánja lan ya! Ánjabu busén, adüga wagíame ürüwa dibásein ya, ában bun, ában lun Moisés, ában lun Elías.

⁵ Dan niján lan Pédro adímureja, ába liábin ában juánriñu miríti, ába louburaguniña, ába lagaambúniwa ában umálali lídaangiñe juánriñu ligía le aríñagubei.

—Niján niraü le jínsiñebei nun, le aúbei ouñwenbun lan nugúndan, adüga jumei le lubeíbei.

⁶ Dan jagáambuni disípulugu, ába jabúluchagun láu jagíbu múarugu le luweírín janúfude. ⁷ Ába liábin Jesúsu jawágun, ába lagúrurun jawágu, ába lariñagun joun.

—Sarájuma, manúfudeda jumá.

⁸ Dan le jaríjinbei, maríjinjaña ámu lueidügü Jesúsu.

⁹ Dan le aráreina jamáni wübü, ába lariñagun Jesúsu joun.

—Mabájudagua jumeítia cátei le aríja jumáalibei lun ni ában daríme saráadina, áu le Wügüri Garaüwarügüti, lídaangiñe ouweni lúnya nabágaridun.

¹⁰ Ábati lariñagun disípulugu lun Jesúsu.

—Guetó subúdi wamáali luágu amürü lan Crístubei. Quei ítara líña lubei, ¿cáti uágu jaríñaga arúfudajatiña lilúrudun Moisés luágu lúnti lan liábin Elías lubáragiñe liábin Crístu?

¹¹ Ába lariñagun Jesúsu joun.

—Inárüni luágu liábinba lan Elías, ábame líchugun sun cátei lídoun lubúdubu, ¹² áni nariñajare jun luágu ñübinjali lan Elías, masúbudirun jamúti gürigia, adügarügü jamúti sun le jabúseerubei láu. Ítara lúba giñe jasúfuriragüdünina, áu le Wügüri Garaüwarügüti.

¹³ Ábati jasúbudiruni disípulugu luágu Juan lan lé meja abásteragüdajabei, ligía lan Elíasbei le uágubei ladímureja Jesúsu.

Lareidaguagüdüñ Jesúsu ában irájü goúwejaditi

(Mr 9.14-29; Lc 9.37-43)

¹⁴ Dan le jachülürünbei le ñíjin jabeí gürigia, ába liábin ában wügüri lúmoun Jesúsu, ába lájjuduragun ligibugiñe, ába lariñagun lun.

¹⁵ —Nabúreme, gudémelá nisáani bun, goúwejaditi, weírítiti lasúfurirun, níjein dan jeiguati wáturugun, níjein dan dúnarugun. ¹⁶ Barü numuti ñájoun joun báni disípulugu, siñá jamuti areidaguagüda.

¹⁷ Ába louñabun Jesúsu.

—¿Gürígia mafíñeraditiña, gürígia wuríbatíña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barújumei irájü ligía ñájoun.

¹⁸ Ábati ladeínjan Jesúsu lun espíritu wuríbati ligía, ába láfuridagüdüni lídaangiñe lúmagiñe óra ligía, ába lareidagun irájü le.

¹⁹ Lárigiñe, ába jadímurejan disípulugu lúma Jesúsu jábugua, ába jálügüdüni.

—¿Cásan uágu siñá wabalin espíritu wuríbati ligía aságara?

²⁰ Ába laríñagun Jesúsu joun.

—Ladüga liloúguan jafíñen. Ninárün jáu luágu ánjein lan ibíja jubeí fe íbini ñúraüräü lan quei ában tágu mostása, jaríñaguba lun wübü le. “Gídaba yágiñe, beíba lídoun ámu fulásu”, ábame lagídarun wübü ligía. Úabei ni cáta jásiñerun ánjein íbija jubeí fe le tímtimaati. ²¹ Ánjeinti jíbe espíritugu ja, láu rügüñein ayúmuraguni lun Búngiu lúma ayúnaruni gayára lan jaságarúniwa.

Ladímurejaanya Jesúsu luágu loúnwen
(Mr 9.30-32; Lc 9.43-45)

²² Dan le eíbugeina jamá úara loúbawagu Galiléa, ába laríñagun Jesúsu joun luágu ledéreguerúaba lan, ligía le Wügüri Garaúwarügüti, jájaburugun wügüriña wuríbatíña, ²³ ábame jáfaruni jilágubei, áni lásaaruba lan lídaangiñe ouweni luágu lürüwan wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

²⁴ Dan lachülürün Jesúsu jáma láni disípulugu Capernaúm, ába jouúin ja agúburajabalin tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

²⁵ Ába loúnabun Pédro, ába laríñagun lun.

—Afáyeijati.

Dánti lebélorun Pédro múnadoun, ába lálügüdüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúburajabaña urúeigu ja lánina ubou le, jásan lílana fulásu ódi ja teréncha?

²⁶ Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi mouún lumuti lubeíti jafáyeijan, áu le Liraü Búngiu, mouún lumuti nafáyeijan tiseínsuna lúban Nüguchi. ²⁷ Lun magáñidagüdün wamá ni ában, beíba, ábame bachürunun bürünjüre dúnarugun, ábame badígini furúmiñeti úduraü le eígiti bun. Badáriruba ában seínsu liyúmulugu úduraü ligía, buídurügübei lun bafáyeijan wawougua láu, ábame bafáyeiruni.

18

¿Cáteisan weírigutimaabei lídan larúeijan Búngiu?
(Mr 9.33-37; Lc 9.46-48)

¹ Lídan dan ligía, ába jáyábin disípulugu lúmoun Jesúsu, ába jálügüdüni.

—¿Cáteisan weírigutimaabei lídan larúeijan Búngiu?

² Ába lanügün Jesúsu ában irájü, ába líchuguni jamídan jámagua, ³ ába laríñagun.

—Nínárün jáu luágu ánjaün lan mayábin lun jítaradun quei irájüñü, mebélubadün lídoun larúeijan Búngiu. ⁴ Ítara líña lubeíti, le ñüraüti lanáangun lúngua, ñübin ligía lun ítarabei lan quei ában irájü, ligía weírigutimaabei lídan arúeijani le lánina siélu. ⁵ Gürígia giñe le erésibiruti ában irájü lídan níri resíbi lumútina giñe.

Luríban lafigoungüdüniwa ában gürígia
(Mr 9.42-48; Lc 17.1-2)

⁶ ‘Furúmieguarügü le afigoungüdüti ában jádaangiñe ja isérigiñabaña lídan jafíñen nuágu, buítimaati jamúga lun lun lagurúniwa baránajoün láu ában oúnwenbun dübü le amúligülei güráñu luágu ligíina sügü láu ladügüni cátei líra. ⁷ ¡Wuríbati lun ubouú, níjein lán buri cátei le afigoungüdübaliña gürígia! Súnwandan ñíbei lan, áni ¡fugiábu le wügüri le lébunabei!

⁸ ‘Ligía ánjein lubeí lafigoungüdübadi bu lubeí bújabu o bugúdi lan, dürübei, fíbei díse buáriua, buítimaati lun bebélurun siélun májabuga o magúdiga, sügü láu badarún láu biángubei bújabu lúma biángubei bugúdi máfiougatin le ñí lubei wátu le méñeguchadipei. ⁹ Ánjein bágu lubeí afigoungüdübadi bu, sagábei, fíbei díse buáriua, buítimaati lun bebélurun siélun máguga sügü láu badarún láu biángubei bágu máfiougatin.

Jémpulu tuáguti mudún to eféridiroun
(Lc 15.3-7)

¹⁰ ‘Manúga jumá ni ában jádaangiñe ja ünabugububaña ja quei ni cáta. Naríñajare jun luágu ligíbugiñeñanu lan Núguchi Búngiu le siélubei ánjeligu ja aríjubaña jáu afíñetiña ja súnwandan. ¹¹ Ladüga asálbarei le féridijalíbei yebe niábin, áu le Wügüri Garaüwarügüti.

¹² ‘¿Ída líña jaríjin lun? Ánjein añájein lubeí san mudún lúma ában wügüri, teféridira ában jádaangiñe, ¿ma lígrubaña jíbiri luágu wúbü, ábame lídin áluajoun to ayúridaguboun? ¹³ Ánjounti ladárira, choúruti luágu gúndaabei lan táu sügü jáu ja mayúridagunbaña. ¹⁴ Ítara líña giñéti, mabúseerunti Júguchi Búngiu le siélubei lun leféridirun ni ában jádaangiñe ünabugutiña ja.

Ligáburi ferúdonawa jamá idújeñu lueígiñe Jesucrístu
(Lc 17.3)

¹⁵ ‘Ánjein adüga bidúje ában wuríbani bun, badímureja lúma jábuguarügü, ábame basúbudiragüdüni lidúnrun lun. Ánjein adüga gásu báu, gamádaguayáadün. ¹⁶ Ánjein madügün gásu báu, ábame banügün ában o bián gürígia jánwoun lun sun lan le aríñawagúti, añájein jamámuga ámu geféentiña luágu. ¹⁷ Ánjein madügün gásu jáu, ábame baríñaguni lun jadámurin afíñetiña, ánjein madügün gásu láu adámurini, ábame banügüni quei ában maffíñeti luágu Búngiu o quei lan ában agúburajati liseínsuna gumádi, gayára lámuga lasáansiruni luríban ligáburi.

¹⁸ ‘Nínárün jáu luágu le lan cátei le uáguti jaríñaga jugúya disípulugu luágu moun lan jadügüni afíñetiña, ligía giñe uágubei lariñaga Búngiu luágu siñá lan ladügüniwa, le cátei le uágubei jaríñaga luágu gayára lan ladügüniwa, ligía giñe le uágubei lariñaga Búngiu luágu gayára lan ladügüniwa.

¹⁹ ‘Naríñajare giñe jun luágu ánjaña lan úrada bíama jídaangiñe ya ubouágu lun jamúriajan ában cátei lúma Búngiu le siélubei, líchugubei jun, ²⁰ ladüga le ñí jamuti bíama o ürúwa oúndaragu lídan níri, anájein ñí jamídaangua.

²¹ Ába layárafadun Pédro lun Jesúsu, ába laríñagun lun.

—Nabúreme, ¿átiribeisan weíyaasu ladügün nibíri ában wuríbani nun lun ferúduna méme náani? Darí sédü weíyaasu?

²² Ába laríñagun Jesúsu lun.

—Maríñaguntina bun luágu darí lan sédü weíyaasu lúnti ferúduna báani, darí ürüwa-wein-díisi weíyaasu sédü.

Jémpulu luáguti músu le májabei ferúduna lan

²³ ‘Ligía ítara líña lubei arúejani le lánina siélu quei ában urúei le ñübinbei lun laráansejan luágu seínsu jáma lumúsuniña. ²⁴ Lagúmesera adúgei, ába janügün ában le adúweirubalin sarágu mífün fiádürü, ²⁵ quei maseínsun lan lun lafáyeijan, ába laríñagun urúei lun lalúgurúniwa idámunime táu sun lúmari, lirájüñü, lúma sun le lúmabei lun lafáyeiruni ladúweijan. ²⁶ Ába lájuduragun músu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.” ²⁷ Ába lagúdemedagun lun urúei, ába ferúduna láani ladúweiruni, ába lígiragüdüni. ²⁸ Quei láfuridun músu ligía ñígiñe, ítara ladúnragun lúma ában músu líledi le adúweirubalin átiri fiádürü. Ába lárügüdüni lueígiñe ligíina, ába lagúmeserun achócurei, ába laríñagun lun. “Fáyeibeí le badúweirubalina.” ²⁹ Ábati lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.” ³⁰ Májati le ában, ñüdünrügü ligía ába ládaruni furísunrugun darí lafáyeiruni ladúweijan. ³¹ Dan le jaríjinbaalin ja jíbiri músu cátei le, ába lagáridun joun sarágu, ába jóudin, ába jabájüdaguni lun urúei. ³² Ába loúnajan urúei oúgei, ába laríñagun lun. “¡Músu wuríbati! Ferúduna numúti sun badúweijan ladúga bayúmuragun nun. ³³ Lúnti yebe giñe gudéme lan bouba bun quei bagúdemedun nun.” ³⁴ Ába lagáñidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

³⁵ Ába lásurun Jesúsu aríñageina.

—Ítara lúba giñe ladúga Núguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

19

Larúfudajan Jesúsu libügürü ígiraguni (Mr 10.1-12; Lc 16.18)

¹ Lárígiñe laríñaguni Jesúsu sun cátei le, ába lídin Galiléagiñe lun loúbawagun Judéa le lueígiñebeí oubaü le ñígiñe lubei laboucha wéyu libíti Jordán. ² Sarágu jáña gürígia afálaruti, ába lareídaguagüdüniña sánditiña ñi.

³ Ábati jayábin fiú fariséogu lúmoun Jesúsu áluga jáburügüdüni tídoun sádara, ába jálügüdüni.

—¿Según barítagan, gayáraatísan lígirunun gürígia lúmari lueígiñe furúmieguarügü cátei?

⁴ Ába loúnabun Jesúsu.

—¿Malíjangidün tídan Lerérun Búngiu luágu lúmagiñe lan furúmiñeti dan, dan le ladügünbaliña Búngiu gürígia, adúga lumúti wügüri, adúga würi? ⁵ Aríñagati giñe. “Ligía lígirubei lubei wügüri lúguchi túma lúguchu lun laganouñiwa túma lúmari, ábame jeréderun quei ábanrügü.” ⁶ Mámaaña

lubeíti biáma, ábanrügaaña. Ligía moún lubei lafánreinraguni wügüri le ladúnraguagüdübei Búngiu.

⁷ Ábati jálügüdüni.

—¿Cáti uágu laríñaga lilúrudun Moisés lun lan tíchugúniwa gárada lánina ígiraguni tun würi lun tigrín?

⁸ Ába laríñagun Jesúsu joun.

—Ladüga tidére janíge lánjarunbei Búngiu lun jígiragun jáma júmarigu, máma líña meja furúmiñe. ⁹ Naríñajare jun luágu furúmieguarügü lan le ígirutu lúmari ába lagámaridun ámu, ladügüña adultériu, mámarügaali ligía ladüga tagámaridun ligíbuagun, le giñe agámariduti würi to ígiraguaaru, ladügüña giñe adultériu.

¹⁰ Ábati jaríñagun láni disípulugu lun.

—Ánjein ítara líña lubei luáguti wügüri túma lúmari, buítimaati lubei lun magámaridun jamá gürígia.

¹¹ Ába laríñagun Jesúsu joun.

—Másutiña gayára jabágaridun mámariga, ja rügüñanu únbaña rújali lan Búngiu ubáfu. ¹² Ámuñegueinarügüti lébuna magámaridun jamá wügüriña, añájein, ítaragubeiñanu lúmagiñe jagüriajóun, jíbiri, adügüwarügüti joun, jíbiri, reideitiña magámaridunga lun jederegeragun jóungua le gumúti lun jesériwidun lun Búngiu. Le gabáfubei lun magámaridun lan, magámaridalá.

*Labíniruniña Jesúsu irájüñü
(Mr 10.13-16; Lc 18.15-17)*

¹³ Ába janügüniwa irájüñü lun Jesúsu lun líchuguni lújabu jawágu lúma lun layúmuragun lun Búngiu jawágu, ába jagúmeserun disípulugu adeinja joun ja anáajabaliña. ¹⁴ Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladüga ja jarúmabaña affíne quei irájüñü, jagía lílana arúejani le lánina siélu.

¹⁵ Ába líchuguni lújabu jawágu irájüñü jagía, lárigiñe, ába lídin lídaangiñe fulúsu ligía.

*Ladímurejan ában wügüri ñúraügili lúma Jesúsu
(Mr 10.17-31; Lc 18.18-30)*

¹⁶ Ába lídin ában wügüri ñúraügili aríjei Jesúsu, ába laríñagun lun.

—Maésturu buíti, ¿cásan cátei buíti lúnbei nadügüni lun nibíjini ibágari le magúmuchaditi?

¹⁷ Ába laríñagun Jesúsu lun.

—¿Ca uágu baríñaga nun “buíti”? Ában rügüñein buíti, Búngiu. Ánjein busén bubei bibíjini ibágari magúmuchaditi, gúnfulibá lúma gumádi.

¹⁸ Ába laríñagun wügüri ligía lun.

—¿Cáteigi buri?

Ába laríñagun Jesúsu lun.

—Máfarajabá, magámaridabá würi gámaritu, míwerujabá, madímurejabá iyéeni luágu ní ában, ¹⁹ inébe jamá bagübürigu bun, jínsiñe jagíame gürígia bíledigu bun quei bínsiñegua búngua.

²⁰ Ába laríñagun lun.

—Gúnfuli numúti sun le lúmagiñe ñúraügidina, ¿cági ámu nemégeirubei?

²¹ Ába laríñagun Jesúsu lun.

—Ánjein busén bubei buídu ban le gumúti, alúgurabeí sun le búmabei, ábame bíchuguni lebégi joun gudémetiña, ábame bibíjin irisini siélu, ábameti biábin, ábame bafálarunina.

²² Dan lagáambunbalin wügüri ligía cátei le, májati, ladüga weíribalin Jesúsu cába lan ladügi irisín, ába lídin láu íruni.

²³ Ábati lariñagun Jesúsu joun láni disípulugu.

—Nínárün jáu luágu jénreengu lan lun lebéllurun ában rísiti lídoun arúejiani le lánina siélu. ²⁴ Aríñagaya numúti jun luágu ménreenguntima lan lásügürün ában caméyu lídaangiñe lujúyun ában agúsa, sügü láu lebéllurun ában rísiti lídoun arúejiani le lánina siélu.

²⁵ Dan jagáambuni disípulugu cátei le, ába laweíridun jan-balin Jesúsu cába lan ladügi sarágu, ába jalügüdagun jámagua.

—¿Cáteiti gayáraabei lasálbarun?

²⁶ Ába lariñaguniña Jesúsu, ába lariñagun joun.

—Siñátí jasálbaragun gürígia jóungua, ánjein Búngiu, gayára lumúti sun cátei adüga.

²⁷ Ábati lariñagun Pédro lun.

—Nabúreme, wagía, ígira wamáali sun lé meja wámabei lun wafálarunibu. ¿Cábasanti wabíja?

²⁸ Ába lariñagun Jesúsu joun.

—Nínárün jáu luágu lídan dánme dan ligía dánme iséri lan sun cátei, dánme le nañúurun, áu le Wügüri Garaúwarügüti luágu nála yágüta siélu lun narúejian láu sun nuweírigun, jugúya le afálarubalina jañúuruba giñe luágu dúusu jalaú lun jagúseragüdüniña dúusugubei láni Israél türíbu. ²⁹ Súnti ja ígíraañábaña jában, o jamúleno, o játunu, o jagübürigu, o jasáanigu, o jamúan, nuágu, jerésibiruba san weíyaasu lánwoun, resíbi jameíme íbágarí magúmuchaditi.

³⁰ Áni sarágu jáña ja furúmiñetiñábaña guetó, jagíaba agúmujoúni, sarágu ja agúmujoúnibaña guetó, jagíaba furúmiñe.

20

Jémpulu jawáguți ñadágimeintiña

¹ Ába lariñagun Jesúsu.

—Ítara líña arúejiani le lánina siélu quei ában labúreme ichári le áfurídubei bináafingua áluaja ñadágimeintiña lun talúbajoún linádirigu. ² Ába ladügün darádu jáma ñadágimeintiña lun líchugun fiádürü joun luágu wéyu, ába louñajaniña ñadágimein lichárirugu. ³ Lárigiñe, ábaya láfuridun quei buri ladaúnrun néfu bináafin, ábaya ladárirun ámu wügüriña mafísiutetiña, mágidirugu. ⁴ Ába lariñagun joun. “Jeíba giñe ñadágimein nichárirugu, ábame nafáyeiruni lebégi juwádigimari jun.” Ába joúdin. ⁵ Ábaya láfuridun amídirugu, furí ligía ladaúnrun ürúwa rábounwéyu, ligía méme ladüga. ⁶ Quei buri ladaúnrun seíngü rábounwéyu, ábaya lídin mágidirugu, ábaya ladárirun wügüriña mafísiutetiña ñi, ába lariñagun joun. “¿Cásan uágu yá jubei sun wéyu mawádigimari?” ⁷ Ába jaríñagun lun. “Úagili ni ában álugutiwa.” Ába lariñagun joun. “Jeíba giñe ñadágimein nichárirugu, ábame nafáyeiruni lebégi juwádigimari jun.” ⁸ Dan le lagúñedunbei, ába lariñagun labúreme ichári lun jábuti ñadágimeintiña. “Wába joun ñadágimeintiña, fáyei bámugaña, bagúmeserame jámagiñe ja atátirubaña agúmujoúni, bagúmuchame jáma ja

atátirubaña furúmiñe.” ⁹ Ábati jayábin ja atátirubaña ñadágimein quei buri ladaünrün seingü rábounwéyu, ába jibíjin fiádürü cáda ában. ¹⁰ Lárigiñe, dan le lachülürün jadáani ja atátirubaña furúmiñe, ába jaritagun luágu gibetimaabei lan jabíjin. Ába gíñe jabíjin fiádürü cáda ában. ¹¹ Dan le jerésibiruni jaseínsun, ába magúndan jamá lúma labúreme ichári, ¹² ába jaríñagun. “Ja ñubinbaña agúmujoúni, ában rügüñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lísüga sun wéyu.” ¹³ Ába loúnabun labúreme ichári, ába laríñagun lun ában jádaangiñe. “Numáda, máma nadügüña ni murúsun maríchaü jun. ¿Ma funági luágu ában fiádürü jadüga darádu núma? ¹⁴ Barüjumei jiseínsun, jeiba. Nafáyeiruñanu ja atátirubaña agúmujoúni quei nafáyeirunün ladüga ítara líña lan nabúseerun. ¹⁵ ¿Maríchatina funági lun nadügüni le nabúseerun láu niseínsun? ¿Ódi gimúgatün ladüga nubuidun?” ¹⁶ Ítara líña lubeíti, sarágu jáña ja agúmujoúnibaña guetó, jagíaba furúmiñetiña, sarágu jáña gíñe ja furúmiñetiñábaña guetó, jagíaba agúmujoúni. Ladüga sarágu jáña agúarútiña áni mibetiña anúadirútiña.

Ladímurejaanya Jesúsu luágu loúnwen

(Mr 10.32-34; Lc 18.31-34)

¹⁷ Dan le niján lan Jesúsu luágu üma lun Jerusaléoun, ába ladíñurun jáu láni dúusu disípulugu jawei ja jíbiri güriáa ja luágubaña üma úara jáma, ába laríñagun joun.

¹⁸ —Quei lubei jaríjini, aweínreina wáña Jerusaléoun le ñiba lubei nederegerúa, áu le Wügüri Garaüwarügüti, joun jábutigu jafádirigun juríu lúma joun arúfudajatiña lilúruden Moisés, ja lúnbaña jasiadirunína lun noúnwen. ¹⁹ Ábame jederegerunina joun ja mámabaña juríu lun jéjerajan náu, áfara jamáname, ábame jádaragunina luágu gurúwa, áni násaaruba lidaangiñe ouweni luágu lürüwan wéyu.

Le tamúriajabei jáguchu Jacóbo láu Juan lúma Jesúsu

(Mr 10.35-45)

²⁰ Ábati tiábin jáguchu Jacóbo láu Juan, ja lisáanigu Zebedéo, lúmoun Jesúsu jáu tisáanigu, ába tájuduragun lun tamúriajan ában fuleísei lúma. ²¹ Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában lueígiñe boúnwenren, ában lueígiñe bubaüna yágüta lídan barúejjan.

²² Ába laríñagun Jesúsu joun.

—Ibidiñeti jun ca lan jamúriajabei. ¿Gayáraati jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

Ába jaríñagun.

—Gayára wabei.

²³ Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, ánjeinti lun jañúurun lueígiñe noúnwenren lúma lueígiñe nubaüna, máma áu lúnbei níchuguni, líchugúaba joun ja ubáabaña laráanserei Búngiu.

²⁴ Dan le jagáambunbalin jíbiri dísi disípulugu cátei le, ába jagáñidun jáma bián amúlenugu jagía. ²⁵ Ába lagúarun Jesúsu joun, ába laríñagun joun.

—Queisi jasúbudiruni, ja agúmadijabaña jádan ja mámabaña juríu arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ²⁶ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ²⁷ Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri ²⁸ itara quei máma lan niábiña, áu le Wügüri Garaúwarügüti, lun nesériwidúniwa, niábiña lun nesériwidun lúma lun níchuguni nibágari lebégame jasálbarun sarágu.

Lareídaguagüdüin Jesúsu bián maríjintiña

(Mr 10.46-52; Lc 18.35-43)

²⁹ Dan le áfurideina jabei Jesúsu jáma láni disípulugu Jericógiñe, sarágu jáña güriña afálaruti Jesúsu. ³⁰ Níñanu bián maríjintiña ñun láru ũma, dan le jagáambun luágu Jesúsu lan le ásügürübei, ába jagúaragun.

—¡Wabúreme, ladügawagun Davíd, gudéme wamá bun!

³¹ Ába jadeínjan güriña joun lun jámanichun, ligíatima jagúaragun.

—¡Wabúreme, ladügawagun Davíd, gudéme wamá bun!

³² Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadügün jun?

³³ Ába jariñagun lun.

—Wabúreme, buséntiwa waríjin.

³⁴ Ába jagúmededagun lun Jesúsu, ába lagúurun luágu jágu. Lúmagiñe óra ligía ába jaríjin, ába jafálaruni.

21

Lebélurun Jesúsu Jerusaléoun

(Mr 11.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachúlürün ligíbugiñe fulásu le giríbei Betfajé, le únabubei libíti wübü le Olívos, ² ába laríñagun Jesúsu joun biáma jádaangiñe láni disípulugu.

—Jeiba lídan liraúraü fulásu le wagíbugiñebei, jadáriruba ában burígü güiráñu ñi láu ában liraúraü burígü túma, ábame jafáragaduniña, ábame janügüniña nun.

³ Ánjein ñi adímurejati jun luegiñe jadügüni, ábame jaríñagun lun luágu busén lániña Jesúsu, luágu láguyugüdúbaña lan.

⁴ Lasúseredunbei líra lun lagúnfulirun lé meja laríñagubei proféta dan le labürüjanbei itara.

⁵ Aríñaga jumá lun ubúruğu Sión.

“Niteín Burúeite bun láu únabuni,

wariñu lanágawagu ában burígü,

wariñu luágu ában liraúraü burígü, anímaalu anájati ílaü.”

⁶ Ába jóudin disípulugu, ába jadügüni quei laríñaguni Jesúsu joun. ⁷ Ába janügünun burígü tugúya láu sun tiraü, ába jíchugunun janáangun jawágu, ába lawárirun Jesúsu. ⁸ Sarágu jañáti güriña, ába jábudunun janáangun luágu ũma, jíbiri, ába jáchuajan tilímun wéwe, ába jíchaajani luágu ũma. ⁹ Dánda güriña ja ubáraübaña quei ja árigibaña, ába jagúmeserun agúaraja.

—¡Uweiriguni lun ladügawagun urúei Davíd! ¡Biníwati wügüri le ñübinbei lídan líri Wabúreme Búngiu! ¡Uweiriguni lun Búngiu!

¹⁰ Dan lebélorun Jesúsu ubúrugun Jerusalén, ába jafúudun sun ja ñíbaña, ába jaríñagun sarágu.

—¿Cáteisán gürígia le?

¹¹ Ába jaríñagun gürígia.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünnun Jesúsu témpulu

(Mr 11.15-19; Lc 19.45-48; Jn 2.13-22)

¹² Lárigiñe, ába lebélorun Jesúsu tídown láni Búngiu témpulu, ába labúgaguniña sun alúgurajatiña jáma agáñijatiña ja ñíbaña. Ába lagáragaguni dábula buri le jadábulan asáansijabaña seínsu ñi joun gürígia, lúma jála ja alúgurajabaña únjun.

¹³ Ába laríñagun joun.

—Laríñajare Búngiu tídan Lerérun. “Núban fulásu le ñi lubei gayára lan jayúmuragun gürígia nun”, ánjein jugúya, barü jumaaru quei jában jíwerutiña.

¹⁴ Ába jayábin fiú maríjintiña jáma danímaatiña lúmoun Jesúsu ñi témpulurugu, ába lareídaguagüdüniña. ¹⁵ Dan le jaríjinbaalin jábutigu fádirigu jáma arúfudajatiña lilúrudun Moisés miláguru buri le ladágubei, lúma dan le jagáambuni jagúarajan irájüñü témpulurugu. “¡Uweírighuni lun ladügawagun urúei Davíd!”, ába jagáñidun. ¹⁶ Ába jaríñagun lun Jesúsu.

—¿Agáamba bumútisan le jaríñagubei ja?

Ába laríñagun Jesúsu joun.

—Ánja, agáamba numúti. ¿Malíjan jumágili tídan Lerérun Búngiu le ñi lubei laríñawagúla lun Búngiu.

Adúgaadibu lun jerémujan ñübürigiña jáma irájüñü ja machúlaagiña, cátei buíti buágu?

¹⁷ Ába lígiriñe, ába lídin ubúrugugiñe lun Betánioun, ába lásügürüni árieibu ñi.

Líñaragunun Jesúsu tídibu ígo to mínboun

(Mr 11.12-14, 20-26)

¹⁸ Larúgan bináafin, dan le lagíribudun Jesúsu ubúrugun, ába lalámachun.

¹⁹ Ába laríjin ában tídibu ígo láru úma, ába lídin tuágun, madáriti ni cáta tuágu lueídügüya ubánaü. Ába laríñagun tun tídibu ígo tugúya.

—¡Magúindadügüyabá!

Lídan óra ligía ába tásaurün. ²⁰ Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída liñásan tásaurübei tídibu ígo to ítara oufun?

²¹ Ába laríñagun Jesúsu joun.

—Nínárün jáu, ánjaün afiñe le gumúti, mámarügübei líbe le nadügübei tun tídibu ígo to gayára jumá adúga, gayáraabei jaríñagun lun wúbü le. “Gidába yágiñe, dabúba baránajoun”, ábame lasúseredun. ²² Súnme gíñe cátei le jamúriajan lúma Búngiu, ánjein afiñe jubeí, jibíjubei.

Lubáfu Jesúsu

(Mr 11.27-33; Lc 20.1-8)

²³ Ábati lebélorun Jesúsu témpulurugun, dan niján lan arúfudaja ñi, ába jayábin jábutigu fádirigu jáma wügüríña ábutigu lídan jafiñen jurú, ába jaríñagun lun.

—¿Aríñagabei woun ca lan biríchabei lun badügüni cátei le? ¿Ca íchugubalin ubáfu le bun?

²⁴ Ába laríñagun Jesúsu joun.

—Nálügüdaadün giñe ában cátei, ánjein jounaba nun, ábame naríñaguni jun ca lan áu ubáfu nadúgei buri cátei le. ²⁵ ¿Ca oúnajabalin Juan abásteragüdaja? ¿Búngiu, ódi wügüríña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan oúnajabalin, laríñaguba woun ca lan uágu maffínerun wabeí lun. ²⁶ Ánjawa aríñaga luágu jounajan lan wügüríña, jouserubadiwa gürígia wuríba ladüga súngubei affíñetiña luágu proféta lán.

²⁷ Ábati jaríñagun lun Jesúsu.

—Ibídíñeti woun.

Ába giñeti laríñagun joun.

—Mariñagun nubeí giñéti jun ca lan áu ubáfu nadúgei buri cátei le.

Jémpulu jawáguti bián isáanigu

²⁸ Ába laríñagun Jesúsu joun.

—Nabájüdagua ában cátei jun, jaríñageime nun ída líña lan jaríjin lun. Níñein ában wügüri, biámañanu lisáanigu. Ába laríñagun lun ában jádaangiñe. “Niraü, beíba ñadágimein ugúñe lídan talúbajoún ninádirigu.” ²⁹ Ába laríñagun lisáani lun. “Mabúseeruntina nídin.” Lárigiñe, ába lasáansiragun larítangun, ába lídin ñadágimein. ³⁰ Lárigiñe, ába lídin úguchili aríjei le ában, aríñageinaleí le méme laríñagubei buga lun le furúmiñeti lun. Ába loúnabun le. “Ánja, nídiba.” Mídinti. ³¹ Aríñaga jumeí nun, ¿cági jádaangiñe biángubei adügübalin le labúseerubei úguchili?

Ába jaríñagun.

—Le furúmiñebei.

Ábati laríñagun Jesúsu joun.

—Nínárün jáu luágu chouútima lan jebélurun agúburajatiña liseínsuna gumádi jáma jórugu lídoun larúejan Búngiu sügü jáu, ³² ladüga ñúbinti Juan le abásteragüdajabei arúfudaja jun ída lúba lan ligáburí jabágaridun, maffíneruntün lun, ánjañati ja agúburajabaña liseínsuna gumádi jáma jórugu, affíñeratiña lun. Jugúya, láu sun aríja jumáni sun líra, masáansiragunti jigáburí lun jaffínerun lun.

Jémpulu jawáguti ñadágimeintiña ja wuríbabaña

(Mr 12.1-12; Lc 20.9-19)

³³ ‘Agáamba jumeí ábaya jémpulu le. Luáguti ában wügüri labúreme ában ichári, ában labunagun tídibu beíbei lichárirugu, ába ladügün barieru láu, adüga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

‘Ába lájayajani ichári joun ñadágimeintiña, ába lídin adüga weíyaasu. ³⁴ Dan le lachülürün dan lun alúbajani, ába loúnajan jádaangiñe lumúsuniña amúriajei lufánran jámagiñe ñadágimeintiña. ³⁵ Ábarüga járügüdúniña ñadágimeintiña músu jagía, buleísei jameí ában, áfara jameí ában jilágubei, rúgua jagía dúbü luágu le ában. ³⁶ Ábaya loúnajan labúreme ichári gíbetimaajaña sügü jáu ja loúnajabaña furúmiñe, ligía méme jadüga ñadágimeintiña joun.

³⁷ ‘Agúmujoúni, ába loúnajani liraü, ába laríñagun lúnguarügü. “Inébebei niraü joun.” ³⁸ Dan le jaríjinbaalin ñadágimeintiña liraü, ába jaríñagun jámagua. “Nijánba le erésibirei alágan, wáfaraali jilágubei, reídei wamámuga láu alágan.”

³⁹ Ábati járügüdúni, ába jaságaruni lídaangiñe ichári, ába jáfaruni jilágubei.

⁴⁰ Ába lálügüdajan Jesúsu.

—Dánmeti liábin labúreme ichári, ¿cábagi ladüga jáu ñadágimeintiña ja?

⁴¹ Ába jariñagun lun.

—Láfaragubaña wuríbatíña jagía jilágubei, magúdemedagúnbaña lun, ábame lájayajani ichári joun ámu ñadágimeintiña ja lúntiña jedéregeruni lufánran lun lídaangiñe alúbajani lídan dan.

⁴² Ábati lariñagun Jesúsu joun.

—¿Malíjañaja jumágiru Lerérun Búngiu? Tariñajare nuágu.

Le meja dúbü le mabúseerun jabeí ábunagutiña, ligíaali furúmiñeti.

Wabúreme Búngiu adügübalin lun furúmiñebei lan, áni aríja wamúti quei ában cátei weírigitu.

⁴³ Ligía nariñagunbei jun luágu lagídarúaba lan larúeijan Búngiu jueí, jugúya le weírigitubei lídan jafíñen juríu, ábame líchugúniwa joun gürígia ja edéregeruti alúbajani le láni larúeijan Búngiu. ⁴⁴ Ánjeinti áu, le dúbü ligía, furúmieguarügü le eiguaduti nuágun lañaürudagúba, léti uáguti leíguada nigáñi, lagúmchaguagüdübei. Ligíaba asúsereda joun gürígia ja májabaña nun.

⁴⁵ Dan le jagáambunbalin jábutigu fádirigu jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja. ⁴⁶ Ábati jabúseerún yebe járügüdüni, madügün jamúti ladüga janúfude jaweí gürígia, ladüga affíne jamá gürígia luágu proféta lan.

22

Jémpulu luáguti maríei

¹ Ábaya lagúmeserun Jesúsu adímureja joun láu jémpulu, ába lariñagun joun.

² —Nijánya ában jémpulu luáguti arúeijani le lánina siélu. Níñein ában urúei adügüti ában fédu lubá lamárieidun lisáani. ³ Ába loúnajaniña lumúsuniña ougaña amísurajoútiña, májatiña amísurajoútiña jayábin. ⁴ Ábaya loúnajan ámu músu, ába lariñagun joun. “Aríñaga jumá joun amísurajoútiña luágu aráanseeli lan eíjini. Áfaragüda náaña bágasu jáma nilügüniña anímaalugu dibúnetiña, aráanseeli sun cátei, lun jayábin maríeirugu.” ⁵ Madügüntiña amísurajoútiña gásu. Ába lídin ában jádaangiñe lichárigu, ñüdün ában adüga ámu wadágimanu, ⁶ ja jíbiri, ába járügüdüniña lumúsuniña urúei, ába jouseruniña wuríba, ába jáfaraguniña jilágubei. ⁷ Ábati lagañidun urúei sarágu, ába loúnajaniña lisúdaaranigu áfaraguaña gáfarajatiña jagía jilágubei lúma águdei jageíra. ⁸ Ába lariñagun joun lumúsuniña. “Aráanseeli sun cátei lun maríei, áni amísurajoútiña jagüra madúnamatiña lun jamísurajoúniwa. ⁹ Jeíba lubeíti luágu buri larígei úma, ábame jamísurajaniña sun ja úmatiña jadúnragua.” ¹⁰ Ába jouidin músu luágu buri úma, ába joundaruniña sun ja úmabaña jadúnragua, butiña jáma wuríbatíña, ába tabuínchun múna jáu gürígia.

¹¹ Ábati lebélorun urúei aríjaña amísurajoútiña, ába laríjin ában wügüri le madáuragunti quei lun ában maríei ñi. ¹² Ába lariñagun lun. “Numáda, ¿ída liñági bebélurunbei ñájoun madáuragunga quei lun ában maríei?” Maní ligía. ¹³ Ába lariñagun urúei joun ja eténirubaña lún buri dábula. “Gürágu jumeí lugúdi lúma lújabu, fijumeí lídoun lubúriga le bougudíbei, le ñíba lubeí layájuaa, acúnrijame lári.” ¹⁴ Ába lariñagun Jesúsu joun ja agáambubalin.

—Gíbetiña agúarútiña lun jebélurun lídoun larúeijan Búngiu, míbetiña anúadiruña.

Luáguti lafáyeirun liseínsuna gumádi
(Mr 12.13-17; Lc 20.20-26)

¹⁵ Ába jóudin fariséogu, ába júaradun aríja cába lan gayára lan jadügün lun jariñagagüdüni Jesúsu cátei le uáguti gayára lan jadárirun lidúnrun. ¹⁶ Ábati jóunajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan bariñagubei, luágu gíñe arúfuda báani lémeri Búngiu láu inárüni, manúfudeiga lueí ni ában, ladüga ni cáta lan luweírigan gürgia bun. ¹⁷ Rúbei lubeíti barítangun woun. ¿Buítisan lun lafáyeirúniwa seínsu lun urúei Rómana ódi mabuídunti?

¹⁸ Ariágu líña Jesúsu lun luríba jayúmajan, ába lariñangun joun.

—¿Biángua tigíbu jugúya le! ¿Ca uágu jíchaaja sádara nubá? ¹⁹ Arúfuda jumei seínsu le áubei lafáyeijoua liseínsuna gumádi nun.

Ába janügün ában seínsu le denáriu lun. ²⁰ Dan larijini, ába lálügüdüniña.

—¿Ca iyáwa le luágubei seínsu le, lúma íri le bürüwafubei luágu?

²¹ Ába jariñangun lun.

—Láni urúei Rómana.

Ábati lariñangun Jesúsu joun.

—Rújumeiti láni urúei lun urúei, rújumeime láni Búngiu lun Búngiu.

²² Dan jagáambunbalin le, ába laweíridun janígi, ába jígiruni, ába jóudin.

Álügüdajani libügürü ásaaruni lídaangiñe óuweni
(Mr 12.18-27; Lc 20.27-40)

²³ Wéyu méme ligía, ába jóudin fiú saduséogu aríjei Jesúsu. Jariñajare saduséogu luágu úa lan ásaaruni lídaangiñe óuweni. Ábati jariñangun lun Jesúsu.

²⁴ —Maésturu, ariñagati meja Moisés luágu ánjein lan óuwe ában wügürí le maríeiti masáaniguga táu lúmari, lúnti lan lamárieidun lamúlen túma würi to ueíbound louwe, lun gasáanigu lan táu lun líbugaña le óuwebei. ²⁵ Wel, ñíñanu méjati sédü gamúlenuguátiña ya wádan, ába lamárieidun le furúmiñeti, ába louñwen. Quei masáanigu lubei táu lúmari, ába lígirunun lun lamúlen.

²⁶ Ligía méme suséreti lun jabíaman, lárigiñe lun júrüwan darí lúmoun jasédün.

²⁷ Lárigiñe, ába gíñe touñwen würi. ²⁸ Dánmeti jásaarun lídaangiñe óuweni, ¿cábatí úmari würi tugúya jádaangiñe sédü gamúlenuguátiña ja, lárigiñe maríei jamá sun jagía túma?

²⁹ Ába lariñangun Jesúsu joun.

—Bulíeiguatün ladüga libídiñe tuáguti Lerérun Búngiu jun, ni luáguti lubáfu Búngiu. ³⁰ Dánme le jásaarun jílaaña lúnya jabágaridun, ámujalime jabágarí, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu. ³¹ Ánjeinti luágu sará jamá jílaaña lúnya jabágaridun, ¿malíjan jumágili le lariñagubei Búngiu gúanarü jun? Ítara líña lariñangun. ³² “Áu Lubúngiutebei Abrahám, Lubúngiute Isáac, Lubúngiute Jacób.” Ítara líña lubeíti, ánjein jamúga jílaañu jáña lubei wügüríña jagía lun sun dan, maríñagunti jamúgati Búngiu luágu Jabúngiute lan, ladüga máma Jabúngiute jílaguaaña Búngiu, Jabúngiute wínwangaña.

³³ Dan jagáambunbalin gürgia cátei le, ába laweíridun janígi láu le larúfudajabei.

Gumádi le weírigutimaabei
(Mr 12.28-34)

³⁴ Dan le jasúbudirunbalin fariséogu luágu manígüda láaña lan Jesúsu saduséogu, ába jóundaragun, ³⁵ ñíñein ában jádaangiñe le arúfudajati lilúrudun Moisés, abúseeruti laríjin lábun Jesúsu, ába laríñagun lun.

³⁶ —Maésturu, ¿cásan gumádi weírigutimaabei lídan lilúrudun Búngiu?

³⁷ Ába laríñagun Jesúsu lun.

—“Jínsiñelá Babúreme Búngiu bun táu sun banígi, táu sun buwáni, láu sun bisáminan.” ³⁸ Niján gumádi weírigutimaabei, furúmiñeti giñe lídaangiñe sun lugúmadin Búngiu. ³⁹ Áni le libíaman lídan uweíriguni lenége le, itara líña. “Jínsiñe jamá bibirigu bun quei bínsiñegua búngua.” ⁴⁰ Bían gumádi le, ligía ébuubei lun sun lilúrudun Moisés lúma jarúfudajan profétagu.

¿Ca adügawagun Crístu?
(Mr 12.35-37; Lc 20.41-44)

⁴¹ Sun añája lan fariséogu oúndaragu, ⁴² ába laríñagun Jesúsu joun.

—¿Cásan jarítagebei libügürü Crístu le lanúadirubei Búngiu lun lasálbaruniña gürígia? ¿Cásan adügawagun?

Ába jaríñagun lun.

—Ladügawagun Davíd.

⁴³ Ábati laríñagun Jesúsu joun.

—¿Ída liñáti lagúarunbalin Davíd quei Abúremein, láu lubáfu Sífiri Sándu? Aríñagatiga Davíd.

⁴⁴ Laríñajare Búngiu lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

⁴⁵ ¿Ída lubáti ladügawagun lan Davíd Crístu ánjein wá lubali Davíd guánarü Crístu Nabúreme?

⁴⁶ Úati ni ában gayáraati loúnabun ni ában dimúrei, lúmagiñeti wéyu ligía, manígiti ni ában lun liábin álügüdaguei.

23

Líchugun Jesúsu jadúnrun fariséogu jáma arúfudajatiña lilúrudun Moisés
(Mr 12.38-40; Lc 11.37-54, 20.45-47)

¹ Ábati laríñagun Jesúsu joun láni disípulugu jáma jíbiri gürígia ja ñíbaña.

² —Gabáfutiña arúfudajatiña lilúrudun Moisés jáma fariséogu lun jafúnraanguagüdüni líla lilúrudun Moisés. ³ Agáamba jumáña lubeiti, adüga jumeime sun le jaríñagunbei jun, le jadügübei, mafálara jumei ladüga aríñagatiña ában cátei, jadüga ámu. ⁴ Rújamuti gumádi joun gürígia queisi anügüni jürüti le siñábei lanügüniwa, ánjein jagía, madügüntiña ni cáta lun jíderaguniña gürígia luágu buri anügüni lánina lúrudu le jíchugubei jawágu. ⁵ Jadügüni sun cátei lun jaríjiña gürígia. Jínsiñeti joun lun jíchugun tirájüñü gáfu táu Lerérun Búngiu jeréberugu lúma luágu buri jarüna, lúma lun jádúragun anáanguni to durúrutu. ⁶ Buséntiña járügüdüni lubuídun-ágei ubáraü lídan eígini lúma jalaü le jála weírigutiña tídan jalígílin. ⁷ Buséntiña lun jabúsurun gürígia joun láu sarágu inébesei úmada, lun giñe lagúarúniwa joun, “maésturugu”.

8 ‘Ánjein jugúya, mígira jumá lun laríñawagúniwa jun, “maésturugu”, ladüga sun jugúya ában jáu, áni ában rügüñein giñe Jumaésturun, áu le Crístubei. 9 Mariñaga jumá giñe “núguchi” lun ni ában wügüri ubouágu lídan ligáburu jagúaruni Búngiu le siélubei “Núguchi”. 10 Mígirun jugúyame lun laríñawagúniwa jun “ábutigu” ladüga Crístu rügüñein Jábuti. 11 Le eséridubei joun jíbiri, ligía weirigutimaabei jídan, 12 ladüga le anáanguti lúngua weíri, lúnabudagüdúwaba, ánjein le anáanguti lúngua únabu, laweíridagüdúwaba.

13 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! ladüga darú jumuti lubéneri arúejani le lánina siélu luei jebélurun ámu, mebélú jugúyati, mígirun lun jebélurun ja busénbaña jebélurun.

14 ‘¡Fugiábugu jugúya, arúfudajatiña lilúrudun Moisés jáma fariséogu! ¡Biángua tigíbu! Gídá jumutu jában wúríña ja jiláaña úmari jaweí, lúnti ibidiñewa lan, ába jadáagun ayúmuraguni lun Búngiu le migínaguti. Ligía weiritimaabei lubei jasúfurirun lueígiña.

15 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Eíbuga jumúti múa, áfayaja jumeí barána áluaja gürígia lun jánigume, dánti le ibíja jumáli le jabúseerubei, ába jadügüniña gürígia jagía bián weíyaasu lúntima jóúdin máfiougati sügü jáu.

16 ‘¡Fugiábugu jugúya, adúndejetiña maríjintiña! Aríñagatün luágu le lan gürígia íchuguti dimúrei, ánjein áfiñura tuágu témpulu mála lan líra, áni ánjein lan áfiñura luágu tigóluna témpulu, aná lan líra, lúnti lan lagúnfulirun. 17 ¡Ibídiougua líña jáu, maríjin! ¿Cági weirigutimaabei, gólu ódi témpulu to adügüboun lun sagraúbei lan gólu? 18 Aríñagatün giñe luágu ánjein lan íchiga gürígia dimúrei lun láfiñurun luágu latárü, mála lan líra, áni ánjein lan áfiñura luágu cátei le adágaragüdúwabei luágu latárü, aná lan líra, lúnti lan lagúnfulirun. 19 ¡Ibídiougua líña jáu, maríjin! ¿Cági weirigutimaabei, cátei le luágubei latárü ódi latárü le adügübalin cátei ligía lun sagraúbei lan? 20 Le áfiñurubei luágu latárü, máma rügüñein luágu latárü láfiñurun, láfiñuruña giñe luágu sun le ligíbuagubei latárü. 21 Le giñe áfiñurubei tuágu témpulu, máma rügüñein giñe tuágu témpulu láfiñura, láfiñuruña giñe luágu Búngiu le aganoubei tídan. 22 Le giñe áfiñurubei luágu siélu, láfiñuruña giñe luágu lála Búngiu, lúma giñe luágu Búngiu le añúurubei luágu jalaü ligía.

23 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün díisi fáreinti láu jíduru le ménta, anísi, lúma comíno lun jíchugun ában fáreinti lun Búngiu, áni mebéresentün láu arúfudajani le weirigutimaabei lídan lilúrudun Búngiu, quei buri lun jadügüni sun cátei láu úraguni, lúma lun jagúdemedun gürígia jun, lúma lun jagúnfulirun lúma Búngiu. Ligía buri cátei le lúnbei jadügüni, mígirunga jumeíme jadügüni le líbiri. 24 ¡Jugúya, adúndejetiña maríjintiña jugúya le, áseija jumúti ában mínímini áni julútün ában caméyul

25 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün lun jarítangun gürígia luágu buídu lan jigáburu. Ítara jíña quei wéru lúma asíedu le jachíbubei bougudigiñe libíti, ánjein múnadagiñe jíbíti, buin jíña láu buri luweínamu-águu lúma lúma íweruni. 26 Fariséogu maríjintiña. jarúmagüda jumeí wéru lúma asíedu lurágeirugugiñe furúmiñe, ábame giñe larúmadun bougudigiñe libíti.

27 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Ítara jíña quei umúajaü le afeíndijóuti láu jarúti bougudigiñe libíti,

buídumeraüti larijín, ánjein lurágeirugugiñe, buín líña láu jábu jiláaña lúma sun luwúyeri iwíyei. ²⁸ Ítara jíña, bougudigiñe jibíti, ma lubuídun jarijiniwa jagíbugiñe gürígia, ánjein múnadagiñe, buín jíña láu iyéerejabuni lúma wuríbani.

²⁹ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Rújumuti dúbü arítaguagüleme luágu jamúaja profétagu, wéndegüda jumei umúajaü le jáni gürígia já meja buídubaña. ³⁰ Ábati jariñagun. “Lun jamúga meja awánjeinjadiwa lan le jadáani binádu wagübürigu, míderagun wamútiña jamúga áfaraguaña profétagu.” ³¹ Láu líra, subúdiguatün júngua luágu jádaangiñetün lan ja áfaragubaliña profétagu jagía. ³² ¡Gumújumeiti jadügüni lé meja jagúmeserubei binádu jagübürigu adúga!

³³ ¡Jéwegu! ¡Jarásan jéwegu! ¿Ída lubásan jeséfurun luei asúfuriruni le lánina máfiougati? ³⁴ Ligía nouñajaba lubei profétagu, jáma ja chúbaña áu, jáma arúfudajatiña, jun. Áni jugúya, jáfaragubaña jádaangiñe, dágua jumáñame jíbiri luágu gurúwa, bei jumáñame jíbiri tidan jalígilisin juríu, eibaaja jumáñame lídan sun fulásu. ³⁵ Ítara lúba láburuhan dúru juágun luágu sun jítaü le áwiyurubei jádaangiñe sun wügüriña buítiña ja jáfarawagúbaña, lúmagiñe meja Abél le richáguabei darí lúmoun Zacarías, liraü Berequíás lé meja jáfarubei tabádinagua témpulu lúma latárü. ³⁶ Ninárün jáu luágu láburrjaba lan dúru jawágun gürígia ja lánina dan le luágu buri sun cátei le.

Layájun Jesúsu jawágu lílana Jerusalén
(Lc 13.34-35)

³⁷ ¡O jugúya Jerusalénna! ¡Áfaragua jumáaña profétagu, chügua jugúya dúbü jawágun ja louñajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁸ Ígira láadün Búngiu, ³⁹ áni nariñajare jun luágu marijindügüya jumáadina lan queisi jasálbaragüle daríme lachülürün dan lun jariñagun. “Biníwati le ñübinbei lídan líri Wabúreme Búngiu.”

24

Lariñagun Jesúsu luágu tagünrinchawagúba lan témpulu
(Mr 13.1-2; Lc 21.5-6)

¹ Dan le láfuridun Jesúsu témpulurugugiñe, leíbuga yebe, ligía jayábin láni disípulugu lúmoun, ába jarúfudun tuágun témpulu lun. ² Ába lariñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dúbü ligíbuagu dúbü, tagünrichawagúba sun to.

Seíni buri lubáragiñe lagúmuchun ubou
(Mr 13.3-23; Lc 21.7-24, 17.22-24)

³ Ábati jóúdin luágu wübü Olívos, dánti ñun lan Jesúsu ñi, ába jóúdin láni disípulugu agülülüja lúma, ába jariñagun lun.

—Buséntiwa lun bariñaguni woun ídaba lan tagünrinchawagúba témpulu. ¿Cába liseíni bagríbudun ubouagun, lúma lagúmuchagüle?

⁴ Ába lariñagun Jesúsu joun.

—Toúnigi jumá lun úa lan ayéedutün, ⁵ ladúga sarágujaba ñübintiña aríñageina. “Áu Crístubei”, áni sarágujaba jayéedun. ⁶ Jugúya jagáambuba lamúri wuríbu yaráfa jun lúma ugánu luáguti buri wuríbu díseti juei, manúfudedagua

jumá. Lúnti ítara lan, mámagilíme lagúmuchagüle ubou líra. ⁷ Lageíndaguba ában ageíraü lúma ában, lawúribujaba ában fulásu lúma ában, ñbei ilámaü, sándi, járabaganáli lídan sarágu fulásu. ⁸ Sun líra lagúmesejarügügli le lúnbei lasúfurirúniwa.

⁹ Jugúyati, jedéregerúaba lun lúruđu lun jasúfurirawagúđu, lun giñe jáfarawagúniwa jilágubei, jiyéeregudúba lun sun ubou nueígiñe. ¹⁰ Lídaanme dan ligia, sarágujaba eféridiruti jafiñen nuágu, ábame jeyéeregudún joúniwagua, ábame jalúguragun joúniwagua. ¹¹ Jachúlaaguba sarágu yéetiña aríñaga luágu profétagu jamá áni sarágujaba gürigia jayéedun. ¹² Ñíbei sarágu wuríbani daríme lun jeféridiruni sarágu jádaangiñe lánigu Búngiu ínsiñejabuni jádaangua. ¹³ Le asígiruti derégúdagu dari lúmoun lagúmujoún, lasálbarúba. ¹⁴ Lapúrichijoúba ugánu buíti le luáguti larúeijan Búngiu lídan sun ubou lun lasúbudirúniwa lídan sun fulásu, ligíaalimeti lagúmuchun ubou.

¹⁵ ‘Abürüjati meja proféta Daniél luágu cátei iyéereguti le gagünrinchaguagúdadibe, dánme le jaríjin chúlújali lan cátei le lídoun fulásu le sánduti—le alíjabei, gunfaráandalá—, ¹⁶ jámeti Judéabaña, lúntime janúrajan luágun buri wúbü. ¹⁷ Léme tábulugubei lúban wéyu ligia, maráriralá aságara ni cáta múnadagiñe, ¹⁸ le áraabubei, magiribudalá ni abúđoun lanáangun. ¹⁹ ¡Fugiábugume wúriña ja dageínatiña o ja lan gasáanigutiña ja gurágiña lídounme wéyu ligia! ²⁰ Amúriaja jumá lúma Búngiu lun máma lan lídan lidíliga ni lídan luwéyuri eméraaguni janúraja. ²¹ Ladúga ñíbei sarágu súfuri le úagili líbe lúmagiñe lagúmeserun ubou, úabei giñe lárigiñe. ²² Lun jamúga madúraagun lubei lan Búngiu dan ligia, úati jamúga ni ában asálbaruti, ladúraagubei jawáгурüğü ja lanúadirubaña lun lánigu jamá.

²³ ‘Anjein lubeíti aríñawagua jun. “Niján Crístu” o “Ningítan lan”, mafíñera jumá, ²⁴ ladúga jayábinba ayéejatiña lun jarúfudagun joúngua camá Crístu, camá buri profétagu, áni jadáaguba oúnwenbun buri seini lúma miláguru lun jeyéedaguniña ja anúadira láañabaña Búngiu áñaña gayára. ²⁵ Aríñaga náali le jun lubáragiñe lasúseredun, ²⁶ ligia lubeíti, ánjein aríñawagua jun. “Níjein Crístu yára lúdan fulásu le mageírawati”, mídin jumá ñi, áñaña aríñaga jun. “Niján ya rúmurugu”, mafíñera jumá. ²⁷ Quei larijiniwa labíríchagun lueígiñe ában oubaü libíti siélu lun luágun le ában, ítara lúba dánme le niábin, aú le Wügüri Garaúwarügüti. ²⁸ Ábame láburujan ligáñi Búngiu jawágun gafígountiña quei wadúbi luágun úgubu jiláali.

*Seini buri lubáragiñe lagíríbudun Crístu ubouágun
(Mr 13.24-37; Lc 21.25-33, 17.26-30, 34-36)*

²⁹ ‘Lárigiñerügüme lásügürün wéyu buri lánina súfuri ligia, ábame labúrigadun wéyu, marúnijalime játi, ábame jeíguadúnga warúguma ja siélubaña, ábame ladáđagarun sun siélu. ³⁰ Ábameti jaríjini niseini siélu, súnme gürigia wuríbatíña ubouágu, jayájuajaba láu jaríjini niábinya, áu le Wügüri Garaúwarügüti, lídan juánriñu siélugiñe láu oúnwenbun ubáfu lúma uweíríguni. ³¹ Dánme línwirúniwa fíđu rein, ábame nouñajaniña náni ánjeligu ja siélubaña lun joúndaruniña nánigu ja anúadira náañabaña lídaangiñe gádürü larígei ubou.

³² ‘Furéndeí jumeí jémpulu le tuáguti tíđuibe ígo. Dan le ñúlúgili tílímun, ába laboučhun tubána, subúdi jumúti luágu yaráfaali lan lubáchouga. ³³ Ítara méme, dánme giñe jaríjini sún buri cátei le, subúdi jumeí luágu yaráfaali lan niábin. ³⁴ Ninárün jáu, luágu lagünrinchawagúba lan sun ubúrgu le Jerusalén

lubáragiñe jóuwegun güriáa ja lánina dan le. ³⁵ Lagúmuchaguba siélu lúma ubouú, ánjein nerérun, merédebei magúnfulirúnga.

³⁶ ‘Ánjeinti luágu wéyu lúma óra le lúnbei nagíribudun ubouúagun, ibídiñeti ni ca un, ni joun ánjeligu ja siélubaña, ni nun, áu le Liraú Búngiu, Búngiu rügüñein Úguchili asúbudirei.

³⁷ ‘Ítara quei meja lasúseredun lídan meja lidáani Noé, ítara lúba giñe dánme le niábin, áu le Wügüri Garaúwarügüti. ³⁸ Lídan meja dan ligía, lubáragiñe ladíbirun ubouú, jerédera meja güriáa eíga, áta, amárieidagua, íchaajaña jasáanigu lun maríei, darí wéyu le lebélorunbei Noé tídown ugúnein. ³⁹ Meféentiña, darí ladíbirun ubouú, ába jañáradagun súngubei. Ítara lúba giñe dánme niábinya, áu le Wügüri Garaúwarügüti ubouúagun. ⁴⁰ Lídaanme dan ligía, ñibaña bián wügüriña áraabu, lanügüba ában, igirúame le ában según jafiñen nuágu.

⁴¹ Ñibaña bián würiña amúlija, tanügüba ában, igirúame to ában.

⁴² ‘Agágudúañu jumá, ladüga ibídiñeti jun cába lan óra niábin, áu le Jabúreme. ⁴³ Subúdi jumei le, luágu ánjein lan jamúga lasúbudira tabúreme ában muna cába lan óra liábin jíweruti áriebu, leréderuña jamúga marúmugunga, mígirunti jamúga lun lebélorúniwa íweruja lúbiñe. ⁴⁴ Ligía aráanseñu jumá lubei, ladüga léme óra magáradajan jumá, ligíame niábin, áu le Wügüri Garaúwarügüti.

Músu le úraguabei, lúma le múaragúnbei

(Lc 12.41-48)

⁴⁵ ‘Ítara jumá queísi músu úraguati, gunfaráanda ligía, le lígirubei liyúbudiri lun laríjin jáu ja lúbiñebaña lun líchugun eígini joun lídan dan. ⁴⁶ Gúndaabei músu le dánme le liábin liyúbudiri ánjein ladárra agúnfulira lúma lífisiute.

⁴⁷ Ninárün jáu luágu líchugubei lan liyúbudiri lun laríjin láu sun lumégen.

⁴⁸ Ánjein ában lubei wügüri wuribati músu ligía, ábame larítagun luágu lügili lan liábin liyúbudiri, ⁴⁹ ábame lagúmeserun ouseraña jíbiri músu wuriba, reidei ligíame eíga lúma áta jáma bacháruatiña, ⁵⁰ ábameti liábin liyúbudiri lídan wéyu le magúrabun láani, lídan óra le ibídiñeti lun. ⁵¹ Ábame líchuguni luweírín-ágei abeichúni luágu, lasiádireime lun máfiougatin úara jáma biángua tigíbu, ábame layájun, acúnrijame lári.

25

Jémpulu jawáguati dísi würiña irájüñü

¹ Ába lariñagun Jesús.

—Ítara lubáti arúejani le lánina siélu quei dísi würiña irájüñü ja anügübaña jalámpun le gálati gási, ába jáfuridun lun jadúnragun lúma adári, ñüdün jamámuga úara lúma maríeirugun. ² Seíngü jádaangiñe, maráanseruntiña, seíngü aráansetiña. ³ Ja maráanserunbaña, dan le janügünbalin jalámpun, manügüntiña ámu gási luei le lídaanbei jalámpun, ⁴ ánjañati ja aráansebaña, barútiña jabúdein láu gási bougudin luei le lídaanbei jalámpun. ⁵ Queísiiti ladárasarun adári, ába ladábudunga jágu súngubei, ába jarúmugun. ⁶ Quei buri luágu amídi áriebu, ligía lagaambúniwa agúaraguni. “Niteín adári, furíjuma adúnraguei.” ⁷ Sun würiña irájüñü jagía, ába jásaarunga, ába jagúmeserun aráansejei jalámpun. ⁸ Ába jariñagun ja maráanserunbaña joun ja aráansebaña. “Rújuma murúsun lídaangiñe jigásin woun, ladüga léñeguchuña walámpun.” ⁹ Ába jariñagun ja aráansebaña joun. “Siñáti, ladüga louguabei woun, louguame jun. Jeíbagubei

le ní lubei lalúgurajoúa agáñija jumámuga júngua.” ¹⁰ Léti añángüra lan ja maráanserunbaña agáñija gási, ligía liábin adári. Játi aráansebaña, ába jebélurun lúma marieirugun, ába ladaurúniwa béna. ¹¹ Lárigiñe, ligía jachúlürün jíbiri würiña irájüñü jagía, ába jaríñagun. “¡Wabüreme, wabüreme, darábei béna wabá! ¹² Ába laríñagun joun. “Nínárün jáu, ibídiñetün nun.”

¹³ Ábati laríñagun Jesúsu joun.

—Agágudúañu jumá, ladüga ibídiñeti jun cába lan wéyu, ni cába lan óra nagíribudun, áu le Wügüri Garaüwarügüti, ubouágun.

Jémpulu luáguti seínsu

¹⁴ Ítara líña arúejani le lánina siélu quei ában wügüri le dan lébei laráansejan lun ladügün weíyaasu lídoun ámu fulásu, ába lagútarun joun lumúsuniña, ába líchuguni liseínsun lábugiñoun jaríajaan.

¹⁵ Lun ában jádaangiñe, rúti quei buri seíngü-mílu fiádürü, quei buri bián-mílu lun ában, quei buri mílu lun ában. Lafánreinjani joun quei jabáfu lun jawádigimariduni. Ábati lídin luágu luweíyasun. ¹⁶ Le músu le erésibirubei seíngü-mílu fiádürü, ába luwádigimariduni, ába lagañeirun seíngü-mílu fiádürü ligíbuagun. ¹⁷ Ítara méme le erésibirubei bián-mílu, gáñeiti bián-mílu lánwoun.

¹⁸ Ánjeinti le erésibirubei mílu, ába lídin, ába lachígin ában júyu, ába larámuduni liseínsun liyúbudiri ñi.

¹⁹ “Sarágu dan lárigiñe, ába lagíribudun iyúbudiri, ába lagúmeserun aráanseja jáma luágu seínsu. ²⁰ Furúmiñe, ába liábin le erésibirubei seíngü-mílu fiádürü, ába ledéregeruni lun liyúbudiri láu seíngü-mílu le lagañeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagañeirun ligíbuagun.” ²¹ Ába laríñagun iyúbudiri lun. “Buíti, ában músu buíti amürü, úaragua, quei úaragua bubei lídan le murúsunnügüti, níchiga gíbetimaati lábugiñe baríajaan. Queímoun, gúnda amürüme úara núma.” ²² Lárigiñe, ába liábin le erésibirubei bián-mílu fiádürü, ába laríñagun. “Niyúbudiri, biámañein-mílu fiádürü bíchugun nun, niján bián-mílu nagañeirun ligíbuagun.” ²³ Ába laríñagun liyúbudiri lun. “Buíti, ában músu buíti amürü, úaragua, quei úaragua bubei lídan le murúsunnügüti, níchiga gíbeti lábugiñe baríajaan. Queímoun, gúnda amürüme úara núma.” ²⁴ Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügüri ban jéreguti, alúbaja ban le ní lumuti mábunagun ban, abúdaja amürü le ní lumuti machágarun ban ni cáta. ²⁵ Ligía nanúfudedunbei, ába nídin arámudei biseínsun lábugiñe múa. Niján le báni.” ²⁶ Ába laríñagun iyúbudiri lun. “Músu wuríbati, moúnti. Subúdigubei bíñein luágu alúbaja nan le ní lubei mábunagun nan, abúdaja áu le ní lubei machágajan nan ni cáta. ²⁷ Ligía lúnti lubei jamúga bíchuguni niseínsun báncürugun lun dan lan jamúga nagíribudun, nerésibiruni le náni láu agáñeiruni.” ²⁸ Ába laríñagun joun ja ñibaña. “Gidájumei seínsu le lúmabei lueí, rújumei lun le láubei díisi-mílu, ²⁹ ladüga le adügübei buíti láu le lúmabei, líchugüba lánwoun lun, ábanme lígiragun lun, ánjein le madügübei buíti láu murúsun le lúmabei, lagídarúaba lueí. ³⁰ Músuti moúnti le, fijumei lídoun lubúriga le bougudibeí, le ñiba lubei layájuaja, acúnrijame lári.”

Jagúseragüdüniwa sun gürígia

³¹ “Dánme nagíribudun, áu le Wügüri Garaüwarügüti, ubouágun, niábinba quei urúei geyégu ánjeligu náu, ábame nañúurun luágu nála láu uweírighuni

lun nagúseragüdüniña sun gürígia. ³² Ábame jóundaragun gürígia ja lílana sun fulásu nigíbugiñe, ábame nafánreinraguniña jawáriuagua quei lafánreinraguniña jóuniri mudún, mudún jádaangiñe gábara. ³³ Ja richáguabaña ligíbugiñe Búngiu, ábame níchuguniña lueígiñe noúnwenren, ja wuríbabaña ligíbugiñe Búngiu, lueígiñebaña nubaüna. ³⁴ Nariñagame joun ja lueígiñebaña noúnwenren. “Jigoúgu, jugúya le biní laalíbe Núguchi, resíbi jumei arúejiani le aráanserúbei jubá lúmagiñe ladügüni Búngiu ubou. ³⁵ Ladúga dan le nalámachunbei, rúttün eígini nun, dan le namágürabudunbei, rúttün dúna nun, dan le eíbugañaja nubeí quei chülüdügüti, rúttün múna nun. ³⁶ Dagáti manáanguni nuágu, rúttün anáanguni nun, dan le nasándirunbei, ñüdüntün aríjana, dan le nadaürünbei, ñüdüntün aríjana.” ³⁷ Ábameti jariñagun richáguatiña jagía nun. “Wabúreme, ¿ída bugagí waríjabu láu ilámaü, ába wíchugun eígini bun? ¿ída bugagí waríjabu láu mágürabu, ába wíchugun dúna bun? ³⁸ ¿Ída bugagí waríjabu quei chülüdügüti, ába wíchugun múna bun? ¿o manáangunga, ába wíchugun anáanguni bun? ³⁹ ¿Ída bugagí waríjabu láu sándi o furísunrugu, ába woúdin aríjabu?” ⁴⁰ Ábame nariñagun joun. “Ninárün jáu, furúmieguarügü cátei le jadügübei lun ában jádaangiñe namúlenu, ca lan lünabunbei, nun méme jadügei.”

⁴¹ ‘Nariñagameti joun ja lueígiñebaña nubaüna. “Díse jumá nueí, jugúya le lúnbei jasúfurirun lun sun dan, jeíba lídoun wátu geméti le méñeguchadibeí, le aráanserúbei lubá Máfia jáu lánigu. ⁴² Ladúga dan le nalámachunbei, míchutün eígini nun, dan le namágürabudunbei, míchutün dúna nun. ⁴³ Eíbugatina quei chülüdügüti, míchutün múna nun, mégeitina anáanguni, míchutün nun, sánditina, daüwa áu, mídintün aríjana.” ⁴⁴ Ábame jariñagun wuríbatiña jagía nun. “Wabúreme, ¿ída bugagí waríjabu láu ilámaü o mágürabu, o quei chülüdügüti, o manáangunga, o láu sándi, o furísunrugu, míderagun wamútibu?” ⁴⁵ Nariñagame joun. “Ninárün jáu, luágu furúmieguarügü lan cátei le madügün jubeí joun gürígia, ca lan lünabunbei, madügün jumúti giñe nun.” ⁴⁶ Ábameti jóudin ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame jóudin siélun lun jagúndaarun ñi lun sun dan.

26

Aráansejani lun lárügüdüniwa Jesúsu (Mr 14.1-2; Lc 22.1-2; Jn 11.45-53)

¹ Dan aríñaga láali Jesúsu sun cátei le, ába laríñagun joun láni disípulugu.

² —Quei jasúbudiruni, bián wéyu lárigiñe le, ligíame fédu le páscua, áni nederegerúaba, áu le Wügüri Garaúwarügüti, lun nádarawagún luágu gurúwa.

³ Ába jóundaragun jábutigu fádirigu, arúfudajatiña lilúrudun Moisés, jáma wügüriña weírigitina lídan jaffínen juríu tigíbugiñe lúban Gáifasi, fádiri le íñutimaabei. ⁴ Ñi jaráanseja luágu Jesúsu lun járügüdüni láu yéguau, lun jáfaruni jilágubei. ⁵ Jariñagati.

—Máma látia fédurugu lueí jachágaragun gürígia.

Tájuduraguni ában würi lábulugu Jesúsu (Mr 14.3-9; Jn 12.1-8)

⁶ Betániañein Jesúsu, lúbiñe Simón lé meja gawágubei gumeín luágu sun lúra, ⁷ ába tiábin ában würi luágun, gámeina tugúya ában lágei ibíñei le weíriti

lisérun. Dan luáguñein lan dábula Jesúsu, ába téseruni ibíñei ligía lúblugun.
 8 Dan jarijinbaalin disípulugu cátei le, ába jamágundarun, ába jariñagun.

—¿Cámesan lefèridirúa le ítara? 9 Gayáraati jamúgagu lalúgurúniwa le luágu sarágu seínsu lun jíderawagún gudémetiña.

10 Ába lagáambuni Jesúsu le jariñagubei, ába lariñagun joun.

—¿Ca uágu jañáwurija tun würi to? Cátei buíti le tadügübei. 11 Súnwandan yábaña lan gudémetiña júma, ánjein áu, mámaba súnwandan júma nan. 12 Le tadügübei würi to láu téseruni ibíñei le nuágun, taráanseruñádina lubá nábutúniwa. 13 Ninárün jáu luágu le lan ní lumuti lapúrichijoúa ugánu luáguti asálbaruni lídan sun ubou, labájüdawagúaba gíñe le tadügübei würi to, lun laritawagún tuágu.

*Lalúguruni Júdas Jesúsu
 (Mr 14.10-11; Lc 22.3-6)*

14 Ába lídin ában jádaangiñe dúusu disípulugu, le gíribei Júdas Iscarióte, adímureja jáma jábutigu fádirigu. 15 Ába lariñagun joun.

—¿Atiribei jíchugun nun ánjein nedéregera Jesúsu jun?

Ába jíchugun darándi murúsun pláta lun. 16 Lúmagiñeti óra ligía, ába lálujan Júdas ida lúba lan luwúyeri ledéregeroni Jesúsu joun.

*Lagúmujoín leigin Jesúsu jáma lánigu
 (Mr 14.12-25; Lc 22.7-23; Jn 13.21-30, 1 Co 11.23-26)*

17 Le furúmiñeti wéyu lídan fédu le ní lubei teigúa fein magánatu ísi, ába jayábin disípulugu lúmoun Jesúsu, ába jariñagun lun.

—¿Jalía babúseera waráanserun lun ñíba lan wadügei eígini le lánina páscua?

18 Ába lariñagun joun.

—Jeíba ubúrugu, lúbiñe ítaga wügüri, ábame jariñagun lun. “Ítara líña lariñagun Maésturu. Yaráfaali nórate, búbiñeba nefédujei páscua jáma náni disípulugu.”

19 Ába jadügüni disípulugu quei lariñaguni Jesúsu joun, ába jaráanseruni eígini le lánina páscua.

20 Dan le lagüñedunbei, ába lañúurun Jesúsu luágu dábula jáma láni dúusu disípulugu, 21 súnti añája lan eíga, ába lariñagun joun.

—Ninárün jáu luágu lalúgurubadina lan ában jádaangiñe.

22 Ábati jajírudagun, ába jagúmeseron álügüdei ában ában.

—Nabúreme, ¿nugúya funásan?

23 Ába lariñagun joun.

—Le éderutu leigan fein núma lídan asiedu, ligiába alúgurana. 24 Nídiña, áu le Wügüri Garaúwarügüti, luágu ũma le uágubei tariñaga Lerérun Búngiu, áni ífugíabutia wügüri le alúgurutina! Buítimaati jamúga lun magúriajóagubei lan.

25 Ábati ladímurejan Júdas, ába lálügüdajan.

—Maésturu, ¿nugúya funásan?

Ába lariñagun Jesúsu lun.

—Ánja, bugúya.

26 Dan añája lan eíga, ába lanügünun Jesúsu fein lújaburugu, ába leteíngiruni Búngiu tuágu, lásun lagúbachagunun, ába líchugunun joun láni disípulugu, aríñageina.

—Joujúma, nugubu le.

²⁷ Lárigiñe, ába lárügüdün ában wéru buin táu diweín lújaburugu, ába leteíngiruni Búngiu tuágu, ába lásügüragüdüni joun, aríñageina.

—Gurájuma lídaangiñe le, sun jugúya. ²⁸ Níta le, le añúuragüdübalin iséri darádu, le gíñe áwiyurubei joun sarágu gürígia lun ferúduwana lan jafígoun.

²⁹ Nariñajare jun luágu mátundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Nóguchi Búngiu yágüta siélu.

Laríñaguni Jesúsu luágu leyéedaguba lan Pédro láu

(Mr 14.26-31; Lc 22.31-34; Jn 13.36-38)

³⁰ Lárigiñe jerémujani urému luágu Búngiu, ába jóudin luágu wübü Olívos.

³¹ Ába laríñagun Jesúsu joun láni disípulugu.

—Sun jugúya, jasándiraguba júngua láu magúraasuni nuágu áriebe le, ladüga laríñajare tidan Lerérun Búngiu. “Náfarubei jóuniri mudún jilágubei, ábame jeréderun mudún chagágu.” ³² Lárigiñeme násaarun lídaangiñe ouweni lúnya nabágaridun, níðiba Galiléa jubáragiñe.

³³ Ába laríñagun Pédro lun.

—Gayáraati járügüdün súngubei magúraasuni buágu, nugúya no.

³⁴ Ábati laríñagun Jesúsu lun.

—Nínárün báu luágu áriebe méme lan le, lubáragiñe layúgurujan gáyu, beyéedaguba náu úrúwa weíyaasu.

³⁵ Ába laríñagun Pédro lun.

—Gayáraati nouñwen búma, meyéedagunbadina báu.

Ligia méme gíñe jariñaga sun disípulugu.

Layúmuragun Jesúsu lun Búngiu, Getsemaní

(Mr 14.32-42; Lc 22.39-46)

³⁶ Ábati lachülürün Jesúsu jáu láni disípulugu lídoun ában fulásu gíriti Getsemaní, ába laríñagun joun.

—ñurújuma ya, neíbuga ayúmuragua lun Búngiu yára.

³⁷ Ába lanügüni Pédro jáma bián lirájüñü Zebedéo lúmagua, ába jagúmeserun asándira íruni lúma tigári anígi. ³⁸ Ábati laríñagun joun.

—Sandítina ában íruni le lánina ouweni tidan nuwáni. Reídei jumá ya, agágudúañu jugúyame núma.

³⁹ Ábati lídin Jesúsu lubáruaguóun mémeraü, ába lájuduragun láu ligíbu múarugun, ába layúmuragun lun Búngiu ítara.

—Nóguchi, ánjein gayára lubei, adügabá lun masúfurirun náani cátei le lúnbei nasúfuriruni, mámalá quei nabúseerun, queilá babúseerun.

⁴⁰ Ábati lagíribudun le ñíjin jabeí láni disípulugu, ába ladáriruniña arúmuga, ába laríñagun lun Pédro.

—¿Siñátísán buga jeréderun agágudúañu núma ni ában óra? ⁴¹ Agágudúañu jumá, ayúmuragua jugúyame, máburujan jumámuga lídoun ínchajóuni lun jeféridiruni jafíñen nuágu. Inárüni luágu ánja tan juwáni lun cátei le buídubei, ánjeinti júgubu, débiliti.

⁴² Ábaya lídin luágu libíaman weíyaasu, ába layúmuragun ítara.

—Nóguchi, ánjein siñá lubei masúfurirun náani le lúnbei nasúfuriruni, adügüwalá bugúndan.

⁴³ Ábaya lagíribudun, ábaya ladáriruniña láni disípulugu arúmuga ladüga weírjiali lidábu jágu. ⁴⁴ Ába lígiruniña, ábaya lídin ayúmuragua luágu lürüwan

weyaasu, aríñageina méme dimúrei ligía. ⁴⁵ Ábati lídin le ñíjin jabeí láni disípulugu, ába laríñagun joun.

—¿Jarúmuguña mémesan, eméraagua jugúya? Chülújali óra lun nedéregeruniwa, áu le Wügüri Garaúwarügüti, jájaburugun gaffigountiña. ⁴⁶ Sarájuma, queímoun lubároun le lúnbei lalúgurunina, níteeli.

Janügüni Jesúsu adáüra

(Mr 14.43-50; Lc 22.47-53; Jn 18.2-11)

⁴⁷ Ñígili Jesúsu adímureja, ligía liábin Júdas, le ábanbei jádaangiñe dúusu disípulugu, jáu sarágu gürígia táu efeín lúma wéwe. Jayábin lueígiñe jóubadina jábutigu fádirigu jáma wügüriña weirigutiña lídan jafiñen juríu. ⁴⁸ Aríñagaaliti buga Júdas joun.

—Le nachúurun, ligía, járügüdeime.

⁴⁹ Ábati layárafadun lun Jesúsu, ába laríñagun.

—¡Buíti gúñoun, maésturu!

Ába lachúuruni. ⁵⁰ Ába laríñagun Jesúsu lun.

—Numáda, ¿ca bálugubei?

Ábati jayábin, ába járügüdüni Jesúsu, ába janügüni adáüra.

⁵¹ Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñutimaabei. ⁵² Ába laríñagun Jesúsu lun.

—Areídabouñ befeínte, ladúga sun ja áfarajatiña táu efeín, táuba giñe efeín jáfarúa. ⁵³ ¿Ibidiñeti bun luágu ánjana lan jamúga busén, gayára lan namúriajan úrúwa-wein-dísi-mílu jádaangiñe láni Núguchi ánjeligu, áni loúnajañanu lan jamúga? ⁵⁴ Lun jamúga nadügüni ítara, ¿ída lubági lagúnfulirun le tídaanbei Lerérun Búngiu to aríñaguboun luágu lúnti lan lasúseredun le ítara?

⁵⁵ Ábati laríñagun Jesúsu joun mútu jagía.

—¿Jiábin táu efeín lúma wéwe lun járügüdünina camá jamuga jíwerutina? Ságüñaja wéyu nañúurun témpulurugu jagánagua arúfudaja, madaü jumútina.

⁵⁶ Wel, lasúseredunbei sun le lun lagúnfulirun le jaríñagubei profétagu tídan Lerérun Búngiu.

Ábati jígiruni sun disípulugu Jesúsu lábugua, ába janúrajan.

Jesúsu ligíbugiñe líñun-ágei lúru

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ja adáürübalin Jesúsu, ába janügüni ligíbugiñoun Gáifasi, fádiri le íñutimaabei, le ñí lubei adámurigu jamá arúfudajatiña lílúrudun Moisés jáma wügüriña weirigutiña lídan jafiñen juríu. ⁵⁸ Ánjeinti Pédro, falá lumuti dísegiñe dari tübürrürugun lúban fádiri le íñutimaabei le ñíjin lubei lebélera, ába leréderun ñun jáma oúnigirutiña témpulu lun laríjin jalíaba lan lébeda cátei le.

⁵⁹ Jáluajati jábutigu fádirigu, jáma sun jíbiri líñun-ágei lúru lidúnrun Jesúsu láu iyéeni lun gayáraabei lan jasiádiruni lun loúnwen, ⁶⁰ madáritiña, láu sun sarágu jáña lan gürígia ñüdüntiña aríñaga iyéeni luágu. Agúmujoúni, ligía jayábin biáma yéetiña íchiga fe luágu, ⁶¹ ába jaríñagun.

—Aríñagati wügüri le luágu gayára lan lagúnrichagunun láni Búngiu témpulu, ábaya lánme laráramagüdünun lídan úrúwa wéyu.

⁶² Ábati laráramun fádiri le íñutimaabei, ába laríñagun lun Jesúsu.

—¿Moúnabuntibusan ní cáta? ¿Cáteigi le, le aríñawagúbei buágu?

⁶³ Reídeiti Jesúsu maníñu. Ábati laríñagun fádiri le íñutimaabei lun.

—Luágu líri Búngiu le wínwanbei báfiñura lun baríñaguni inárüni. Aríñagabei woun ánjein amürü lubei Crístubei le Liraü Búngiu, le lanúadirubei Búngiu lun lasálbaruniña gürígia ubouágu.

⁶⁴ Ába laríñagun Jesúsú lun.

—Ánja, áu, quei bariñaguni. Aríñagatina giñe jun luágu jaríjubadina lan, áu le Wügüri Garaüwarügüti, ñun lueigiñe loúnwenren Búngiu le Sünti Gabáfu, jaríjubei giñe niábin lídan juánriñu siélugiñe.

⁶⁵ Ábati lajeíridagunun fádiri le íñutimaabei lanáangun, le ligáñi, ába laríñagun.

—¡Anába láali wügüri le Búngiu láu lerérun! Mabúseerunjadiwa ámu lun lichugun fe luágu, agáamba jumáali anábuni le laríñagubei, ⁶⁶ ¿ída líña jaríjin lun?

Ába jaríñagun.

—Gadúnrunti, lúnti loúnwen.

⁶⁷ Ábati jásuéraguni ligíbu, buleísei jameí, jíbiri, ába jagáyuajan ligíbuagun,

⁶⁸ ába jaríñagun lun.

—Quei amürü lan Crístubei, jaríñaga beígia ca lan agáyuajabei buágu!

Jaríñagunbei lun ítara ladüga gürágu líña lan lágu.

Laríñagun Pédro luágu íbídiñe lan Jesúsú lun

(Mr 14.66-72; Lc 22.56-62; Jn 18.15-18, 25-27)

⁶⁹ Sünti lasúseredun sun cátei le, ñun líña Pédro bougudi tübüürürüru luágun, ába taríñagun lun.

—Bugúya, lúmañadibútia giñéñaja Jesúsú le Galiléana.

⁷⁰ Ába leyéedagun Pédro jagíbugiñe súngubei, ába laríñagun.

—Íbídiñeti nun ca lan uágu badímureja.

⁷¹ Leíbuga yebe Pédro luágun béna, ligía taríjini ábanya, ába taríñagun joun ja ñíbaña.

—Eyéri le, lúmañajañein giñe Jesúsú le Nazarétna.

⁷² Ábaya leyéedagun Pédro láu fiñún, ába laríñagun.

—Íbídiñeti wügüri ligía nun.

⁷³ Murúsun lueigiñe, ába jayábin ja ñíbaña lúmoun Pédro, ába jaríñagun lun.

—Inárüni luágu ában lan jádaangiñe amürü, arijúati luágu ligáburi badímurejan.

⁷⁴ Ába lagúmeserun íñaragua lúngua aríñaga láu fiñún.

—¡Íbídiñeti gürígia ligía nun!

Lídan méme óra ligía, ába layúgurujan ában gáyu. ⁷⁵ Ábati larítangun Pédro luágu le laríñagubei Jesúsú lun. “Beyéedaguba náu ürüwa weíyaasu lubáragiñe layúgurujan gáyu.” Ába láfuridun Pédro ñígiñe, ába layájuajan láu igárigu.

27

Ledéregerúniwa Jesúsú lun Piláto

(Mr 15.1; Lc 23.1-2; Jn 18.28-32)

¹ Dan larúgadunbei, ába jadámuridagun sun jábutigu fádirigu jáma wügüriña weírigitüña lídan jafíñen juríu aríja cába lan jadüga lun lasíadirúniwa Jesúsú.

² Ába janügüni gürágu, ába jedéregeruni lun Póncio Piláto le gumádimati.

Loúnwen Júdas

³ Dan le laríjinbei Júdas, le alúgurubalin Jesúsu, luágu siádi jamáali lan Jesúsu lun loúnwen, ába laságürijan, ába láguyugüdüni darándi murúsun pláta ligía joun jábutigu fádirigu lúma joun wügüríña weírigutiña, ⁴ ába laríñagun joun.

—Afigounjaadina láu nedégerun ában wügürí madúnrunti lun loúnwen.

Ába jaríñagun lun.

—¿Cámegi le warúma? ;Bugúya lun baríjini líra!

⁵ Ába lachágaruni Júdas seínsu ñi témpulurugu, ába lídin átigiragua lúngua.

⁶ Ába jabúduni jábutigu fádirigu seínsu ligía, ába jaríñagun.

—Siñáti wíchuguni seínsu le tídoun gáfu to lágei liseínsuna Búngiu ladüga lebégi ouweni.

⁷ Ába júaradun lun lagáñijóun lufúlasun ában wügürí le adáagubei barámbi láu seínsu ligía lun jábunajoún teréncha ñi. ⁸ Ligía Lufúlasun Jítaü lubei líribei fulásu ligía chülü lúmoun dan le. ⁹ Ítara líña lagúnfulirun lé meja laríñagubei proféta Jeremías. “Barü jamuti darándi murúsun pláta ligía, ebégi le jíchugubei Israelítagu luágu wügürí ligía, ¹⁰ ába jagáñijani lufúlasun ában wügürí le adáagubei barámbi láu, quei laríñaguni Nabúreme nun.”

Jesúsu ligíbugiñe Piláto

(Mr 15.2-5; Lc 23.3-5; Jn 18.33-38)

¹¹ Barüwati Jesúsu ligíbugiñoun gumádimati, le giríbei Piláto, le álügüdübalin.

—¿Amürüsan Jarúeitebei Juríu?

Ába laríñagun Jesúsu lun.

—Ánja, áu quei baríñaguni.

¹² Dán buriti jíchugun jábutigu fádirigu jáma wügüríña weírigutiña lidúnrun, moúnabuntija Jesúsu ni cáta. ¹³ Ábati laríñagun Piláto lun.

—¿Magáambun bumútisan le jaríñagubei buágu?

¹⁴ Moúnabunti Jesúsu ni cáta, ábati laweíridun lanígi gumádimati.

Lasiádirún Jesúsu lun loúnwen

(Mr 15.6-20; Lc 23.13-25; Jn 18.38–19.16)

¹⁵ Gagáburi lumúti mejáti gumádimati lígiragüdüñ ában adaürüti joun güri-gía lídan fédu, furúmieguaügü adaürüti le jamúriajan lúma. ¹⁶ Ñíñeinti ában adaürüti, díseti leíbaajan líri, giríti Barabási, ¹⁷ dánti le adámuriñujaña lan sun güri-gía, ába lálügüdüniña Piláto.

—¿Ca jabúseerubei nígiragüdüñ jun, Barabási, ódi Jesúsu le únbei laríñawagua Crístu?

¹⁸ Líridubalin gíñe Jesúsu ladüga subúdi láali lan luágu ladüga lan jagímugan lun jedéregerei.

¹⁹ Sun ñun lan Piláto luágu lála le lánina agúseruni, ába toúnajan lúmari aríñaga lun. “Madügabá ni cáta láu güri-gía úaraguati le, ladüga gewéreditina buga ában uwénedi wuríbati áriebu buga ladüga güri-gía le.”

²⁰ Ába jádaruni jábutigu fádirigu jáma wügüríña weírigutiña jádoun güri-gía lun jamúriajan lun láfuridun Barabási, lun lafarún Jesúsu. ²¹ Ábaya ladímurejan gumádimati joun sun güri-gía jagía, ába laríñagun joun.

—¿Ca jádaangiñe biángubei jabúseerubei lun nígiragüdüni jun?

Ába jaríñagun.

—Barabási.

²² Ába laríñagun Piláto joun.

—¿Cábati nadüga láu Jesúsu le únbei laríñawagúa Crístu?

Ába jóunabun súngubei.

—¡Dáguabeí luágu gurúwa!

²³ Ába laríñagun Piláto joun.

—¿Cáti wuríbati ladügübei?

Ábatima jagúaragun.

—¡Dáguabeí luágu gurúwa!

²⁴ Dan le laríñbalin Piláto luágu siñá lan ladügün ni cáta lueídügüya chagáguau, ába lamúriajan dúna, ába lachíbuni lújabu jagibugiñe gürígia, aríñageina.

—Máma áu lúnbei naríjin láu loúnwen wügüri madúnrunti le, jugúya lun jaríjini ñi.

²⁵ Ába jaríñagun sun gürígia.

—¡Wagía jáma warájüñü, wanügüba furúmieguarügü dúru wawouguoun luágu loúnwen!

²⁶ Ábati lígiragüdüni Piláto Barabási, ába loúnajan abeíchei Jesúsu, ába ledéreggeruni lun ládarawagún luágu gurúwa.

²⁷ Lárigiñe, ába janügüni lisúdaaranigu gumádimati Jesúsu tídon lúban Piláto, ába jóundaraguagüdüniña sun súdaara geyéguá láu. ²⁸ Ába jarágachunun lanáangun, ába jíchugun ában anáangun funátu luágu, ²⁹ ába jíchugun ában rádi láuti jíyu lábulugu, lúma ában mabúru lújaburugu le loúnwenren. Ábati jájuduragun ligíbugiñe, ába jéjerajan láu, ába jaríñagun lun.

—¡Gabágarilá Jarúeite Juríu!

³⁰ Ába giñe jásuerauni, janügeija mabúru ligía, jíchaaguei lábulugu. ³¹ Lárigiñe jéjerajan láu ítara, ába jagídarunun anáangun funátu luei, ába jadáürünun lanáangun luágu. Ába janügüni lun ládarawagún luágu gurúwa.

Ládarawagún Jesúsu luágu gurúwa

(Mr 15.21-32; Lc 23.26-43; Jn 19.17-27)

³² Dan le áfurideina jáña lan, ába jadúnragun lúma ában wügüri Cirénena, gíriti Simón, ába jafósuruni lun lanügüni lugúruwan Jesúsu.

³³ Ítara líña jachülürün lídoun ában fulásu gíriti Gólgota, líla líra, Lufúlasun Lábu Ichügü. ³⁴ Ñi jíchiga diweín láu árani tídan lun Jesúsu lun látunun, jóucharügü lumútu, mátun lumútu.

³⁵ Dan le dáguá jamáli luágu gurúwa, ába jájurerun súdaara ubúnuruni lun jafánreinjanun lanáangun Jesúsu jádaangua. Ítara líña lagúnfulirun lé meja labürüjabei proféta. “Ájureratiña ubúnuruni lun jaríjin cába lan jádaangiñe erédera táu nanáangun.” ³⁶ Ába jañúurun ñi lun jóunigiruni. ³⁷ Ába jíchugun ában abürüjóuni loúgiñe lichügü le ñi lubei laríñaga ca lan lidúnrunbei. Abürüjóuni ligía ítara líña. “Jesúsu le, le jarúeitebei juríu.”

³⁸ Dáwaguatiña giñe bián jíwerutiña luágu gurúwa lúma, ában lueígiñe loúnwenren, ában lueígiñe lubaúna. ³⁹ Já buriti ásügürübaña ñígiñe, ába janábuni, ába jánjingichuni jachügü, ⁴⁰ aríñageina.

—Bugúya le gayáraabei bágurunun témpulu ábaya baráramagüdünnun lídan ürüwa wéyu, sálbaguabá búngua. Ánjein Liraü bubei Búngiu, raríba lueígiñe gurúwa.

⁴¹ Ítara líña giñe jéjerajan jábutigu fádirigu jáma arúfudajatiña lilúrudun Moisés, fariséogu, jáma wügüríña weirigutiña, láu, ábaja jaríñagun jámagua.

⁴² —Sálbati ámu, ánjein lúngua, siñáti lasálbaragun. Ánjein ligía lubei Jarúitebei Israelítagu, raríla lueigiñe gurúwa, afiñe wamámuga luágu. ⁴³ Rúlaali lafiñen luágu Búngiu, sálbaleíti Búngiu guetó ánjein inárúni lubei luágu jínsiñe lan lun, quei aríñagaali lan woun luágu Liraü lan Búngiu.

⁴⁴ Anába jamúti giñe jíwerutiña ja dáwaguñubaña luágu jagúruwan úara lúma.

Loúnwen Jesúsu

(Mr 15.33-41; Lc 23.44-49; Jn 19.28-30)

⁴⁵ Ábati labúrigadun sun fulásu lúmagiñe amídirugu dari ladaúnrun úruwa rábounwéyu. ⁴⁶ Quei buri óra méme ligía, ába lagúaragun Jesúsu jére.

—Elí, Elí, ¿láma sabáctani? —líla líra. Nubúngiute, Nubúngiute, ¿cásan uágu bígirana?

⁴⁷ Níñanu agáambuti jádaangiñe ja ñúbaña, ába jaríñagun.

—Lagúajaña wügüri le lun proféta Elías.

⁴⁸ Ába lídin ában jádaangiñe eíbaagueina anüga ában mudúsi, lárigiñe ladüdüragüdüni táu diweín garüjütu ába líchuguni luágu ában wéwe, ába línchunun lun lun lachúrunun. Ába lachúrunun. ⁴⁹ Ába jaríñagun ja jíbiri.

—Ígirabeí, waríja ánjein ñúbin Elías asálbarei.

⁵⁰ Ábaya ladügün Jesúsu ában agúaraguni jéreti, ábati loúnwen. ⁵¹ Lídan óra ligía, ába tajeíridagun tubélun témpulu lídan bían murúsun, íñugiñe lun únabun.

Ába ladágarun ában járabaganáli, ába láwarajan dübü. ⁵² Ába lánjunrenchúnga umúajaü, águyuaguatiña sarágu jádaangiñe afiñetiña luágu Búngiu já meja jiláguaañábaña. ⁵³ Ába jáfuridunga lídaangiñe jamúaja lárigiñe lásaarun Jesúsu lídaangiñe otúweni. Ába jebélurun lídoun ubúruyu Jerusalén le biníwabei, le ñí lubei jarijaña sarágu gürija.

⁵⁴ Léti jábuti súdeara jáma súdeara ja óunigirubalin Jesúsu, dan jasándirubalin járabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárúni, Liraü Búngiu wügüri le.

⁵⁵ Níñanu sarágu würíña aríagua dísegiñe, ja afálarubalin Jesúsu lúmagiñe Galiléagiñe íderagua jameí. ⁵⁶ Níñoun María Magdaléna jádan, María to lúguchu Jacóbo lúma José, túma jáguchu lirájüñü Zebedéo.

Labunúniwa Jesúsu

(Mr 15.42-47; Lc 23.50-56; Jn 19.38-42)

⁵⁷ Dan le agúñedeina líña lubei, ába liábin ában wügüri risiti gírti José, lídaangiñeti fulásu le gíribei Arimatéa, jádaangiñeti giñe ja afálarubalin Jesúsu.

⁵⁸ Ábati lídin aríjei Piláto, ába lamúriajani lúgubu Jesúsu lúma. Ábati laríñagun Piláto lun líchugúniwa lun, ⁵⁹ ába lanügüni José, ába loúburaguni tídan ában gamísa jarúmatu. ⁶⁰ Ába líchuguni lídoun lumúaja iséri lé yebe lachíagüdübei lubárua luágu dübü. Lárigiñe ladáruni umúajaü láu ában dübü weíríti luágu lubéneri, ába lídin. ⁶¹ Níñounti María Magdaléna túma to ában María ñun ligíbugiñe umúajaü.

Óunigirutiña ligíbugiñe lumúaja Jesúsu

⁶² Larúgan, lárigiñe aráansejani lubá luwéyuri eméraaguni, ába jóúdin jábutigu fádirigu jáma fariséogu aríjei Piláto, ⁶³ ába jaríñagun lun.

—Wábuti, jarítagua wamúti luágu aríñaga lán meja yéeti ligíra dán meja mouñwengili luágu lásaaruba lan luágu lürüwan wéyu lárigiñe louñwen.
⁶⁴ Oúnajagubeibá achorurei umúajaü daríme lürüwan wéyu, mayábin jamámuga láni disípulugu áriebe íwerujei lúgubu, ábame jaríñagun joun gürígia luágu saráli lan. Weiritimaajalímeti lagúmujoún iyéeni le sügü láu le furúmiñeti.

⁶⁵ Ába laríñagun Piláto joun.

—Barüjuma fiú súaara, jeiba choúru jumeí umúajaü le lubuídun-ágei juáraati.

⁶⁶ Ábati jóúdin, ába jachoururuni dübü le luágubei umúajaü, ába jígiruniña súaara lun jóúnigiruni.

28

Lásaarun Jesúsu lídaangiñe ouweni
(Mr 16.1-8; Lc 24.1-12; Jn 20.1-10)

¹ Dan le lásügürünbei luwéyuri eméraaguni áni arúgadeina líña dimáasu, ába jóúdin María Magdaléna túma to ában María aríjei umúajaü. ² Sódini, ába ladágarun ában jarabaganáli jéreti óra ligía láu larárirun ában láni Wabúreme ánjeli siéluigiñe, ába liábin luágun umúajaü, ába lagídaruni dübü le áubei ladaurúa, ába lañúurun luágu. ³ Miríti ánjeli ligía quei ában labírjanoúga, tiábin lanáangun, jarú jarú. ⁴ Dan le jaríjmbalin súaara, ába jadádagarun láu anúfudei, ába jeréderun camá jiláguaaña. ⁵ Ábati laríñagun ánjeli ligía joun würiña jagía.

—Manúfude jumá. Subúsiti nun luágu jáluajañein lan Jesúsu le ádarawagúbei luágu gurúwa. ⁶ Úati ya, saráli quei laríñaguni. Jigoúgu jaríjei fulásu le ñijn lubei líchugúa, ⁷ ábame jídin furése, ábame jaríñagun joun láni disípulugu luágu saráli lan, luágu níngiran lan jubá jubá Galiléoun, ñíba jaríjei. Niján ugánu lé buga lúnbei naríñaguni jun.

⁸ Ába jóúdin würiña jagía oufudagueina, láu anúfudei lúma sarágu ugúndani, ába jóúdin eibaagueina aríñagei joun disípulugu. ⁹ Súnti añája lan luágu úma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába jóúburuni lugúdi. ¹⁰ Ába laríñagun joun.

—Manúfude jumá. Jeiba awísaraña nánigu lun jóúdin Galiléoun, luágu ñíba lan jaríjana.

Cátei le jabájüdagubei súaara

¹¹ Dan le jóúdiña lubei würiña, ligía jóúdin jádaangiñe súaara ja ouñigirubaña, ába jóúdin ubúru, ába jabájüdaguni le asúseredubei joun jábutigu fádirigu. ¹² Ába jóúdin ábutigu ja adímureja jáma wügüriña weirigutiña lídan jafiñen juríu lun jebélurun jáma lídoun ában úarani, ába jíchugun sarágu seínsu joun súaara, ¹³ ába jaríñagun joun.

—Jaríñagame luágu dan lan le anjünja lan arúmuga áriebe, ába lan jayábin láni Jesúsu disípulugu, ába jíwerujani lúgubu. ¹⁴ Ánjein lasúbudira gumádimati cátei le, wadímurejaba luágu jáni fuleísei lúma lun madügün lan ni cáta jáu.

¹⁵ Ábati jerésibiruni súaara jagía seínsu, ába jóúdin adúgei le uágubei laríñawagúja joun. Ítara líñáti jaríñaguni juríu chülü lúmoun dan le.

Líchugun Jesúsu jadásin disípulugu
(Mr 16.14-18; Lc 24.36-49; Jn 20.19-23)

¹⁶ Ába lubeíti jóúdin únsu disípulugu Galiléoun luágu wübü lé meja uágubei lariñaga Jesúsu joun lun jóúdin. ¹⁷ Dánti le jaríjinbalin Jesúsu, ába jájuduragun lun, láu sun añájein lan jádaangiñe, louguati jafíñen luágu ligía lan. ¹⁸ Ába liábin Jesúsu jawágun, ába lariñagun joun.

—Rúaali sun ubáfu nun siélu lúma uboúagu. ¹⁹ Jeíbati jabügürü gürígia ja lílana sun fulásu, adüga jumáña nánime disípulugu, badíseigüda jumáña lídan líri Búngiu Úguchili, Búngiu Irájü, lúma líri Sífiri Sándu. ²⁰ Arúfudaja jugúyame joun lun gagáambadi jamá lun sun le uágubei nariñaga jun. Subúdi jumeí luágu anájein lan júma ságü wéyu daríme lagúmuchun uboú. Ítaralá.

UGÁNU BUÍTI LE LABÜRÜJABEI MÁRCOS LUÁGU JESÚSU

Lapúrichijan Juan

(Mt 3.1-12; Lc 3.1-9, 15-17; Jn 1.19-28)

¹ Niján ugánu buíti luágu Jesucrístu, le Liraü Búngiu, ² latátira láu lagúnfulirúniwa dimúrei lé meja labürüjabei proféta Isaías, laríñaga.

Niján noúnagüle, líña Búngiu, noúnajañein bubáragiñe, amürü le Niraü, lun laráansejanun janígi gürígia lubá biábin.

³ Lagúarajaba lídan fulásu mageírawati.

“Aráanse jumoún janígi lubá liábin Wabúreme, queísi ladárarúniwa üma surúti.”

⁴ Lun lagúnfulirúniwa dimúrei ligía liábinbei Juan lídoun fulásu mageírawati, ábaja laríñagun joun gürígia ja ñübinbaña lun luágu lúnti lan jasáansiruni ligáburí jóuserun lun ferúdunawa lan jafígoun, badísei jagíame. ⁵ Ábatija jayábin lídaangiñe sun Judéa lúma sun Jerusalén agáambeí lapúrichijan. Dántija le jagúfesaruni jafígoun, ábabei labásteragüdúniña Juan lídan dúna le giríbei Jordán.

⁶ Mebégitu lanáangun Juan, láutu lúra caméyu, lagürüga lamídan, guéru, chigángaru leígibaña lúma síruudu le áraabuna. ⁷ Laríñagaja joun gürígia lídan lapúrichijan.

—Liábinba ában le gabáfutimaati nárigiñe, weíríti lubáfu nueí dari lun madúna nan ni lun nélemuchun afáragadeí tagürüga ligeídin. ⁸ Áu, láu dúna nabásteragüdaün, áñjein ligía, labuínchagüdübadün láu lubáfu Sífiri Sándu.

Labásterun Jesúsu

(Mt 3.13-17; Lc 3.21-22)

⁹ Lídoun buga dan ligía, ába lídin Jesúsu Nazarétgiñe, fulásu le lídaanbei lumúan Galiléa, ába labásteragüdúni Juan lídan dúna le Jordán. ¹⁰ Dan le láfuridunbei dúnarugugiñe, ába lánjunrenchagun siélu lun, ába laríjini Juan larárirun Sífiri Sándu luágu Jesúsu queí jamúga ában únjun. ¹¹ Ában la-gaambúniwa ában umálali siélugiñe aríñaguti.

—Amürü niraü le jínsiñebei nun, gúndaatina báu.

Louçhaguni Máfia Jesúsu

(Mt 4.1-11; Lc 4.1-13)

¹² Lárígiñe, ába lanügüni Sífiri Sándu Jesúsu lídoun fulásu mageírawati, ¹³ ába leréderun Jesúsu bián-wein wéyu ñi jagánagua anímaalugu janárimetiña. Sun dan le láubei ñi, ába louçhaguni Máfia, lárígiñe, ába jayábin ánjeligu lun jeténirun lun.

Lagúmeseruni Jesúsu luwádigimari lídan fulásu le giríbei Galiléa

(Mt 4.12-17; Lc 4.14-15)

¹⁴ Lárígiñe ladaürüniwa Juan, ába lídin Jesúsu Galiléa apúrichijei ugánu buíti lúmagiñeti Búngiu. ¹⁵ Ába laríñagun.

—Chülújali dan lun lagúmeserun larúeijan Búngiu, sáansi jumeí ligáburí jóuserun, affiñe jumá luágu ugánu le lánina asálbaruni lídaangiñe figou.

*Lagúarun Jesúsu joun gádürü esénijatiña lun jafálaruni
(Mt 4.18-22; Lc 5.1-11)*

¹⁶ Luágu ában wéyu, eibugeina líña Jesúsu láru láru dúna le gíribei Galiléa, ába laríjini Simón lúma Andrés le lamúlen. Esénijani lubeígia jawádigimaribei, jáguruñati óra ligía. ¹⁷ Ába laráñagun joun.

—Jigóugu nárigi, falá jumana, madíajanjadünme úduraü, güriégiajañame jadiaja nun.

¹⁸ Ába jígirunun jasénin furése furése, ába jóúdin lúma.

¹⁹ Ábati leíbugun Jesúsu murúsunraüya, ába laríjini Jacóbo le liraü Zebedéo, láu sun Juan le lamúlen, tídaañanu ában ugúnein arámada joun jasénin. ²⁰ Ába lagúarun joun, ába jígiruni jáguchi tídan ugúnein jáma ja íderagubaliña, ába jóúdin lúma Jesúsu.

*Ában güriégia gawáguti ában espíritu wuríbati
(Lc 4.31-37)*

²¹ Ába jachülürün lídoun fulásu le gíribei Capernaüm lídan wéyu le eméraaguagülei, ába lebélorun Jesúsu tídoun jalígilisin juríu, ába lagúmeserun arúfudaja joun. ²² Weiriti janígi güriégia láu sun le laráñagubei Jesúsu joun ladüga larúfudajan joun láu ubáfu, máma quei arúfudajatiña lilúrudun Moisés. ²³ Níñein ában wügüri tídan ligíliis tugúya láu ában espíritu wuríbati, ába lagúaragun.

²⁴ —¿Cámesan bemétera wámoun, Jesúsu Nazarétna? ¿Biábiñasan lun bagúnrichaguniwa? Subúdi numúti cátabu lan, láu amürü lan Búngiu Irajü le sándybei.

²⁵ Ába ladeínjan Jesúsu lun espíritu wuríbati ligía, ába laráñagun lun.

—¡Maníba, furíba lídaangiñe güriégia le!

²⁶ Ába louwe jagüdüni espíritu wuríbati güriégia ligía, ába láfuridun lídaangiñe, wágueina. ²⁷ Sun ja ñíbaña, ába laweíridun janígi, ába jalügüdagun jámagua.

—¿Cáteisan le? ¿Cáteisan iséri arúfudajani le? ¡Güriégia le, gabáfuti lun giñe lagúmadiruniña espíritu wuríbatiña áni agáamba jamúti!

²⁸ Ába lagaambúniwa luágu Jesúsu lídan sun Galiléa furése.

*Lareídaguagüdünnun Jesúsu límenidi Simón Pédro
(Mt 8.14-15; Lc 4.38-39)*

²⁹ Dan le jáfuridunbei tídaangiñe ligíliis tugúya, ába lídin Jesúsu lúma Jacóbo láu Juan jábiñe Simón lúma Andrés. ³⁰ Roun tiñáti límenidi Simón, tabíruajaña, ába jaráñagun lun Jesúsu luágu sándiñoun lan. ³¹ Ábati lídin tuágun, ába lárügüdüni tújabu, ába líñuragunun, lídan meme óra ligía ába tareídagun, ába tásaarun, ába teténirun joun.

*Lareídaguagüdünnun Jesúsu sarágu sánditiña
(Mt 8.16-17; Lc 4.40-41)*

³² Dan le lálüdünnun wéyu, gúñeeli, ába janügüniwa sun sánditiña jáma sun ja gawágubaña espíritugu wuríbatiña lun Jesúsu, ³³ ába jóúndaragun sun lílana fulásu lubádu béna. ³⁴ Areídaguagüdati Jesúsu sarágu sánditiña ja láutiña ámuñegueinarügü luwúyeri sándi, sagá ligía sarágu espíritugu wuríbatiña jaweí güriégia. Mígiruntijati lun jadímurejan espíritugu jagía, ladüga subúdi jamáni cáteíñein lan.

*Lapúrichijan Jesúsu Galiléa
(Lc 4.42-44)*

³⁵ Lubá larúgan, dan le búrigagili, ába lásaarun Jesúsu, ába láfuridun bougudin luei ubúru luídoun ában fulásu le mageírawati lun layúmuragun lun Búngiu ñi.

³⁶ Ába lídin Simón jáma líbirigu áluajei. ³⁷ Dan le jadáriruni, ába jaríñagun lun.

—Añájeintia sarágu gürígia áluajabu.

³⁸ Ába laríñagun joun.

—Queímoun lídoun buri líbiri fulásu le yaráfabei, apúrichija námuga gíñe ñi, ladúga lun napúrichijan lídan sun fulásu niábin ubouágun.

³⁹ Ítara líña lubeiti eíbuga lumúti Jesúsu sun Galiléa apúrichijeina tídan buri jalígilisin juríu lídan sun fulásu, aságajeina ligía espíritugu wuríbatíña jawei gürígia.

*Lareídaguagüdüni Jesúsu ában gawáguti gumeín luágu sun líra
(Mt 8.1-4; Lc 5.12-16)*

⁴⁰ Ába líábin ában gürígia sánditi láu gumeín luágu sun líra, ába lájuduragun ligíbugiñe Jesúsu, ába layúmuragun lun, laríñaga.

—Gayáraati bareídaguagüdüniña ánjabu busúen.

⁴¹ Ába lagúdemedagun lun Jesúsu, ába lagúuruni láu lújabu, ába laríñagun.

—Láu sun nugúndan, areídaguabá.

⁴² Quei laríñagun ítara, ába lareídagun sánditi ligía. ⁴³ Ábati louñajani Jesúsu ñígiñe láu ában furése, aríñageina lun.

⁴⁴ —Mabájüdagubeítia lun ni ában, ñüdünrügüba arúfudagua búngua lun jafádirin juríu, ábame bíchuguni badágaragüdüñ luágu barúmadun queisi laríñaguni lilúrudun Moisés. Ítara lúba jaríjini gürígia luágu areídaguadibu lan.

⁴⁵ Ábarüga lídin, ába labájüdaguni sun le asúseredubei lun joun sun gürígia, ligía lébubei siñá lan leréderun Jesúsu furáangu lídan ni ában fulásu, ába leréderun le ñí lumuti úa jamá gürígia. Láu sun líra, ñübin mémetiña lídaangiñe sun fulásu aríjei.

2

*Lareídaguagüdüni Jesúsu ában wügilri le derégüdaali lúgubu
(Mt 9.1-8; Lc 5.17-26)*

¹ Átiri wéyu lárigiñe, ába lagíribudun Jesúsu Capernaúm, ába jagáambun gürígia luágu giríbujali lan. ² Ába jóúndaragun sarágu gürígia darí lun mabáaraña lan ni bénabu, ába lapúrichijani ugánu buiti lúmagiñeti Búngiu luágu jasálbarun joun. ³ Ñíñein apúrichija, ligía jayábin gádürü wügüríña barúna jagía ában wügüri le derégüdaali lúgubu. ⁴ Queísiti siñá lubei jachülürün le ñí lubei Jesúsu ladúga jibe gürígia, ába jagídarun murúsun lueígiñe tábulugu múna lougiñe le ñí lubei Jesúsu, ába jarárigüdüni sánditi ñígiñe tídan lubárari. ⁵ Dan le laríjinbalin Jesúsu jafiñen, ába laríñagun lun le sándibeí.

—Niraü, ferúdnawaali bífigoun.

⁶ Ñíñanu jádaangiñe arúfudajatiña lilúrudun Moisés ja ñúnbaña ñi, ába jasáminarun. ⁷ “¿Cásan uágu ladímureja gürígia le ítara? Lanábaguñeiga le Búngiu, ladúga úati ni ában gayáraati ferúdnuna lan figou lueídügüya Búngiu.” ⁸ Subúdi lumúti Jesúsu le jasáminarubei, ába laríñagun joun.

—¿Cásan uágu jasáminara ítara? ⁹ ¿Cáteitimasan ménreengunbei laríñawagún lun sánditi le. “Ferúdnawaali bífigoun”, o laríñawagún lun. “Sarába, budáboun bubárari, beíba”? ¹⁰ Narúfudaaliti jun luágu gabáfu nan, áu le Wügüri Garaúwarügüti lun ferúdnuna nan figou.

Ába laríñagun lun sánditi.

11 —Sarába, budáboun bubárari, beíba águyu.

12 Ába lásaarun sánditi lídan óra ligía, ába labúdunun lubárari, ába láfuridun ñígiñe, aríagu sun ja ñíbaña lun. Weíriti janígi ja ñíbaña luágu cátei le, ába jíchugun uweiriguni lun Búngiu, aríñageina.

—¡Maríjiñajági diwa cátei itara buriti!

Lagúarun Jesúsu lun Leví lun lánigume

(Mt 9.9-13; Lc 5.27-32)

13 Ñígiñe, ábaya lídin Jesúsu láru dúna, dan le jayárafadun sarágu gürígia lubádun, ába larúfudajan joun. 14 Lásun larúfudajan joun, ába lasígiruni leibugun, ába laríjini Leví, le liraü Álfeo, ñun líña le ní lubei lagúburajoúa liseínsuna gumádi. Ába laríñagun lun.

—Falábana, queímoun núma queísi náni disípulu.

Ába lásaarun Leví, ába lafálaruni.

15 Murúsun óra lárígiñe, ñíñein Jesúsu eíga lúbiñe Leví, ñíñanu gíñeti sarágu agúburajatiña liseínsuna gumádi, jáma ámu gafígountiña ñun luágu dábula úara lúma, jáma láni disípulugu, ladüga sarágu jána afálaruti. 16 Ja arúfudajatiña lilúrudun Moisés, jáma fariséogu, dan le jaríjinalin eíga jáma sun wuríbatíña jagía (según jagía), ába jaríñagun joun láni disípulugu.

—¿Ída liñásan leíginbei jumáesturun áni gurá ligía jáma agúburajatiña liseínsuna gumádi lúma jáma ámu gafígountiña?

17 Dan le lagáambunbalin Jesúsu cátei le, ába laríñagun.

—Ja magádiebaña mabúseerúntiña surúsia, ja sándibaña, jagía busénbaña surúsia. Máma lubeíti niábiña áluaja gürígia buítiña ligíbugiñe Búngiu, niábiña áluajaña ja gafígounbaña lun lasáansirún jóuserun.

Jálügüdüni Jesúsu luágu ayúnaruni

(Mt 9.14-17; Lc 5.33-39)

18 Luágu ában wéyu, dan le jayúnarun lánigu Juan jáma jánigu fariséogu lun jagúnfulirun lúma Búngiu, ába jayábin fiú gürígia álügüdei Jesúsu.

—¿Cásan uágu jayúnara lánigu Juan jáma jánigu fariséogu lun jagúnfulirun lúma Búngiu, ánjaña báni disípulugu mayúnaruntiña?

19 Ába louñabun Jesúsu láu jémpulu luágu iséri larúfudajan lúma binádu, laríñaga.

—¿Gayáraati funági jayúnarun amísurajoútiña lídan ában maríei dan le níjein lan adári ñi jáma? Ánjein níjein lubei adári ñi, siñáti jayúnarun, lúnti jeígin.

20 Lachülürüba dan lun lanügüniwa adári jámagiñe, ligíameti jadáni lun jayúnarun.

21 Máfadajoúntu anáanguni binádujaru táu gamísa to macháwaranguru, ladüga le méme tífe gamísa to macháwaranguru tajeíridaguboun to binádujaruboun dánme le tacháwaragun, laweíridatimaabati jeíriti.

22 Meserúnwati gíñe bínu le isérigili lídoun ában ágei guéru le binádujali ladüga labouchagubei bínu iséri guéru binádu dánme le liñúrun. Féridimeti bínu, féridi guéru. Bínu iséri lúnti leserúniwa lídoun guéru iséri.

Játüjan disípulugu túriгу lídan wéyu le eméraaguagülei

(Mt 12.1-8; Lc 6.1-5)

²³ Ában wéyu le eméraaguagülei, eíbuageina líña Jesúsu jáu láni disípulugu labádinagua bunáguau, ába játtüjan láni disípulugu türígu dan le jástügürün.

²⁴ Ába jariñagun fariséogu lun Jesúsu.

—¡Aríjabá joun bānigu! ¿Cásan uágu jadüga wadágimanu le moún lumuti ladügüniwa lídan wéyu le eméraaguagülei?

²⁵ Ába lariñagun joun.

—¿Malíjangidün luágu le ladügübei David luágu ában dan, dan le lálámachunbei, ligía jáu sun líbirigu? ²⁶ Ába lebélorun ligilisirugun dan le Abiatár lan fádiri le íñutimaabei, ába leiginun fein to sagráuboun, to majouáboun jeiginun ámu güriúa jaweidügüya fádriugu según lilúrudun Moisés, áni ru ligía joun güriúa ja lúmabaña. Mámati figou le ladügübei David ligíbugiñe Búngiu.

²⁷ Ába giñe lariñagun Jesúsu joun.

—Lun wügüri ladügüwa wéyu le eméraaguagülei, máma wügüri adügüwabei lun wéyu ligía. ²⁸ Ligía gabáfutina giñe, áu le Wügüri Garaüwarügüti, lun nariñagun cába lan gayára ladügüniwa lídan wéyu le eméraaguagülei.

3

Ában wügüri jiláali ában lújabu (Mt 12.9-14; Lc 6.6-11)

¹ Ábaya lebélorun Jesúsu tídoun ában jalígílisin juríu, ñíñeinti ában wügüri jiláali ában lújabu. ² Jaríjati ja ñibaña ánjein lagáranijaba lubei Jesúsu lun lídan wéyu le eméraaguagülei, lun jadárirun lidúnrun. ³ Ába lariñagun Jesúsu lun le jiláalibeí újabu.

—Sarába, ráramabá ya jagíbugiñe sùngubei.

⁴ Ába lálügüdüniña ja jíbiri.

—¿Cátei lúnbei ladügüniwa lídan wéyu le eméraaguagülei, lun jíderawagüniwa güriúa ódi lun ladügüniwa wuríbati joun, lun leséfurüniwa jabágari ódi lun jígirüniwa lun joúnwen?

Sun jagía, ába jámanichun. ⁵ Ábati lariñaguniña Jesúsu láu igáñi lúma íruni ladüga tidere janígi. Ába lariñagun lun wügüri ligía.

—Tulébei bújabu.

Ába látuleruni, ába lareídagun. ⁶ Ába jáfuridun fariséogu, ába jagúmeserun adímureja jámagua jáma giñe lánigu Heródes ída lúba lan jáfaruni Jesúsu jilágubei.

Sarágu güriúa lárú dúna

⁷ Ába lídin Jesúsu jáu láni disípulugu lárún dúna, ába jafálaruni sarágu güriúa Galiléana. ⁸ Dan le lagaambúnbei luágu oúnwenbun buri cátei le ladügübei, ába jayábingua güriúa Judéagiñe, Jerusaléngiñe, Iduméagiñe, loubáfurugugiñe dúna le Jordán, Tírogiñe, lúma Sidóngiñe lun jaríjini. ⁹ Ligía lariñagunbei Jesúsu joun láni disípulugu lun aráanseñu jamá ában ugúnein lubá lueí jámuruduni sarágu güriúa jagía, ¹⁰ ladüga queí gíbeeña lan lareídaguagdün, sun sánditiña, ába jáguragun joúngua luágun lúnrügü jagúuruni lun lareídaguagdüniña. ¹¹ Dántija le jaríjini ja gawágubaña espíritugu wuríbatíña, ábaja jájuduragun ligíbugiñe, ába jagúaragun espíritugu jádaangiñe.

—Liraü Búngiu amürü.

¹² Ába lewéridiruniña Jesúsu lun maríñagun jamá cáteifein lan.

Lanúadiruniña Jesúsu dúusu apóstolugu
(Mt 10.1-4; Lc 6.12-16)

¹³ Lárigiñe, ába lamúdeirun Jesúsu luágun ában wübü ní lubei lagúara joun ja labúseerubaña queísi loúnagülegu, ába jayábin lun. ¹⁴ Ába lanúadirun dúusu jádaangiñe lun lúmabaña lan súnwandan lúma lun japúrichijani ugánu buíti lánina asalbaruni. ¹⁵ Ába líchugun ubáfu joun lun jareídaguagüdün sánditiña lúma lun jaságajan espíritugu wuríbatíña. ¹⁶ Niján jíri dúusu wügüríña jagía. Simón, le únbei lagúaja Jesúsu Pédro, ¹⁷ Jacóbo láu Juan le lamúlen, ja lirájüñü Zebedeó, ja únbaña lagúaja Jesúsu Boanérges—míni lan líra, Lirájüñü Wayújururu, ¹⁸ Andrés, Felípe, Bartolomé, Matéo, Tomás, Jacóbo le liraü Álfeo, Tadéo, Simón—ában meja wügüri le áfaaguti lun jawáanserun juríu, ¹⁹ lúma Júdas Iscarióte le alúgurubalin Jesúsu.

Ariñagatiña luágu lubáfu lan Máfia lúmabei Jesúsu
(Mt 12.22-32; Lc 11.14-23, 12.10)

Lárigiñe, ába jagíribudun járigoún, ába jebélurun tídoun ában múna, ²⁰ ábaya jóundaragun sarágu gürígia ní darí lun madáni jamá ni lun jeígin. ²¹ Dan le jasúbudirunbalin lidújeñu Jesúsu ca lan ásügürübei, ába jayábin lún yebe janügüni, ladüga jariñagun gürígia luágu wuríbaali lan líchügü.

²² Níñanu arúfudajatiña lilúrudun Moisés ja achülürübaña Jerusaléngiñe, ába jariñagun.

—Wügüri le, níjein Beelzebú, le Máfia, le jábuti espíritugu wuríbatíña, lúma, láu lubáfu Máfia laságaja espíritugu wuríbatíña.

²³ Ábati lagúarun Jesúsu joun lun jayárafadun lubádun, ába líchugun ában jémpulu joun, ába laríñagun.

—¿Ída lúba gayára lan laságaruni Máfia Máfia guánarügü? ²⁴ Furúmieguarügü arúejani le afánreinraguti lun jageindagun jámagua, lagünrinchaguba, ²⁵ áni ánjein fánreingujaña lubei idújeñu ladüga wuríbu jádaangua, siñábei jadúrarun idújeñu jagía queísi idújeñu. ²⁶ Ánjein lubei jamúgati afáreinragua Máfia, lageíndaguame lúmagua, siñábei ladúrarun, lagúmuchagülerügübei le.

²⁷ Úati ni ában lun lebélorun lúbiñoun ában wügüri le jéreti lun lanügüni lílugu ánjein magúragun lan wügüri jéreti ligía furúmiñe. Ítara rügüñein gayára lan lanügüni lílugu.

²⁸ Láu sun ninárün naríñagun jun luágu gayára lan ferúdnawa lan sun figóu lúma sun wuríbani le laríñagubei gürígia, ²⁹ lueidügüya lun jadímurejan wuríbati luágu Sífiri Sándu, siñábei ferúdnawa lan figóu líra, leréderuba lidúnrun lun sun dan.

³⁰ Laríñagunbalin Jesúsu líra, ladüga jariñagun luágu lubáfu lan Máfia lubáfu Sífiri Sándu le luágubei.

Lúguchu Jesúsu jáma lamúlenu
(Mt 12.46-50; Lc 8.19-21)

³¹ Lárigiñe, ába tachülürün lúguchu Jesúsu jáu lamúlenu tubádun múna to ní lubei Jesúsu, ába jeréderun bougudi, ába jóunagüdün luágu. ³² Játi ñúnbaña geyégu láu Jesúsu, ába jariñagun lun.

—Nurántia búguchu jáu bamúlenu bougudi, jáluajañádibu.

³³ Ába laríñagun joun.

—¿Cági núguchuboun jáu namúlenu?

³⁴ Ába laríagun jawágun ja ñúnbaña geyégu láu, ába laríñagun.

35 —Añája núguchu jáu namúlenu, ladüga furúmieguarügü ja adügüti lugúndan Búngiu, jagía namúlenubaña, nítunu, núguchu.

4

Jémpulu luáguti ábunaguti (Mt 13.1-9; Lc 8.4-8)

¹ Ábaya lagúmeserun Jesúsu arúfudaja láru dúna, ába jóúndaragun sarágu güriá le ñi lubei. Quei gíbeyaaña lan güriá ñi, ába ládinun Jesúsu tídoun ában ugúnein to ñiboun dúnarugu. Ába lañúurun ñi, ába jeréderun sun güriá láru béya. ² Ábati larúfudajan sarágu cátei joun láu jémpulu, laríñaga joun.

³ —Agáamba jumána. Ñíñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láburujan murúsun lídaangiñe luágun úma, ába jayábin dunúru, ába jeígini. ⁵ Líbiri, ába láburujan labádinaguóun dübü le ñi lumuti úa lan sarágu múa, ába labouuchun furése ladüga majúlin lan múa. ⁶ Dan le lásüdün wéyu, ába lásaurün, queíti málagüle lan, ába loúnwen. ⁷ Líbiri ílaü, ába láburujan labádinaguóun jíyu, ába laweinamudun jíyu úara lúma, ába lañáradaguagüdüni, magínduntiti nádü lígia. ⁸ Níjeinti lídaangiñe, áburujati lídoun múa buíti, ába labouuchun, ába laweinamudun, jma lubuídun alúbajoúti lídaangiñe! Níjein lídaangiñe, íchuguti daráandi águu luágu cáda ában águu, líbiri rúti úrúwa-wein, líbiri, san.

⁹ Ábati laríñagun joun.

—Ja garígeirugubaña lun jagáambun, agáamba jamá.

Le lébubei larúfudajan Jesúsu joun güriá láu jémpulu (Mt 13.10-17; Lc 8.9-10)

¹⁰ Lárigiñe, dan le leréderunbei Jesúsu lábugua, ába jayábin láni dúusu disípulugu jama jíbiri lánigu, ába jálügüdüni ca lan lílabei jémpulu le. ¹¹ Ába laríñagun joun.

—Jugúya, subúdigüda láali Búngiu cátei arámudaguati le lánina larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun, ¹² lun dánme lan jaríjin, íbídiñe lámuga joun ca lan laníchigubei cátei le jaríjubei, dánme jagáambun, úa lámuga gunfaráanda jamá, lun lásíñerun jagíribudun lun Búngiu lun ferúdnawa lan jafígoun.

Lafúnraanguagüdüni Jesúsu jémpulu luáguti ábunaguti (Mt 13.18-23; Lc 8.11-15)

¹³ Ába laríñagun joun.

—¿Útatan gunfaráanda jumáni le? ¿Ída lubági gunfaráanda jumáni líbiri jémpulu? ¹⁴ Le ábanagubalin líla nádü, itara jáña quei le apúrichijabalin Lerérun Búngiu. ¹⁵ Añájein güriá, itara jáña quei úma le uágunbei láburuja lídaangiñe líla nádü, ába jagáambuni Lerérun Búngiu, lárigiñe jagáambuni, ába liábin Máfia, ába lagídaruni dimúrei le abunúbei tídan janígi. ¹⁶ Jíbiri güriá, itara jáña quei dübü le abádinaguóunbei láburuja lídaangiñe líla nádü, ába jagáambuni Lerérun Búngiu, ába jerésibiruni láu ugúndani. ¹⁷ Quei márügüdü lubei Lerérun Búngiu tídan janígi buídu, madúratí jádan, dánti le laríjníwa jábun, o jeíbaajoúniwa lan lueígiñe Lerérun Búngiu, magúraasuntiña. ¹⁸ Jayábin jíbiri, itara jáña quei jíyu le abádinaguóunbei láburuja lídaangiñe líla nádü, ába jagáambuni Lerérun Búngiu, ¹⁹ weírítimaati jafúudun luágu cátei le lánina íbágari le, ába leyéeduniña írisini. Sun le, ába láfaruni Lerérun Búngiu tídaangiñe janígi, mígiruntiti lun lalúbajoún

jádan gürígia jagía. ²⁰ Añájein gíñe gürígia, ítara jáña quei múa buíti le ídounbei láburuja lídaangiñe líla nádü, ába jagáambuni Lerérun Búngiu, ába jerésibiruni, alúbajolati cátei buíti jádaangiñe. Buíti jagáburi quei líla nádü le íchugubei darándi águu luágu ában, o ürüwa-wein, o san.

Jémpulu luáguti lámpu
(Lc 8.16-18)

²¹ Ába laríñagun joun.

—¿Béwati funági ában lámpu lun líchugúniwa tábugiñe ában gáfu o tábugiñe lan gabána? ¡Uá! Luágu dábula líchugúa lun larúgoungadágüdün múnada.

²² Úati lubeiti ni cáta le arámudaguati lun mafúnraangudúnbei lan, úa ligía ni cáta le íbídiñewati lun masúbudírúnwabei lan. ²³ Agáamba jumána, jugúya le garígeirugubei lun jagáambun.

²⁴ Aríñagati gíñe joun.

—Tóunigi jumátia lun jagúnfulirun lúma inárüni le jagáambunbei. Láuba jagúnfuliruni, gunfaráandatima jumáni le naríñagubei jun. ²⁵ Ítara líña, gürígia le aténirubei buídu lun nerérun, gunfaráandatima lumúti, ánjeinti le meténibeí lun, labúleidubei sun le agáamba lálíbeí.

Jémpulu luáguti nádü le aweíridubei

²⁶ Aríñagati gíñe Jesúsu.

—Ítara líña larúeijan Búngiu quei le asúseredubei lun ában wügüri le ábunubei líla nádü lábugiñe múa, ²⁷ áriebu buri lúma wéyuagu lídan le larúmugun ábunaguti ligía, sará ligía quei léchun, chülü dan ába labouúchun nádü, ába laweíridun, íbídiñeti lun ábunaguti ída líña lan lasúseredun. ²⁸ Múa guánarügü aráandarati, furúmiñe ába láfuridun ídibu, ñígiñe ába legélewejan, ñígiñe ába labuúchun ílewei láu ílaü. ²⁹ Dánti le funáli líla nádü, ába látújóuniwa ladüga chülüjali lan dan lun lalúbajoun.

Jémpulu luáguti tíla mostása
(Mt 13.31-32; Lc 13.18-19)

³⁰ Aríñagati gíñe Jesúsu.

—¿Cásan lenégebei larúeijan Búngiu, o ca jamúga jémpulu gayáraabei wíchuguni lúmoun? ³¹ Ítara líña quei ában tíla mostása le abunúti lábugiñe múa. Tíla mostása, ligía ában lídaangiñe ílaü le ñúraútimaabei ubouágu, ³² dan le labunún, ába laweíridun, ligía weíritimaabei tídaangiñe sun nádü, weínamuti lílímun darí lun gayára lan jeméraagun dunúru lábugiñe lamúñounga le líchugubei.

Layúsuruni Jesúsu jémpulu
(Mt 13.34-35)

³³ Ítara líñájei larúfudajan Jesúsu luágu larúeijan Búngiu joun láu sarágu jémpulu líbe le darí le ñí lumuti gayára lan gunfaráanda jamá. ³⁴ Marúfudajaanti ni cáta joun luágu larúeijan Búngiu mayúsurunga jémpulu. Ába lafúnraanguagüdüni sun jémpulu joun láni díspulugu dan le jagíarügü lan lúma.

Lagálumaruni Jesúsu garábali lúma lugúdi barána
(Mt 8.23-27; Lc 8.22-25)

³⁵ Wéyu méme ligía, dan le lagúñedunbei, ába laríñagun Jesúsu joun láni díspulugu.

—Queímoun loubáfurugun dúna.

³⁶ Ábati jígruniña bürübünu gürígia jagía, ába janügüni Jesúsu tídan ugúnein to gádaanbaliña. Níñoun buri giñe ámu ugúnein úara jáma. ³⁷ Ába láfuragun ában garábali jéreti, ába lebélujan lugúdi barána tídoun ugúnein darí lún yebe tabuíunchun láu dúna. ³⁸ Larúmuguñati Jesúsu tiyúna ugúnein baláñu tuágu ában ichügübarari. Ába jagágudajani, ába jariñagun lun.

—¡Maésturu! ¿Mebéreseguntibusan láu wadíbiragua lan?

³⁹ Ába lásaarun Jesúsu, ába ladeñjan lun garábali, ába lariñagun lun barána.

—¡Maníba! ¡Derégüdagubá!

Ába lagálumadun garábali, ába darángila lan sun cátei. ⁴⁰ Ábati lariñagun joun láni disípulugu.

—¿Cásan uágu luweírinbei janúfude? ¿Cásan uágu mafíñen jubeí?

⁴¹ Ába jeréderun láu luweírin janígi, ába jálügüdagun jámagua.

—¿Cátei funásan le, garábali lúma barána ñüdüntiña láu le lubeíbei?

5

Ában wügüri Gadárana le gawágubei máfianu (Mt 8.28-34; Lc 8.26-39)

¹ Ába jachülürün loubáfurugun dúna lídoun fulásu le gíribei Gadára. ² Lárigiñerügü láfuridun Jesúsu tídaangiñe ugúnein, ába liábin ában gürígia lídaangiñe ában umúajaü achigíti luágu dübü luágun, wügüri ligía gawáguti ában espírítu wuríbati. ³ Lídan jabára jiláaña lagánoua áni úati ni ában gayáraati lagüraguni, ni láu güríngüri. ⁴ Güráguañája jamáali láu güríngüri luágu lugúdi lúma luágu lújabu, súnwandan látumuraguni, úati ni ában gayáraati lámuruduni. ⁵ Súnwandanja leibugun árieibu wéyuagu agúarajeina luágu buri wübü lúma buri lídan jabára jiláaña íbiagua lúngua láu dübü. ⁶ Dan le laríjinbalin gürígia ligía Jesúsu dísegiñein, ába leibaagun lubároun, ába lájuduragun ligíbugiñe, ⁷ ába lagüaragun lun.

—¿Cásan uágu bemétera nómoun, Jesúsu Liraü Búngiu le Íñutimaabei? Ayúmuraguatina bun luágu líri Búngiu lun masúfuriragüdün bánina.

⁸ Lariñagunbei ítara ladüga guméseeli lan Jesúsu aríñaga lun.

—¡Espírítu wuríbati, ígirabei gürígia le!

⁹ Ába lálügüdüni Jesúsu.

—¿Ca bíri?

Ába loúnabun.

—Lejión níña ladüga gíbetiwa.

¹⁰ Ába jayúmuragun espírítugu jagía lun Jesúsu lun moúnajan lániña bougudin lueí fulásu ligía. ¹¹ Queíti níñanu lan sarágu büüruju eíga ñi luágu wübü, ¹² ába jayúmuragun espírítugu wuríbatiña jagía lun.

—Oúnaja báwa jádoun büüruju jára, rúba úma woun lun webélurun jádoun.

¹³ Ábati líchugun Jesúsu úma joun, ába jáfuridun lueí gürígia ligía, ába jebélurun jádoun büüruju. Níñanu jawára bián-mílu büüruju. Ába jáguragun büüruju jagía jóungua lueígiñe ában gudúngu, ába jáburujan baránajoun, ába jañáradagun.

¹⁴ Ábati janúfudedagun ja oúnigirubaliña büüruju jagía, ába jeibaagun abájüdaguei le asúseredubei ubúruгу lúma áraabu. Ába jayábíngua gürígia aríjei ca lan asúseredubei. ¹⁵ Dan le jachülürünbei le ñi lubei Jesúsu, ába

jarjini gürigia lé meja gawágubei espíritugu wuríbatíña ñun líña, táuñein gíñe lanáangun, areídaguaali, ába janúfudedagun. ¹⁶ Játí arjubalin, ába jabájúdaguni le asúseredubei lun gürigia lé buga gawágubei espíritugu wuríbatíña lúma jawáguti búuruju, joun. ¹⁷ Ábati jayúmragun lun Jesúsu lun láfuridun lídaangiñe jageira.

¹⁸ Dan le ládinun Jesúsu tidoun ugúnein, ába layúmragun wügüri lé buga gawágubei espíritugu wuríbatíña lun lun lídin lúma, ¹⁹ májati Jesúsu, aríñarügüti lun.

—Beíba júbiñoun jámoun bidújeñu, ábame babájúdaguni sun le ladügübei Babúreme Búngiu báu, ída líña lan bagúdemedun lun.

²⁰ Ába lídin, ába lagúmeserun abájúdaguei sun le ladügübei Jesúsu láu lídan sun fulásu Decápolis, ába laweíridun janígi sùngubei.

*Liraü Jáiro, túma würi to agúurubarun lanáangun Jesúsu
(Mt 9.18-26; Lc 8.40-56)*

²¹ Dan le lagíribudunbei Jesúsu tídan ugúnein loubáfurugun dúna, ába jayábingua bürübunu gürigia le ñjin lubeí, ába leréderun ñi láru dúna. ²² Ábati liábin ában jádaangiñe tábuti jalígilisin juríu, gíriti Jáiro. Dan le laríjinalin wügüri le Jesúsu, ába lájuduragun lubádu lugúdi, ²³ ába layúmragun lun ítara.

—Nújein niraü touwe, queímoun bíchigei bújabu tuágu, areídagua támuga, mouñwen támuga.

²⁴ Ába lídin Jesúsu lúma, sarágu jáña gürigia afálarutiña, ába buriti jámurudaguni Jesúsu. ²⁵ Jádaanti sarágu gürigia ja, ñíñoun ában würi sánditu, dúusu irúmu táu láu lésejan jítaü tídaangiñe. ²⁶ Súfurijaru sarágu jámagiñe surúsiagu áni gásta táali sun le túmati, mareídaguntu, gáwoun gueínarügü.

²⁷ Ligía tagáambun ladímurejóun luágu Jesúsu, ába tiábin lanáangiñe jádan sarágu gürigia, ába tagúurunun lanáangun, ²⁸ ladüga tariñagun túnguarügü. “Láurügüme nagúurunun lanáangun nareídaguba.” ²⁹ Lídan óra ligía, ába leréderun lésejan jítaü tueí, ába tasándiragun túngua luágu areídaguáaru lan.

³⁰ Ábati lasándiruni Jesúsu luágu areídaguagúdaali lan gürigia láu lubáfu, ába lagáraragun jawágun gürigia ja lanáangiñeña, ába lálügúdjagan.

—¿Ca agúurubei tuágu nanáangun?

³¹ Ába jariñagun láni disípulugu lun.

—Aríagu biñátia lun jíbe gürigia ya luágu murúgu jáña lan, ¿álügúdjagídibu ca lan agúurubei buágu?

³² Ába laríajaan Jesúsu áluaja ca lan agúurubei luágu. ³³ Ába tiábin würi tugúya adádagareina láu anúfudei, subúdiñuteí le asúseredubei tun, ába tájuduragun ligíbugiñe, ába tariñaguni sun inárüni lun. ³⁴ Ába laríñagun Jesúsu tun.

—Niraü, areídaguáadibu ladüga bafiñen. Beíba láu darángiláü, areídaguáñu lídaangiñe bisándi.

³⁵ Nígili Jesúsu adímureja, ligía jayábin lúbiñegiñe wügüri lé buga ññüdünbei óugei luágu tisándi liraü, ába jariñagun lun túguchi irájü tugúya.

—Jilátia biraü, ¿ca uágu bebéreseja lun maésturu guetó?

³⁶ Agáamba lumúti Jesúsu le jariñagubei, ába laríñagun lun wügüri ligía.

—Manúfudedabá, afíñerügüba.

³⁷ Májatiti jóudin ámu lúma lueídügüya Pédro, Jacóbo lúma Juan le lamúlen Jacóbo. ³⁸ Dan le lachülürünbei lúbiñoun wügüri ligía, ába laríjini chagáguau jáma gürigia ja ayájubaña, agúaraja. ³⁹ Ába lebelurun, ába laríñagun joun.

—¿Cásan uágu jareíncha, ayájua buri jugúya ítara? Moúnwentutia irájü to, tarúmugua.

⁴⁰ Ába jéjerajan láu. Ábati láfuridagüdüniña Jesúsu súngubei ñígiñe, ába lanügüni túguchi irájü túma túguchu jáma ja ñüdümbañá lúma, ába lebélorun le ñíjin tubei irájü. ⁴¹ Ába lárügüdüni tújabu, ába laríñagun tun.

—Talíta, cümi—lila líra. Niraü, sarába.

⁴² Lídan óra ligía, ába tásaarun irájü tugúya, ába teibugun. Weíyaraüjaru, dúusu irúmu táu. Ába laweíridun janígi gürígia ja ñíbaña. ⁴³ Ába líchugun Jesúsu dimúrei deréğüdati joun lun mabájüdagun jamáni ni ca un, ába laríñagun joun lun jíchugun eíginini tun.

6

Jesúsu lídan fulásu le Nazarét (Mt 13.53-58; Lc 4.16-30)

¹ Ába lídin Jesúsu ñígiñe, ába lagíribudun lageíroun, ába jóudin láni disípulugu lúma. ² Dan lachülürün wéyu le eméraaguagülei, ába larúfudajan tídan jalígilisin juríu, sarágu jáña gürígia agáambeí, ába laweíridun janígi láu larúfudajan, ába jaríñagun.

—¿Jalía funásan lafúnrendeirei gürígia le sun le? ¿Cáteisan lichú áu le luágubei? ¿Ída liñásan gayára lubei ladáagun miláguru? ³ Saráfangeiga le tiraü María le, libugaña Jacóbo, José, Júdas, lúma Simón, ñáñanu giñe lítunu wáma.

Ába jíchugun mabájüdüni luágu. ⁴ Ába laríñagun Jesúsu joun.

—Sun gürígia, gúndaatiña láu ában proféta jaweídügüya ja lupaísanun jáma lidújeñu, jáma ja tílana lúban, jagía rügüñanu íchiga mabájüdüni luágu.

⁵ Ligía lásiñerunbei ladügün ámu miláguru ñi lueídügüya líchugun lújabu jawágu biñaráu sánditiña, ába lareídaguagüdüniña. ⁶ Weirititi lanígi láu mafiñen jamá. Lárígiñe, ába leibuguni lirájüñü fulásu, arúfudajeina.

Louñajaniña Jesúsu láni disípulugu apúrichija (Mt 10.5-15; Lc 9.1-6)

⁷ Ába louñajan jawágu láni dúusu disípulugu lun lagúmeserun oúnajaña bián bián, ába líchugun ubáfu joun lun gayára lan jaságarun espíritugu wuríbatíña.

⁸ Rúti dimúrei joun lun manügün jamá ni cáta luágu jeibugun lueídügüya bádun, moún lumuti janügün ni fein, ni ságü, ni seínsu, ⁹ lun geidi tan jasábadun, lun mabíaman tan jasímisin. ¹⁰ Ába giñe laríñagun joun.

—Dánme le jebélorun lídoun ában fulásu apúsaraja, reidei jumá ñi tídan ában méme múna dari jáfuridun lídaangiñe fulásu ligía. ¹¹ Ánjañti merésibirúniwa lídan ában fulásu, mája jagía jagáambunün, furíjuma ñígiñe, ábame jáfuruduni calíqui lueígiñe jugúdi, liseínime magúndani jáu lílana fulásu ligía, ígira jumáña quei jadáriragun jóungua. Le ninárün jáu luágu dánme lan lachülürün luwéyuri Búngiu lun lagúseragüdüniña sun gürígia, maweíribei jabeichúniwa Sodómana jáma Gomórrana quei lílana fulásu le merésibirunbalün.

¹² Ábati jáfuridun, ába japúrichijan joun gürígia luágu lúnti lan jasáansiruni ligáburu jóuserun. ¹³ Sagátiña giñe sarágu espíritugu wuríbatíña jaweí gürígia, jurúgua jagía aílí jawágu sarágu sánditiña, ába jareídaguagüdüniña.

Louñwen Juan le abásteragüdajabei (Mt 14.1-12; Lc 9.7-9)

14 Queiti eíbaajali lubei luáuti Jesúsu lídan sun fulásu, ába gíñe lachülürün lábun lagáambun urúei Heródes. Sarágu jáña aríñagutiña.

—Saráya Juan le abásteragüdajabei lídaangiñe ouweni, ligía luweírinbei lubáfu.

15 Jaríñaga jíbiri.

—Elías lé meja proféta le.

Jíbiri aríñaga.

—Ában proféta quei ja binádu.

16 Dan le lagáambunbalin Heródes sun le, ába laríñagun.

—Juan le, le nadürüragüdübei ichügü, saráya lídaangiñe ouweni.

17 Lé meja asúseredubei, ouñajali meja Heródes adáurei Juan, ába lagüraguni láu güringüri furisunrugu tadüga Heródias. Würi tugúya, lúmarí meja Felípe, le lamúlen Heródes, ába lanügünun Heródes lúmarime. 18 Ába meja laríñagun Juan lun Heródes.

—Moún lumuti bagámaridunun lúmarí bamúlen.

19 Ába liyéeregudun Juan tun Heródias, ába tabúseerun táfaruni jilágubei, 20 siñá tumuti ladüga subúdi lan lun Heródes luágu ában lan wügüri le eíbuguti buídu lúma Búngiu Juan, áni ában lan wügüri eseríwiduti lun Búngiu, janúfudetiti lueí. Ligía mája lubei lun tadügün ni cáta láu. Láu sun úa lan gunfaráanda láani Heródes le laríñagubei Juan lun buídu, agáamba lumúti láu ugúndani. 21 Ába tadáriruni Heródias ticháansin dan le lagúnfulirun Heródes irúmu, ába ladügün fédu joun gumádimatiña jáma jábutigu súdeara jáma ámu buri gürgía weírigutiña ja Galiléabaña. 22 Ába tebélorun tiraü Heródias ní lubei fédu le, ába tabínajan, gúndaatiti Heródes jáma sun ja ñibaña eíga lúma láu tabínajan irájü to, ába laríñagun tun.

—Amúriajabei le babúseerun núma, níchugubei bun.

23 Rulumuti lerérun tun luágu líchugubei lan furúmieguarügü cátei le tamúriajan lúma tun, gayára lan lamídan lan fulásu le ní lubei larúeijan tamúriaja. 24 Ába táfuridun, ába taríñagun tun tügüchu.

—¿Cábasan namúriaja lúma?

Ába taríñagun tun.

—Amúriajabei lábulugu Juan le abásteragüdajabei lúma.

25 Ába tebélorun irájü to furése le ñíjin lubei urúei, ába taríñagun lun.

—Buséntina lun bíchuguni lábulugu Juan le abásteragüdajabei nun lídan ában asíedu guelé guelé.

26 Ába lajírudagun urúei sarágu, quei rúlaali lan lerérun áni agáambagu jáña amísurajóutiña lun, májati lun míchu lubei lan le tamúriajabei lúma tun.

27 Furése furése, ába loúnajan urúei ában súdeara láu dimúrei lun lanügüni lábulugu Juan lun. 28 Ába lídin súdeara ligía furisunrugu, ába ladürürüni lábulugu Juan, ába lanügüni lídan ában asíedu. Ába líchuguni tun irájü tugúya, ába tíchuguni tun tügüchu.

29 Dan le jagáambunbalin lánigu Juan, ába jayábin lun janügüni lúgubu, ába jábununi.

Leígaqüdün Jesúsu seíngü mílu wügüriña

(Mt 14.13-21; Lc 9.10-17; Jn 6.1-14)

30 Lárigiñe jagíríbudun láni Jesúsu apóstolugu, ába jóundaragun lúma, ába jabájüdaguni sun le jadügübei lúma le jarúfudajabei, lun. 31 Ába laríñagun Jesúsu joun.

—Jigóúgu, queímoun weméraagua lídan ában fulásu le mageírawati.

Lariñagubaalin líra ladüga ñíñanu sarágu gürígia, jíbiri ñúdün, jíbiri ñübin, dari lun madáni lan Jesúsu jáma láni disípulugu ni lun jeígin. ³² Ába jóudin tídan ába ugúnein lídoun ában fulásu mageírawati. ³³ Sarágu jáña aríjiti jóudin, dan le jasúbudiruni luágu níjein lan Jesúsu jádan, ába jeíbaagun geyégua láu lagúnu lídaangiñe sun lirájüñü fulásu, ába jachülürün lubáragiñe lachülürün Jesúsu jáu láni disípulugu. ³⁴ Dan le larárirunbei Jesúsu tídaangiñe ugúnein, ába laríjin sarágu gürígia jagúrabajañein, ába jagúdemedagun lun ladüga ítara jáña lan quei mudún ja mouñiritiña. Ába lagúmeserun arúfudaja sarágu cátei joun. ³⁵ Dan le dárüjali, ába jayábin láni disípulugu, ába jariñagun lun.

—Dárüjalitia áni úatiña aganoútiña lídan fulásu le. ³⁶ Oúnaja báña gürígia ja lun jóudin lídoun buri lirájüñü fulásu le yaráfabei lun jagáñijan fein, ladüga úati ni cáta ya lun jeígin.

³⁷ Ába lariñagun Jesúsu.

—Rújuma eígin joun.

Ába jariñagun lun.

—¿Gayáraati funági wóudin agáñija fein joun? Busénwati jamúga lebégi bián-san wéyu wadágimanu lun wabíjini seínsu lun wíchugun fein joun súngubei.

³⁸ Lariñaga Jesúsu joun.

—¿Átiriñoungi fein júma? Jeíba aríjoun.

Dan le jaríjinun, ába jariñagun lun.

—Seíngü fein jáma bián úduraü.

³⁹ Ába lañúragüdüniña gürígia sagádirugu. ⁴⁰ Ába jañúurun san san lúma dimí dimí san, queísi lariñagun joun. ⁴¹ Ába lanügünun Jesúsu seíngü fein to lújaburugu jáma bián úduraü ja, ába laríjin siélun, ába leteíngiruni Búngiu tuágu, ába lagúbachagúnun, lárigiñe, ába lamúrusujanun lun lichugunun joun láni disípulugu lun jafánreinjanun jádan gürígia jagía, fánrein jamáña giñe bián úduraü jagía jádan súngubei. ⁴² Jóútiña sun jagía químule. ⁴³ Lárigiñe, ába jabuínchagüdüñ dúusu faníñe láu tífe fein lúma úduraü ígiragúti. ⁴⁴ Seíngüñanu mílu wügüríña eígitíña, mabájüdünga würíña jáma irájüñü.

Leíbugun Jesúsu ligíbuagu dúna (Mt 14.22-27; Jn 6.16-21)

⁴⁵ Ába ládinagüdüniña Jesúsu láni disípulugu tídoun ugúnein lun jánjiñuragun lubá lun jachülürün Betsáida, sun niján lan ayoúragua joun gürígia. ⁴⁶ Dan le ñúdüñaña, ába lídin luágu wübü ayúmuragua lun Búngiu. ⁴⁷ Dan le lagúñedunbei, lamídaanjaru dúna ugúnein jáu disípulugu, Jesúsu rugáali lábugua múarugu. ⁴⁸ Ába laríjin luágu jénreenguja lan joun lun jénjunjan ladüga jabárouñein lan garábali. Lubá larúgan, ába lídin Jesúsu jawágun eíbugeina ligíbuagu dúna, lásügürá yebe jáu. ⁴⁹ Dan le jaríjini eíbuga ligíbuagu dúna, ába jarítagun luágu úfiaü lan, ába jagúaragun, ⁵⁰ ladüga sun jagía aríja jamúti, ába janúfudedagun. Ába ladímurejan joun, ába lariñagun.

—¡Ganígi jumá! ¡Manúfude jumá, áu le!

⁵¹ Ába ládinun tídoun ugúnein jámoun, ába lagálumadun garábali. Ába laweíridun janígi láu, ⁵² ladüga úagili lan gunfaráanda jamáni miláguru le ladügübei táu fein, luágu gabáfu lan lun sun cátei, derégili jachügü.

*Lareidaguagüdüniña Jesúsu sánditiña Genésaret
(Mt 14.34-36)*

⁵³ Ába jánjiñuraguni dúna, ába jachülürün Genésaret, ába jagürünun ugúnein lárú dúna. ⁵⁴ Quei jaráriragun tidaangiñe ugúnein, itara jasúbudiruni lílana fulásu luágu Jesúsu lan. ⁵⁵ Ába jeibaagun lídoun sun fulásu aríñaga luágu chülújali lan, ába jagúmeserun gürígia anájaja sánditiña tídan jabárari le ñíjin lubei jagáamba luágu níjein lan Jesúsu ñi. ⁵⁶ Súnti fulásu ñíjin lumúti lebélera, ubúrugu yébe, lirájüñü yébe fulásu, áraabu yébe, ába jíchaajoún sánditiña úmada, ába jamúriajan lúma lun lígiruniña lúnrügü jagúurun sánditiña jagía luágu táru lanáangun. Súnti ja agúurubaña luágu, areidaguatiña.

7

*Cátei le adügübalin gürígia lun marúman lan ligíbugiñe Búngiu
(Mt 15.1-20)*

¹ Ába jayábin fariséogu jáma jádaangiñe arúfudajatiña lilúrudun Moisés ja ñübinbaña Jerusaléngiñe, luágun Jesúsu. ² Ába jaríjin luágu añájein lan jádaangiñe disípulugu machíbun jamúti jájabu lubá jeígin según jagáburi juríu. ³ (Falá jamúti fariséogu jáma jíbiri juríu binádu jagáburi binádu jagübürigu lun meigin jamá, machíbunga jamei jájabu sarágu weíyaasu. ⁴ Dan le jayábin mágidirugugiñe, meiginbaña magúnfulirunga jagía láu jachíbuni jájabu. Níjein buri giñe sarágu luwúyerigu igáburi jafálarun, quei buri lachibúniwa wéru, sóudieru, boúlu, asíedu.) ⁵ Ábati jálügüdüni fariséogu jáma arúfudajatiña lilúrudun Moisés jagía, Jesúsu.

—¿Cásan uágu mafála jabálin báni disípulugu binádu jagáburi binádu wagübürigu, jeíginbei láu liwíye jájabu?

⁶ Ába loúnabuniña Jesúsu.

—Linárün proféta Isaías, dan le laríñagunbei juágu luágu ámu lan jigáburi luei le áubei jarúfudagua júngua. Aríñagati.

Gürígia ja, jayumárurügü jíchiga inébesei nun, líña Búngiu, ánjein tídan janígi, mebéresentiña náu.

⁷ Málati jájuduragun nun,

ladüga lé rügüñein jagúmadijan wügüríña jarúfudaja.

⁸ Ába laríñagun Jesúsu.

—Ígira jumáli lagúmadijan Búngiu lun jafálaruni binádu jagáburi binádu gürígia. lachibúniwa sóudieru, wéru, lúma cátei líbeina líra. ⁹ ¡Maésturugu giñe buítiña jugúya, ígira jumúti lagúmadijan Búngiu lun jafálaruni binádu jigáburi! ¹⁰ Aríñagati meja Moisés. “Inébe jamá bagübürigu bun, le anábagubaliña lagübürigu, jíllála.” ¹¹ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu. “Síñati níderagunibu ladüga sun le númabei, aríñagaadina luágu lun lan níchuguni lun Búngiu”, ¹² luágu furúmiegurügü lan le aríñaguti itara, mámaali lan lúnti líderaguniña lagübürigu. ¹³ Láu líra, mebégigüda jumáli lagúmadijan Búngiu lun jafálaruni binádu jigáburi, adüga jugúya sarágu cátei líbeina líra.

¹⁴ Ábaya lagúarun Jesúsu joun gürígia ja ñíbaña, ába laríñagun joun.

—Agáamba jumána, sun jugúya, gunfaráanda jumáname. ¹⁵ Úati ni cáta ebéluruti lídoun gürígia lun laríbadagüdüni ligíbugiñe Búngiu, le áfuridubei

tídaangiñe lanígi gürígia, ligía aríbadagüdübalin ligíbugiñe Búngiu. ¹⁶ Jugúya le garígeirugubei lun jagáambun, agáamba jumána.

¹⁷ Dan le lígironiña Jesúsu gürígia jagía, ába lebélorun múnadoun, ába jálügüdüni láni dispulugu luágu jémpulu le. ¹⁸ Ába lariñagun joun.

—¿Úati lubei giñe gunfaráanda jumá? ¿Úati gunfaráanda jumáni luágu sun lan le ebélurubei botügudigiñe lídoun gürígia siñá lan laríbadagüdüni ¹⁹ ladüga mebéluti tídoun lanígi, lurágeirugun lebélura, ñígiñe ábaya láfuridun lídaangiñe?

Láu líra lariñaguña luágu sun lan eígini, jarúmati. ²⁰ Ariñagati giñe.

—Le áfuridubei lídaangiñe gürígia, anáti líra, wuríbagüda lumúti, ²¹ ladüga lídaangiñe gürígia o tídaangiñe lanígi láfurida lagübüri samínaü, adultériu, salúfuri, áfarajani, ²² íwerujani, wámajabúni, iyéreejabúni, iyéeni, marícharagun lan ibágari, gimúgaü, marásualugú, anáanguni únguaü, medéraaguaguduni. ²³ Sún buri cátei wuríbati le, tídaangiñe lanígi gürígia liábin, ligíati mabuídundagüdübalin ligíbugiñe Búngiu.

*Ában würi teréncha to afñeruboun luágu Jesúsu
(Mt 15.21-28)*

²⁴ Ába lídin Jesúsu ñígiñe louábawagun Tíro lúma Sidón. Ába lebélorun tídoun ában múna áni mabúseerunti yebe lun lasúbudiruni ni ában. Siñáti larámudagun, ²⁵ furése, ába tagáambun ában würi luágu, túguchu ában irájü gawágutu ában espíritu wuríbati. Ába tiábin, ába tájuduragun ligíbugiñe Jesúsu. ²⁶ Würi tugúya, máma juríu, Síro-Fenicána. Ába tamúriajan lúma Jesúsu lun laságaruni espíritu wuríbati le tuei tiraü. ²⁷ Ába lariñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jawei isáanigu lun tíchugúniwa joun oúnli.

²⁸ Ába toúnabuni.

—Ánja Nabúreme, oúnli ja lábugiñebaña dábula gayáraati giñe jeígin tídaangiñe tífe fein to jágujaboun isáanigu.

²⁹ Ábati lariñagun Jesúsu tun.

—Adímurejadibu buídu, gayáraajali bídin, furíja espíritu wuríbati tídaangiñe biráü.

³⁰ Dan le tachülürün múnada, ába tadárirunun irájü tídan gabána, furíjali espíritu wuríbati tídaangiñe.

Lareídagugüdüni Jesúsu ában magáambaditi, mariñagadi

³¹ Ába láfuridun Jesúsu louábawagugiñe Tíro, ába lásügürün Sidóngiñe lúma lídaangiñe buri fulásu lánina Decápolis, ába lachülürün luágun barána Galiléa.

³² Ñi janüga ában wügüri magáambaditi, dagádaga lerérun lun, ába jamúriajan lúma lun líchuguni lújabu luágu lun lareídagugüdüni. ³³ Ába ladíñurun Jesúsu ñígiñe láu jawei gürígia, ába ládaruni bián lirájüñü lújabu larígeirugun, ába lásuerun, ába lájurudunun liñeñe láu arürei. ³⁴ Ába larijin siélun, ába lawáragun, ába lariñagun.

—¡Efata! —míni lan líra. ¡Junrénba!

³⁵ Ába lánjunrenchun larígeirugu magáambaditi ligía, ába tánjingichun liñeñe lun ladímurejan buídu. ³⁶ Ába lariñagun Jesúsu joun lun mabájüdagun jamáni ni ca un, létima lariñagun joun lun mabájüdagun jamáni, ligíatima jabájüdaguni.

³⁷ Ábati buri laweíridun janígi sarágu, ába jariñagun.

—Adüga lumúti sun cátei buídu, darí lun lagáambagüdüniña magáambaditiña, adímuregüda láña mariñagaditiña.

8

Leigagüdüñ Jesúsu gádürü mílu güriquia

(Mt 15.32-39)

¹ Lídan dan ligía, ábaya jóundaragun sarágu güriquia áni úati ni cáta jáma lun jeígin. Ába lagúarun Jesúsu joun láni disípulugu, ába laríñagun joun.

² —Gudémetiña güriquia ja nun ladüga ürüwa wéyu jáu núma ya áni úaali ni cáta jáma lun jeígin. ³ Ánjaña nouñaja águyu meíginga, ladágaruba falálaü jawágu ümada, ladüga añájein jádaangiñe, díseti ñígiñe lumúti jayábin.

⁴ Ába jóunabuni láni disípulugu.

—¿Ída lubáti jeíggüdüniwa ya lídan fulásu le mageírawaguti?

⁵ Ába lálügüdüniña Jesúsu.

—¿Átiriñoun fein júma?

Ába jaríñagun lun.

—Sédü.

⁶ Ába lañúragüdüniña güriquia múarugu, ába lanügünun sédü fein tugúya lújaburugu, ába líchugun eteíngiruni lun Búngiu. Ába lagúbachagunun, ába lamúrúsujanun, ába lichugunun joun láni disípulugu, ába jafánreinjanun jádan güriquia jagía. ⁷ Ñíñanu gíñe átiri jarájüñü úduraü jáma, ába líchugun eteíngiruni jawágu, ába lafánreinragüdüniña. ⁸ Jouítiña sun jagía químule, buíngüdagíña sédü faniñe táu tífe to ígiraguboun. ⁹ Yaráfañanu joun gádürü mílu wügüriña. Ába loúnajaniña Jesúsu águyu, ¹⁰ ába ládinun tídoun ugúnein jáma láni disípulugu, ába jóudin Dalmanutoún.

Jamúriajan fariséogu miláguru lúma Jesúsu

(Mt 16.1-4; Lc 12.54-56)

¹¹ Ába jayábin fariséogu, ába jagúmeserun asígeneja lúma Jesúsu. Lúnti jaríjin lábun, ába jamúriajan lun larúfudun ában miláguru joun, siélugiñe. ¹² Ába lawáragun Jesúsu weíri, ába laríñagun.

—¿Cásan uágu jamúriaja güriquia ja lánina dan le ában miláguru? Ninárün jáu luágu marúfudúnbei lan miláguru jun.

¹³ Ába lígiruniña Jesúsu, ábaya ládinun tídoun ugúnein, ába lídin loubáfurugun dúna.

Jarúfudajan fariséogu quei ísi

(Mt 16.5-12)

¹⁴ Bulíei jamútiti disípulugu janügün eígini, ában rügüñoun fein jáma tídan ugúnein. ¹⁵ Ába lewéridiruniña Jesúsu, laríñaga joun.

—Tóunigi jumátia lueí jísite fariséogu lúma lísite Heródes.

¹⁶ Ába jaríñagun disípulugu jádaangua.

—Ladügatia meígan wamá fein laríñagubei ítara.

¹⁷ Ába lasúbudiruni Jesúsu jarítangun, ába laríñagun joun.

—¿Ca uágu jaríñaga luágu meígan jumá fein? ¿Üagili gunfaráanda jumá, meféen jugúya? ¿Ítara lidére jichügü? ¹⁸ ¿Maríjintün láu jágu, magáambun jugúya láu jarígeirugu? ¿Marítangun jumáli? ¹⁹ Dan le nafánreinjanbarun seíngü fein jádan seíngü mílu wügüriña, ¿átiriñoun faniñe táu tífe jabúdnun?

Ába jariñagun.

—Dúusu.

²⁰ —Ángi dan le nafánreinjanun sédü fein jádan gádürü mílu, ¿átiriñeingi faniñe buin jabúdun?

Ába jariñagun.

—Sédü.

²¹ Ába lariñagun joun.

—¿Úagili gunfaráanda jumá luágu máma lan tuágu fein nadímureja?

Lareidaguagüdüin Jesúsu ában maríjinti Betsáida

²² Lárigiñe, ába jachülürün Betsáidoun, ába lanügüniwa ában maríjinti lun Jesúsu, ába jayúmuragun lun lun lagúurun luágu. ²³ Ítara líña lárügüdüni Jesúsu maríjinti ligía, ába lanügüni bougudín lueí fulásu ligía. Ába lájurudagun arürei luágu lágu, ába líchuguni lújabu luágu, ába lálügüdüni ánjein gayáaraarü lubei laríjin. ²⁴ Ába laríjin, ába lariñagun.

—Aríja numútiña wügüríña, naríjiniña quei tidibu wéwe, eíbugeina.

²⁵ Ábaya líchuguni Jesúsu lújabu luágu lágu, ába laríjin güriía ligía láu goúnigi, ába lareidagun, ába laríjini sun cátei furáangu. ²⁶ Ába loúnajani Jesúsu águyu, aríñageina lun.

—Mebélurabátia ubúrugun, mariñagunbeíme lun ni ában ñi.

Lariñaguni Pédro luágu Jesúsu lan Crístubei

(Mt 16.13-20; Lc 9.18-21)

²⁷ Lárigiñe, ába lídin Jesúsu jáu láni disípulugu lídoun buri lirájüñü fulásu le geyéguabei láu ubúrugun Cesaréa le Filípo. Úmada, ába lálügüdüniña láni disípulugu, lariñaga joun.

—¿Cátanasan jariñagun güriía?

²⁸ Ába joúnabun.

—Añájein aríñagutiña luágu Juan lan le abásteragüdejabei lan amürü, jíbiri aríñaga proféta Elías ban, añájeingua aríñagutiña luágu ámu lan proféta amürü.

²⁹ Ába lariñagun.

—Ánti jugúya, ¿cátanati lídan jarítangun?

Ába lariñagun Pédro lun.

—Amürü Crístubei, le loúnajabei Búngiu lun lasálbaruniña güriía lídaangiñe jaffgoun.

³⁰ Ába lariñagun Jesúsu joun lun mariñagun jamáni lun ni ában.

Ladímurejan Jesúsu luágu loúnwen

(Mt 16.21-28; Lc 9.22-27)

³¹ Ába lagúmeserun Jesúsu, le Wügüri Garaüwarügüti, arúfudaja joun luágu línti lan lasúfurirun sarágu, luágu weíríbei lan jíchugun wügüríña weírígutiña lídan jafiñen juríu mebéreseni láu, ítara lúba gíñe joúseruni jábutigu fádírígu jáma arúfudajatiña lílúrúdu Moisés. Aríñagati joun luágu láfarúaba lan jilágubei, áni lásaaruba lan lídaangiñe oúweni lúnya labágaridun luágu lürúwan wéyu.

³² Furáanguti lariñaguni le joun. Ábati lanügüni Pédro Jesúsu ñígiñe, ába lagúmeserun adeíña lun. ³³ Ába lagáragun Jesúsu, ába laríjin jawágun láni disípulugu, ába lébechuni Pédro, ába lariñagun lun.

—¡Diseba nueí, Máfia! Bugúya, masáminaruntibu quei Búngiu, basáminarun quei wügüríña.

³⁴ Ábati lagúarun Jesúsu joun láni disípulugu jáma jíbiri gürígia lun jayárafadun lun, ába lariñagun joun.

—Le busénti lafálarunina, bulíeleí cáteifein lan, awándaleí sun luwúyeri asúfuriruni le lúnbei liábin lun nueígiñe queisi lanügüni ában wügüri lugúruwan, faláлана. ³⁵ Ladüga le abúseeruti leséfuragun lúngua ya ubouágu leféridirubei ibágari le magúmuchaditi, ánjeinti le ánjabei lefédiruni libágari ya ubouágu nueígiñe, libíjubei ibágari le magúmuchaditi siélu. ³⁶ ¿Cági ju lan lun gürígia lagáñeiruni sun le lánina ubou, leféridireime lubára siélu? ³⁷ Úati ni cáta lánina ubou le áuti gayára lan lagáñijan gürígia lubára siélu. ³⁸ Le anügüti busíganu nuágu lúma luágu nerérun jagíbugiñe gürígia múaraantiña áni gafígountiña ja, nanügüba giñe busíganu láu, áu le Wügüri Garaüwarügüti, dánme le niábin siélugiñe láu luweírigun Núguchi, geyégu jáu ánjeligu ja sándubaña.

9

¹ Aríñagati giñe Jesúsu joun.

—Nínárün jáu, luágu añájein lan jádaangiñe ja yábaña guetó, mouñwenbaña darí jaríjini lachúlürün larúeijan Búngiu láu ubáfu.

Lámuñedagun larijín Jesúsu
(Mt 17.1-13; Lc 9.28-36)

² Sisi wéyu lárigiñe, ába lanügüni Jesúsu Pédro, Jacóbo, lúma Juan, ába lídin jáu luágu ában wübü íñuti le ñi lumuti gayára lan jábugua jamá, ába lámuñedagun larijín ñi jagíbugiñe. ³ Ába támiridun lanáangun jarú quei jeméreedu, weíríti tjarun chülü lúmoun úa jamá ni gürígia ubouágu gayáraati jachíbun gamísa lun tájarudun ítara. ⁴ Ába jaríjini Elías lúma Moisés ayánuja lúma Jesúsu, ⁵ ába lariñagun Pédro lun Jesúsu.

—Maésturu, jlídan dan awánja lan ya! Adüga wamá ürüwa dibásein, ában bun, ában lun Moisés, ában lun Elías.

⁶ Lariñagubaalin líra ladüga janúfude disípulugu, áni ibídiñeti lun Pédro ca lan lariñagubei. ⁷ Ába larárirun ában juánriñu le ñíjin jabei, ába ladáuragun jáu, ába lagaambúniwa ában umálali lídaangiñe juánriñu ligía le aríñagubei.

—Níjan Niraü le jínsiñebei nun, jeíba láu le lubeíbei.

⁸ Lídan óra ligía, dan le jaríjin geyégu ñi, marijinjaña ámu ñi lueídügüya Jesúsu.

⁹ Dan le arárireina jamá lueígiñe wübü, ába léredun Jesúsu jawágu lun mabájüdagun jamáni le jaríjibei lun ni ában daríme saráali lídaangiñe ouweni lúnya labágaridun, ligía le Wügüri Garaüwarügüti. ¹⁰ Ligía jareídunbalin jádaangua, álügüdajárügütiña jámagua cátei lán funa ásaarunibeí lídaangiñe ouweni. ¹¹ Ábati jálügüdüni Jesúsu.

—¿Cásan uágu jaríñaga arúfudajatiña lilúrudun Moisés luágu lúnti lan liábin Elías furúmiñe lubáragiñe liábin le Cristubei?

¹² Ába loúnabuniña.

—Inárüni le jaríñagubei luágu Elíasba lan ñübin furúmiñe áni laráanserubei lan sun cátei. ¿Cági tariñagubei Lerérun Búngiu nuágu, áu le Wügüri Garaüwarügüti? Aríñagatu luágu nasúfuriruba lan sarágu áni mabájüdünbadina lan. ¹³ Nariñajare jun luágu ñübinjali lan Elías, ába jadügüni gürígia sun le jabúseerunbei láu, quei tariñaguni Lerérun Búngiu luágu ítara lúba lan lasúseredun lun.

*Lareídaguagüdüin Jesúsu ában irájü gawáguti espíritu wuríbati
(Mt 17.14-21; Lc 9.37-43)*

¹⁴ Lárigiñe, ába jagíribudun le ñijin jabei jíbiri disípulugu, ába jaríjin sarágu güriá geyégu jáu. Níñanu giñe arúfudajatiña lilúrudun Moisés asígeneja jáma.

¹⁵ Dan le jaríjinbalin Jesúsu, ába laweíridun janígi láu jaríjini ñi, ába jeíbaagun abúsura lun. ¹⁶ Ábati lálügüdüniña, laríñaga joun.

—¿Ca uágu jasígeneja jáma?

¹⁷ Ába louñabun ában jádaangiñe ja ñíbaña, ába laríñagun.

—Maésturu, niján niraü nanügün bun, níjein ában espíritu wuríbati luágu, merérunjali ladüga. ¹⁸ Ní lumuti lárügüdei espíritu wuríbati ligía, lájuchuruni múarugun, ába láfurijan jacútaü liyúmulugugiñe, ába lacünrinjan lári. Ledébiliduñati ítara. Amúriajaadina jáma báni disípulugu lun jaságaruni espíritu wuríbati le luei, siñá jamuti.

¹⁹ Ába louñabun Jesúsu, ába laríñagun.

—¿Güriá maffíñeradiña! ¿Átiribeísan dan lun neréderuni júma lubá gayára lan jaffíñerun nuágu? ¿Ídame lagúmucha maffíñeni le jídaanbei? Barújumei irájü ligía ñájoun.

²⁰ Ába janügüni lun. Dan le laríjinbalin espíritu wuríbati ligía Jesúsu, ába louwejagüdüni irájü ligía, ába leíguadun múarugun, ába lagárabajan, ába láfurijan jacútaü liyúmulugugiñe. ²¹ Ába lálügüdüni Jesúsu lúguchi, ába laríñagun lun.

—¿Átiri dan lueigiñe ítara lan?

Ába laríñagun lúguchi.

—Lúmagiñe ñúraügili. ²² Gíbeeli weíyaasu lájuchuruni espíritu wuríbati ligía wáturugun o dúnarugun lan lún yebe láfaruni jilágubei. Anjein lubeíti níjein lubei gayára bumúti adüga, gudéme wamá bun, íderagua báwa.

²³ Ába laríñagun Jesúsu lun.

—¿Ca uágu baríñaga ítara? Inárüni luágu gayára lan nadügüni. Sun cátei gayáraati lun le affíñebei.

²⁴ Ába lagúaragun lúguchi irájü ligía.

—¿Affíñetina, íderagua bána lúntima naffíñerun!

²⁵ Dan le laríjinbei Jesúsu luágu furésetimájali lan jagíbedun güriá, ába ladeínjan lun espíritu wuríbati ligía, ába laríñagun.

—Espíritu magáambaditi, maríñagadi, aríñagatina bun lun báfuridun, ígirabei irájü le áni mebéluradügüyabá lídoun.

²⁶ Ába lagúaragun espíritu, ábaya louwejagüdüni irájü ligía, ába láfuridun, ába leréderun irájü ligía camá jílaali. Sarágu jáña aríñagutiña luágu jíla lan. ²⁷ Ába lárügüdüni Jesúsu lueigiñe lújabu, ába liñúraguni, ába laráramun.

²⁸ Ábati lebélorun Jesúsu múnadoun, ába jálügüdüni láni disípulugu dan le jábuguarügaña lúma, ába jaríñagun lun.

—¿Cásan uágu siñá wabalin espíritu wuríbati ligía aságara?

²⁹ Ába laríñagun joun.

—Ladüga líbe espíritu le, láu rügüñein ayúmuraguni lun Búngiu lúma ayúnaruni gayára lan láfuridun.

*Ladímurejaanya Jesúsu luágu louñwen
(Mt 17.22-23; Lc 9.43-45)*

³⁰ Dan le jóudin ñígiñe, ába jásügürün Galiléagiñe, ³¹ mabúseeruntiti Jesúsu lun lasúbudirúniwa jalíñañein lan ladüga larúfudajaña lan joun láni disípulugu, aríñageina ligía luágu ledéregerúaba lan, ligía le Wügüri Garaüwarügüti, jájaburugun wügüriña wuríbatíña áni jáfarubei lan jilágubei, ábame lásaarun lídaangiñe ouweni luágu lürüwan wéyu lúnya labágaridun. ³² Úati gunfaráanda jamáni le lariñagubei joun, áni janúfudetiña lun jalügüdüni.

¿Cátima weírígubei?

(Mt 18.1-5; Lc 9.46-48)

³³ Ába jachülürün ubúrugu Capernaúm, múnada, ába lálügüdüniña Jesúsu.

—¿Cásan buga uágu jadímureja le eíbugeina jumá?

³⁴ Ába jeréderun maníñu ladüga ümada adímurejeina jañá buga luágu ca lan jádaangiñe weírígutimaabei. ³⁵ Ábati lañúurun Jesúsu, ába lagárun joun dúnusugubei disípulugu lubádun, ába lariñagun joun.

—Le abúsueruti ligía lan furúmíñeti, lúnti agúmujoñi lan jádan súnigubei, lun giñe lesériwidun joun súnigubei.

³⁶ Ába lanügün ában irájü, ába líchuguni jamádaangua, ába lanügüni lújaburugu, ába lariñagun joun.

³⁷ —Gürígia le erésibiruti ában irájü quei le lídan níri, resíbi lumútina, áni máma rügüñein áu lerésibira, resíbi lumúti giñe Núguchi le ouñajabalina.

Le mámabei wágani, wámagiñeñein

(Lc 9.49-50; Mt 10.42)

³⁸ Ába lariñagun Juan lun.

—Maésturu, aríjatiwa ában wügüri aságajati espíritugu wuríbatíña lídan bíri, quei máma lan wámañein, ába wawéridiruni lun madügüdüngüya láni.

³⁹ Ába lariñagun Jesúsu.

—Mawéridira jumeí, ladüga úati ní ában le adügüti miláguru lídan níri lun ladímurejan wuríba nuágu. ⁴⁰ Le mámabei wágani, wámagiñeñein. ⁴¹ Ninárün jáu luágu furúmieguarügü lan le íchuguti ában wéru dúna jun lídan níri ladüga láni jumá Crístu, libíjuba afáyeiruajaü buíti.

Góunigi luei leíguadúniwa lídoun figóu

(Mt 18.6-9; Lc 17.1-2)

⁴² ‘Furúmieguarügü le afígoungüdüti ában jádaangiñe ja isérigiñabaña lídan jafíñen nuágu, buítimaati jamúga lun lun lágurúniwa baránajoñ láu ában ouñwenbun dübü le amúligülei güráñu luágu ligíña sügü láu ladügüni cátei líra. ⁴³ Ánjabu lafígoungüda bújabu guánarü, buítimaati jamúga lun báchuguni, ladüga buítimaati jamúga bídin siélun láurügü ában újabu sügü láu jamúga badarún láu biángubei bújabu máfiougatin, ⁴⁴ ñí lubei moúnwen jamá jéweraü ja eígbalin jágubu jiláaña, méñeguchadi wátu. ⁴⁵ Ánjabu giñe lafígoungüda bugüdi guánarü, buítimaati jamúga giñe lun báchuguni, ladüga buítimaati jamúga bebélurun siélun láu ában ugüdi sügü láu badarún máfiougatin láu biángubei bugüdi, ⁴⁶ le ñí lubei moúnwen jamá jéweraü, méñeguchadi ligía wátu. ⁴⁷ Ánjabu giñe lafígoungüda bágu, buítimaati lun baságaruni, ladüga buítimaati jamúga bebélurun lídoun larúejan Búngiu láu ában águu sügü láu jamúga badarún máfiougatin láu biángubei bágu, ⁴⁸ le ñí lubei moúnwen jamá jéweraü, méñeguchadi ligía wátu.

⁴⁹ ‘Sun gürígia ja lánigubaña Búngiu, jouchúaba quei lau wátu geméti jawágu lun jarúmadagüdúniwa, queisigubeirügü líchugúniwa sálu luágu cátei adágaragüdúwati lun Búngiu, arúfuda lámuga luágu jarúma lan, buídu ligía lun la Reidúniwa. ⁵⁰ Buíti sálu, ánjein leféridira lubásuan, ¿cábagi un ju lan? Ítara líña lubeíti, awánda jumeí sun ouchúni lubá jarúmadun ligíbugiñe Búngiu, lídan jumá úaragun júmaga.

10

Larúfudajan Jesúsu luágu ígiraguni (Mt 19.1-12; Lc 16.18)

¹ Ába láfuridun Jesúsu Capernaúmgiñe, ába lídin loúbawagun Judéa lúma luágun oúbaü le ñígiñe lubeí láfuacha wéyu libíti dúna le Jordán. Ábaya jóundaragun gürígia le ñí lubei, ábaya larúfudajan joun queíñaja ligáburi. ² Ábati jayábin jádaangiñe fariséogu luágun Jesúsu áluga járügüdúni tídan jasá daran láu jálügüdúni ánjein maríban lubeí lun lafánreinragun wügüri túma lúmari. ³ Ába laríñagun Jesúsu joun.

—¿Cá mejagi laríñagubei Moisés jun?

⁴ Ába laríñagun lun.

—Ariñagati Moisés luágu gayára lan tíchugúniwa gárada lánina ígiraguni tun úmari.

⁵ Ába laríñagun Jesúsu joun.

—Líchugunbaalin Moisés gumádi líra jun ladüga tidére janígi. ⁶ Ánjein méja, dan le ladügünbalin Búngiu sun cátei, “adüga lumútiña wügüri túma würi”.

⁷ “Ligía lígirubei lubeí wügüri lüguchi túma lüguchu lun laganouñiwa túma lúmari, ⁸ ábame jeréderun quei ábanrügü.” Mámána lubeíti bíama, ábanrúgaañe.

⁹ Ligía moún lubei lafánreinraguni wügüri le ladúnraguagüdúbei Búngiu.

¹⁰ Dan le múnada jamá, ábaya jálügüdúni disípulugu luágu cátei le, ¹¹ ába laríñagun Jesúsu joun.

—Le ígirutu lúmari, ába lagámaridun ámu, ladügüña adultériu. ¹² Ánjein gíñe tígira würi túmari, ába tagámaridun ámu, tadügüña gíñe adultériu.

Labíniruniña Jesúsu irájüñü (Mt 19.13-15; Lc 18.15-17)

¹³ Ába janáajan gürígia irájüñü lun Jesúsu lun lagúurun jawágu, ába jagúmeserun disípulugu adeínja joun ja anájabaliña. ¹⁴ Dan le laríjini Jesúsu, magúndaati láu, ába laríñagun joun.

—Ígira jumá lun jayábin irájüñü númoun, mamájara jumá, ladüga ja jarúmabaña afíñe quei irájüñü, jagía lílanabaña larúeijan Búngiu. ¹⁵ Ninárün jáu luágu le lan marúfudunti ában igáburi únabugubuti queísi ában irájü, siñábei lebélorun lídoun larúeijan Búngiu.

¹⁶ Ába lanügüniña lújaburugu, ába labíniruniña láu lújabu jawágu.

Ladímurejan ában rísiti lúma Jesúsu (Mt 19.16-30; Lc 18.18-30)

¹⁷ Dan le lasígirunbalin Jesúsu luweíyasun, ába liábin ában wügüri eibaagueina lubároun, ába lájuduragun ligíbugiñe, ába lálügüdúni ítara.

—Maésturu buíti, ¿cásan cátei buíti lúnbei nadügüni lun nibíjini ibágarí le magúmuchaditi?

18 Ába lariñagun Jesúsu lun.

—¿Ca uágu bariñaga nun “buíti”? Ában rügüñein buíti, Búngiu. 19 Subúdi gumádi bun. “Maganouábá túma ában gámaritu ámu, máfarajabá, míwerujabá, madímurejabá iyéeni luágu ni ában, mayéeda báña gürigia, inébe jamá bagübürigu bun.”

20 Ába lariñagun wügüri ligía.

—Maésturu, gúnfulitina láu sun le lúmagiñe ñúraügidina.

21 Ába lariaguni Jesúsu láu ínsiñeni, ába lariñagun lun.

—Ában cátei mégeibeí lun badügüni. beíba, alúgurabeí sun le búmabei, ábame bíchuguni lebégi joun gudémetiña, ábame bibíjin írisini siélu. Ábame bagíribudun, ábame bafálarunina.

22 Dan le lagáambunbalin gürigia le cátei le, ába lírudagun, ába lídin láu íruni ladüga rísiti buídu. 23 Ába laríjin Jesúsu geyégu jawágun súngubei, ába lariñagun joun láni disípulugu.

—jénreenguti lun jebélurun rísitiña lídoun larúejan Búngiu!

24 Ába laweíridun janígi disípulugu láu le lariñagubei, ábaya lariñagun joun.

—Nirájüñü, jénreenguti lun jebélurun ja íchubalin jafiñen luágu jarísin lídoun larúejan Búngiu! 25 Méreenguntimaati lun ában caméyu lun lásügürün lídaangiñe lujúyun ában agúsa sügü láu lebelurun ában rísiti lídoun larúejan Búngiu.

26 Dan jagáambunbalin cátei le, ába laweíridun janígi, ába jálügüdagun jámagua.

—¿Cáteiti gayáraabei lasálbarun?

27 Ába lariaguniña Jesúsu, ába lariñagun joun.

—Siñáti jasálbaragun gürigia jóungua, ánjein Búngiu, gayáraati, ladüga úati ni cáta siñáti lun Búngiu.

28 Ábati lariñagun Pédro.

—Wabúreme, wagía, ígira wamáalitia sún meja le wámabei lun wafálarunibu.

29 Ába lariñagun Jesúsu.

—Nínárün jáu luágu furúmieguaügü lan le ígirutu lúban, o lamúlenu, o líbugañanu, o lítunu, o lúguchi, o lúguchu, o lirájüñü, o lufúlasun nueígiñe o lueígiñe lan ugánu le lánina asálbaruni, 30 lerésibiruba san weíyaasu sügü láu guetó lídan uboú le. muna, amúlenu, íbugañanu, ítunu, úguchurunu, isáanigu, luma fulásu, láu sun leíbaajóuniwa, resíbi ligíame íbágari magúmuchaditi siélu.

31 Sarágu jáña ja furúmiñetiñábaña guetó, jagíaba agúmujoúni yágüta siélu, áni sarágu ja agúmujoúnibaña, jagíaba furúmiñetiña.

Ladímurejaanya Jesúsu luágu loúnwen

(Mt 20.17-19; Lc 18.31-34)

32 Luáguñanu úma lun Jerusaléoun, Jesúsu jabá jabá láni disípulugu, láuñanu luweírin anígi, áni jíbiri gürigia ja afálarubaliña, láuñanu anúfudei. Ábayati ladíñurun Jesúsu jáu láni dúusu disípulugu jaweí jíbiri gürigia, ába lagúmeserun aríñagei le lúnbei lasúseredun lun joun. 33 Ába lariñagun joun.

—Quei lubeí jaríjini, luáguñadiwa úma lun Jerusaléoun, le ñíba lubeí nedégerúa, áu le Wügüri Garaúwarügüti, joun jábutigu jafádirigun juríu luma joun arúfudajatiña lilúrudun Moisés, ja lúnbaña jasiádirunina lun nouúnwen. 34 Ábame jedégerunina joun ja mámabaña juríu lun jéjerajan náu, jabeíchubadina, jásuerağubadina, ábame jáfarunina jilágubei, luágume lürüwan wéyu, ábame násaarun lídaangiñe oúweni lúnya nabágaridun.

Jamúriajan Jacóbo lúma Juan ában fuleísei
(Mt 20.20-28)

³⁵ Ábati jayábin Jacóbo lúma Juan, ja lirájüñü Zebedéo, ába jaríñagun lun Jesúsu.

—Maésturu, buséntiwa lun badügün ában fuleísei woun.

³⁶ Ábati laríñagun joun.

—¿Cági jabúseerubei lun nadügün jun?

³⁷ Ába jaríñagun lun.

—Lun dánme lan barúeijan láu sun buweírigun, lun bañúuragüdúniwa, ában lueígiñe boúnwenren, ában lueígiñe bubaüna.

³⁸ Ába laríñagun Jesúsu joun.

—Ibidiñeti jun ca lan jamúriajabei. ¿Gayáraabei jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

³⁹ Ába jounabun.

—Gayára wabeí.

Ába laríñagun joun.

—Lúnti jawánduni igárigu le lúnbei nawánduni, úara jugúyame núma lídan nasúfurirun, ⁴⁰ ánjein lun jañúurun ában lueígiñe nouñwenren, ában lueígiñe nubaüna, máma áu lúnbei níchuguni, líchugúba joun ja ubáabaña laráanserei Búngiu.

⁴¹ Dan le jagáambunbalin ja jíbiri díisi disípulugu, ába jagáñidun lúma Jacóbo láu Juan. ⁴² Ába lagúarun Jesúsu joun súngubei lubádun, ába laríñagun joun.

—Quei jasúbudirun, ja agúmadijabaña jádan ja mámabaña juríu, arúfudaguatiña joúngua camá jamuga jabúriña lílana fulásu ligía, játi weínamabaña jádan, arúfuda jamúti jabáfu. ⁴³ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ⁴⁴ Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri, ⁴⁵ itara quei máma lan niábiña, áu le Wügüri Garaúwarügüti, lun nesériwidúniwa, niábiña lun nesériwidun lúma lun níchuguni nibágari lebégime jasálbarun sarágu gürígia.

Lareídaguagüdüni Jesúsu Bartiméo, le maríjinbei
(Mt 20.29-34; Lc 18.35-43)

⁴⁶ Ábati jachülürün Jericó. Dan le áfurideina lan Jesúsu lídaangiñe fulásu ligía jáu láni disípulugu jáma sarágu gürígia, ñíñein ában maríjinti giriti Bartiméo, liraü Timéo, ñun láru úma amúriaja seínsu. ⁴⁷ Dan le lagáambunbei luágu yaráfaali lan Jesúsu le Nazarétna, ába lagúmeserun maríjinti ligía agúaraja.

—¡Jesúsu, ladügawagun Davíd, gudémená bun!

⁴⁸ Sarágu jáña adeínjatiña lun lun lámánichun, ligíatima lagúaragun.

—¡Ladügawagun Davíd, gudémená bun!

⁴⁹ Ába leréderagun Jesúsu, ába laríñagun.

—Wájuma lun lun liábin nun.

Ába jagúarun lun maríjinti ligía, ába jaríñagun lun.

—Ragúba gurásu, sarába, lagúajaña bun.

⁵⁰ Ába lachüürunun labíte, ába ladügün ában chubaü, ába layárafadun lun Jesúsu. ⁵¹ Ába lálügüdüni Jesúsu.

—¿Ca babúseerubei nadügün bun?

Ába louñabun maríjinti ligía.

—Maésturu, buséntina naríjin.

⁵² Ába laráñagun Jesúsu lun.

—Gayáraati bídin, areídaguaadibu ladüga affíneedibu nuágu.

Lídan óra ligía, ába gayára lan laríjin maríjinti ligía, ába lídin lárigi Jesúsu.

11

Lebélorun Jesúsu Jerusaléoun

(Mt 21.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachülürün ligíbugiñe fulásu buri le Betfajé lúma Betánia, le únabubei libíti wúbü le Olivós, ába laráñagun Jesúsu joun biáma jádaangiñe láni disípulugu.

² —Jeíba lídan liraüraü fulásu le wagíbugiñebei, dánme le jachülürün ñi, jadáriruba ában burígü güráñu le maweinjóungili ni ában weíyaasu. Jafáragadeíme, ábame janügüni ñájoun. ³ Ánjaün álügüdüwa ca lan uágu jadügei le, jaráñagame lun luágu busén láni Jesúsu, luágu láguyügüdübei lan furése.

⁴ Ába jóudin, ába jadáriruni burígü ligía güráñu lubádu ában béna, bougudi lídan üma, ába jafáragaduni. ⁵ Ába jaráñagun jádaangiñe ja ñúbaña úmadarugu joun.

—¿Ca jadügübei? ¿Cáme jafáragadei burígü le?

⁶ Ába jóunabuniña quei laráñaguni Jesúsu joun, ába jígiruniña lun jóudin láu.

⁷ Ába janügüni burígü lun Jesúsu, ába jíchugunun jabíte luágu burígü ligía, ába laweínruni Jesúsu. ⁸ Sarágu jáña átulerutu jabíte luágu üma, jíbiri, ába jánchujajani tilímun wéwe, ába jachágajani luágu üma lubá lásügürün Jesúsu ligibuagugiñe.

⁹ Ja ubáraübaña jáma ja árigibaña, ába jagúmeserun agúaraja.

¡Glória! ¡Biniwati wügüri le ñúbinbei lídan líri Wabúreme Búngiu!

¹⁰ Biniwati arúejani le ñúbinbei, le lúnbei ítara lan queísi meja larúejan wáguchi Davíd.

¡Uweíríguni lun Búngiu lídan líñun-ágei siélu!

¹¹ Lárigiñe, ába lebélorun Jesúsu Jerusaléoun, belú ligía témpulurugun, lárigiñe laríjini sun cátei, ába lídin Betánia jáu dúusu disípulugu ladüga dárüjali lan.

Líñaraguni Jesúsu tídibu ígo to múnboun

(Mt 21.18-19)

¹² Larúgan, dan le jáfuridunbei Betániagiñe, ába lalámachun Jesúsu. ¹³ Dísegiñe, ába laríjin ában tídibu ígo gabánatu. Ába lídin aríja ánjein gin tubei, ubánaü rügüñein ladárra tuágu ladüga mámagili lan tidáani ígo. ¹⁴ Ábati laráñagun Jesúsu lun tídibu ígo ligía.

—Magíindadügüyabá.

Ába jagáambuni láni disípulugu.

Larúmadagüdünun Jesúsu témpulu

(Mt 21.12-17; Lc 19.45-48; Jn 2.13-22)

¹⁵ Lárigiñe, ába jachülürün Jerusaléoun, ába lebélorun Jesúsu témpulurugun, ába laságajaniña ja alúgurajabaña jáma ja agáñijabaña ñi. Ába lagárabajani jadábulan ja asáansijabaña seínsu joun gürígia lúma jála ja alúgurajabaña únjun.

¹⁶ Mígirun lumútu témpulu lun ümame. ¹⁷ Ába laráñagun lídan larúfudajan joun.

—Laríñajare Búngiu tídan líburu to Lerérun. “Núban, fulásu le ní lubei gayára lan jayúmuragun sun gürígia nun, ánjein jugúya, barü jumaaru quei jában jíwerutiña.”

¹⁸ Ába jagáambun jábutigu fádírígu jáma arúfudajatiña lilúrudun Moisés luágu le laríñagubei, ába jagúmeserun áluaja ída lúba lan jáfaruni jilágubei, ladüga janúfudetiña luei, quei sun lan gürígia weíríti janígi luágu le larúfudajabei. ¹⁹ Dan le lagúñedunbei, ába láfuridun Jesúsu fulásurugugiñe.

Tídibu ígo to ásairúboun
(Mt 21.20-22)

²⁰ Larúgan bináafin, sügüti Jesúsu jáma láni dúusu disípulugu lueígiñe méme úma ligía, ába jaríjinun tídibu ígo saúja lúmagiñe tílagüle. ²¹ Ába larítáguni Pédro, ába laríñagun lun Jesúsu.

—Maésturu, jaríjabá tun tídibu ígo to bíñaraguboun gúñaarü, saúja!

²² Ába laríñagun Jesúsu joun süngubei.

—Afiñe jumá luágu Búngiu. ²³ Ninárün jáu luágu furúmiegurügü lan le aríñaguti lun wübü le. “Gidába yágiñe, dabúba baránajoun”, ánjein úa lubei liloúguan afíñeni tídan lanígi áni afíñe ligía luágu lagúnfuliruba lan le laríñagubei, ítara lúba. ²⁴ Ligía naríñagunbei jun luágu sun lan le jamúriajan lúma Búngiu, ánjein afíñe jubei luágu resíbi jumáli lan, ítara lúba. ²⁵ Dan le jayúmuraguña lan lun Búngiu, ánjein níjein lubei ladüga ában gürígia jun le mísiñeti jun, ferúduna jumei lun giñe ferúduna lánün Júguchi Búngiu le siélubei.

²⁶ Ánjein úa ferúduna jumá, úabei giñe ferúduna láni Júguchi Búngiu le siélubei jífigoun.

Lugúmadin Jesúsu
(Mt 21.23-27; Lc 20.1-8)

²⁷ Ába jagíribudun Jerusaléoun. Dan le eíbugeina lubei Jesúsu témpulurugu, ába jayábin jábutigu fádírígu, arúfudajatiña lilúrudun Moisés, jáma ámu wügüríña ja weíríguitiña lídan jafíñen juríu, ²⁸ ába jálügüdüni.

—¿Cáteisan birichabei lun bádaragun búngua lídoun cátei le tánina témpulu? ¿Ca íchugubalin ubáfu le bun?

²⁹ Ába loúnabuniña Jesúsu, aríñageina ligía joun.

—Nálügüdaadün giñe ában cátei, ánjana jóunaba, naríñagubei jun ca lan áu gumádi nadügei buri cátei le. ³⁰ ¿Ca óunajabalin Juan abásteragüdaja? ¿Búngiu, ódi wügüríña?

³¹ Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óunajabalin, laríñaguba woun ca lan uágu mafíñerun wabei lun Juan. ³² ¿Ódi waríñaguba funági luágu jóunajan lan wügüríña?

Lun jamúga jóunabun ítara, janúfudetiña jawei gürígia, ladüga subúdi jamáni sun gürígia luágu proféta lán Juan. ³³ Ábati jaríñagun lun Jesúsu.

—Íbidiñeti woun.

Ábati giñe laríñagun Jesúsu.

—Maríñagun nubei giñe jun ca lan áu gumádi nadügei cátei le.

12

Jémpulu jawáguti ñadágimeintiña wuríbatíña
(Mt 21.33-46; Lc 20.9-19)

¹ Ábati lagúmeserun Jesúsu adímureja joun gürígia ja ñíbaña láu jémpulu, ába lariñagun joun.

—Ñíñein meja ában wügüri, ábunaguti tídibu beíbei lufúlasunrugu. Ába ladügün bariéru láu, adüga ligía ában ágei lun laríbachawagún tíra beíbei lídoun lúma ában wáyelesi lun gayára lan loúnigiruni sun cátei.

Ába lájayajani lichári joun ñadágimeintiña, ába lídin adüga weíyaasu. ² Dan le lachülürünbei dan lun alúbajani, ába loúnajan ában lumúsun amúriajei lufánran jámagiñe ñadágimeintiña. ³ Ábarüga járugüdüni músu ligía, ába jabúleiseiruni, ába jóunajani lárigoún, míchutiña ní cáta lun. ⁴ Ábaya loúnajan labúreme ichári ábanya músu, ába jíchaagun dübü luágu, bougua jameí lálbulugu, anába. ⁵ Ábaya loúnajan labúreme ichári ábanya, ába jáfaruni jilágubei. Lárigiñe, ába loúnajan sarágu, ában lárigi ában, buleísei jamáña jíbiri, áfaragua jíbiri jilágubei.

⁶ Níjeinguati ában lun loúnajani, ában liraü jínsiñeti lun buídu, lagúmujoún óra ába loúnajani, ába larítangun luágu inébebei lan joun ladüga liraü lan. ⁷ Ába jariñagun ñadágimeintiña jámagua. “Niján le lúnbei libjini alágan, wáfaraaali jilágubei, wagía lámuga labúriña sun cátei.” ⁸ Ábati járugüdüni, ába jáfaruni jilágubei, ába jaságaruni lúgubu lídaangiñe fulásu ligía.

⁹ Ábati lálügüdajan Jesúsu.

—¿Cábati ladüga labúreme ichári? Liábinme, ábame láfaraguiniña ñadágimeintiña jilágubei, ábame líchuguni ichári joun ámu.

¹⁰ ¿Malíjan jumágilisan le tariñagubei Lerérun Búngiu nuágu? Tariñajare. Lé meja dübü le mabúseerun jabeí ábunagutiña, ligíaali furúmiñeti.

¹¹ Wabúreme Búngiu adügübalin lun furúmiñetibeí lan, áni aríja wamúti quei ában cátei weíríguti.

¹² Ába jabúseerún yebe jadáürüni Jesúsu ladüga jasúbudiruni luágu jawágu lan layúserei jémpulu le. Quei janúfudebei jaweí gürígia, ába jígiruni lúngua, ába jóúdin.

*Luáguti lafáyeijoún seínsu lun gumádi
(Mt 22.15-22; Lc 20.20-26)*

¹³ Lárigiñe, ába jóúnajoúniwa jádaangiñe fariséogu jáma jádaangiñe lánigu Heródes lúmoun Jesúsu lun jariñagagüdüni som cátei le lúnti gayára lan jíchuguni lídúnrunme. ¹⁴ Ába jayábin, ába jariñagun lun.

—Maésturu, subúdi tan woun luágu aríñaga báani inárüni, manúfudeiga lueí ní ában ladüga ní cáta lan luweírigin gürígia bun, áni barúfudajani lémeri Búngiu láu inárüni. Aríñagabá ában cátei woun. ¿Buítisan lun lafáyeijoún seínsu lun warúeite le Rómana ódi mabuídunti?

¹⁵ Subúdi lumúti Jesúsu luágu biánguañein lan jagíbu, ába lariñagun joun.

—¿Cámesan jíchaajan sádara nubá? Barújuma ában lídaangiñe seínsu ligía nun, aríja námugei.

¹⁶ Ába janügüni lun. Dan le larjini, ába lálügüdüniña.

—¿Cági iyáwa lúma íri le luágubei?

Ába jariñagun lun.

—Láni urúei Rómana.

¹⁷ Ába lariñagun joun.

—Rújumeiti láni urúei lun urúei, rújumeime láni Búngiu lun Búngiu.

Ába laweíridun janígi láu ligáburi loúnabuniña.

Álīgūdajani libūgūrū ásaaruni lídaangiñe óuweni
(Mt 22.23-33; Lc 20.27-40)

¹⁸ Ába jóudin fiú saduséogu aríjei Jesúsu. Afíñetiña saduséogu luágu úa lan ásaaruni lídaangiñe óuweni. Ába lubeíti jaríñagun lun.

¹⁹ —Maésturu, aríñagatí meja Moisés luágu ánjein lan óuwe ában wūgūri le maríeiti masáaniguga táu lúmari, lúnti lan lamárieidun lamúlen túma wūri to ueiboun loúwe, lun gasáanigu lan táu lun líbugaña le óuwebei. ²⁰ Níñanu mejati sédū gamúlenuguátiña, le furúmiñeti, ába lamárieidun, ába loúnwen marájūñūga. ²¹ Le jabíaman, ába lamárieidun túma wūri tó buga lúmari líbugaña, ába giñe loúnwen marájūñūtiña, ligía méme asúsereda lúma le jūrūwan. ²² Maríeitiña sédūgubei jagía túma, úati ni ában garaúti táu. Lagúmujóun óra, ába giñe toúnwen wūri tugúya. ²³ Niján le uágubei wálūgūdaja. Dánme le jásaarun jiláaña lídaangiñe óuweni lúnya gabágari jamá, ¿cábagi úmari wūri tugúya jádaangiñe sédū gamúlenuguátiña ja, lárigiñe maríei jamá sun jagía túma?

²⁴ Ába laríñagun Jesúsu joun.

—Bulíeiguatūn ladūga libídiñe tuáguti Lerérūn Búngiu jun, ni luáguti lubáfu Búngiu. ²⁵ Dánme le jásaarun jiláaña lúnya jabágaridun, ámujalime jabágari, magámaridun jába, míchugun jamáñame jasáanigu lun maríei, queisi magámaridun jamá ánjeligu siélu. ²⁶ Ánjeinti luágu sará jamá jiláaña lúnya jabágaridun, ¿malíjan jumágiru lilíburun Moisés luágu ladímurejan Búngiu lun lídaangiñe ában búbugati durúngu umúti? Laríñajare lun. “Áu Lubúngiutebei Abraham, Lubúngiute Isáac, Lubúngiute Jacob.” ²⁷ Ítara líña lubeíti, ánjein jamúgati jiláañu jáña wūgūriña jagía lun sun dan, maríñaguntí jamúga Búngiu luágu Jabúngiute lan, ladūga máma Jabúngiute jiláguaaña Búngiu, Jabúngiute wínwangiña. Ítara líña lubeíti, jugúya weíríti jabúlieidágun.

Gumádi le weírigitimaabei
(Mt 22.34-40)

²⁸ Níñein ában jádaangiñe arúfudajatiña lilúrūdun Moisés le agáambubalin jadímurejan, queíti subúdi láani luágu óunaba lániña Jesúsu buídu, ába liábin lubároun, ába lálūgūdūni.

—¿Cáteisan lídaangiñe lilúrūdun Búngiu weírigitimaabei?

²⁹ Ába laríñagun Jesúsu lun.

—Niján le weírigitimaabei. “Agáamba jumána, jugúya Israelítagu, Wabúreme Búngiu, ligía rūgūñein Abúremein. ³⁰ Jínsiñelá lubeíti Babúreme Búngiu bun táu sun banígi, táu sun buwáni, láu sun bisáminan, láu sun bére.” Ligía gumádi le weírigitimaabei, ³¹ áni le libíaman lídan uweíriguni lenége le furúmiñeti. “Jínsiñe jamá bíbirigu bun quei bínsiñegua búngua.” Úati ámu gumádi weíriguti lueí biáma le.

³² Ába laríñagun arúfudajati ligía lun.

—Buíti baríñaguni, maésturu. Binárūn luágu ában rūgūñein lan Búngiu, luágu úa lan ámu, ³³ áni lúnti jínsiñe lan Búngiu woun táu sun wanígi, láu sun wasáminan, táu sun wawáni, láu sun wére, lun giñe jínsiñe jamá wíbirigu woun queisi wínsiñegua woungua. Gebégiti sun líra ligíbugiñe sūgū láu sun wadágaragūdūn lun lúma sun cátei le agudúbei luágu latárū.

³⁴ Dánti le lagáambun Jesúsu loúnabun láu lichú áu, ába laríñagun lun.

—Madíseedibu lueí lílana ban larúeijan Búngiu.

Manígijaña lun jálügüdajan.

*¿Ca adügawagun Crístu?
(Mt 22.41-46; Lc 20.41-44)*

³⁵ Larúfudajaña Jesúsu témpulurugu, lariñağa.

—¿Ída lińásan jarińagunbei arúfudajatiña lilúrudun Moisés luágu ladügawagun lan David Crístu? ³⁶ David guánarügü láu lubáfu Sífiri Sándu aríńagati itara.

Larińajare Abúremein lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

³⁷ ¿Ída lubáti ladügawagun lan David Crístu ánjein wa lubálin David guánarü Crístu, “Nabúreme”?

Ába jagáambuni bürübünu gürígia jagía láu ugúndani.

*Ladárirun Jesúsu jadúnrun arúfudajatiña lilúrudun Moisés
(Mt 23.1-36; Lc 11.37-54, 20.45-47)*

³⁸ Ábaja larińagun Jesúsu joun lídan larúfudajan.

—Touńigi jumátia jawei arúfudajatiña lilúrudun Moisés, jínsiñeti joun lun jeíbugun táu anáanguni durúrutu lúma lun labúsuruńiwa joun úmada láu sarágu inébesei. ³⁹ Áluaja jamúti jalaü le jala weírigutiña tídan jalígílisin juríu, lúma lubuídun-ágei ubáraü lídan eígini. ⁴⁰ Gídá jamutu jában wúriña ja jiláaña úmari jawei, lúnti jadáuragun láu sun líra, ába jadügün afúrieiduni le migínaguti. Weíríbei jasúfurirun luágu sun le jadügübei.

*Tedéweejan fugiábu würi to jiláali túmari, lun Búngiu
(Lc 21.1-4)*

⁴¹ Luágu ában wéyu, ñun líña Jesúsu témpulurugu tigíbugiñe gáfu to lágei seínsu, aríaguei jíchaajan gürígia seínsu tídoun. Gibetiña rísitiña íchugutiña sarágu seínsu. ⁴² Lígia tiábin ában fugiábu würi to jiláali túmari, ába tíchugun bián gáwanün tídoun gáfu tugúya. ⁴³ Ába lagúarun Jesúsu joun láni disípulugu lubádun, ába larińagun joun.

—Nínárün jáu luágu gíbetima lan tíchugun würi to sügü jáu sun ja íchugubaña seínsu tídoun gáfu to, ⁴⁴ ladüga sun jagía, lídaangiñe le ígiragubei jáma jíchiga, ánjoun tugúya, láu tugúdemegun rútumuti sun lé túmabei lun tawínwandun.

13

*Larińagun Jesúsu luágu tagünrinchawagüba lan témpulu
(Mt 24.1-2; Lc 21.5-6)*

¹ Dan le láfuriduña lan Jesúsu témpulurugugiñe, ába larińagun ában jádaangiñe láni disípulugu lun.

—¡Maésturu, aríjabá tun tubuídun watémpulun lúma buri dübü le áubei tadügüwa! ¡Máma tanárime buri!

² Ába loúnabuni Jesúsu.

—¿Ariágu jíña tun tanárime témpulu to? Merédebeítia ni ában dübü ligibuagu ában, lagünrinchaguba sun le.

*Seíni buri lubáragiñe lagúmuchun ubou
(Mt 24.3-28; Lc 21.7-24, 17.22-24)*

³ Ábati jóudin luágu wübü le gíribei Olívos le tigíbugiñebei témpulu. Dánti le ñun líña lan Jesúsu ñi, ába jayábin Pédro, Jacóbo, Juan lúma Andrés, ába jaríñagun lun, jagíaguarügü.

⁴—Buséntiwa lun baríñaguni woun ídame lan lasúsereda sun le tun témpulu to. ¿Cábasan seíni luágu chülüjali lan dan lun lagúnfulirun sún buri cátei le?

⁵Ába laríñagun Jesúsu joun.

—Tóunigi jumá, mayéedagualaün ni ában, ⁶ladüga sarágujaba ñübintiña, jaríñagame. “Áu Crístubei”, áni sarágujaba jayéedun.

⁷Jugúya, dánme le jagáambuni lamúri wuríbu yaráfa jun lúma ugánu luáguti buri wuríbu díseti jueí, manúfudedagua jumá, ladüga ñíbei wuríbu súnwandan, mámagili lagúmuchun ubou líra. ⁸Lageíndaguba ában fulásu lúma ában, awúribuja ligíame ában ageíraü lúma ámu. Ñíbei járabaganáli lídan sarágu fulásu, ilámaü, chagáguau, áni súnme buri cátei le, lagúmesejarügügilime le lúnbei lasúfurirúniwa.

⁹Tóunigigua jumá júnga ladüga jedéregerúaba lun lúrudu, ábame jabúleiseirunün tidan buri jagílisisin juríu, janügüba lun jagúseragüdúniwa jagíbugiñe gumádimatiña lúma jagíbugiñe urúeigu, nueígiñe, ítara lúba gayára lan jadímurejan nuágu, jagíbugiñe. ¹⁰Lubáragiñe lagúmuchun ubou, lapúrichijouba ugánu luáguti asálbaruni lídan sun fulásu. ¹¹Dánmeti le janügúniwa lun jedéregerúniwa joun lúrudugu, magíbedalá jarítangun luágu cába lan jaríñaga, masáminaragubei jumeí. Aríñaga jumeí le laríñagun Búngiu jun lídan óra ligía, ladüga mámba jugúya adímureja, Sífiri Sándu, ligíaba adímureja. ¹²Jedéregerubaña wügúriña jamúlenu jáma jábugaña lun jáfarúniwa jilágubei, deréga jamáñame agübúrigu jasáanigu, jagáraabaguba isáanigu jawágun jagübúrigu lun jedéregerúniwa lun jáfaruniwa jilágubei. ¹³Jiyéereguduba lun sun ubou nueígiñe, le asígiruti úragu darí lúmoun lagúmujouñ, lasálbaruba.

¹⁴‘Abürüjati proféta Daniél luágu cátei iyéreeguti le gagünrinchaguagüdadíbei, dánme le jaríjini cátei ligía le ñí lubei moun lan lun ñi lan —le alíjabei, gunfaráandalá —jámetia Judéabaña, lúntimétia janúrigan luágun wübü. ¹⁵Le gürígia le bougudíbei, mebélura látia múnadoun aságara ni cáta, ¹⁶le áraabubei, magíríbudalá águyu ni anügoun lanángun. ¹⁷Fugíábugume wúriña ja dageínatiña lídoun wéyu ligía jáma ja garájüñütiña ja gurágiña. ¹⁸Amúriaja jumá lúma Búngiu lun máma lan lídan lidáni lidíliga jeíbaagua, ¹⁹ladüga lidáaníbei asúfuriruni quei le masúseredungili lúmagiñe ladügüni Búngiu ubou, masúseredundügüyaalime giñe lárígiñe. ²⁰Ánjein jamúga madúraagun lánme Jabúreme Búngiu dan ligía, úabei jamúga ni ában eséfuruti, ladúraagubei luágu jínsiñe lánigu lun, ja anúadaja láañabaña.

²¹‘Ánjeinti aríñawagua jun. “Aríja jumá, niján Crístubei”, o “Nirán”, mafíñera jumá, ²²ladüga jayábiba eyéejatiña aríñaga jawougua luágu Crístu lan jagia, jíbiri, aríñaga jagíame luágu profétagu jamá, áni jayéeni. Jadügüba seíni lúma miláguru lun jayéedaguniña ásta ja anúadaja láañabaña Búngiu ánjein gayára. ²³Aráanseñu jumá, rúnaadün luágun jugúdi.

Ída lúba lan ligáburí lagíríbudun Crístu ubouagun

(Mt 24.29-35, 42-44; Lc 21.25-36)

²⁴Lídounme wéyu ligía, lárígiñeme dan ligía le lánina asúfuriruni, ábame labúrigadun wéyu, marúnidunjalime játi. ²⁵Jeíguaduba warúguma siélugiñe, ábame ladádagaran sun siélu. ²⁶Ábamei naríjiniwa, áu le Wügüri

Garaüwarügüti, niábin lídan juánriñu láu ouñwenbun ubáfu lúma uweíríguni, ²⁷ ábame nouñajaniña ánjeligu ouñdaraña sun ja nanúadajabaña lídaangiñe gádürü larígei ubouú, lúmagiñe lidíse-ágei ubouú darí lúmoun lidíse-ágei siélu.

²⁸ Gunfaráanda jumei jémpulu le tuáguti tídibu ígo. Dan le ñulúgili tilímun, ába labouçhun tubána, subúdi jumúti luágu níteeli lan lidáni lubáchouga. ²⁹ Ítara meme, dánme giñe jaríjini sún buri cátei le, subúdi jumei luágu yaráfaali lan niábin. ³⁰ Ninárün jáu, luágu lagüñrinchawagúba lan sun ubúruгу le Jerusalén lubáragiñe jouwegun güriága ja lánina dan le. ³¹ Lagúmuchaguba siélu lúma ubouú, ánjein nerérun, merédebei magúñfulirunga.

³² Ánjeinti wéyu lúma óra le lúnbei lasúseredun sun cátei le, ibídiñeti ni ca un, ni joun láni Búngiu ánjeligu ja siélubaña, ni lun Liraü, Búngiu rügüñein le Úguchili asúbudirei.

³³ Lúnti lubeiti agágudúañu jumá, aríaaaja, ayúmuragua lun Búngiu, ladüga ibídiñeti jun ídame lan lachülúra óra ligía. ³⁴ Ítara lúba quei ában wügüri le ñüdünbei luágu ában weíyaasu díse, lubáragiñe láfuridun lúbiñegiñe, ába líchuguni sun cátei jájaburugun lumúsuniña áni ru ligía jawádigimari, aríñaga ligía lun le luágubei béna lun loúñigirun. ³⁵ Áu queísi tabúreme múná tugúya, furésebei nagríbudun. Agágudúañu jumá lubeiti, ladüga ibídiñeti jun cába lan óra nachülúra, ánjein güñounba lubei lúmoun áriebuba lan, o lubá lan larúgan o bináafin lan, ³⁶ ñübindügü niñein sódini, ábame nadárirunün arúmuga. ³⁷ Le naríñagubei jun aríñaga numúti joun súnagubei. Agágudúañu jumá.

14

Lalédawagúniwa lubá Jesúsu

(Mt 26.1-5; Lc 22.1-2; Jn 11.45-53)

¹ Bián rügáli wéyu lubá fédu le arítaguáülei luágu meja dan le lásügürünbei láni Búngiu ánjei áfaraguáña jarájüñü Ejíptona, máfarawaguntiña jarájüñü Israélítagu, lidáni giñe fédu le ñí lubei teigúga fein to magánatu ísi. Ábantí jáluajan jábutigu fádirigu jáma arúfudajatiña lilúrudun Moisés ída lúba lan jarügüdüni Jesúsu láu eyéerawaguni lun jáfaruni jilágubei. ² Ába jaríñagun.

—Márügüda wamei fédurugu luei jafúudun güriága.

Tájurudaguni ában würi Jesúsu

(Mt 26.6-13; Jn 12.1-8)

³ Betániañein Jesúsu lúbiñe Simón lé meja gawágubei gumein luágu lúra, dánti le ñun líña lan luágu dábula, ába tiábin ában würi láu ában budein buin láu ibíñei le jémeti, le séruti. Ába tájalachuni ligíina budein, ába téseruni ibíñei lálbulugun Jesúsu. ⁴ Ába jagáñidun jádaangiñe ja ñibaña, ába jaríñagun jámagua.

—¿Cámesan lefédirírua íbíñei jémeti le? ⁵ Gayáraati jamúgagu lalúgurun luágu sügü láu lebégi ában írúmu wadágimanu, lun jíderawagún gudémetiña.

Ába jébechunun, ⁶ ába laríñagun Jesúsu.

—Ígira jumouñ. ¿Ca uágu jañáwurija tun? Ában cátei buíti le tadügübei nun. ⁷ Súnwandan ñibaña lan gudémetiña júma lun jíderaguniña dan le jabúserun, ánjein áu, mámaba súnwandan júma nan. ⁸ Adüga táali würi to le tíaraabei, jurúguaarú íbíñei luágu núgubu lubá nábunajoún, ⁹ áni ninárün jáu luágu lídan lan furúmieguarügü fulásu lídan sun ubouú le ñí lumuti lapúrichijoúa ugánu le lánina asálbaruni labájüdawagúba giñe le tadügübei würi to lun jarítangun tuágu.

Lalúguruni Júdas Jesúsu
(Mt 26.14-16; Lc 22.3-6)

¹⁰ Ábati lídin Júdas Iscarióte, le ában jádaangiñe dúusu láni Jesúsu disípulugu, adímureja jáma jábutigu fádirigu lun ladügün darádu jáma lun ledéregeruni Jesúsu joun. ¹¹ Dan le jagáambubalin, ába jagúndaaragun, ába jaríñagun lun luágu jíchuguba lan seínsu lun. Ába lagúmeserun Júdas áluaja ída lúba lan ledéregeruni Jesúsu joun.

Lagúmujoún leígin Jesúsu jáma lánigu
(Mt 26.17-29; Lc 22.7-23; Jn 13.21-30, 1 Co 11.23-26)

¹² Le furúmiñeti wéyu lídan fédu le ní lubei teigüa fein to magánatu ísi, luwéyuri lafarún mudún le lánina fédu le páscua, ába jálügdüni disípulugu Jesúsu.

—¿Jaláagi babúseera lun woúdin aráansera wabárua lun weígini eígini le lánina fédu?

¹³ Ába louñajan biáma jádaangiñe láni disípulugu, ába lariñagun joun lubáragiñe joúdin.

—Jeíba ubúrugug, jadúnraguba lúma ában wügüri ní táu ában dináa láu dúna, ¹⁴ jídinme lárígi le níjin lumúti lebélu, ábame jaríñagun lun tabúreme múna. “Ítara líña maésturu, ¿jagoún nege rúmu to lúnboun ní lan leígei eígini le lánina fédu jáu láni disípulugu?” ¹⁵ Ábame larúfudun ában rúmu weírítu jun, tougiñegua múna, to aráanseñu tíña, ábame jaráanseruni eígini woun ní.

¹⁶ Ába jáfuridun disípulugu, ába jachúlürün ubúrugun, ába jadáriruni súngebui quei lariñaguni Jesúsu joun, ába jaráanseruni eígini lánina fédu ní.

¹⁷ Dan le lagúñedunbei, ába lachúlürün Jesúsu jáu dúusu disípulugu. ¹⁸ Dánti le luágu jamá dábuula eíga, ába lariñagun joun.

—Nínárün jáu luágu lalúgurubadina lan ában jádaangiñe le eígibeí núma.

¹⁹ Ábati jajírudagun, ába jagúmeserun álügdaguei ában ában.

—¿Áu funásan?

²⁰ Ába lariñagun Jesúsu joun.

—Ában jádaangiñe jugúya dúusu le éderutu leígan fein lídan asíedu.

²¹ Anángüraadina lubeíti, áu le Wügüri Garaúwarügüti, luágu üma le uágubei tariñaga Lerérun Búngiu, áni ¡fugiábutia wügüri le alúgurutina! Buítimaati jamúga lun wügüri ligia lun magúriajoúniwa lan.

²² Dan le añája lubei eíga, ába lanügünun Jesúsu jeígan fein lújaburugu, ába leteíngiruni Búngiu tuágu, lárigiñe lagúbachagunun ába líchugunun joun, ába lariñagun joun.

—Joújuma, núgubu le.

²³ Lárigiñe, ába lanügün ában wéru táu diweín lújaburugu, lárigiñe leteíngiruni Búngiu tuágu, ába líchugunun joun, ába játun sun jagia tídaangiñe diweín tugúya.

²⁴ Ába lariñagun joun.

—Níta le, le añúuragüdübalin iséri darádu, le giñe áwiyurúabei joun sarágu gürigia lun ferúdnawa lan jafígoun. ²⁵ Nínárün jáu luágu mátundügüyaadina lan diweín daríme wéyu le lúnbei nátunun iséri tuwúyeri diweín lídan larúeijan Búngiu siélu.

Lariñaguni Jesúsu luágu leyéedaguba lan Pédro láu
(Mt 26.30-35; Lc 22.31-34; Jn 13.36-38)

²⁶ Lásun jerémujani urému luágu Búngiu, ába jóúdin luágun wübü le gírubei Olívos. ²⁷ Ábati lariñagun Jesúsu joun.

—Sun jugúya janúrajaba, ígira jumáname árieibu le, ladüga tariñajare Lerérun Búngiu. “Náfarubei jóúniri mudún jilágubei, ábame jeréderun mudún chagágu.”

²⁸ Láriñime násaarun lídaangiñe óúweni lúnya nabágaridun, nídiba Galiléa jubáragiñe.

²⁹ Ábati lariñagun Pédro lun.

—Gayáraati jígirunibu sun ja, nugúya, mígirun nubádibu.

³⁰ Ába lariñagun Jesúsu lun.

—Nínárün báu, árieibu meme le, lubáragiñe layúgurujan gáyu bián weíyaasu, úrúwaalime weíyaasu bariñagun luágu ibídiñe nan bun.

³¹ Ába lariñagun.

—Ni ánjein lun lubei nóúnwen búma, mariñagubadina luágu ibídiñe ban nun. Ligía méme giñe jariñaga súnqubei.

Layúmuragun Jesúsu lun Búngiu, Getsemaní

(Mt 26.36-46; Lc 22.39-46)

³² Ábati jachúlürün lídoun ában fulásu gíriti Getsemaní, ába lariñagun Jesúsu joun láni disípulugu,

—Ñurújuma ya, neíbuga ayúmuragua lun Búngiu.

³³ Ába lanügüniña Pédro, Jacóbo, lúma Juan lúmagua. Ába ladíjeridun larítagan buídu, sandí ligía ában ígarigu weíriri títan lanígi. ³⁴ Ába lariñagun.

—Sandítina ában írui weíriri le lánina óúweni títan nuwáni. Reídei jumá ya, áni agágudúañu jumá.

³⁵ Ábati lídin Jesúsu lubáruaguóún mémeraü, ába labúluchagun múaragun, ába lamúriajan lúma Búngiu ánjein gayára lubei masúfurirun láani le lúnbei lasúseredun lun lídan óra ligía. ³⁶ Ába lariñagun lídan layúmuragun.

—Núguchi, gayára bumúti sun cátei, séfu bána luei nasúfuriruni cátei le, máma quei nabúseerun, quei babúseerun.

³⁷ Ába lídin, ába ladáriruniña disípulugu arúmuga, ába lariñagun lun Pédro.

—Simón, ¿barúmuguñasan? ¿Siñátisán buga beréderun ni ában óra agágudúañu? ³⁸ Agágudúañu jumá, ayúmuragua jugúyame luei jeíguadun lídoun ínchajóuni lun jeféridiruni jafiñen nuágu. Inárüni luágu benéfa lan jáni espírítu lun le buídubei, ánjein júgubu, débiliti.

³⁹ Ábaya lídin ayúmuragua lun Búngiu, aríñageinaléi méme dimúrei le lariñagubei furúmiñe. ⁴⁰ Dánya lagíribudun, ábaya ladáriruniña arúmuga ladüga luweírín lídábu jágu. Ibídiñetiti joun cába lan jóunabagüle lun. ⁴¹ Ábaya lídin lürüwan weíyaasu, ába lariñagun joun.

—¿Jarúmuguña mémesan, eméraagua jugúya? Buídürügaali, chülüja óra lun nedéregerúniwa, áu le Wügüri Garaúwarügüti, jájaburugun gafígountiña.

⁴² Sarájuma, queímoun, níteeli le lúnbei ledéregerunina.

Janügüni Jesúsu adáura

(Mt 26.47-56; Lc 22.47-53; Jn 18.2-11)

⁴³ Nígili Jesúsu adímureja, ligía lachúlürün Júdas, le ában jádaangiñe dúusu disípulugu, liábin jáu sarágu mútu táu efeín lúma wéwe. Jóúnajan jábutigu fádirigu, arúfudajatiña lilúrúndun Moisés, jáma ámu wügüriña weírígutiña lídan jafiñen juríu. ⁴⁴ Aríñagalíti buga Júdas joun ítara.

—Le wügüri le nachúurun, ligía, ábame járügüdüni, ábame janügüni, jóunigireime buídu.

⁴⁵ Ítara líña lubeíti, dan le lachülürünbei, ába layárafadun Júdas lun Jesúsu, ába laríñagun lun.

—Maésturu.

Ába lachúuruni. ⁴⁶ Ábati járügüdüni Jesúsu, ába janügüni adaürüwa.

⁴⁷ Níñein ában jádaangiñe ja ñibaña, ába láluguchunun lefeínte, ába líbuguni ában larígei lumúsun fádiri le íñutimaabei. ⁴⁸ Ábati laríñagun Jesúsu joun mútu jagía.

—¿Jiábin táu efeín lúma wéwe lun janügünina adáúra, camá jamuga jíwerutina? ⁴⁹ Ságüñaja wéyu júma nan témpulurugu arúfudaja jun, madaü jumútina. Wel, lasúseredunbei le lun lagúnfulirun Lerérun Búngiu.

⁵⁰ Ábati jígiruni sun disípulugu Jesúsu lábugua, ába janúrajan.

Wügüri ñüraügili le anúrajabei

⁵¹ Níñein ában wügüri ñüraügili afálaruti Jesúsu, darúgu lougua táurügü ában sídi, ában járügüdüni. ⁵² Ába lasáfarun jaweí, ába leíbaágun surúsu, ígira sídi.

Jesúsu ligíbugiñe líñun-ágei lúrudu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Ábati janügüni Jesúsu ligíbugiñoun fádiri le íñutimaabei, ába jóundaragun sun jábutigu fádorigu jáma arúfudajatiña lilúrudun Moisés, jáma ámu wügüriña ja weírigitíña lídan jafiñen juríu. ⁵⁴ Ábati lafálaruni Pédro Jesúsu dísegiñe chülü tübürürurugun lúban fádiri le íñutimaabei, ába leréderun ñun jáma oúnigirutiña témpulu abácharagua larügürügü wátu.

⁵⁵ Jáluajati jábutigu fádirigu lúma sun líñun-ágei lúrudu lidúnrun Jesúsu lun gayáraabei lan jasíadiruni lun láfarúniwa jilágubei, madáritiña lidúnrun. ⁵⁶ Sarágu jáña yebe adímurejatiña iyéeni luágu, múaradúntiña láu le jaríñagubei. ⁵⁷ Níñanu yéetiña ásaarutiña aríñaga.

⁵⁸ —Agáambatiwa laríñagun. “Nagünrinchaguboun témpulu to, to jadügüboun wügüriña, ábame naráramagüdün ában témpulu lídan ürüwa wéyu to máma jadüga wügüriña.”

⁵⁹ Ni ítara, múaradúntiña láu le jaríñagubei.

⁶⁰ Ábati lásaarun fádiri le íñutimaabei jádaangiñe sun jagía, ába laríñagun lun Jesúsu.

—¿Moúnabuntibusan ni cáta? ¿Cáteisan le, le jaríñagubei buágu?

⁶¹ Ába leréderun Jesúsu maníñu, moúnabunga ni cáta. Ábaya lálügüdüni fádiri íñutimaati.

—¿Amürüsan Crístubei le Liraü Búngiu, le lúnbei lasálbaruniña gürígia lídaangiñe jafígoun?

⁶² Ába laríñagun Jesúsu lun.

—Ánja, áu. Áni jugúya, jaríjubadina, áu le Wügüri Garaüwarügüti, ñun luegiñe loúnwenren Súnti Gabáfu, aríja jumeíme niábin lídan juánriñu siélugiñe.

⁶³ Ábati lajeiridagunun fádiri íñutimaati lanáangun, le ligáni, ába laríñagun.

—¿Ca ámu wabúseerubei lun líchugun fe luágu guetó? ⁶⁴ Agáamba jumúti lanábaguni Búngiu láu lerérun. ¿Ída líña jaríjin lun líra?

Ába jabúdujan súngubei lun láfarúniwa jilágubei.

⁶⁵ Ábati buri jagúmeserun jíbiri ásueraguei, adáuragua láu ligíbu, abúleiseirei, jariñagati.

—¡Ariñaga beígia cátei lan áfarubalibu!

Ába buri jagáyuajan súdaara luágu.

Lariñagun Pédro luágu ibídiñe lan Jesúsu lun
(Mt 26.69-75; Lc 22.56-62; Jn 18.15-18, 25-27)

⁶⁶ Ñiñein Pédro bürürüru, ligia tiábin ában lumúsun fádiri le iñutimaabei.

⁶⁷ Dan le taríjini abácharagua larügürügü wátu, ába tarílaguni, ába taríñagun lun.

—¿Ma giñe buga lúmañadibu Jesúsu le Nazarétna?

⁶⁸ Ába leyéedagun Pédro, lariñaga.

—Ibídiñeti gürígia ligia nun, ibídiñegubeíti nun ca lan uágu badímureja.

Ába lígruni fulásu le ñi lubei labácharagua lun yaráfa lan lun lebéneri baríeru, ábati layúgurujan ában gáyu. ⁶⁹ Ábaya taríjini músu tugúya, ába taríñagun joun ja ñíbaña.

—Ába giñétia jádaangiñe lánigu Jesúsu le.

⁷⁰ Ábaya leyéedagun. Murúsun óra lueígiñe, ábaya jariñagun ja ñíbaña lun Pédro.

—Inárüni, amürü ában jádaangiñe, ladüga Galiléana amürü, ítara líña badímurejan quei jagía.

⁷¹ Ába líñaragun Pédro lúngua ánjein máma lubei inárüni le lariñagubei. Ábaya lariñagun.

—Ibídiñeti gürígia le uágubei jadímureja nun.

⁷² Lídan óra ligía, ába layúgurujan gáyu libíaman weíyaasu. Ábati larítagun Pédro luágu le lariñagubei buga Jesúsu lun. “Lubáragiñe layúgurujan gáyu bían weíyaasu, beyéedaguba náu ürüwa weíyaasu.” Dánti le larítagun luágu, ába layájun.

15

Jesúsu ligíbugiñe Piláto
(Mt 27.1-2, 11-14; Lc 23.1-5; Jn 18.28-38)

¹ Larúgan bináafin, ába joúndaragun jábutigu fádirigu jáma arúfudajatiña lilúrudun Moisés, jáma ámu wügüríña ja weírigutiña lídan jafiñen juríu lúma sun líbiri líñun-ágei lúrudu, aríja cába lan jadüga lun lasiadirúniwa Jesúsu. Ába janügüni gürágu, ába jedéregeruni lun Piláto. ² Ába lálügüdüni Piláto Jesúsu.

—¿Amürü Jarúeitebei Juríu?

Ába louñabun Jesúsu.

—Ánja, ítara líña quei baríñaguni.

³ Ába buríti jíchugun jábutigu fádirigu sarágu lidúnrun. ⁴ Ábayati lálügüdüni Piláto, ába lariñagun lun.

—¿Móunabuntíbusan ni cáta? ¿Arijabá átiriñein lan bidúnrun íchuguti?

⁵ Móunabun mémeti Jesúsu ni cáta, ába laweíridun lanígi Piláto láu líra.

Lasiadirúniwa Jesúsu lun ouweni
(Mt 27.15-31; Lc 23.13-25; Jn 18.38-19.16)

⁶ Jécutiti Piláto ígiragüda ában adaürüti ságü fédu le lánina páscua, le jamúriajan gürígia jádaangiñe adaürütiña. ⁷ Ñiñeinti ában adaürüti gíriti Barabási úara jáma ámu ja áfarajabaña gürígia jilágubei lídan iñúraguni luágu

gumádi. ⁸ Ábati jayábin gürígia, ába jaríñagun lun Piláto lun ladügüni queíñaja ladüga. ⁹ Ába lálügüdüniña.

—¿Buséntün lun nígiragüdüni Jarúeite Juríu?

¹⁰ Laríñagubalin Piláto líra ladüga busén lán yebe lígiragüdüni Jesúsu, subúdi lumúti luágu ladüga lan gimúgaü jedéregerei jábutigu fádirigu. ¹¹ Fúgüda jamáña jábutigu fádirigu gürígia, jaríñaga joun lun jamúriajan lun lígiragüdüni Barabási, máma Jesúsu. ¹² Ábati laríñagun Piláto.

—¿Cáti jabúseerubei nadügün láu le uágubei jaríñaga Jarúeite Juríu?

¹³ Ába jagúaragun.

—¡Dáguabeí luágu gurúwa!

¹⁴ Ába laríñagun Piláto joun.

—¿Cáti wuríbati ladügübei?

Ábaya jagúaragun.

—¡Dáguabeí luágu gurúwa!

¹⁵ Queíti busúen lan Piláto leréderun buídu jáma gürígia, ába lígiragüdüni Barabási, lárígíñeti loúnajan abeíchei Jesúsu, ába ledéregeroni lun ládarawagún luágu gurúwa.

¹⁶ Ábati janügüni súdaara lídoun tübürürü lúban urúei, ába jóúndarúniwa sun súdaara. ¹⁷ Ába jadáüraguagüdüni táu ában anáanguni funátu, ába jadügün ában rídi láuti jíyu, ába jíchuguni leréberugu. ¹⁸ Ába jagúmeseron agúaraja lun.

—¡Gabágarilá Jarúeite Juríu!

¹⁹ Ába jagáyuajan lálbulugun láu ában wéwe, ába jásueraguni, ába jájuduragun abúsura lun. ²⁰ Lárígíñe jéjerajan láu ítara, ába jarágachunun anáanguni to jadáürüboun luágu lueí, ába jadáürünun lanáangun luágu. Ába jaságaruni lun jádaraguni luágu gurúwa.

Ládarawagún Jesúsu luágu gurúwa

(Mt 27.32-44; Lc 23.26-43; Jn 19.17-27)

²¹ Níñein ában wügüri Cirénena, gíríti Simón, lúguchi Alejándro lúma Rúfo, liábiña áraabugiñe, dan le lásügürün nígiñe, ába jafósuronni lun lanügüni lugúruwan Jesúsu.

²² Ába janügüni Jesúsu lídoun ában fulásu gíríti Gólgota, míni lan líra, Lufúlasun Lábu Ichügü. ²³ Ába jíchugun diweín láu ában luwúyeri árani gíríti mírra tídoun lun, mátun lumútu. ²⁴ Ábati jádaraguni luágu gurúwa, ába jájurerun súdaara ubúnuruni lun jaríjin cába lan jádaangiñe erédera táu lanáangun.

²⁵ Ladaünrün nefu bináafin, ligía jádaraguni luágu gurúwa. ²⁶ Ába labürüdüniwa lidúnrun ñi. “Jarúeite Juríu.” ²⁷ Dáguatiña gíñe bián jíwerutiña luágu gurúwa úara lúma, ában lueígiñe loúnwenren, ában lueígiñe lubaúna. ²⁸ Láu líra lagúnfulira le taríñagubei Lerérun Búngiu. “Abájüdüwati jáma wuríbatiña.”

²⁹ Dan le buríti jásügürün gürígia, ába jájinjani jachügü láu, ába janábuni, jaríñaga.

—¡Bugúya le aríñagubei luágu fibounme lan témpulu, ábaya lánme baráramagüdünun lídan ürúwa wéyu, ³⁰ séfuguabá búngua, raríba lueígiñe gurúwa!

³¹ Ába gíñe jéjerajan jábutigu fádirigu jáma arúfudajatiña lilúruden Moisés láu, ába jaríñagun jámagua.

—¡Séfuti ámu, ánjein ligía, siñáti leséfuragun lúngua! ³² ¡Raríla Crístu, Jarúeite Israelítagu, lueigiñe gurúwa guetó wagíbugiñe, afiñe wamámuga luágu! Ja dáwaguñubaña luágu gurúwa úara lúma, anába jamúti giñe.

Loúnwen Jesúsu

(Mt 27.45-56; Lc 23.44-49; Jn 19.28-30)

³³ Amídirugu, ába labúrigadun sun ubou darí ladaünrún ürúwa rábounwéyu.

³⁴ Ligía lagúaragun Jesúsu.

—Eloí, Eloí, ¿láma sabáctani? —míni lan líra. Nubúngiute, Nubúngiute, ¿cásan uágu bígirana?

³⁵ Ñiñanu jádaangiñe ja ñibaña agáambuti, ába jariñagun.

—Agáamba jumá, lagúajaña lun proféta Elías.

³⁶ Ába leíbaagun ában jádaangiñe, ába ladüdurágüdün ában mudúsi táu diweín garüjütu, ába líchuguni luágu ában wéwe, ába línchuni lun Jesúsu lun lachúurunun, ába lariñagun.

—Ígira wameí guetó, waríja ánjein ñübin Elías aráriragüdei.

³⁷ Ábati ladügün Jesúsu ában agúaraguni jéreti, ába loúnwen. ³⁸ Ába tajeíridagun tubélun témpulu lídan bián murúsun iñugiñe lun únabun. ³⁹ Dan lagáambuni jábuti súdaara Rómána le rárabei ligíbugiñe Jesúsu lagúaragun, aríjaleí ída líña lan loúnwen, aba lariñagun.

—Inárüni luágu Líraü lan Búngiu wügüri le.

⁴⁰ Ñiñanu giñe würiña, ariagutiña dísegiñe, ñiñoun María Magdaléna, María to lúguchu Jacóbo le ñúraütimagilíbei, lúguchu giñe José, ñiñoun giñe Salomé.

⁴¹ Würiña ja, falá jamuti Jesúsu áni íderagua jamúti dán meja le Galiléaínein lan. Ñiñanu giñe sarágu ámu würiña ja ñübinbaña Jerusaléoun úara lúma Jesúsu.

Lábunajoún Jesúsu

(Mt 27.57-61; Lc 23.50-56; Jn 19.38-42)

⁴²⁻⁴³ Lubáragiñe lálüdün wéyu, ába liábin José, ában wügüri inébewati jádaangiñe líñun-ágei lúruđu, le agúrabajabaalin lagúmeserun larúejan Búngiu táu sun lanígi, lílana fulásu le giríbei Arimatéa. Queíti luwéyuri lubeí lan aráansejani, le ában wéyu lubá wéyu le eméraaguagülei, ába lebéllurun le ñíjin lubeí Piláto amúriajei lúgubu Jesúsu, úouga ni murúsun anúfudei lídan.

⁴⁴ Ába laweíridun lanígi Piláto dan le lagáambun luágu jilá lan Jesúsu, ába loúnajan luágu ában jábuti súdaara lun lálügüdüni ánjein inárüni lubeí luágu jilá lan.

⁴⁵ Dan le lariñagunbei lun luágu inárüni lan, ába líchuguni Piláto lúgubu Jesúsu lun José.

⁴⁶ Ábati lagáñijan José ában gamísa fínutu, ába larárigüdüni lúgubu Jesúsu lueigiñe gurúwa, ába louburaguni táu. Ába líchuguni lídoun ában umúajaü achigiti luágu dübü, ába ladáuruni láu ában dübü. ⁴⁷ Ába tídin María Magdaléna túma María to lúguchu José aríjei fulásu le ní lubei labunúa Jesúsu.

16

Lásaarun Jesúsu lídaangiñe oúweni

(Mt 28.1-10; Lc 24.1-12; Jn 20.1-10)

¹ Dan le lásügürünbei wéyu le eméraaguagülei, ába jagáñijan María Magdaléna, María to lúguchu Jacóbo, túma Salomé íbíñei lun jóúdin ájurudei luágu lúgubu Jesúsu. ² Dimáasu, láfunaduña larúgan, ába jóúdin luágu lumúaja, ³ ábati jariñagun jámagua.

—¿Cábasan agídareí dübü lueígiñe lubéneri umúajaü?

⁴ Dan le jaríjinbei, úaali oúnwenbun dübü ligía lídan lilúgaarun. ⁵ Ába jebélurun lídoun umúajaü, ába jaríjin ában wügüri ññraügili ñun ñi lueígiñe loúnwenren táu ában goúnu jarútu. Ába janúfudedagun, ⁶ ába lariñagun joun.

—Manúfudedagua jumá, jáluajañein Jesúsu le Nazarétna le ádarawagúbei luágu gurúwa, úati ya, sará lídaangiñe oúweni. Aríja jumeísan fulásu le ñi lubei líchugúa. ⁷ Jeíba, jariñagame joun láni disípulugu, lúntima Pédro, luágu níngiran lan luágu úma lun Galiléoun jubáragiñe. Jaríjibeí ñi quei lariñaguni jun.

⁸ Ába jóudin würiña jagía anúrajeina ñígiñe ladüga lebélorun ában luweírín anúfudei joun. Maríñaguntiñati ni cáta ni ca un ladüga janúfude.

*Larúfudagun Jesúsu lúngua tun María Magdaléna
(Jn 20.11-18)*

⁹ Lárigiñe lásaarun Jesúsu lídaangiñe oúweni, dimáasu bináafin, ába larúfudagun lúngua furúmiñe tun María Magdaléna, to méja ueíboun laságara sédú espíritugu wuríbatíña. ¹⁰ Ába tídin, ába tawísaruniña ja eíbugubaña meja lúma. Dan le tadárirunbáliña, jayájuajaña ladüga lanárime íruni jádan luágu loúnwen. ¹¹ Dan le jagáambun luágu wínwanya lan, luágu aríja táani, maffíñetiña.

*Larúfudagun Jesúsu lúngua joun biáma jádaangiñe disípulugu
(Lc 24.13-35)*

¹² Lárigiñe, ába larúfudagun Jesúsu lúngua joun biáma jádaangiñe já meja eíbugubaña lúma, jóudiña áraabun. Ibídiñetí yebe joun luágu Jesúsu lan. ¹³ Ába jóudin, ába jawísaruniña ja jíbiri, ni jagía, maffíñetiña.

*Líchugun Jesúsu jadásin disípulugu
(Mt 28.16-20; Lc 24.36-49; Jn 20.19-23)*

¹⁴ Lárigiñe, ligía larúfudagun Jesúsu lúngua joun únsu disípulugu jagía dan le ñun jamá luágu dábulu, ába celadeínjan joun luágu liloúguan jaffíñen lúma lídère jachügü, ladüga maffíñen jamá joun ja aríjubalin lárigiñe lásaarun. ¹⁵ Ába lariñagun joun.

—Jeíba lídan sun fulásu apúrichija jumeí ugánu le luáguti asálbaruni joun sun gürígia. ¹⁶ Ja affínerutiña luágu, badísei jagíame, jasálbaruba, ja maffíñetiña, jeféridiruba lídaanme luwéyuri agúseragüdüni. ¹⁷ Niján cátei le lúnbei jarúfuduni ja afíñebaña nuágu, lun lasúbudirúniwa luágu Búngiu lan oúnajabaliña. Jaságaruba espíritugu wuríbatíña jaweí gürígia lídan níri, jadímurejaba ámu dí múrei lueí jerérún, ¹⁸ ánjaña árügüda jéwe jájaburugu o ánjaña lan áta cátei le gáfarajati, madügünbei wuríbani joun, lánwoun sun líra, jíchugubei jájabu jawágu sánditiña, ábame jareídagun.

*Lamúdeirun Jesúsu siélun
(Lc 24.50-53)*

¹⁹ Lárigiñe ladímurejan joun, ába líñurúniwa Jesúsu siélun, ába lañúurun lueígiñe loúnwenren Búngiu. ²⁰ Ába jáfuridun disípulugu, ába japúrichijani ugánu le lánina asálbaruni lídan sun fulásu. Jesúsu méme íderagua lumútiña, áni chouругüdaleí ugánu le japúrichijabei láu miláguru lé buri jadügúbei.

UGÁNU BUÍTI LE LABÜRÜJABEI LÚCAS LUÁGU JESÚSU

Labürüjani Lúcas lé meja asúseredubei

¹ Lun Teófilo le weírigubei. Gíbeeña gürígia ouchutiña jabürüjani cátei lé buri luáguti wasálbarun lé meja asúseredubei wagánagua lídan lúaragun, ² áfaaguatiña jabürüjani ítara quei jarúfudajani ja aríjubalin buri cátei ligia lúmagiñe lagúmeserun, apúrichija jagía luágu, woun. ³ Áu giñe, álügúdajadina giñe buídu buídu libügürü sun cátei le asúseredubei lúmagiñe lagúmeserun, áni afíñetina luágu maríban lan lun nabürüjanun gárada to bun quei lubúdubu, ⁴ subúdi bámugei linárün cátei le arúfudúaalibei bun buídu buídu. Niján le asúseredubei.

Lasúbudiragüdüni ában ánjeli luáguti lagüriajouñ Juan le abásteragüdajabei

⁵ Dán meja le Heródes lan urúeibei Judéa, ñíñein meja ában fádiri lánina jafíñen juríu, gíriti Zacarías, jádaangiñeti fádirigu ja lánigu Abías. Elisabét tíribe lúmari, jádaangiñetu giñe ladügawagun Aarón. ⁶ Biángubei jagía, richáguatiña ligíbugiñe Búngiu, gúnfulitiña lúma, adüga jamei sun le lubeibeí dari lun siñá lan lariñawagún ni cáta wuríbatí jawágu. ⁷ Masáanigutiña ladüga siñá lan tagarágüdün Elisabét, áni derébugugaaña giñe jagía biángubei.

⁸ Luágu ában wéyu, lídan lidáani jesériwidun lánigu Zacarías quei fádirigu ligíbugiñe Búngiu, ⁹ ába jabúdujan según jagáburi fádirigu juríu, lun jasúbudiruni cába lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába láburujan luágun Zacarías. ¹⁰ Sun niján lan cupáli águdajouá, añája gürígia bougudi ayúmuragua lun Búngiu. ¹¹ Ábati lasáliragun ában láni Wabúreme ánjeli lun Zacarías, rára lueígiñe loúnwenren latárü le ñí lubei cupáli. ¹² Dan le laríjini Zacarías ánjeli ligía, ába laweíridun lanígi, ába lebélerun anúfudei lídoun. ¹³ Ába lariñagun ánjeli ligía lun.

—Manúfudebá, Zacarías, ladüga agáamba láali Búngiu bayúmuragun, tagáraúduba búmari ában irájü, ábame bíchuguni líri Juan. ¹⁴ Tabuínchuba banígi láu ugúndani luágu, áni sarágujaba giñe agúndaarutiña láu lagüriajouñ, ¹⁵ ladüga weírigubei biraü ligíbugiñe Búngiu. Mátunbei diweín ni bínu, áni ñíbeí Sífiri Sándu lúma lúmagiñe lubáragiñe lagüriajouñ lun ladúndejani lídan sun cátei. ¹⁶ Ladügüba lun jagíribudun sarágu jádaangiñe Israelítagu lun jagáambuni Jabúngiute, ¹⁷ lesériwiduba lun Búngiu láu sarágu ubáfu quei meja ladügüni Elías. Laráansejaba lubá Jesúsu láu laráandaragüdüniña agübürigu jáma isáanigu, láu giñe larúfudajan joun ja magáambadibaña lun Búngiu lun júaradun lúma queísi gürígia richáguatiña. Ítara lúba laráanseruniña lubá jerésibiruni Jabúreme Jesúsu.

¹⁸ Ába lariñagun Zacarías lun ánjeli ligía.

—¿Ída lubági nachouruni cátei le? Áu táu sun númeri, derébugugaadiwa.

¹⁹ Ába lariñagun ánjeli ligía lun.

—Gabriel áu, áni nesériwiduña lun Búngiu, ligía oúnajabalina adímureja bun lun níchuguni ugánu buíti le bun. ²⁰ Guetó, quei maffíñerun bubei luágu le

naríñagubei bun, berédera merérunga, siñábei badímurejan daríme lagüriajóun biraü. Lagúnfuliruba cátei le lídan lidáani.

²¹ Sun dan le, añájati buga güri-gia bougudi agúrabajei Zacarías, weirititi janígi luágu lílú témpulurugu. ²² Dan le láfuridunbei, siñá ladímurejan joun, ábati jasúbudiruni luágu salíqua lan som cátei lun, témpulurugu. Ladímurejati joun láu seíni, meréngadijaali.

²³ Dan le lagúmuchun dan le lúnbei lesériwidun Zacarías témpulurugu, ába lídin lúbiñoun. ²⁴ Lárigiñe cátei le, ába tadágeinadun Elisabét, to lúmari, ába máfuridun tan jábiñeñe luágu seíngü játi, teréngati túnguarügü. ²⁵ “Ladügüñein Búngiu lubuídun cátei le nun gueleé lun lagídaruni nibúsigari jagíbugiñe güri-gia.”

Lasúbudirağüdüni ában ánjeli luáğuti lagüriajóun Jesúsu

²⁶ Sísi játi lárigiñe, ába louñajani Búngiu ánjeli Gabriél lídoun ában ubúru-gu láni Galiléa, gíriti Nazarét, ²⁷ lun lídin bisídoun ában würi irájü-giru, gíritu María. Würi tugúya, gadáraduñoun lúma ában wügüri gíriti José lun tamárieidun lúma, wügüri ligía, linébaanfan urúei Davíd. ²⁸ Ába lebé-lurun ánjeli ligía le ñíjin tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun würiña.

²⁹ Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara. ³⁰ Ábati laríñagun ánjeli ligía tun.

—Manúfudebá María, fuleisei láadibu Búngiu, ³¹ badágeinada, ábame bagüri-ajan ában irájü, ábame bíchuguni líri Jesúsu. ³² Weirígubei, Liraü Búngiu le íñubei lúba lagúarúniwa, áni larúeigüdübei Wabúreme Búngiu quei larúeigüdüni Davíd, le binádu lidúje. ³³ Lagúmadirubei linásiñun Israél lun sun dan, áni magúmuchadibei lagúmadíjan.

³⁴ Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

³⁵ Ába laríñagun ánjeli tun.

—Liábinba Sífiri Sándu buágun, ábame louburagunibu lubáfu Búngiu. Ligía sándubei lubeí irájü le lúnbei bagüri-ajan, Liraü Búngiu lúba lagúarún. ³⁶ Tiábin bidúje to Elisabét, dageínaaru giñe lau sun weíyaaru lan, tagáraüdüba ában wügüri irájü, ítara líña lubeíti, tó meja uáguboun jariñaga luágu siñá lan tagáraüdü, níjein sísi játi dageínaü tuágu. ³⁷ Úati ni cáta siñáti lun Búngiu.

³⁸ Ábati taríñagun María.

—Lidámun Nabúreme Búngiu nugúya, adügaleí le baríñagubei náu.

Lárigiñe, ába lídin ánjeli.

Tídin María bisídoun Elisabét

³⁹ Lídoun dan ligía, ába tídin María furése lídoun ában ubúru-gu le labádinaguabei buri wübü Judéa, ⁴⁰ ába tebé-lurun lúbiñoun Zacarías, ába tabúsurun tun Elisabét. ⁴¹ Dan le tagáambuni Elisabét tabúsurun, ába lánjingichagun tiraü turágeirugu, ába liábin Sífiri Sándu tuágun. ⁴² Ábati taríñagun láu umálali le jéreti.

—Binílaadibu Búngiu sügü jáu sun jiñáriñu, binílaali giñe biraü.

⁴³ ¿Cátanañadina lun tiábin lúguchu Nabúreme bisídana? ⁴⁴ Láu nagáambuni babúsurun, ába lánjingichagun niraü nurágeirugu láu ugúndani. ⁴⁵ Gúndaatibu bugúya le affínerubei, luágu lagúnfuliruba lan cátei le laríñagubei Wabúreme bun.

⁴⁶ Ábati tariñagun María.

Rútu nuwáni uweíriguni lun Nabúreme,

⁴⁷ gúndaagua tugúya nanígi luágu Búngiu le Nasálbaragüle,

⁴⁸ lugúndun gudémejabujaali nun, nugúya le lidámun.

Lúmagiñe guelé, jariñaguba sun gürigia luágu fuleiseiwaadina lan,

⁴⁹ ladúga adúgaali Búngiu, le Súnti Gabáfu, cátei weínamuti nun, sánduti líri.

⁵⁰ Súnwandan gudémebaña lan ja inébejabúbaña lun, lun.

⁵¹ Adúgaali oúnwenbun buri cátei,

adúgaali lun ni cáta jamá ja barúguabaña joúngua.

⁵² Gídálalaña ja gabáfubaña lídaangiñe jaweírigun,

ja ünabubaña, ába ladügüniña lun weírigu jamá.

⁵³ Já buga lamábaña, quimúlegüda lumútiña,

ánjeinti ja rísibaña, míchugunti ni cáta joun.

⁵⁴ Íderagua lumútiña linásiñun Israél, ja esériwidubaña lun,

mabúleidun lumúti lun gudémejabu lan,

⁵⁵ quei meja lidáradun jáma binádu wagübürigu—

Abrahám jáma ladúgawagun—lun gudémejabu lan joun lun sun dan.

⁵⁶ Ába teréderun María ürüwa játi ñi, lárigiñe, ába tagíribudun jábiñoun.

Lagüriajóun Juan le abásteragüdjabei

⁵⁷ Ába lagúnfulirun dan lun tagüriajan Elisabét, ába tagüriajan ában wügüri

irájü. ⁵⁸ Dan le jagáambun tubésinanigu jáma tidújeñu luágu lubuídun cátei le

ladügübei Búngiu tun, ába jagúndaarun úara túma. ⁵⁹ Luágu liwidün wéyu, ába

lerésibiruni circuncisión, le liseíni luágu láni lan Búngiu irájü ligía. Weséntiña

yebéti jíchuguni líri lúguchi luágu, le Zacarías, ⁶⁰ ába tariñagun lúguchu.

—Uá, Juánba líri.

⁶¹ Ába jariñagun tun.

—¿Cági uágu? Úati ni ában jádaangiñe binébaanfaangu gíríti Juan.

⁶² Ába jálügüdüni lúguchi irájü láu seíni ca lan íri labúseerubei líchugun

luágu. ⁶³ Ába lamúriajan ában murúsun fuláansu, ába labürüdün luágun. “Juan

líribei.” Ába laweíridun janígi súngubei láu cátei le. ⁶⁴ Lídan méme óra ligía,

ába gayáraajaali lan ladímurejan Zacarías, ába líchugun uweíriguni lun Búngiu.

⁶⁵ Ába laweíridun janígi besínagu láu cátei le, ába labájüdawagún cátei le lídan

sun fulásu geyégua jáu. ⁶⁶ Sun ja agáambubalin, ába jeréderun asáminara, ába

jálügüdagun jámagua, jariñaga.

—¿Cáteibeí funasan irájü le?

Ladúga biní lumútija Búngiu le tímatimaati.

Lerémujan Zacarías

⁶⁷ Ába liábin Sífiri Sándu luágun Zacarías, le lúguchi irájü ligía, ába ladímurejani

Zacarías dimúrei le laríñagubei Búngiu lun, ába laríñagun.

⁶⁸ Buidulá ladímurejoún luágu Wabúreme le Jabúngiutebei gürigia ja Israelítagu,

ladúga ñúbinjali woun, wagía le lánigu, áni sálba láadiwa.

⁶⁹ Rújali ában Asálbaragülei le gabáfuti woun jádaangiñe linébaanfaangu Davíd,

lé meja esériwidubei lun.

⁷⁰ Ítara líña meja laríñaguni Búngiu jádaangiñe láni profétagu ja edéregeragubaña

joúngua lun, lúmagiñe meja binádu dan,

71 luágu lasálbarubádiwa lan jawei wáganiñu lúma jawei sun ja iyéreejabúbaña woun.

72 Ítara líña gudêmejabu lan Búngiu joun binádu wagübürigu, arúfudaleí luágu mabúlieidagun lan lueí lidáradun le sándubei jáma.

73 Niján lé meja laríñagubei lun wáguchi Abrahám.

74 luágu leséfurubádiwa lan jawei wáganiñu, lun gayáraabei lan wesériwidun lun manúfudeiga,

75 láu úarani, derégeguñu wagía woúngua lun, sun dan le wabágaridubei.

76 Áni bugúya nisáaniraü, láni Búngiu le íñubei proféta lúba bagúarúniwa, ladúga baráansejaba lubá Wabúreme,

77 subúdi lámuga úma lánina asálbaruni joun lánigu, le áubei ferúdunawa lan jafígoun.

78 Wabúngiute, láu lísiñejabu lúma lugúdemejabu, loúnajabei Crístu wámoun siélugiñe

79 lun larúgoungadágüdün jáu ja lídaanbaña lubúriga lúma jáu ja luágubaña úma le ouwenibeí lébeja,

lúma lun ladúndejani wapásun lídoun úma le anügübaliwa lídoun darángilaü.

80 Aweírdeina ligiati irájü ligía, afáragadagueina giñe lídan láni espíritu. Ába laganoún lídan fulásu mageírawati darí lúmoun wéyu le lagúmeserun luwádigimari lun Búngiu jagánagua lumútuniña Búngiu ja Israelítagu.

2

Lagúriajouniwa Jesúsu (Mt 1.18-25)

1 Lídoun buga dan ligía, ába laríñagun urúei Augústo lun jabájüdüñ sun gürígia ja Rómabaña. 2 Furúmiñe meja jadügüni cátei le, dán meja le Círenio lan agúmadijabei Síria. 3 Súnti gürígia mósu jouñdin jageíra lun ñi lan jabájüdüwa. 4 Ligía láfuridunbei José Nazarétgiñe, loúbawagugiñe Galiléa, ába lídin loúbawagun Judéa lídoun fulásu le giribeí Belén, le ñi lubei lagúriajouá David, quei linébaanfan lubeí David José. 5 Ába lídin Belén lun labájüdüñ úara túma María to gadáradunboun lúma lun jamárieidun, áni dageínañoun. 6 Dánti le añája lan ñi Belén, ába lachúlürün dan lun tagúriajan María. 7 Ába tagúriajani furúmiñeti tiraü ñi, ába touburaguni tídan lágei, ába taróunragüdüni ñi tídan jában anímaalu ladúga úati ubáraü joun tídan jában chülüdügütiña.

Ánjeligu jáma ouñigirutiña mudún

8 Lídan áraabu bougudi lueí Belén, ñíñanu jouñiri mudún, bou larúgan jáu ouñigiraña jalügüniña mudún. 9 Sódini, ába lasálriragun ában láni Wabúreme Búngiu ánjeli siélugiñe joun, ába jaríjin ában ouñwenbun larúgounga le lánina Búngiu geyégua jáu, ába janúfudedagun. 10 Ába laríñagun ánjeli ligía joun.

—Manúfudeda jumá, ladúga nijein ugánu buíti nanügün jun, lébunabei sarágu ugúndani joun sun gürígia. 11 luágu agúriajouaali lan ában asálbaragülei jun ugúñe, lageíra David, Crístu le Jabúreme. 12 Jadárirubei irájü ligía jouburagu tídan lágei, roun tídan jában anímaalu.

13 Lídan óra ligía, ába jasálriragun sarágu ánjeligu lubádu furúmiñeti ánjeli, ába jíchugun uweíríguni lun Búngiu, jaríñaga.

14 Uweíríguni lun Búngiu lídan líñutima siélu, darángilaü múarugu jádan gürígia ja íbájubalin lufúleisein!

¹⁵ Dánti le jagíribudun ánjeligu járigoún siélun, ába jaríñagun jóuniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába jóudin furéseguena, ába jadárirunun María lúma José, lúma irájü roun tídan jában anímaalu. ¹⁷ Dan le jaríjnbalin, ába jabájüdaguni le laríñagubei ánjeli joun libügürü le. ¹⁸ Súnti ja agáambuliña, weíríti janígi láu le jaríñagubei.

¹⁹ Áni María, areidañu tíñein sun cátei le tídan tanígi, arítagua luágu. ²⁰ Ábati jagíribudun jóuniri mudún, adímurejeina weíri luágu Búngiu, luágu sun le jagáambubei lúma le jaríjibe, ladüga suséreti ítara quei laríñawagúniwa joun.

Larífudúniwa Jesúsu témpulurugu

²¹ Luágu liwídün wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²² Dan le lagúnfulirunbei lidáani jarúmadun lagübürigu Jesúsu según igáburí lídan lilúrudun Moisés, ába janügüni irájü ligía ubúrugun Jerusalén lun jederegeruni lun Búngiu. ²³ Jadügünbalin líra ladüga laríñajare tídan lilúrudun Búngiu. “Sun furúmiñeti wügüri irájü agúriajóuti lúnbei Búngiu.” ²⁴ Ába lubeíti jóudin adágaragüda le uágubei laríñaga lilúrudun Búngiu. bían wagúgua o bían lan únjun.

²⁵ Lídan meja dan ligía, ñíñein meja ában wügüri Jerusalén gíríti Simeón. Wügüri ligía ában wügüri buíti, weíríti lederegeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Ñíñein Sífiri Sándu lúma Simeón, ²⁶ áni arúfuda láali lun luágu moúnwenbei lan maríjingaleí Crístu le lúnbei loúnajani Wabúreme Búngiu. ²⁷ Ába lídin wügüri ligía témpulurugun, ladúndejan Sífiri Sándu. Dánti le janügünbalin lagübürigu Jesúsu Jesúsu témpulurugun lun jadügüni le laríñagubei lúruđu láu, ²⁸ ába loúyuajani Simeón, ába líchugun eteíngiruni lun Búngiu, aríñageina ligía.

²⁹ Nabúreme, gayáraajali bígirunina lun noúnwen láu darángilaü, nugúya le esériwidubei bun, ladüga gúnfuli báali le baríñagubei nun.

³⁰ Aríja náali Wasálbaragüle láu nágu,

³¹ Asálbaragülei le boúnajabei joun sun gürígia.

³² Ítara lúba queísi ában lámpu lun larífuduni inárüni joun ja mámabaña juríu, ru ligíame uweíríguni joun Israelítagu, ja bánigu.

³³ Ába laweíridun lanígi José táu sun María láu le laríñagubei Simeón luágu irájü le. ³⁴ Ábati labíniruniña Simeón, ába laríñagun tun María, to lúguchu Jesúsu.

—Írajü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatíña jerésibiruni. ³⁵ Ítara lúba lasúbudirúniwa le larítageubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágu buwáni.

³⁶ Ñíñoun gíñe ában würi proféta, gírítu Ána, würi tugúya liraü Fanué, jádaangiñe ladügawagun Áser. Weíríyaaru würi tugúya, ñúraügíru meja tamárieidunbei, sédüñein irúmu táu lúma túmari, ába loúnwen, ³⁷ guetó, gádürüweín-gádürü irúmu táu. Máfuriduntuti témpulurugugiñe, terédera ñi esériwida lun

Búngiu árieibu wéyuagu, ayúnara lúma ayúmurağa lun Búngiu. ³⁸ Ába tiábin Ána jawágun María, José, lúma Jesúsu lídan méme óra ligía, ába teteingiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

³⁹ Lárigiñeti jagúnfulirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét. ⁴⁰ Aweírdeina ligíati irájü le, éredeina ligía, afáragadagueina lídan lichú áu, biní lumútijati Búngiu sarágu.

Jesúsu témpulurugu

⁴¹ Ságüja irúmu jóudin lagübürigu Jesúsu ubúruğu Jerusalén lubá fédu le páscua, ⁴² áni dan le lagúnfulirunbei Jesúsu dúusu irúmu, ába jóudin súngubei Jerusalén quei le jagáburi lídan fédu ligía. ⁴³ Dánti le jagíribudun lárigiñe lagúmuchağun fédu, ába leréderun irájü ligía Jerusalén, ibídiñoun tun lúguchu ni lun José, ⁴⁴ jaritáğun yebe luágu niten lan jádan gürígia ja jámarigubaña luágu üma. Ítara líña jadügün ában wéyu eíbuguni, dan le jáluajani jádan jadújeñu lúma jádan jasúbudiraagun, ⁴⁵ madári jamúti. Ábati jagíribudun ubúrugun Jerusalén áluajei ñi.

⁴⁶ Ürüwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña. ⁴⁷ Súnti ja agáambubalin, weíriti janígi luágu lichú láu lúma luágu buri loúnabagüle. ⁴⁸ Dan le jaríjinbalin lagübürigu, ába laweírídun janígi, ába tariñagun lúguchu lun.

—¿Cáme badúgei cátei le woun, niraü? Nugúya lúma búguchi, wáluajañadibutia láu idíjeri.

⁴⁹ Ábati laríñagun Jesúsu joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le láni Núguchi?

⁵⁰ Úati gunfaráanda jamáni le laríñagubei joun.

⁵¹ Ábati lagíribudun jáma, Nazarétün, ába lasígirun láu meme lagáambadi joun. Ábatí buri tareíduni lúguchu sun cátei le tarítangunrugun. ⁵² Niján mémeti Jesúsu aweírdeina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe gürígia.

3

Lapúrichijan Juan le abásteragüdajabei, lídan fulásu mageírawati (Mt 3.1-12; Mr 1.1-8; Jn 1.19-28)

¹ Lídan liqueínsin lirúmoduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia, ² Anás lúma Gáifasi, jagía fádirigu íñutimáabaña lídan jafíñen juríu. Ábati líchugun Búngiu ában ugánu lun Juan, le liraü Zacarías, lídan fulásu mageírawati, ³ ába leíbuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságürrijan luágu jaffígoun, sáansi jameíme jagáburi lun ferúdnawa lan jaffígoun, badisei jagíame. ⁴ Suséreti cátei le ítara queí meja labürüdüni proféta Isaías, laríñaga.

Agambúati lumálali ában agúrajati lídan fulásu mageírawati ítara.

“Aráanseja jumóun janígi lubá liábin Wabúreme, queísi ladárarúniwa ūma surúti.

⁵ Labuínchagüdüwaba sun gudúungu, sun wübü, lagurúaba, ūma buri le segéti, lásururuba, ūma buri le múaragunti, lúwaradaguba.

⁶ Larijúbei sun ubou Wasálbaragüle, le loúnajabei Búngiu woun.”

⁷ Nübintiña sarágu gürígia lun Juan lun labásteragüdüniña, ába laríñaga joun.

—¡Jarásan jéwe jugúya le! ¿Ca awísarubalün lun jeibaagun luei lanárime lafáyeiragüle figou le yaráfaalibeí? ⁸ Ígira jumeí binádu jigáburi, abágarida jumá lun gayára lan larijín buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladúga quei nariñaguni jun, gayáraati ladügün Búngiu linébaanfaangu Abrahám lidaangiñe buri dübü le. ⁹ Yaráfaali dan lun jafáyeijan luágu jifígoun queísi taráanserún jaráwa lun tánychuguni tídibu wéwe. Sun ídibu le mabuídunti lín lánchugúba, ábame lagudún.

¹⁰ Ábati jariñagun gürígia jagía lun.

—¿Cáteiti lúnbei wadügüni?

¹¹ Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinraguni lúma le meíginbei.

¹² Nübintiña gíñe agúburajatiña liseínsuna gumádi lun jabásterun, ába jariñagun lun.

—Maésturu, ¿ca cátei lúnbei wadügüni?

¹³ Laríñaga Juan joun.

—Magúburaja jumá lougiñe le uágubei laríñaga lúrudu.

¹⁴ Aríñagatiña gíñe fiú sudaara lun.

—Ángi wagía, ¿cági lúnbei wadügüni?

Laríñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madügün lumúti, gufúruma jumá láu jafáyeiruaaja.

¹⁵ Añájati gürígia madéraguagüdünja arítagua luágu fágua lan Juan Crístubei,

¹⁶ ába laríñagun Juan joun sùngubei.

—Áu, láu dúna nabásteragüdaün, nítenei ában le lúnbei labásteragüdünün láu Sífiri Sándu lúma láu queísi wátu geméti, ligía Crístubei. Gabáfutimaati nueí darí lun madúna nan ni lun nafáragaduni tagürüga ligeídin. ¹⁷ Dánme liábin, jafánreinrúaba gürígia ja lánigubaña jadaangiñe ja wuríbabaña queísigubeirügü lagídarániwa ífei lidaangiñe türígu buíti, ába loúndarún türígu buíti tídoun lágei, ába lagudún ífei lídan wátu geméti le meñeguchati.

¹⁸ Láu igáburi le lúma láu buri ámu ewéridijani líchigei Juan ugánu buíti joun gürígia luágu wasálbaragüle. ¹⁹ Erérati gíñe lun gumándan Heródes luágu laganóun túma Heródias, to lúmari Felípe, le lamúlen, lúma luágu ámu buri cátei wuríbati le ladügübei. ²⁰ Lubáragiñe ladügün Heródes gásu láu, adügarügü ligía ában cátei wuríbatimaati. ladaruni Juan furísunrugun.

*Labásterun Jesúsu
(Mt 3.13-17; Mr 1.9-11)*

²¹ Lubáragiñe ladaürüniwa Juan, dan le labásteragüdüniña gürigia, badíseiti giñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu, ²² ába larijiniwa larárirun Sifiri Sándu luágun camá jamuga ában únjun, ába lagaambúniwa laríñagun ában umálali siéluigiñe.

—Amürü Niraü le jínsiñebei nun, gündaatina báu.

Linébaanfaangu Jesúsu

(Mt 1.1-17)

²³ Quei burí darándi irúmu láu Jesúsu dan le lagúmeserunbalin luwádigimari le uágubei loúnajei Búngiu. Jarítawagúati luágu liraü lan José, José, liraü Elí, ²⁴ Elí, liraü Matát, Matát, liraü Leví, Leví, liraü Melquí, Melquí, liraü Jána, Jána, liraü José, ²⁵ José, liraü Matatías, Matatías, liraü Amós, Amós, liraü Nahúm, Nahúm, liraü Eslí, Eslí, liraü Nagái, ²⁶ Nagái, liraü Maat, Maat, liraü Matatías, Matatías, liraü Semeí, Semeí, liraü José, José, liraü Judá, ²⁷ Judá, liraü Joána, Joána, liraü Résa, Résa, liraü Zorobabél, Zorobabél, liraü Salatiél, Salatiél, liraü Néri, ²⁸ Néri, liraü Melquí, Melquí, liraü Adí, Adí, liraü Cosám, Cosám, liraü Elmodám, Elmodám, liraü Er, ²⁹ Er, liraü Josué, Josué, liraü Eliézer, Eliézer, liraü Jorím, Jorím, liraü Matát, ³⁰ Matát, liraü Leví, Leví, liraü Simeón, Simeón, liraü Judá, Judá, liraü José, José, liraü Jonán, Jonán, liraü Eliaquíim, ³¹ Eliaquíim, liraü Meléa, Meléa, liraü Mainán, Mainán, liraü Matáta, Matáta, liraü Natán, ³² Natán, liraü Davíd, Davíd, liraü Isaí, Isaí, liraü Obéd, Obéd, liraü Booz, Booz, liraü Salmón, Salmón, liraü Naasón, ³³ Naasón, liraü Aminadáb, Aminadáb, liraü Arám, Arám, liraü Esróm, Esróm, liraü Fáres, Fáres, liraü Judá, ³⁴ Judá, liraü Jacób, Jacób, liraü Isáac, Isáac, liraü Abrahám, Abrahám, liraü Taré, Taré, liraü Nacór, ³⁵ Nacór, liraü Serúg, Serúg, liraü Ragáu, Ragáu, liraü Pelég, Pelég, liraü Héber, Héber, liraü Sála, ³⁶ Sála, liraü Cainán, Cainán, liraü Arfaxád, Arfaxád, liraü Sem, Sem, liraü Noé, Noé, liraü Laméc, ³⁷ Laméc, liraü Matusalén, Matusalén, liraü Enóc, Enóc, liraü Jaréd, Jaréd, liraü Mahalaléel, Mahalaléel, liraü Cainán, ³⁸ Cainán, liraü Enós, Enós, liraü Set, Set, liraü Adán, Adán, liraü Búngiu.

4

Louchawagúniwa Jesúsu

(Mt 4.1-11; Mr 1.12-13)

¹ Ába lígiruni Jesúsu fulásu loúbawagu dúna Jordán, buin láu lubáfu Sifiri Sándu, ába lanügüni Sifiri Sándu lídoun fulásu mageírawati. ² Reídeiti Jesúsu bián-wein wéyu ñi láu Máfia ouchaguei ánjein áburuja lídoun wuribani. Meíginti ni cáta lídan sun bián-wein wéyu ligía, ába lasándirun ában ounwenbun ilámaü.

³ Ábati lariñagun Máfia lun.

—Ánjein Liraü bubei Búngiu, salíguagüdabeí dübü le feínme.

⁴ Lariñaga Jesúsu lun.

—Tariñajare Lerérun Búngiu. “Mámarügüba táu feín jabágarida gürigia, jabágariduba giñe láu jagúnfulirun láu sun dimürei le lariñagubei Búngiu.”

⁵ Lárigiñe, ába lanügüni Máfia Jesúsu luágun ában wübü íñuti, ába larúfuduni sun fulásu le ubouagubei lun lídan ában. ⁶ Ába lariñagun Máfia lun.

—Níchugubei sun ubáfu lúma sun uweíríguni le bun ⁷ ánjabu ájuduragua nun lun banügünina quei bubúngiute, báníbei süngubei, ladüga íbija náali sun le, áni gayáraati níchuguni lun le únti nabúseera.

⁸ Ába lariñagun Jesúsu lun.

—Dísebá nueí, Máfia, ladüga tariñajare Lerérun Búngiu. “Judúguabá lun Búngiu le Babúreme, lúnrgüülá besériwida.”

⁹ Lárigiñe, ába lanügüni Máfia ubúrugun Jerusalén, ába laweinragüdüni tábulugu témpulu, ába lariñagun lun.

—Anjein Liraü bubei Búngiu, chüguabá búngua yágiñe lun ünabun, ¹⁰ ladüga tariñajare Lerérun Búngiu.

Loúnajabaña Búngiu láni ánjeligu lun jóunigiruníbu,

¹¹ janügübadibu jájaburugu lueí labúleiseirun bugüdi luágu dübü.

¹² Ába lariñagun Jesúsu lun.

—Tariñajare giñe Lerérun Búngiu. “Móuchaguabeí Búngiu le Babúreme.”

¹³ Dánti le madárijali Máfia cába lan luwúyeri ouchwagüni ladüga lun Jesúsu, ába lígiruni lúngua luágu átiri dan.

Lagúmeseruni Jesúsu luwádigimari Galiléa

(Mt 4.12-17; Mr 1.14-15)

¹⁴ Ába lagribudun Jesúsu Galiléoun buin láu lubáfu Sífiri Sándu, ába buríti ladímurejoun luágu lídan sun fulásu geyégua. ¹⁵ Arúfudajatija tídan jalígílisin juríu lídan sun fulásu, buíti jadímurejan sun gürígia luágu.

Jesúsu lídan ubúruğu Nazarét

(Mt 13.53-58; Mr 6.1-6)

¹⁶ Ábati lídin Jesúsu Nazarétün, le fulásu le ñí lubei lagüriajouá, ába lebélorun tídoun jalígílisin juríu lídan wéyu le eméraaguagülei quei ligáburi yebu, ába laráramun lun lalíjan tídan Lerérun Búngiu. ¹⁷ Ába jíchugunun lilíburun proféta Isaías lun, dan le ladáranun, ába ladáriruni le ñí lubei lariñaga ítara.

¹⁸ Níjein láni Búngiu Sífiri Sándu nuágu, ladüga anúadaja láadina lun níchuguni ugánu buíti joun gudémetiña, oúnaja láadina lun námaliñaniña ja nidíjeribaña tídan janígi, lun náfuridagüdüniña adaürütiña,

lun níchugun arjíjini joun maríjintiña,

lun neséfuruniña ja ouserúabaña wuríba,

¹⁹ lun nadímurejan luágu dan le fuleísejabu lan Búngiu joun gürígia.

²⁰ Ába ladárunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña aríaguei, ²¹ ába lagúmeserun adímureja, lariñaga.

—Ugúñe guánarü gúnfulijali cátei le jigíbugiñe.

²² Adímurejatiña sun jagía buíti luágu Jesúsu, weirititi janígi luágu lubuídun buri dimúrei le lariñagubei. Jálügüdagua buriti jámagua.

—¿Mámasan le liraü José le?

²³ Ába lariñagun Jesúsu joun.

—Subúsiti nun luágu jariñagubei lan cátei le nun. “Surúsia, agáraniguabá búngua”, jariñaguba giñe nun. “Agáambaadiwa luágu buri cátei le adüga báalibe Capernaúm, adügabeí giñe ya bageíra.”

²⁴ Ába lasígirun adímureja, lariñaga.

—Nínárün jáu luágu úa lan ni ában proféta erésibirúati buídu lageíra. ²⁵ Chóuru numúti luágu añájein lán meja sarágu würiña ja jiláguañabaña jámarígu jádan Israelítagu lídan meja lidáani proféta Elías, dan le májuyun lubei júya luágu ürüwa írúmu dimí, ába ñi lan sarágu ilámaü fulásurugu, ²⁶ áni móúnajan lumúti Búngiu Elías túmoun ni ában jádaangiñe würiña jiláguaña

jámarigu jagía ja aganoúbaña Israél, loúnajei túmoun ában to aganoúboun Sarépta, yaráfa lun ubúruгу Sidón. ²⁷ Ñíñanu meja gíñe sarágu gawágutiña gumeín luágu jára ñi Israél lídan lídáani proféta Eliséo, úati ni ában jádaangiñe areídawaguagüdüti lueídügüya Naamán le Síriana.

²⁸ Dan le jagáambunbalin sun ja ñíbaña ligílisirugu cátei le, ába jagáñidun sarágu. ²⁹ Ába jásaarun, ába jaságaruni Jesúsu bougudín lueí fulásu, ába janügüni lálbulugun wúbü le gagíbuagubalin fulásu lun jájuchuruni ñígiñe. ³⁰ Ába lásügürün Jesúsu jamídaanguágiñe jámagua, ába lídin.

*Ában wügüri gawáguti espíritu wuríbati
(Mr 1.21-28)*

³¹ Ábati lídin Jesúsu Capernaúm, ában fulásu le lídaanbei Galiléa, ába larúfudajan joun gürígia ñi lídan wéyu le eméraaguagülei. ³² Weírititi janígi láu ligáburi larúfudajan, ladüga láu ubáfu ladímureja.

³³ Ñíñeinti ában wügüri ligílisirugu, gawáguti espíritu wuríbati, ába lagúaragun ítara.

³⁴ —Ígira báwa, ¿ca uágu bemétera wámoun, Jesúsu le Nazarétna? ¿Biábiña agünrinchaguawa? Subúdi numútibu, áni subúdi numúti luágu amürü lan Liraü Búngiu le sándubei.

³⁵ Ába ladeínjan Jesúsu lun espíritu wuríbati ligía, ába laríñagun lun.
—¡Maníba, furíba lídaangiñe gürígia le!

Ábati lájuchuruni espíritu wuríbati wügüri ligía múarugun jagíbugiñe súngebui, ába láfuridun lídaangiñe, mabúleiseirunga. ³⁶ Ába laweíridun janígi súngebui, ába jaríñagun jámagua.

—¿Cáteisán buri dimúrei le? ¡Adímurejati wügüri le láu gumádi lúma ubáfu joun espíritugu wuríbatiña, ába jáfuridun!

³⁷ Adímurejóuátiti buri luágu Jesúsu lídan sun fulásu geyégua.

*Lareídaguagüdünun Jesúsu límenidi Pédro
(Mt 8.14-15; Mr 1.29-31)*

³⁸ Ábati láfuridun Jesúsu tídaangiñe jalígílisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmuragun lun Jesúsu lun lareídaguagüdünun. ³⁹ Ába lélemuchun Jesúsu tuágun, ába ladeínjan lun abíruaü, ába lagídarun abíruaü tueí. Lídan méme óra ligía ába tásaarun, ába tagúmeserun eténira joun.

*Lareídaguagüdüñ Jesúsu sarágu sánditiña
(Mt 8.16-17; Mr 1.32-34)*

⁴⁰ Sun ja añájeimbaña sánditiña jábiñe, dan le láfuachun wéyu ába janügüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguarügü sándi le jawáguti. ⁴¹ Sarágu jaña gíñe ja gawágutiña espíritugu wuríbatiña, ába jagídarúniwa jaweí, ába buri jagúaragun ítara.

—Amürü le Liraübei Búngiu.

Ába ladeínjan Jesúsu joun espíritugu wuríbatiña, mígirun lumútiña lun jadímurejan, ladüga subúdi jamúti luágu ligía lan Crístubei.

*Lapúrichijan Jesúsu Galiléa
(Mr 1.35-39)*

⁴² Dan le larúgadunbei, ába láfuridun Jesúsu bougudín lueí ubúruгу lídoun ában fulásu mageírawati. Ába jáluajani gürígia, ába jachülürün le ñíjin lubeí, buséntiña yebe jeréderuni lueí lídin, ⁴³ ába lariñagun joun.

—Gásu giñe níchuguni ugánu le luáguti larúeijan Búngiu joun lílana líbiri fulásu, ladüga lun líra nouñajoúa.

⁴⁴ Ítara líña lídin apúrichijaina tídan buri jalígílisin juríu, Galiléa.

5

Esénijani le láubei milágu
(Mt 4.18-22; Mr 1.16-20)

¹ Luágu ában dan, ñíñein Jesúsu láru dúna le Genesarét, ábati jayábingua sarágu gürígia darí lun jámurudaguni, ladüga busén jamá jagáambuni lerérün Búngiu. ² Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin. ³ Ábati ládinun Jesúsu tídoun ában tídaangiñe ugúnein tugúya to lugúneboun Simón, ába lariñagun lun lun ladisedun murúsun lueí láru béya. Ábati lañúurun Jesúsu tídan ugúnein, ába lagúmeserun arúfudaja joun gürígia ñígiñe. ⁴ Dan le lásurunbei ladímurejan, ába lariñagun lun Simón.

—Jeíba méme anágün, ábame jágurun ñi.

⁵ Lariñaga Simón lun.

—Maésturu, ñadímeinjadiwa sun áriebu, mañúguntiwa ni cáta, quei amürü lubeí ariñagubalin, wágura.

⁶ Ába jágurun, dan le jiñúragunbárun séni, ñíñanu sarágu úduraü tídan darí yebe lun tajeíridagun. ⁷ Ábati jadügün seíni joun jíbiriгу ja tídaanbaña to ában ugúnein lun jayábin íderaguaña. Ába jayábin, ába jabuínchagüdúnun biángubei ugúnein darí yebe lun tadíbiragun. ⁸ Dan le laríjini Simón Pédro cátei le, ába lájuduragun ligíbugiñe Jesúsu, ába lariñagun lun.

—Ígira bána, Nabúreme, ladüga ában wügüri gafígounti nugúya.

⁹ Lariñagubaañin Simón líra ladüga laweíridun lanígi, jáu sun ja úarabaña lúma, luágu añúguni le jadügübei. ¹⁰ Weíriti giñe janígi Jacóbo lúma Juan, ja lirájüñü Zebedéo, ja lúmabaña Simón. Ába lariñagun Jesúsu lun Simón.

—Manúfudebá, lúmagiñe guetó buwádígimarida adíaja gürígia nun.

¹¹ Lárigiñeti játürün, ába jígiruni sun cátei, ába jóudin lúma Jesúsu lun láni jamá díspulugu.

Lareídaguagüdün Jesúsu ában gawáguti gumeínlúagu sun lúra
(Mt 8.1-4; Mr 1.40-45)

¹² Luágu ában dan, lídaañein ában fulásu Jesúsu, le ñí lubei ában wügüri gawáguti gumeín luágu sun lúra. Dan le laríjinbalin wügüri ligía Jesúsu, ába lájuduragun dagá ligíbu múarugun, ába layúmuragun lun ítara.

—Nabúreme, áñjabu busén, gayáraati bareídaguagüdünina.

¹³ Ábati lagúruruni Jesúsu láu lújabu, ába lariñagun.

—Buséntina, areídaguabá.

Quei lariñagun ítara, ába lagídarun gumeín lueí wügüri ligía, ¹⁴ ábati lariñagun Jesúsu lun lun mabájüdagun láani cátei le ni ca un. Lariñaga lun.

—Ñüdünrügübá, arúfudagua búngua lun fádiri, rúbeíme edéweejani le uágubei lariñaga lílürudun Moisés luágu barúmadun, aríja jamámugei gürígia luágu areídaguadibu lan.

15 Eibu dan, eibu labúruchaguntima luágu Jesúsu, sarágu jañátija gürigia oúndaragutiña lun jagáambuni lúma lun lareidaguágüdüni jasándi. 16 Ábaja lídin Jesúsu le ñíjin lumúti úa jamá gürigia lun layúmuragun lun Búngiu.

Lareidaguágüdüni Jesúsu ában fadáguaali
(Mt 9.1-8; Mr 2.1-12)

17 Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúruden Moisés, ñúbintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareidaguágüdüniña sánditiña. 18 Ábati jayábin fiú wügüriña barúina ában wügüri fadáguaali tídan ában ubárari, jálugati jebélaagüdüni le ñíjin lubei Jesúsu lun laríjini. 19 Madáritiña jalágiñeba lan jebélura ladüga jíbe gürigia, ábati jaweínrun tábulugun múna, ába jagídarun murúsun lueigiñe lougiñe le ñí lubei Jesúsu, ába jarárigüdüni sánditi tídan lubárari ligíbugiñoun. 20 Dan le laríjinbalin Jesúsu afíñeni le jawágubei, ába laríñagun lun sánditi ligía.

—Wügüri, ferúdunawaali bifígoun.

21 Ábati jaríñagun arúfudajatiña lilúruden Moisés jáma fariséogu jóunguarügü.

—¿Cáteisan gürigia le, le minébenejabubei lun Búngiu láu ligáburi ladímurejan? Úati ámu gayáraati ferúduna lan figoú lueidügüya Búngiu.

22 Subúdi lumúti Jesúsu ca lan jasáminabei, ába laríñagun joun.

—¿Ca uágu jasáminara ítara? 23 ¿Cátima méreengünbei laríñawagun. “Ferúdunawaali bifígoun”, ódi “Sarába, beíbuga”? 24 Narúfudaaliti jun luágu gayára lan ferúduna nan figoú, áu le Wügüri Garaüwarügüti.

Ábati laríñagun lun le sándibei.

—Sarába, barúboun bubárari, beíba búbiñoun.

25 Lídan óra ligía, ába lásaarun sánditi ligía jagíbugiñe, ába labúdunun lubárari tó buga ídaanboun laroúnra, ába lídin lúbiñoun adímurejeina luágu luweírigun Búngiu. 26 Ába laweíridun janígi súngubei, ába jadímurejan luágu luweírigun Búngiu, ába jaríñagun láu luweírin janígi.

—Arijaadiwa cátei weíriguti ugüñe.

Lagúarun Jesúsu lun Leví lun lánime disípulu
(Mt 9.9-13; Mr 2.13-17)

27 Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíriri Leví, ñun líña lídan fulásu le ñí lubei lagúburaja, ába laríñagun Jesúsu lun.

—Falábana, queímoun núma queisi náni disípulu.

28 Ába lásaarun Leví, ába lígiruni sun cátei lánina binádu libágari, ába lídin lúma Jesúsu queisi láni disípulu lúmagiñe óra ligía.

29 Lárigiñe, ába ladügün Leví ában oúnwenbun fédu lun Jesúsu, lúbiñe, ñíñanuti sarágu agúburajatiña liseínsuna gumádi jámaya ámu gürigia ñun luágu dábula jáma. 30 Ába jagúmeserun fariséogu jáma arúfudajatiña lilúruden Moisés adímureja luágu Jesúsu jáma láni disípulugu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gafígoutiña?

31 Laríñaga Jesúsu joun.

—Ja magádiebaña, memégeirúntiña surúsia, aná ja sándibaña. 32 Máma niábiña áluaja magádietaña ligíbugiñe Búngiu, niábiña áluaja gafígoutiña lun lasáansirún jóuserun.

*Jálügüdüni Jesúsu luágu ayúnaruni
(Mt 9.14-17; Mr 2.18-22)*

³³ Ábati jariñagun lun Jesúsu.

—¿Ída liñásan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, joutiña, gurá jagía súnwandan?

³⁴ Ába lariñagun Jesúsu joun.

—¿Gayáraati funági jayúnaragüdüniña gürígia ja jamísurajan lídoun ában maríei sun niján lan adári jáma ñi? ³⁵ Lachülürüba dan lun lídín adári, ligíameti jayúnarun.

³⁶ Rúti giñe Jesúsu ában jémpulu joun luágu iséri larúfudajan lúma binádu, lariñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladúga itara, lagádeirouboun to isérigiruboun, áni merédebei giñe murúsun gamísa iséri ligía buídu tuágu anáanguni ñulújaru tugúya. ³⁷ Michugúntu giñe diweín iséri lídoun guéru ñulújali, ánjein adügúwa itara, tajeíridagubei diweín iséri guéru ñulújali, féridiméti diweín, féridi guéru. ³⁸ Ligía lúnti lubei tíchugún diweín iséri lídoun guéru iséri, itara lúba lesérididun guéru, seríwi diweín. ³⁹ Úati giñe átuti diweín to binádu lun labúseerunun to iséri lárigiñe, lariñaguba. “Búitimaatu to binádu.”

6

*Jabúdajan disípulugu túrígu lídan wéyu le eméraqaguálei
(Mt 12.1-8; Mr 2.23-28)*

¹ Luágu ában wéyu le eméraqaguálei, eíbugeina líña Jesúsu labádinagua nádü jáma láni disípulugu, átújeina jagíati disípulugu lín túrígu, ába jéferejani láu jájabu, ába jeígini líla. ² Ábati jariñagun jádaangiñe fariséogu joun.

—¿Cásan uágu jadúga wadágimanu le moún lumuti ladügün lídan wéyu le eméraqaguálei?

³ Lariñaga Jesúsu joun.

—¿Malíjangidün luágu le ladügübei David luágu ában dan, dan le lalámachunbei jáu sun ja úrabaña lúma? ⁴ Ába lebélurun tídoun lúban Búngiu, ába lanügün tídaangiñe fein to sagraúboun, jou ligía tídaangiñe, ru ligía joun ja úrabaña lúma, láu sun fádírígu rügüñanu lán yebe lúnbaña jeígin tídaangiñe fein tugúya, según lilúrudun Moisés, áni máma figou le ladügübei David ligíbugiñe Búngiu.

⁵ Aríñagati giñe joun.

—Gabáfutina, áu le Wügüri Garaüwarügüti, lun naríñagun cába lan gayára ladügüniwa wéyu le eméraqaguálei.

*Wügüri le jiláalíbei újabu
(Mt 12.9-14; Mr 3.1-6)*

⁶ Lídaanya ában wéyu le eméraqaguálei, ába lebélurun Jesúsu tídoun jalígílisin juríu, ába lagúmeserun arúfudaja. Níñein ában wügüri jiláali újabu le louñwenren, ⁷ añájati arúfudajatiña lilúrudun Moisés jáma fariséogu aríaaiei Jesúsu ánjein lagáranjaba lubeí lun lídan wéyu le eméraqaguálei, lun jadárirun lidúnrun. ⁸ Subúdi lumúti ca lan jarítagubei, ába lariñagun lun wügüri le jiláalíbei újabu.

—Sarába, ráramabá wagíbugiñe.

Ába lásaarun, ába laráramun ñi. ⁹ Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügün lídan wéyu le eméraguagülei, buídu ódi wuríbani, lasálbarun ibágari ódi lagídarún?

¹⁰ Ábati laríaguniña Jesúsu sun ja geyégubaña láu, ába laríñagun lun wügüri ligía.

—Tulébei bújabu.

Ába látuleruni, ába lareídagun. ¹¹ Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmuchun láu Jesúsu.

Lanúadajaniña Jesúsu dúusu apóstolugu

(Mt 10.1-4; Mr 3.13-19)

¹² Lídoun dan ligía, ába lídin Jesúsu luágun ában wübü ayúmuragua lun Búngiu. ¹³ Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu. ¹⁴ Niján jíribei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé, ¹⁵ Matéo lúma Tomás, Jacóbo, le liraü Alféo, Simón, le áfaaguti lun jawáanserun juríu, ¹⁶ Júdas, le lamúlen Jacóbo, lúma Júdas Iscarióte, le alúgurubalin Jesúsu.

Larúfudajan Jesúsu joun sarágu güriúa

(Mt 4.23-25)

¹⁷ Ába larárirun Jesúsu jáu lueígiñe wübü, ába leréderagun jáu láni disípulugu lídan ában fulásu le ñí lumuti sagádi wásati, ñíñanu giñe sarágu güriúa ñübintiña loubwagugiñe Judéa, Jerusalén, lúma lárurugugiñe Tíro lúma Sidón. Sun güriúa ja, jayábiña lun jagáambuni lapúrichijan Jesúsu lúma lun lareídaguagüdüni jasándi. ¹⁸ Já buri asúfurirubaña jáu espíritugu wuríbatiña, areídaguatiña giñe. ¹⁹ Álugatiña sun güriúa jagúrurun luágu Jesúsu, ladüga areídaguagüda lumútiña sùngubei láu lubáfu.

Fuleíseiwatiña jáma fugiábugu

(Mt 5.1-12)

²⁰ Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeiabei, ladüga ménreengünbei jun lun jebélurun lídoun larúeijan Búngiu.

²¹ Fuleíseiwatün, jugúya le áfaagubei ilámaü guetó, ladüga jaquímuléduba.

Fuleíseiwatün, jugúya le ayájubei guetó, jéjerajaba lárigiñe.

²² Fuleíseiwatün dan le iyéreegu jumá joun güriúa nueígiñe, dan le jabúgagunün jawáriua, dan le janábaganün, dan le janügüni jíri quei ní cáta, quei cátei wuríbati, nueígiñe, áu le Wügüri Garaüwarügüti. ²³ Gúnda jumá sarágu, buin jumá láu ugúndani lídan wéyu ligía, ladüga jibíjuba ában oúnwenbun afáyeiruañe siélu, ítara méme líña meja jadüga binádu jagübürigu güriúa ja joun profétagu.

²⁴ Fugiábugu jugúya, jugúya le rísibei, ladüga ibíja jumáli sun ugúndani le lúnbei jibíjini.

²⁵ Fugiábugu jugúya, jugúya le químulébei, ladüga jalámachuba.

Fugiábugu jugúya le éjerajabei guetó, ladüga jayájuajaba láu írui.

²⁶ Fugiábugu jugúya dan le sun jamá güriúa adímureja buíti juágu, ítara líña meja jadímurejan binádu jagübürigu buíti jawágu profétagu yéetiña.

Jínsiñe jamá jáganiñu jun

(Mt 5.38-48, 7.12)

²⁷ ‘Niján nerérun jun, Jugúya le agáambubalina. Jínsiñe jamá jáganiñu jun, adüga jumá buíti joun ja iyéeejabúbaña jun, ²⁸ biní jumaña ja íñaragutün, ayúmuragua jumá jawágu ja anábagutün. ²⁹ Ánjaabu láfara ában gürígia luágu ában louba bigíbu, rúbei gíñe le ában louba lun, le anügütu babíte buei, rúboun gíñe bisímisin lun. ³⁰ Furúmieguarügü le amúriajati búma, rúba lun, le anügüti bumégen, máluajabei lúma. ³¹ Le cátei le babúseerubei ladügün bun, ligialá badüga joun ámu.

³² ‘Ánjein já rügüñanu lubei jínsiñejabúbaña jun jínsiñe jun, ¿ca buíti jadügübei láu líra? Ásta gafígoontiña, ítara líña jadüga. ³³ O ánjaün lan adüga buíti jóunrügü ja adügübaña buíti jun, ¿ca buíti jadügübei láu líra? Ítara líña gíñe jadügün gafígoontiña. ³⁴ Ánjaün afúredeija jóunrügü ja úmagiñebaña jarítagua jibíjin som cátei, ¿ca buíti jadügübei láu líra? Afúredeijatiña gíñe ja wuríbabaña joun wuríbatiña jáledi, agúrabañu jagía gíñe jabíjin som cátei jámagiñe. ³⁵ Ánjein jugúya, lúnti jínsiñe jamá jáganiñu jun, adüga jugúyame buíti, afúredeija jugúyame, magúrabajaanga ni cáta lewéñegua. Ítara lúba weíri lan jafáyeyruaja lúmagiñe Búngiu le ífugubei, áni lirájüñubadün gíñe le tímataati, ladüga ligía, fuleiseijabúti gíñe joun ja meteíngiradibaña lúma joun ja wuríbabaña. ³⁶ Gudémeyabu jumá, quei gudémeyabu lan júguchi Búngiu.

Madímureja jumá wuríba jawágu ámu

(Mt 7.1-5)

³⁷ ‘Madímureja jumá wuríba jawágu ámu, ábame gíñe mariñagun lan Búngiu luágu wuríba lan jigáburí. Míchiga jumá jadúnrun ámu, míchun lámuga gíñe Búngiu jidúnrun. Ferúduna jumá, ferúduna lámugaün gíñe Búngiu. ³⁸ Rújuma joun ámu, ru lámuga gíñe Búngiu jun. Líchuguba Búngiu sarágu jun, ladügüba jun queígubeirügü jadüga joun ámu.

³⁹ Rúlumuti Jesúsú jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme júyu? ⁴⁰ Úati ni ában disípulu weíríguti lueí lumáesturun, íbini ánjein lagúmucha latúriajan, chülürügübei quei lumáesturun.

⁴¹ ‘¿Ída líña gayára bubálin liraúraü ífei le lídaanbei lágu bíbugaña aríja, áni masándi bumúti durúsu le lídaanbei bágu? ⁴² ¿Ída líña gayára lubei bariñagun lun bíbugaña. “Sagánei liraúraü ífei le bágurugubei”, áni masándi bumúti durúsu le bágurugubei? ¡Biánguañein bigíbu! Sagábei durúsu le bágurugubei furúmiñe, gayára lámuga baríjini liraúraü ífei le bágurugubei bíbugaña buídu lun baságaruni.

Luágu lin tídibu wéwe tasúbudirúa

(Mt 7.17-20, 12.34-35)

⁴³ ‘Úati tídibu wéwe buíti lun wuríba lan lin, úati gíñe tídibu wéwe wuríbati lun buídu lan lin. ⁴⁴ Sun tídibu wéwe subúdiwati luágu lin, mátüjóuntu ígo lueígiñe jíyu, ni beíbei lueígiñe guríbiyuwa. ⁴⁵ Gürígia le buídubei, cátei buíti lariñagubei ladüga cátei lan buíti tídaanbei lanígi, gürígia le wuríbati, cátei wuríbati lariñagubei ladüga cátei lan wuríbati tídaanbei lanígi. Luágu le lariñagubei gürígia lasúbudirúa ca lan tídaanbei lanígi.

Bián ébuu

(Mt 7.24-27)

46 ‘¿Ca uágu jariñaga luágu áu lan Jabúremebei áni madügün jumúti le nubebei? 47 Nariñagaali jun ída líña lan le ñübinbei nun áni adügalet le nubebei. 48 Ítara líña quei ában wügüri le ábunagubei ában múna, achíajati julíli furúmiñe, ába lábununi wagábu labádinagua dübü derébuguti. Dan le líñúrunbei dúna, ába liábin fulúdu láu érei tuágun múna tugúya, siñá lumutu ánjingicha ladüga luáguñoun lan ébuu derébuguti. 49 Ánjeinti le agáambubalina áni madügün lumúti le nubebei, ítara líña quei ában wügüri le ábunagubei lúban ligíbuagu ságoun, mawágaburiga, dánti le líñúrunbei dúna, ába liábin fulúdu láu érei tuágun, ába teíguadun, ába tagünrinchagun le gumúti.

7

Lareídaguagüdüni Jesúsu lumúsun ában gumándan Rómana (Mt 8.5-13)

1 Dan le lásurunbei ladímurejan Jesúsu joun güriá, ába lídin Capernaúm. 2 Ñiñein ában gumándan Rómana ñi, láu ában lumúsun jinsiñeti lun sarágu, sándiñein músu ligía, yaráfa lun loúnwen. 3 Dan le lagáambunbei gumándan ligía luágu Jesúsu, ába loúnajan fiú jádaangiñe wügüriña weirigutiña lídan jafíñen juríu lun jayúmuragun lun Jesúsu lun lídin areídaguagüdei lumúsun. 4 Ába jóudin lúmoun Jesúsu, ába jagúmeserun ayúmuragua lun táu sun janígi, jariñaga lun.

—Buíti lun bíderaguni gumándan le, 5 ladüga jinsiñetiwa wagía juríu lun, ligía guánarügü ábunaguagüdübarun walígilisin.

6 Ábati lídin Jesúsu jáma, dan le yaráfaaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manügün ban bubéresegun ñüdüñ lúbiñe, luágu nege madúna lan lun bebélurun lúbiñoun, 7 ligía nege mídin lubei lúngua álugabu. Rúrügübeí dimúrei, ábame lareídagun lumúsun. 8 Ladüga ligía nege giñe lábugiñeñein gumádi íñutimaati, áni añajein giñe súdeara lábugiñe lagúmadijan. Dan lé nege lariñagun lun ában jádaangiñe lun lídin, ñüdünti, dan le lariñagun lun le ában lun liábin, ñübinti, áni dan le loúnajani lumúsun adüga som cátei, adüga lumúti. Ítara lúba nege, luágu berérun mósu lídin sándi luei lumúsun.

9 Dan le lagáambunbalin Jesúsu cátei le, weiriti lanígi láu wügüri ligía, ába laríjin jawágun güriá ja afálarubalin, aba laríñagun joun.

—Nínarün jáu, ni íbini jádan Israelítagu madárigidina affíñeni weiriti quei lafiñen wügüri le.

10 Dánti le jachülürünbei wügüriña ja ñüdüñbaña álugei Jesúsu járigoún lúbiñoun gumándan, areídaguagüdüni lumúsun.

Láguyuagüdüni Jesúsu tiraü ában jiláali túmari

11 Lárigiñe cátei le, lídiña Jesúsu lídoun ában ubúru gu gíriti Naín, úareina jáña láni disípulugu lúma, jáma sarágu güriá. 12 Dan le lachülürünbei yaráfa lun lubéneri ubúru gu ligía, ába laríjin jóudin ábunaja ában jiláali le ligiarügüti tiraü lúguchu to jiláali túmari. Sarágu jáña lílana fulásu ñüdüñ ábunaja túma. 13 Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

14 Ába layárafadun, ába lagúrurunun gánjoun, ába jaráramagun ja anügübaña. Ába laríñagun lun jiláali.

—Írájú, ¡nariñaguña bun lun básaarun!

15 Ábati lásaarun lé buga jiláalibei, ába lagúmeserun adímureja. Ába ledéregeruni Jesúsu tun lúguchu. 16 Dan le jaríjinbalin gürígia cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chülúgua ában proféta weíriguti wádoun.

Aríñagatiña gíñe.

—Ñübinja Búngiu íderaguawa, wagía le lumútuniña.

17 Ába lagaambúniwa cátei le ladügübei Jesúsu lídan sun Judéa lúma geyéguá láu.

*Loúnagülegu Juan le abásteragüdjabei
(Mt 11.2-19)*

18 Agáambati Juan luágu sun cátei le, abájüdagua jamúti lánigu lun. Ábati lagúarun joun biáma jádaangiñe, 19 ába loúnajaniña álügüdei Wabúreme Jesúsu ánjein ligía lubei Crístubei le lúnbei liábin, o ánjein jagúrabajaba lubei ámu. 20 Dan le jachülürünbei le ñi lubei Jesúsu, ába jayárafadun, ába jaríñagun lun.

—Loúnajañadiwa Juan le abásteragüdjabei álügüdabu ánjein amürü lubei Crístubei le lúnbei liábin, o ánjein lun lubei wagúrabun ámu.

21 Lídan méme óra ligía, areídaguagüdati Jesúsu sarágu gürígia lídaangiñe jasáandi lúma jasúfurirun, lúma jádaangiñe espíritugu wuribatiña, aríjagüda ligía gíñe sarágu maríjintiña. 22 Ába lubeiti lariñagun joun.

—Jeíba, jaríñageime le jaríjubei lúma le jagáambubei lun Juan. Jabájüdaguáme lun luágu jaríjin maríjintiña, jeíbugun meíbuguntiña, jareídagun láutiña gumein luágu jára, jagáambun magáambaditiña, jáguuyugun jiláaña, lúma luágu líchugún ugánu luáguti asálbaruni joun gudémetiña. 23 Gúndaati gíñe gürígia le meféridirun lumúti lafiñen noágu.

24 Láriigiñe jóudin já buga loúnajabaña Juan, ába lagúmeserun Jesúsu adímureja luágu Juan joun gürígia, lariñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali? 25 Ánjein máma lubei ítara líña, ¿cáti jídinbei aríja? ¿Ában wügüri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu. 26 Lídan linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügü láu proféta. 27 Juan, ligía oúnagülei le uágubei taríñaga Lerérun Búngiu.

Nóunajañein nóunagüle bubáragiñe lun laráansejani úma bubá.

28 Quei nariñaguni jun, jádan sun gürígia, úgali proféta weíriguti luei Juan, áni láu sun líra, weíriguti le ünabutimaabei lídan larúeijan Búngiu sügü láu le anúgarügübalin ugánu luágu arúejani ligía.

29 Dan le jagáambunbalin sun gürígia, ásta ja agúburajabaña liseínsuna gumádi, cátei le, ába jaríñagun luágu richá lan Búngiu láu lariñagun liyúmulugugiñe Juan luágu lúnti lan jasáansiraguni jagáburi. Gürígia jagía, resíbi jamáli meja labásteragüdjagan Juan, 30 ánjanati jíbe-ágei fariseógu jáma arúfudajatiña lilúrudun Moisés, májatiña meja lun jadügüni le lubeibe Juan, merésibirun jamúti lé yebe labúseerubei Búngiu ladügün luágu jafúleisein. 31 Ába lariñagun Jesúsu.

—¿Ída liñásan jagáburi gürígia lánina dan le? ¿Cásan lenégebei? 32 Ítara jáña quei irájüñü ja añúurubaña mágidirugu ájurera, ába jagúaragun joun jíbegu. “Íñaajatiwa fidu jun, mabínajantün, erémujatiwa urému jírti jun, mayájuntün.”

³³ Ladüga ñübinti Juan le abásteragüdajabei, lé meja meíginbei fein, mátun ligía diweín, aríñagatün luágu gawágu lan espíritu wuríbati. ³⁴ Lárigiñe, ába niábin, áu le Wügüri Garaüwarügüti, joutina áni gurá áu. Jaríñaga luágu geígadina, gátadi, jamáda áu nege gafíngountiña jáma agúburajatiña liseínsuna gumádi. ³⁵ Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

Jesúsu lúbiñe Simón le fariséo

³⁶ Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábunan. ³⁷ Níñounti ában würi wuríbati témeri lídan ubúru luágu, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti. ³⁸ Ába taráramun lanágangiñe Jesúsu, lubádu lugúdi, ába tadúdüragüdüni lugúdi láu táguira. Nuján ayájuaja, nuján arágajei láu tídihuri, nuján achújei lugúdi, ába téseruni ibíñei luágun. ³⁹ Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügüri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.” ⁴⁰ Ábati laríñagun Jesúsu lun fariséo ligía.

—Simón, níjein ában cátei lun nariñaguni bun.

Laríñaga fariséo.

—Aríñagabeí nun, maésturu.

⁴¹ Laríñaga Jesúsu lun.

—Níñanu bián wügüriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san. ⁴² Queíti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábago jádaangiñe jínsiñejabutima lun afúredeijati ligía?

⁴³ Laríñaga Simón lun.

—Lídan narítagun, le gíbetimaabei adúweijan.

Laríñaga Jesúsu lun.

—Richátibu.

⁴⁴ Ába laríjin Jesúsu tuágun würi tugúya, ába laríñagun lun Simón.

—¿Aríagu bíña tun würi to? Belútina búbiñoun, míchutibu dúna nun lun nachíbuni nugúdi, ánjounti würi to, ágawagüda tumúti nugúdi láu táguira, ába tamábeidagüdüni láu tídihuri. ⁴⁵ Machú bumúтина, ánjoun tugúya, lúmagiñe nebélurun, merédegili tachújani nugúdi. ⁴⁶ Míchutibu aili nábulugu, ánjoun tugúya, túguatu ibiñei jémeti luágu nugúdi. ⁴⁷ Ligía nariñagunbei bun luágu arúfuda láani luweírín tínsiñejabu luágu ferúdnawa lan líbe tífigoun, ánjeinti gürígia le míbeti ferúdnawa lan, míbeti ínsiñeni larúfudun.

⁴⁸ Ábati laríñagun Jesúsu tun würi tugúya.

—Ferúdnawaali bífigoun.

⁴⁹ Ábati jagúmeserun amísurajoutiña ja ñúnbaña lúma ñi aríñaga jámagua.

—¿Cáteisan wügüri le, ferúdnuna lubei gíñe figou?

⁵⁰ Ába laríñagun Jesúsu tun würi tugúya.

—Sálbawádibu lídaangiñe bífigoun ladüga baffñerun nuágu, beíba darángilañu.

¹ Lárigiñe cátei le, ñūdūnti Jesúsu lídoun sarágu ubúruгу lúma buri lirájūññū fulásu íchigei ugánu buíti luágu larúeijan Búngiu. ² Ñūdūtiña dúusu apóstolugu lúma jáma wúriña ja lareídaguagüdübaña jádaangiñe espíritugu wuríbatiña lúma sándi. Ñíñoun María to giriboun Magdaléna jádan, to ídaangiñeboun jáfurida sédü espíritugu wuríbatiña, ³ ñíñoun giñe Juána, to lúmari Chúza, le ouñgírubarun lúban Heródes, ñíñoun Susána, jámaya sarágu ámu ja íderagubálin láu le jámati.

Jémpulu luáguti ábunaguti
(Mt 13.1-9; Mr 4.1-9)

⁴ Sarágu jáña gürigia ñūbinburitiña lídaangiñe sarágu fulásu lun jaríjini Jesúsu, dánti le oundaraguaaña, ába ladímurejan Jesúsu joun láu jémpulu. Laríñaga joun.

⁵ —Furíti ában ábunaguti ábunagua líla nádü, dan le afúrujeina láani, ába láburuhan lídaangiñe luágun üma, ába jadügüraguni ásügürütiña, ába jeígini dunúru. ⁶ Líbiri, ába láburuhan labádinaguouñ dübü, dánti le labouчhun, ába lásaurün ladüga lumábei fulásu. ⁷ Ába láburuhan líbiri labádinaguouñ jíyu, ába láfaruni jíyu le ájüchübei úara lúma. ⁸ Ñíñein giñe lídaangiñe, áburujati lídoun múa buíti, dan le laweinamudun, gin ligía, buíti lalúbajoün, cáda ílaü rúti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garigeirugubei lun jagáambun, agáamba jumána.

Le lébubei ladímurejan Jesúsu láu jémpulu
(Mt 13.10-17; Mr 4.10-12)

⁹ Ábati jálügüdüni láni dísipulugu ca lan lílabei jémpulu le. ¹⁰ Laríñaga joun.

—Jugúya, subúdigüda láali Búngiu cátei arámudaguati le luágutibei larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun lun ibídiñebei lan líla cátei le jaríjibei joun, lun giñe úa lan gunfaráanda jamáni cátei le jagáambubei.

Lafúnraanguagüdüni Jesúsu jémpulu luáguti ábunaguti
(Mt 13.18-23; Mr 4.13-20)

¹¹ Ába laríñagun Jesúsu joun.

—Niján líla jémpulu ligía. Líla nádü, ligía lerérun Búngiu, ¹² üma le ñíjin lubei láburuja lídaangiñe líla nádü, jagía gürigia ja agáambubalin lerérun Búngiu, ába líabin Máfia, ába lagídaruni tídaangiñe janígi lun mafiñerun jamá, masálbarun jagíame. ¹³ Dübü le ñíjin lubei láburuja líbiri líla nádü, jagía gürigia ja agáambubalin lerérun Búngiu, ába jerésibiruni láu ugúndani, áni márügüdünti jádan buídu, affíñetiña luágu murúsun dan, áni dan le jóuchawagún, mawándun jamúti, ába jefédiruni jafiñen luágu Búngiu. ¹⁴ Jíyu le ñíjin lubei láburuja líbiri líla nádü, jagía gürigia ja agáambubalin lerérun Búngiu, ába jasígiruni binádu jagáburi, ába jasígirun arítagua luágu írisini lúma ugúndani le lánina ubou le, úati fulásu jarítagurugun lun lerérun Búngiu, siñátiti laságarún cátei buíti jádaangiñe. ¹⁵ Ánjeinti múa buíti le ñíjin lubei láburuja líbiri líla nádü, jagía gürigia ja agáambubalin lerérun Búngiu táu anígi buítu, adüga jagía gásu láu lerérun, eíbuga jagía quei lubúdubu, sagáwati cátei buíti jádaangiñe.

Jémpulu luáguti lámpu
(Mr 4.21-25)

¹⁶ Ába laríñagun Jesúsu.

—Úati gürígia ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdün múnada, lun gayára lan jaríjin ja ebélurubaña jabárua. ¹⁷ Úati lubeíti ni cáta arámudaguati lun mafúnraangudun lan, úa ni cáta le íbídiñewati lun machúlürün lan dan lun lasúbudirúniwa lúma lun lafúnraangudun.

¹⁸ ‘Gagáambadi jumá lubeíti buídu lun lerérun Búngiu, le gámati lerérun Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tídan lanígi, íbini le uágubei larítagua luágu níjein lan lúma, lagídarúaba lueí.

Lúguchu Jesúsu jáma lamúlenu
(Mt 12.46-50; Mr 3.31-35)

¹⁹ Ábati tachúlürün lúguchu Jesúsu jáma lamúlenu le ñíjin lubeí Jesúsu, siñáti jayárafadun lun ladüga jíbe gürígia. ²⁰ Ába laríñawagún lun.

—Nujántia búguchu jáma bamúlenu bougudi áni buséntiña jaríjinibu.

²¹ Ába laríñagun joun.

—Ja agáambubalin lerérun Búngiu, úara jagía lúma, jagía núguchubaña jáma namúlenu.

Lagálumaduni Jesúsu lérouga
(Mt 8.23-27; Mr 4.35-41)

²² Luágu ában wéyu, ába ládinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóudin. ²³ Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun. ²⁴ Ábati jóudin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálumougadun, ába darángila lan sun cátei. ²⁵ Ábati laríñagun joun disípulugu.

—¿Ca susébebe lun jafíñen?

Ába jálügüdagun jámagua láu anúfudei lúma luweírín anígi, jaríñaga.

—¿Cátei funásan wügüri le, gumádi lubáli garábali lúma lugúdi barána áni agáamba jamei?

Wügütri Gadárana le gawágubei espíritugu wuríbatíña
(Mt 8.28-34; Mr 5.1-20)

²⁶ Ába jachúlürün loubwagun Gadára, le loubáfurugubei lagúnu, ligíbugiñe Galiléa. ²⁷ Dan le larárirunbei Jesúsu, ába liábin ában wügüri lílana fulásu ligía lubádun. Lújali wügüri ligía gawágu espíritugu wuríbatíña. Madáüti anáanguni, maganoún ligía tídan múná, lídan buri jabára jílaaña le achigíti luágu dübü lagánawa. ²⁸ Dan le laríjnbalin wügüri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera númoun, Jesúsu Liraü Búngiu le Íñugutimaabei? Ayúmuraguatina bun lun masúfuriragüdün bánina.

²⁹ Laríñagunbei ítara ladüga lagúmadiruñein lan Jesúsu espíritugu ligía lun láfuridun lídaangiñe. Saráguja weíyaasu lárügüdüni espíritugu wuríbatí ligía, ábaja jagúraguni gürígia lújabu lúma lugúdi láu güríngüri lun ledéraguagüdün, ábaja

látumuraguni, ába lanúrągüdüni espírítu lídoun fulásu le mageírawati. ³⁰ Ába lariñagun Jesúsu lun.

—¿Ca bíri?

Ába lariñagun.

—Lejión níribei.

Lariñagunbei luágu ligía lan líribei ladüga gíbeeña espírítugu wuríbatiña ja ebélurubaña lídoun. ³¹ Ába jamúriajan espírítugu jagía lúma Jesúsu lun mouñajan lániña máfiougatin. ³² Queíti ñiñanu jamá sarágu búúruju eíga luágu ában wúbü yaráfa, ába jayúmuragun espírítugu jagía lun lun louñajaniña jádoun búúruju jagía, ába lánjarun Jesúsu. ³³ Ábati jáfuridun espírítugu wuríbatiña jagía lueí wügüri ligía, ába jebélurun jádoun búúruju, ábati jáguragun búúruju jagía jóungua lueigiñe ában gudúngu, ába jáburujan lídoun lagúnu, ába jañáradagun.

³⁴ Dan le jaríjnbalin ja oúnigirubaliña búúruju cátei le asúseredubei, ába janúfudedagun, ába jeíbaagun abájüdaguei ubúruгу lúma áraabu. ³⁵ Ábati jóúdingua gürígia aríjei cátei le asúseredubei. Dan le jachúlürünbei le ñí lubei Jesúsu, ába jadáriruni wügüri le ídaangiñebei jáfurida espírítugu wuríbatiña ñun lubádu lugúdi Jesúsu, táu lanáangun, areídaguáli, ába janúfudedagun. ³⁶ Játi buga aríjubalin, ába jabájüdaguni luáguti lareídagun wügüri lé buga gawágubei espírítugu wuríbatiña joun, ³⁷ ába jayúmuragun lílana fulásu ligía lun Jesúsu lun lídin ñigiñe, ladüga janúfude. Ábati ládinun Jesúsu tídoun ugúnein lun lídin, ³⁸ ába layúmuragun wügüri le ídaangiñebei jáfurida espírítugu lun lun lídin lúma, ába lariñagun Jesúsu lun lun leréderun, lariñaga lun.

³⁹ —Giríbubá búbiñoun, ábame babájüdaguni sun le ladügübei Búngiu bun.

Ába lídin, ába labájüdaguni le ladügübei Jesúsu lun lídan sun fulásu ligía.

Liraü Jáiro túma würi to agúrurubarun lanáangun Jesúsu

(Mt 9.18-26; Mr 5.21-43)

⁴⁰ Dan le lagíríbudunbei Jesúsu loubáfurugun lagúnu, ába jerésibiruni gürígia láu ugúndani ladüga sun jagía agúrabañu jáñein. ⁴¹ Ábati líabin ában wügüri gíríti Jáiro, le ábanbei jádaangiñe tábutigu jalígílisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe, ⁴² ladüga ában rügüñoun liraü, quei buri dúusu irúmu táu, touwe. Dan le lídinbei Jesúsu, ába jafálaruni sarágu gürígia dari lun jámurudaguni.

⁴³ Ñiñounti ában würi jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda. ⁴⁴ Ába tayárafadun lun Jesúsu lanágangiñe, ába tagúruruni táru lanáangun, lídan méme ora ligía ába tareídagun.

⁴⁵ Ábati lariñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába lariñagun Pédro jáma líbirigu.

—Maésturu, murúgu wañátia ya lurúma jíbe gürígia, ¿álügüdagidibu ca lan agúrurubei buágu?

⁴⁶ Ába lariñagun Jesúsu.

—Gurúwaali nuágu, ladüga sandí numuti luágu areídaguagüdaadina lan gürígia láu nubáfu.

⁴⁷ Dan le tasúbudiruni würi tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúfesperun lun

jagíbugiñe sun gürigia ca lan lébubei tagúrurun luágu áni ába lan tareídagun lídan méme óra ligía. ⁴⁸ Ábati laríñagun Jesúsu tun.

—Niraü, areídaguadibu ladüga bafíñerun nuágu. Beíba darángilañu.

⁴⁹ Nígili Jesúsu adímureja, ligía lachülürün ában lúbiñegiñe Jáiro, ába laríñagun lun Jáiro.

—Jilá biraü, mebéresejadügüyabá lun Maésturu.

⁵⁰ Dan le lagáambunbalin Jesúsu le, ába laríñagun lun.

—Manúfudedabá, affíñerügübá, ábame tareídagun biraü.

⁵¹ Dan le lachülürünbei Jesúsu lúbiñoun Jáiro, mígrunti lun jebélurun ámu lúma lueídügüya Pédro, Jacóbo lúma Juan jáma tagübürigu irájü tugüya.

⁵² Jayájüna sun ja ñíbaña tárigi, ába laríñagun Jesúsu joun.

—Mayájua jumá, moúnwentu, tarúmugarügüña.

⁵³ Ába jéjerajan láu ladüga subúdi jamáni luágu jilá tan. ⁵⁴ Ábati lárügüdüni Jesúsu tújabu, ába laríñagun láu umálali jéreti.

—Irájü, sarába.

⁵⁵ Ába tágyugun, ába tásaarun lídan méme óra ligía, ába laríñagun Jesúsu lun jíchugun eígini tun. ⁵⁶ Weíríti janígi tagübürigu, ába laríñagun Jesúsu joun lun mabájüdagun jamáni le asúseredubei ni ca un.

9

Loúnajaniña Jesúsu dúusu apóstolugu apúrichija (Mt 10.5-15; Mr 6.7-13)

¹ Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatiña lúma lun jareídagugüdün sánditiña. ² Ába loúnajaniña apúrichijeí ugánu luáguti larúeijan Búngiu lúma areídaguagüdaña sánditiña. ³ Laríñaga joun.

—Manüga jumá ni cáta júmagua luágu juweíyasun—ni bádun, ni ságü, ni fein, ni seínsu. Ábanrügütá símisi janügün. ⁴ Furúmieguarügü múna to ñíjin lumúti jachülúra, reidei jumá ñi dari jídin lídaangiñe fulásu ligía. ⁵ Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugeí luágu magúndan jumá láu jagáburi lílana fulásu ligía, ígira jumáña quei jadáriragun joúngua.

⁶ Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídaguagüdeina jagía sánditiña lídan sun fulásu le ñí lumuti jóudin.

Loúnwen Juan le abásteragüdjabei (Mt 14.1-12; Mr 6.14-29)

⁷ Ába lagáambun gumádimati Heródes luágu sun cátei le ladügübei Jesúsu, ibídiñetiti lun cába lan larítagua, ladüga ñíñanu aríñagutiña luágu saráali lan Juan lídaangiñe ouweni, ⁸ jíbiri aríñaga luágu proféta Elías lan achúlaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe ouweni. ⁹ Ába laríñagun Heródes.

—Áu guánarügü oúnajabei adürürei lichügü Juan. ¿Cátei funáti le, le uágubei nagáamba labájüdawagun sarágu cátei?

Ábati louchun Heródes laríjini Jesúsu.

Leigagüdüñ Jesúsu seíngü mílu wügüríña
(Mt 14.13-21; Mr 6.30-44; Jn 6.1-14)

¹⁰ Dan le jagíribudun apóstolugu, ába jabájüdagun lun Jesúsu luágu sun le jadügübei. Ábati lanügüñiña lídoun fulásu mageírawati yaráfa lun Betsáida.

¹¹ Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jariñagun lun.

—Oúnaja báña gürígia ja, ñüdüñ jamámuga áluga jabára lun jeméraagun, áluaja jagíame eígini lídan buri lirájüñü aüdü lúma lídan buri fulásu yaráfati, ladüga úati ni cáta ya.

¹³ Lariñaga Jesúsu joun.

—Rújuma eígini joun.

Jariñaga lun.

—Seíngü rügüñoun fein wáma jáma bián úduraü, ánjawa gubeírügü ñüdüñ agáñija eígini joun sun gürígia ja.

¹⁴ Yaráfañanu jóun seíngü mílu wügüríña ñi, mabájüdünga würíña jáma irájüñü. Ába lariñagun Jesúsu joun láni disípulugu.

—Ñurügüda jumáña dimí dimí-san.

¹⁵ Ába jadügüni ítara, ába jañúurun súngubei. ¹⁶ Ábati lanügünun Jesúsu seíngü fein lújaburugu jáma bián úduraü, ába larjín siélun, ába líchuguni eteíngiruni lun Búngiu. Láriγιñe lagúbachagunun fein lúma úwi, ába líchuguni joun láni disípulugu lun jafánreinjani jádan gürígia. ¹⁷ Jóutiña súngubei quimúle, dan le jabúdanun ígiragutu, buíngüdatiña dúusu faníñe láu.

Lariñaguni Pédro luágu Jesúsu lan Crístubei
(Mt 16.13-19; Mr 8.27-29)

¹⁸ Luágu ában wéyu dan le layúmuraguña lan Jesúsu lábugua, ñiñanu láni disípulugu díseraü lueí, ába lariñagun joun.

—¿Ída liñásan jarítagun gürígia nuágu? ¿Cátanasan, según jagía?

¹⁹ Ába jariñagun lun.

—Añájein, aríñagutiña luágu Juan lan le abásteragüdjabe amürü, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe ouweni amürü.

²⁰ Ábati lariñagun joun.

—Ángi jugúya, ¿cátanagi lídan jarítagun?

Lariñaga Pédro lun.

—Crístu, le louñajabei Búngiu lun lasálbaruniña gürígia, amürü.

Ladímurejan Jesúsu luágu louñwen
(Mt 16.20-28; Mr 8.30-9.1)

²¹ Ába lariñagun Jesúsu joun láu éregu lun maríñagun jamáni cátei le ni ca un.

²² Ába lariñagun joun.

—Nasúfuriruba sarágu, áu le Wügüri Garaüwarügüti. Janügübadina wügüríña weirigutiña lídan jafíñen juríu, jábutigu fádirigu, jáma arúfudajatiña lílúrudun Moisés, quei ni cáta. Nafarúaba jilágubei, ábame násaarun lídaangiñe ouweni luágu lürüwan wéyu lúnya nabágaridun.

²³ Láriγιñe, ába lariñagun joun súngubei.

—Le busénti nánigu lan, buléileí cáteifein lan, awándaleí sun luwúyeri asúfuriruni le lúnbei liábin lun, nueígiñe, queisi lanügüni ában wügüri lugúruwan, falálana. ²⁴ Ladüga le abúseeruti leséfuragun lúngua ya ubouágu leféridirubei ibágari le magúmuchaditi, ánjein le ánjabei leféridiruni libágari ya ubouágu nueígiñe, libíjubei ibágari le magúmuchaditi siélu. ²⁵ ¿Cági ju lan lun gürigia lagañeiruni sun le lánina ubou, leféridireime lubára siélu o lagünrinchaguba lan lúngua? ²⁶ Le anügüti busíganu nuágu lúma luágu nerérun, áu le Wügüri Garaúwarügüti, nibúsigaribadina giñe láu dánme le niábin quei urúei láu luweírigan Nüguchi jáma ánjeligu ja sándubaña. ²⁷ Ninárün nariñaguni jun luágu añájein lan jádaangiñe ja yábaña guetó, mouñwenbaña maríjnga jameí larúeijan Búngiu.

Lámuñedagun larijín Jesúsu
(Mt 17.1-8; Mr 9.2-8)

²⁸ Queíburi widü wéyu lárigiñe lariñaguni Jesúsu cátei le, ába laweínrun luágun ában wübü ayúmuragua lun Búngiu, barü lumútiña Pédro, Jacóbo, lúma Juan lúmagua. ²⁹ Dan le niján lan Jesúsu ayúmuragua, ába lámuñedagun ligíbu, ába tájarudun lanáangun, ába támiridun. ³⁰ Ábati jasáliragun Moisés lúma Elías ayánuja lúma, ³¹ geyégu líña ában larúgunga weíruti jáu, jayánujaña libügürü ouweni le lúnbei lasúfuriruni Jesúsu, Jerusalén. ³² Láu sun luweírín lidábu lágu Pédro jáma líbirigu, marúmuguntiña, aríja jamúti luweírigan Jesúsu jáma bián wügüriña ja lúmabaña. ³³ Dan le adísedeinaña bián wügüriña jagía lueí Jesúsu, ába lariñagun Pédro lun.

—Maésturu, jíldan dan awánja lan ya! Adüga wamá ürüwa dibásein ya—ában bun, ában lun Moisés, túma ában lun Elías.

Ibidiñeti lun Pédro ca lan lariñagubei. ³⁴ Súnti niján lan adímureja, ába liábin ában juánriñu oúburaguaña, ába janúfudedagun ladüga jadáriragun jóungua lurágeirugu juánriñu ligía. ³⁵ Ábati jagáambun ában umálali aríñaguti lídaangiñe juánriñu ligía.

—Niraü le jínsiñebeí nun le, agáamba jumeí le lubeíbei.

³⁶ Lárigiñe ladímurejan umálali ligía, ába jaríjin disípulugu luágu lábugua rügáali lan Jesúsu. Reídeitiña maníñu, maríñagun jamúti cátei le jaríjubei lun ni ában lídan dan ligía.

Lareídagugüdüñ Jesúsu ában irájü gawáguti espíritu wuríbati
(Mt 17.14-21; Mr 9.14-29)

³⁷ Larúgan, dan le jarárirunbei lueígiñe wübü, sarágu jáña gürigia ñüdüntiña lubároun Jesúsu. ³⁸ Ábati lagúaragun ában wügüri jádaangiñe láu umálali jéreti, lariñaga.

—Maésturu, fuleíseijabubá nun, aríjabeí niraü le ligía rügüñeíbei, ³⁹ níjein ában espíritu wuríbati luágu, dan le lárügüdüni, ába lagúaragugüdüni, ába louwejan, ába lafurijan jacútaü liyúmulugugiñe. Añáwurija lumúti, májati lígiruni. ⁴⁰ Ayúmuraguaadina joun báni disípulugu lun jaságaruni espíritu wuríbati le lueí, siñá jamuti.

⁴¹ Ába louñabun Jesúsu, lariñaga.

—¡Jugúya gürigia mafiñeraditiña, wuríbatiña! ¿Átiribeísan dan lun neréderuni júma lubá gayára lan jafiñerun nuágu? ¿Ídame lagúmucha mafiñeni le jídaanbei? Barübei bíraü ñájoun.

⁴² Dán yebe le lídin irájü ligía lun, ába lájuchuruni espíritu wuríbatí múarugún, ába louwejagüdüni, ába ladeínjan Jesúsu lun espíritu wuríbatí ligía, ába lareídaguagüdüni irájü, ába ledéregeruni lun lúguchi. ⁴³ Ába laweíridun janígi súngubei láu luweírigun Búngiu.

Ladímurejaanya Jesúsu luágu louñwen
(Mt 17.22-23; Mr 9.30-32)

Sun añája lan láu luweírín janígi láu le ladügübei Jesúsu, ába laríñagun joun láni disípulugu.

⁴⁴ —Agáamba jumeí cátei le buídu. nedéregerúaba, áu le Wügüri Garaüwarügüti, jájaburugun náganiñu.

⁴⁵ Úati gunfaráanda jamáni disípulugu le laríñagubei, ladüga darúñu líña jasáminan lun cátei le, áni janúfudetiñati lun jaríñagun lun lun lafúnraanguagüdüni le laríñagubei, joun.

¿Ca weírigutimaabei?
(Mt 18.1-5; Mr 9.33-37)

⁴⁶ Ábati jagúmeserun disípulugu asígeneja jámagua luágu ca lan weírigutimaabei jádan, ⁴⁷ quei lasúbudiruni Jesúsu jasáminan, ába lanügün ában irájü lubáduagun, ⁴⁸ ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti únabugutimaabei jídan, ligía weírigutimaabei.

Le mámabei wágani, wámagiñeñein
(Mr 9.38-40)

⁴⁹ Ábati laríñagun Juan lun Jesúsu.

—Maésturu, aríjatiwa ában wügüri aságajati espíritugu wuríbatíña lídan bíri, ába wewéridiruni ladüga máma lan ában wádaangiñe.

⁵⁰ Laríñaga Jesúsu lun.

—Mewéridira jumeí, ladüga le mámabei wágani, wámagiñeñein.

Ladeínjan Jesúsu lun Jacóbo lúma Juan

⁵¹ Dan le layárafadun dan lun lanügüniwa Jesúsu siélun, ába ladügüni luweíyasun Jerusaléoun láu anígi. ⁵² Ába louñajan louñagülegu lubá, ába jóúdin lídoun ában liraúraü fulásu láni Samária lun jáluajan múna lubá, ⁵³ májatiña Samariána jerésibiruni ladüga jaríñin luágu leibuga lan Jerusaléoun. ⁵⁴ Dan le jaríñinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siéluigiñe lun lagúmuchun jáu quei meja ladügüni proféta Elías?

⁵⁵ Ábati ladígiragun Jesúsu jawágun, ába ladeínjan joun, laríñaga.

—Ibídiñeti jun luágu wuriba lan cátei le jayúmajabei. ⁵⁶ Máma níabiña, áu le Wügüri Garaüwarügüti, agünrinchaguei jabágari gürígia, níabiña asálbarei.

Ábati jóúdin lídoun ámu liraúraü fulásu.

Já yebe busénbaña jafálaruni Jesúsu
(Mt 8.19-22)

⁵⁷ Dan le luágu jamá úma, ába laríñagun ában wügüri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Laríñaga Jesúsu lun.

—Daríitiña gasígamu júyu lun jaganouñ ñi, gádibu jagía dunúru, ánjein áu le Wügüri Garaúwarügüti, úati ni jalíaba lan nabálachagüdei nichügü.

⁵⁹ Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen núguchi, buná neíme, ábame neíbugun búma.

⁶⁰ Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburí, ánjein bugúya, beíba apúrichjei ugánu luáguti larúeijan Búngiu.

⁶¹ Ábayati laríñagun ában lun.

—Nabúreme, buséntina nafálarunibu, neíba yebe ayoúragua joun ja wábiñebaña.

⁶² Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárigoún, mabuídunti lun lílaname larúeijan Búngiu.

10

Loúnajaniña Jesúsu ürüwa-wein-dísi disípulugu apúrichija

¹ Lárigiñe cátei le, ába lanúadajan Jesúsu ürüwa-wein-dísi jádaangiñe lánigu, ába loúnajaniña lubá, bián bián, lídoun sun ageíraü luma fulásu le lúnbei lídin ñi.

² Laríñaga joun.

—Inárüni, gíbetiña güriquia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni loúguatiña ñadágimeintiña. Ligía lúnti lubei jamúriajan luma Búngiu lun loúnajan ñadágimeintiña jagánaguouñ. ³ Jeíba, nouñajañadün quei mudún jádoun anímaalu gáñitiña. ⁴ Manüga jumá ságü júmagua, ni seínsu, ni geídi, meréderagun jugúyame ayánuja ni ca úma luágu üma. ⁵ Dánme le jebélurun tídoun ában múna, busújuma furúmiñe, jaríñagame. “Darángilaü joun tílana múna to.” ⁶ Ánjein añájein lubei güriquia jínsiñejabutiña lun darángilaü tídan múna tugúya, jerésibirubadün láu ugúndani, joúnbei abúsuruni lánina darángilaü. Ánjein úa jabeí güriquia jínsiñejabutiña lun darángilaü tídan múna tugúya, giríbugüda jumei abúsuruni. ⁷ Reídei jumá tídan múna tugúya to ñi lubei jerésibirúa, jou jumeíme, gurá le íchugüti jun úouga busíganu, ladüga garíchati ñadágimeinti lun lafáyeiruaaja. Masáansija jumá múna. ⁸ Dánme le jachülürün lídoun ában ageíraü le ñí lumuti jerésibirúa, joújumei le íchugüti jun, ⁹ areídaguagüda jumáña sánditiña ja ñitiña, jaríñagame joun lílana fulásu ligía. “Subúdigüdáwaali luáguti larúeijan Búngiu jun.” ¹⁰ Ánjaün achülüra lídoun ában ageíraü le ñí lumuti merésibirúniwa jumá, furíjuma lídoun buri üma, jaríñagame. ¹¹ “Ásta licáliquin jageíra le luágubei wagüdi furú wamuti lun warúfuduni jun luágu magúndan wamá láu jigáburí, áni subúdi jumei luágu subúdigüdáwaali lan luáguti larúeijan Búngiu jun.” ¹² Nariñajare jun luágu lídan lánme luwéyuri lagúseragüdüniña Búngiu gafígountiña, janárimetimaabei jabeichúniwa lílana fulásu le merésibirunbadün sügü láu jabeichún lílana ubúruge le Sodóma.

*Lílana ageíraü buri magáambaditiña
(Mt 11.20-24)*

¹³ ‘Fugiábu jugúya lílana Corazín! ¡Fugiábu jugúya lílana Betsáida! Ladüga lun jamüga ubúrugute, binárü jamüga lasáansiragua jagáburi lílana, ába jamüga jarúfuduni láu jadáuragun lúdu lúma balígi. ¹⁴ Ánjein jugúya, lídaanme luwéyuri agúseruni, weíritimaabei jabeichúniwa sügü jáu gürígia Tírona jáma Sidónna. ¹⁵ Amürüti, ubúrugute le Capernaúm, ¿jarítaguatibu luágu liñurúaba lan bíri queísi líñun siélu? Larárirawagúdüwaba bíri ünabun queísi lünabun máfiougati.

¹⁶ Ába laríñagun Jesúsu joun ürüwa-wein-dísi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati gíñe lagáambunina, áni le májati lagáambunina, májati gíñe lagáambuni Núguchi le oúnajabalina.

Jagríbudun ürüwa-wein-dísi disípulugu

¹⁷ Ába jagríbudun ürüwa-wein-dísi disípulugu jagía lídaangiñe jaweíyasun láu ugúndani, aríñageina jagía.

—Wabúreme, ásta espíritugu wuríbatiña agáamba jamútiwa dan le waságaruniña lídan bíri.

¹⁸ Laríñaga Jesúsu joun.

—Ánja, aríja numúti ligáburi leíguadun Máfia siélugiñe quei ában labíríjanouga. ¹⁹ Rújadina ubáfu jun lun jadügúragun jéwe jáma águru, masúfurirunga ni cáta, lúma lun jére lan jubáfu lueí lubáfu Máfia. ²⁰ Láu sun líra, magúndaara jumá luágu jagáambunün espíritugu, gúnda jumá luágu níjein lan jiri bürüwañu tidan lílburun Búngiu siélu.

Lagúndaarun Jesúsu

(Mt 11.25-27, 13.16-17)

²¹ Lídan óra ligía, ába labuínchagüdüni Sífiri Sándu Jesúsu láu ugúndani, ába laríñagun.

—Núguchi, le Labúremebei siélu lúma múa, iñúragüda numúti bíri, ladüga arámuda báali cátei luáguti barúeijan jaweí chútiña áu jáma furéndetiña, ába bafúraanguagüdüni joun ja louguabaña ufúrendeí queísi irájüñü. Ánja, Núguchi, ladüga ítara líña babúseeruni.

²² ‘Derége láali Núguchi sun cátei nun. Úati ni ában subúdíjabuti cáтана lan lueídügüya Núguchi, úati gíñe ni ában subúdíjabuti cáteiñein lan Núguchi nueídügüya jáma ja úntiña nabúseera nasúbudiragüdüni.

²³ Ábati ladígiragun adímureja jóunrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya, ²⁴ ladüga naríñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguti Samariána le buídubei

²⁵ Lídan ában guririguaü, ñíñein ában arúfudajati lílúrudun Moisés, abúseeruti louchaguni Jesúsu, ába lásaarun, ába laríñagun lun.

—Maésturu, ¿cábasan nadüga lun gayára lan nibíjini ibágari magúmuchaditi?

²⁶ Laríñaga Jesúsu lun.

—¿Cáteigi bürüwañubei lídan lílúrudun Moisés? ¿Ída líñágia balíijan ñi?

²⁷ Ába loúnabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

²⁸ Ábati laríñagun Jesúsu lun.

—Oúnabaadibu buídu, ánjein badüga ítara, bibíjubei ibágari magúmuchaditi.

²⁹ Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Cátañagi níbirigubaña?

³⁰ Ábati louñabuni Jesúsu, laríñaga lun.

—Ñíñein ában wügüri arágachuti Jerusaléngiñe lun ubúrugun Jericó, luágu luweíyasun ába járügüdüni jíwerutiña, ába jíwerujani sun le lúmabei ásta lanáangun, buleisei jameí, ába jígiruni jilá mémeeli. ³¹ Ába lásügürün ában jafádirin juríu lídaangiñe méme üma ligía, dan le laríjinbalin wügüri ligía, mebéresenti láu, ába lasígiruni leíbugun loubáfurugugiñe üma. ³² Sügü ligía ában jádaangiñe ladügawagun Leví ñígiñe, dan giñe le laríjini wügüri buleiseiwaali ligía, ába giñe lasígiruni leíbugun loubáfurugugiñe üma, mebéresenga giñe láu. ³³ Ábati lásügürün ában wügüri Samariána aweíyasujati lídaangiñe üma ligía, dan le laríjinbalin, ába lagúdemedagun lun. ³⁴ Ába liábin, ába lagáranijan lun bíti buri le luágubei láu aáli túma diweín, ába lagüraguni. Ába laweínrágüdüni luágu lilügün burígü, ába lanügüni tídoun jában chülüdügütiña, ába ladügüni le liyáraati lun. ³⁵ Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Toúñigibei wügüri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

³⁶ Ábati lálügüdüni Jesúsu arúfudajati ligía.

—¿Cáteiti jádaangiñe ürüwa wügüriña ja líbiribei le ueíbei líwerujoúa, lídan barítagan?

³⁷ Laríñaga lun.

—Le gudémejabubei lun.

Laríñagati Jesúsu lun.

—Ítaralá giñe badüga.

Jesúsu jábiñe Márta túma María

³⁸ Ába lasígirun Jesúsu luágu luweíyasun jáma lánigu, ába lachülürün lídoun ában liraúraü fulúsu le ñí lubei terésibirei ában würi giritu Márta, túbiñe. ³⁹ Ñíñoun ában tamúlelua Márta giritu María, ába tañúurun lubádu lugúdi Jesúsu lun tagáambuni le laríñagubei, ⁴⁰ ánjounti Márta, weíriti teténirun lun tubéresegun. Ába taríñagun Márta lun Jesúsu.

—Nabúreme, ¿mbebéresentibusan láu tígirunina namúlelua adügei sun berésegu nábugua? Aríñagabá tun lun tíderagunina.

⁴¹ Ába louñabunun Jesúsu, laríñaga tun.

—Márta, bafúuduña luágu sarágu cátei, ⁴² buídurügüti murúsun lun weígin. Anúadaja táali María lubuídun-ágei cátei le lúnbei ladügüniwa, áni úabei ní ában lun lagídaruni tueí.

11

*Larífudajani Jesúsu ayúmuraguni lun Búngiu
(Mt 6.9-15, 7.7-11)*

¹ Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába laríñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larífudajan Juan joun láni disípulugu.

² Laríñaga Jesúsu lun.

—Dánme le jayúmuragun lun Búngiu, jaríñagame ítara.

Wáguchi Búngiu le siélubei, inébewalá bíri.

Nübinlá bidáani lun barúeijan ya ubouágu, adügüwalá bugúndan ubouágu quei ladügün bugúndan siélu.

³ Rúboun fein buídurügütu woun lun wéyu le ugüñebei.

⁴ Ferúdunabeí wuríbati le adüga wamáalibeí quei ferúduna wamániña ja adügübaña wuríbati woun.

Mígira báwa lun wáburujan lídoun wuríbani, dísegüdarügü báwa lueí.

⁵ Aríñagati giñe Jesúsu joun.

—Níjan ában jémpulu jun. lídin jamúga ában jádaangiñe líbiñe ában lumáda amídi árieubu, ába laríñagun lun. “Numáda, furédeibá úrúwa fein nun,

⁶ ladüga sun líña lachülürün ában numáda núbiñoun áni úati ni cáta núma lun níchugun lun.” ⁷ Ába jamúgati loúnabun le ában múnadagiñe, laríñaga jamúga.

“Mebéreseja bána, darúnaali nubéneri, áni rouñjadina jáu sun nisáanigu, siñáti násaarun íchiga ni cáta bun.” ⁸ Naríñaguña jun luágu íbini lan jamúga másaarun lan íchigoun lun ladüga lumáda lan, lásaaruña jamúga íchigoun lun lueí lasígirun ebéreseja lun.

⁹ Aríñagatina lubeíti jun. Jamúriaja, ábame íchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun.

¹⁰ Ladüga sun le amúriajati, íbíjati, le áluajati, daríti, le adaúnjati luágu béna, junrénwati lun.

¹¹ ¿Gayáraabei funági líchugun ában úguchili jádaangiñe dübü lun liraü dan le lamúriajan fein lúma? ¿o líchugun lan ában jéwe lun dan le lamúriajan úduraü?

¹² ¿o líchugun lan ában águru lun dan le lamúriajan gañeín? ¹³ Gíchigadijadün ligía cátei buíti joun jirájüñü láu sun juríban, ígúbumeti líchigei Júguchi Búngiu le siélubei Sífiri Sándu joun ja amúriajati!

*Laríñawagün luágu nýein lan lubáfu Máfia lúma Jesúsu
(Mt 12.22-30; Mr 3.19-27)*

¹⁴ Níñein Jesúsu aságara ában espíritu wuríbati lueí ában wügüri le madímuregüdün láalibeí yebe espíritu ligía, dánti le láfuridunbei espíritu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le. ¹⁵ Níñanu giñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügüri le espíritugu wuríbatiña.

¹⁶ Jíbiri, lun jóuchaguni, ába jamúriajan miláguru lúma lun larífuduni luágu lúmagiñe lan Búngiu liábin lubáfu. ¹⁷ Queíti subúdi láani le jarítageubei, ába laríñagun joun.

—Furúmieguarügü arúejani le afánreinraguti lun jageíndagun jámagua, lagünrinchaguba, ában giñe familia fánreinguatiña ladüga wuribu, jagünrinchaguba giñe. ¹⁸ Anjein giñe njein lubei fánreinguaü jádan Máfia jáma lánigu, ¿ida lubági ladúrarun lubáfu? Naríñagunbalin le, ladüga jaríñagun luágu láu lan lubáfu Máfia naságaja espíritugu wuribatiña ja ebélagüdübaña Máfia guánarügü jádoun gürígia, ¹⁹ áni anjein itara líña lubei, ¿cági íchugubei ubáfu joun ja jánigu jugúya lun jaságajan espíritugu wuribatiña, Máfia ódi Búngiu? Láu líra, jagía guánarügü arúfuda jamúti luágu buléigua jumá. ²⁰ Le inárünibeí, láu lubáfu Búngiu naságaja espíritugu wuribatiña, áni arúfuda lumúti líra luágu chülüjali lan larúejan Búngiu lídoun fulásu le.

²¹ ‘Ába wügüri jéreti, dan le aráanseñu lan, toúnigi lúban buídu, sun le lúbiñebei chóuruti. ²² Anjein ñúbin ában jéretimaati lueí ába lásiiraguni, lagídaruboun sun lárumate to uáguboun leménigida lueí, ábame lanügüni le labúseerun, ába lafánreinraguni jáma lumádagu.

²³ ‘Le mámabeí númagiñe, náganiñein, le míderagun lumútina, güríngua lumúti le nadügübei.

*Espíritu wuríbati le agíribudúbei
(Mt 12.43-45)*

²⁴ Ába laríñagun Jesúsu.

—Dan le láfuridun ában espíritu wuríbati lídaangiñe ában gürígia, eíbugañajádügü líña lídan buri fulásu mábeiti áluaja leméraagun, dánti le madári láani, ába laríñagun lúnguarügü. “Nagíribudayá tídoun núbun to ñígiñe lubei náfurida.” ²⁵ Dánti le lagíribudun, ába ladáriruni gürígia buga ligía quei ában múna to buídawaru, aráanserúa. ²⁶ Ábati lídin, ába liábin jáu sedü espíritugu wuribatimaatiña lueí, ába jebélerun agánawa lídan gürígia ligía, wuribatimaajaliti le gádaanbalin wügüri ligía lueí buga furúmíñe.

Ugúndani le tímatimaati

²⁷ Dan le niján lubei Jesúsu aríñagei cátei le, ába tagúaragun ában würi jádaangiñe gürígia, taríñaga.

—¡Fuleiseiwatu jiñáru to agúriajabalibu, fuleiseiwatu to atágüdübalibu!

²⁸ Ába laríñagun Jesúsu.

—¡Fuleiseiwatimaatiña ja agáambubalin le lubeíbei Búngiu áni abájüda jameí!

Amúriajatiña gürígia wuribatiña miláguru lúma Jesúsu

(Mt 12.38-42; Mr 8.12)

²⁹ Añája méme gürígia óundaragua geyégu láu Jesúsu, ába lagúmeserun adímureja, laríñaga.

—Wuribatiña gürígia ja lánina dan le, áni jamúriaja miláguru núma lun narúfuduni luágu Búngiu lan óunajabalina, wel, míchugúnbei ámu seíni joun lueí le luáguti meja proféta Jonás. ³⁰ Ítara quei meja le asúseredubei lun Jonás ában seíni joun ja aganoúbaña Nínive luágu Búngiu lan óunajabalin, itara lúba giñe le lúnbei lasúseredun nun, áu le Wügüri Garaúwarügüti, ligíaba ában seíni joun gürígia ja lánina dan le luágu Búngiu lan óunajabalina. ³¹ Dánme le lidáani agúseruni, dánme le lagúseragüdúniña Búngiu gürígia ja lánina dan le, ábame tásaarun lurúeite Súru lun tasíadiruniña, ladüga tugúya, ñúbintu lídaangiñe lidíse-ágei uboú lun tagáambuni lichú láu Salomón, áu, weírigutimaatina sügü láu Salomón áni májatün jagáambunina. ³² Lídan mémeme agúseruni ligía, ábame giñe jásaarun já meja aganoúbaña ubúругu Nínive, ábame jasiadiruniña ja lánina

dan le, ladüga sáansiguati jagáburi Nínivena lárigiñe lapúríchijani Jonás ugánu le láni Búngiu joun, áni áu ában le weíriguti sügü láu Jonás, áni májatün lun jagáambunina.

Lilámpun úgubu
(Mt 5.15, 6.22-23)

Ába lasígirun Jesúsu aríñaga.

33 —Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoundadun joun ja ebélurutiña. ³⁴ Ítara líña águu quei ában lámpu lun úgubu, ánjein buídu lubei bágu, aríja ligía luágun cátei lánina Búngiu, camá jamuga jarúgoundabei giñe láu sun búgubu, áni buídubei giñe sun bigáburi. Ánjein sándi lubei bágu, aríja ligía luágun cátei lánina ubou, camá jamuga lídaanbei lubúriga sun búgubu, wuríbabei giñe bigáburi. ³⁵ Toúnigibá lun mabúrigadun lan bilámpun. ³⁶ Ánjein jarúgounga lubei láu sun búgubu, úaga ni murúsun lubúriga, baríjubei sun cátei furáangu quei dan le durúngu líña lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés
(Mt 23.1-36; Mr 12.38-40; Lc 20.45-47)

37 Dan le lagúmchunbei ladímurejan Jesúsu, ába lamísurajani ában fariséo eíga lúbifiñe. Ába lebélorun Jesúsu, ába lañúrun luágu dábulu. ³⁸ Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eígini. ³⁹ Ába laríñagun Wabúreme Jesúsu lun.

—Jugúya fariséogu ragá jumuti wéru lúma asíedu bougudigiñe libíti, múnadagiñe jíbíti, wíyetün, buin jíña láu luweinamu águu lúma sarágu luwúyeri wuríbani. ⁴⁰ ¡Deré tagáambun jugúya le! ¿Ibídifiñeti jun luágu le lan adügübalin le bougudigiñebei, ligía lan giñe adügübalin le múnadagiñebei? ⁴¹ Jarúma jumá múnadagiñe jíbíti láu jíchugun joun gudémetiña, ítara lúba jarúma jumá giñe bougudigiñe jíbíti.

⁴² ¡Fugiábugu jugúya fariséogu! Adúgatün díisi fánreinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madügüntün gásu láu ísuruni lúma línsiñejabu Búngiu. Ligía lúnbei jadügüni, mígirunga jumeíme jadügüni le ában.

⁴³ ¡Fugiábugu jugúya fariséogu! Buséntün járügüdüni ubáraü le jabára ja weírigutimaabaña tídan jilígílisin, busén jugúya lun labúsúrún jun láu sarágu inébesei úmada.

⁴⁴ ¡Fugiábugu jugúya fariséogu, biángua tigíbul, ladüga ítara jíña quei umúajaü le marijinti, sügü jagía gürígia ligíbuagugiñe ibídíñoun joun.

⁴⁵ Ábati loúnabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa giñetia dan le baríñaguni le.

⁴⁶ Ába laríñagun Jesúsu.

—¡Fugiábugu giñe jugúya, arúfudajatiña lilúrudun Moisés! Jíchigei lilúrudun Búngiu queisi ában anügüni jürüti joun ámu, áni jugúya, májatün janügün ni murúsun lídaangiñe.

⁴⁷ ¡Fugiábugu jugúya!, ladüga rújumuti dübü arítaguagüleme luágu jamúaja profétagu já meja jáfaragubaña binádu jagübürigu. ⁴⁸ Láu líra, arúfuda jumúti luágu gúnda jumá láu le jadügübei binádu jagübürigu, jagía áfaragubaliña, jugúya wéndegüda jumúti jamúaja.

49 ‘Ligía laríñagunbei meja Búngiu láu lichú láu. “Nóunajaba profétagu jáma apóstolugu joun, ábame jáfaraguniña jíbiri jilágubei, eibaaja jamáñame jíbiri.”
50 Ligía lagúseragüdúbaña lubei Búngiu gürígia ja lánina dan le luágu játa profétagu ja áfarawagúbaña lúmagiñe ladügün ubou, 51 lúmagiñe líta Abél lúmoun líta Zacarías le jáfarubei labádinagua latárú túma témpulu. Ligía nariñagunbei jun luágu lagúseragüdúbaña lan Búngiu gürígia ja lánina dan le luágu joutwegun profétagu.

52 ‘¡Fugíábugu jugúya arúfudajatiña lilúrudun Moisés!, ladüga ragü jumaali ligélen lubéneri subúdi, mebélurun jíña, mígirun jugúya lun jebélurun ja busénbaña jebélurun.

53 Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani 54 lun jaríjin ánjaña adárra lidúnrun.

12

Larúfudajan Jesúsu luágu mabuídun lan biángua lan igíbu

1 Ába jóundaragun sarágu mílu gürígia, gíbetiña darí lun jachúinragun jóungua. Ába lagúmeserun Jesúsu aríñaga jóuntima láni disípulugu.

—Tóunigi jumátia jawei fariséogu, ítara líña jagáburi quei ísi—biánguañein jagíbu. 2 Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan. 3 Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanágangiñe béna, lagúarajóuba tábulugugiñe múna.

Ca lan uei lúnbei janúfudewa lan (Mt 10.28-31)

4 ‘Nariñajare jun, numádagu, moún lumuti janúfudedun jawei gürígia ja gabáfubaña lun jáfarunún jilágubei, lárigiñe líra siñá jadügün ámu cátei jun. 5 Nariñagaali jun ca lan uei lúnbei janúfudedun. Janúfude jumá luei Búngiu le gabáfugilibei lun loúnajanun juwáni máfiougatin lárigiñe lagídaruni jibágari. Lueilá janúfudeda.

6 ‘¿Ma alúgurúatiña seíngü dunúru luágu bián gáwanún? Láu sun mebégi jamá sarágu, mabúlieiduntí Búngiu ní ában jádaangiñe. 7 Ánjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégitün sügü jáu sarágu dunúru ligíbugiñe Búngiu, áni loúnigiruhádün.

Ja meyédagunbaña luágu Jesúsu jagíbugiñe gürígia (Mt 10.32-33, 12.32, 10.19-20)

8 ‘Nariñajare jun luágu sun lan ja aríñagubaña jagíbugiñe gürígia luágu nánigu jamá, nariñaguba giñe luágu nánigu jamá jagíbugiñe láni Búngiu ánjeligu. 9 Ánjaña ja aríñagubaña jagíbugiñe gürígia luágu máma jamá nánigu, nariñaguba giñe jagíbugiñe láni Búngiu ánjeligu luágu máma jamá nánigu.

10 ‘Furúmieguarügü le aríñaguti cátei wuríbati nuágu, áu le Wügüri Garaúwarügüti, gayáraati ferúdunawa lan, ánjein le anábaguti Sífiri Sándu, siñátí ferúdunawa lan.

11 ‘Dánme le janügün ligíbugiñoun lúrudu lun jagúserun, o jagíbugiñoun lan tábutigu jalígilisin juríu, madíjerida jumá luágu cába lan jóunaba o cába lan

jaríñaga, ¹² dánme le lachülürün óra lun jadímurejan, larúfudubei Sífiri Sándu le lúnbei jaríñaguni jun.

Ewéridijani luei leténirún sarágu lun irísini

¹³ Ába lariñagun ában jádaangiñe gürigia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

¹⁴ Lariñaga Jesúsu lun.

—¿Cági íchubalina quei agúseragüdüti o quei afánreinjati jídan?

¹⁵ Aríñagati giñe ítara.

—Tóunigigua jumá júngua luei luweínamu águu, ladüga máma lueigiñe líbe lúmati gürigia labágarida sarágu dan.

¹⁶ Ábati líchuguni jémpulu le joun, lariñaga.

—Ñíñein méja ában wügüri rísiti, ába líchugun lichári alúbajoúni buíti. ¹⁷ Ábati lariñagun rísiti le lúnguarügü. “¿Cábasán funa nadüga? Ibídiñeti nun jalíaba lan nareídei sun le nalúbajabei.” ¹⁸ Ába lasáminarun, ába lariñagun. “Subúdi náali cába lan nadüga, nagünrinchaguaru sun náni lágei líla nádü, ábame nadügün ámu weínamutimaatu, ábame nareíduni nalúbajan lúma sun le númabei tídan.

¹⁹ Ábameti nariñagun núniwagua. Buíti dan bun, níjein sarágu cátei areídañu búma lun sarágu dan, eméraaguabá, jóuba, gurába, gúndaabá.” ²⁰ Lariñaga Búngiu lun. “Wügüri deré tagáambun, bouwe árieibu le, sun le búmabei areídañu, ¿cábasan un lerédera?” ²¹ Ítara líña lasúseredun lun gürigia le adámuridaguagdüti irísini lánina ubou le lúngua, ába leréderun gudémeñu lídan cátei le luágoti Búngiu, líña Jesúsu.

Tóunigi lumútiña Búngiu lirájüñü

(Mt 6.25-34)

²² Ába lariñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ní tuágu anáanguni to lúnboun jadáürünun. ²³ Gebégitimaati íbágarí sügü láu eígini, gebégi úgubu sügü táu anáanguni. ²⁴ Aríja jumá joun dunúru. mábunaguntiña, malúbajan, mágei ligía jeígin, láu sun líra, jóügüda lumútiña Búngiu. ¡Gebégitimaatün sügü jáu dunúru! ²⁵ Úati ní ában jádaangiñe gayáraati líchugun lánwoun libágarí láu sun luweírin lidíjeri luágu. ²⁶ Ánjein lubeíti siñá lubei jadügüni le míbebei, ¿ca uágu jadíjerida luágu buri líbiri cátei?

²⁷ ‘Aríja jumá ída líña lan labouóchun buri fulúri. mawádigimariti, májúchagun ligía lanáangun, áni láu sun líra, quei nariñaguni jun, ní urúei Salomón láu sun luwéndegun, mawéndedunti quei ában fulúri. ²⁸ Ánjeinti ítara líña lubei ladáüraguagdüni Búngiu jíduru, le níjeinbei ugúñe, jarúga lagudúña, ¡ladáüraguagüdatimabadün, lougua taffínen jugúya le! ²⁹ Madíjerida jumá lubeíti luágu ní cáta, ní luágu cába lan jeíga, ní luágu cába lan játa. ³⁰ Ladüga lirájüñü ubou le, lárigiñanu buri cátei le, ánjein jugúya, níjein ában Júguchi le subúdíjabubei lun sun jemégeirun. ³¹ Áluaja jumá lun jesériwidun lun furúmiñe, ábame líchuguni sun le jemégeirubei jun.

Irísini siélu

(Mt 6.19-21)

³² ‘Manúfude jumá, nirájüñü, láu sun míbe jumá, gúndaati Búngiu lun líchugun ában ubáraü jun lídan larúeijan. ³³ Alúgura jumei le júmati, jíchigeime

lebégi joun gudémetiña, láu líra, jadüğüñoun lágei seínsu to maweyadaditu, irisini siélu le magúmuchaditi, le ñi lubei siña lan jebélurun jíwerutiña anügei jírisin, úa jagía jamútiri ñi lun jeígini. ³⁴ Naríñagubalin le jun ladüga le ñi lumuti jírisin, ñiñoun giñe janígi.

Aráanseñu jumá, agúrabağa

³⁵ 'Aráanseñu jumá lubá nagíribudun siéluğiñe, durúngu jilámpun. ³⁶ Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun. ³⁷ Buídubei dan joun músu ja ladárirubaña jayúbudiri agágudúañu dan le lachülürün, ninárün jáu, iyúbudiri meme ligía laráanseruba, ábame lañúragüdúniña luágu dábulá, ábame lesériwiduni jeígin joun. ³⁸ Íbini amídi áriebu lan lachülúra o lubá lan larúgan, ánjaña ladárra agágudúañu, buídubei dan joun músu jagía. ³⁹ Subúdi jumei luágu lun lan jamúga subúdi láni tabúreme múna cába lan óra lachülúra jíweruti íweruja, leréderuña jamúga agágudúañu, mígirunti jamúga lun tadárarún lúban lun líwerujoún lumégegun. ⁴⁰ Jugúya, aráanseñu jumá giñe, ladüga lídaanme magáradajan jumá ligíame nagíribudun, áu le Wügúri Garaúwarügüti, ubouágun.

Músu le úarabei, lúma le múaraanbei (Mt 24.45-51)

⁴¹ Ábati lálügüdüni Pédro Jesúsú, laríñaga lun.

—Nabúreme, ¿wouñrügü bíchigei jémpulu le ódi joun súngubei?

⁴² Laríñaga Wabúreme Jesúsú lun.

—Lun furúmieguaarügü oúnigiruti úarati, gunfaráanda ligía, le lígirubei liyúbudiri lun laríjin jáu títana lúban, lun leígagüdúniña lídan dan. ⁴³ Buídubei dan lun músu le ladárirubei liyúbudiri agúnfulira láu luwádigimari dan le lachülürün. ⁴⁴ Ninárün jáu, luágu líchugubei lan liyúbudiri lun ligía lan aríja láu sun le libjubei. ⁴⁵ Anjein arítağa músu ligía luágu lügilí lan liábin liyúbudiri, ábame lagúmeserun ouseraña jíbiri músu ja lábugiñebaña laríajaan wuríba, leréderame eíga, áta, abácharuada, ⁴⁶ ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírin-ágei abeíchuni luágu, lasíadireime lun lasúfuriruni le jasúfurirubei ja múaraanbaña, máfiougati.

⁴⁷ 'Músu le subúdi jábubei lun ca lan labúseerubei liyúbudiri áni maráanserunti, mabájüdüñleí, labeichúba sarágu. ⁴⁸ Anjeinti músu le ibídiñeti lun, ába ladügün cátei lé buri lúnti labeichún lueígiñe, mawéiribeí labeichún. Le únti líchugúa gíbeti, gíbebei amúriajóuti lúmagiñe, le gíbeti ígirúti lábugiñe laríajaan, gíbetimaabei amúriajóuti lúmagiñe.

Jesúsú lébunabei fánreinguaü (Mt 10.34-36)

⁴⁹ 'Láu niábin ubouágun, ñibeí fánreinguaü ubouágu queísi wátu geméti. ¡Busénjadina jamúga durúnguaali lan wátu ligía! ⁵⁰ Lúnti nasúfurirun le gumúti, ¡meménija nanígi lagúmuchun! ⁵¹ ¿Jarítaguatúnsan luágu barú nán meja darángilaü númagua dan le niábinbei ubouágun? Manügütina darángilaü, fánreinguaü nanügübei. Jafánreinraguba ja mafiñebaña nuágu jáma ja afíñebaña nuágu, ⁵² lúmagiñe guetó, seíngüga tídan ában múna, jafánreinraguba úrüwa jawei bíama, bíama jawei úrüwa, nueígiñe. ⁵³ Lagáraguba úguchili luágun líraü, isáani luágun úguchili, úguchuru tuágun tiraü, isáani tuágun túguchu, ímenidi tuágun ágürü, ágürü tuágun ímenidi.

*Liseíni buri dan**(Mt 16.1-4; Mr 8.11-13)*⁵⁴ Ariñagati giñe Jesúsu joun gürígia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda. ⁵⁵ Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda. ⁵⁶ ¡Biángua tigibu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubei luáguti ligáburi dan le gádaanbalün jun?

*Jóucha jumá lun lídan jumá dan jáma jáganiñu**(Mt 5.25-26)*

⁵⁷ ‘¿Ca uágu siñá lubei jasúbudiruni cátei le úraguabei júngua? ⁵⁸ Anjein agúaragüda ában gürígia buágu, ába bídin lúma ligíbugiñe lúrudu, jóuchabá baráanseragun búngua lúma luágu úma lubáragiñe jachülürün, manügün lámugabu ligíbugiñoun agúseragüdüti, luei ledéregerunibu agúseragüdüti lun polisía, ábame ládarunibu furísunrugun. ⁵⁹ Naríñajare bun luágu máfuridunbadibu lan ñigiñe dari bafáyeiruni lagúmujoún bigáwanün.

13*Ca lan uágu lúnti lubei lasáansirün igáburi*

¹ Lídoun méja dan ligía, ába jayábin gürígia abájüdagua lun Jesúsu jawágu wügüríña Galiléana ja láfaragubaña Piláto úara jáma anímaalu ja áfarawagúbaña lun adáragagüdüni lun Búngiu. ² Ába lariñagun Jesúsu joun.

—¿Jarítaguatünsan luágu ladüga lan luweírin jafígoun Galiléana jagía sügü jáu ja jíbiri lílana jageíra lasúseredunbei le joun? ³ Máma lueígiñe líra, láu sun líra, naríñajare jun luágu ánjein lan masáansirun jumá jigáburi, jóüweguba giñe sun jugúya. ⁴ Ángi díisi-widü jagüra ja ouwegubaña dan le láburujanbei wáyelesi le Siloébei jawágoun— ¿jarítaguatün luágu weíritima lan jadúnrun sügü jáu ja jíbiri ja aganoubaña Jerusalén? ⁵ Máma líña giñe, láu sun líra, naríñajare jun luágu ánjein lan masáansirun jumá jigáburi, jóüweguba giñe sun jugúya.

*Jémpulu tuáguti tídibu ígo to mñinboun*⁶ Ábati labájüdaguni Jesúsu jémpulu le joun, lariñaga.

—Ñiñein ában wügüri, ganádiriti ában tídibu wéwe to ígo, ába lídin aríja ánjein gín tubei, madáriti ni cáta tuágu. ⁷ Ábati lariñagun lun le ouñigirubalin ichári. “Aríjabásan, ürúwaali irúmu gabügürügua níabin áluaja ígo tuágu ídibu to, madáritina. Chaünboun, ¿cába uágu terédera ñi luágu ni cáta?” ⁸ Ába loúnabuni le ouñigirubalin ichári, ába lariñagun. “Niyúbudiri, ígirayaboún irúmu le, nañúludagüdali múa táu, awoúja áume táu. ⁹ Fágua tagíindun ítara, ánjoun magíindun, ábame tánchugün.”

Lareidaguagüdünnun Jesúsu ában würi sebúti tanágan lídan wéyu le eméraguagülei

¹⁰ Luágu ában wéyu le eméraguagülei, ñiñein Jesúsu arúfudaja tídan jalígílinin juríu, ¹¹ ñiñounti ában würi, díisi-widü irúmu táu láu ában espíritu wuríbatu tuágu, ígira láaru espíritu ligía lemúñu, siñá tásururun ni murúsun. ¹² Dan le larijinbarun Jesúsu, ába lagúarun tun, ába lariñaga tun.

—Würi, areidaguadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu. ¹⁴ Ábati lagañidun tábuti ligílisi ladúga lareidaguagüdünun Jesúsu lídan wéyu le eméraaguagülei, ába lariñagun joun gürígia ja ñibaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jiábin lun lagáranijoún jun, máma lídan wéyu le eméraaguagülei.

¹⁵ Ába lariñagun Wabúreme Jesúsu lun.

—¡Biángua tigíbu jugúya le!, ¿ma farára jumúti sun jugúya jilügün bágasu o jilügün lan burigú lun janügün áta dúna lídan wéyu le eméraaguagülei? ¹⁶ Würi to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿moún lumuti funági yebe lun tareidawaguagüdün lídan wéyu le eméraaguagülei?

¹⁷ Dan le lariñagunbalin Jesúsu cáte le, ába nibúsigarigua jamá sun láganiñu, ánjaña sun jíbiri gürígia, gúndaatiña láu cáte le buri weíriguti le ladügübei Jesúsu.

Jémpulu luáguti tla mostása

(Mt 13.31-32; Mr 4.30-32)

¹⁸ Ábati lariñagun Jesúsu.

—¿Ída líña ligáburu larúeijan Búngiu? ¿ca cáte le úmounbei gayára lan níchuguni? ¹⁹ Ítara líña quei ában liraúraü tla mostása le lábunubei ában wügüri lichárirugu, ába labouúchun, ába laweíridun darí lun liábin lun ábanme lan tídibu wéwe weíríti, darí lun jadügün dunúru jádibu luágu tuburébu.

Jémpulu luáguti ísi

(Mt 13.33)

²⁰ Ábaya lariñagun Jesúsu.

—¿Ca cáte le úmounbei gayára lan níchuguni larúeijan Búngiu? ²¹ Ítara líña quei ísi le tíchugubei ában würi tídoun ürúwa líburu fulúaarú, ába terésirun sùngubei.

Béna le bürüraübei

(Mt 7.13-14, 21-23)

²² Ába lasígiruni Jesúsu luweíyasun Jerusaléoun, arúfudajeina ligía lídan buri sun aüdü lúma lirájüñü fulásu le ídaangiñebei lásügüra. ²³ Ába lariñagun ában wügüri lun Jesúsu.

—Nabúreme, míbetiñásan ja lúnbaña jasálbarun?

Ába loúnabun Jesúsu, ába lariñagun.

²⁴ —Bürüraüti lubéneri siélu, jóucha jumá lun gayáraabei lan jebélurun lídaangiñe, ladúga quei nariñaguni jun, sarágujaba busúentiña jebélurun, siñábei. ²⁵ Láriangiñe ladáuruni tabúreme múna lubéneri, jugúya le bougudíbei jadaúnjaba luágu béna, jariñagame. “Wabúreme, darába béna wabá.” Ábame loúnabunün, lariñagame jun. “Íbídiñetün nun, íbídiñe gíñe nun jalíana jumá.” ²⁶ Ábame ti jagúmeserun aríñaga. “Jóujúadiwa, gurá wagía búma, arúfudaja amürü woun úmadarugu.” ²⁷ Ábame ti loúnabunün, lariñagame. “Aríñaga náali jun luágu íbídiñe jumá nun, íbídiñe nun jalíana jumá. Díse jumá nuei, sun jugúya le adügübei wuríbaní.” ²⁸ Lígiaba jayájuajan, acúnrijame jári dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa bougudin. ²⁹ Jayábiba gürígia lueígiñe oubaü le ñígiñe lubei láfuara wéyu lúma lueígiñe le ñígiñe lubei lálüda, lueígiñe núru lúma

lueígiñe suédi lun jañúurun eíga lídan larúeijan Búngiu. ³⁰ Ñíbañati jádaangiñe ja agúmujoúnibaña guetó, jagiaba furúmiñetiña, jámeti furúmiñetiña guetó, jagiaba agúmujoúni.

Layájun Jesúsu jawágu lílana Jerusalén
(Mt 23.37-39)

³¹ Lídan méme wéyu ligía, ába jayábin fariséogu, ába jariñagun lun Jesúsu. —Beíba yágiñe, ladüga busénti Heródes láfarunibu jilágubei.

³² Ába lariñagun joun.

—Jeíba, jariñagame lun wügüri bíbuti ligía. “Ugúñe lúma jarúga naságajan espíritu wuriñetiña jádaangiñe güriñe, areídaguagüda áu sánditiña, larígiñe jarúga, lásurun nuwádigimari. ³³ Lúnti nasígiruni nuweíyasun ugúñe, jarúga, lúma larígiñe jarúga, ladüga máma lúnti lafarúniwa ában proféta jilágubei bougudi luei Jerusalén.

³⁴ Ába layájun Jesúsu jawágu lílana Jerusalén ítara.

—¡O jugúya Jerusaléna! Afaragua jumáaña profétagu, chügua jugúya dübü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natóunigirunün quei tatoúnigiruniña gáyu tirájüñü lábugiñe tarúna, májatün! ³⁵ Ígira láadün Búngiu, áni nariñajare jun luágu maríjindügüya jumáadina lan daríme lachülürün dan lun jariñagun. “Biníwati le ñübinbei lídan líri Wabúreme.”

14

Lareídaguagüdüñ Jesúsu ában wügüri lújali laruña lúma liyáda

¹ Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja ñíbaña, jariaguñein Jesúsu. ² Ñíñein giñe ában wügüri láu sándi le ílu, ³ ábati lálügüdüniña Jesúsu arúfudajatiña lilúrudun Moisés jáma fariséogu, lariñaga joun.

—¿Gayaraati lareídawaguagüdüñ ában wügüri lídan wéyu le eméraaguagülei ódi siñáti?

⁴ Ába jeréderun maníñu. Ábati lanügüni Jesúsu sánditi ligía, ába lareídaguagüdüni, ába lariñagun lun lun lídin. ⁵ Ába lariñagun joun fariséogu.

—Furúmieguarügü jádaangiñe, ánjein eíguada lilügün bágasu o lilügün lan burígü lídoun ában wélu lídan wéyu le eméraaguagülei, laságarubei ñígiñe furése.

⁶ Maríñagun jáña ni cáta.

Ja amísurajoúbaña lídoun maríei

⁷ Dan le laríjini Jesúsu janúadajani amísurajoútiña ubáraü buri le jounbei ja weírigubaña, ába lariñagun joun.

⁸ —Dánme le bamísurajoún lídoun ában fédu lánina maríei, máluajabei lubuidun-ágei ubáraü, ñübin líñein ábanya amísurajoúti weírigutimáati buei,

⁹ ábame liábin le amísurajabalün, lariñagame bun. “Rúbei bubára lun wügüri le.” Ábame bídin láu busíganu añúura lídan lúnabun-ágei ubáraü. ¹⁰ Dánme le bamísurajoún lídoun ában fédu, ñurúba lídan lúnabun-ágei ubáraü, lun dánme lan le liábin le amísurajabalíbu, lariñagame bun. “Numáda, sügüba lídoun ában ubáraü weírigutimaati.” Ítara lúba berésibirun inébesei jagíbugiñe sun ja ñúnbaña luágu dábula. ¹¹ Le anáanguti lúngua weíri, lúnabudúba, le ünabuti lanáangun lúngua, weíríbei lanügün.

¹² Aríñagati giñe lun wügüri le amísurajabalín.

—Dánme le bíhugun ában adíneruni o fédu, mamísuraja báña bumádagu, ni bamúlenu, ni bíbugañanu, ni jíbiri bidújeñu, ni bubésinanigu ja rísitiña, ladüga jamísurajabadibu gíñe, bíbjubati bafáyeiruaja. ¹³ Dánme le badügün fédu, amísuraja báña gudémetiña, siñáguatiña úngua, danímaatiña, maríjintiña. ¹⁴ Ábame gúnda ban, ladüga siñáti jafáyeirunibu, bíbjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe otúweni.

Jémpulu luáguti oúnwenbun adíneruni

¹⁵ Dan le lagáambunbalin ában jádaangiñe ja ñúnbaña luágu dábula cátei le, ába laríñagun lun Jesúsu.

—Gúndaabaña gürígia ja eígiabaña lídan larúeijan Búngiu.

¹⁶ Ábati laríñagun Jesúsu lun.

—Ñíñein ában wügürí, íchuguti ában oúnwenbun adíneruni, ába loúnajan amísuraja sarágu gürígia. ¹⁷ Óra lun adíneruni, aba loúnajani lumúsun aríñaga joun amísurajotútiña. “Queímoun, aráanseeli sun cátei.” ¹⁸ Súngubei, ába jaríñagun luágu siñá lan jóudin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.” ¹⁹ Laríñaga ában. “Agáñijaadina seíngü féru bágasu lánina wadágimanu, neíbuga ouchaña, adügabá fuleísei nun, ferúduna bána, siñáti nídin.” ²⁰ Laríñagaya ában. “Sun líña namárieidun, ligía siñá lubei nídin.” ²¹ Dan le lagíríbudun músu, ába labájúdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun úma le ubúrugubei, banúgañame gudémetiña, siñáguatiña úngua, danímaatiña, jáma maríjintiña.” ²² Lárígiñe ladügüni, ába laríñagun músu lun liyúbudiri. “Nabúreme, adüga náali le bubeíbei nun, níjein mémegua ubáraü.” ²³ Ábati laríñagun iyúbudiri lun músu ligía. “Beíba lídan sun úma bougudin luei ubúrugu, lúma sun fulásu geyégua láu, ábame bafósuruniña sun ja badárirun lun jayábin lídoun nufédun, buin támuga núban. ²⁴ Ladüga nariñajare jun luágu úabei lan ni ában jádaangiñe ja namísurajabaña eígiti lídan nadíneragüdün.”

Lúnti lígirúniwa sun cátei lun lánibeí lan Crístu

²⁵ Sarágu jáña gürígia afálaruti Jesúsu, ába lagáragun, ába laríñagun joun.

²⁶ —Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúlenu, o lítunu, o libágari guánarügü, sügü náu. ²⁷ Le gíñe májabei lasúfurirun nueígiñe queísigubeirügü jamúga ában wügürí le anügüti lugúruwan, siñáti náni lan díspulu. ²⁸ Ánjein arítagua ában jádaangiñe ladügün ában wáyelesi, ¿ma funági lañúuruba furúmiñe asáminara átiríbei lan lagástarun lun laríjini ánjein gabáfu lubeí lun lagúmuchuni? ²⁹ Ladüga ánjein líchiga ébuu, lárígiñeme lásiñerei wadágimanu agúmucha, jéjerajaba ja aríjubalin láu, ³⁰ jaríñagame. “Guméseiti wügürí le ában wadágimanu, siñá lumuti agúmucha.” ³¹ Ánjein lawúríjaba lubeí ában urúei lúma ámu urúei, ¿ma funági ñurúti furúmiñe lun lasámínarun ánjein gayáraabei lubeí lageíndagun jáu díisi mílu súdeara lúma le jáubei wein mílu? ³² Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúríbijan jamá, lun jebélurun lídoun idíli. ³³ Ítara líña lubeíti, furúmieguarügü jádaangiñe le mígirunti sun le lúmabei lun lafálarunina, siñáti nánibeí lan díspulu.

*Dan le leféridiruni sálu lubásuan
(Mt 5.13; Mr 9.50)*

³⁴ ‘Buíti sálu, ánjein leféridira lubásuan, ¿cábagi un ju lan? ³⁵ Mabuídunjali ni lun lábunawagún nádü lídan, ni lun lidérebugu múa, fíwarügaalime. Agáamba jumána, jugúya le garígeirugubei lun jagáambun.

15

Jémpulu tuáguti mudún to eféridiruboun (Mt 18.10-14)

¹ Luágu ában wéyu, ába jayárafadun sarágu agúburajatiña liseínsuna gumádi jáma gafígountiña lun Jesúsu lun jagáambuni. ² Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cátei le, jariñaga.

—Wügüri le, resíbi lumútiña gafígountiña, jou ligía jáma.

³ Ábati líchuguni Jesúsu jémpulu le joun, lariñaga.

⁴ —¿Ca jídaangiñe, lun jamúga galügüniña lan san mudún, leféridira ában jídaangiñe, mígirun lubáña gádürü-wein-díisi-néfu ñi, lubárúa, lun lídin áluajoun mudún to eféridiruboun? ⁵ Dan le ladárirunun, ába lanügünun légewagu láu ugúndani. ⁶ Dan le lachülürün lúbiñoun, ába loúndaruniña lumádagu jáma lubésinanigu, lariñaga joun. “Gúnda jumá úara núma, ladüga darína nilügün mudún tó yebe eféridiruboun nuei.” ⁷ Nariñajare jun luágu itara méme líña weírítima lan ugúndani siélu luágu ában gafígounti le asáansiruti luríban ligáburi lun lafálaruni Búngiu, sügü láu jawágu gádürü-wein-díisi-néfu gürígia richágutiña ligíbugiñe Búngiu ja memégeirunbaña jasáansiruni jagáburi.

Jémpulu luáguti seínsu le efédirubei

⁸ ‘¿Ca würi to níjeinti jamúga díisi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buídu darí lun tadáriruni? ⁹ Dan le tadáriruni, ába toúndaruniña tumádagu jáma tubésinanigu, tariñaga joun. “Gúnda jumá núma, ladüga darína seínsu lé yebe neféridirubei.” ¹⁰ Nariñajare jun luágu itara líña lan giñe ugúndani jádan láni Búngiu ánjeligu luágu ában gafígounti le asáansiraguti luríban ligáburi lun lafálaruni Búngiu.

Jémpulu luáguti irájü le acháragadubei

¹¹ Rúlumuti giñe Jesúsu jémpulu le joun, lariñaga.

—Ñíñein méja ában wügüri jáu bián lirájüñü. ¹² Ába lariñagun le amúleñein lun lúguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei. ¹³ Málüti lueígiñe, ába loúndaruni amúleñein sun lumégegün, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti. ¹⁴ Dan le gumújali sun liseínsun, ába ladágarun ában lemégeirun eígini lídan fulásu ligía, ába ladáiragun lúngua lídan ában oúnwenbun mégei. ¹⁵ Ábati lídin áluaja wadágimanu lúma ában lílana fulásu ligía, ába loúnajani wügüri ligía oúnigiraña lilügüniña büíruju. ¹⁶ Weíríti líláma darí lun lawámadun lun lun leígini jeígin büíruju, míchugúnwati lun. ¹⁷ Ábati lasáminarun, lariñaga lúnguarügü. “¡Sarágu ñadágimeintiña lúbiñe núguchi ígiraguati eígini joun, áu ya, óuwe niláma! ¹⁸ Nagíribuda le ñíjin lubei núguchi, nariñagame lun. Núguchi, afígounjaadina ligíbugiñe Búngiu lúma bigíbugiñe. ¹⁹ Madúnaali lun nanáangun nungua quei biraü, barübana quei ában jídaangiñe ñadágimeintiña búma.” ²⁰ Ába lárügüdün úma lun lagíribudun lúbiñoun lúguchi.

“Dísegi líña, ába laríjini úguchili irájü le, ába lagúdemedun lun. Ába leíbaagun lubároun, ába louburuni, ába lachúuruni. ²¹ Ábati lariñagun isáani lun. “Núguchi, affigounjaadina ligíbugiñe Búngiu lúma bigíbugiñe, madúnaali lun nanáangun nungua quei biraü.” ²² Ába lariñagun úguchili joun lumúsuniña. “Sagájumoun tubúidun-ágei anáanguni furése, daúguagüda jumeí. Daújuma giñe ában bágü luágu lújabu túma geídi luágu lugúdi. ²³ Áfara jumeí liraüraü bágasu le dibúnetimaabei. ¡Weíga, eféduja wagíamel, ²⁴ ladüga niraü le, rúnaali yebe quei jiláali áni chülúguaya, féridijalí yebe áni dariwama.” Ába jagúmeserun eféduja.

²⁵ “Súnti buga dan le, níjeinti buga íbugañaü áraabu. Dánti le lagíribudun, dan le lachülürün tubádun múna, ába lagaámbuni áfaruni lúma abínajani. ²⁶ Ábati lagúarun lun ában jádaangiñe músu, ába lálügüduni ca lan susérebei. ²⁷ Ába lariñagun lun. “Chülújalí bamúlen, áfaragúdala búguchi liraüraü bágasu le dibúnetimaabei, ladüga lachülürün láu magádiei.” ²⁸ Ába lagañidun íbugañaü, májaali lebélorun. Ába láfuridun lúguchi, ába layúmragun lun lun lebélorun. ²⁹ Ába lariñagun lun lúguchi. “Subúdi bumúti luágu seríwíjadina lan bun sarágu dan, madúraagunganeí le bubeíbei ní ában weíyaasu, míchugidibu ní ában liraüraü gábara nun lun nefédujan jáma numádagu. ³⁰ Guetóti, láu liábin biraü le, le achágarubalin biseínsun jáma wúrífña wuríbatífña, jáfaragúdabá bágasu le dibúnetimaabei!” ³¹ Ábati lariñagun úguchili lun. “Niraü, amürü númañadibu súnwandan, sun le náni, báni. ³² Ánjein guetó, lúnti wadügün fédu lúma lun wagúndaarun ladüga bamúlen lé yebe rúwamaalíbei quei jiláali, chülúguaya, féridijalí yebe, áni dariwama.”

16

Jémpulu luáguti oúnigiruti le múaraanbei

¹ Aríñagati giñe Jesúsu joun láni disípulugu.

—Níñein méja ában iyúbudiri rísiti, níñein giñe ában loúniri lumégegungun, ába jayábin aríñaga lun luágu lachágaruñein lan oúnigiruti ligía lirísini. ² Ábati lagúarun iyúbudiri lun, ába lariñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladüga masígijadibu oúnigirei nílagu.” ³ Ábati leréderun oúnigiruti ligía asáminara, lariñaga lúnguarügü. “¿Cábatí nadüga guetó lárigiñe gidála lan niyúbudiri wadágimanu nueí? Méretina lun nadügün wadágimanu jürüti, áni nibúsigaritina lun namúriaajan. ⁴ Subúdi náali cába lan nadüga lun ní jama erésibirutina jábiñe dánme mawádigimarijadina.” ⁵ Ába loúnajan jawágu ja adúweirubalin liyúbudiri lun jayábin lun ában ában. Ába lálügüdüni le furúmiñeti, lariñaga lun. “¿Átiri badúweiruni niyúbudiri?” ⁶ Ába lariñagun lun. “Dúwei numúti san barín agülei.” Ábati lariñagun oúnigiruti ligía lun. “Nuján bigáradan, ñurúba furése, badügame ában luágurügü dimí-san.” ⁷ Lárigiñe, ábaya lálügüdün ában, lariñaga lun. “Ángi amürü, ¿átiri badúweijan?” Lariñaga lun. “San ságü túrígu.” Lariñagati lun. “Nuján bigáradan, adügabá ában luágurügü gádürü-wein.” ⁸ Ába lasúbudiruni iyúbudiri luágu chu lan láu oúnigiruti ligía lídan ligáburi ladügüni cátei.

Ligía lariñagun Jesúsu.

—Gúrigia wuríbatífña ja lánina ubou le, chúti jáu lídan jáni jáma ámu sügü jáu ja lánina larúgounga, ja lirájüñü Búngiu. ⁹ Siñáti leménigidún luágu írísini lánina

ubou le, arifñagatina lubeíti jun lun jayúsuruni jirisin lun jadügün buíti, lun dánme lan le lagúmuchun jibágari, jerésibirúba tidan múna to magúmuchaditu, yágüta siélu.

¹⁰ ‘Le adügüti buíti láu le murúsunrügüti, ladügüba giñe buíti láu le gibeti, le madügünti buíti láu le murúsunrügüti, madügünbei giñe buíti láu le gibeti.

¹¹ Ánjaün lubeíti madügün buíti láu buri irisini le láni ubou le, le uágubei siñá lan leménigidún, çcábago afiñera juágu lun ledéregun irisini inárüniti lábugiñe jariaajan? ¹² Ánjaüti madügün buíti láu jemégen ámu, çcábago ichigei le jáni guánarügü jun?

¹³ ‘Siñáti lesériwidun ában güriña joun bián iyúbudirigu, ladüga liyereeguduba ában lun, línsiñedame le ában lun, o úarabei lan lun ában, lanügeime le ában quei ni cáta. Siñáti lesériwidúniwa lun Búngiu lúma lun seínsu.

¹⁴ Agáambagu jáña fariséogu lun sun cátei le, ába jéjerajan láu Jesúsu, ladüga jínsiñe lan seínsu joun. ¹⁵ Ábati lariñagun Jesúsu joun.

—Jugúya güriña ja arúfudagubaña jóungua quei buítiña jagíbugiñe güriña, ánjeinti Búngiu, subúdi lumútu janígi luágu wuriba tan. Le cátei le janügübei güriña quei weiriti cátei, iyereeguti lun Búngiu.

Lúrudu lúma larúeijan Búngiu

¹⁶ Níjein meja lilúrudun Moisés lúma jarúfudajan profétagu dari lúmoun lidáani Juan. Lúmagiñe dan ligía, lapúrichijoún ugánu buíti le luágu larúeijan Búngiu, sun güriña jóuchatiña lun jebélurun lídoun.

¹⁷ ‘Méreenguntimaati lun lagúmuchagun siélu lúma ubou, máma lun magúnfulirun lan liñúraü-ágei dimúrei lídaangiñe lilúrudun Búngiu.

Larúfudajan Jesúsu luágu ígiraguni (Mt 19.1-12; Mr 10.1-12)

¹⁸ ‘Ánjoun lígira ában wügüri lúmari, lagámarida ámu, ladügüñein figou le giríbei adultériu, le giñe agámariduti ában würi to ígiraguaaru, ladügüña giñe adultériu.

Wügüri le rísibe, lúma Lázaro

¹⁹ Aríñagati giñe Jesúsu.

—Ñíñein méja ában wügüri rísiti, anánguni finutu to wéndegutu ladáuraguboun, ságüja wéyu ladáagun fédu láu sarágu wéndegu. ²⁰ Níñein giñe ában gudémeti giríti Lázaro, sun lúra láu gumeín, ²¹ lañúurati buri múarugu tubéneri lúban rísiti ligía áluga leígini lífe eígini le eíguaduti lueígiñe lidábulan rísiti. Weiriti lasúfurirun dari lun lawánduni jayábin oúnli éjelujei lugúmeín.

²² Luágu ában wéyu, ába loúnwen fugiábu ligía, ába janügüni ánjeligu lúmoun Abrahám, le ñíjin jabeí jiláaña buítiña, ába giñe loúnwen rísiti, ába lábunajoún.

²³ Dan le lasúfurirurña lan rísiti ligía lídan fulásu le ñíjin jabeí jiláaña wuribatiña, ába liñúruri lariñin, ában lariñini Abrahám dísegiñe, láu Lázaro lúma. ²⁴ Ábati lagúaragun, lariñaga. “¡Núguchi Abrahám, gudémená bun! Oúnajabeí Lázaro lun ladúdúragüdüni ligibu lújabu láu dúna, ñúbin lámuga éderei tuágu niñéñe, ladüga nasúfurirurña sarágu lídan wátu geméti le.” ²⁵ Ába lariñagun Abrahám lun. “Niraü, jaritaguabá luágu buídu lán meja dan bun lídan bibágari, ánjein lun Lázaro, wuríbatí meja dan. Guetó, buíti dan lun ya, bugúya asúfurira.

²⁶ Bougudigiñe lueí sun le, níjein ában baráangu afánreinraguáwa júma, ja jamúga buséntiña jóudin yágiñe lun ñíjin, siñáti, ni ja ñibaña, siñáti jayábin

ñájoun.” ²⁷ Ábati laríñagun rísiti. “Amúriajatina búma, Núguchi Abrahám, lun bouñajani Lázaro lúbiñe núguchi, ²⁸ añájein seíngü namúlenu ñi, lun ladímurejan joun, mayábin jamámuga giñe lídoun fulásu lánina asúfuriruni le.” ²⁹ Ába laríñagun Abrahám lun. “Níjein le labürüjabei Moisés jáma profétagu jáma ñi, jadüga jamá gásu láu!” ³⁰ Ába louñabun rísiti, ába laríñagun. “Binárün, núguchi Abrahám, láu sun líra, ánjein ñüdüñ ában jádaangiñe jiláañá adímureja joun, lasáansiraguba jagáburí.” ³¹ Laríñaga Abrahám lun. “Ánjein mája jabei jadügün gásu láu le laríñagubei Moisés jáma profétagu, mafíñebañá giñe láu sun lásaarun ában jádaangiñe jiláañá lun lídin adímureja joun.”

17

Luríban lafígoungüdüniwa ában gürígia
(Mt 18.6-7, 21-22; Mr 9.42)

¹ Ába laríñagun Jesúsu joun láni disípulugu.

—Súnwandan níjeinbei lán buri cátei afigougüdüti gürígia, jáni fugiábu gürígia le afigougüdüti ámu! ² Buítimaati jamúga lun lun lagurün baránajoun láu ában dübü le lamúlija awási güaráñu luágu ligína sügü láu lafígoungüdüñ ában jádaangiñe ja ñübürigiñabaña lídan jafíñen nuágu. ³ Ítara líña lubeiti toúnigi jumá.

‘Ánjein adüga bamúlen o bíbugaña wuríbani bun, wéridibeí, ánjein asáansiragua ligáburí, ferúdunabeí, ⁴ ánjein adüga wuríbani bun sédü weíyaasu lídan ában wéyu, sédü weíyaasu liábin aríñaga bun luágu madügündügüya láali lan, lúnti ferúduna báni.

Lubáfu afíñeni

⁵ Ába jaríñagun apóstolugu lun Jesúsu.

—Wabúreme, rúba lánwoun wafíñen.

⁶ Ábati laríñagun Wabúreme Jesúsu joun.

—Lun jamúga níjein lan murúsuraü afíñeni jídan—gayáraati jamúga ñúrauraü lan queisi ában tíla mostása—gayáraati jamúga jaríñagun tun tídibu wéwe to. “Gidába yágiñe láu sun bílagüle, beiba ájúcha baránaja”, áni lasúsereduña jamúga.

Wesériwidun lun Búngiu máma ában cátei lun lateíngiruniwa luágu

⁷ ‘Ánjein níjein lubeí lumúsun ában jádaangiñe, dan le lagíribudun áraabugiñe lárigiñe lawouñan o louñigirun lan anímaalu, ¿laríñaguba funági lun músu ligía. “Belúba, ñurúba eíga”? ⁸ Uá, aríñagarügübei lun. “Aráansebei neígin, aráanseñu amürüme lun beténirun nun sun anája lan eíga lúma áta, lárigiñeme, gayáraajalíme beígin lúma bátun.” ⁹ ¿Teínqui lumúti funági iyúbudiri músu luágu ladügüni le lubeíbei lun? Uá. ¹⁰ Jugüya giñéti, dánme lásurun jadügüni le uágubei laríñaga Búngiu jun lun jadügüni, lúnti jaríñagun. “Músu mouñtiña wagía, ladüga lé rügüñein lúnbei wadügüni wadüga.”

Lareídagugüdüñ Jesúsu dísi gawágutiña gumeín

¹¹ Lídan lasígiruni Jesúsu luweiyasun Jerusaléoun, ába lásügürün labádinaguagiñe Samária lúma Galiléa. ¹² Dan le lachülürünbei lídan ában liraúraü fulásu, ába jayábin dísi wügüriña gawágutiña gumeín, lubároun. Ába jeréderun díse lueí, ¹³ ába jagúaragun lun ítara.

—jesúsu, Maésturu, gudéme wamá bun!

14 Dan le laríjinbaliña Jesúsu, ába laríñagun joun.

—Jeíba arúfudagua júngua joun fádirigu.

Dánti le idirina jamá, ába jareídagun. 15 Níñeinti ában jádaangiñe, dan le laríjinbei luágu areidaguaali lan, ába lagíribudun le ñíjin lubei Jesúsu, adímurejeina buíti luágu Búngiu láu umálali jéreti. 16 Ába lájuduragun dagá ligíbu múarugu lun líchuguni eteingiruni lun. Áni Samariána wügüri ligía. 17 Ábati laríñagun Jesúsu.

—¿Ma dísiñanu areidagutiña? ¿Jagáñagi ja jíbiri néfu? 18 ¿Niján gubeírügü teréncha le agíribuda eteingirei Búngiu?

19 Ábati laríñagun lun wügüri ligía.

—Sarába, beiba, areidaguaadibu ladüga bafíñen.

*Ída lúba lan ligáburí liábin larúeijan Búngiu
(Mt 24.23-28, 36-41)*

20 Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, maríjinbei, 21 maríñawagúnbei. “Niján”, o “Níngitan”, ladüga lídan linárün cátei, níjeinjali larúeijan Búngiu jagánagua.

22 Ábati laríñagun joun láni disípulugu.

—Lachülürüba dan lun meménija lánme janígi lun júmabadina lan, íbini luágurügü ában wéyu, masúseredunbei lídan dan ligía. 23 Laríñawagúba jun. “Niján Cristu ya”, o “Níngitan yágüta.” Iyéenibei, mídin jumá járigi, mafálarun jumáñame. 24 Ladüga itara quei laríjin ában labírijaniga lueígiñe ában louba siélu lun luágun le ában, itara lúba dánme le nagíribudun ubouágun, áu le Wügüri Garaüwarügüti. 25 Lúnti nasúfurirun sarágu furúmiñe, mebéresen jagíame gürígia ja lánina dan le náu. 26 Quei meja lasúseredun lídan lidáani Noé, itara lúba giñe lasúseredun lídan búrime wéyu le niábíngüle, áu le Wügüri Garaüwarügüti. 27 Dán meja ligía, jerédera meja gürígia eíga, áta, agámarida, íchajaña jarájüñü lun jamárieidun darí wéyu le lebéllurun Noé tídoungünein to árca. Ába liábin gúnran, ába jañáradagun súngebei. 28 Ítara lúba giñe quei lasúseredun lídan lidáani Lot. jerédera gürígia eíga, áta, agáñija, alúguraja, ábunagua, adáagua múna. 29 Dan le láfuridunbei Lot ubúrugugiñe Sodóma, ába láburujan wátu geméti lúma súfuru siéluigiñe, ába láfaraguniña súngebei. 30 Ítara lúba dánme le niábin, áu le Wügüri Garaüwarügüti.

31 Lídaanme wéyu ligía, le gürígia le bougudibei tueí lúban, ánjein níjein lubei lumégegün múnada, mebéluralá aságarei. Le gürígia le áraabubei lídan óra ligía, magíribudalá lúbiñoun. 32 Jaritagua jumá luágu le asúseredubei tun lúmari Lot. 33 Le áluguti leséfuruni libágari ya ubouágu, leféridirubei íbágari magúmchaditi, le ánjabei leféridiruni libágari ya ubouágu, nueígiñe, libíjuba íbágari magúmchaditi.

34 Nariñajare jun luágu árieibu lánme ligía, ñíbaña bíama gürígia arúmuga tídan ában meme gabána, lanügüba ában jádaangiñe, ígirúame le ában según jafíñen nuágu. 35 Níbaña bíama wúriña amúlija lídan ában, tanügüba ában jádaangiñe, ígirúame to ában. 36 Níbaña bíama wügüriña áraabu, lanügüba ában jádaangiñe, ígirúame le ában.

37 Dan le jagáambunbalin cátei le, ába jálügüdüni, jaríñaga lun.

—¿Jalíabasan lasúsereda buri cátei le, Wabúreme?

Lariñaga joun.

—Le ñi lumuti lúgubu jiláali, ñíba jóúndaragua wadúbi.

18

Jémpulu tuáguti würi to jiláali túmari, lúma agúseragüdüti

¹ Ába labájüdagun Jesúsu ában jémpulu joun, lun larífudajan joun luágu lúnti lan jayúmuragun lun Búngiu súnwandan, láu gurásu. ² Lariñaga joun.

—Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában gürígia. ³ Ñíñoun gíñe ában würi lídan fulásu ligía, jilá meja túmari, ságü wéyu tídin lúmoun agúseragüdüti le lun líchuguni tirícha tun luágu ában tuwúribun lúma tágani. ⁴ Luágu sarágu dan, májati yebe leténirun tun, lárigiñe, ába lariñagun lúnguarügü. “Láu sun minében lan Búngiu nun, mebéresen áu láu ni ában, ⁵ quei nuján méme lan würi to ásüdagüda nichügü, neséfuraaru, jebé lámuga tiábin, gumú líñein nugúraasun.”

⁶ Ába lariñagun Jesúsu.

—Niján lariñagubei agúseragüdüti le wuribabei, ⁷ gúbumeti leséfuraña Búngiu lánigu ja ayúmuragutiña lun wéyuagu, áriebu. ¿Lübei lubá líderaguniña? ⁸ Uá, madárasanbei. Láu sun le, dánme le nagíribudun, áu le Wügüri Garaüwarügüti, ubouágun, ¿nadáriruba funásan affíñeni jádan gürígia ja yábaña, nuágu?

Jémpulu luáguti fariséo lúma agúburajati liseínsuna gumádi

⁹ Rúyati Jesúsu ában jémpulu joun ja jarítaguabaña luágu richágua jamá ligibugiñe Búngiu, janügaña ámu gürígia quei ni cáta. Lariñaga.

¹⁰ —Ñüdütiña bián wügüriña témpulurugu ayúmuragua lun Búngiu, ában fariséo, ában agúburajati liseínsuna gumádi. ¹¹ Le fariséo, rára líña layúmuragun, lariñaga. “Búngiu, teínqui numútibu luágu mítaran nan quei jíbiri gürígia—jíwerutiña, wuríbatíña, salúfuritiña, mítaraantina gíñe quei agúburajati liseínsuna gumádi le. ¹² Ayúnaratina bián weíyaasu lídan dimáasu lun nagúnfulirun búma, rúnumuti gíñe díisi gáwanün lídaangiñe ságü fiádürü le ebélurubei nun, bun.”

¹³ Ánjeinti agúburajati liseínsuna gumádi, ába leréderun díse, mabúseerunti ni lun líñúrui laríjin siélun, le luweírín lünabun lanáangun lúngua. Abotújarügülei laníguagu láu igárigu, lariñaga. “¡Búngiu, gudémená bun, nugúya le gafígounti!”

¹⁴ Nariñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladüga le anáanguti lúngua weíri, ñúraübei lanügün, ánjein le ñúraübei lanáangun lúngua, weírubei lanügün.

Labíniruniña Jesúsu irájüñü

(Mt 19.13-15; Mr 10.13-16)

¹⁵ Anaajouatiña gíñe irájüñü lun Jesúsu lun lagúrurun jawágu, dan le jaríjinbalin disípulugu cátei le, ába jadeínjan joun ja anáajabaliña irájüñü. ¹⁶ Ába lariñagun Jesúsu joun lun jasígirun anáajaña jarájüñü lun, ába lariñagun joun lánigu.

—Ígira jumá lun jayábin irájüñü nun, mewéridija jumá lueí, ladüga ja ítarabaña quei jagía, jagía lílanabaña larúeijan Búngiu. ¹⁷ Ninárün jáu luágu le lan merésibirun lumúti larúeijan Búngiu láu affíñeni jarúmati líbe jaffíñen irájüñü, mebélubei lídoun.

Layánujan ában wügüri rísiti lúma Jesúsu

(Mt 19.16-30; Mr 10.17-31)

18 Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadügüni lun gayára lan nibjini ibágari le magúmchaditi?

19 Laríñaga Jesúsu lun.

—¿Ca uágu bariñaga nun “buíti”? Ában rügüñein buíti, Búngiu. 20 Subúdi bumúti gumádi. Maganouábá túma würi gámaritu, máfarajabá, míwerujabá, mayéjabá luágu ni ában, inébe jamá bagübürigu bun.

21 Laríñaga wügüri ligía lun.

—Gúnfulitina láu sun le lúmagiñe ñúraügidina.

22 Lídán le lagáambunbalin Jesúsu cátei le, ába laríñagun lun.

—Mégeigili ában cátei lun badügüni. alúgurabei sun le búmabei, ábame bíchuguni lebégi joun gudémetiña, ábame garísín ban siélu. Ábame bagíribudun, ábame bafálarunina.

23 Dan le lagáambunbalin wügüri ligía cátei le, ába lírudagun, ladüga rísiti buídu. 24 Dan le laríjini Jesúsu lírudagun, ába laríñagun.

—jénreenguti lun jebélurun rísitiña lídoun larúeijan Búngiu!

25 Méreenguntimaati lun lásügürün ában caméyu lídaangiñe lujúyun ában agúsa sügü láu lebélorun ában rísiti lídoun larúeijan Búngiu.

26 Ába jariñagun ja agáambubalin.

—¿Cáteiti gayáraabei lasálbarun?

27 Laríñaga Jesúsu joun.

—Le jásiñerubei güriña adüga, gayára lumúti Búngiu, ladüga úati ni cáta siñáti lun Búngiu.

28 Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

29 Ába laríñagun Jesúsu joun.

—Nínárün jáu luágu furúmieguarügü lan le ígiruti lúban, o lagübürigu, o líbugañanu, o lamúleno, o lúmari, o lirájüñü luágu larúeijan Búngiu, 30 libjubatíma sarágu weíyaasu lougiñe lídan ubou le, ibíjaleíme ibágari magúmchaditi yágüta siélu.

*Ladímurejaanya Jesúsu luágu louñwen
(Mt 20.17-19; Mr 10.32-34)*

31 Ába lagúarun Jesúsu joun láni dúusu apóstolugu jábugua, ába laríñagun joun.

—Weíbuga Jerusalén guetó, le ñiba lubei lagúnfulira sun le jabürüjabei profétagu nuágu, áu le Wügüri Garaüwarügüti. 32 Jedéregerubadina joun ja mámabaña juríu, jéjerajaba náu, anába jamáname, suégua. 33 Jabeichubadina, lárígíñeme, ábame jáfarunina jilágubei, áni násaaruba lídaangiñe ouweni luágu lürüwan wéyu lúnya nabágaridun.

34 Úati gunfaráanda jamá ni cáta lídaangiñe cátei le, ibídiñegubeíti joun ca lan uágu ladímureja joun, darúguati laníchigu cátei le laríñagubei, joun.

*Lareídaguagüdün Jesúsu ában Jericóna marjinti
(Mt 20.29-34; Mr 10.46-52)*

35 Dan le achülüreinaali Jesúsu ubúrugin Jericó, ñíñein ában marjinti ñun láru üma amúriaja. 36 Dan le lagáambunbei marjinti ligía já süüjan sarágu güriña, ába lálügüdajan ca lan susébebei. 37 Ába jariñagun lun luágu niján lan Jesúsu Nazarétna ásügüra ñígiñe. 38 Ábati lagúaragun, laríñaga.

—jjesúsu, le ladügawagun Davíd, gudémená bun!

39 Ja lubá lubáabaña, ába jadeínjan lun lun lámanichun, ligiatima lagúaragun. —¡Ladügawagun Davíd, gudémená bun!

40 Ábati laráramagun Jesúsu, ába loúnajan anügei. Dan le yaráfaali lun, ába laríñagun lun.

41 —¿Ca babúseerubei nadügün bun?

Ába laríñagun lun.

—Nabúreme, buséntina naríjin.

42 Laríñaga Jesúsu lun.

—¡lbjabei baríjin! Areídaguaadibu ladüga baffíñen.

43 Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürígia ja aríjubalin cátei le, ába gíñe jadímurejan buíti luágu Búngiu.

19

Jesúsu lúma Zaquéo

1 Ábati lebélorun Jesúsu fulásurugun Jericó, ába lásügürün ubúrugugiñe.

2 Níñein ában wügüri risiti, gíriti Zaquéo, jábuti agúburajatiña liseínsuna gumádi. 3 Buséntiti Zaquéo laríjini Jesúsu lun lasúbudiruni, siñáti laríjini ladüga ñúrauraüti lúgubu, áni gíbetiña gürígia. 4 Lúnti gayára lan laríjini, ába leíbaagun ubáraü, ába laweínrun tuágun ában tídibu wéwe sicómoro yaráfa lun le ñígiñeba lubei lásügüra Jesúsu. 5 Dan le lásügürün Jesúsu ñígiñe, ába laríjin íñun, ába laríñagun lun Zaquéo.

—Zaquéo, raríba furése, ladüga lúnti neréderun búbiñe ugúñe.

6 Ábati larárirun Zaquéo furése, ába lerésibiruni Jesúsu lúbiñe láu ugúndani.

7 Dánti le jaríjini jíbiri gürígia cátei le, ába jagúmeserun adímureja luágu lídin Jesúsu erédera lúbiñe ában gaffigounti. 8 Ábati laráramun Zaquéo, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubei lueí ában gürígia láu eyéeraguni, náguuyügüdüba gádürü weíyaasu sügü láu lun.

9 Laríñaga Jesúsu lun.

—Sálbañu jáña tílana múna to ugúñe, ladügawagun gíñe Abrahám amürü.

10 Ligía niábinbei uboúagu, áu le Wügüri Garaüwarügüti, lun náluajaniña lúma asálbaraña já yebe féridijañabaña.

Jémpulu luáguti dísi murúsun seínsu

11 Dan le añája lubei gürígia agáambajei laríñaguni buri Jesúsu cátei le, ába labájüdagun ában jémpulu joun, ladüga ayárafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía. 12 Ábati laríñagun joun.

—Níñein ában wügüri íñugutiña lidújeñu, leíbugati wügüri ligía lídoun ámu fulásu díseti lun líchugúniwa lurúeiteme lageira, ábayame lagiribudun. 13 Lubáragiñe láfuridun, ába loúnajan jawágu dísi jádaangiñe lumúsuníña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumeí seínsu le darí nagiribudun.” 14 Queíti liyéreegunbei wügüri ligía joun lílana fulásu, ába jóúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme. 15 Láu sun líra, resíbivati lun urúeime, ába lagiribudun lageíroun. Dan le lachúlürün, ába loúnajan

jawágu lumúsuníña já buga únbaña líchigei seínsu lun lasúbudiruni átiriñein lan lagáñirun cáda ában. ¹⁶ Ába liábin le furúmiñeti, ába lariñagun. “Nabúreme, gáñeitina dísi weíyaasu ligíbuagun biseínsun.” ¹⁷ Lariñaga urúei lun. “Buíti, ában músu buíti bugúya. Quei úara bubei lídan le murúsunrügüti, níchigaadibu agúmadija lídan dísi fulásu.” ¹⁸ Ábaya liábin ában, ába lariñagun. “Nabúreme, gáñeitina seíngü weíyaasu ligíbuagun biseínsun.” ¹⁹ Ába gíñe lariñagun lun. “Bagúmadija lídan seíngü fulásu.” ²⁰ Ábati liábin ában, ába lariñagun. “Nabúreme, niján biseínsun, areída numúti tídan ában músue ladüga nanúfude buei, ²¹ ladüga ában ban wügüri derégüdati, reídeitibu láu cátei le mawádigimaritibu luágu, alúbaja amürü le ñi lumuti mábunagun ban.” ²² Ábati lariñagun urúei lun. “Músu wuríbati, luágu guánarügü berérun nagúseragüdábu. Quei subúdi bubálin luágu ában nan wügüri derégüdati, luágu reídei nan láu cátei le mawádigimaritina luágu, alúbaja áu le ñi lumuti mábunagun nan, ²³ ¿cáti uágu míchububalin niseínsun bántúrugun lun jamúga lagánwoundun dan le nagíríbudun?” ²⁴ Ába lariñagun joun ja ñibaña. “Gidájumei seínsu luei, rújumei lun le dísiabei lúma.” ²⁵ Ába jariñagun lun. “Wabúreme, níjeinga dísi seínsu lúma.” ²⁶ Ába lariñagun urúei. “Nariñajare jun luágu sun lan le adügati buíti láu le lúmabei, libíjuba lánwoun, ánjein le madügüti ni cáta buíti láu murúsun le lúmabei, lagídarúaba murúsun ligia luei. ²⁷ Játi náганиñu, já yebe mabúseerúnbaña lun urúei nan, barújumaña ñájoun, áfaragua jumáña jílágubei nigíbugiñe.”

*Lebélurun Jesúsu Jerusaléoun
(Mt 21.1-11; Mr 11.1-11; Jn 12.12-19)*

²⁸ Lárigiñe lariñaguni Jesúsu cátei le, ába lasígiruni luweíyasun Jerusaléoun jáu lánigu, ligia jabá jabá. ²⁹ Dan le chülü mémeeli lídoun buri fulásu le Betfajé lúma Betánia, yaráfa lun wübü le giríbei Olívos, ³⁰ ába lariñagun joun biáma jádaangiñe láni dísi pulugu.

—Jeíba lídan liraúraü fulásu le wagíbugiñebei, dánme le jachülürün ñi, jadáriruba ában burígü güráñu le maweinrüngili. Jafáragadeíme, ábame janügüni ñájoun. ³¹ Ánjaün álügüdüwa ca lan uágu jafáragadei, jariñagame luágu busén láani Jabúreme.

³² Ába jóudin, ába jadáriruni ítara quei lariñaguni Jesúsu joun. ³³ Dánti le añája lubei afáragadei burígü, ába jálügüdüniña labúriña, jariñaga joun.

—¿Ca uágu jafáragadei burígü le?

³⁴ Ába jóunabuniña.

—Ladüga busén láani Wabúreme.

³⁵ Ábati janügüni lun Jesúsu, ába jíchugunun janáangun lanágawagun burígü, ába jaweinragüdüni Jesúsu luágun. ³⁶ Quei awáansereina lan Jesúsu, átulejeina jamóun janáangun luágu úma lubá. ³⁷ Dan le jayárafadun lun larárirün wübü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigin Búngiu, luágu buri milágu ru le jarijibe. ³⁸ Jariñaga.

—¡Biníwati urúei le ñübinbei lídan líri Wabúreme Búngiu! ¡Níjein ñurúguau siélu, lúma uweírigu lun Búngiu!

³⁹ Ábati jariñagun fariséogu ja ñibaña jádan gürígia lun.

—Maésturu, aríñagabá joun bánígu lun jámanichun.

⁴⁰ Lariñaga Jesúsu joun.

—Ninárün jáu luágu ánjaña lan ámanichaja ja, lagúarajaba lán buri dübü nuágu.

⁴¹ Dan le layárafadun lun Jerusalén, dan le laríjini ubúrugú ligía, ába layájuajan jawágu lílana fulásu ligía, lariñaga.

⁴² —¡Lun jamúga gunfaráanda jumáni uguñe luágu áu lan ùmabei lun ñurúguau joun, buiti jamúga! Májatün. ⁴³ Ligía lachülürüba lubei wéyu buri wuríbatí jun, jadügame jáganiñu ában bariéru geyégua láu jubúrugute lun siñá lan jáfuridun ñigiñe, ábame jageíndagun júma lídaangiñe sun oubaü.

⁴⁴ Jagünrinchagubei jufúlasun le gumúti, mígirunbaña ni ában dübü ligíbuagu dübü, jáfarúaba sun jugúya, ladüga mebéresen jumá láu óra le liábinbei Búngiu asálbaraün.

Larúmadagüdünnun Jesúsu témpulu
(Mt 21.12-17; Mr 11.15-19; Jn 2.13-22)

⁴⁵ Ábati lebélorun Jesúsu témpulurugun, ába laságaruniña ja alúgurajabaña jáma ja agáñijabaña ñi. ⁴⁶ Lariñaga joun.

—Lariñajare tidan Lerérun Búngiu. “Núban, fulásu le ñi lubei gayára lan jayúmuragun güriúa nun”, ánejin jugúya, barújumaaru quei jában jíwerutiña.

⁴⁷ Ságü buri wéyu larúfudajan Jesúsu témpulurugu, añájeti jábutigu jafádirigun juríu jáma arúfudajatiña lílúrudun Moisés, jáma giñe lábutigu fulásu áluaja ída lúba lan jáfaruni jílagubei, ⁴⁸ madáritiña ída lúba lan jadügüni ladüga weíri lan jóurabajúniwa sun güriúa lun jagáambuni lerérun.

20

Lirícha Jesúsu témpulurugu
(Mt 21.23-27; Mr 11.27-33)

¹ Luágu ában wéyu, dan le témpuluruguñein lubei Jesúsu arúfudaja joun güriúa, apúrichijeí ugánu luáguti asálbaruni, ligía jayábin jábutigu jafádirigun juríu, jáma arúfudajatiña lílúrudun Moisés, jáma wüğüriña weirigutiña lídan jafíñen juríu, ² ába jariñagun lun.

—Ariñagabei woun ca lan biríchabei lun badügüni cátei le. ¿Ca íchugubalin ubáfu le bun?

³ Ábati lariñagun Jesúsu joun.

—Nálügüdáadün giñe ában cátei, oúnaba jumána. ⁴ ¿Ca oúnajabalin Juan abásteragüdaja? ¿Loúnajan Búngiu ódi jóúnajan wüğüriña?

⁵ Ába jagúmeserun ariñaga jámagua.

—¿Cába waríñaga? Ánjawa ariñaga luágu loúnajan lan Búngiu, lariñagame woun ca lan uágu mafíñerun wabei lun. ⁶ Ánjawa ariñaga luágu jóúnajan lan wüğüriña, jachámuraguba güriúa dübü wawágun, ladüga choúru jamúti luágu proféta lán meja Juan.

⁷ Ábati jariñagun luágu ibidiñe lan joun ca lán meja oúnajabalin Juan abásteragüdaja. ⁸ Ábati lariñagun Jesúsu joun.

—Mariñagun nubei giñe jun ca lan áu ubáfu nadügei buri cátei le.

Jémpulu jawágu ti ñadágimeintiña wuríbatíña
(Mt 21.33-44; Mr 12.1-11)

⁹ Ába lagúmeserun Jesúsu adímureja joun güriúa, ába labájüdagun ában úraga le gibebei laníchigu, joun. Niján úraga ligía.

—Ñíñein meja ában wügüri ábunaguti beibei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan. ¹⁰ Dan le lachúlürün lidáani alúbajani, ába loúnajan ában lumúsun anúgei lufánran, ába jabúleiseiruni ñadágimeintiña músu ligía, ába jóúnajani lárigoún, míchugunga ni cáta lun. ¹¹ Ábayati loúnajan ábanya músu, ába giñe janábuni, buleisei jameí, oúnaja jameí, míchugunga ni cáta lun. ¹² Ábaya loúnajan ábanya, ábaya giñe jabúleiseiruni, ába jabúguni ñígiñe.

¹³ Ába lariñagun labúreme ichári lúnguarügü. “¿Cábasán funa nadúga? Nounajaali niraú le jínsiñebei nun, dánme le jaríjini, fágua inébebei joun.” Ába loúnajani. ¹⁴ Dan le jaríjinalin, ába jariñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.” ¹⁵ Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, lariñaga.

—¿Cábati ladúga labúreme ichári? ¹⁶ Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jariñagun.

—¡Masúsereda lámuga ítara!

¹⁷ Ába lariaguniña Jesúsu, ába lariñagun joun.

—¿Cáti lílabei le bürüñubei tídan Lerérun Búngiu le ní lubei lariñaga.

Lé meja dübü le mabúseerun jabeí ábunagutiña, ligíaali furúmiñeti?

¹⁸ Furúmieguarügü le achúgeraguti luágu dübü ligía lagünrinchaguba, léti uágunti láburuja, labúrechagúbei. Áu dübü ligía.

Luáguti liseínsuna gumádi

(Mt 21.45-46, 22.15-22; Mr 12.12-17)

¹⁹ Lídan meme óra ligía, ába jálugun jábutigu jafádirigun juríu jáma arúfudajatiña lílürudun Moisés járügüdüni Jesúsu, ladúga jasúbudiruni luágu jawáguti lan jémpulu le lariñagubei, madügün jamúti ladúga janúfude jaweí güriá. Ábati jagúrabajan ámu dan. ²⁰ Ábati jóúnajan güriá ja ásügürütiña jóungua camá jamuga jarúmatiña lun jaríajani Jesúsu, lun jariñagagüdüni cátei le gawáguti gayára lan jíchugun lidúnrun lun jedéregeruni lun gumádimati.

²¹ Ligía jálügüdünbalin, jariñaga lun.

—Maésturu, subúdi wamúti luágu richá lan le baríñagubei lúma giñe le barúfudajabei, manúfudetibu giñe lueí ni ában, ladúga ni cáta lan luweirigun güriá bun, áni láu inárüni barúfudajei lémeri Búngiu. ²² Aríñagabá ában cátei woun. ¿buíti lun lafáyeijóun seínsu lun warúeite César ódi mabuídunti?

²³ Ába lasúbudiruni Jesúsu luríban jarítangun, ába lariñagun joun.

—¿Ca uágu jabúseera jíchugun sádara nubá? ²⁴ Arúfuda jumá ában lídaangiñe seínsu ligía nun. ¿Cá iyáwa lúma íri le bürüñubei luágu?

Jariñaga lun.

—Láni César.

²⁵ Ábati lariñagun joun.

—Le láni César rújumei lun César, le láni Búngiu rújumei lun Búngiu.

²⁶ Siñá jamútiti áburügüda tídoun jasá daran láu lé buri lariñagubei jagíbugiñe güriá, weírürügüti janígi láu loúnabagüle joun. Ába jámanichun.

Álügüdajani lübügürü ásaaruni lídaangiñe óuweni

(Mt 22.23-33; Mr 12.18-27)

²⁷ Lárigiñe, ába jóudin saduséogu aríjei Jesúsú. Jaríñajare saduséogu luágu másaarunbaña lan jiláaña lídaangiñe óuweni lúnya jabágaridun. Ábati jaríñagun lun Jesúsú.

²⁸ —Maésturu, laríñajare Moisés woun tídan lilíburun, luágu ánjein lan óuwe ában wügürí, ába lígirunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadügawagun lámuga líbugaña le óuwebei.

²⁹ Wel, ñíñanu mejáti sédú wügüríña gamúlenuguátiña, ába lamárieidun le furúmiñeti, ába loúnwen marájüñüga. ³⁰ Ába lamárieidun le jabíaman túma buga lúmari íbugañaü, ába giñe loúnwen marájüñüga. ³¹ Ábati lamárieidun le jürüwan túma, chülü lúmoun le jasédün, jiláguá meme jagía, marájüñüga táu.

³² Ába giñe toúnwen würi tugúya. ³³ Aríñagabá ában cátei woun. dánmeti le jásaarun lídaangiñe óuweni lúnya jabágaridun, ¿cábatí úmari würi to jádaangiñe, quei maríeí tubei jáma sédügubei?

³⁴ Ába laríñagun Jesúsú joun.

—Lídan ubóu le, maríeitiña wügüríña jáma würíña, ³⁵ ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe óuweni lúma lun jebélurun siélun agánawa ñi lun sun dan. Magámaridubaña ñi, míchaajan jamáñame jarájüñü lun maríeí, ³⁶ ladúga moúnwendügüyaaña gürigia siélu, ítaraañame quei ánjeligu, lirájüñü jañame Búngiu ja saráaña lídaangiñe óuweni. ³⁷ Moisés guánarügü arúfuda lumúti luágu níjein lan ásaaruni lídaangiñe óuweni lídan le labürüjanbei luágu búbugati gemetí. Laríñajare ñi luágu Búngiu lan Lubúngiutebei Abrahám, Isáac lúma Jacób. ³⁸ Láu dimúrei ligía, arúfuda lumúti Moisés luágu wínwangiña lan Abrahám, Isáac lúma Jacób, láu sun jilá lan jágubu, ladúga máma Jabúngiute jiláaña Búngiu, Jabúngiute ja wínwangiñabaña. Wínwangiña lanügüniña Búngiu sun gürigia.

³⁹ Ábati jaríñagun arúfudajatiña lilírudun Moisés.

—Buíti bariñaguni, Maésturu.

⁴⁰ Ába málügüdagun jamáli lan.

¿Ladügawagunsan David Crístu?

(Mt 22.41-46; Mr 12.35-37)

⁴¹ Ába laríñagun Jesúsú joun.

—¿Ída liñásan jaríñagunbei luágu ladügawagun lan David Crístu?

⁴² Laríñajare David guánarügü tídan líburu to gíriboun Sálmos.

Aríñagati Búngiu lun Nabúreme. “Ñurúba lueígiñe noúnwenren,

⁴³ daríme níchuguniña báganiñu bújaburugun.”

⁴⁴ ¿Ída lubáti ladügawagun lan David Crístu, áni aríñagati David guánarügü lun Crístu “Nabúreme”?

Ladárirun Jesúsú jadúnrun arúfudajatiña lilírudun Moisés

(Mt 23.1-36; Mr 12.38-40; Lc 11.37-54)

⁴⁵ Ñíñanu sarágu gürigia agáambajei Jesúsú, ába jagáambun laríñagun joun láni dísipulugu.

⁴⁶ —Toúnigigua jumá júngua jaweí arúfudajatiña lilírudun Moisés, ganígitiña jeíbugun táu anáanguni durúrutu, busén jagía lun labúsúrún joun láu inébesei úmadarugu, áluaja jameí ubáraü le jabára weírigutiña tídan ligílisi, lúma lubuídun-ágei ubáraü lídan eígini. ⁴⁷ Gidá jamutu giñe jában würíña ja jiláaña

úmari jawei, lúnti jadáuragun láu, ába jadügün furíeigi migínaguti. Weíribei jasúfurirun luágu sun le jadügübei.

21

*Seínsu le tichugubei ában fugiábu würi témpulurugu
(Mr 12.41-44)*

¹ Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu, ² aríja lumúti gíñe tichugun ában würi jíláali túmari, gudémetu, bián gáwanün tídoun gáfu. ³ Ába laríñagun Jesúsu.

—Nínarün jáu luágu gíbetima lan tichugun fugiábu würi to sügü jáu súngubei, ladüga sun jagía, lídaangiñe le ígiragubei jáma jíchiga, ⁴ ánjoun tugúya, láu tugúdemegun tichigei sun le túmabei lún yebe tawínwandun.

*Laríñagun Jesúsu luágu tagünrinchawagüba lan témpulu
(Mt 24.1-2; Mr 13.1-2)*

⁵ Jadímurejaña fiú güriquia tuágu témpulu, luágu tubuídunmeraü láu lubuídun buri tidübüri lúma buri cátei le jíchugubei güriquia lun tawéndedun. Ábati laríñagun Jesúsu.

⁶ —Lachülürüba wéyu lun lagünrinchawagün sun le jariagubei tuágu témpulu to guetó, merédebei ni ában dübü ligíbuagu dübü.

*Seíni buri lubá lagúmuchun ubouú
(Mt 24.3-28; Mr 13.3-23)*

⁷ Ábati jálügüdüni, jariñaga lun.

—Maésturu, ¿ídamé san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Tounigi jumá, mayeedúa jumá. Jayábinba sarágu aríñageina luágu áu lan jagía, jariñagame. “Áu Crístubei”, “Níján dan ligía.” Mafíñera jumá joun, mafálara jumáña. ⁹ Dánme le jagáambun ladímurejoün luágu awúribujani lúma jawágu güriquia agárabagua luágun jarúeite, manúfudedagua jumá, lasúsereduba le furúmiñe, mámagilíme lagúmuchun ubouú líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu. ¹¹ Níbei oúnwenbun buri jarabaganáli, ilámaü, sándi, lídan ámuñegueinarügü fulásu, larijúba buri cátei janúfunati siélu lúma oúnwenbun buri seíni.

¹² ‘Lubarágiñe lasúseredun sun le, járújouba, eíbaajoúa jugúyame. Janügüba agúsera tídan jalígílisin juríu, jádarawagüba furísunrugun, barüwa jugúyame jagíbugiñoün urúeigu jáma gumádimatiña, nueígiñe, lun jagúseragüdüün, ¹³ ligíame jídaani lun jadímurejan luágu nufúleisein. ¹⁴ Aráanse jumei jaritagun lun madíjeri jumá cába lan jariñaga jueígiñegua, ¹⁵ níchuguba dímuerei lúma lichú áu jun le lásíñerun ní ában jádaangiñe jáganiñu asígenera ní oúnaba. ¹⁶ Jalúgurubadün jagübürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe, ¹⁷ jiyéreeguduba joun sun güriquia, nueígiñe. ¹⁸ Lídaanme sun líra, latoúnigirubadün Búngiu le gumúti, ¹⁹ áni ánjaün meue derégúdagua lídan jafiñen nuágu, jibíjibeí íbágarí magúmuchaditi.

²⁰ ‘Dánme jarijin geyégu jamá lan súdaara ubúruгу Jerusalén, subúdi jumei luágu yaráfaali lan lagünrinchagun ubúruгу ligía. ²¹ Jámeti güriquia ja Judéabaña, lúnti janúrajan luágun buri wübü, ja ubúrugubaña Jerusalén, lúnti

jáfuridun ñígiñe, ja áraabubaña, magíríbuda jamá ubúrugun. ²² Luwéyuri buríbei jafáyeirun gürígia luágu wuríbati le jadügübei, dánme le lagúnfulirún sun le bürúwañubei tidan Lerérun Búngiu. ²³ ¡Fugiábugume würíña ja dageinatiña lídan dan ligía, o ja lan garájüñütiña ja gurágiña! Ladüga ñíbei sarágu igárigu ubouágu, larúfudubei Búngiu luweírín ligáñi luágu jafígoun gürígia ja juríu. ²⁴ Ñíbaña ouwegutiña wuríburugu, jíbiri janáawaguba adáürawagua lídoun ámu ageiraü, ábame jagúnrinchaguni ja mámabaña juríu ubúrugun Jerusalén daríme lagúmuchun dan le íchugübei joun lun jadügüni.

*Ligáburi ída lúba lan liábin Crístu
(Mt 24.29-35, 42-44; Mr 13.24-37)*

²⁵ ‘Lasálriragubáti buri seini luágu wéyu, luágu játi lúma jawágu warúguma, ábame laweírídun janígi néchaanigu ubouágu, ábame janúfudedagun luágu lanárimelajúujan lúma labouñjan lugúdi barána. ²⁶ Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladüga járügüdüba lan warúguma ámu üma. ²⁷ Ábamei larijín niábin, áu le Wügüri Garaüwarügüti, lídan juánriña láu sun nubáfu lúma ouñwenbun nuweírígoun. ²⁸ Dánme le lagúmeserún buri cátei le asúsereda, ragüjuma dügüdaguáü, iñúra jumeime jichügü, ladüga madíseelime jasálbarun.

²⁹ Rúlumuti giñe jémpulu le joun.

—Aríja jumouñ tidibu ígo, o furúmieguarügü tidibu wéwe. ³⁰ Dan le jaríjin labouñchun tubána, subúdi jumúti luágu yaráfaali lan lidáani lubáchouga. ³¹ Dánme giñe le jaríjini lasúseredun buri cátei le, subúdi jumei luágu madíseeli lan lidáani Búngiu lun larúeijan.

³² ‘Nínarün jáu luágu lagúnrinchawagúba lan sun ubúrugun le Jerusalén lubáragiñe jouwegun gürígia ja lánina dan le. ³³ Lagúmuchaguba siélu lúma ubou, ánjein nerérun, ladúraruba lun sun dan.

³⁴ ‘Touñigi jumá, mígira jumá lun tabuñchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina íbágarile, márügüdün lámugaün wéyu nagríbudagüle ubouágun lídan magáradajan jumá, ³⁵ quei ában sádara to adárrurutu. Ladüga ítara lúba liábin wéyu ligía jawágun sun ja aganoubaña lídan sun fulásu ya ubouágu. ³⁶ Aráanseñu jumá lubeiti, ayúmuragua jumá lun Búngiu sun dan, gayára lámuga jíbijin ubáfu lun jawánduni sún buri cátei le lúnbei lasúseredun, lun giñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, árieibu, ábaja lídin erédera luágu wübü le Olívos. ³⁸ Ábaja chülügiñe jamá gürígia témpulurugun ságü bináafin lun jagáambuni.

22

*Jelédegun áganiñu lubá Jesúsu
(Mt 26.1-5, 14-16; Mr 14.1-2, 10-11; Jn 11.45-53)*

¹ Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjele áfaraguaña jígirama Ejíptona, máfaragun lumútiña jígirama Israélitagu. ² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, íbídiñounga joun gürígia, ladüga janúfude jawei.

³ Ábati lagáñeiruni Máfia larítagun Júdas Iscarióte, le ában jádaangiñe lání Jesúsu dúusu apóstolugu, ⁴ ába lídin adüga darádu jáma jábutigu jafádiriñegu juríu jáma jábutigu tisúdaarana témpulu lun ledéregeruni Jesúsu joun. ⁵ Ába jagúndaaragun, ába jariñagun lun Júdas luágu jíchuguba lan seínsu lun, ⁶ ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá gürígia.

Lagúmujoín leigin Jesúsu jáma lánigu
(Mt 26.17-29; Mr 14.12-25; Jn 13.21-30, 1 Co 11.23-26)

⁷ Ába lachülürün fédu le ídaanbei teigüa fein magánatu ísi, ní lubei giñe ladágarawagüdüwa mudún le lánina fédu. ⁸ Ába lariñagun Jesúsu lun Pédro lúma Juan.

—Jeíba aráanserei eígin le lánina fédu.

⁹ Ába jálügüdüni.

—¿Jalíagi babúseera waráanseruni?

¹⁰ Lariñaga joun.

—Dánme le jebélurun ubúrugun, jadúnraguba lúma ában wügüri táu ában dináa láu dúna, jafálareime chülü tídun múna to ñíjin lumúti lebelura.

¹¹ Jariñagame lun tabúreme múna. “Lariñajare Maésturu. ¿Jigóun rúmu to ní lubei gayára lan neígini eígin le lánina fédu jáu náni disípulugu?”

¹² Ábame larúfudun ában rúmu weírítu jun tougiñegua múna, aráanseñu tíña, jaráansereime eígin ñi.

¹³ Ába jóúdin, ába jadáriruni sun cátei quei lariñaguni Jesúsu joun, ába jaráanseruni eígin lánina fédu ñi.

¹⁴ Dan le lachülürünbei óra, ába lañúurun Jesúsu jáu lání disípulugu luágu dábula, ¹⁵ ábati lariñagun joun.

—¡Oúnwenbun nabúseerun neígini eígin lánina fédu le júma lubáragiñe noúnwen! ¹⁶ Ladüga nariñajare jun luágu meígindügüya náali lan eígin lánina fédu le daríme lagúnfulirún laníchigu lídan larúeijan Búngiu.

¹⁷ Ábati lanügün ában wéru táu diweín lújaburugu, ába leteíngiruni Búngiu, lariñaga.

—Barüjumei le, fánreingua jumei jádaangua, ¹⁸ nariñajare jun luágu mátundügüyaadina lan diweín daríme liábin larúeijan Búngiu.

¹⁹ Lárigiñe, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adüga jumei le, jarítaguagüleme nuágu.

²⁰ Ítara meme giñe, lárigiñe jeígin, ába lanügüni wéru táu diweín, ába lariñagun.

—Niján níta le lúnbei láwiurun lídaangiñe núgubu juágu, lun lañúurun iséri darádu.

²¹ Niján wügüri le lúnbei ledéregerunina wáma ya luágu dábula, ²² luáguñadina üma le lúnbei nanügüni, áu le Wügüri Garaüwarügüti, áni jfugiábutia wügüri le lúnbei lalúgurunina!

²³ Ábati jagúmeserun álügüdagua jádaangua cába lánfuna alúgurei.

Ladímurejoín luágu cába lan weírigutima

²⁴ Ába jasígenejan lánigu luágu cába lan jádaangiñe weírigutimá. ²⁵ Ába lariñagun Jesúsu joun.

—Lídan arúejiani lánina ubou le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawagúati jawágu luágu wügúriña jamá ja gadügatiña fuleísei joun gürígia. ²⁶ Ánjein lídan narúejian, mítaraanti, lubáragiñe líra, le weirigutimaabei le tímátimaati jídan lúnti lanáangun lúngua quei le únabutimaabei, le agúmadijabei, lúnti ítara lan quei le esériwijabei. ²⁷ ¿Cági weirigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

²⁸ Jugúya úarabañája núma lídan nouchawagun, ²⁹ ligía níchugunbadün lun jarúejian quei líchugunina Núguchi lun narúejian. ³⁰ Jeígiba, gurá jugúyame luágu nidábulan yágúta siélu lídan narúejian, ñurú jugúyame luágu buri lála urúei lun jagúseragüdüniña jadügawagun dúusu lirájüñü Israél.

Laríñaguni Jesúsu luágu leyéedaguba lan Pédro láu
(Mt 26.31-35; Mr 14.27-31; Jn 13.36-38)

³¹ Aríñagati giñe Wabúreme Jesúsu.

—Simón, Simón, amúrijaali Máfia üma lúma Búngiu lun gayáraabei lan louchagunün quei lawánijoún türígu, ³² ibíja lumúti, áni ayúmuraguaadina buágu lun Búngiu lun meféridirun báani bafíñen nuágu lídaanme óra ligía. Áni dánme le bagíribudun nun, rúba dügúdaguaü joun bíbirigu.

³³ Laríñaga Simón lun.

—Nabúreme, aráansetina lun nídin búma furísunrugun, o lun lan nouñwen búma.

³⁴ Laríñaga Jesúsu lun.

—Pédro, uguñe méme, beyéedaguba náu ürúwa weíyaasu lubáragiñe layúgurujan gáyu, baríñaguba luágu ibidiñe nan bun.

Layárafadun lórate Oúchawaguni

³⁵ Ábati laríñagun Jesúsu joun.

—Dan le nouñajanbalün maságúteiga, ni láu lágei seínsu, ni geídi, ¿ñíñein funági jemégeirun?

Ába jaríñagun.

—Uá Maésturu, memégeiruntiwa ni cáta.

³⁶ Ábati laríñagun joun.

—Ánjeinti guetó, le gaságüteti, barüloun, barü ligíame lágei seínsu, le mefeínteti, alúguraloún labíte lun lagáñijan lefeínte, ladúga wuríbati dan le.

³⁷ Naríñajare jun luágu lagúnfuliruba lan le taríñagubei Lerérun Búngiu nuágu. “Ába jabájüdüni jádan wuríbatíña.” Sun le bürüwañubei nuágu lagúnfuliruña guetó.

³⁸ Ábati jaríñagun.

—Wabúreme, nuján bián efeín ya.

Ába laríñagun joun.

—Buíti.

Layúmuragun Jesúsu Getsemaní
(Mt 26.36-46; Mr 14.32-42)

³⁹ Ábati láfuridun Jesúsu, ába lídin luágun wübü le Olívos quei ligáburiñaja, ába jóudin láni disípulugu lúma. ⁴⁰ Dan le jachülürün lídan fulásu ligía, ába laríñagun joun.

—Jayúmuragua, meféridirun jumámugei jafíñen nuágu.

⁴¹ Ába ladísedun Jesúsu jawei murúsunraü, ába lájuduragun ayúmuragua lun Búngiu, ⁴² lariñaga.

—Núguchi, ánjabu busén, séfu bána luei óunwenbun asúfuriruni le lúnbei nasúfurirun, madügüwalá le nabúseerubei, le la babúseerubei adügüwa.

⁴³ Ábati liábin ában ánjeli siélugiñe lun líchugun érei lun. ⁴⁴ Dan létima laweíridun ligárigu, ligiatima layúmuragun láu érei, lédedejati lísüga luei camá jamuga óunwenbun lédedejan jítaü, múarugun.

⁴⁵ Dan le lásaarun lídaangiñe layúmuragun, ába ladáriruniña disípulugu arúmuga, larúmagüdün íruni. ⁴⁶ Ábati lariñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafíñen nuágu.

Janügüni Jesúsu adáüra

(Mt 26.47-56; Mr 14.43-50; Jn 18.2-11)

⁴⁷ Nígili Jesúsu adímureja, ligía jayábin sarágu gürígia, Júdas, le ában jádaangiñe dúusu disípulugu, jabá jabá. Aba layárafadun lun Jesúsu lun lachúuruni. ⁴⁸ Ábati lariñagun Jesúsu lun.

—Júdas, ¿láu ában chúuti balúgurana, áu le Wügüri Garaüwarügüti?

⁴⁹ Játi lúmabaña Jesúsu, dan le jaríjinalin cába lan asúsereda, ába jariñagun lun.

—Wabúreme, ¿ageíndagua wamáña táu efeín?

⁵⁰ Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren. ⁵¹ Ába lariñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun. ⁵² Ába lariñagun joun jábutigu fádorigu, joun wügüriña weírigutiña lidan jafíñen juríu, lúma joun jábutigu tisúdaarana témpulu, ja ñübinbaña anügei.

—¿Jiábin nuágu táu efeín lúma wéwe camá jamuga jíwerutina? ⁵³ Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadügüni jugúndan náu, óraali lun lagúmadijan le labúremebei lubúriga.

Lariñagun Pédro luágu ibídiñe lan Jesúsu lun

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Ábati járügüdüni Jesúsu, ába janügüni lúbiñoun fádiri le íñutimaabei, ábati lafálaruni Pédro dísegiñe. ⁵⁵ Ába jáfuragun wátu ñi lamídaangua baríeru, ába jañúurun geyégu láu, ába giñe lañúurun Pédro jádan. ⁵⁶ Queíti taríjini ában músu ñun larügürügü wátu, ába teréderun aríaguei, ába taríñagun.

—Lúmañein buga giñe Jesúsu gürígia le.

⁵⁷ Ába leyéedagun Pédro, lariñaga.

—Ibídiñeti wügüri ligía nun.

⁵⁸ Murúsun lueígiñe, ábaya laríjini ában, ába lariñagun.

—Jánigu giñe amürü.

Ába lariñagun Pédro.

—Máma jánigu áu.

⁵⁹ Queí buri ában óra lárigiñe, ábaya lariñagun ában.

—Inárüni luágu lúmañajañein lan wügüri le ladüga Galiléana giñe.

⁶⁰ Ábati lariñagun Pédro.

—Íbidiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu. ⁶¹ Ába ladígiragun Wabúreme Jesúsu aríja luágun Pédro, ába larítagun Pédro luágu lé buga laríñagubei Jesúsu lun. “Lubáragiñe layúgurujan gáyu ugúñe, beyéedaguba náu úrúwa weíyaasu.” ⁶² Ábati láfuridun Pédro, ába layájun láu igárigu.

Jéjerajan láu Jesúsu
(Mt 26.67-68; Mr 14.65)

⁶³ Ja wügüríña ja oúnigirubalin Jesúsu, ába jéjerajan láu, bei jameí. ⁶⁴ Ába jagúraguni lágu, ába jagáyuajan ligibuagun, aríñageina jagía.

—¿Bugúya le profétabei, aríñagabeígia ca lan agáyuajabei buágu!

⁶⁵ Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu
(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába jóundaragun wügüríña weírigutiña lídan jafiñen juríu, jábutigu jafádirigun juríu, jáma arúfudajatiña lilúrudun Moisés, ába janügüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabeí woun, ¿amürüsan Crístubei le lúnbei lasálbaruniña gürígia?

Ába laríñagun joun.

—Ánjana aríñaga jun luágu ánja lan, mafiñebadün nun, ⁶⁸ ánjaün nálügúdagua, mouñabun jubáдина, mígiragüdüñ jumáname. ⁶⁹ Naríñaga ában cátei jun. lúmagiñe guetó, nañúuruba, áu le Wügürí Garaúwarügüti, lueígiñe louñwenren Búngiu le Súnti Gabáfuti.

⁷⁰ Ábati jálügüdüni súngubei.

—¿Amürü lubeíti Liraúbei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

23

Jesúsu ligíbugiñe Piláto
(Mt 27.1-2, 11-14; Mr 15.1-5; Jn 18.28-38)

¹ Ábati jásaarun sun líñun-ágei lúrudu, ába janügüni Jesúsu ligíbugiñoún Piláto, ² ába jagúmeserun íchiga lidúnrun, jaríñaga.

—Darí wamaali wügürí le achágaraguágüdaña gürígia, laríñajare luágu moun lan lun wafáyeijan seínsu lun urúei Rómána, aríñagati giñe luágu ligía lan Crístubei le lanúadirubei Búngiu lun lasálbaruniña gürígia, aríñaga ligía luágu urúei lan ligía.

³ Ábati laríñagun Piláto lun.

—¿Amürüsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábati laríñagun Piláto joun jábutigu fádirigu lúma joun jíbiri gürígia.

—Madáritina dúru luágu wügüri le.

⁵ Ábatima jaríñagun jére.

—Lachágaraguágüdúñanu sun gürígia Judéana láu ligáburí larúfudajan, lagúmesera Galiléagiñe, niján mémegua adúgei chúlú ñájour.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügüdajan ánjein Galiléana lubei wügüri ligía. ⁷ Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladüga ñíñein Heródes Jerusalén lídan dan ligía.

⁸ Ába lagúndaaragun Heródes dan le laríjini Jesúsu, ladüga agáambañajaali lan luágu áni lüja labúseerun laríjini, agúrabatiti laríjin ladügün ában miláguru.

⁹ Ába lálügüdaguni luágu sarágu cátei, mouñabunti Jesúsu ni cáta. ¹⁰ Ñíñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun. ¹¹ Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáüraguagdúni táu anáanguni wédegutu quei lanáangun urúei, ábaya loúnajani Heródes lun Piláto. ¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasíadirúniwa Jesúsu lun loúnwen

(Mt 27.15-26; Mr 15.6-15; Jn 18.39–19.16)

¹³ Ábati loúndaruniña Piláto jábutigu fádirigu jáma lúrudugu, jáma buri ámu gürígia, ¹⁴ ába laríñagun joun.

—Jugúya anügúbalin wügüri le nun, jaríñaga luágu chagáguagüda lániña gürígia, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jaríñagubei luágu. ¹⁵ Madáriti giñe Heródes lidúnrun, giríbugüdalá woun. Aríja jumáali luágu madügün lan ni cáta le lúnti lafarún jilágubei lueígiñe, ¹⁶ nabeíchagüdali lubeíti, lárigiñeme, ábame nígiragüdúni.

¹⁷ Gagáburititi Piláto lúnja lígiragüdün ában adaürüti fédurugu, ¹⁸ ába jagúarajan súngubei lídan ában.

—¡Áfarabeí le! ¡Ígiragüdabeí Barabási!

¹⁹ Barabási ligía, ladaürüña lueígiñe ligía lan ában jádaangiñe ja iñúrugaña jóungua luágu gumádi, lúma lueígiñe láfarajan. ²⁰ Busénti yebe Piláto lígiragüdúni Jesúsu, ábaya ladímurejan joun, ²¹ ligiatima jagúaragun.

—¡Dáguabeí luágu gurúwa! ¡Dáguabeí luágu gurúwa!

²² Ába laríñagun Piláto joun luágu lürüwan weíyaasu.

—¿Cáti wuríbatí ladügübei? Madáritina ni cáta le lúnti lafarún jilágubei lueígiñe. Nabeíchagüdali, ábame nígiragüdúni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei. ²⁴ Ábagubeíti ladügüni Piláto le jabúseerubei, ²⁵ ábati lígiragüdúni wügüri le jabúseerubei, le adaürübei lueígiñe iñúrugini lúma áfarajani, ábati ledéreggeruni Jesúsu joun lun jadügüni jagúndan láu.

Ládarawagún Jesúsu luágu gurúwa

(Mt 27.32-44; Mr 15.21-32; Jn 19.17-27)

²⁶ Dan le jóúdiña lan láu Jesúsu lun ládarawagún luágu gurúwa, ába járgügdün ában wügüri Cirénena gíriti Simón, liábiña áraabugiñe, ába janügagüdúni gurúwa lun, ába lídin láu lárigi lárigi Jesúsu.

27 Sarágu jáña gürígia afálaruti jáma sarágu würiña jádan ayájuajeina, agúarajeina láu íruni luágu. 28 Ába ladígiragun Jesúsu jawágun, ába laríñagun joun.

—Würiña Jerusalénna, mayájua jumá nuágu, jayájua juóguua lúma jawágu jirájüñü. 29 ladüga liábinba buri wéyu dánme le laríñawagún. “Fuleiseiwatiña ja siñábei jagáraudun jáma giñe ja marájüñüjañábaña, jáma ja mátagüdanbaña.” 30 Ábamenti jariñagun gürígia lun wübü iñuti. “Áburujabá wawágun”, aríñaga jagíame lun wübü ünabuti. “Darúguabá wáu.” 31 Ladüga ánjein adügajabalin sun le láu tidibu wéwe le düdügili, ¿cábaga madügün jamá láu le mábejjali? (Ítara líña ladímurejan luóguua, le madúnrunbei, lúma jawágu ja gadúnrunbaña.)

32 Barütiña giñe biáma gadúnruntiña lun jafarún úara lúma Jesúsu. 33 Dan le jachülürünbei lídoun fulásu le giríbei Lufúlasun Lábu Ichügü, ába jádaraguni Jesúsu luágu gurúwa jáma giñe biáma wuribatiña jagía, ában lueigiñe loúnwenren, ában lueigiñe lubáüna. 34 Dánti le añája lan ádaraguei Jesúsu luágu gurúwa, ába laríñagun.

—Núguchi, ferúduna báña ladüga ibídiñeti joun ca lan jadügübei.

Ába jájurerun súdeara ubúnuruni lun jarijin cába lan un jádaangiñe terédera lanáangun Jesúsu. 35 Níñanu gürígia aríagua, níñanu giñe lúrudugu jéjerajaña láu, jariñaga.

—Sálbati ámu, sálbagonalá giñeti lúngua, ánjein inárüni lubei luágu ligía lan Crístubei le lanúadirubei Búngiu lun lasálbaruniña gürígia.

36 Éjerajatiña giñe súdeara láu, láu jayárafadun íchiga tagübüri diweín lun lun látunun, 37 jariñaga buri lun.

—Ánjein Jarúeite bubei juríu, sálbaguabá búngua.

38 Níñeinti ában abürüjouni lougiñe lichügü, laríñajare ñi. “Niján Jarúeite Juríu.”

39 Ába lanábuni ában jádaangiñe wuribatiña ja dáwagubaña luágu gurúwa ñi Jesúsu, laríñaga.

—Ánjein bugúya lubei Crístubei, sálbaguabá búngua, sálba báwame.

40 Ába ladeínjan le ában lun louba, laríñaga lun.

—¿Manúfudetibusan luei Búngiu, bugúya le labugiñebei ában meme súfuri lúma? 41 Wagía, garíchatíwa lun wasúfurirun ladüga wafáyeijaña luágu wadüga, ánjeinti wügüri le, madügünti ni cáta wuribati.

42 Ábati laríñagun.

—Jesúsu, barítaguame nuágu dánme le lagúmeserun barúeijan.

43 Laríñaga Jesúsu lun.

—Nínárün báu luágu númabadibu lan siélu, ugúñe méme.

Loúnwen Jesúsu

(Mt 27.45-56; Mr 15.33-41; Jn 19.28-30)

44 Amídirugu, ába labúrigadun sun fulásu darí ladaünrún ürüwa rábounwéyu.

45 Ába labúrigadun wéyu, ába tajeíridagun tubélu tempulu tamídan túmagua.

46 Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

47 Dan le laríjinalin jábuti súdeara Rómána le asúseredubei, ába ladímurejan weírugu luágu Búngiu, laríñaga.

—Inárüni, madúnrunti buga wügüri le.

⁴⁸ Sun gürígia ja ñibaña, ja arjubalin le asúseredubei, ába jóudin ñígiñe, áfarajeina jamei janíguagu, le jagárigu. ⁴⁹ Ánjaña sun lumádagu Jesúsu jáma giñe würiña ja ñübinbaña úara lúma Galiléagiñe, ába jeréderun díse aríjei buri cátei le.

Labunún Jesúsu

(Mt 27.57-61; Mr 15.42-47; Jn 19.38-42)

⁵⁰ Ñíñein ában wügüri gíriti José, lídaangiñeti fulásu le gíribei Arimatéa, le jafúlasun juríu. Buíti ligáburu wügüri ligía, richáguati ligíbugiñe Búngiu, lídaañein líñun-ágei lúrudu le jáni juríu. ⁵¹ Agúrabañu líñein larúeijan Búngiu, magúndaanti lubeíti láu cátei le ladúgübei líñun-ágei lúrudu láu Jesúsu. ⁵² Ábati lídin lúmoun Piláto, ába lamúriajani lúgubu Jesúsu lúma. ⁵³ Lárigiñe larárigüdüni lueígiñe gurúwa, ába louburaguni táu ában gamísa, ába lácharuni lídoun ában umúajaü achigíti luágu ában dübü le ñí lubei úagili lan ni ában abunúti. ⁵⁴ Wáandaradi wéyu ligía, luwéyuri aráansejani lubá luwéyuri eméraguni joun juríu, áni agúñeeli gumése.

⁵⁵ Ába jafálaruni würiña já meja ñübinbaña lúma Jesúsu Galiléagiñe José, aríja jamei umúajaü, aríja jamei buídu ída líña lan líchugún lúgubu Jesúsu lídoun umúajaü. ⁵⁶ Dan le jagíribudunbei jábiñoun, ába jaráanseruni ibíñei buri le íchugübei jawágu jiláaña, ábati jeméragun lídan wéyu le eméraguagülei quei laríñaguni lílúrudun Moisés.

24

Lásaarun Jesúsu lídaangiñe oúweni

(Mt 28.1-10; Mr 16.1-8; Jn 20.1-10)

¹ Wéyu dimáasu, ába jagíribudun würiña luágun umúajaü, bináafingua, barüina jamei ibíñei le jaráanserubei jámagua. ² Dan le jachúlürünbei, mámaali lídan lubára dübü le lidaü umúajaü. ³ Ába jebélurun lídoun umúajaü ligía, madári jamúti lúgubu Wabúreme Jesúsu ñi. ⁴ Súnti añája lan ñi arítagua jagei lánfunu, ligía jaríjin bián wügüriña rára jarúgabu táu anáanguni mirítu. ⁵ Queíti jélemuchun láu jagíbu ünabun, buin láu anúfudei, ába jaríñagun wügüriña jagía joun.

—¿Ca uágu jáluajei le wíwanbei jádan jiláaña? ⁶ Úati ya, saráli lídaangiñe oúweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügüri Garaüwarügüti, ⁷ luágu ledéregerúaba lan jájaburugun gafígountiña, ábame jádaraguni luágu gurúwa, ábame lásaarun lídaangiñe oúweni luágu lürüwan wéyu.

⁸ Ábati jarítangun luágu dimúrei le laríñagubei Jesúsu. ⁹ Lárigiñeti jagíribudun umúajaürugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu. ¹⁰ Ja anügübalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri würiña. ¹¹ Dan le jaríñagunbalin buri cátei le joun apóstolugu, ába janügüni quei lílülün áu, mafiñetiña joun.

¹² Ába láfuridun Pédro, ába lídin eíbaagueina luágun umúajaü, dan le laríjinbei lurágeirugun, gamísa rügüñoun ñi, úaali úgubu. Ába lídin lúbiñoun láu luweírin anígi láu cátei le laríjubei.

Luágu ũma lun Emaúsun
(Mr 16.12-13)

¹³ Luágu méme wéyu ligía, jóúdiña biáma jádaangiñe lánigu Jesúsu lídoun ában liraúraü fulásu gíriti Emaús, ũrúwa óra eíbuguni Jerusaléngiñe, ¹⁴ adímurejeina jáña luágu sun cátei lé buri asúseredubei. ¹⁵ Súnti adímurejeina jamá, ába layárafadun Jesúsu joun, ába lagúmeserun eíbuga úara jáma. ¹⁶ Láu sun aríja jamáni, siñáti jasúbudiruni luágu Jesúsu lan. ¹⁷ Ábati laríñagun joun.

—¿Cásan le uágubei jadímureja, sun eíbugeina jumá?

¹⁸ Ába jaráramagun láu íruni jagíbuagu, ába loúnabun ában jádaangiñe, gíriti Cleofás, ába laríñagun.

—Sun gürígia subúdi jamúti le asúseredubei Jerusalén lídoun buri wéyu le. ¿Amürü rügüñein jádaangiñe ja ñibaña ibídiñejabu lun?

¹⁹ Ábati laríñagun joun.

—¿Cági asúseredubei?

Jaríñaga lun.

—Luáguti Jesúsu le Nazarétna, ában meja proféta láu ubáfu luágu le ladügübei lúma luágu lerérun ligíbugiñe Búngiu lúma jagíbugiñe sun gürígia.

²⁰ Ábati jedéregeruni jábutigu wafádiríñegu jáma walúrudungu lun siádiwa lan lun ouweni lúma lun ládarawagún luágu gurúwa. ²¹ Rúwamutí yebe wafiñen luágu ligiaba lan eséfurei linásiñun Israel. ũrúwa wéyu guetó lueigiñe lasúseredun cátei le. ²² Láu sun líra, weírígüda jamáli jádaangiñe würíña ja wámabaña wanígi láu jóúdin luágun umúajaü lubá buga larúgan, ²³ queíti madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun luágu wínwan lan Jesúsu. ²⁴ Ába jóúdin jádaangiñe wíbirigu aríje umúajaü, ába jadáriruni ítara quei jaríñaguni würíña jagía, maríjin jamúti Jesúsu.

²⁵ Ábati laríñagun Jesúsu joun.

—¡Louguati giñe gunfaráanda jumá, lüti giñe lubá jafíñerun luágu lé meja jaríñagubei profétagu! ²⁶ ¿Ma funági lúnti meja lasúfuriruni Crístu sun cátei le lubáragiñe lerésibiruni luweírigan?

²⁷ Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera túmangiñe buri lilíburun Moisés túmoun sun jalíburun profétagu.

²⁸ Dan le jachülürün lídoun fulásu le ñíjinbaña lubeí, ába ladügün Jesúsu camá jamuga lasígiraali leíbugun. ²⁹ Ába jéredun luágu lun leréderun jáma, jaríñaga lun.

—Reídeibá wáma, ladüga ladáruduña áni gúñemémeeli.

Ábati lebélurun Jesúsu lun leréderun jáma. ³⁰ Dánti le ñurújali jáma luágu dábula, ába lanügünun fein lújaturugu, ába leteíngiruni Búngiu tuágu, ába lagúbachagunun, ába líchugunun joun. ³¹ Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe. ³² Ábati jaríñagun jámaga.

—¿Ma sandítiwa tásüdün wanígi le wagúndan dan le adímurejeina lubeí woun luágu ũma, aríñagaleí tíla Lerérun Búngiu woun?

³³ Ábati magúrabajaanjaña lan, ába járügüdün ũma lun jagíribudun ubúrugin Jerusalén le ñí lubei jadáriraña únsu apóstolugu oúndaragu jáma giñe jíbiri lánigu. ³⁴ Ába jaríñagun ja oúndaraguñubaña ñi joun.

—Inárüni luágu saráali lan Wabúreme Jesúsu lídaangiñe ouweni lúnya labágaridun, aríja láali Simón.

³⁵ Ábati jabájüdaguni bián wügüriña jagía le asúseredubei joun luágu üma, lúma luágu jasúbudiruni luágu Jesúsu lan dan le lagúbachagúnbarun fein.

*Larúfudagun Jesúsu lúngua joun disípulugu
(Mt 28.16-20; Mr 16.14-18; Jn 20.19-23)*

³⁶ Ñígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jarítagun luágu pántu lan jaríjubei. ³⁸ Ába lariñagun Jesúsu joun.

—¿Ca uágu tájüchüra janígi? ¿Ca uágu níjein lubei liloúguan afíñeni le títan janígi? ³⁹ Aríja jumei nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰ Dan lariñaguni líra, ába larúfuduni lújabu lúma lugúdi joun. ⁴¹ Queíti mafiñen mémegiña lan ladüga ugúndani lúma luweírín anígi le jawágubei, ába lariñagun Jesúsu joun.

—¿Níjeinsan eígini júma ya?

⁴² Ába jíchugun murúsun úduraü süti lun lúma síruudu, ⁴³ ába lanügüni, ába leígini jagíbugiñe sun jagía. ⁴⁴ Lárígiñe, ába lariñagun joun.

—Le asúseredubei nun, ligía lé meja uágubei nariñaga jun dán meja le júmagidina, luágu lagúnfulirúaba lan sun le bürüwañubei nuágu títan lilíburun Moisés, títan jalíburun profétagu, lúma títan líburu to gíríbound Sálmos.

⁴⁵ Ábati gunfaráandagüda lánun Lerérün Búngiu joun, ⁴⁶ ába lariñagun joun.

—Bürüwañu líña luágu lúnti lan loúnwen Cristu, ába lánme lásaarun lídaangiñe ouweni lúnya labágaridun luágu lürüwan wéyu, ⁴⁷ lúnti lan gíñe lapúrichijoún lídan líri joun sun gürígia ubouágu lun jasáansiruni jouserun lun ferúdnawa lan jaffígoun, lagúmeseruña apúrichijani ligía ubúrugugiñe Jerusalén. ⁴⁸ Jugúya geféentün luágu buri cátei le. ⁴⁹ Nouñajabei Sífiri Sándu, le uágubei lariñaga Núguchi Búngiu jun, ítara líña lubeiti, reidei jumá ya ubúругu Jerusalén daríme jerésibiruni ubáfu lúmagiñe Búngiu le siélubei.

*Lamúdeirun Jesúsu siélun
(Mr 16.19-20)*

⁵⁰ Ábati lanügüniña Jesúsu bougudin luei ubúругu chülü Betánia, ába liñúruni lújabu, ába ln ferúdnawa laabíniruniña. ⁵¹ Dánti labíniruniña, ába lamúdeirun jawei, ába lanügüniwa siélun. ⁵² Lárígiñe jájuduragun lun, ába jagíríbudun járigoun ubúrugun Jerusalén, ¡ma jagúndan! ⁵³ Súnwandánti témpulurugúñanu lan íchiga uweíríguni lun Búngiu.

UGÁNU BUÍTI LE LABÜRÜJABEI JUAN LUÁGU JESÚSU

Liábígüle Búngiu Irájü ubouágun queísi Wügüri Garaitwarügüti

¹ Dan le lagúmeserunbei sun cátei, níjeinjali meja Dimúrei (le ámu íri lun Búngiu Irájü), lúmañein Búngiu le Dimúreibe, áni Búngiu méme ligía. ² Lídan lubeíti lagúmeserunbei sun cátei, lúmañein Búngiu Úguchili Búngiu Irájü. ³ Lídaangiñe ladügei Búngiu sun cátei, úati ni cáta adügüti le máma ladüga. ⁴ Ligía íchugubei íbágari lun sun cátei, áni ligía arúgoungadagüdübei jáu gürígia. ⁵ Rúti larúgounga queísi lámpu lídan lubúriga, áni lásiñerubei lubúriga lámpu ligía éñegucha.

⁶ Níñein meja ában wügüri loúnajan Búngiu, gíriti Juan, le ñübinbei lun líchugun fe luágu Búngiu Irájü le lúnbei liábin ubouágun lun larúgoungadágüdün jáu gürígia. ⁷ Juan, lúnti líchugun fe luágu, lun gayáraabei lan jafiñerun sun gürígia luágu cátei le lúnbei laríñaguni dánme le liábin. ⁸ Máma Juan le lúnbei larúgoungadágüdün jáu gürígia, ában wügüri ligía le ouñajoúbei lun ladímurejaba lan luágu. ⁹ Búngiu Irájü, le queísigubeirügübei ában lámpu le tímatisaati lun larúgoungadágüdün jáu sun gürígia, lachülürüña meja ubouágun lídan dan ligía.

¹⁰ Ñübinti ubouágun, áni láu sun lídaangiñe lan ladügei Búngiu ubou, manügün jamúti lirájüñü ubou quei Búngiu Irájü. ¹¹ Lageíroun yebe liábin, merésibirun jamúti lílana lageíra. ¹² Láu sun líra, añájein erésibiruti, ába jafiñerun luágu, ába líchugun ubáfu joun lun lirájüñübaña lan Búngiu. ¹³ Mítaraantiñatia quei jasáanigu agübüriгу ja gürígiabaña, ja agüriajouñtia quei furúmerügü gürígia o láu lan lugúndan ában wügüri, lirájüñü Búngiu jagía.

¹⁴ Ligirati meja le Dimúreibe, le méme Búngiu Irájübei, ñübinti lun ítara lúba lan quei furúmerügü gürígia, ába laganouñiwa wádan. Aríja wamúti luweírigun, uweíriguni le ladúnabei Liraü Búngiu le ábanrügüti, le buínbei láu areíni lúma inárüni. ¹⁵ Adímurejati Juan luágu, ába laríñagun.

—Niján léñaja uágubei nadímureja jun dan le naríñagunbei luágu le lan ubábei naráanseja úma, weírigutima lan sügü náu, ladüga níjeinjali lán meja lubáragiñebei nagüriajouñ.

¹⁶ Sun wagía íbijaadiwa sarágu abíniruni lídaangiñe luweírin lírisin. ¹⁷ Lúmagiñe Moisés lerésibirúa lílúrudun Búngiu, ánjeinti ínshiñeni lúma inárüni, lídaangiñe Jesucrístu liábin. ¹⁸ Úagili ni ában aríjiti Búngiu, Liraü le ábanrügübei le yaráfabei tun lanígi, ligía arúfudubalin woun ída líña lan Búngiu.

*Ladímurejan Juan le abásteragüdjabei luágu lufúleisein Jesucrístu
(Mt 3.11-12; Mr 1.7-8; Lc 3.15-17)*

¹⁹ Ába jouñajan juríu ja Jerusalénna fádírigu jáma wügüriña jádaangiñe ladügawagun Levi áltügüdei Juan cáteíñein lan. ²⁰ Ába laríñagun joun furáangu.

—Máma áu Crístu.

²¹ Ábayati jálügüdüni.

—¿Cátabuti? ¿Proféta Elías amürü?

Laríñaga joun.

—Uá, máma áu.

Ábaya jaríñagun lun.

—¿Amürü proféta ligira le lúnbei liábin?

Ába laríñagun joun.

—Máma gíñe áu.

²² Ábati jaríñagun lun.

—¿Cátabuti? Mósutia wanügüni bouñabagüle joun ja ouñajabaliwa. ¿Cági gayáraabei bariñagun woun buougua?

²³ Ába louñabuniña láu méme dimúrei lé meja laríñagubei proféta Isaías.

—Áu ában le agúarajabei lídan fulásu le mageírawati. “Aráanse jumouñ janígi lubá liábin Wabúreme queísi ladárarúniwa úma surúti.”

²⁴ Ja ñüdünbaña adímureja lúma Juan, lánigu jadámurin fariséogu, ²⁵ ábati jaríñagun lun.

—Ánjeinti máma bubei Crístu, ni Elías, ni proféta ligía, ¿cáti uágu babásteragüdaja?

²⁶ Ába laríñagun joun.

—Áu, láu dúna nabásteragüdaja, níjein ában ibídiñeti jun jagánagua, ²⁷ liábinba nárigiñe, wügüri ligía, madúnatina ni lun jamúga nafáragaduni tagürüga ligeidin.

²⁸ Sun cátei le, lídan fulásu le gírubei Betábara lasúsereda, luágu oubaü le ñígiñe lubei láfuara wéyu libíti dúna Jordán, le ñi lubei labásteragüdaja Juan.

Wügüri le louñajabei Búngiu lun louñwen luágu jafígoun gürígia

²⁹ Larúgan, ába laríjin Juan liábin Jesúsu ayárafadeina lun, ába laríñagun joun lánigu.

—Niján le louñajabei Búngiu lun louñwen luágu jafígoun gürígia queísi meja lafarúniwa mudún lídan dan ligira luágu jafígoun gürígia. ³⁰ Luáguñaja nadímureja dan le naríñagunbei. “Liábinba ában wügüri nárigiñe le weiriguti sügü náu, ladüga níjeinjali lán meja lubáragiñe nagüríajouñ.” ³¹ Ni áu, ibídiñeti meja wügüri ligía nun, abásteragüdajádina láu dúna lun jasúbudiruni Israelítagu.

³² Aríñagati gíñe Juan.

—Aríja numúti Sífiri Sándu camá ában únjun, larárirun siéluigiñe, ába laráramagun lábulugu. ³³ Ibídiñeti yebe nun cátei lan wügüri ligía, aríñagarügaali meja le ouñajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lábulugu ítaga wügüri, ligía wügüri ligía le abásteragüdajabei láu Sífiri Sándu.” ³⁴ Aríja náaliti, geféen áu luágu ligía lan Liraübei Búngiu.

Furúmiñetiña láni Jesúsu dístpulugu

³⁵ Larúgan, ñíñeinya Juan jáma biáma jádaangiñe lánigu. ³⁶ Dan le laríjinbei Juan lásügürün Jesúsu, ába laríñagun.

—Niján wügüri le lanúadirubei Búngiu lun lagídaruni jafígoun gürígia.

³⁷ Ába jagáambuni biáma lánigu Juan laríñagun ítara, ába jafálaruni Jesúsu.

³⁸ Ábati ladígiragun Jesúsu lárigoún, quei laríjin jafálaruni, ába laríñagun joun.

—¿Ca jabúseerubei núma?

Ába jaríñagun lun.

—Maésturu, ¿jalía bagánawa?

³⁹ Ába laríñagun Jesúsu joun.

—Jigóugu jaríjei.

Ába jóudin, ába jaríjini jalía lan lagánawa, ába jásügürüni líbiri wéyu ligía lúma, ladúga queíburijali lan gádürü rábounwéyu óra ligía.

⁴⁰ Andrés, le lamúlen Simón Pédro, ligía ában jádaangiñe bíama ja agáambubalin le lariñagubei Juan ába jafálaruni Jesúsu. ⁴¹ Lubáragiñe ámu cátei, ába lídin Andrés álugei Simón Pédro le líbugaña, ába lariñagun lun.

—Darí wamaali Mesías, le Crístu, le lanúadirubei Búngiu lun lasálbaruniña gürígia lídaangiñe jafígoun.

⁴² Ába lanügüni Andrés Simón le ñíjin lubei Jesúsu, ába lariaguni Jesúsu Simón ligíbuagun, ába lariñagun lun.

—Simón, amürü le liraü Jonás, guetó Céfasha bíri, míni lan íri le. Pédro, o dübü.

Lanúadiruniña Jesúsu Felípe lúma Natanaél lun lánime disípulugu

⁴³ Larúgan, ába larítagun Jesúsu lídin louábawagun Galiléa, ába ladúnragun lúma Felípe, ába lariñagun lun.

—Falábana.

⁴⁴ Felípe ligía, Betsáidana le ñí lubei giñe lagánawa Andrés láu sun Pédro.

⁴⁵ Ábati lídin Felípe áluajei Natanaél, ába lariñagun lun.

—Aríja wamáali wügüri le uágubei labürüja Moisés tídan líburu to lánina lilúrudun Búngiu, le giñe uágubei jabürüja profétagu—Jesúsu le liraü José le Nazarétna.

⁴⁶ Ába lariñagun Natanaél.

—¿Níjein funági Nazarétna buítí?

Ába lariñagun Felípe lun.

—Jigábu baríja.

⁴⁷ Dan le larijin Jesúsu layárafadun Natanaél, ába lariñagun.

—Nitén ában ladúgawagun Israel le tímataati, úati yéguau lídan.

⁴⁸ Ába lariñagun Natanaél lun.

—¿Ída línági basúbudirunina?

Ába lariñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

⁴⁹ Ábati lariñagun Natanaél lun.

—Maésturu, amürü Liraübei Búngiu, amürü jarúeitebei Israelítagu.

⁵⁰ Ába lariñagun Jesúsu lun.

—¿Bafíñerunbei nun ladúgarügü nariñagun bun luágu aríja nánibu tábugiñe tídibu ígo? Baríjubati cátei weínamutimáati lueí le.

⁵¹ Ariñagati giñe Jesúsu.

—Nínarün jáu, luágu jaríjubei lan siélu junréñu, añájame láni Búngiu ánjeligu aweínja lúma arárija nougiñe, áu le Wügüri Garaüwarügüti.

2

Ában maríei lídan fulásu le gíribei Caná, le lídaanbei Galiléa

¹ Ürüwa wéyu lárigiñe, ñíñein ában maríei lídan ában fulásu gírítí Caná, le lídaanbei Galiléa. Ñíñounti lúguchu Jesúsu, ² amísurajoúati gíñeti Jesúsu jáu sun láni disípulugu lídoun maríei ligía. ³ Ába tagúmuchun diweín, ába tariñagun lúguchu Jesúsu lun.

—Gumújatia diweín.

⁴ Ába laríñagun Jesúsu tun.

—¿Cági uágu baríñagei le nun, núguchu? Machülügili dan lun nídejan lídan cátei le.

⁵ Ába taríñagun joun ja éjeeragubaña.

—Adüga jumei sun le laríñagunbei jun.

⁶ Níñoun sísi dináa láutu dübü tibe to jayúsuruboun juríu lun jachíbagun jóungua según jagáburí. Ságu ában dináa tugúya, barítu wein o darándi gálun dúna. ⁷ Ába laríñagun Jesúsu joun éjeeragutiña.

—Buíngüda jumóun sun dináa to láu dúna.

Ába jabuínchagüdünun buídu buídu. ⁸ Ábati laríñagun Jesúsu joun.

—Dabú jumati murúsun tídaangiñe, ábame janügüni lun le aríjubei láu fédu.

Ába jadügüni ítara. ⁹ Ábati loučhuni le aríjubei láu fédu dúna ligía salígua lun diweínme, ibídiñoun lun jalíagiñeti lan, ja rügüñanu éjeeragubaña asúbudirei, ladüga jagía lan adáburubalin dúna. Ábati lagúarun le aríjubei láu fédu lun le amárieidubei, ¹⁰ ába laríñagun lun.

—Sun güriúa seríwi jamútu tubuídun-ágei diweín furúmiñe, dánti le guráaña amísurajóutiña gibe, ligía jéjeeragun diweín to furúmiñegarügü, ánjeinti amürü, ába bareídunun tubuídun-ágei diweín darí guetó baségaroun.

¹¹ Cátei le, le ladügübei Jesúsu lídan fulásu le gíríbei Caná le lídaanbei Galiléa, ligía furúmiñetíbei miláguru le áubei larúfudei luweírígún, ába jafíñerun láni disípulugu luágu.

¹² Lárígiñe cátei le, ába lídin lídoun fulásu le gíríbei Capernaúm, úara túma lúguchu, lamúlenu, jáma láni disípulugu, ába jeréderun átíri wéyu ñi.

*Labúgaguniña Jesúsu alúgurajatiña témpulurugugiñe
(Mt 21.12-13; Mr 11.15-18; Lc 19.45-46)*

¹³ Ábati lídin Jesúsu ubúruгу Jerusalén ladüga yaráfaali lan jafédun juríu le lánina páscua. ¹⁴ Ñi ladárraña ja alúgurajabaña bágasu, mudún, únjun, jáma buri ja ñúnbaña lídan jabára le ñi lubei jasáansija seínsu joun güriúa. Lídan түbürürü témpulu ladárraña sun güriúa ja. ¹⁵ Dan le laríjinbalin Jesúsu cátei le, ába ladügün ában labeíjagüle láu gürudu, ába labúgaguniña sun jagía lídaangiñe түbürürü témpulu jáu sun jalügüniña mudún jáma bágasu. Chagálei jaseínsun ja asáansijabaña seínsu, garábagualei jadábulan. ¹⁶ Ába laríñagun joun ja alúgurajabaña únjun.

—¡Sagájumei sun cátei le yágiñe! ¡Manüga jumóun lúban Núguchi lun jalúguraagüleme!

¹⁷ Ábati jarítangun láni disípulugu luágu laríñawagún tídan líburu to Lerérún Búngiu. “Jángitina táu búban táu sun nanígi.”

¹⁸ Ábati jaríñagun juríu lun.

—¿Ca miláguru barúfudubei woun lun wasúbudiruni ánjein garícha bubei lun badügüni cátei le?

¹⁹ Ába laríñagun Jesúsu joun.

—Güríngua jumóun témpulu to, naráramagüdáyaboun lídan ürüwa wéyu.

²⁰ Ába jaríñagun juríu lun.

—Bián-wein-sísi irúmu janügün adügoun témpulu to, ¿lun biyáraaboun lan aráramagüda lídan ürüwa wéyu?

²¹ Lúgubu guánarü Jesúsu témpulu to uáguboun ladímureja joun. ²² Ligía dan lubei le lásaarun lídaangiñe ouweni, ába jarítangun luágu dimúrei lé meja laríñagubei, ába jaffínerun luágu sun le tídaanbei líburu to Lerérun Búngiu lúma luágu dimúrei buri lé meja laríñagubei joun.

Subúsi le tídaanbei janígi gürígia lun Jesúsu

²³ Dan le Jerusalén lubei Jesúsu lídan fédu le lánina páscua, sarágu jáña afíñerutiña luágu dan jaríjinbaalin miláguru buri le ladágubei lun larúfuduni luágu ligía lan Crístubei. ²⁴ Ánjeinti Jesúsu, míchaagunti lúngua jájaburugun ladúga subúdi láníña cátañañanu lan. ²⁵ Mabúseerunti laríñawagúniwa lun ída jáña lan gürígia, ligía lúngua subúdi lumúti cátei lan tídaanbei janígi.

3

Jesúsu lúma Nicodémo

¹ Níñein ában wügüri lánina jadámurin fariséogu, ába jádaangiñe jábutígu jurú, gíriti Nicodémo. ² Ába lídin Nicodémo ayánuja lúma Jesúsu gúñoun, ába laríñangun lun.

—Maésturu, subúdi wamúti luágu Búngiu lan oúnajabalibu arúfudaja woun, ladúga úati ni ában lun gayára lan larúfuduni lubáfu láu miláguru quei badügüni ánjein úa lubei Búngiu lúma.

³ Ába laríñangun Jesúsu lun.

—Nínárün báu luágu le lan magüriajouñwayati, siñáti lebélorun lídoun larúeijan Búngiu.

⁴ Ába laríñangun Nicodémo lun.

—¿Ída lubági lagüriajouñwaya ában wügüri weíriyaali? ¿Gayáraati funági lebélorunya turágeirugun lúguchu lúnya tagüriajani?

⁵ Ába laríñangun Jesúsu lun.

—Nínárün báu luágu le lan magüriajouñti lídaangiñe dúna lánina abásteruni, lúma lídaangiñe Sífiri Sándu, siñáti lebélorun lídoun larúeijan Búngiu. ⁶ Le agüriajoubei jádaangiñe agübürigu ja gürígiabaña, ítara líña ligáburu queisi jagáburu gürígia, le agüriajoubei lídaangiñe Sífiri Sándu, ítara líña ligáburu queisi ligáburu Sífiri Sándu. ⁷ Maweidalá banígi luágu naríñangun bun luágu lúnti lánya jagüriajouñiwa sun gürígia. ⁸ Ítara quei láfurun garábali le nígiñe lumúti labúseera, agáambabei lamúri, íbídiñeti bun jalíagiñe lan liábin ni jalíñoun lan lídin, ítara jáña gíñe sun ja agüriajoubaña lídaangiñe Sífiri Sándu.

⁹ Ábayati laríñangun Nicodémo lun.

—¿Ída lubásan cátei le?

¹⁰ Ába laríñangun Jesúsu lun.

—Ába oúnwenbun maésturu Israélna amürü, ¿íbídiñeti cátei le bun? ¹¹ Nínárün báu luágu le lan wasúbudirubei, ligía lan wadímurejabei, geféen wagía lubei le aríja wamáalibei, jugúya fariséogu, mafiñetün luágu le waríñagubei jun. ¹² Ánjein mafiñen jubei nun dan le nadímurejan luágu buri cátei le lánina ubou, ¿ída lubági jafíñera luágu le lánina siélu?

¹³ Úagili ni ában amúdeiruti siélu, lárigiñe ába larárirun nígiñe lun gayára lan geféen lan luágu nueídügüya, áu le Wügüri Garaüwarügüti, le gábanbei siélu. ¹⁴ Ítara quei meja liñúrurun Moisés tiyáwa jéwe luágu wéwe lídan fulásu mageírawati lun jasálbaruba lan sun ja aríjitiña tuágun, ítara líñá gíñe niñurúaba

lan luágu gurúwa ¹⁵ lun sun lan le afiñeruti nuágu, mídin lámuga máfiougati, siélun lámuga lídin abágarida ában ibágari le magúmuchaditi.

Lísiñejabu Búngiu joun gürígia

¹⁶ Weíríti jínsiñe gürígia ja ubouágubaña lun Búngiu dari lun loúnajanina, áu le Liraü le ábanrügüti, lun nouwen luágu jafígoun, lun sun lan ja afiñerutiña nuágu, mídin jamámuga máfiougati, siélun lámuga jóudin, abágarida ában ibágari le magúmuchaditi. ¹⁷ Mouñajan lumútina Búngiu áu le Liraü ubouágoun lun níchugun jadúnrun gürígia, loúnajanina lun jasálbarun ja ubouágubaña nuágu.

¹⁸ Le afiñeti nuágu, áu le Liraü Búngiu, barü lumuti Búngiu quéisi madúnrunti, ánjein le mafiñeti, gadúnrunjali ligíbugiñe Búngiu ladüga mafiñen lan nuágu, áu le Liraü Búngiu le ábanrügüti. ¹⁹ Ja mafiñebaña, gadúnrunjaña ligíbugiñe Búngiu ladüga dán buga le niábinbei ubouágoun lun narúgoungagüdün láu, gúndaatimaatiña lílana ubou láu lubúriga sügü láu larúgounga, ladüga cátei lan wuríbati jadaágubei. ²⁰ Sun ja adügübaña cátei wuríbati, iyereeguti larúgounga joun, ába jadísedun luei larúgounga ligía, luei lasúbudirúniwa cátei wuríbati le jadügübei. ²¹ Ja adügübalin lugúndan Búngiu, jínsiñeti joun lun lídan jamá larúgounga lun larijiniwa luágu jarúma lan le jadügübei, láu lubáfu Búngiu.

Ladímurejanya Juan luágu Jesús

²² Lárigiñe sun cátei le, ába lídin Jesúsú jáu lání díspulugu Judéoun, ába leréderun átiri dan ñi, abásteragüdaja. ²³ Níñein giñe Juan abásteragüdaja lídan fulásu le giríbei Enón, yaráfa lun Sálím, ladüga ñíñein lan sarágu dúna, ába buríti jayábingua gürígia, ába jabásterun. ²⁴ Lubáragiñe ladaürün Juan lasúsereda sun cátei le.

²⁵ Ábati jagúmeserun jádaangiñe lánigu Juan asígeneja jáma jurífu luágu igáburi le lánina arúmaduni. ²⁶ Ábati jóudin aríñaga lun Juan.

—Aríjabásan maésturu, wügüri lé buga búmabei luágu óubaü le ñígiñe lubei láfurida wéyu libíti dúna Jordán, le ligíra lé meja uágubei badímureja woun, guetó labásteragüdajaña gürígia áni jafálaruñeiti sun gürígia.

²⁷ Ába lariñagun Juan joun.

—Siñáti níjein lan ni cáta lúma ni ában gürígia ánjein máma lubei líchugun Búngiu lun. ²⁸ Agáamba jumúti lubeígia nariñagun jun furáangu luágu máma lan áu Crístubei, luágu áu lan ában le oúnajóubei lubá. ²⁹ Lídan ában maríei, adári ligía táubei ladári. Léti lumáda adári, le ñíbei agáambe, oúnwenbun lugúndan láu lagáambuni ladímurejan. Ítara níña giñeti, oúnwenbun nugúndan luágu Jesúsú, ³⁰ ligía lúnti laweírigudúntima, áu lun núnabudúntima.

Le ñübinbei siélugiñe

³¹ Jesúsú, le ñübinbei siélugiñe, jóugiñeñein sun gürígia. Áu, múaruguna áu, áni lérügüñein lánina ubou gunfaráanda nan. Ánjein le ñübinbei siélugiñe, jóugiñeñein sun gürígia, ³² luágu giñe le aríja láalíbei lúma le agáamba láalíbei ladímureja, míbetiña afiñerutiña luágu le lariñagubei. ³³ Ánjeinti le afiñeruti, lachóururubei luágu inárúni lan le lariñagubei Búngiu, láu laríñerun. ³⁴ Le loúnajabei Búngiu, lerérun Búngiu ladímurejabei, ladüga mébejati líchuguni Búngiu lání Espíritu lun. ³⁵ Jínsiñeti Liraü Búngiu lun, rúlaali giñe sun cátei lújaburugun. ³⁶ Le afiñebei luágu Liraü Búngiu, gabágariti le magúmuchaditi,

ánjeinti le májabei laffínerun luágu Liraü Búngiu, mabágaribe líbe ibágarí ligía áni mebélurunbei siélun, láburujarügüba ligiáni Búngiu luágu.

4

Jesúsu túma würi to Samariána

¹ Aba jagáambun fariséogu luágu gíbetima jamá lánigu Jesúsu sügü jáu lánigu Juan, áni gíbetima gürígia nübintiña lun, lun jabásterun, ² láu sun máma lan Jesúsu abásteragüdajabaliña, lánigu abásteragüdajabaña. ³ Dan le lasúbudirunbalin Jesúsu cátei le, ába láfuridun Judéagiñe lun lagíribudun Galiléoun.

⁴ Lidan weíyaasu ligía lásügürúbati loúbawagugiñe Samária. ⁵ Ítara liñáti lachülürün lídoun ában fulásu lídan Samária gíriti Sícar, yaráfa lun múa lé meja lígirubei Jacób lun José le liraü, le ában jádaangiñe binádu wagübürigu. ⁶ Níñein wélu le únbei jagúara luwélun Jacób, queíti buchá lan luágu Jesúsu eíbuga, ába lañúurun láru wélu ligía. Quei burí amídirugu óra ligía. ⁷ Tiábijati ában würi Samariána adábura dúna lídaangiñe wélu le, ába laríñagun Jesúsu tun.

—Rúba dúna nun.

⁸ Añángüratí buga láni disípulugu agáñija eígini ubúругu. ⁹ Ábati taríñagun würi Samariána to lun Jesúsu.

—¿Ída liñági bamúriajanbei dúna núma, lárigiñe juríu ban, nugúya Samariána?

(Mínsiñeguatiñati juríu jóungua jáma Samariána.) ¹⁰ Aba laríñagun Jesúsu tun.

—Lun jamúga subúdi báni edéweejani le líchugubei Búngiu, subúdibeí jamúga cátei lan le amúriajabei dúna búma, bamúriajaña jamúga núma, ába jamúga níchugun ában luwúyeri dúna le gayáraati líchugun ibágarí bun, bun.

¹¹ Ába taríñagun lun.

—Úgubeíti cába lan áu badábura dúna áni julíiti wélu le, ¿ída lubáti bíchuguni luwúyeri dúna ligía nun? ¹² Jacób, lé meja binádu wadúgawagun, ígirubalin wélu le woun, guráti meja dúna lídaangiñe jáu sun lirájüñü jáma lilügüniña. ¿Weírigutibu funági sügü láu Jacób?

¹³ Ába laríñagun Jesúsu tun.

—Sun ja átubaña lídaangiñe dúna le, jamágürabudayaba, ¹⁴ ánjein le átuti lídaangiñe dúna le níchugubei, mamágürabudundügüyaali, ladüga dúna le lúnbei níchuguni lun, géseseenbei lídan lun líchugun ibágarí magúmchaditi lun.

¹⁵ Ábati taríñagun lun.

—Rúbei dúna ligía nun, masándirundügüyaadina lámuga mágürabu, miábin nugúyame ya wélurugu adábura dúna.

¹⁶ Ába laríñagun Jesúsu tun.

—Beíba ougei búmari le úmabei bamárieida, ábame bíábin.

¹⁷ Ába taríñagun lun.

—Mámaritina le maríeitina lúma.

Ábati laríñagun Jesúsu tun.

—Binárün láu baríñagun luágu mámari ban le maríeiti búma, ¹⁸ ladüga seíngüjájña wügüríña úmatíña bagánawa, áni mamárieiduntibu lúma wügüri le úmabei bagánawa guetó. Aríñagaadibu inárüni.

¹⁹ Dan tagáambubalin würi to cátei le, ába taríñagun lun.

—Affiñetina luágu proféta ban. ²⁰ Binádu wagübürigu ja Samariána, judúguatiña meja lun Búngiu ya luágu wübü lígita, ánjein jugúya juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

²¹ Ába lariñagun Jesúsu tun.

—Affiñebá nun luágu nítebei lan dan lun jájuduragun lun Búngiu mídinga jugúya luágun wübü lígita, ni jídin Jerusalén. ²² Jugúya Samariána, ibídiñeti jun ca lan un jájuduragua, ánjein wagia, subúdi wamúti ca lan un wájuduragua ladüga lídaangiñe warásan wagía juríu líabin asálbaruni. ²³ Lachülürüba óra, áni niján óra ligía, lun mebéresenwa lan jalía lan jájuduragua gürígia lun Búngiu. Le lúnbei lebéreserunwa láu, ída líña lan ligáburi jájuduragun lun. lúnti jadügüni táu sun janígi lídan ában luwúyeri le áuti lagúndaara Búngiu, según lerérun. Niján luwúyeri ájuduraguni le lálujabei Búngiu jámagiñe gürígia. ²⁴ Espíritu Búngiu, ja ájuduragubaña lun, lúnti jadügüni láu sun janárün, mebéresenga láu cátei le arijúati.

²⁵ Ába tariñagun lun.

—Subúditu nun luágu líabinba lan Mesías le gíribei Crístu, dánmeti líabin, lafúnraanguagüdübei sun cátei woun.

²⁶ Ába lariñagun Jesúsu tun.

—Áu Mesías ligía.

²⁷ Ligíati jachülürün láni disípulugu, ába laweíridun janígi láu jadáriruni Jesúsu adímureja túma ában würi, úati ni ában ganígiti lun lálügüdajan ca lan tabúseerubei o ca lan uágu layánuja túma. ²⁸ Ábati tígirunun würi tugúya tidína, ába tídin ubúruгу oúgaña gürígia, ába tariñagun joun.

²⁹ —Jígoúgu jaríja ában eyéri aríñaguti sun cátei le adüga náalibeí nun. ¿Mámadügü funásan ligía Crístubei?

³⁰ Ábati jóudingua ubúrugugiñe lun le ñíjin lubeí Jesúsu. ³¹ Añájati buga disípulugu ayúmuragua lun Jesúsu lun leígin. ³² Lariñaga joun.

—Níjein cátei lun neígini le ibídiñeti jun.

³³ Ábati jagúmeserun disípulugu álügüdagua jámagua, ába jaríñagun.

—¿Máfuna barújaña eígini lun?

³⁴ Ába lariñagun Jesúsu joun.

—Nadügüni lugúndan le oúnajabalina, agúmucheí luwádigimari, ligía neíginbei. ³⁵ Jugúya aríñagatün. “Níjeingua gádürü játi lubá alúbajani.” Ánjein áu, nariñajare jun. Aríja jumeí nádü, dánjali lun lalúbajoún. ³⁶ Le ñadágimeinbei alúbaja, íbíja lumúti lafáyeiruaja, áni cáteiti le lalúbajabei, gürígia, lun jabíjini íbágari le magúmchaditi síélu, lun lagúndaarun le ábunagubei úara lúma le alúbajabei. ³⁷ Quei le lubeíbei lariñawagún. “Ámu le ábunagubei, ámu le alúbajabei.” ³⁸ Oúnaja náadün alúbaja le ñí lubei mábunagun jumá, ámu ábunagubaña, jugúya alúbaja.

³⁹ Sarágu jáña lílana fulásu ligía le láni Samária affiñerutiña luágu Jesúsu láu tariñagun würi tugúya joun luágu aríñaga láni sun le adüga táalibeí tun.

⁴⁰ Dánti le jachülürünbei Samariána le ñí lubei Jesúsu, ába jayúmuragun lun lun leréderun jáma. Ába leréderun bían wéyu ñi, ⁴¹ ábaya jaffiñerun sarágu gürígia dan le jagáambunbalin le lariñagubei. ⁴² Ábati jaríñagun tun würi tugúya.

—Mámarügaali luágu le baríñagubei woun waffiñera, ladüga agáamba wamáali gíñe lúmagiñe, áni subúdi wamúti luágu ligía lan Crístubei le lasálbaja ubóu.

Lareidaguagüdüni Jesúsu liraü ában ñadágimeinti lúma urúei

⁴³ Bián wéyu lárigiñe, ába láfuridun Jesúsu Samáriagiñe, ába lasígiruni luweiyasun loúbawagun Galiléa, ⁴⁴ mídinti lageira quei laríñaguni Jesúsu guánarü luágu madügüniwa lan gásu láu ában proféta lídan guánarü lageira. ⁴⁵ Dan lachülürünbei Galiléa, resíbi jamúti lílana fulásu buídu, ladüga ñüdün jamá giñe lídan fédu le lánina páscua Jerusalén áni aríja jamúti sun le ladügübei lídan fédu ligía.

⁴⁶ Ábayati lagíribudun Jesúsu lídoun fulásu le Caná le lídaanbei Galiléa, le ñí lubei lasáliraguagüda dúna lun diweínme. Ñíñeinti ában wügüri weíriguti, ñadágimeinti lúma urúei, níjein ában liraü sánditi lídan fulásu le gíribei Capernaúm. ⁴⁷ Dan lagáambunbei wügüri ligía luágu ñübinjali lan Jesúsu Judéagiñe lun Galiléoun, ába lídin aríjei, ába layúmuragun lun lun lídin lúbifiñe lun lareidaguagüdüni liraü, ladüga madíseeli lan lun loúnwen. ⁴⁸ Ába laríñagun Jesúsu lun.

—Jugúya, ánjaün maríjin miláguru, maffíñetün.

⁴⁹ Laríñaga wügüri ligía lun.

—Queímoun furése lubáragiñe loúnwen niraü.

⁵⁰ Ábati laríñagun Jesúsu lun.

—Giríbubá búbiñoun, areidagua biraü.

Ába lafiñerun wügüri ligía luágu le laríñagubei Jesúsu lun, ába lídin. ⁵¹ Dan layárafadun tun lúban, ába jayábin lumúsuniña lubároun, ába jaríñagun lun.

—Magádieeli biraü.

⁵² Ába lálügüdüniña ca lan óra lagúmesera liraü areidagua, ába jaríñagun lun.

—Gúñaarü ladaüñrún ában rábounwéyu lagídara abírúaü lueí.

⁵³ Ába larítaguni luágu ligía lan óra laríñagun Jesúsu lun luágu areidaguaali lan liraü, ába lafiñerun luágu Jesúsu jáu sun lufámilian.

⁵⁴ Ligía libíaman miláguru le ladügübei Jesúsu dan le lagíribudunbei Judéagiñe lun Galiléoun.

5

Lareidaguagüdüni Jesúsu wügüri adádagaraali le Betésdana

¹ Lárigiñe cátei le, jadügüña juríu ában fédu, ába lagíribudun Jesúsu Jerusaléoun luágu fédu ligía. ² Ñi Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri. ³ Sarágu jáña sánditiña roun ñi múarugu, ñíñanu maríjintiña, meibuguntiña, jáma derégüdaña, jagúrabajañein lánjingichagun dúna. ⁴ Ladüga níjeinja dan, liábin ában ánjeli siélugiñe, ába lánjingichaguni dúna ligía, léti furúmiñeti sánditi le adáburuti lídoun dúna ligía lárigi lánjingichagun, ába lareidagun furúmieguarügü sándi le luágubei. ⁵ Ñíñeinti ában wügüri, darándi-widü irúmu láu láu sándi, ⁶ dan laríjínbalin Jesúsu wügüri ligía roun, subúdílei átiri lan dan láu ítara, ába laríñagun lun.

—¿Buséntibu bareidagun?

⁷ Ába loúnabun le sándiabei.

—Úati cába lan anügana lídoun dúna dan le lánjingichagun. Ságu nálugun nadáburun, dabújali ámu nubáragiñe.

⁸ Ába laríñagun Jesúsu lun.

—Sarába, budáboun bubárami, beíba.

⁹ Lídán óra ligía, ába lareídagun, ába labúðunun lubárari, ába lagúmeserun eíbuga. Queíti lídáani lubei eméraaguni wéyu ligía, ¹⁰ ába jariñagun juríu lun le areídagubei.

—Wéyu le eméraagugülei ugúñe, mouñ lumuti banügünun bubárari buougua.

¹¹ Ába lariñagun joun.

—Le areídagugüdübalina aríñagubei nun. “Budáboun bubárari, beíba.”

¹² Ába jariñagun lun.

—¿Cáteigi le aríñagubei bun. “Budáboun bubárari, beíba”?

¹³ Ibíðifetiti lun ca lan areídagugüdübalin, ladüga gíbetiña gürígia ñi áni ñüðünja bugáti Jesúsu. ¹⁴ Lárigiñe, ába ladúnragun Jesúsu lúma, témpulurugu, ába lariñagun lun.

—Guetó, quei areídaguaadibu lubei, mafígounjadügüyabá luei ladágarun ámu cátei janárimetimaati buágu.

¹⁵ Ábati lídin, ába lawíсарuniña juríu luágu Jesúsu lan areídagugüdübalin.

¹⁶ Ligía lébubei jeíbaajani juríu Jesúsu lun jáfaruni jilágubei ladüga buri ladáaguni cátei líbe le lídan wéyu le eméraagugülei. ¹⁷ Ába lariñagun Jesúsu joun.

—Ñadágimeinti Núguchi chülü lúmoun dan le, áu ñadágimeintina gíñe.

¹⁸ Ligiatimaati jabúseerunbei juríu jáfaruni jilágubei, mámarügü ladüga lálalachaguni lúrudu le lánina wéyu le eméraagugülei, ladüga gíñe líchaagun lúngua quei Búngiu láu lariñagun luágu Lúguchi lan.

Lugúmadin Liraü Búngiu

¹⁹ Ábati lariñagun Jesúsu joun.

—Nínárün jáu, luágu siñá lan nadügün, áu le Liraü Búngiu, ni cáta láu náni núngua, le rügüñein naríjubei ladügün Núguchi, nadüga. Sun le ladügubei Búngiu Úguchili, adüga numúti gíñe, áu le Búngiu Irájü, ²⁰ ladüga jínsifetina lun Búngiu, arúfuda lumúti sun le ladügubei nun, áni larúfuduba cátei weínamutimaati nun, le lúnti laweíridun janígi láu. ²¹ Ítara quei lásaaragüdüniña Búngiu Úguchili jiláaña lídaangiñe ouweni ába líchugun ibágari joun, itara líña gíñe níchugun, áu le Búngiu Irájü, ibágari joun ja nabúseerun. ²² Magúseragüdünti Búngiu ni ában, rúrügü lumúti sun ubáfu nun, áu le Liraü, lun nadügüni, ²³ lun sun lan gürígia íchigei ában méme inébesei le jíchugubei lun Búngiu Úguchili nun. Le míchuti inébesei nun, áu le Búngiu Irájü, míchuti gíñe inébesei lun Búngiu Úguchili le ouñajabalina.

²⁴ “Nínárün jáu, luágu le lan eténiruti lun le naríñagubei lun, affíne ligía luágu le ouñajabalina, gabágariti le magúmuchaditi, masíadirúnwabei gíñe, sügüjali lídaangiñe féridi lídoun ibágari le magúmuchaditi. ²⁵ Nínárün jáu luágu nítebei lan dan, áni níján dan ligía, dánme le jagáambuni jiláaña numálali, ja ñüðünbaña láu le nubeíbei, gabágaribaña. ²⁶ Ladüga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu Irájü, lun níchugun ibágari, ²⁷ rújali gíñe ubáfu nun lun nagúseragüdüniña gürígia ladüga Wügüri Garaúwarügüti áu. ²⁸ Maweíridalá janígi luágu le, ladüga lachülürüba dan lun jagáambuni sun jiláguaaña numálali, ²⁹ ábame jáfuridugua lídaangiñe jamúaja. Já meja arúfudubalin luágu nánigu jamá láu jadügüni buíti ubouágu, jásaaruba lun jaganouñ lúma Búngiu lun sun dan, ánjañati ja arúfudubalin luágu lánigu jamá

Máfia láu jadügüni wuríbani, jásaaruba lun jasíadirúniwa lun máfiougati lun sun dan.

Larífuduni Jesúsu lagúmadijan

³⁰ ‘Siñáti nadügün ni cáta láu náni núngua. Quei laríñawagúniwa nun, ítara líña nagúseragüdün, áni buíti ligáburí nagúseragüdün ladüga moučhun nan lun nadügüni le nabúseerubei, lueidügüya le labúseerubei Núguchi le oúnajabalina. ³¹ Ánjein ába lubeí geféen nuóugua, mounti le naríñagubei. ³² Níjein ámu le geféenbei luágu náni fuleísei, áni subúdi ni nun luágu le lan laríñagubei nuágu, gebégiti. ³³ Jugúya oúnajatün álügüdei Juan nuágu, áni le louñabagülebei jun, inarúni. ³⁴ Áu magúrabuntina ladímurejan ni ában wügüri luágu nufúleisein, narítaguagüda rügüñaadün luágu le laríñagubei Juan nuágu lun gayáraabei lan jafíñerun nuágu lun jasálbaruba lan. ³⁵ Ítara líñá meja Juan quei ában lámpu le durúnguati, ru ligía larúgounga, áni jugúya aráanseñu jíña méjati lun jerésibiruni larúgounga ligía luágu murúsun dan. ³⁶ Níjein ában cátei luágu nufúleisein buítimaati sügü láu le laríñagubei Juan. Lé buri cátei le nadügübei, le méme buri uágubei laríñaga Núguchi nun lun nadügüni, arúfuda lumúti luágu Núguchi lan oúnajabalina le tímataaati. ³⁷ Núguchi le oúnajabalina, arúfuda láali luágu áu lan Liraú le oúnajoubei lun nasálbaruniña gürígia uboúagu, láu sun magáambun jumágili lan lumálali Búngiu, maríjin jumeí. ³⁸ Mebélugili lerérun jídoun, ladüga mafíñetün nuágu, áu le louñajabei. ³⁹ Atúriaja jumútu Lerérun Búngiu láu sarágu gounígi, ladüga agúraba jumá jadáriruni íbágari le magúmuchaditi tídan, láu sun líra, líburu tugúya adímurejaboun nuágu, ⁴⁰ áni májatün jiábin númoun lun jíbíjini íbágari ligía.

⁴¹ ‘Máluajantina lun janügünina gürígia weírigo. ⁴² Gáma lúmoun, subúdi numútün, áni subúdi numúti luágu mísiñen lan Búngiu jun. ⁴³ Áu, lueígiñe loubadina Núguchi niábin, áni jugúya, merésibirun jumútina, ánjein núbün ámu láu láni lúngua, ligiaba jerésibira. ⁴⁴ ¿Ída lubásan jafíñerun nuágu, resíbitünga uweíríguni júmagíñegua, máluajan jumúti uweíríguni le lúmagíñeti Búngiu le ábanrügüti? ⁴⁵ Marítagua jumátia luágu níchuguba lan jidúnrun ligíbugiñe Núguchi, Moisés guánarügüba íchiga jidúnrun, le guánarügü uágubei jíchiği jeménigin. ⁴⁶ Ladüga, lun jamúga afíñe jumá luágu le laríñagubei Moisés, jafíñeruña jamúga gíñe nun, ladüga abürújati Moisés nibügürü. ⁴⁷ Ánjein mafíñen jubei luágu le labürújabei, ¿ída lubáti jafíñerun luágu le naríñagubei jun?

6

Leígagüdün Jesúsu seíngü mlu wügüriña (Mt 14.13-21; Mr 6.30-44; Lc 9.10-17)

¹ Lárígiñe, ába lídin Jesúsu loubáfurugun dúna le Galiléa, le méme gíñe dúna le gíribei Tibérias. ² Sarágu jáña gürígia afálareí ladüga jaríjini buri miláguru le ladáagubei, láu lareídaguagüdüniña sánditiña. ³ Ábati laweínrun Jesúsu luágun ában wúbü, ába lañúurun ñi jáma láni disípulugu. ⁴ Yaráfaaliti páscua, le jafédun juríu. ⁵ Dan laríjinbei Jesúsu luágu sarágu jáña lan gürígia afálaruti, ába laríñagun lun Felípe.

—¿Jalíabasan wagáñija eígini joun sun gürígia ja?

⁶ Laríñagunbalin líra lúnrügü lagáambun cába lan laríñaga Felípe, Jesúsu, subúdi láali cába lan ladüga. ⁷ Ábati laríñagun Felípe lun.

—Ni bián-san fiádürü fein louguaboun lun tafánreinjoúniwa murúsun murúsun jádan sun gürígia ja.

⁸ Ábati lariñagun Andrés, ában giñe jádaangiñe disípulugu, le lamúlen Simón Pédro, lun.

⁹ —Niján ában irájü ya, nújein seíngü fein lúma, jáma bián úduraü, louguabei líra joun sarágu gürígia.

¹⁰ Ábati lariñagun Jesúsu.

—Ariñaga jumá joun súnubei lun jañúurun.

Ñiñanuti jawára seíngü mílu wügüríña bougudin jawei würíña jáma irájüñü. Queíti ñiñein lan sarágu sagádi lídan fulásu ligía, ába jañúurun. ¹¹ Ábati lanügünun Jesúsu fein lújaburugu, lárigiñe líchugun eteíngiruni lun Búngiu, ába líchugunun joun láni disípulugu, ába jafánreinjanun disípulugu jádan sun ja ñunbaña. Ligía méme ladüga jáu úduraü, ruínaleí sun le jabúseerubei joun.

¹² Dan le quimúleña, ába lariñagun Jesúsu joun láni disípulugu.

—Abúdaja jumei sun le ígiragubei, mabúlegu lámuga ni cáta.

¹³ Ába jabúdajani, ába jabuínchagüdün dúusu faníñe láu tífe fein le ígiragubei tídaangiñe seíngü fein. ¹⁴ Dánti le jaríjinbalin gürígia miláguru le, le ladügubei Jesúsu, ába jariñagun.

—Inárüni luágu niján lan proféta lé meja lúnbei liábin ubouágun.

¹⁵ Queíti lasúbudiruni Jesúsu luágu busén jamá janügüni láu érei lun jadügüni urúeime, ába lídin lábuga luágun wúbü.

Leíbugun Jesúsu ligíbuagu dúna
(Mt 14.22-27; Mr 6.45-52)

¹⁶ Dan le lagüñedunbei, ába jarágachun láni Jesúsu disípulugu lárun dúna, ¹⁷ ába jádinagun tídoun ában ugúnein, ába jagúmeserun ánjiñuruga lun jachülürün Capernaúm. Búrigaaliti, machülüti Jesúsu jámoun. ¹⁸ Ába lagúmeserun garábali áfuragua jere, ába lérougadun. ¹⁹ Dan le awáanseña luára seíngü o sísi quilómetros, ligía jaríjin liábin Jesúsu tuágun ugúnein, eíbugeina ligíbuagu dúna, ába janúfudedagun. ²⁰ Ába lariñagun joun.

—Manúfudeda jumá, áu le.

²¹ Ábati jerésibiruni láu ugúndani tídan ugúnein, ába jachülürün lídoun fulásu le ñíjin lubei jóúdin lídan murúsun óra.

Jáluajani gürígia Jesúsu

²² Larúgan, ába jaríjin gürígia ja eréderubaña loubáfurugu luágu ñüdüñja jamá buga disípulugu tídan ugúnein to ñíboun áni tugúya rügüñoun ñi, áni mídin lan Jesúsu jáma. ²³ Súnti dan ligía, ába tiábingua ugúnein ubúrugugiñe Tibérias lun lídoun ában fulásu yaráfa lun le ñi lubei jeígoun fein lárigi leteíngirun Jesúsu tuágun. ²⁴ Dánti jaríjini gürígia luágu úa lan Jesúsu ñi, ni láni disípulugu, ába jádinagun tídoun ugúnein buri tugúya, ába jóúdin Capernaúm álujai.

Jesúsu, fein to lánina ibágarí

²⁵ Dan le jachülürünbei loubáfurugu dúna, ába jadáriruni Jesúsu, ába jariñagun lun.

—Maésturu, ¿ída búgasan biábin?

²⁶ Ába lariñagun Jesúsu joun.

—Ninárün jáu luágu ladüga lan jeígin darí lun jaquímuledun jáluajana, máma ladüga gunfaráanda jumáni laníchigu buri miláguru. ²⁷ Madíjerida jumá luágu

eígini le gagúmuchaditi le lúntibei júgubu, áluaja jumeí eígini tun juwáni, le íchugubei ibágari magúmuchaditi. Ligía eígini le lúnbei níchuguni jun, áu Wügüri Garaüwarügüti, ladüga rúlaali Búngiu Úguchili ubáfu nun lun níchuguni ibágari ligía.

²⁸ Ábati jaríñagun lun.

—¿Ída lubásan wadüga lun wouðin láu le lubeíbei Búngiu?

²⁹ Ába laríñagun Jesúsu joun.

—Le labúseerubei Búngiu, lun jaffínerun nuágu, áu le loúnajabei.

³⁰ Jaríñagati lun.

—¿Cábagi seíni gayára barúfudun woun lun waffínerun buágu? ¿Cági cátei badügübei? ³¹ Binádu wagübürigu jóutiña meja fein to gíriboun maná lídan fulásu mageírawati, quei taríñaguni Lerérun Búngiu. “Jouğüda lumútiña Búngiu fein to siélugiñetu.”

³² Ába laríñagun Jesúsu joun.

—Nínárün jáu luágu máma lan Moisés íchugubarun fein siélugiñetu tugúya joun, Nóguchi íchugubei fein joun áni ligía giñe íchugubarun fein siélugiñetu jun to tímátimaatu. ³³ Ladüga fein to líchuguboun Búngiu, tugúya to aráriruboun siélugiñe áni rúti giñe ibágari joun lílana ubou.

³⁴ Ábati jaríñagun lun.

—Rúboun fein tugúya woun súnwandan.

³⁵ Ába laríñagun Jesúsu joun.

—Áu fein to íchuguboun ibágari. Le ñübinti númoun, malámadügüyaarume luwáni, le affíneruti nuágu, mamágürabudügüyaaru giñe luwáni. ³⁶ Quei le nubeíbei jun, jugúya mafíñetün láu sun aríja jumáadina lan. ³⁷ Sun gürígia ja líchugubaña Nóguchi nun, ñübintiña nun, játi ñübintiña númoun mabúgun nubáña. ³⁸ Máma niábiña siélugiñe lun nadügüni nugúndan, le náni núngua, niábiña lun nadügüni lugúndan le oúnajabalina. ³⁹ Lėti labúseerubei Nóguchi le oúnajabalina, lun meferídirun nan ni ában jádaangiñe ja líchugubaña nun, lun sarágüdarügü nániña lídaangiñe ouweni lídaanme lagúmujoún wéyu. ⁴⁰ Le labúseerubei le oúnajabalina, lun sun lan ja anügütna queísi Liraü Búngiu, affíne jagía nuágu, lun gabágari jamá le magúmuchaditi, áni násaaragüdübaña lídaangiñe ouweni lídan lagúmujoún wéyu.

⁴¹ Ába jagúmeserun juríu adímureja wuríba luágu Jesúsu ladüga laríñagun luágu ligía lan fein to aráriruboun siélugiñe. ⁴² Ába jaríñagun.

—¿Ma funági Jesúsu le liraü José le? Subúdi wamúti lúguchi túma lúguchu. ¿Ída líñáti laríñagunbei luágu siélugiñe lan larárira?

⁴³ Ábati laríñagun Jesúsu joun.

—Madímureja jumá nuágu. ⁴⁴ Siñáti liábin ni ában númoun ánjein máma lubeí lanügün Búngiu Úguchili le oúnajabalina, áni násaaragüdübei lídaangiñe ouweni lídan lagúmujoún wéyu. ⁴⁵ Laríñajare tídan líburu to jerérun profétagu. “Larúfudajaba Búngiu joun súngubei.” Sun lubeiti ja agáambubalin Búngiu Úguchili, furéndeí jagía lúmagiñe, ñübintiña númoun.

⁴⁶ Máma jamúgatia luágu níjein lan aríjiti Búngiu Úguchili. Áu le ñübinbei lúmagiñe Búngiu, áu rügüñein aríjei. ⁴⁷ Nínárün jáu luágu le lan affíñeti nuágu, gabágariti le magúmuchaditi. ⁴⁸ Áu fein to íchuguboun ibágari. ⁴⁹ Jóutiña binádu jagübürigu fein to maná lídan fulásu mageírawati áni láu sun luwúyeri

jiláguatiña. ⁵⁰ Áu, tuágu fein to aráriruboun siéluigiñe nadímureja, lun ja lan eígitu, lúmounbaña Búngiu. ⁵¹ Áu méme fein wínwantu tugúya to aráriruboun siéluigiñe, le eígiti tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, núgubu guánarü, níchugubei lun gayáraabei lan jabágaridun gürígia lun sun dan lúma Búngiu.

⁵² Ábati jeréderun juríu adímureja jámagua, ába jariñagun.

—¿Ída lubásan leígagüdüni le lúgubu guánarü woun?

⁵³ Laríñaga Jesúsu joun.

—Nínarün jáu luágu ánjaün lan meígin lídaangiñe núgubu, áu Wügüri Garaüwarügüti, mátun jumeíme níta, mabágaribadün. ⁵⁴ Le eígiti núgubu, gurálei níta, gabágariti tímatimaati le magúmuchaditi, áni násaaragüdübei lídaangiñe ouweni lídan lagúmujóun wéyu. ⁵⁵ Ladüga eígini le tímatimaati núgubu, uníñein le tímatimaati níta. ⁵⁶ Le eígiti núgubu, gurálei níta, lídaañein ában núma, áu lúma. ⁵⁷ Úguchili le ouñajabalina, gabágariti, áni áu, gabágaritina giñe lídaangiñe, itara méme líña, le awínwanduti nídaangiñe, gabágaribei nídaangiñe. ⁵⁸ Tuágu fein to aráriruboun siéluigiñe nadímureja. Mítaraantu fein to quei maná le jeígubei binádu jagübüriugu, láu lan sun luwúyeri jiláguatiña, le eígiti tídaangiñe fein to, labágariduba tímatimaati lun sun dan lúma Búngiu.

⁵⁹ Lídan adámuridaguni tídan jalígilisin juríu to Capernaúboun, ñi larúfudajei Jesúsu cátei le.

Dimúrei lánina ibágarí magúmuchaditi

⁶⁰ Sarágu jáña jádaangiñe ja afálarubalin Jesúsu, dan le jagáambunbalin arúfudajani le, ába jariñagun.

—Cátei le laríñagubei, jénrenguti lerésibirúniwa, ¿cábasan adüga gásu láu?

⁶¹ Ába lasúbudiruni Jesúsu luágu jadímurejaña lan luágu cátei ligía, ába laríñagun joun.

—¿Wuríbati láburujan líra jun? ⁶² ¿Cába jamúga funáti asúsereda ánjana jamúga jarija, áu Wügüri Garaüwarügüti, awárira nárigoún siélun lé meja ñi nubei furúmiñe? ⁶³ Náni Espíritu, ligía íchugubei ibágarí tímatimaati, núguburügü, siñáti líderagunün. Áni sún buri cátei le naríñagubei jun, máma luáguti eígini le lúnti jurágeirugu, luáguti eígini le túnti juwáni, le íchugubei ibágarí magúmuchaditi. ⁶⁴ Áni añájeingua jádaangiñe, maffíñetiña.

Ladüga lúmagiñe furúmiñeti dan, subúdi láña Jesúsu cátaña lan maffíñebaña, lúma cátei lan le lúnbei lalúguruni. ⁶⁵ Ába laríñagun.

—Ligía naríñagunbei jun luágu siñá lan liábin ni ában númoun ánjein máma lubei Núguchi Búngiu agúarubei lun.

⁶⁶ Lúmagiñe dan ligía, sarágu jáña jádaangiñe ja afálarubalin Jesúsu, ába jígiruni, ába meíbugunjaña lan lúma. ⁶⁷ Ábati laríñagun Jesúsu joun dúusu disípulugu.

—Ángi jugúya, ¿buséntün giñe jídin nueí?

⁶⁸ Ába louñabun Simón.

—¿Cábagi úmoun wouñin? Dimúrei buri le bariñagubei, lánina ibágarí tímatimaati le magúmuchaditi. ⁶⁹ Wagía affíneediwa, áni subúdi wamúti luágu amürü lan Crístubei le Liraü Búngiu wínwanti.

⁷⁰ Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, níjein ában jádaangiñe láni Máfia.

71 Dan lariñagunbalin Jesúsu líra, luáguñein Júdas, le liraü Simón Iscarióte, ladüga ligiába lan alúgurei, láu sun ában lan jádaangiñe dúusu disípulugu ligía.

7

Mafiñeruntiña lamúlenu Jesúsu luágu

¹ Lárigiñe sun cátei le, ába eibugañaja lan Jesúsu loúbawagu Galiléa, mabúseerunti leréderun Judéa ladüga ñi busentiña juríu jáfaruni jilágubei.

² Queíti yaráfaali lan ában lídaangiñe jafédun juríu le gíribei tufédun dibásein,

³ ába jariñagun lamúlenu lun.

—Meréderabá ya, beíba Judéoun aríja jamámugei giñe bánigu ja ñibaña cátei lé buri badügübei. ⁴ Dan le busén lan ában güriquia lasúbudirúniwa, madügün lumúti buri cátei arámudaguarügü. Queíti adüga ban cátei líbeina le, adügabei ligibugiñe sun ubouü.

⁵ Ni íbini lamúlenu mafiñetiña luágu. ⁶ Ábati lariñagun Jesúsu joun.

—Machülügili dan lun nídin Jerusalén luágu fédu ligía, ánjein jun, buíti furúmíerügü óra. ⁷ Siñáti jiyéeregudún joun ja lánina ubouü le, anáti áu, iyéeregutina joun, ladüga geféentina luágu wuríba lán buri cátei le jadügübei.

⁸ Jeíba lídan fédu, áu mídinbadina guetó, machülügili nidáani lun nídin.

⁹ Lárigiñe lariñaguni sun le joun, ába leréderun Galiléa.

Jesúsu lídan fédu le tánina dibásein

¹⁰ Lárigiñe jouđin lamúlenu, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijouniwa. ¹¹ Ítara líña jáluajani juríu lídan fédu ligía, ába jariñagun.

—¿Jageí funásan wügüri le?

¹² Sarágu jañáti adímurejatiña luágu jádan güriquia. Ñíñanu aríñagutiña luágu ában lan wügüri buíti ligía, jíbiri aríñaga. “Mabuídunti, yéegua lumútiña güriquia.”

¹³ Úati ni ában adímurejati furáangu luágu, ladüga janúfude jawei juríu.

¹⁴ Lamídownjali fédu lúmagua, ligía lebélorun Jesúsu témpulurugun, ába lagúmeserun arúfudaja. ¹⁵ Ába laweíridun janígi juríu, ába jariñagun.

—¿Ída líñásan lasúbudirunbei le sarágu cátei, matúriajaanga ligía?

¹⁶ Ába lariñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina. ¹⁷ Ánjein níjein lubei ában le aráanseti lun ladügüni le labúseerubei Búngiu, lasúbudirubei ánjein lúmagiñeti lubei Búngiu le narúfudajabei lúmoun luágu lan náni núngua nadímureja. ¹⁸ Le adímurejabei luágu láni lúngua, ladügüni lun janügüni güriquia weíri, le oúchubei lun lanügüniwa le oúnajabalin weíri, ligía aríñagubalin inárüni, áni máma ligía biángua tigíbu.

¹⁹ ¿Ma inárüni luágu rúlaani Moisés lúruđu jun? Láu sun líra, úati ni ában jídaangiñe úaraduti lúma lúruđu ligía. ¿Ca uágu jabúseera jáfarunina jilágubei?

²⁰ Ába jariñagun lun.

—Níjein espíritu wuríbati bídan, ¿ca busénbei láfarunibu jilágubei?

²¹ Ába lariñagun Jesúsu joun.

—Luágurügü ában cátei le nadügübei lídan wéyu le eméraguagülei laweírída janígi sun jugúya. ²² Arúfudaja lumúti Moisés luáguti jagáburi juríu le circuncisión, (láu sun máma lan ligía agúmeserubalin igáburi ligía, jagúmeserun bináđu lagübürigu lubáragiñe), ligía lébubei lerésibirun ában irájü circuncisión íbini

lídaan lan wéyu le eméeraaguagülei. ²³ Ánjein adüga jubálin líra íbini lídaan lan wéyu le eméeraaguagülei lueírügü jadüraaguni lílürudun Moisés, ¿cáti uágu jagáñida núma lueígiñe nareidaguagüdüni lúgubu ában wügüri dayáruugubei lídaan wéyu le eméeraaguagülei? ²⁴ Masáminara jumá luágu cátei quéisi larijiniwa, samína jumá luágu quéisi lubeí.

Ladímurejan Jesúsu luágu ladügawagún

²⁵ Ábati jagúmeserun jádaangiñe ja aganóubaña Jerusalén álügüdjaja.

—¿Másan niján le jáluajabei lun jáfaruni jilágubei? ²⁶ Nijánga adímureja ligíbugiñe guríriguaü, áni úati ni ában aríñaguti ni cáta lun. ¿Léfunasan afiñe jamá gumádimatiña luágu wügüri lan le Crístubei? ²⁷ Subúdiiti woun jalíagiñe lan liábin le, ánjeinti dánme le liábin Crístu, ibídiñebei ni ca un jalíagiñe lan liábin.

²⁸ Dan lagáambubalin Jesúsu cátei le, dan larúfudajaña lubeí témpulurugu, ába lariñagun rein.

—¡Subúdi jumútina lubeíti, subúdi jumeí jalíagiñe lan niábin! Máma láu náni núngua niábin, ában le inárünibeí luágu níjein lan, ligía oúnajabalina, áni ibídiñeti jun. ²⁹ Áu, subúdi numúti ladüga lúmagiñe lan niábin, áni ligía oúnajabalina.

³⁰ Ába yebéti jabúseerun jadáürüni, úati ni ában agúuruti luágu ladüga machülügili lan dan lun louñwen. ³¹ Sarágu jáña afiñerutiña luágu, ába jariñagun.

—Dánme le liábin Crístu, ¿ladügüba funági ámu milágoru sügü láu wügüri le?

Jounajan fariséogu polisia adáürei Jesúsu

³² Ába jagáambuni fariséogu le jariñagubei güriágu luágu Jesúsu, jagía jáma jábutigu fádorigu, ába jounajan polisia témpulurugugiñe lun jadáürüni. ³³ Ábati lariñagun Jesúsu.

—Murúsunrügübei dan neréderun júma ya, ábame nagíribudun lúmoun le oúnajabalina. ³⁴ Jáluajabadina, madári jubádina, ladüga siñábei lan jidin le ñijnbadina lubeí.

³⁵ Ábati jagúmeserun juríu álügüdagua jámagua.

—¿Jalíñounba funásan lídin le siñábei lubeí nege wadáriruni? ¿Leíbuga funa jámoun juríu ja jagánaguabaña güriágu ja güriégu, lun larúfudajan joun güriégu?

³⁶ ¿Ca míni lan láu lariñagun woun. “Jáluajabadina, madári jubádina ladüga siñábei lan jidin le ñjbadina lubeí”?

Líseesen dúna wínwanti

³⁷ Le lagúmujoún wéyu lídaan fédu ligía, ligiatima weírigubei. Lídaanti wéyu ligía, ába laráramun Jesúsu, ába lariñagun láu umálali reínti.

—Le mágürabutu luwáni, nübinlá númoun, gurála. ³⁸ Le afiñeti nuágu, láwiyujaba dúna wínwanti tídaangiñe lanígi, quei tariñaguni Lerérun Búngiu.

³⁹ Lariñaguña Jesúsu láu líra luágu ja lan afiñerutiña luágu, jerésibirubei lan Sífiri Sándu, dan ligía, miábingili Sífiri Sándu ladüga magíribudungili lan Jesúsu larigoún siélun lídoun luweírigun.

Fánreinguau jádan güriágu

⁴⁰ Níñanu jádaangiñe güriágu, dan le jagáambunbalin cátei le, ába jariñagun.

—Inárüni luágu niján lan proféta lé meja lúnbei liábin.

⁴¹ Jariñaga jíbiri.

—Niján Crístubei.

Jaríñaga jíbiri.

—¿Ída lubásan Galiléanabei lan Crístu? ⁴² Tariñajare Lerérun Búngiu luágu ladúgawagunbei lan urúei Davíd Crístu, áni Beléngiñetibe lan, fulásu meme le ñúgiñeti lubei Davíd.

⁴³ Ába lubeíti jafánreinragun gürígia lueígiñe Jesúsu. ⁴⁴ Ñíñanu yebe abúseerutiña jadáürüni, úati ni ában adúgüti.

Mafñetiña gumádimatiña luágu Jesúsu

⁴⁵ Ába jagíribudun polisía ja tánina témpulu jarigóun jámoun fariséogu jáma jábutigu fádirigu. Ába jaríñagun joun polisía.

—¿Ca uágu manügün jubálin?

⁴⁶ Ába jaríñagun polisía.

—¿Úagili ni ában adímurejati quei ladímurejan wügüri le!

⁴⁷ Ábati jaríñagun fariséogu joun.

—¿Ígiraguagüdaadün giñe júngua lun leyéedunün? ⁴⁸ ¿Níjein funági ában jádaangiñe wábutigu o jádaangiñe lan fariséogu afíñeruti luágu? ⁴⁹ Ánjaña gürígia ja, ja afálarubalin wügüri ligía, ja ibidiñejabubaña lun lúrudu, íñarawagúaaña.

⁵⁰ Nicodémo, le ñúdünbei adímureja lúma Jesúsu gúñoun, ligía ában jádaangiñe fariséogu, ába laríñagun joun.

⁵¹ —Según walúrudun, siñáti wasíadiruni ában wügüri magáambunga wamei furúmiñe lun wasúbudiruni ca lan lidúnrunbei.

⁵² Ábati jaríñagun lun.

—¿Galiléana giñe amürü, badímurejaanbei luágu lufúlesein? Atúriajabóun Lerérun Búngiu, basúbudirubei luágu úagili lan ni ában proféta Galiléana.

⁵³ Ába jóudin cáda ában jábiñoun.

8

Würi maríeitu to aganoúboun luma ámu wügüri

¹ Anjeinti Jesúsu, ába lídin luágun wübü le giríbei Olívos. ² Larúgan bináafin, ába lagíribudun témpulurugun, ába jayábin sun gürígia lubádun, ába lañúurun, ába lagúmeserun arúfudaja joun. ³ Ábati janügün arúfudajatiña lilúrudun Moisés jáma fariséogu ában würi jádáriragun lúma ámu wügüri luei túmari. Ába jíchugunun jamídaangua ja ñibaña jámagua, ⁴ ába jaríñagun lun Jesúsu.

—Maésturu, nuján würi to, wadáriragun lúma ámu wügüri luei túmari.

⁵ Laríñajare lilúrudun Moisés jawágu jíbe würiña ja, lun jáfarawagún jílagubei láu dübü. ¿Cági bariñagubei?

⁶ Jaríñagunbalin líra lun jaríjin lábun, lun gébuna lan jíchugun lidúnrun. Ábati lélemuchun Jesúsu, ába labürüjan múarugu láu lújabu. ⁷ Queíti jasígirun álügüdaguei, ába laráramun, ába laríñagun joun.

—Furúmiñeguarügü jídaangiñe le mafígounti, chüleí furúmiñeti dübü tuágu.

⁸ Ábaya lélemuchun, ába lasígirun abürüja múarugu. ⁹ Jagía, le jagáambubalin le laríñagubei, ába jasándiragun jóungua luágu gafígoun jamá, ába jáfuridunga ában ában, jagúmesera jámagiñe ja weinamutimáajañabaña. Dánti le furijaña súngubei, ába ladáriragun Jesúsu lúngua lábugua túma würi tugúya quei teréderunbei ñi.

¹⁰ Ábati liñúraguni Jesúsu lichügü, ába laríñagun tun.

—¿Jagáñasán buga ja íchugubaña bidúnrun? ¿Úati ni ában asíadirutibu lun bouñwen?

11 Ába tariñagun lun.

—Uá, úati ni ában.

—Ábati lariñagun Jesúsu tun.

—Ni áu, masiadirun nubádibu, beiba, madügadügüyabá figou.

Jesúsu lilámpun ubou

12 Ábaya ladímurejan Jesúsu joun gürígia, ába lariñagun.

—Áu lilámpunbei ubou, le afálarutina, libíjubei larúgounga le anügübei gürígia lídoun ibágarí magúmuchaditi, áni meíbugunbei lídan lubúriga.

13 Ábati jariñagun fariséogu lun.

—Amürü, badímurejaña buíti buougua, mebégiti líra.

14 Ába lariñagun Jesúsu joun.

—Le nariñagubei gebégiti, láu sun áu lan adímurejabei buíti nuougua. Áu, subúdi numúti jalíagiñe lan niábin lúma jalíñounba lan nídin, ánjein jugúya, ibídiñeti jun jalíagiñe lan niábin ni jalíñounbadina lan. 15 Jugúya, jasáminarun nuágu queísi luwúyeri lasáminarun ubou, áu, magúseragüdüntina ni ában. 16 Ánjana jamúga agúseragüda, nadügüñein jamúga láu úarani, ladüga mámarügüba áu agúseragüda, Nüguchi le ouñajabalina lagúseragüdüba giñe núma. 17 Bürüwati lídan jílürudun luágu dan lan geféen jamá bián gürígia luágu ában méme cátei, lúnti lan lafiñerún joun. 18 Ítara liñáti áu ában le geféenbei luágu náni fuleísei, Nüguchi le ouñajabalina, ligía giñe ában le geféenbei nuágu.

19 Ábati jariñagun lun.

—¿Jageígi Búguchi?

Ába lariñagun joun.

—Jugúya, ibídiñetina jun, ni Nüguchi, ibídiñeti giñe jun, lun jamúga subúdi jumánina, subúdi jamúga giñe Nüguchi jun.

20 Lídan lariñagubalin Jesúsu cátei le, larúfudajaña témpulurugu lídan fulásu le ní tubei buri gáfu to lágei seínsu. Madáürün lumúti ni ában ladüga machülügili lan lidáni lun louñwen.

Lariñajare Jesúsu joun luágu siñá lan jeidin ñjinba lubei lídin

21 Ábaya lariñagun Jesúsu joun.

—Áu, neíbuga, jugúya jáluajabadina, jóüweguba gafígounga, siñáti jídin le ñjinba lubei nídin.

22 Ábati jariñagun juríu.

—¿Láfaragua funa lúngua, lariñagunbei luágu siñá lan wouúdin le ñjinba lubei lídin?

23 Ábati lariñagun Jesúsu joun.

—Jugúya, ünabuna jugúya, ánjein áu, yágütana íñu áu. Láni ubou le jugúya, ánjein áu, máma láni ubou le áu. 24 Ligía nariñagunbei jun luágu jóüweguba lan gafígounga, ladüga ánjein mafíñen jubei luágu áu lan áu, jóüweguba ítara.

25 Ábati jariñagun lun.

—¿Cátabuti?

Ába lariñagun joun.

—Aríñaga náali jun lúmagiñe binárü. 26 Gayáraati jamúga nariñagun gibeti jun luágu luríban jigáburí lun nadeínjan jun, le ouñajabalina aríñaga lumúti inárüni, áni cáteirügübei le nagáambubei lúmagiñe le ouñajabalina nariñaga joun ja lílana ubou.

27 Ánjein jagía, úati gunfaráanda jamáni láu luágu lan Búngiu ladímureja Jesúsu joun. 28 Ligía laríñagunbei joun.

—Dánme le jiñúrurina, áu Wügúri Garaúwarügüti, ligíame jasúbudiruni luágu áu lan le uágubei nariñaga luágu áu lan, áni madügün nan ni cáta luágu náni nungua, lueidügüya le larúfudajabei Nóguchi nun. 29 Ladüga númañein le oúnajabalina, mígiran lágidina Nóguchi nábugua, ladüga adüga náni le áubei lagúndaara súnwandan.

30 Dan le laríñagunbalin Jesúsu le, ába jafiñerun sarágu luágu.

Lirájüñü Búngiu jáma lidámuniña figou

31 Ába laríñagun Jesúsu joun juríu ja ánjarubaña lun lerérun.

—Ánjaün asígira lun jídin surúñu láu le nubeibeí jun, jiábinba lun náni jumá disípulugu le timatimaati. 32 Ábame jasúbudiruni inárüni, ábame lafúnraanguagüdünün inárüni.

33 Ába jaríñagun lun.

—Linébaanfaangu Abrahám wagía, áni merédegidiwa idámunime ni ca un. ¿Ída liñáti bariñagunbei luágu furáangujadiwa lánme?

34 Ába laríñagun Jesúsu joun.

—Ninárün jáu, luágu sun lan ja adágubaña figou, lidámun figou jagía.

35 Ában idámuni, máma jádaangiñeti família, ánjeinti ában isáani, jádaangiñeti família súnwandan. 36 Ánjaün lubeíti nafúnraanguagüda, áu le Búngiu Irájü, lídaangiñe idámuni lun figou, furáangubadün le timatimaati. 37 Subúdi náali luágu linébaanfaangu jumá Abrahám, láu sun líra, buséntün jáfarunina, ladüga mája jumá lun le nubeibeí jun. 38 Áu nadímurejan luágu le larúfudubei Nóguchi nun, júgüya jadügüni le jafúnrendeirubei lúmagiñe júguchi, le Máfia.

39 Ába jaríñagun lun.

—Abrahám wáguchibeí.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadügüñein jamúga le ladügübeí. 40 Láu sun aríñaga náali lan inárüni le larúfudajabei Búngiu nun jun, buséntün jáfarunina. ¡Madügüti meja Abrahám ni cáta líbe líra! 41 Le méme ladügübeí júguchi, ligía jadügübeí.

Ábati jaríñagun lun.

—Mámata wagía bástadi, ában rügüñein wáguchi, Búngiu.

42 Ába laríñagun Jesúsu joun.

—Ánjein jamúga Búngiu lubeí júguchibeí, jínsiñetina jamúga jun ladüga lúmagiñe Búngiu niábin, áni anája ya. Máma láu náni nungua niábin, Búngiu oúnajabalina. 43 ¿Ca uágu lásiñerunbei gunfaráanda jumáni le nariñagubeí? Ladüga mabúseerun jumá jagáambuni náni ugánu. 44 Máfia júguchibeí, lánigu júgüya, áni buséntün jadügüni lugúndan. Gáfarajadigubeíñein Máfia lúmagiñe furúmiñeti dan. Márügüdünti lueigiñe inárüni, maríñagunti giñe inárüni. Lídan le laríñagun iyéeni, ladímurejaña quei ligáburi, ladüga yéeti áni ligía lúguchibeí iyéeni. 45 Ánjeinti áu, quei inárüni lubeí nariñagubeí, mafiñetün nun. 46 ¿Ca jídaangiñe gayáraabeí larúfuduni luágu gafígon nan? Ánjeinti inárüni lubeí nariñagubeí, ¿cáti uágu mafiñen jubeí nun? 47 Le lánigu Búngiu, agáamba lumúti lerérun Búngiu, ánjeinti júgüya, quei máma jubeí lánigu Búngiu, ligía mája jubeí jagáambuni.

Njeinjali meja Crístu lubáragiñe Abrahám

⁴⁸ Ábati jariñagun juríu lun.

—Wanárun láu wariñagun luágu máma ban ámu jawei jagübüri Samariána, luágu giñe njein lan ában espíritu wuríbati bídan.

⁴⁹ Ába lariñagun Jesúsu joun.

—Úati espíritu wuríbati nídan. Le nadügübei, níchuguña inébesei lun Núguchi, jugúya, íchiga minébeni nun. ⁵⁰ Máluajaantina inébesei nungua, láu sun njein lan ában áluga lumúti ninébesi, áni ligía le agúseragüdübei. ⁵¹ Ninárün jáu luágu le lan adügüti gásu láu le nubeíbei, mouñwenbei lan.

⁵² Ábati jariñagun juríu lun.

—Anáti guetó, chouúu wamáali luágu njein lan espíritu wuríbati bídan. Jiláti Abrahám, jilágu profétagu, áni aríñagagibu luágu le lan adügüti gásu láu le bubeíbei, mouñwenbei lan. ⁵³ ¿Cátabuñadibugi lúmoun wáguchi Abrahám? Jiláti Abrahám, jilágu profétagu. ¿Ída liñáti banáangun búngua?

⁵⁴ Ába lariñagun Jesúsu joun.

—Ánjana íchiga uweíríguni nuóúgua, málabei, ánjeinti Núguchi, le méme uágubei jariñaga luágu ligía lan Jubúngiutebei, ligía íchugubei uweíríguni nuágu. ⁵⁵ Jugúya, ibídiñeti Búngiu jun, anáti áu, subúdiiti nun, áni ánjana jamúga aríñaga luágu ibídiñe lan nun, yéetina jamúga giñe quei jugúya. Subúdiiti Búngiu nun le tímataaati, áni adúga numúti le lubeíbei. ⁵⁶ Abrahám lé meja binádu júguchi, gúndaati meja láu lasúbudiruni luágu lachülürüba lan nuwéyuri lun niábin ubóúagun queísi asálbaragülei, buin líña láu ugúndani dan laríjini wéyu ligía.

⁵⁷ Ábati jariñagun juríu lun Jesúsu.

—Úagubeígili ní dimí-san írúmu báu, ¿aríñagatibu luágu aríja báni Abrahám?

⁵⁸ Ába lariñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

⁵⁹ Ába jabúdajan dübü lun jachüraguni luágu, ába larámudagun, ába láfuridun témpulurugugiñe, ába lásügürün jamídaangiñe, ába lídin.

9

Lareidaguagüdün Jesúsu ában wügüri maríjinti

¹ Lídan le lásügürün Jesúsu lídaangiñe ában fulásu, ába laríjin ában wügüri maríjinti lúmagiñe lagüriajóun. ² Ába jariñagun láni disípulugu lun.

—Maésturu, ¿cásan uágu lagüriajóunbei wügüri le maríjina? ¿Ladúgason jafígoun lagübürigu, o ladúga lífígoun guánarú?

³ Ába lariñagun Jesúsu joun.

—Máma ladúga lífígoun, máma giñe ladúga jafígoun lagübürigu, lasúseredunbei ítara lun larijóuniwa le luáraabei Búngiu adúga láu lareidagun wügüri ligía. ⁴ Lúnti nadügüni luwádigimari Búngiu le ouñajabalina sun wíñwángidina lan, jiláadina ligíame, siñáme nadügüni. ⁵ Sun dan anája lan ligíbuagu ubóu le, áu lilámpunbei ubóu.

⁶ Láriigiñe lariñaguni Jesúsu cátei le, ába lásuerun múarugun, ába ladügün murúsun gubégubeti láu larüre, ába lájuruduni luágu lágu le maríjinbei. ⁷ Ába lariñagun lun.

—Beíba achíbei bigíbu lídan dúna le gíribei Siloé —míni lan líra, Oúnajóuti.

Ába lídin maríjinti ligía, ába lachíbuni ligíbu ñi, dan le lagíribudunbei, aríjaali.
 8 Játí lubésinanigu jáma gürígia já meja aríjubalin amúriaja, ába jaríñagun.

—¿Másan nijáñaja le añúurubei amúriaja seínsu?

9 Ñíñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába lariñagun wügüri ligía.

—Ánja, áu.

10 Ábati jaríñagun lun.

—¿Ída liñáti aríjaadibu lubeí?

11 Ába lariñagun joun.

—Wügüri le gíribei Jesúsú, ligía adügübei murúsun gubégubeti, ába lájuruduni luágu nágu, ába lariñagun nun. “Beíba lídan dúna le gíribei Siloé, ábame bachíbuni bigíbu ñi.” Ábati nídin, lásun nachíbuni nigíbu, ába naríjin.

12 Ábati jaríñagun lun.

—¿Jageígi wügüri ligía?

Lariñaga joun.

—Ibídíñeti nun jageí lan.

Jálügüdaguni fariséogu maríjinti le areídaguagüdüwalibeí

13 Ábati janügüni wügüri lé meja maríjinbei jagíbugiñoún fariséogu.

14 Queíti lídan lan wéyu le eméraaguagülei ladügei Jesúsú gubégubeti le áubei lareídaguagüdei maríjinti ligía, 15 ába giñe jálügüdüni fariséogu wügüri ligía ída líña lan gayáraajali lubeí laríjin. Ába lariñagun joun.

—Ába líchugun gubégubeti luágu nágu, ába nachíbuni nigíbu, guetó aríjaadina.

16 Ábati jaríñagun jádaangiñe fariséogu.

—Le wügüri le adügübalin cátei le, siñáti loúnagüle lan Búngiu ladüga minébenti wéyu le eméraaguagülei lun.

Jaríñagati jíbiri.

—¿Ída liñáti ladáaguni buri miláguru le, ánjein gaffigoun lubeí?

Ába lubeíti ñi lan fánreinguaú jádan. 17 Ábaya jálügüdüni lé meja maríjinbei.

—Ángi bugúya, ¿cági bariñagubei luágu wügüri le, queísi bugúya lubeí le laríjagüdübei?

Ába lariñagun.

—Nugúya, nariñagun luágu ában lan proféta.

18 Májatiña yebe fariséogu jafiñerun luágu maríjin lán meja wügüri ligía áni aríjaali lan guetó, darí lun jagúarun joun lagübürigu, 19 ába jaríñagun joun.

—¿Nijánsan jiraú le uágubei jaríñaga luágu maríjin gubeíñein lan lúmagiñe lagúriajoun? ¿Ída liñáti aríjaali lubeí guetó?

20 Ába jaríñagun lagübürigu.

—Subúdi wamúti luágu waraú lan le, áni maríjin lan dan le lagúriajounbei, 21 ibídíñeti woun ída líña lan aríjaali lubeí, ni ca lan areídaguagüdübalin lágu. Álügüda jumeí, weíriyaali, gayáraati loúnabun lueígiñegua.

22 Anúfudeiti aríñagagüdübalin líra joun lagübürigu wügüri ligía, ladüga aríñagaaña lan fariséogu luágu sun lan ja affíñerutiña luágu Jesúsú lan Crístubei,

jabugúba lan tídaangiñe jalígilisin juríu. ²³ Ligía jaríñagunbei lagübürigu. “Álügüda jumei, weíriyaali.”

²⁴ Ábayati jagúarun juríu lun wügüri lé meja maríjinbei, ába jaríñagun lun.

—Aríñagabei inárüni woun ligíbugiñe Búngiu, wagía, subúdiri woun luágu gaffigoun lan wügüri líra.

²⁵ Ábati lariñagun joun.

—Íbidiñeti nun ánjein gaffigoun lubei lúmoun maffigoun lan. Le nasúbudirubei, luágu maríjin nán meja, áni guetó aríjaadina.

²⁶ Ábaya jaríñagun lun.

—¿Cásan ladügübei báu? ¿Ída liñásan ladüga lun laríjagüdünibu?

²⁷ Ába lariñagun joun.

—Aríñaga náali jun, mebéreseguntün náu, ¿cáti uágu jabúseera nariñaguniya jun? ¿Ódi buséntün giñe jafálaruni?

²⁸ Ábati janábuni, ába jaríñagun lun.

—Bugúya, falá bumuti larúfudajan wügüri ligía, ánjein wagía, larúfudajan Moisés wafálarubei. ²⁹ Subúdiri woun luágu adímureja lán meja Búngiu lun Moisés, ánjein le, íbidiñegubeíti woun jalíagiñeti lan.

³⁰ Ábati lariñagun wügüri ligía joun.

—¡Ámuti giñe cátei le! ¡Íbidiñeti jun jalíagiñeti lan, áni aríjagüda lána!

³¹ Subúdiri woun luágu magáambun láníña Búngiu gaffigountiña, ja rügüñanu ájuduragubaña lun jáma ja adügübalin lugúndan, lagáamba. ³² Magáambuñajagili luágu ni ában aríjagüdüti ában gürígia le agüríajouti maríjinga. ³³ Lun jamúga máma lan lúmagiñe Búngiu liábin wügüri le, siñáti jamúga ladügün ni cáta.

³⁴ Ábati jaríñagun lun.

—¿Bugúyasan le agüríajoubei buin láu figou, buséntibu barúfudajan woun?

Ába jabúguni tídaangiñe jalígilisin.

Ja maríjмбаña luágu cátei lánina Búngiu

³⁵ Ába lagáambuni Jesúsu luágu bugá jamaani maríjinti meja ligía, dánti le ladúnragun lúma, ába lariñagun lun.

—¿Afiñetibu luágu Liraü Búngiu?

³⁶ Ába lariñagun wügüri ligía lun.

—Aríñagabei nun cátei lan, afiñe námuga luágu.

³⁷ Ába lariñagun Jesúsu lun.

—Aríja báali, áu le úmabei badímureja.

³⁸ Ába lájuduragun ligíbugiñe Jesúsu, ába lariñagun.

—Afiñetina, Nabúreme.

³⁹ Ába lariñagun Jesúsu.

—Niábinbei ñájoun ubouágun lun néfegechagüdüni jágu ja íbidiñejabubaña lun cátei lánina Búngiu, lun giñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, maríjin jamá ni cáta.

⁴⁰ Dan le jagáambunbalin jádaangiñe fariséogu ja ñíbaña cátei le, ába jaríñagun lun.

—¿Baríñaguñati luágu darúñu líña lan giñe wágu lun cátei le luáguti Búngiu?

⁴¹ Laríñaga Jesúsu joun.

—Lun jamúga íbidiñe lan cátei lánina Búngiu jun, madúnruntün jamúga luágu jifigoun, quei jaríñagun luágu subúdi jumáni, gadúnruntün.

10

Jémpulu luáguti loúnigiruniña Jesúsu lánigu queísi ában oúnigiruti mudún

¹ 'Ninárün jáu luágu le lan mebéleri lídaangiñe lubéneri jabárierun mudún, lun lebélerun lídaangiñe ámu oúbaü, jíweruti. ² Ánjeinti le ebélerubei lídaangiñe béna, ligía le oúnigirubaliña mudún. ³ Ába lánjunrenchuni le oúnigirubalin béna béna lun, lun lebélerun, subúdi jamúti giñe mudún lumálali. Ába lagúajan joun láu jíri, ába laságaraguniña barierurugugiñe. ⁴ Lárigiñe laságaraguniña súngubei, ába lídin eibugeina jabá jabá, ába jafálaruni ladúga subúdi jamáni lumálali. ⁵ Mídintiña lárigi ában le ibídiñeti joun, anúrjarügütiña lueí ladúga ibídiñeti jamálali ámu mútu joun.

⁶ Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu joúniri mudún buíti

⁷ Ábayati laríñagun Jesúsu joun.

—Ninárün jáu, áu béna le ñígiñe lubeí gayára lan jayábin gürígia lun lánigu jamá Búngiu. ⁸ Ja ñúbinbaña nubáragiñe, ítara jáña queísi jíwerutiña mudún ladúga iyéeni lan jarúfudajabei, madúgütiña lánigu Búngiu gásu jáu. ⁹ Áu bénabei, le ebéleruti nueígiñe, lasálbarúaba. Ítara lúba quei ában mudún le ebéleruti furí ligía barierurugugiñe, darí ligía sagádi lun leigin.

¹⁰ 'Jíweruti, liábin rügüña lun líwerujan, lun láfarajan lúma lun lagúnrinchagun, ánjein áu, niábiña lun jibíjin ibágarí, áni lun jibíjini gíbe. ¹¹ Áu, ítara níña queísi ában joúniri mudún le buíti, le gayáraati líchuguni libágarí jawágu lilügüniña mudún. ¹² Ánjein le ñadágimeinrügüti luágu fáyeiti, dan le laríjin liábin anímaalu le jabísa mudún, ába lígiruniña mudún, ába leíbaagun, ladúga máma lan oúnigiruti buíti ligía, máma giñe lilügüniña mudún. Ábati liábin jabísa mudún, ába lawáraüdaguagüdüniña. ¹³ Wügüri ligía eibaaguati ladúga luwádigimariña lan luágurügü fáyeiti, mebéresegüti jáu mudún.

¹⁴⁻¹⁵ 'Áu oúnigirutibeí buíti. Ítara quei nisúbudin lun Núguchi áni subúdi Núguchi nun, ítara líña giñe jasúbudin nánigu nun, subúdi jamána giñe queísi subúdi jamáni mudún joúniri. Rúnnumuti nibágarí jawágu queísi líchuguni oúnigiruti mudún libágarí jawágu lilügüniña mudún. ¹⁶ Añájein gíñe ámu gürígia ja lúnbaña nánigu jamá ja mámabaña juríu, lúnti giñe nanügüniña lun nánigu jamá. Jagáambubadina, ábame jeréderun súngubei lídan ában lúma ában oúnigiruti.

¹⁷ 'Jínsiñetina lun Núguchi, ladúga níchugubei nibágarí luágu uboú, ligía ábayame nibíjini. ¹⁸ Magída lubeí ni ában gürígia nibágarí, láuba nugúndan níchigei. Garíchatina lun níchuguni lúma lúnya nerésibiruni. Ligía cátei le laríñagubei Núguchi nun.

¹⁹ Dan le jagáambubalin juríu dimúrei buri le, ábaya jafánreinragun. ²⁰ Sarágu jáña jádaangiñe aríñagutiña.

—¿Cásan uágu jadúga gásu láu, níjeingusan espíritu wuríbati lídan áni lülújali láu?

²¹ Jaríñaga jíbiri.

—Úati ni ában le láuti espíritu wuríbati lun gayára lan ladímurejan ítara. ¿Gayáraati funági laríjagüdüñ espíritu wuríbati maríjintiña?

Merésibirun jamáni juríu Jesúsu

²² Dan ligía lidáni luríbouga, ladügüñiati fédu le lánina tedéregerún témpulu Jerusalén lun Búngiu. ²³ Níñeinti Jesúsu eibugaña ja témpulurugu luágu corredór le gíribei Láni Salomón corredór. ²⁴ Ába jagúriridagun juríu láu, ába jariñagun lun.

—¿Darísan ídaba bígirawa láu machouruni? Ánjein amürü lubei Crístubei, aríñagabei furáangu.

²⁵ Ába lariñagun Jesúsu joun.

—Aríñaga náali, mafiñetün nun. Sún buri cátei le nadágubei láu lugúmadin Nóguchi, arúfuda lumúti furáangu. ²⁶ Jugúya, mafiñetün ladüga máma jumá jádaangiñe nilügüniña mudún quei bugája nariñaguni jun. ²⁷ Subúdi jamúti nilügüniña mudún numálali, subúdi numútiña giñe, áni falá jamutina. ²⁸ Rútina íbágarí magúmchaditi joun áni meféridirubaña, úabei giñe agídarutiña nújaburugugiñe. ²⁹ Nóguchi le weíribei jawei súngubei, ligía íchugubaliña nun, áni úati ni ában lun lagídaruniña lújaburugugiñe. ³⁰ Áu lúma Búngiu Úguchili ában méme wagía.

³¹ Ábayati jabúdajan juríu dübü lun jachüraguni luágun. ³² Ába lariñagun Jesúsu joun.

—Gíbeeli cátei buíti nadüga jigíbugiñe láu lubáfu Búngiu, ¿cábagi lídaangiñe uágu jíchaagua dübü nuágu?

³³ Ába jariñagun juríu lun.

—Míchaagunbadiwa dübü buágu luágu ni cáta buíti badüga, ladüga anába báali lan Búngiu láu berérun. Wügüri rügüñadibu, áni bíchaaguña búngua quei Búngiu.

³⁴ Ábati lariñagun Jesúsu joun.

—Bürüwati lídan jilúrudun luágu aríñaga lan Búngiu. “búngiu buri jugúya”. ³⁵ Subúdití woun luágu síñá lan leyéedawagún láu le taríñagubei Lerérun Búngiu, áni aríñagatu líburu tugúya luágu wa láníña Búngiu gürígia ja erésibirubalin lerérun lun jíchuguni joun gürígia, quei búngiugu. ³⁶ Ánjeinti anúadaja lubáalina Búngiu, ába louñajanina ubouágun, ¿ída líñáti jariñagunbei luágu anába náni láu nariñagun luágu Liraü nan Búngiu? ³⁷ Ánjein madügün nan cátei lé buri ladügübei Nóguchi, mafiñera jumá nun, ³⁸ ánjein nadüga, íbini mafiñerun jumá nun, afiñe jumá luágu buri cátei le nadügübei, subúdi jumámugei luágu njein lan Nóguchi nídan, áni anájein lan giñe lídan Nóguchi.

³⁹ Ábaya jálugun jadáürüni, ába leséfurun jawei.

⁴⁰ Ábati lagíribudun Jesúsu loubáfurugun dúna Jordán, ába leréderun ñi lídan fulásu le ñí lubei meja labásteragüdaja Juan. ⁴¹ Sarágu jáña gürígia ñüdüntiña aríjei, ába buri jariñagun.

—Láu sun madügün lan Juan ni ában miláguru, inárüni sun le lariñagubei luágu wügüri le.

⁴² Ába jafiñerun sarágu gürígia luágu Jesúsu lídan fulásu ligía.

11

Loúnwen Lázaro

¹ Níñein ában wügüri sánditi, gírítí Lázaro, lílana fulásu le gíribei Betánia, le tageíra María túma Márta to tíbugaña. ² María tugúya, to lítu Lázaro le sándíbei, tugúya to éseruboun íbíñe luágun lugúdi Jesúsu, ába tarágajani láu tídíburi.

³ Ábati jounajan bián ítunu ja, aríñaga lun Jesúsu.

—Jesúsu, sándiñeintia bumáda.

⁴ Dan lagáambunbalin Jesúsu cátei le, ába laríñagun.

—Mámabei ouweni lébeja cátei lídaangiñe sándi le, lúntibei laríjiniwa luweírigan Búngiu, lúma gíñe lun laríjiniwa luweírigan Liraü Búngiu lídaangiñe sándi ligía.

⁵ Láu sun weíri lan jínsiñe Márta, María, lúma Lázaro lun Jesúsu, ⁶ dan le jaríñawagúnbei lun luágu sándiñein lan Lázaro, reideigili bián wéyu lídan fulásu le ñi lubei. ⁷ Lárigiñe, ába laríñagun joun láni disípulugu.

—Queímounya Judéa.

⁸ Ábati jaríñagun lun.

—Maésturu, málügili lueígiñe jálugun juríu jáfarunibu láu dübü ñi, ¿busényadibu bídin ñi?

⁹ Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti eibuga ában güriúa wéyuagu, machúgeragúnbei, ladüga laríjubei lan larúgounga le yábei ubouágu, ¹⁰ ánjein eibuga áriebe, lachúgeraguba ladüga lubúriaga.

¹¹ Lárigiñe, ába laríñagun Jesúsu joun.

—Arúmuga wamáda Lázaro, neibuga agágudajei.

¹² Ábati jaríñagun disípulugu lun.

—Maésturu, ánjein arúmuga lubeí, lareídaguárügü líña.

¹³ Míni lánti Jesúsu luágu jilá lan Lázaro, jarítagunti disípulugu luágu luágu lan furúmieguarügü arúmuguni ladímureja. ¹⁴ Ábati laríñagun Jesúsu joun, furáangu.

—Jilá Lázaro. ¹⁵ Gúndaatina láu úa nan ñi, ladüga buitimaati itara jun, afíñe jumámuga. Queímoun waríjei.

¹⁶ Ábati laríñagun Tomás, le únbei jaríñaga Mádou, joun jíbiri disípulugu.

—Queímoun gíñe, jilá wamámuga úara lúma.

Jesúsu ásaaragüdübei lídaangiñe ouweni, ligía íchiga íbágari

¹⁷ Dan le lachülürünbei Jesúsu, gádürüjali wéyu lueígiñe labunún Lázaro.

¹⁸ Lidíse Betánia lueí Jerusalén quei bián quilómetros dimí. ¹⁹ Sarágu jáñati jádaangiñe juríu ñüdüntiña Jerusaléngiñe bisídoun Márta túma María lun jíchugun ñurúguau joun luágu louñwen jamúlen. ²⁰ Dan tagáambunbei Márta luágu níteeli lan Jesúsu achülüreina, ába táfuridun lubároun, ánjoun María, ába teréderun múnada. ²¹ Ába taríñagun Márta lun Jesúsu.

—Lun jamúga ya ban, moúnwenti jamúga namúlen, ²² áni subúditi nun luágu líchugubei lan Búngiu sun le bamúriajan lúma bun.

²³ Laríñaga Jesúsu tun.

—Labágaridayaba bamúlen.

²⁴ Taríñaga Márta lun.

—Ánja, subúditi nun luágu labágaridayaba lan lídaanme jásaarun jiláguaña lídan lagúmujoún wéyu.

²⁵ Ábati laríñagun Jesúsu tun.

—Áu le ásaaragüdübaliña jiláaña, rúneí jabágari joun lárigoún. Le afíñeti nuágu, gayáraati louñwen, labágaridayaba, ²⁶ áni sun le wínwangilibei áni afíñeti nuágu, labágariduba gíñe lúma Búngiu súnwanda. ¿Afíñetibu?

²⁷ Taríñaga lun.

—Ánja, Nabúreme, affiñetiña luágu bugúya lan Crístubei le Liraü Búngiu, lé meja lúnbei liábin ubouágun.

Layájun Jesúsu lubádu lumúaja Lázaro

²⁸ Lárigiñe tariñaguni Márta le, ába tídin ougoun María, ába tariñagun tun joúnguarügü.

—Níjein Maésturu ya lún nege bídin lun.

²⁹ Quei tagáambuni María cátei le, ába tásaarun, ába tídin furése aríjei Jesúsu. ³⁰ Mebélugiliti Jesúsu ubúrugun, lídaañein fulásu le ñí lubei tadárierei Márta. ³¹ Dan le jaríjinbei juríu ja ñíbaña múnada túma María ámalijun tásaarun ába táfuridun furéseguaina, ába jóudin tárigi, jarítangun luágu teíbuga lán yebe luágu umúajaü ayájua.

³² Dánti le tachülürünbei María le ñíjin lubei Jesúsu, ába tájuduragun ligíbugiñe, ába tariñagun.

—Nabúreme, lun jamúga ya ban, mouñwenti jamúga namúlen.

³³ Dan le laríjin Jesúsu tayájun María jáma juríu ja ñúbinbaña túma, ába lírudagun tídan lanígi, ³⁴ ába laríñagun joun.

—¿Jalíasan jábunei?

Ába jaríñagun lun.

—Jigábu baríjei.

³⁵ Ába layájun Jesúsu. ³⁶ Ábati jaríñagun juríu.

—¡Aríja jumá luweírín meja línsiñe lun!

³⁷ Ñíñanu jádaangiñe aríñagutiña.

—Níján le aríjagüdúbalin wügüri le maríjinbei, ¿siñáti jamúga funásan ladügün lun mouñwen lan Lázaro?

Lásaarun Lázaro lídaangiñe ouweni

³⁸ Ábaya tírudagun lanígi Jesúsu, ába layarafadun lun umúajaü. Umúajaü ligía ában júyu luágu dübü, ñíñein ában dübü lídaüme. ³⁹ Ába laríñagun Jesúsu.

—Gidájumei dübü.

Ába tariñagun Márta lun.

—Mósutia jíngiaali lan ladúga gádürü wéyu lueígiñe loúnwen.

⁴⁰ Ába laríñagun Jesúsu tun.

—¿Másan aríñagatina bun luágu ánjabu lan afíñe nuágu, baríjubei lan luweírigin Búngiu?

⁴¹ Ábati jagídaruni dübü, ába laríjin Jesúsu siélun, ába laríñagun.

—Núguchi, teínqui numútipu luágu bagáambunina. ⁴² Subúdi numúti luágu agáamba bánina súnwandan, naríñaguñein líra jawágu güriája ja, ja yábaña, lun jafiñerun luágu amürü lan ouñajabalina.

⁴³ Lárigiñe laríñaguni cátei le, ába lagúaragun.

—¡Lázaro, furíba ñígiñe!

⁴⁴ Ába láfuridun jílláali láu lújabu lúma lugúdi gürágu táu gamísa, lúma ligíbu táu ában gamísa. Ába laríñagun Jesúsu joun.

—Farára jumeí, ígira jumeí lun lídin.

Elédeguni lun laríjagüdüniwa Jesúsu

(Mt 26.1-5; Mr 14.1-2; Lc 22.1-2)

⁴⁵ Láu lasúseredun líra, sarágu jádaangiñe juríu ja ñüdüñbaña túma María, aríja jameí le ladügübei Jesúsu, ába jafiñerun luágu. ⁴⁶ Ñíñanu jádaangiñe,

ába jóudin jámoun fariséogu, ába jabájüdaguni le ladügübei Jesúsu joun.
⁴⁷ Ábati jayábin fariséogu jáma jábutigu fádirigu, ába jóúndaragun jáma jíñun-ágei agúmadijatiña, ába jariñagun.

—¿Cábasan wadüga? Ladáaguñatia wügüri le sarágu miláguru. ⁴⁸ Ánjeinti wígira ítara, jafíñeruba sun güri-gia luágu, ábame ti jayábin gumádimatiña Rómana, ábame jagúmuchaguagüdünnun walígilisin láu sun warásan.

⁴⁹ Níñein ában jádaangiñe, gíriti Gáifasi, ligía jábutibe i fádirigu lídan irúmu ligía, ába laríñagun joun.

—Ibidiñeti ni cáta jun, ⁵⁰ maríjin jumei luágu buítima lan woun lun loúnwen ábanrügü wügüri jawágu jíbiri, máma lun lagúnrinchawagún sun warásan.

⁵¹ Máma láu láni Gáifasi lúngua laríñagei líra, ladüga quei ligía lan fádiri le íñutimaabei lídan irúmu ligía, ába laríñagagüdüni Búngiu lun, luágu louúweba lan Jesúsu jawágu juríu, ⁵² áni mámarügü jawágu juríu, lun giñe louúdaruniña sun lirájüñü Búngiu ja díseguabaña jawáriuagua. ⁵³ Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jilágubei.

⁵⁴ Ligía ába lubei meíbugunjaali lan Jesúsu furáangu jádan juríu, ába láfuridun Judéagiñe, ába lídin lídoun ában fulásu gíriti Efraín, yaráfa lun fulásu megeírawati. Ába leréderun ñi jáma láni disípulugu.

⁵⁵ Yaráfaaliti jafédun juríu le gíribei páscua, sarágu jáña güri-gia ñüdünnun Jerusalén lun jadügüni igáburi le lánina jarúmadun lubáragiñe fédu ligía.

⁵⁶ Jáluajañeinti Jesúsu, dánti le témpulurugúñanu lan, ába jálügüdjagan jámagua.

—¿Ca jariñagubei? ¿Líabinba lídan fédu, ódi miábinbei?

⁵⁷ Rújañati fariséogu jáma jábutigu fádirigu dimúrei lun le lan asúbudiruti jalíañein lan Jesúsu, lun lan laríñaguni, barü jamámugei adáüra.

12

Tájurudaguni ában wítri lugúdi Jesúsu

(Mt 26.6-13; Mr 14.3-9)

¹ Sísi wéyu lubáragiñe páscua, ába lídin Jesúsu Betánia, le ñi lubei lagánawa Lázaro le lásaaragüdübei jádaangiñe jiláaña lúnya labágaridun. ² Ába jadügün ában adíneruni ñi luágu láni fuleisei, Márta, tugúya éjeeraguboun, Lázaro ában jádaangiñe ja ñünbaña luágu dábulá lúma Jesúsu. ³ Ábati tanügün María ában paenti ibíñei le séritu, ába tájurudaguni lugúdi Jesúsu láu, ába tarágajani láu tídiburi, ába lejémougadun ibíñei ligía sun ñi múnada. ⁴ Ába laríñagun Júdas Iscaríote, le liraü Simón, ában jádaangiñe láni Jesúsu disípulugu, le méme lúnbei lalúguruni.

⁵ —¿Ánsan malúgurún lubei ibíñei le luágu ürüwa-san fiádürü lun jíderawagún gudémetiña?

⁶ Laríñagunbei Júdas ítara, máma luágu berése lan jáu gudémetiña, laríñagunbei ítara ladüga jíweru lan, áni queiti ligía lan gámabarun lágei seínsu, ábaja líwerujan lídaangiñe le íchugübei tídoun. ⁷ Ábati laríñagun Jesúsu lun.

—Ígirabóun, taráanseruñadina lubá lachülürün luwéyuri nábuñuñiwa. ⁸ Súnwandan ñibaña lan gudémetiña jídan, ánjeinti áu, mámba súnwandan júma nan.

Elédeguni lubá Lázaro

⁹ Ába jasúbudiruni sarágu jádaangiñe juríu luágu níjein lan Jesúsu Betánia, ába jóudin ñi, mámarügü lun jaríjini, lun giñe jaríjini Lázaro le lásaaragüdübei Jesúsu jádaangiñe jiláaña. ¹⁰ Ába giñeti juáradun jábutigu fádirigu lídan ában lun giñe jáfaruni Lázaro, ¹¹ ladüga sarágu jáña lan juríu adiseduntiña jawei lun jafiñerun luágu Jesúsu, lídaangiñeti Lázaro.

Lebélorun Jesúsu ubúrugun Jerusalén

(Mt 21.1-11; Mr 11.1-11; Lc 19.28-40)

¹² Sarágu jáña güriquia ñüdüntiña Jerusalén lubá fédu le páscua, larúgan, ába jasúbudiruni luágu lachülürüba lan Jesúsu ñíjin ubúrugun. ¹³ Ábati játújan tubána fálima, ába jáfuridun lubároun Jesúsu agúarajeina.

—¡Uweírighuni lun Búngiu! ¡Biniwati le ñübinbei lídan líri Wabúreme! ¡Biniwati lurúeite Israel!

¹⁴ Ába ladárirun Jesúsu ában burígü, ába laweínruni quei laríñagun tídan Lerérun Búngiu.

¹⁵ Manúfudebá, ubúrgu le Sión, níten burúeite waríñu luágu ában burígü.

¹⁶ Úati yebe gunfaráanda jamáni láni disípulugu cátei le wéyu ligía, lárigiñe, dan le belújali Jesúsu lídoun luweírighun yágüta siélu, ába jarítangun luágu bürüwa lan sun cátei le luágu, áni ítara líña lan lasúseredun lun.

¹⁷ Ja güriquia ja ñibaña dan le lagúarun Jesúsu lun Lázaro lídaangiñe lumúaja, ába lásaaragüdüni lídaangiñe otúweni, abájüdagua jamúti le jaríjubei. ¹⁸ Ligía lébubei jáfuridun güriquia erésibirei Jesúsu, ladüga jagáambun luágu miláguru le ladügübei. ¹⁹ Ábati jaríñagun fariséogu jámagua.

—Aríja jumáli luágu, siñá lan ladügüniwa ni cáta, sun güriquia añágüran lúma.

Jáluajani güriégu Jesúsu

²⁰ Ñíñanu güriégu jádan güriquia ja ñüdünbaña Jerusalén lun jájuduragun lun Búngiu, ²¹ ába jayábin güriégu jagía lúmoun Felípe, le Betsáidana, ñi Galiléa, ába jaríñagun lun.

—Buséntiwa waríjini Jesúsu.

²² Ába lídin Felípe, ába laríñaguni lun Andrés, ába jóudin biángubei jagía abájüdaguei lun Jesúsu. ²³ Ábati laríñagun Jesúsu joun.

—Chülúja óra lun líchugüniwa uweírighuni nun, áu le Wügüri Garaüwarügüti.

²⁴ Ninárün jáu luágu ánjein lan máburujan ában lágu túrígu múarugun lun loúnwen, ában mémebei águu, ánjein ouwe, lalúbajoúba sarágu lídaangiñe. ²⁵ Le jínsiñejabuti lun libágari, leféridirubei, ánjein le mebésenti láu libágari lídan ubou le, lareídubei lubá ibágari le magúmuchaditi, siélu. ²⁶ Le busénti lesériwidunina, lúnti lafálarunina, áni le ní numuti, ñíbei giñe le esériwidubalina. Le esériwidutina, líchuguba Núguchi uweírighuni lun.

Ladímurejan Jesúsu luágu loúnwen

²⁷ ‘Níjein ában ouúnwenbun líbe samínaü nuágu guetó. ¿Cábasan nariñaga? ¿Nariñaga funa. “Núguchi, sálba bána lídaangiñe le lúnbei lasúseredun nun guetó”? Uá, lun líra niábin. ²⁸ Núguchi, iñurúalá bíri nídaangiñe.

Ábati lagaambúniwa ában umálali siélugiñe le aríñagubei.

—Iñúra náali níri bídaangiñe, áni niñúruiyabei.

29 Ábati jaríñagun gürígia ja ñibaña agáambaja luágu wayújururu lan, jíbiri aríñaga.

—Ában ánjeli adímurejabei lun.

30 Ábati laríñagun Jesúsu joun.

—Mámata luágu nufúleisein lagaambúa umálali le, luágu jufúleisein.

31 Niján dan ligía lun lagúserawagüdün ubouú, áni guetóba leféridirei Máfia, le agúmadijabei lídan ubouú le, lubáfu. 32 Dánmeti le niñurúniwa múarugugíñe, nanúgübaña súngubei númoun.

33 Láu líra laríñaguñein luágu louweba lan luágu ában gurúwa. 34 Ába jaríñagun gürígia lun.

—Agáambaadiwa laliijoun tídan walíburun to lánina lilúrudun Moisés luágu labágariduba lan Crístu lun sun dan. ¿Ída liñáti bariñagunbei luágu liñurúaba lan Wügüri Garaúwarügüti? ¿Cáteigi Wügüri Garaúwarügüti ligía?

35 Ábati laríñagun Jesúsu joun.

—Níchiga mémebei larúgounga jun luágurügü murúsun dan. Eíbuga jumá lídan larúgounga ligía sun anájagua lan júma lun gayáraabei lan jachúlürün le ñijin lubei jabúseera jachúlürün, márügüdün lámugaün lubúriga, ladüga le eíbuguti lídan lubúriga, ibídiñeti lun jalíñouñein lan. 36 Afíñe jumá lubeíti nuágu sun anájagua lan júma lun lirájüñü jumá larúgounga.

Lárigíñe laríñaguni Jesúsu sún buri cátei le, ába lídin, ába larámudagun jaweí.

Lébuna mafíñen jamá juríu luágu Jesúsu

37 Láu sun adüga lan Jesúsu sarágu miláguru jagíbugiñe, mafíñetiña luágu.

38 Láu líra jagúnfulirei le laríñagubei proféta Isaías.

¿Cásan afíñerubei luágu wáni ugánu?

¿Ca un larúfudei Wabúreme Búngiu lubáfu?

39 Quei mafíñerun jabeí, ába lasúseredun le ámu dimúrei le laríñagubei Isaías tídan labürüjan, joun.

40 Darú lumuti Búngiu jaríjin, derégüda loun janígi,

lun maríjin jamá láu jágu,

úame gunfaráanda jamá,

mayábin jagíame nun lun nareídaguagüdüniña.

41 Laríñagunbalin Isaías le luágu Jesúsu ladüga aríja láali lan luweírigun.

42 Láu sun líra, sarágu jáña jádaangiñe juríu afíñerutiña luágu Jesúsu ásta jádaangiñe ábutigu, áni maríñagun jamúti bougudi, le janúfude jaweí fariséogu, lueí jabúguniña tídaangiñe jalígilisin. 43 Ladüga gúndaatimaatiña láu inébesi le jíchugubei gürígia sügü láu le líchugubei Búngiu.

Lagúseragüdübaña dimúrei buri le laríñagubei Jesúsu gürígia

44 Ába laríñagun Jesúsu láu umálali jéreti.

—Le afíñeti nuágu, máma rügüñein nuágu lafíñera, afíñeti gíñe luágu Nóguchi le oúnajabalina. 45 Le gíñe aríjitina, laríjiñein gíñe le oúnajabalina.

46 Au lámpubei, niábinbei ubouúagun lun sun lan ja afíñetiña nuágu, merédera jamámuga lídan lubúriga. 47 Ánjein le agáambuti nerérun áni madügünti gásu láu, máma áu asiádirubalin, ladüga máma niábiña lun nasiádiruniña gürígia ubouúagu, niábiña asálbaraña. 48 Le mebéresenti náu, madügün ligía gásu láu nerérun, níjein lúnti lasiádiruni. dimúrei buri le aríñaga náalibeí, ligiaba asiádirei lídaanne lagúmujoún wéyu. 49 Ladüga madímurejaantina luágu nání núngua,

Nóguchi le oúnajabalina, ligía aríñagubalin le lúnbei naríñaguni nun lúma le

lúnbei narúfudajani. ⁵⁰ Áni subúdi numúti luágu barü lan lugúmadin Núguchi ibágari magúmuchaditi joun ja adügübalin le lubeibeí. Le lubeíti naríñagubei, naríñaguni quei laríñaguni Núguchi nun.

13

Lachíbuni Jesúsu jagúdi láni disípulugu

¹ Ábanrúgaali wéyu lubá fédu le páscua. Subúdi láali Jesúsu luágu chülüja lan óra lun lígiruni uboú le lun lídin lúmoun Lúguchi. Súnwandan meja jínsiñe jamá lánigu ja ubouáguabaña lun, guetó larúfuduñeinti línsiñejabu lídan luweírín-ágei.

²⁻⁴ Dálaalíti Máfia larítangun tídoun lanígi Júdas Iscarióte lun ledéregeroni Jesúsu joun láganiñu. Jesúsu, láu sun subúdi láni luágu lúmagiñe lan Búngiu liábin, luágu lúmounba lan giñe Búngiu lagíribuda, luágu giñe rúlaali lan Úguchili sun cátei lújaburugun, ába larúfuduni luweírín-ágei únabuni le luágubei. Dan lubeíti jadíneruña lan, ába lásaarun lueígiñe dábula, ába larágachunun gamísa to tigíbuaguboun ladáüragan, ába lagürün ában tuáya liránaagua. ⁵ Ába líchugun dúna lídoun ában dabáragi, ába lachíbuni jagúdi disípulugu, ába larágachuni táu tuáya to liránaaguaboun.

⁶ Dán yebe le lachíbaali lan lugúdi Simón Pédro, ába laríñagun lun.
—Nabúreme, ¿bachíbaalisan nugúdi?

⁷ Ába laríñagun Jesúsu lun.
—Guetó, úati gunfaráanda báni le nadügübei, gunfaráanda bubeí larígiñe.

⁸ Ába laríñagun Pédro lun.
—¡Machíbun bubeí nugúdi!
Laríñaga Jesúsu lun.

—Ánjein machíbun nan bugúdi, siñábei gafánran ban núma.

⁹ Ába laríñagun Simón Pédro lun.
—Mámarügüla nugúdi bachíba, chibábei giñe nújabu lúma nigíbu.

¹⁰ Laríñaga Jesúsu lun.
—Le sun liñábei lágoun, lugúdi rügüñein abúseera lachibúniwa, ladüga jarúmati líbiri lúgubu. Jugúya, jarúmatün, mámarügü líña sun jugúya.

¹¹ Le laríñagunbei luágu máma lan sun jagía jarúmatiña, ladüga subúdi láni cába lan edéregerei.

¹² Lásun lachíbuni Jesúsu jagúdi, ábaya ladáürunun gamísa to larágachuboun, ábaya lañúurun luágu dábula, ába laríñagun joun.

—¿Gunfaráanda jumútan le nadügübei jun? ¹³ Jugúya agúajatün nun Maésturu, lúma Nabúreme, áni richátün ladüga áu ligía, ¹⁴ ánjeinti chibá nubálin jugúdi láu sun Jumáesturun nan áni Jabúreme, lúnti giñe jachíbuni jugúdi júmaga. ¹⁵ Rújadina ában jémpulu jun lun jadügüni líbe méme le nadügübei. ¹⁶ Ninárün jáu luágu míñugun lan ni ában músu lueí liyúbudiri, ni ában le oúnajoúti lueí le oúnajabalin. ¹⁷ Ánjein gunfaráanda jumá buri cátei le áni adüga juméime, gúndaabadün.

¹⁸ Mámatia nadímurejaña juágu sun jugúya, subúdi numútiña cátaña lan nanúadirubaña lun nanígume le tímatiimaati. Áni lúnti lagúnfulirún le tídaanbei Lerérun Búngiu. “Garábagua le egubei núma, nuágun.” ¹⁹ Naríñaguñein le jun lubáragiñe lasúseredun, lun dánme lan le lasúseredun, affiñe jumámuga luágu áu lan Crístubei. ²⁰ Ninárün jáu luágu le lan erésibiruti le noúnajan, resibi lumútina giñe, áni le erésibirutina, resibi lumúti giñe le oúnajabalina.

Ladímurejani Jesúsu luágu ledéregerubei lan Júdas

(Mt 26.20-25; Mr 14.17-21; Lc 22.21-23)

²¹ Lásun lariñaguni Jesúsu sun cátei le, ába lasándirun sarágu íruni tídan lanígi, ába lariñagun furáangu.

—Ninárün jáu luágu ledéregerubadina lan ában jádaangiñe.

²² Ábati jagúmeserun disípulugu aríagua jawouguoún, ibídiñounga joun ca lan jádaangiñe uágubei ladímureja Jesúsu. ²³ Áu Juan, le abürüjabarun gárada to, ában jádaangiñe disípulugu, le weiribei ínsiñe lun Jesúsu, loubagiñeñádina lídan adíneruni, ²⁴ ába ladügün Simón Pédro seíni nun lun nálügüdüni Jesúsu ca lan jádaangiñe uágubei ladímureja. ²⁵ Ábati nayárafaduntima lun Jesúsu, ába nariñagun lun.

—Nabúreme, ¿cáteisán lúnbei ledéregerunibu?

²⁶ Ába lariñagun Jesúsu nun.

—Nadüdüragüda murúsun fein, le únti níchigoun, ligíaba edéregerana.

Ábati ladüdüragüdün murúsun fein, ába líchugunun lun Júdas Iscarióte, le líraü Simón. ²⁷ Quei lárügüdünun Júdas fein tugúya, ítara lebélorun Máfia tídoun lanígi. Ábati lariñagun Jesúsu lun.

—Le lúnbei badügüni, adügabei furése.

²⁸ Úati gunfaráanda láni ni ában jádaangiñe ja eígibaña luágu dábula ca lan uágu lariñagei Jesúsu líra lun. ²⁹ Quei Júdas lubei táubei lágei seínsu, sun jariñagun yebéti lariñaguña Jesúsu lun lun lagáñijani le jabúseerubei lubá fédu, o lun lan líchugun seínsu joun gudémetiña. ³⁰ Láriigiñe leíginun Júdas fein, ába láfuridun. Gúñeeli óra ligía.

Iséri gumádi

³¹ Láriigiñe láfuridun Júdas, ába lariñagun Jesúsu.

—Larijúa nuweírigan, áu le Wügüri Garaüwarügüti, guetó, arijúame luweírigan Úguchili nuágu. ³² Ánjeinti arúfuda nubálin luweírigan Búngiu, larúfudubei giñe Búngiu nuweírigan, áni ladügübei madíse. ³³ Nirájüñü, úaadináme júma sarágu dan. Jáluajabadina, le méme nariñagubei joun juríu nariñagayaali jun guetó. Siñábei jídin le ñíjinba lubei nídin. ³⁴ Níchigaali iséri gumádi le jun. lun jínsiñegua jumá júngua. Ítara quei jínsiñe nun, lúnti giñe jínsiñegua jumá júngua. ³⁵ Ánjaün jínsiñegua júngua, jasúbudirubei sun gürígia luágu náni jumá disípulugu.

Ladímurejani Jesúsu luágu leyéedaguba lan Pédro luágu

(Mt 26.31-35; Mr 14.27-31; Lc 22.31-34)

³⁶ Ába lariñagun Simón Pédro lun Jesúsu.

—¿Jalíñounbadibusan, Nabúreme?

Ába lariñagun Jesúsu lun.

—Siñáti bafálarunina le ñíjinbadina lubei guetó, lachülürüba wéyu lun bafálarubadina lan.

³⁷ Lariñaga Pédro lun.

—¿Ca uágu siñá lubei nafálarunibu guetó? Aráanseedina lun níchuguni nibágari buágu.

³⁸ Lariñaga Jesúsu lun.

—¿Binárün luágu aráanse ban lun bíchuguni bibágari nuágu? Ninárün báu luágu beyéedaguba lan náu ürüwa weíyaasu lubáragiñe layúguruhan gáyu.

14

Jesúsu, ligía ùmabei lun lúmoun Úguchili

¹ ‘Merédera jumá láu líbe samínaü, afiñe méme jumá luágu Búngiu, afiñe méme jugúyame nuágu. ² Njein sarágu ubáraü tídan lúban Nóguchi lun jaganouñ gürígia ñi, lun jamúga máma lan ítara líña, aríñaga náali jamúga jun. Neibuga lubeiti aráanseja ában ubáraü jubá. ³ Lárígiñeme nídin, aráanse neíme ubáraü ligía, ábame nagíribudunya lun nanügünün númagua, lun ñi jumá le méme ñi numuti. ⁴ Subúdi jumúti jalíñounbadina lan, subúdi jumúti giñe ùma.

⁵ Lariñaga Tomás lun.

—Nabúreme, ibídiñeti woun jalíñounbadibu lan, ¿ída lubáti wasúbudiruni ùma?

⁶ Lariñaga Jesúsu lun.

—Lun lachülürüniwa lúmoun Búngiu, áu ùmabei, áu inárüni, áu ibágari. Nueígiñe rügüñein gayára lan lachülürüniwa lúmoun Búngiu Úguchili. ⁷ Lun jamúga subúdi nan jun buídu, subúdi jumúti jamúga giñe Nóguchi, subúdi jumáali lúmagiñe guetó, ladüga aríjañaja jumáli láu jaríjinina.

⁸ Lariñagati Felípe lun.

—Arúfudabei Úguchili woun, buídurügaalime woun.

⁹ Lariñaga Jesúsu lun.

—Felípe, lüjadina júma, ¿ibídiñegidina bun? Le aríjitina, laríjiñein giñe Búngiu Úguchili, ¿cáti uágu baríñaga nun lun narúfuduni Búngiu Úguchili jun?

¹⁰ ¿Mafíñetibusan luágu anájein lan lídan Búngiu Úguchili, níjein lan giñe Búngiu Úguchili nídan? Lé buri cátei le naríñagubei jun, máma lan láu náni núngua naríñagei, Búngiu Úguchili le aganoubei nídan, ligía adügübalin luwádigimari guánarü. ¹¹ Afiñe jumá nun luágu anájein lan lídan Búngiu Úguchili, áni lan níjein giñe Búngiu Úguchili nídan, íbini luágurügü cátei lé buri nadügübei, afiñe jumá nun. ¹² Ninárün jáu, luágu le lan afiñeti nuágu, ladügübei lan cátei lé buri nadügübei, ladügüba buri cátei weínamutimaati, ladüga áu, neibuga le ñíjin lubeí Nóguchi. ¹³ Sun le jamúriajan lídan níri, nadügübei, arúfuda námugei luweírigun Nóguchi. ¹⁴ Nadügübei furúmiegurügü cátei le jamúriajan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵ ‘Ánjein jínsiñe nubei jun, gúnfuli jumá láu le nubeíbei, ¹⁶ ábame nayúmuragun lun Nóguchi lun loúnajan ámu jun newéñegua lun líderagunün, lun giñe líchugun gurásu jun. Ligíaba Sífiri Sándu le subúdíjabúbei lun sun inárüni, júmabei súnwandan. ¹⁷ Ja lánigu ubou le, siñáti jerésibiruni Sífiri Sándu ligía, ladüga siñá lan jaríjini ni jasúbudiruni, ánjein jugúya, subúdi jumáli, ladüga njein júma áni leréderuba jídan. ¹⁸ Mígirun nubádün jábugua, nagíribudayaba lun júma nan. ¹⁹ Málüjadina ánjana maríjin jamá gürígia, ánjein jugúya, jaríjubadina, áni gabágaribadün ladüga wínwañu níña lan. ²⁰ Lárígiñeme liábin Sífiri Sándu lun júma lan lun sun dan, jasúbudirubei luágu anájein lan lídan Nóguchi, jugúya nídan, áu giñe jídan. ²¹ Le subúdíjabuti lun nugúmadin áni úragu ligía lúma, arúfuda lumúti luágu jínsiñe nan lun le tímatimaati. Áni jínsiñejabúbei Nóguchi lun le jínsiñejabuti nun, jínsiñebei giñe nun, arúfudagua áume núngua lun.

²² Ába laríñagun Júdas (mámatia le Iscarióte).

—¿Cásan uágu barúfudaguba lubei búngua woun, máma joun gürígia ja lánigu ubou le?

²³ Laríñaga Jesúsu lun.

—Le jínsiñejabuti nun, adúgati gásu láu le nubeibe, áni línsiñeduba lun Nóguchi, ábame wayábin, áu lúma Nóguchi, agánawa lúma. ²⁴ Le mínsiñejabuti nun, madügúnti gásu láu le nubeibe. Dimúrei le naríñagubei, máma nání, lání Nóguchi le oúnajabalina.

²⁵ ‘Naríñaguñein sun le jun láu anájagua lan júma, ²⁶ Sífiri Sándu le lúnbei loúnajani Nóguchi lídan níri lun líderagunún, larúfudajaba jun, larítaguagüdúbadún gíñe luágu sun le aríñaga náalibeí jun.

²⁷ ‘Neíbuga júmagiñe, nígiraali ñurúguaü júma—ában luwúyeri ñurúguaü le áurügübeí gayára lan níchiguni. Mítaraanti queísi ñurúguaü le líchugubei ubou. Magíbedalá jisáminan, manúfude jugúyame. ²⁸ Agáamba jumáli naríñagan luágu neíbuga lan, áni nagíribudayaba lan lun júma nan, lun jamúga jínsiñe nan jun láu jinárün, gúndaatún jamúga láu jasúbudiruni luágu neíbuga lan lúmoun Nóguchi, ladüga ligía íñugutimaati nueí. ²⁹ Ligía aríñaga gíñe nubálin le jun, lun dánme lan lasúseredun, affíñe jumámuga.

³⁰ ‘Madímurejaanjadina sarágu júma, ladüga níteeli le agúmadijabeí lídan ubou le. Láu sun mabáfu lan nuágu, ³¹ lúnti ítara lúba lan lun lasúbudiruni ubou luágu jínsiñe lan Nóguchi nun, áni adüga nání le lubeibe nun. Sarájuma, queímoun yágiñe.

15

Tídibu beíbeí lúma tilímun

¹ Laríñaga Jesúsu.

—Ítara níña queí ában tídibu beíbeí le tímatimaati, Nóguchi, ítara líña queí le oúnigirubarun nádü. ² Chaün lumuti furúmieguaügü lídaangiñe nilímun le míinti, atírímujá lumúti le gínbeí, jarúmagüdaleí lúntima lagíndun. ³ Jugúya, jarúmaadún lárígi narúfudajan jun. ⁴ Lídan méme jumá ában núma queí lídaañadina lan ában júma. Ában límu siñáti lagíndun ánjein mámañein lubeí luágu ídibu, ítara jíña gíñe, siñáti jagíndun ánjein máma lubeí badüleñu jíña nuágu.

⁵ ‘Áu ídibubeí, jugúya límu. Le badüleñuti nuágu, badüleñu áu luágu, lagínduba gibe, siñáti jadügün ní cáta úouga áu. ⁶ Le merédeti badüleñu nuágu, lágurúba bougudín, ábame lamábeidun queí buri límu le abúdajoubeí lun lagudúniwa.

⁷ ‘Ánjaün asígira badüleñu nuágu, mabúlieidun jumeíme le narúfudajabeí, gayáraabeí jamúriajani le jabúseerun, áni jíbíjubeí. ⁸ Ibíjati Nóguchi inébesi dan le gíbe lan jagíndun, áni arúfuda jumúti luágu nání jumá díspulugu ja tímatimaatiña láu líra. ⁹ Jínsiñetün nun ítara queí nínsiñe lun Nóguchi, ítara méme jumá lubeíti lídan ínsiñeni le nánibeí jun. ¹⁰ Ánjaün ñüdüñ láu le nubeibeí, lídan mémebadún ínsiñeni le nánibeí jun, ítara queí nídin láu le lubeibeí Nóguchi, áni lídan mémeñadina ínsiñeni le lánibeí nun.

¹¹ ‘Nadímurejánbeí jun ítara lun gayára lan jasúbudiruni úgundani le níchugubeí, le gumúti. ¹² Níjan nugúmadinbeí. lun jínsiñegua jumá júngua queí jínsiñe nun. ¹³ Luweírín-ágei ínsiñeni le gayáraabeí gáni lání gürígia, lun líchuguni libágarí jawágu lumádagu. ¹⁴ Numádagu jugúya, ánjein jadüga le nubeibeí. ¹⁵ Manügün náadún queí músu, ladüga ibidíñeti le ladügübeí

liyúbudiri músu lun, nanügünün quei numádagu ladüga subúdigüda náali sun le laríñagubei Nüguchi nun jun. ¹⁶ Máma jugúya anúadajabalina, áu anúadajabalün, áni rújadina dimúrei jun lun jagúindun gíbe, lun gíñe ladúrarun jin. Ítara lúba líchuguni Nüguchi sun le jamúriajan lúma lídan níri jun. ¹⁷ Ítara líña lubeíti nugúmadin jun lun jínsiñegua jumá júngua.

Iyéreeguti Jesúsu jáu sun lánigu lun ubou

¹⁸ ‘Ánjaün iyéreeguda lun ubou, subúdi jumei luágu áu lan iyéreegudubei lun furúmiñe. ¹⁹ Lun jamúga lánigu jumá ubou, jínsiñetün jamúga joun gürígia ja lánigu ubou quei jínsiñe jánigu joun. Anúadaja numútün jádaangiñe ja lánigu ubou, ligía jiyéreegunbei lun ubou ladüga mámaadün lan láni ubou. ²⁰ Jarítaagua jumá luágu le nariñagubei jun. “Úati músu íñuguti luei liyúbudiri.” Ánjein eíbaaja jamáadina lubei, jeíbaajabadün gíñe, ánjein giñeti madügün jabei gásu láu narúfudajan, madügünbaña gíñe gásu jáu. ²¹ Jadügübei sun le jun, nueígiñe, ladüga ibídiñe lan le oúnajabalina joun.

²² ‘Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queisiti niábin joun, gadúnruntiña lubeíti luágu figou ligía. ²³ Ja iyéreejabúbaña nun, iyéreeguti gíñe Nüguchi joun. ²⁴ Madúnruntiña jamúga lun jamúga madügün nan ni cáta le úagili adügüti jagánagua, guetó aríja jamáli buri cátei ligía áni láu sun líra iyéreegugidina joun, iyéreegu gíñe Nüguchi joun. ²⁵ Wel, lasúseredunbei le ladüga lúnti lan lagúnfulirun dimúrei le búrwuwañubei lídan jalúrudun. “Ába niyéreegudun joun, mébunouga.”

²⁶ ‘Dánme liábin Sífiri Sándu le lúnbei líderagunün, Espíritu le lánina inárüni le lúnbei nouñajani luágu loubadina Nüguchi, ligíaba adímureja luágu náni fuleísei. ²⁷ Jugúya, jadímurejaba gíñe luágu náni fuleísei, ladüga númañadün lan lúmangiñe furúmiñeti dan.

16

¹ ‘Nariñaguñein buri cátei le jun lun mouñwen lan jafiñen nuágu. ² Jabúgagubadün tídaangiñe jalígílin, wuríbabei dan jun daríme lun ánjaün lan láfaragua furúmierügü gürígia jilágubei, larítaagua luágu lesériwiduñein lan Búngiu láu líra. ³ Jadügübei líra ladüga masúbudirun jamágili lan Nüguchi, masúbudirun jamána. ⁴ Nariñaguñein le jun, lun dánme lan le lachúlürün dan ligía, lun jarítagun luágu aríñaga náali lán meja jun.

Le ladügübei Sífiri Sándu

‘Maríñagun numúti meja le jun lúmangiñe binárü ladüga meja júmañadina lan, ⁵ ánjein guetó, neíbuga lúmoun le oúnajabalina. Málügüdün lumútina ni ában jídaangiñe jalíñounbadina lan, ⁶ jírurügütün luágu nariñaguni cátei lé buri jun. ⁷ Inárüni nariñagubei jun. buítimaati jun lun nídin, ladüga ánjana mídin, miábinbei Sífiri Sándu júmoun lun líderagunün, áni ánjana ñüdüñ, nouñajabei. ⁸ Dánme liábin, ladáriraguagüdúbaña gürígia ja ubouagubaña jóungua luágu gafígoun jamá, luágu gíñe níjein lan ában úma le lánina úarani, luágu gíñe lagúseragüdúbaña lan Búngiu. ⁹ Larúfudubei joun luágu gafígoun jamá láu mafíñen jamá nuágu, ¹⁰ lasúbudiragüdúbei joun luágu úaragua nan, láu larúfuduni joun luágu nídiiba lan le ñíjin lubei Nüguchi dánme le nígirunün. ¹¹ Líchuguba fe joun luágu lagúseragüdün Búngiu, ladüga agúseragüda láali Máfia, le agúmadijabei lídan ubou le.

¹² ‘Gíbegili lúnti naríñaguni jun, jásiñerubei gunfaráanda guetó. ¹³ Dánme liábin Sífiri Sándu le lánina inárüni, larúfudajabei sun inárüni jun, ladüga madímurejanbei luágu láni lúngua, le lagáambubei, ligiába lariñaga. Lasúbudiragüdübei cátei lé buri lúnbei lasúseredun jun. ¹⁴ Líchuguba inébesei nun, ladüga lerésibiruba lídaangiñe ninárün, ábame lasúbudiragüdüni jun. ¹⁵ Sun le lúmabei Núguchi, náni gíñe, ligía naríñagunbei luágu lerésibiruba lan Sífiri Sándu lídaangiñe ninárün, ábame lasúbudiragüdüni jun.

Lasáansiraguba íruni lun ugúndanime

¹⁶ ‘Málüjadina, ánjana maríjin jumá, múrusunmeya dan lárigiñe, ábayame jaríjinina, ladüga neibuga le ñíjin lubei Núguchi.

¹⁷ Ábati jálügüdagun jádaangiñe láni disípulugu jámagua, ába jariñagun.

—¿Cásan míni lan le? Lariñaga woun luágu málüjali lan ánjein maríjin wamá, múrusunya lánme dan lárigiñe, ábayame lan waríjini, ladüga leibuga lan le ñíjin lubei Lúguchi. ¹⁸ ¿Ca míni lan láu “murúsun dan lárigiñe le”? Úati gunfaráanda wamáni ca lan uágu ladímureja.

¹⁹ Ába lasúbudiruni Jesúsu luágu busén jama jálügüdaguni, ába lariñagun joun.

—Ariñagatina jun luágu málüjadina lan ánjana maríjin jumá, murúsun lánme dan lárigiñe, ábaya lánme jaríjinina. ¿Ligía le uágubei jálügüdagua júmagua?

²⁰ Ninárün jáu luágu jayájuba lan, jíruga jugúyame, ánjañati gürígia ja láni ubóu le, jagúndaaruba. Láu sun líra, íbini jíru jumá, lasáansiraguba jírun lun ugúndanime. ²¹ Dan le tagüriajan lan ában würi, súfiritu ladüga chülüja lan lórate igári, lásun agüriajouaali lan irájü, marítangunjaru luágu igári, ladüga ugúndani le tasándirubei luágu agüriajaaru lan ában irájü ubouágu. ²² Ítara líña gíñe, jugúya jirutün guetó, naríjayabadün, ábame tabuínchun janígi láu ugúndani, ában ugúndani le úati gayáraati lagídaruni jueí.

²³ Lídaanme wéyu ligía, málügüdüñ jumádiname luágu ni cáta. Ninárün jáu luágu líchugubei lan Núguchi sun le jamúriajabei lídan níri lúma, jun. ²⁴ Chülü lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucrístu, le ásiiragúbalin ubou

²⁵ Ariñaga náali buri cátei le jun láu jémpulu, ínitebei dan lun madímurejaanjadina lánme jun láu jémpulu, ábame nadímurejan furáangu jun luágu Búngiu Úguchili. ²⁶ Lídaanme wéyu ligía, jamúriajaba lúma lídan níri, maríñaguntina luágu nayúmraguba lan lun Núguchi juágu, ²⁷ ladüga ligía guánarü jínsiñetün lun. Jínsiñetün lun ladüga jínsiñe nan jun, afiñeedün gíñe luágu lúmagiñe lan Búngiu niábin. ²⁸ Lúmagiñe Búngiu Úguchili náfurida, ába niábin lídoun ubou le, guetó nígiraali ubou le, neibugaya lúmoun Núguchi.

²⁹ Ába jariñagun láni disípulugu.

—Anáti guetó, badímurejaña furáangu, mayúsurunga jémpulu. ³⁰ Aríja wamáali guetó subúdi lan sun cátei bun, moún lumuti bálügüdüñ luágu ni cáta ladüga subúdi báni jarítangun gürígia. Luágu líra wafiñera luágu lúmagiñe lan Búngiu biábin.

³¹ Ába lariñagun Jesúsu joun.

—¿Afiñeedüti guetó? ³² Iníteeli óra, áni guetó guetó, dánme le jachágaragun sun jugúya, cáda ában luágu loubadina, ábame jígirunina nábugua, láu sun máma lan nábuguañadina ladüga níjein Núguchi núma. ³³ Naríñagunbalin sun le jun,

lun jadárirun ñurúguau lídan jaffínerun nuágu. Jasúfuriruba ubouágu, ganígi jumá, ¡siríguá náali ubouú!

17

Layúmuragun Jesúsu jawágu lání disípulugun

¹ Lárigiñe lariñaguni Jesúsu sun cátei le, ába larijin siélun, ába lariñagun.

—Núguchi, chülúja nidáani, rúba inébesi luágu Biraú, ru lámuga gíñe Biraú inébesi bun. ² Rújadibu ubáfu lun Biraú jawágu sun gürígia lun líchugun ibágari magúmuchaditi joun ja bíchugubaña lun. ³ Níjan lébunabei ibágari le magúmuchaditi, lun jasúbudirunibu gürígia amürü le Búngiu ábanrügüti, le inárüti, luma lun jasúbudirunina, áu Jesucristu le boúnajabei.

⁴ Rújadina uweírighuni bun ya ubouágu, gumú nan gíñe le uágubei boúnajana.

⁵ Guetóti Núguchi, rúbei uweírighuni le méme méja nánibei nun biñúwarú lubáragiñe meja ñi lan ubouú.

⁶ ‘Subúdigüda náali joun ja baságarubaña lídaangiñe ubouú lun bíchuguniña nun, cátabu lan. Bánigu meja, ába bíchuguniña nun, ñüdüntiña láu le bubeibeí.

⁷ Guetó, subúdi jamáali luágu sun lan le bíchugubei nun búmagiñe lan liábin, ⁸ rúnaali ugánu le bíchugubei nun joun áni resíbi jamúti, subúdi jamáali luágu inárüni lan luágu búmagiñe lan niábin, affíñeeña gíñe luágu amürü lan oúnajabalina.

⁹ ‘Ayúmuraguatina bun jawágu, mayúmuraguntina jawágu lánigu ubouú, nayúmuragun jawágu ja bíchugubaña nun, ladüga báni jamá. ¹⁰ Sun le náni, báni, le báni, náni, arijúati nuweírighun jawágu.

¹¹ ‘Áu, meréedina ubouágu, ánjein jagía, jeréderuba. Áu, neíbuga búmoun. Núguchi sánduti, toúnigi baña ja bíchugubaña nun láu bubáfu luei jeigquadun, lun lídan jamá ában le tímatimaati quei áu búma. ¹² Dán meja le jáma nan ubouágu, toúnigi numútiña meja ja bíchugubaña nun láu bubáfu, meféridiruntina ni ában jádaangiñe lueidügü Júdas, lun lagúnfulirun le búrwañubei tídan Berérun.

¹³ ‘Guetó, neíbuga le ñíjin bubeí, luágu anájagua lan ubouágu aríñaga numúti buri cátei le lun jabuínchun láu ugúndani méme le nuágubei. ¹⁴ Rúnaali berérun joun, ába jeyéegudún lun ubouú, ladüga máma jamá lánigu ubouú ítara queísi máma lan lánigu ubouú áu. ¹⁵ Mamúriajaantina búma lun baságaruniña ubouágugiñe, namúriajan búma lun batoúnigiruniña lueí Máfia. ¹⁶ Ítara quei máma lan lání ubouú áu, máma gíñe lání ubouú jagía. ¹⁷ Derégeguagüda baña jóungua bun, láu lubáfu berérun le inárütibeí. ¹⁸ Quei boúnajanina jádoun lánigu ubouú láu ugánu lánina asálbaruni, ítara gíñe noúnajaniña jádoun lánigu ubouú láu ugánu ligía. ¹⁹ Áni derégeguatina núngua bun jawágu, lun gíñe jedéregeragun jóungua bun le tímatimaati.

²⁰ ‘Máma rügüñein jawágu namúriaja búma, amúriajatina gíñe jawágu ja lúnbaña jaffínerun nuágu dánme le jagáambuni ugánu lánina asálbaruni jámagiñe.

²¹ Amúriajatina búma lun lídan jamá ában sun jagía, lun ában méme jamá cátei wáma quei áu búma, amürü núma, lun lídan jamá ában buídu buídu, lun lafiñerun ubouú luágu boúnajan nan. ²² Rúnaali uweírighuni le méme bíchugubei nun joun, lun ában méme jamá cátei quei ában méme wamá cátei áu búma, ²³ áu jádan, amürü nídan, lun jayábin lun ában mémebaña lan buídu buídu, subúdi lámugei ubouú luágu boúnajan lan áu, áni jínsiñe jamá bun sarágu quei nísíñe bun.

²⁴ ‘Núguchi, amürü íchugubaliña nun, buséntina lun númabaña lan le ñi numuti, lun jaríjini uweírighuni le bíchugubei nun, ladüga jinsiñegubeiñadina bun lubáragiñe ladügüniwa ubou. ²⁵ Núguchi richáguati, ibídiñetibu lun ubou, subúditibu nun, subúdi jamáli giñe wügüríña ja luágu bouñajan lan áu. ²⁶ Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun giñe ñi nan já dan.

18

Janügüni Jesúsu adáüra

(Mt 26.47-56; Mr 14.43-50; Lc 22.47-53)

¹ Lárighiñe laríñaguni Jesúsu cátei le, ába láfuridun jáu láni disípulugu lun jóudin loubáfurugun dúna le cedrón. Ñiñein ában fulásu lé buri ñi lumuti tídibu olívos, ñijin lubei lebélera Jesúsu jáu láni disípulugu. ² Subúdi lumúti giñe Júdas le alúgurubalin Jesúsu, fulásu ligia, ladüga oúndaraguañajaali Jesúsu ñi jáma láni disípulugu. ³ Ába lubeiti lachúlürün Júdas ñijin jáu sarágu súdeara jáma polisía ja tánina témpulu, jóunajan jábutigu fádirigu jáma fariséogu. Gárumatetiña, barütíña giñe lámpu lúma tóchi. ⁴ Quei subúdi láali lan Jesúsu le lúnbei lasúseredun lun, ába láfuridun, ába laríñagun joun.

—¿Ca jáluajabei?

⁵ Ába jaríñagun lun.

—Wáluajañein Jesúsu le Nazarétna.

Laríñaga Jesúsu joun.

—Áu Jesúsu ligia le jáluajabei.

Ñiñeinti Júdas le edégerubalin jáma. ⁶ Dan laríñagunbei Jesúsu joun luágu ligia lan le jáluajabei, ába jeíguadunga múarugún janagoún. ⁷ Ábaya laríñagun Jesúsu joun.

—¿Ca jáluajabei?

Ába jaríñagun lun.

—Wáluajañein Jesúsu le Nazarétna.

⁸ Ábati laríñagun Jesúsu joun.

—Aríñagaadinatia jun luágu áu lan. Ánjein áu lubei jáluajabei, ígira jumáña ja lun jóudin.

⁹ Lasúseredunbei líra lun lagúnfulirun le laríñagubei Jesúsu guánarügü. “Mefédirúnti ni ában jádaangiñe ja líchugubaña Núguchi nun.” ¹⁰ Ábati laságarunun Simón Pedro lefeinte, ába líbuguni larígei ában lumúsun fádiri le íñutimaabei gíriti Málco. ¹¹ Ába laríñagun Jesúsu lun Pedro.

—Dáboun befeinte tárigoún. ¿Jaritaguatibu funági luágu moun lan nasúfuriruni ouchwagüni le líchugubei Núguchi lun nasúfuriruni?

Jesúsu ligíbugiñe fádiri le íñutimaabei

(Mt 26.57-58; Mr 14.53-54; Lc 22.54)

¹² Ábati janügüni súdeara, lúma gumándan, jáma japolisían juríu, Jesúsu adáüra, ába jagüraguni. ¹³ Lárighiñe, ába janügüni lúbiñoun Anás. Anás ligia limédamurubei Gáifasi, fádiri le íñutimaabei lídan irúmu ligia. ¹⁴ Gáifasi ligia, le méme meja aríñagubei joun juríu luágu buítima lan joun lun loúnwen ában wügüri jawágu sun mútu.

Leyéedagun Pédro luágu subúdi láni Jesúsu
(Mt 26.69-70; Mr 14.66-68; Lc 22.55-57)

¹⁵ Ába wouúdin, áu Juan lúma Simón Pédro, lárigi lárigi Jesúsu. Áu, subúditina lun fádiri le íñutimaabei, ábati nebelurun lúma Jesúsu lídoun túbürürü lúban fádiri, ¹⁶ ánjeinti Pédro, ába leréderun bougudi luágu béna. Ligía náfuridunbei, ába nadímurejan túma to ouñigirubalin béna, ába nebélaagüdüni Pédro. ¹⁷ Ábati tálügüdüni ouñigirutu béna Pédro.

—¿Ma bugúya ában jádaangiñe láni gürígia le disípulugu?

Lariñaga Pédro.

—Uá, máma áu.

¹⁸ Queiti dilíga lubei, fúguatiñati músu jáma polisía wátu, rára jañáti ñi abácharagua. Ñiñein giñe Pédro jáma, abácharagua larügürügü wátu.

Lálügüdaguni fádiri le íñutimaabei Jesúsu
(Mt 26.59-66; Mr 14.55-64; Lc 22.66-71)

¹⁹ Ába lagúmeserun fádiri le íñutimaabei álügüdaguei Jesúsu cátaña lan lánibaña disípulugu, cátei lan giñe larúfudajabei. ²⁰ Lariñaga Jesúsu lun.

—Bougudi nadímureja ligíbugiñe sun ubouú, súnwandan narúfudajan tídan ligíli lúma témpulurugu le ñi lubei jóundaragua sun juríu, madügüngidina lubeiti ni cáta arámudaguati. ²¹ ¿Ca uágu bálügüdana? Álügüda báña ja agáambubalina, jagíalá aríñagei le uágubei nadímureja joun. Subúdi jamúti le nariñagubei joun.

²² Dan lariñaguni Jesúsu cátei le, ába liábin ában jádaangiñe polisía ja tánina témpulu, ába lagáyuajan ligíbuagan, ába lariñagun lun.

—¿Ítara lúba bouñabuni fádiri le íñutimaabei?

²³ Lariñaga Jesúsu lun.

—Ánjein aríñaga nubei wuríbati, aríñagabei jalíañein lan luríban, ánjeinti búdu lubei le nariñagubei, ¿ca uágu bagáyuaja nuágu?

²⁴ Ábati louñajani Anás gürágu lun Gáifasi, fádiri le íñutimaabei lídan irúmu ligía.

Leyéedagunya Pédro luágu Jesúsu
(Mt 26.71-75; Mr 14.69-72; Lc 22.58-62)

²⁵ Sun dan le, nijágua Pédro abácharagua larügürügü wátu, ába jariñagun lun.

—¿Másan amürü ában jádaangiñe láni gürígia le disípulugu?

Ába leyéedagun Pédro, ába lariñagun.

—Uá, máma áu.

²⁶ Ábati lálügüdüni ában jádaangiñe lumúsuniña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ñi lumuti tídibu olívos?

²⁷ Ábaya leyéedagun Pédro, lídan óra ligía, ába layúgurujan gáyu.

Jesúsu ligíbugiñe Piláto
(Mt 27.1-2, 11-14; Mr 15.1-5; Lc 23.1-5)

²⁸ Ábati janügüni Jesúsu lúbiñegiñe Gáifasi lun lúbiñoun gumándan. Arúgadeina liñáti, mebelutiñati juríu palásieurugún lueí marúma jamá, siñáme gádan láníña adíneruni le lánina páscua. ²⁹ Ligía láfuridunbei Piláto lun ladímurejan jáma, ába lariñagun joun.

—¿Cásan lidúnrunbei gürígia le jurúma?

³⁰ Ába jaríñagun lun.

—Lun jamúga madügün lan wuríbani, medéregerun wamúti jamúga bun.

³¹ Ábati laríñagun Piláto joun.

—Barüjumei, agúseragüda jumei quei laríñaguni jilúrudun guánarü.

Jaríñaga juríu lun.

—Wagía juríu, maríchatiwa lun wáfarun ni ában jilágubei.

³² Ítara líña lagúnfulirún le laríñagubei Jesúsu luágu ligáburi ída lúba lan loúnwen. ³³ Ábaya lebélorun Piláto palásiurugun, ába lagúarun lun Jesúsu, ába laríñagun lun.

—¿Amürü Jarúeitebei Juríu?

³⁴ Ába laríñagun Jesúsu lun.

—¿Luágu báni búngua bálügüdaja luágu líra, ódi ladüga jaríñaguni ámu bun nuágu?

³⁵ Laríñaga Piláto lun.

—¿Juríu funági áu? Binásiñun jáma jábutigu fádirigu, jagía edéregerubalibu nun. ¿Cági bidúnrunbei?

³⁶ Ábati laríñagun Jesúsu lun.

—Narúeijan máma lánina ubou le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷ Ábati laríñagun Piláto lun.

—¿Urúei lubeíti amürü?

Laríñaga Jesúsu lun.

—Urúei áu quei baríñaguni. Agüriajouatina, ñübin áu lídoun ubou le lun nariñaguni le inárünibeí. Sun ja gagáambadibaña lun inárüni, agáamba jamúti le nariñagubei.

³⁸ Laríñaga Piláto lun.

—¿Cáteiti inárünibeí?

Lasíadirúniwa Jesúsu lun ouweni

(Mt 27.15-31; Mr 15.6-20; Lc 23.13-25)

Lárigiñe ladügüni Piláto álügüdajani le, ábaya láfuridun adímureja jáma juríu, ába laríñagun joun.

—Madáritina ni murúsun dúru luágu wügüri le. ³⁹ Quei jéchu jumá lun nígiragüdün ában adaürüti jun lídan fédu le lání páscua, ¿buséntün lun náfuridagüdüni Jesúsu le jarúeitebei juríu?

⁴⁰ Ábaya jagúaragun sun jagía.

—¡Mígiragüdabeí le! ¡Barabáslá bígiragüda!

Barabási ligía, ában jíwer uti.

19

¹ Ábati lanügüni Piláto Jesúsu, ába loúnajan abeíchagüdei, ² ába jíchugun ában súdaara ába ridi láuti jíyu leréberugu Jesúsu, ába jadáüraguagüdüni táu ában anáanguni colóru gúchu. ³ Ába jayárafadun lubádun dan méme aríñageina.

—¡Gabágarilá Jarúeite Juríu!

Ába jagáyuajan ligíbuagun.

⁴ Ábayati láfuridun Piláto, ába laríñagun joun juríu.

—Naságaraali ñájoun lun jasúbudiruni luágu madári nan dúru luágu.

⁵ Ába láfuridun Jesúsu láu rídi láuti jíyu lábulugu, táu lanáangun colóru gúchu. Ábati lariñagun Piláto joun.

—¡Niján wügüri ligía!

⁶ Dan jaríjinbalin jábutigu fádirigu jáu sun polisía, ába jagúmeserun agúaraja.

—¡Dáguabeí luágu gurúwa! ¡Dáguabeí luágu gurúwa!

Lariñaga Piláto joun.

—Barújumeiti, dágua jumeí luágu gurúwa, ladüga áu, madáritina ni murúsun dúru luágu.

⁷ Ába jariñagun juríu lun.

—Wagía galúruduntiwa áni según walúrudun, lúnti loúnwen ladüga lariñagun luougua luágu Liraü lan Búngiu.

⁸ Dan lagáambunbalin Piláto le, ábatima lanúfudedun. ⁹ Ábaya lebéllurun palásiurugun, ába lariñagun lun Jesúsu.

—¿Jalíanasan amürü?

Moúnabunti Jesúsu ni cáta.

¹⁰ Ábati lariñagun Piláto lun.

—¿Moúnabun bumútina? ¿Ibídiñetisan bun luágu gabáfu nan lun nígiragüdünibu, gabáfu áu lun nádaraguagüdünibu luágu gurúwa?

¹¹ Lariñaga Jesúsu lun.

—Úati jamúga ni murúsun ubáfu búma nuágu lun jamúga míchu láni Búngiu bun, ligía weíritima lubei lídúnrun le edéregerubalina bun sügü báu.

¹² Lúmagiñe óra ligía, ába lálugun Piláto ída lúba lan lígiragüdüni Jesúsu. Ába jagúaragun juríu lun.

—¡Ánjein bígiragüda, máma amürü lumáda urúei Rómana! ¡Furúmieguarügü le aríñaguti luougua luágu urúei lan, lágani urúei Rómana!

¹³ Dan lagáambunbalin Piláto líra, ába loúnajan aságarei Jesúsu, ába lañúurun luágu jalaü le agúseragülei, ubáraü le únbei jariñaga Dübü, Gabáta lídan jerérun juríu. ¹⁴ Queí buri amídirugujaali, le ában wéyu lubá páscua. Ábati lariñagun Piláto joun juríu.

—¡Niján jurúeite!

¹⁵ Ába jagúaragun.

—¡Jilála! ¡Jilála! ¡Dáguabeí luágu gurúwa!

Lariñaga Piláto joun.

—¿Buséntün nádaraguni jurúeite luágu gurúwa?

Jariñaga jábutigu fádirigu lun.

—Marúeitetiwa ámu lueí urúei Rómana.

¹⁶ Láu líra, aba ledéregeruni Piláto joun lun ládarawagún luágu gurúwa, ába janügüni.

Ládarawagún Jesúsu luágu gurúwa

(Mt 27.32-44; Mr 15.21-32; Lc 23.26-43)

¹⁷ Ábati láfuridun Jesúsu barúinaleí lugúruwan lun lídin lídoun fulásu le únbei jariñaga Lufúlasun Lábu Ichügü, Gólgota lídan jerérun juríu. ¹⁸ Ñi jádaraguei luágu gurúwa, dágua jagía bián wügüriña úara lúma, ában lueígiñe cáda louba.

¹⁹ Ába loúnajan Piláto íchigagüda ában abürüjoúni luágu gurúwa, lariñaga ñi. “Jesúsu Nazarétna, Jarúeite Juríu”. ²⁰ Sarágu jáña jádaangiñe juríu alíjati abürüjoúni ligía ladüga fulásu le ñi lubei jádaraguei Jesúsu luágu gurúwa, madíseti ubúrugugiñe, áni abürüjoúati abürüjoúni ligía lídan buri dimúrei

hebréo, güriégu, lúma latín. ²¹ Ligía jaríñagunbei jábutigu jafádirin juríu lun Piláto.

—Mabürüdabá ñi “Jarúeite Juríu”, bürüba “Le aríñagubei luágu Jarúeite lan Juríu.”

²² Ába laríñagun Piláto joun.

—Le bürünaalíbei bürünaalíbei, ítara lúba.

²³ Lárígiñe jádaraguni súdeara Jesúsu luágu gurúwa, ába janügünun lanáangun, ába jadügün gádürü fánreinti táu, ába fánreinti lun cáda súdeara. Ába giñe janügünun lisímisin, quei májüchawagún tubei, ában rügüñoun fiésu iñugiñe lun ünabun, ²⁴ ába jaríñagun súdeara jámagua.

—Majeiridagua wamóun, ájurerera wamá tuágu, aríja wamámuga cába lan agáñiroun.

Ítara líña lagúnfulirun le taríñagubei Lerérun Búngiu. “Fánreingua jamútu nanáangun jádaangua, ájurerera jagía tuágu nisímisin cába lan agáñiroun.” Ítara líña lubeíti jadügüni sudaaragu.

²⁵ Ñiñoun lúguchu Jesúsu yaráfa lun gurúwa túma tamúlelua, María to lúmari Cléofas, túma María Magdaléna. ²⁶ Dan laríjinbarun Jesúsu lúguchu rára nubádu, áu le disípulu lé jínsiñebei lun sarágu, ába laríñagun tun lúguchu.

—Núguchu, nirán biraú.

²⁷ Ába laríñagun nun.

—Nurán búguchu.

Lúmagiñe óra ligía, ába nerésibirunun núbiñe.

Louñwen Jesúsu

(Mt 27.45-56; Mr 15.33-41; Lc 23.44-49)

²⁸ Lárígiñe sun cátei le, quei subúdi láni Jesúsu luágu gúnfulijali lan láu sun le lúnbei ladügüni luágu wasálbarun, ába laríñagun, lun lagúnfulirún le taríñagubei Lerérun Búngiu.

—Mágürabujadina.

²⁹ Ñiñein ában fúdu táu diweín garüjütu, ába jadüduragüdün ában mudúsi tídan diweín tugúya, ába jíchuguni luágu ában wéwe, ába jiñüruni luágun liyúma.

³⁰ Ába látunun Jesúsu diweín garüjütu tugúya, ába laríñagun.

—Gúnfulija sun cátei.

Ába larábachun ligíina, ába louñwen.

Límiruni ában súdeara louba Jesúsu táu lefeínte

³¹ Wéyu ligía, ában wéyu lubá páscua, mabúseeruntiñati juríu lun leréderun jágubu gürígia luágu gurúwa lídan wéyu le eméraaguagülei, ladüga weíríti wéyu ligía. Ligía jamúriaajaanbei lúma Piláto lun louñajan ájalajei járuna ja dáwaguñubaña luágu gurúwa, lun giñe lagídarún jágubu ñígiñe. ³² Ábati jóudin súdeara, ába jájalachuni lúruna furúmiñeti, jalá jamei lúruna le ában le dáwaguñubei luágu gurúwa úara lúma Jesúsu. ³³ Dan le jayárafadunbei lun Jesúsu, ába jaríjin luágu jiláali lan, ligía májalachun jamáali lubei lúruna.

³⁴ Ába líabin ában súdeara, ába límiruni Jesúsu loubawagun táu ában efeín, ába láfuridun jítaü lúma dúna ñígiñe. ³⁵ Áu Juan, le abürüjabin le, ában le aríjubalin, áni aríñaga numúti inárüni, subúdi numúti luágu aríñaga náni inárüni lun giñe jafíñerun jugúya. ³⁶ Ladüga lasúseredunbei buri cátei le, lun lagúnfulirun le taríñagubei Lerérun Búngiu. “Májalachúnwabei ni ában ábuu luágu.” ³⁷ Aríñagati giñe tídan Lerérun Búngiu. “Jaríjubei le jímiragubei.”

*Lábunajoún Jesúsu**(Mt 27.57-61; Mr 15.42-47; Lc 23.50-56)*

³⁸ Lárigiñe sun cátei le, ñiñein ában wügüri Arimatéana, giriti José, falá lumuti meja wügüri ligía Jesúsu, láu sun arámudaguarügü lan ladüga lanúfude jawei juríu, ába lamúriajani lúgubu Jesúsu lúma Piláto. Ába líchuguni lun, ába lanügüni José lúgubu Jesúsu. ³⁹ Ába giñe liábin Nicodémo, lé meja ñüdünbei ayánuja lúma Jesúsu guñoun, ába liábin láu sarágu ibíñei. ⁴⁰ Ábati janügüni José lúma Nicodémo lúgubu Jesúsu, ába jóuburaguni táu gamísa to túaguatu láu ibíñei ligía según jagáburi juríu lubá jábunajan. ⁴¹ Ñiñein ában fulúri-ágei lídan fulásu le ñí lubei jádaraguei Jesúsu luágu gurúwa, lídaanti fulásu ligía, ñiñein ában umúajaü iséri le mayúsurungili. ⁴² Ñijin jíchigei lúgubu Jesúsu, ladüga yaráfa lan umúajaü ligía, ladüga giñe agüñeeli lan, gumése wéyu le eméraaguagülei.

20*Lásaarun Jesúsu lídaangiñe oúweni**(Mt 28.1-10; Mr 16.1-8; Lc 24.1-12)*

¹ Wéyu dimáasu, lubá larúgan dan le búrigagili, ába tídin María Magdaléna aríjei umúajaü, dan tachülürünbei ñi, úaali dübü le lidaü umúajaü ñi. ² Ába tídin eíbaagueina le ñijin wabeí áu lúma Simón Pédro, ába taríñagun woun.

—Barújama Jesúsu lídaangiñe lumúaja, ibídiñeti woun jalía lan jíchigei.

³ Ábati wáfuridun, ába wóudin luágun umúajaü. ⁴ Úara wóudin biángubei wagía eíbaagueina, furésetina lueí Pédro, ába nachülürün furúmiñe luágu umúajaü. ⁵ Ába nélemuchun aríja ñijin, gamísa rügüñoun naríja ñi, mebelútina. ⁶ Lárigiñe, ába lachülürün Simón Pédro, ába lebelúrún lídoun umúajaü. Gamísa to aúboun lagürawagua Jesúsu, tugúya rügüñoun giñe laríja ñi. ⁷ Gamísati to áboun jóubarawagúa lichügü Jesúsu, máma lídaañoun ában túma tó buri áboun lagürawagúa, jóuburagu tíña, tábugua. ⁸ Ába giñeti nebelúrún, ába naríjini le asúseredubei, ába nafíñerun luágu saráali lan Jesúsu lídaangiñe oúweni. ⁹ Ligíaaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe oúweni. ¹⁰ Ábati wagíribudun wábiñoun.

*Larúfudagun Jesúsu lúngua tun María Magdaléna**(Mr 16.9-11)*

¹¹ Ánjounti María, ába teréderun bougudi ayájuaja lubádu umúajaü. Sun nuján lan ayájua, ába télemuchun aríja lídoun umúajaü, ¹² ába taríjin bián ánjeligu, jarútu jadáuragun, ñun le ñí lubei buga lúgubu Jesúsu, ában lichügügiñe, ában lugúdigíñe. ¹³ Ába jaríñagun ánjeligu jagía tun.

—¿Ca uágu bayájua?

Taríñaga joun.

—Barújama Nabúreme, ibídiñeti nun jalía lan jíchigei.

¹⁴ Queí taríñagun ítara, ába tadígiragun, ába taríjini Jesúsu, niján lan ñi, ibídiñeti tun luágu ligía lan. ¹⁵ Ábati laríñagun Jesúsu tun.

—¿Ca uágu bayájua? ¿Ca báluajabei?

Sun taríñaguti le oúnigirubalin fulúri-ágei adímurejabei tun, ába taríñagun lun.

—Ánjein banügün lubei, aríñagabei nun jalía lan bíchigei, barü námugei.

¹⁶ Ábati laríñagun Jesúsu tun.

—¡María!

Ába tagáraragun, ába taríñagun lun lídan jerérun juríu.

—¡Rabóni! —míni lan líra, Maésturu.

¹⁷ Laríñaga Jesúsu tun.

—Márügüdabá nuágu, ladüga maweínrungidina le ñíjin lubeí Nóguchi. Beíba, bariñagame joun náni disípulugu luágu neíbuga lan le ñíjin lubeí Nóguchi, le gíñe Júguchi, Nubúngiute le gíñe Jubúngiute.

¹⁸ Ábati tídin María Magdaléna awísaraña disípulugu luágu aríja táali lan Jesúsu, áni aríñaga láni buri cátei le tun lun taríñaguni joun.

Larúfudagun Jesúsu lúngua joun disípulugu

(Mt 28.16-20; Mr 16.14-18; Lc 24.36-49)

¹⁹ Wéyu méme ligía gúñoun, oúndaragu jáña disípulugu, darúgu béna jáu ladüga janúfude jawei juríu. Ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁰ Lárigiñe laríñaguni líra, ába larúfuduni lújabu lúma louba joun. Ába jagúndaaragun disípulugu láu jaríjini Jesúsu. ²¹ Ábaya laríñagun Jesúsu joun.

—Níjeinlá darángilaü jídan. Ítara quei louñajanina Nóguchi, ítara líña gíñe nouñajanün.

²² Ábati láfurun jawágun, ába laríñagun joun.

—Resíbi jumeí Sífiri Sándu. ²³ Ánjein ferúduna jumá jafígoun ámu, ferúdunawaali, ánjein úa ferúduna jumáni, reídeijali, úouga ferúdunawa lan.

Laríjini Tomás Jesúsu lárigiñe lásaarun lídaangiñe ouwéni

²⁴ Tomás, ában jádaangiñe dúusu disípulugu le únbei jaríñaga Mádou, úatiti jáma dan le líabinbei Jesúsu. ²⁵ Lárigiñe, ába jaríñagun ja jíbiri disípulugu lun.

—Aríja wamáali Wabúreme Jesúsu.

Ába laríñagun Tomás joun.

—Ánjein maríjin nan lárigi gürábu luágu lújabu, da neíme liraúraü nújabu lídoun júyu le lárigi gürábu, da nújabu lídoun louba, siñábei nafíñerun.

²⁶ Wídü wéyu lárigiñe, oúndaragu jáñaya disípulugu tídan ában muna, ñíñeinti Tomás jáma dan ligía. Láu sun darúgu líña lan béna jáu, ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁷ Ába laríñagun lun Tomás.

—Dábei liraúraü bújabu ñájoun, aríja beíme nújabu, da beíme bújabu lídoun nouba. Masígirabá láu liloúguan afíñeni, afíñebá luágu áu lan.

²⁸ Ábati laríñagun Tomás.

—¡Nabúreme, Nubúngiute gíñe!

²⁹ Laríñaga Jesúsu lun.

—Tomás, afíñeedibu guetó, ladüga aríja báadina lan, gúndaatíña ja afíñerubaña, maríjinga jamána.

Ca lan lébubei tabürüjoún líburu to

³⁰ Adúgayati Jesúsu ámu sarágu miláguru jagíbugiñe láni disípulugu, le úabei bürüñu tídan líburu to. ³¹ Labürüdünbei buri le lun jafíñerun luágu Jesúsu lan Crístubei, le Liraü Búngiu, lun gíñe láu lan jafíñerun, gabágari jumá queísi lánigu.

21

Larúfudagun Jesúsu lúngua joun sédü jádaangiñe láni disípulugu

¹ Lárigiñe, ábaya larúfudagun Jesúsu lúngua joun láni disípulugu lárú dúna le giríbei Tibérias. Niján ligáburí ladügüni. ² Lídaañanu ában Simón Pédro, Tomás le únbei jaríñaga Mádou, Natanaél, le lílana Caná le láni Galiléa, lirájüñü Zebedeó, jámaya bián jádaangiñe láni Jesúsu disípulugu. ³ Ába laríñagun Simón Pédro joun.

—Neíbuga esénija.

Ába jaríñagun lun.

—Weíbuga giñe búma.

Ába jádinun tídoun jagúne, ába jóúdin, mañúguntiña ni cáta árieibu ligía. ⁴ Dan le arúgadeina lan, ába jaríjini Jesúsu ñi lárú dúna, ibídiñetí yebe joun disípulugu luágu Jesúsu lan. ⁵ Ábati laríñagun joun.

—Numádagu, ¿mañúgungidúnsan?

Jaríñaga lun.

—Ni cáta.

⁶ Ábati laríñagun Jesúsu joun.

—Fíjuma luegiñe touñwenren ibítí ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jibe úduraü ⁷ Ábati naríñagun, aú Juan, lun Pédro.

—Jesúsutia le!

Quei lagáambun Simón Pédro luágu Jesúsu lan, ába ladáürunun lanáangun, ába lachúbarun dúnarugun. ⁸ Ja jíbiri disípulugu, ába jóúdin lárú béya táu ugúnein, adúrujeina jamóun séni buin jáu úduraü, quei ában rügüñein lan san báduñ jadíse lueí béya. ⁹ Dan le jarárirun múarugun, ába jadárirun wátu gemetí láu eñéguraü, láu ában úduraü ligíbuagu túma fein. ¹⁰ Ába laríñagun Jesúsu joun.

—Barújuma fiú jádaangiñe úduraü ja sun liñábei jañúguniña.

¹¹ Ába ládínun Simón Pédro tídoun ugúnein, ába ladúrujanun séni lárú béya buin jáu úduraü weínamutiña, san dimí-san úrúwañanu, láu sun jibe, ma-jeíridaguntú séni. ¹² Ábati laríñagun Jesúsu joun.

—Jigoúgu, játa bachátí.

Úati ni ában jádaangiñe disípulugu álügüdüti cátei lan, ladüga subúdi jamáni luágu Jesúsu lan. ¹³ Ába liábin, ába lanügünun fein lújaburugu, ába líchugunun joun, ligía méme ladüga láu úduraü.

¹⁴ Ligía lürüwan larúfudagun Jesúsu lúngua joun láni disípulugu lárigi lásaarun lídaangiñe oúweni lúnya labágaridun.

Ladímurejan Jesúsu lúma Simón Pédro

¹⁵ Lárigiñe játun bachátí, ába laríñagun Jesúsu lun Simón Pédro.

—Simón, Liraü Jonás, ¿jinsiñetinasan bun sügü jáu ja?

Laríñaga Pédro lun.

—Ánja, Nabúreme, subúdi bun luágu jinsiñe ban nun.

Ába laríñagun Jesúsu lun.

—Touñigi bañati nánigu queísi ában jóuniri mudún buítí.

¹⁶ Ábaya lálügüdüni luágu libíaman weíyaasu.

—Simón, liraü Jonás, ¿jinsiñetinasan bun le tímatimaati?

Laríñaga Pédro lun.

—Ánja, Nabúreme, subúdi bun luágu jinsiñe ban nun.

Laríñaga lun.

—Toúnigi báñati nánigu.

¹⁷ Ábaya lálügüdüni luágu lürüwan weíyaasu.

—Simón, liraü Jonás, ¿jinsiñetinasan bun?

Ába lírudagun Pédro ladüga lálügüdüni Jesúsu luágu lürüwan weíyaasu ánjein jinsiñe lubei lun, ába laríñagun lun.

—Nabúreme, subúsiiti sun cátei bun. Subúsiiti bun luágu jinsiñe ban nun.

Ába laríñagun Jesúsu lun.

—Toúnigi báñati nánigu queísi ában jóuniri mudún buíti. ¹⁸ Ninárün báu, luágu dan lán meja ñúraütimagidibu, ábaja badáüragun, ába bídin le ñíjin lumúti babúseera, dánme le weíyaadibu, iñúrarügübalime barüna, ábame ladáüraguagüdünibu ámu, ábame lanügünibu le ñíjin lumúti mabúseerun ban bídin.

¹⁹ Láu laríñaguni Jesúsu cátei le, lasúbudiragüdüñein ída lúba lan ligáburu loúnwen Pédro, lun lichugun uweíríguni lun Búngiu láu. Lárígiñe, ába laríñagun lun.

—¡Falábana!

Disípulu le jinsiñegubei

²⁰ Dan ladígiragúnbei Pédro, ába laríjinina, áu Juan, anángüran lan járigi, áu le jinsiñebei sarágu lun Jesúsu, le méme añúurubei loúbagiñe Jesúsu lídan adíneruni, le gíñe álügüdübalin Jesúsu cába lan wádaangiñe edéregerei. ²¹ Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²² Laríñaga Jesúsu lun.

—Ánjana busén labágaridun daríme nagíribudun, ¿cámegi burúma? Amürü, falábana.

²³ Ábati leíbaagun dimúrei jádan jíbiri lánigu Jesúsu luágu moúnwenbadina lán nege, mariñagunti Jesúsu luágu moúnwenbadina lan, aríñagarügüti. “Ánjana busén labágaridun darí lúmoun nagíribudun, ¿cámegi burúma?”

²⁴ Áu méme disípulu le, le achóururubalin buri cátei le, abürüja náaru gíñe gárada to jalíjaboun guetó. Áni subúdiwati luágu inárüni lan le naríñagubei.

²⁵ Níjein gíñe sarágu cátei ladüga Jesúsu, ánjein jamúga abürüjoúa ában ában, afiñetina luágu mábara tan jamúga buri líburu to abürüjoútu láu lídan sun ubou.

CÁTEI LÉ BURI MEJA JADÜGÜBEI APÓSTOLUGU

Louñajani Búngiu Sífiri Sándu

¹ Lun teófilo.

Abürüjatina bun tidan furúmiñetu nigáradan luágu sun le ladügübei Jesúsu, lúma le larúfudajabei, lúmagiñe dan le lagúmeserunbalin luwádigimari ² dari lúmoun wéyu le lamúdeirúnbei siélun. Lubáragiñebei lídin siélun, láu lubáfu Sífiri Sándu aríñaga lumúti cátei lé buri labúseerubei lun jadügüni apóstolugu já meja lanúadajabaña, lárigiñe lídin jámagiñe. ³ Lídan bián-wein wéyu le láubei ubouágu lárigiñe lásaarun lídaangiñe ouweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴ Dán meja le níjeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúrugú Jerusalén, laráñaga joun.

—Agúraba jumá lagúnfulirun dimúrei le lichugubei Nóguchi jun, le uágubei naráñaga jun. ⁵ Subúdi jumúti luágu badíseigüda lan Juan láu dúna, nasúbudiragüdúñein jun luágu málújadún lan giñe ánjaün badísei láu Sífiri Sándu.

Lamúdeirun Jesúsu siélun

⁶ Dan le oúndaragujaña lubei lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷ Laráñaga Jesúsu joun.

—Siñáti jasúbudiruni ídame lan o cába lan dan ladügei Nóguchi cátei le buri, ligía rügüñein gayára laráñagun ídame lan ladügei. ⁸ Ánjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun louábawagu Judéa, Samária, chülü lúmoun lidíse-ágei fulásu ubouágu.

⁹ Lárigiñe laráñaguni Jesúsu cátei le, sun añája lan aríaguei, ába liñurúniwa lun lanügüniwa siélun, ába liábin ában juánriñu, ába ladáuragun láu, ába maríjan jamáali lan. ¹⁰ Níñanu aríagua siélun sun amúdeireina lan Jesúsu, ligía jasáliragun bián wügüriña, jarútu jadáüragun jarúgabu, ¹¹ ába jaríñagun joun.

—Wügüriña Galiléana, ¿ca uágu jerédera aríagua siélun? Jesúsu méme le, le amúdeirubei siélun júmagiñe, liábiyaba ítara quei jaríjin lídin.

Lanúadirún Matías lewéñequame Júdas

¹² Ábati jagíribudun disípulugu lueígiñe wübü le gíribei Olívos lun ubúrugun Jerusalén, lidíse ában kilómetro. ¹³ Dan le jachülürünbei ubúrugun, ába jamúdeirun tidoun rúmu to ní lubei jagánawa. Níñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraü Álfeo, Simón le lídaanbei adámurini le gíribei Cananista, lúma Júdas le lamúlen Jacóbo. ¹⁴ Oúndaraguátíñaja sun jagía súnwandan lun jayúmuragun lun Búngiu jáma lamúleno Jesúsu, túma María to lúguchu, jáma ja jíbiri würiña.

¹⁵ Luágu ában wéyu lídan dan ligía, ába laráramun Pédro jagíbugiñe sun affíñetiña ja ñibaña—jawára san-wein gürígia—ába laráñagun joun.

¹⁶ —Nidújeñu, lúnti buga lagúnfulirun le laráñagubei Sífiri Sándu liyúmulugugiñe David tidan Lerérun Búngiu, lídan le ladímurejánbei luágu Júdas, le adúndejabáliña ja anügübalin Jesúsu adáúra. ¹⁷ Ában meja jádaangiñe

wánigu, Júdas, áni seríwiti lun Jesúsu úara wáma. ¹⁸ Ába lídin, ába lagáñijan ában fulásu láu seínsu le afáyeirúbei lun luágu wuríbani le ladügúbei. Ába láburlujan láu láburlugu ünabun, ába lafáünchün, ába lafuridun sun litrípan. ¹⁹ Dan le jagáambunbalin gürígia ja aganóubaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jítaü.

²⁰ Ába lasígirun Pédro aríñaga.

—Bürüwañu líña dimúrei buri le luágu Júdas tídan líburu to gíriboun Sálmos. Laríñajare ñi.

Reídeitá lúban málouga,
úa jamá aganóutiña tídan.

Aríñagati gíñe ñi.

Rúalá lubára lun ámu.

²¹ Ítara líña lubeíti, lúnti wanúadajan ában wügüri wádaangiñe lé meja wámati sun dan le wáma lubei Jesúsu, ²² lúmagiñe dan le labásterágüdünbalin Juan Jesúsu darí lúmoun dan le lamúdeirünbei siélun, lun lewéñegua lan Júdas. Wügüri ligía, líchuguba fe úara wáma luágu lásaarun Jesúsu lídaangiñe oúweni lúnya labágaridun.

²³ Ábati jíridun bián jádaangiñe. José, le méme gíribei Barsabási, le méme gíñe gíribei Jústó, lúma Matías. ²⁴ Ába jayúmuragun lun Búngiu ítara.

—Wabúreme, amürü le subúdjabúbei tun janígi sun gürígia, arúfudabei woun ca lan jádaangiñe bián wügüriña ja anúadira báalibei ²⁵ lun lesériwidunibu queísi apóstolu lewéñegua Júdas. Ladüga féridi láali Júdas lubára ladüga lafígounjan, áni ñüdünja lídoun fulásu le ladünabei.

²⁶ Ábati jíchaajan ubúnuruni, ába láburlujan luágun Matías. Lúmagiñe óra ligía, ába ábanjali lan jádaangiñe apóstolugu.

2

Liábin Sífiri Sándu

¹ Dan lachülürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu. ² Sódini ába lagaambún ában ireíni ñübinti siéluigiñe quei dan le láfurun ában garábali jéreti, ába lagaambún tídan sun múna to ñi jabei. ³ Ábati lasálrágún buri cátei joun camá ligémeri wátu, afánreinjóaüa lun ñi lan ában murúsun lougiñe láburlugu cáda ában jádaangiñe. ⁴ Ába jabuínchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei luei jerérun quei ladímuregüdüniña Sífiri Sándu.

⁵ Lídoun buri dan ligía, ñíburiñanu juríu Jerusalén ja gúnfulitiña lídan jafiñen, ñübintiña lídaangiñe sun fulásu ubóúagu. ⁶ Dan le jagáambunbalin ireíni ligía, ába jóúndaragunga gürígia, ibídiñeja joun cába lan jasáminara ladüga cáda ában jádaangiñe gürígia jagía, agáamba jamútiña lánigu Jesúsu adímureja lídan jerérun guánarü. ⁷ Ába laweíridun janígi, ába jaríñagun jámagua.

—¿Ma funági Galiléana ja adímurejabaña? ⁸ ¿Ída líñáti wagáambubaliña adímureja lídan lerérun cáda ában wádaangiñe? ⁹ Añájein gürígia Pártiana ya, Médiana, Elámna, Mesopotámiana, Judéana, Capadócia, Póntona jáma Ásiana, ¹⁰ Fríjiana, Panfíliana, Ejíptona lúma lídaangiñe buri fulásu África le yagüroun mémebei luei Ciréne. Añájein giñe Rómána aganóutiña ya, añájein jádaangiñe, juríu ladüga juríu jamá jagübürigu, jíbiri, barü jamaali ligáburi jafiñen juríu.

¹¹ Añájein giñe güriña Crétana jáma Arábiana, sun wagía agáamba wamútiña adímureja luágu luweirigun Búngiu lídan werérun guánarü.

¹² Weíriti janígi súngebei, ibidiñeja joun cába lan jasáminara, ába buri jálügdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jariñagun.

—Bacháruañanürügü jáña.

Le lariñagubei Pédro joun güriña ja ñibaña

¹⁴ Ábati laráramun Pédro jáma ja jíbiri únsu apóstolugu, ába lariñagun láu umálali jéreti.

—Wügüriña Judéana jáma sun ja aganoubaña Jerusalén, agáamba jumei le lúnbei nariñaguni jun buídu, subúdi jumámugei ca lan lílabei cátei le jarijubei.

¹⁵ Mabácharuántiña wügüriña ja quei jarítagun, néfugubeigili bináafin guetó.

¹⁶ Cátei le, le jarijubei, ligía lé meja uágubei ladímureja Joél, le proféta, dan le lariñagunbei.

¹⁷ Lídoun buríme lagúmujoun wéyu, líña lariñagun Búngiu,

noúnajabei náni Espíritu jádoun sun güriña,

nadímurejaba jayúmulugugiñe jisáanigu.

Nayáwadaguba joun irájüñü,

lúma joun weyaaña mútu.

¹⁸ Noúnajabei giñe náni Espíritu jádoun ja esériwidubaña nun lídoun buri wéyu

ligía, wügüriña jáma würiña,

ábame nadímurejan jayúmulugugiñe.

¹⁹ Narúfuduba buri cátei gariyawaseti siélu,

narúfuduba seíni ubouágu.

láubei jítaü seíni buri ligía, láu wátu geméti, lúma láu juánriñu láuti gumúlali.

²⁰ Labúrigaduba wéyu,

láfuarame játi funáti quei jítaü,

lubáragiñe lachülürün luwéyuri Wabúreme,

le lúnbei ában lan wéyu weíriti, le marijngilíbei líbe.

²¹ Áni sun ja amúriajatiña asálbaruni lúmagiñe Búngiu, jasálbaruba.

²² Agáamba jumei lubeíti le lúnbei nariñaguni, jugúya wügüriña Israelítagu.

Jesúsu le Nazarétna, ában meja wügüri le larúfudubei Búngiu jigíbugiñe quei wügüri úraguati láu buri cátei weinamuti, miláguru, lúma buri seíni le

ladügübei Búngiu jagánagua lídaangiñe, quei le jisúbudin. ²³ Láu sun líra,

dan le ledéregerúnbei jun, quei ligáburu aráansejani le lariñagubei Búngiu

lúmagiñe furúmiñeti dan, ába jáfaruni jilágubei láu jedéregeruni joun wügüriña

wuribatíña lun jádaraguni luágu gurúwa. ²⁴ Ába leséfuruni Búngiu lídaangiñe

lubáfu ouweni, sarágüda lumúti lúnya labágaridun, ladüga siñá lan gabáfu lan

ouweni luágu. ²⁵ Lariñajare urúei David, dan le ladímurejan luágu Jesúsu.

Subúdi numúti luágu númabei lan Nabúreme Búngiu súnwandan,

noúbagiñeñein lun úa lan ni cáta lun lebélaagüdün anúfudei nídoun.

²⁶ Ligía lébubei téjerajan nanígi,

ába nadímurejan luágu ugúndani le nídaanbei.

Láu sun wügüri nan garaüwarügüti,

jemenigitina buágu luágu nabágaridayaba lan,

²⁷ ladüga mígirun bubóun nuwáni lídan jabára jiláaña,

mígirun amúrume lun lañáladun nógubu, áu le bánigu le jínsiñebei bun.

²⁸ Arúfuda bumúti úma le anügübei gürígia lídoun ibágari magúmuchaditi nun, áni babuínchagüdübadina láu ugúndani láu abúnja lan nubádu.

²⁹ ‘Nidújeñu, cátei furánguti le, luágu jilá lan meja wadúje Davíd, bunáwa ligía, gayáraagili waríjini lumúaja chúlú lúmoun wéyu le. ³⁰ Davíd, ában meja proféta ligía, áni subúdi lumúti meja luágu aríñaga láali lan Búngiu lun luágu jádaangiñeba lan linébaanfan liábin Crístu, le lúnbei lañúurun luágu lála.

³¹ Adímurejati lubeíti Davíd luágu lásaarun Crístu lídaangiñe ouweni, luágu gíñe merédeboun lan luwáni lídan jabára jiláaña, mañáladun ligíame lúgbu. Ítara líña ladímurejan Davíd luágu Crístu camá jamuga aríagu líña lun, áni ítara líña lasúseredun. ³² Sarágüda lumúti Búngiu Jesúsu méme le lídaangiñe ouweni, sun wagía geféentiwa luágu líra. ³³ Ñurügüda lumúti Búngiu lueígiñe louñwenren láu sarágu uweírugini, ába lerésibiruni Sífiri Sándu lúmagiñe Búngiu queísi laríñaguni Búngiu lun, lun gayáraabei lan louñajani méme Sífiri Sándu ligía joun sun lánigu ubouágu. Ligía cátei le aríja jumáalibei lúma le agáamba jumáalibei guetó. ³⁴ Máma Davíd amúdeirubei siélun, aríñagati Davíd guánarügü. Lariñajare Búngiu lun Nabúreme.

“Ñürüba lueígiñe nouñwenren,

³⁵ daríme níchuguniña báganiñu lábugiñoun bubáfu.”

³⁶ ‘Lúnti jasúbudiruni sun jugúya linásiñun Israél luágu Jesúsu méme lan le, le jádaragubei luágu gurúwa, adüga láali lan Búngiu lun ligiaba lan Wasálbaragüle, ligíame gíñe Wabúreme.

³⁷ Dan jagáambunbalin cátei le, ába lebéllun igárigu tídoun janígi, ába jaríñagun lun Pédro lúma joun jíbiri apóstolugu.

—Wadújeñu, ¿cábasan wadüga?

³⁸ Ába laríñagun Pédro joun.

—Sáansi jumejí jigáburí ligíbugiñe Búngiu, badísei jugúyame cáda ában lídan líri Jesucrístu, ferúdnawa lámuga jifígoun, ru lámugei Búngiu Sífiri Sándu jun.

³⁹ Ladüga aríñagaali Búngiu luágu líchugubei lan gíñe Sífiri Sándu jun, lúma joun jadügawagun, lúma joun ja aganoubaña dise, lúma joun sun ja lagúarubaña Búngiu lun lánigu jamá.

⁴⁰ Láu buri dimúrei le lúma buri ámu, ladímureja Pédro joun, ába laríñagun joun.

—Séfu jumá lueí asúfuriruni le lúnbei liábin jawágun gürígia wuríbatíña ja.

⁴¹ Ítara líñáti ába jabásterun, ja adügübaña gásu láu lerérun, ába jayábin queí buri ürüwa mílu gürígia lun jafíñerun luágu Jesucrístu wéyu ligía.

⁴² Ába jedéregeragun jóungua lun jafúnrendeiruni le jarúfudajabei apóstolugu joun, aganoua jagía lídan úarani jámagua, ayúmuragua jagía buri lun Búngiu, oundaragua jagía lun jeíginun fein to aritaguagülei luágu louñwen Jesúsu, queísi meja laríñaguni joun apóstolugu lun jadügüni.

Jabágari furúmiñetiña lánigu Crístu

⁴³ Súngubei láuñanu luweírín anígi luágu buri seíni lúma buri miláguru le ladügübei Búngiu jádaangiñe apóstolugu. ⁴⁴ Sun ja afíñerubaña, lídaañanu ában, ába buríti jafánreinjani le jámati jádaangua. ⁴⁵ Jalúgurajei buri jafúlasun lúma le jámati, ába jafánreinjani lebégi según lemegeirun cáda ában. ⁴⁶ Ságü wéyu jotúndaragun témpulurugu lun jájuduragun lun Búngiu. Lárigiñe, ába jotúndaragun lúbiñe ában jádaangiñe lun jeíginun fein to aritaguagülei luágu louñwen Jesúsu, lúma lun jeígin le lánina ságü wéyu, lídan ában láu ugúndani lúma gudémeгу.

47 Ábaja jadímurejan weírigu luágu Búngiu, ábati jínsiñe jamá joun gürígia, ábatija anáajeina lániña Búngiu ja asálbareinabaña jánwoun.

3

Lareidagun ában meíbugunti

1 Luágu ában wéyu, ába lídin Pédro lúma Juan témpulurugu ladaünrün ürüwa rábounwéyu, le lórate ayúmuraguni lun Búngiu. 2 Ságü wéyu, ñíñein lan ában wügüri meíbugunti lúmagiñe lagüriajoún, barüwarügütija añúura lubádu tubéneri témpulu le gíribei “Béna Buídumeraüti” lun lamúriajan seínsu jáma ebélurutiña témpulurugun. 3 Dan le laríjinbaliña meíbugunti ligía Pédro lúma Juan jebélura lan témpulurúgun, ába lamúriajan seínsu jáma. 4 Ábati jaríjin Pédro lúma Juan luágun, ába laríñagun Pédro lun.

—Aríjabá wawágun.

5 Ába laríjin jawágun, agúraba yebe jíchugun seínsu lun. 6 Ába laríñagun Pédro lun.

—Maseínsutina, níchigaali le númati bun. lídan líri Jesucrístu le Nazarétna, sarába, beíbuga.

7 Ábati lárügüdüni Pédro lueígiñe lújabu le loúnwenren, ába liñúraguni, óra ligía, ába ledébugudun lugúdi lúma lumúrugute. 8 Ábati lachúbarun lun laráramun, ába leíbugun. Ába lebéburun jáma témpulurugun, eíbugeina, achúbajeina, adímurejeina luágu luweírigin Búngiu. 9 Ába jaríjini sun gürígia eíbuga lúma adímureja luágu luweírigin Búngiu. 10 Weirititi janígi luágu le asúseredubei lun, quei subúdi jabálin wügüri ligía, subúdi jameí luágu ligía lan léñaja añúurubei amúriaja tubéneri témpulu le gíribei “Béna Buídumeraüti”.

Lapúrichijan Pédro témpulurugu

11 Mígiragüdün lumútiñati meíbugunti le areidagubei Pédro lúma Juan, súnti gürígia, ába jeíbaagun láu luweírín janígi luágun tubárandá témpulu le gíribei Salomón, le ñí jabei. 12 Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírída janígi? ¿Ca uágu jaríaguawa camá jamuga wagía areidaguagüdúbalin wügüri le, eíbugagüdei láu wabáfu o láu lan wagúnfulin lúma Búngiu? 13 Máma líña, Búngiu, le Jabúngiute binádu wagübúrigu Abrahám, Isáac lúma Jacób, ligía areidaguagüdúbalin wügüri le lun líchuguni líñun-ágei uweírigin lun Jesucrístu le Liraü, lígira lé meja jedégerubei joun lúrudugun, áni dan lálugan Piláto lígiragüdüni, májatün. 14 Lubáragiñe jamúriajan lun lígirawagüdün Jesúsu le jarúmabei áni richágu, amúriajarágü jugúya lun lígirawagüdün ában gáfarajati. 15 Ítara líña jáfaruni le íchugubalin ibágarí tímatimaati. Ába lásaaragüdüni Búngiu lídaangiñe ouweni, áni geféentiwa luágu líra. 16 Niján wügüri le jaríjubei áni subúdi jumeí, láu lubáfu méme Jesúsu ligía, lerésibira érei. Wafíñen luágu Jesúsu, ligía areidaguagüdúbalin buídu buídu quei jaríjini.

17 Subúdi náali, nidújeñu, luágu ibídiñe lán meja jun ca lan jadügübei dan le jáfarunbálin Jesúsu, jugúya jáma jábutinu. 18 Láu sun líra, gúnfuli lumúti Búngiu lé meja laríñagubei jádaangiñe profétagu, luágu lúnti lan lasúfuriruba lan Crístu. 19 Ligía lubeíti, ígira jumeí binádu jigáburi, giríbu jumá lun Búngiu, chibáwa lámuga jíffigoun. 20 Ábameti gayára lan loúnajan Búngiu eméraaguni tun juwáni, oúnajaya leíme Jesúsu le Crístu, le aráanseelibeí lubáragiñe furúmiñeti dan woun. 21 Láu sun, lúnti lan leréderun Jesucrístu siélu guetó daríme laráanseruni

Búngiu sun cátei quei laríñaguni jádaangiñe profétagu ja derégeguaañabaña jóungua lun, lídan meja dan le binádu. ²² Ítara líña lubeíti aríñagati meja Moisés joun binádu wagübürigu. “Louñajaba Wabúreme Búngiu ában proféta jádaangiñe guánarügü quei louñajanina. Ánja jumá lun sun le lúnbei laríñaguni jun, ²³ ladüga sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagünrinchawagún.”

²⁴ Ítara líña lubeíti, sun profétagu lúmagiñe Samuél darí lárigiñe, adímurejatiña libügürü buri cátei le lúnbei lasúseredun lídoun buri wéyu le. ²⁵ Jugúya lúnbei jerésibiruni sun le laríñagubei Búngiu jádaangiñe profétagu, luáguti giñe jufúleisein darádu lé meja ladügubei Búngiu jáma binádu wagübürigu dan le laríñagunbei lun Abrahám. “Nabínirubaña sun gürígia ja ubouágubaña láu ában jádaangiñe binébaanfaangu.” ²⁶ Ába lanúadajani Búngiu Liraü lun louñajani jun furúmiñe, jugúya juríu, lun labínirunün cáda ában jádaangiñe, láu laságarunün lídaangiñe luríban jigáburi.

4

Pédro lúma Juan jagíbugiñe gumádimatiña

¹ Nígiña Pedro lúma Juan adímureja joun gürígia, ligía jayábin jafádirigun juríu, jáma jábutigu súaara ja oúnigirubarun témpulu, jáma ja lídaanbaña jadámurin saduséogu. ² Gáñitiña ladüga jarúfudajan Pédro lúma Juan joun gürígia, aríñaga jagía luágu arúfudúa lan luágu jásaaruba lan gürígia lídaangiñe ouweni lúnya jabágaridun ladüga sará lan Jesúsu. ³ Ábati janügüniña adáüra, ába jádaruniña furísunrugun darí larúgan quei dárüjali lubeí. ⁴ Sarágu jáña jádaangiñe ja agáambubalin ugánu le jíchugubei apóstolugu affínerutiña luágu. Ja affínerubaña járügü wügüriña, quei buri seíngü mílu.

⁵ Larúgan, ába jóundaragun jábutigu juríu, wügüriña weírigutiña lídan jafíñen, jáma arúfudajatiña lilúrudun Moisés, Jerusalén. ⁶ Níñein giñe Anás le fádiri le ínutimaabei, Gáifasi, Juan, Alejándro jáma sun ja jádaangiñebaña lufámilian Anás. ⁷ Ábati jóúnajan anúgei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídaguagüdei wügüri le?

⁸ Buin líña Pédro láu Sífiri Sándu, ába laríñagun joun.

—Jábutigu juríu jáma wügüriña weírigutiña lídan wafíñen. ⁹ quei jálügüdüniwa luágu buíti le adügübei lun ában wügüri sánditi, ída líña lan lareídawaguágüdün, ¹⁰ buséntiwa lun jasúbudiruni, jugúya jáma sun gürígia ja Israelítagu, luágu láu lan lubáfu Jesucristu le Nazarétna niján lubei wügüri le ya jigíbugiñe areídaguañu. Láu lubáfu Jesucristu, le meme jádaragubei luágu gurúwa, le lásaaragüdübei Búngiu lídaangiñe ouweni, lareídagua. ¹¹ Jesúsu le, ligía queísi dübü le áubei jíchiga mebéreseni, jugúya le queíbaña ábumagutiña muna, áni ñúbinjali Jesúsu lun ligíaba lan quei dübü le mégeiwatimaabei lídan bunáguau. ¹² Úati ámu lun lasálbaruniwa lueídügüya Jesucristu, ladüga míchuti Búngiu ámu íri ubouágu lun gayára lan wasálbarun lueígiñe.

¹³ Dan jaríjini gumádimatiña luágu adímureja jamá Pédro lúma Juan manúfudeiga ní murúsun, áni subúdi jameí luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábati jasúbudiruni luágu jádaangiñetiña lan já meja eíbugubaña lúma Jesúsu. ¹⁴ Queíti níñein lubeí wügüri le areídawaguágüdübei jáma, rára ligía, siñáti

jaríñagun lúrudugu ni cáta. ¹⁵ Ábati jóunajaniña lúrudugu Pédro lúma Juan lúma wügüri le areídaguualibeí bougudin lueí jadámurin lun gayáraabei lan jayánujan jámagua. ¹⁶ Jaríñagati.

—¿Cábasan wadüga jáu wügüriña ja? Sun ja aganoúbaña Jerusalén subúdi jamúti luágu adüga jamáali lan miláguru le, áni siñáti wayeedagan láu. ¹⁷ Lun mabúrchagun lan uganú luágu cátei le lídan sun fulásu, wewerídiraña lun madímurejandügüya jamá ni ca un lídan líri Jesúsu lúmagiñe ugüñe.

¹⁸ Ábati jagúarun joun lun jebélurun, ába jaríñagun joun lun ni lan ca uágu lun madímurejan jamá, marúfudajan jagíame lídan líri Jesúsu. ¹⁹ Ába jaríñagun Pédro lúma Juan joun.

—Samína jumá júngua ánjein buídu lubeí ligíbugiñe Búngiu lun ladügün le jubeibeí, ígira le lubeibeí Búngiu. ²⁰ Wagía, siñáti wámanichun láu cátei le aríja wamáalibeí lúma le agáamba wamáalibeí.

²¹ Ábayati jewerídiruniña gumádimatiña, ába jígiragüdüniña. Madáritiña ída lúba lan jadügün ni cáta jáu ladüga adímurejatiña buri güriquia buíti luágu Búngiu luágu cátei le asúseredubeí. ²² Wügüri le areídagubeí láu miláguru ligía, sügü láu bián-wein írúmu láu.

Jamúriajan afñetiña manúfudei lúma Búngiu lídan jesériwidun lun

²³ Dan le jáfuridun Pédro lúma Juan furisunrugugiñe, ába jóudin le ñi jabeí jíbirigu, ába jabájüdaguni sun le jaríñagubeí jábutigu fádirigu jáma wügüriña weirigutiña joun. ²⁴ Dan jagáambubalin, ába jayúmuragun sun jagía lun Búngiu, ába jaríñagun.

—Wabúreme, amürü Búngiubeí le adügübalin siélu, ubouú, barána lúma sun cátei. ²⁵ Amürü, aríñagatibu láu lubáfu Sífiri Sándu liyúmulugugiñe David lé meja esériwidubeí lun.

¿Ca uágu jagáñida ja mámabaña juríu, samína jagía lun jadügüni cátei le siñábei jadügüni?

²⁶ Inúraguatiña lurúitegu ubou jóungua, oúndaraguatiña lábutigu fulásu

lun jadügün wuríbani lun Wabúreme Búngiu lúma lun Crístu le lanúadajabei.

²⁷ Áni suséreti ítara, oúndaraguatiña Heródes luma Póncio Piláto lídan ubúruge le, jáma ja mámabaña juríu, lúma jáma Israelítagu lun jadügün wuríbani lun Biraü Jesúsu le sándubeí, le banúadajabei. ²⁸ Láu líra, adüga jamúti sun le baráansejabei lun lasúsereduba lan. ²⁹ Guetóti, Wabúreme, aríjabeí jasiadiruniwa, rúba anígi woun, wagía le esériwidubalibu, lun wadímurejan buágu manúfudeiga, ³⁰ gayára lámuga giñe wareídaguágüdüñ sánditiña, adüga wagiame miláguru lídan líri Biraü Jesúsu le sándubeí, láu bubáfu wawágu.

³¹ Dan le lásurun jayúmuragun, ába lánjingichun fulásu le ñi lubeí jóúndaragua, ába jabuínchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súnqua luágu

³² Sun ja afñerubaña, ában lábu jarítangun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súnqua luágu.

³³ Ába jasígirun apóstolugu adímureja luágu lásaarun Wabúreme Jesúsu lídaangiñe oúweni láu sarágu ubáfu, ábati labíniruniña Búngiu sun jagía sarágu. ³⁴ Úati ni ában jádaangiñe emégeiruti ni cáta ladüga sun ja gafúlasunbaña o gában, ába buri jalúgurunun, ába janügüni tebégi, ³⁵ ába jadéreggeruni joun apóstolugu

lun lafánreinjoún jádan ja emeigeirutiña. ³⁶ Queiburi, ñíñein ában jádaangiñe ladügawagun Levi jádan, gíriti José, agüriajóuti luágu uboúju le gíribei Chípre, ába jáchuni apóstolugu Bernabé, míni lan líra, “Le Íchigubei Gurásu”. ³⁷ Wügüri ligía, ába lalúguruni lufúlasun, ába lanügüni seínsu ederegera joun apóstolugu.

5

Jafígoun Ananías túma Safira

¹ Ñíñein giñe ában wügüri gíriti Ananías, túma Safira, to lúmari, ába giñe jalúgurun ában fulásu. ² Wügüri le, ába lanügün lídaangiñe seínsu, ába lídin láu líbiri joun apóstolugu, lafámura camá jamuga ligía rügüñein libíjin luágu fulásu. Áni subúsititi sun cátei tun lúmari. ³ Ábati lariñagun Pédro lun.

—Ananías, ¿ca uágu bígira lun lagañiruni Máfia barítagun lun layéejagüdünibu lun Sífiri Sándu, lun beréderun láu líbiri seínsu le afáyeirúbei bun luágu fulásu? ⁴ ¿Ma funági bufúlasun meja fulásu? Lárigiñe balúguruni, ¿ma biseínsun lun badügüni le babúseerunbei láu? ¿Ca uágu basáminara badügüni cátei le? Búngiu balugubei bayéedagun, máma wügüriña.

⁵ Dan lagáambuni Ananías cátei le, ába láburujan oúwe. Súnti ja asúbudirubalin cátei le, ába janúfudedagun. ⁶ Ábati jayábin wügüriña, ába jóuburaguni Ananías, ába janügüni ábuna.

⁷ Queiburi ürúwa óra lárigiñe, ába tebélorun lúmari Ananías, ibídiñoun ni cáta tun luágu le asúseredubei. ⁸ Ába lariñagun Pédro tun.

—Ariñagabeí nun, ¿luágu ebégi le jariñagubei jalúgurei fulásu?

Ába tariñagun.

—Ánja, luágu ebégi ligía.

⁹ Ábati lariñagun Pédro.

—¿Ca san uágu jebélura lídoun úraduni lun jóuchaguni láni Búngiu Espíritu ítara? Añatén ja anügübalin búmari ábuna, janügadibu giñe.

¹⁰ Lídan méme óra ligía, ába táburujan oúwe lubádu lugúdi Pédro. Dan jebélorun wügüriña, jadáriroun jiláaru, ába jaságarunun, ába jábununun loúbagiñe túmari. ¹¹ Súnti gürígia ja afiñebaña luágu Crístu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

¹² Adáguatiña buri apóstolugu sarágu seíni lúma miláguru jádan gürígia, ábati buri jóúndaragun sun afiñetiña lídan fulásu témpulurugu le gíribei “Barandá Salomón”. ¹³ Úati meja ni ában jádaangiñe ja mámabaña afiñetiña lun jóúndaragun jáma afiñetiña ladüga janúfude, láu sun jínsiñe jamá sun afiñetiña joun gürígia, sarágu. ¹⁴ Eibu wéyu, eibu jayábin gürígia lun jafiñerun luágu Jesucrístu, dándu wügüriña queísi würiña. ¹⁵ Quei jadügüña lan apóstolugu sarágu miláguru, ába jaságaraguniña gürígia sánditiña úmadoun tídan jabárari lun dan lan lásügürün Pédro, gayára lan jareidagun láurügü tadágarun liyáwa jawágu. ¹⁶ Nübintiña giñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawágutiña espíritugu wuríbatíña, sun jagía areídagutiña.

Jeíbaajoún Pédro lúma Juan

¹⁷ Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü, ¹⁸ ába janügüniña apóstolugu, ába jadáürüniña. ¹⁹ Ába

ladáruni ában láni Wabúreme Búngiu ánjeli tubéneri furísun árieibu ligía, ába láfuridagüdüniña, ába lariñagun joun.

²⁰ —Jeiba, jaráramame témpulurugu, ábame jabájüdagun joun ja ñíbaña luágu iséri ibágari le líchugubei Jesucristu joun güriúa.

²¹ Dan jagáambuni cátei le, ába jóudin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóundaruniña líñun-ágei lúruđu, ja súnbaña Israelítagu weirigutiña, ába jóunajan anúgaña apóstolugu furísunrugugiñe. ²² Dan jachülürünbei polisía furísunrugu, madári jamútiña ñi. Ába jagríbudun, ²³ ába jariñagun.

—Darúñu líña wadárirunun furísun, ñíñanu súaara bénabu óunigira, dan le webélurunbei, madáritiwa ni ában jádaangiñe apóstolugu ñi múnada.

²⁴ Dan le jagáambunbalin jábutigu fádorigu lúma jábuti súaara ja óunigirubarun témpulu cátei le, ába jálügüdagun jóungua cába lánfuna ídan lébeda cátei le.

²⁵ Lídan óra ligía, ligía liábin ában wügüri, ába lariñagun joun.

—Ja wügüriña ja jádarubaña furísunrugun, añájein témpulurugu arúfudaja joun güriúa.

²⁶ Ábati lídin jábuti óunigirutiña jáu súaara, ába janügüniña láu buíđu, ladüga janúfude lueí jachámuragun güriúa dübü jawágun. ²⁷ Dan jachülürün jáu, ába jíchuguniña ligíbugiñe líñun-ágei lúruđu, ába lariñagun fádiri íñutimaati joun.

²⁸ —Wéridi wamáadün lun marúfudajandügüya jumá lídan líri Jesúsü, áni ¿ca jadüga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügüri ligía.

²⁹ Ábati loúnabun Pédro jáma ja jíbiri apóstolugu, ába lariñagun.

—Lúnti wagáambuni Búngiu lun wadügüni le lubeíbei lubáragiñe le jabeíbei wügüriña. ³⁰ Le Jabúngiute bináđu wagübüriгу, ligía ásaaragüdübalin Jesúsü, le méme jáfarubei láu jádaraguni luágu ában gurúwa. ³¹ Rúlaali Búngiu uweiriguni lun, ñurügüdalei lueígiñe loúnwenren, adüga láali Ábutime lúma Asálbaragülei, gayára lámuga jígiruni Israelítagu bináđu jagáburi, lun giñe ferúdnawa lan jafígoun. ³² Geféentiwa luágu líra, geféenti giñe Sífiri Sándu le líchugubei Búngiu joun ja ñüdünbaña láu le lubeíbei.

³³ Dan jagáambunbalin líñun-ágei lúruđu cátei le, ába jagáñidun, ába yebe jabúseerun jáfaraguniña jílagubei. ³⁴ Ñíñein ában fariséo jádan lúrudugu, gíriti Gamaliél, maésturu lánina lílúrudun Moisés, inébeti joun güriúa sarágu. Ába laráramun, ába lariñagun lun janügüniwa apóstolugu lídaangiñe adamurini luágu murúsun óra, gayára lámuga ladímurejan jámarügü lúruđu. ³⁵ Ába lariñagun joun gumádimatiña.

—Wügüriña Israélna, toúnigi jumátia láu le lúnbei jadügüni jáu wügüriña ja. ³⁶ Jarítagua jumátia luágu íñúruga lán meja Teudás lúngua aríñaga luágu ában lan wügüri weiriguti ligía, ába jafálaruni gádürü-san wügüriña, áni afarúati jílagubei, súnti ja afálarubalin, ába jawáragadagun, ába lagúmuchun sun cátei. ³⁷ Lárigiñe, lídan lídáani jabájüdüniwa güriúa, ligía líñúrágun Júdas le Galiléana lúngua, sarágu jáña afálaruti lídan labúseerun yebe lagárabagun luágun gumádi. Afarúati giñe, ába giñe jawáragadagun sun ja afálarubalin. ³⁸ Ígira jumáña lubeíti wügüriña ja, memétera jumá jámoun. Ladüga ánjein jáni lubeí wügüriña cátei le jarúfudajabei lúma le jadügübei, lagúmuchaguba, ³⁹ ánjein láni lubeí Búngiu, siña jubei agünrinchagua. Toúnigi jumá, mageíndagua jumá lúma Búngiu.

⁴⁰ Ába jánjanrun súngebui láu le laríñagubei. Ábati jebélaagüdüniña apóstolugu, ába jabeíchuniña, ába jariñagun joun lun jebé lan jadímurejan lídan líri Jesúsu. Lárigiñe, ába jígiragüdüniña, ⁴¹ Ába jáfuridun apóstolugu jámagiñe lúrudugu, gúndaañu láu laríjiniña Búngiu queisi gürígia gadúnamatíña lun jasúfuriruni busígánu luágu líri Jesúsu. ⁴² Merédetiti jarúfudajan témpulurugu lúma tídan buri múna ságü wéyu, aríñaga jagía luágu Jesúsu lan Crístubei le agúrabajoúbei.

6

Jáluajoúniwa sédü ídejatiña

¹ Lídan dan ligía, quei agíbedeina jamátima afíñetiña luágu Jesucrístu, ába jagúmeserun ja adímurejabaña güríegu adárira jadúnrun ja adímurejabalin jerérun juríu, ába jariñagun luágu mibíjin jamá wúríña güríegu ja jiláañabaña úmari eígini dan le lafánreinjoúniwa, ságü wéyu. ² Ábati joúndaruniña dúusu apóstolugu afíñetiña, ába jariñagun joun.

—Mabuídunti lun wígiruni wapúríchijani lerérun Búngiu lun wagíaba lan afánreinjei eígini. ³ Ligía lubeiti nidújeñu, áluga jumá sédü wügüríña jídaangiñe ja gafiñerúati jawágu, ja chúbaña áu, ja derégeguatiña joúngua lun Sífiri Sándu le gumúti, lun jadügüni wadágimanu le. ⁴ Wagía, wedéregerubei wadáani lun ayúmuraguni lun Búngiu luma lun warúfudajani lerérun.

⁵ Ába júaradun súngebui lídan cátei le, ába janúadiruní Estéban, le ában wügürí buín líña láu afíñeni luágu Jesucrístu áni derégeguañu líña lúngua lun Sífiri Sándu le gumúti, Felipe, Prócoro, Nicanór, Timón, Parménas lúma Nicolás le Antioquíana, le meja afálarubalin ligáburi jafiñen juríu. ⁶ Ába janügüniña le ñíjin jabeí apóstolugu, ába jayúmuragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaaña lan agáambuti lerérun Búngiu lídan sun fulásu, agánwoundeina jagía afíñetiña Jerusalén furése, ába giñe jafiñerun sarágu fádirigu juríu luágu Jesucrístu.

Ladáürün Estéban

⁸ Adáaguatíja Estéban, le ábanbei wügürí le buínbei láu ubáfu lúma abíniruni lúmagiñeti Búngiu, miláguru lúma seíni jádan gürígia. ⁹ Ábati jagúmeserun gürígia asígeneja luágu, gürígia jagía, túdaangiñetiña jalígílisin juríu to gíriboun “Idámunigu Joúnguanaña”, jáma Ciréneña, Alejandríana, Cilíciana jáma Ásiana. ¹⁰ Siñáti joun lúma Estéban, ladúga láu lichú áu le lichugubei Sífiri Sándu lun ladímureja. ¹¹ Ábati jafáyeirun wügüríña lun jariñagun luágu agáamba jamáani adímureja wuríba luágu Moisés lúma luágu Búngiu. ¹² Ábati jafúdagüdüniña gürígia, jáma arúfudajatiña lilúrudun Moisés, jáma wügüríña weírigutiña lídan jafiñen juríu, ába jarügüdüni Estéban, ába janügüni ligíbugiñoun líñun-ágei lúrudu. ¹³ Ába giñe jálugun yéetiña lun jariñagun luágu lerédera lan adímureja wuríba tuágu témpulu sándu lúma luágu lilúrudun Moisés. ¹⁴ Jariñaga.

—Agáamba wamúti laríñagun luágu lagúnrinchagubouñ lan Jesúsu Nazarétna témpulu, sáansi leíme igáburi le lígirubei Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, itara líña camá ligíbu ában ánjeli.

7

Ladímurejan Estéban luágu lufúleisein

¹ Ábati laríñagun fádiri le íñutimaabei lun Estéban.

—¿Inárüni sun cátei le?

² Ába loúnabun.

—Nidújeñu, nagübürigu, agáamba jumána. Weíriguti Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán. ³ Ába laríñagun lun. “Ígirabei bageíra jáma bidújeñu, beíba lídoun fulásu le lúnbei narúfuduni bun.” ⁴ Ábati láfuridun Abrahám Caldéagiñe, ába lídin agánawa Harán. Lárigiñe, ába loúnwen lúguchi, ába lanügüni Búngiu Abrahám lídoun fulásu le ñi lubei wagánawa guetó. ⁵ Míchuti ni murúsun múa lun lídan fulásu le, aríñagarügüti lun luágu lachúlürüba lan dan lun lánibei lan ageíraü le jáu sun ladügüwagun, láu sún meja marájüñügili lan Abrahám lídan dan ligía. ⁶ Aríñagati Búngiu lun luágu jaganoúba lan ladügawagun quei teréncha lídan jageíra ámu, luágu idámunibaña lan ñi, amúdirúa jagiame luágu gádürü-san irúmu. ⁷ Aríñagati giñe Búngiu lun. “Nagúseragüdübaña lílana fulásu le anügübaliña idámunime, lárigiñeme lásügürün gádürü-san irúmu, ábame jáfuridun ñigiñe, ábame jeséridun nun lídan fulásu le.” ⁸ Adügati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubei lagüriajouñbei liraü Abrahám le Isáac, ába lerésibiruni circuncisión luágu widü wéyu láu, ítara giñe ladüga Isáac lun Jacób le liraü, adügaí Jacób, le méme gíribei Israél, joun dúusu lirájüñü, ja jagübürigubaña dúusu türüba ja gíribaña Israelítagu guetó.

⁹ ‘Lirájüñü Jacób ja, ja binádubaña wagübürigu, ába jagímugajan lun José le jamúlen, ába jalóguruni lun lanügün Ejíptoun quei idámuni. Níñein Búngiu lúma José, ¹⁰ ába leséfuruni lídaangiñe sun lidíjeri láu lichugun gunfaráandaü lun. Ába lagáñeiragüdüni lufúleisein Faraón, le lurúeite Ejípto lun, ába lichuguni José ábutime ñi Ejípto lúma tídan lúban Faraón.

¹¹ ‘Ábati ladágarun ában ilámaü lídan fulásu le Ejípto lúma Canaán, deréti meja dan ligía, madáritiñati binádu wagübürigu cába lan jeíga. ¹² Ába lagáambun Jacób luágu níjein lan eígin Ejípto, ába loúnajaniña lirájüñü, ja binádu wagübürigu, ñi. Ligía furúmiñetibi jaweíyasun. ¹³ Le libíaman jóudin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José. ¹⁴ Ábati loúnajan José anügei Jacób le lúguchi jáu sun lufámilian, Ejíptoun, ürüwañanu-wein-queínsi gürüria jagía. ¹⁵ Ítara líña lídinbei Jacób agánawa Ejípto, le ñi lubei louwe, ñi lubei giñe jóüwegua binádu wagübürigu. ¹⁶ Átiri irúmu lárigiñe, ába lanügüniwa jábu ñigiñe lídoun fulásu le gíribei Síquem, ába jabunún lídan umúajaü lé meja lagáñijabei Abrahám jámagiñe lirájüñü Hamor ñi Síquem.

¹⁷ ‘Dan le layáfafadúnbei dan lun lagúnfulirun dimúrei le lichugubei Búngiu lun Abrahám, gíbeeña ladügawagun Israél Ejípto. ¹⁸ Ábati lagúmeserun ában urúei agúmadija Ejípto le ibidíñejabubei lun José. ¹⁹ Ába layéeraguniña urúei ligía warásan juríu, amúdiragua láña binádu wagübürigu, águragüdáña jasáanigu ja figígiña joun lun jóüwegun, gumúgua lámuga warásan. ²⁰ Lídan dan ligía, ligía lagüriajouñ Moisés, ában irájü buídumeraüti, ába jagüriajani lagübürigu jábiñe luágu ürüwa játi. ²¹ Dan lachúlürünbei dan lun jáguruni, ába jáguruni, ába tabúduni liraü urúei Ejíptona, ába tagüriajani quei tiraü. ²² Ligía lafúnrendeirubalin Moisés lichú jáu Ejíptona, áni gabáfutiti lídan le laríñagubei lúma le ladügubei.

²³ ‘Dan le bián-weínjali irúmu láu Moisés, ába lálugun lídin aríjaña lirásan ja ladúgawagun Israél, ja ñibaña Ejípto. ²⁴ Ába laríjin ában Ejíptona amúdiragua ában jádaangiñe, ába lídin Moisés íderaguei lidúje, ába leséfuruni láu láfaruni Ejíptona ligia jilágubei. ²⁵ Moisés, jaritaguati luágu jasúbudirúbei lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti. ²⁶ Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdúniña jámagua. Ítara líña laríñagunbei joun. “Ában mémestia mútu jugúya, ¿ca uágu jageíndagua júmagua?” ²⁷ Ábati ládaruni wügüri le áluajabei wuríbu lúma le ában, ába laríñagun lun. “¿Ca íchubalíbu ábutime lúma agúseragüdútime wádan? ²⁸ ¿Buséntibu gíñe báfarunina quei báfaruni Ejíptona ligíra gúñaarú?” ²⁹ Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi quei teréncha, ába jaguchi lan bián irájüñü ñi.

³⁰ ‘Bián-wein irúmu larigiñe, ába lasáriragun ában ánjeli lun lídan fulásu mageírawati, yaráfa lun wúbü le giríbei Sinaí, liábin lun quei wátu geméti lídan ában búbugati. ³¹ Ába laweíridun lanígi Moisés láu cátei le laríjubei, dánti layarafadun lúntima laríjini buídu, ába lagáambun laríñagun lumálali Wabúreme Búngiu. ³² “Áu Jabúngiute binádu bagübürigu, Lubúngiute Abrahám, Lubúngiute Isáac lúma Jacób.” Ábati lagúmeserun Moisés adádagara láu anúfudei, májaali ni lun laríjin ñíjin. ³³ Ába laríñagun Búngiu lun. “Gidáboun bigeídin luegiñe bugúdi, ladúga fulásu le ñi bubei rára, fulásu sánduti. ³⁴ Aríja náali jasúfurirun numútuniña Ejípto, agáamba náali jagúajan láu igárigu, neséfuraaña lubeíti. Jigábu lubeíti, noúnajadibu Ejípto.”

³⁵ ‘Láu sun mebéresen jamá láu Moisés, álügüda jamei ca lan íchubalin ábutime lúma agúseragüdútime, oúnaja lumúti Búngiu quei ábuti lúma quei eséfujati, adímurejeina Búngiu lídaangiñe ánjeli le asáriragubei lun lídan búbugati. ³⁶ Moisés aságarubaliña binádu wagübürigu Ejíptogiñe, adúga ligia miláguru buri lúma buri cátei weíriguti lídan fulásu ligia, lídan Barána Funáti, lúma lídan fulásu mageírawati, luágu bián-wein irúmu. ³⁷ Moisés meme le, ligia aríñagubei joun Israelítagu. “Loúnajaba Búngiu ában proféta jun jádaangiñe guánarügü jibíriña, quei loúnajanina. Adúga jumá gásu láu.” ³⁸ Lídan le añája lubei Israelítagu adámurigu lídan fulásu mageírawati, Moisés méme le, ába ladímurejan lúma ánjeli luágu wúbü le Sinaí, ába lásügüragüdúni lerérun ánjeli ligia joun binádu wagübürigu. Ligia le erésibirubalin ugánu le adúrubei lun sun dan lúmagiñe Búngiu lun lásügüragüdúni woun.

³⁹ ‘Májataña meja binádu wagübürigu jagáambuni Moisés, mebéreseruntiña láu, busénrügü jagía jagíribudun Ejíptoun. ⁴⁰ Ábati jaríñagun lun Aarón. “Buséntiwa lun badügün búngiugu woun lun jóudin wabá wabá, ladúga ibíñeti woun ca lan susérebei lun Moisés, le aságarubaliwa Ejíptogiñe.” ⁴¹ Ábati jadügün ában tiyáwa bágasu lun jasándunme, ába jáfarun ánímaalugu lun jadágaragüdün tun jasándun, ába jadügün fédu lun jagúndaarun láu cátei le jadügübei láu jájabu. ⁴² Ábati ladíreirun Búngiu jawei, ába lígiruniña lun jájuduragun joun warúguma ja siélubaña. Ítara líña labürüdün tídan jalíburun profétaгу.

Jugúya Israelítagu, ¿afaratün funági anímaalugu lun jadágaragüdün nun lídan bián-wein irúmu le jáubei lídan fulásu mageírawati?

⁴³ Madügün jumúti líra, lubáragiñe lira, barü jumuti jisándun Molóc tídan lágei to jadügüboun lun,

túma tiyáwa warúguma to gíriboun Renfán, to giñe janügüboun quei jisándun, iyáwaü buri ja jadáagun guánarügü lun jájuduragun joun.

Ligia naságarubadün lubei jageiragiñe, nouñajaünme yagüroun méme luei Babilónia.

⁴⁴ Lídan fulásu mageírawati, ñíñoun méja lúban Búngiu to gadíñurúwadiboun jáma binádu wagübürigu, ñi lubei lerédera Búngiu jáma. Adúga lumútu Moisés lúban Búngiu tugúya queísi larúfuduni Búngiu lun lun ladügünun. ⁴⁵ Nújeingua méja múna tugúya jáma jadügawagun binádu wagübürigu, ába janügünun jámawagua lídoun fulásu le ñi lubei wagánawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoúbaña ya. Ítara líña, nújeingua lubei lúban Búngiu tugúya lídan fulásu le darí lidáani Davíd. ⁴⁶ Daríti urúei Davíd fuleísei ligíbugiñe Búngiu, ába labúseerún yebe ladügün ában témpulu lun laganoún Lubúngiute Jacob ñi, ⁴⁷ Salomón adügübarun témpulu tugúya, ⁴⁸ láu sun, maganoún lan Búngiu le weírigitimaabei tídan buri ligílisi to jadúga gürígia, quei meja lariñaguni proféta.

⁴⁹ Siélu nálabei le ñi lubei nañúura lun narúeijan,

ubou, le ñi lubei neméraguagüdei nugúdi.

¿Cába tuwúyeri múna jadúga nun? líña lariñagun Búngiu.

¿Cátei fulásu le ñi lubei gayára lan neméragun?

⁵⁰ ¿Ma funági nadúga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítara jíña quei ja ibídiñejabúbaña lun Búngiu. Súnwandan májatün lun Sífiri Sándu, ítara jíña quei binádu jagübürigu. ⁵² ¿Ca jádaangiñe profétagu mouserun jabáña binádu jagübürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti dan liábin, ába jalúguruni joun láganiñu, ába jáfaruni jilágubei. ⁵³ Jugúya le erésibirubálin lilúrudun Búngiu jámagiñe ánjeligu, mídintün láu.

Loúnwen Estéban

⁵⁴ Dan jagáambunbalin cátei le, ába jagáñidun buídu, ába lacünrinjan jári luágu Estéban, le jagáñi lun. ⁵⁵ Ánjein Estéban, buin líña láu lubáfu Sífiri Sándu, ába laríjin siélun, ába laríjini luweírigin Búngiu, lúma Jesúsu rára lueígiñe loúnwenren Búngiu. ⁵⁶ Ába lariñagun joun.

—¡Aríja jumá! Aríagu níña lun siélu darágu, lúma Jesúsu le Wügüri Garaüwarügüti, lueígiñe loúnwenren Búngiu.

⁵⁷ Ába jadáuruni jarígei láu jájabu luei jagáambuni, ába jayábin sun jagía luágun, agúarajeina. ⁵⁸ Ába jaságaruni ubúrugugiñe, ába jígirunun geféentiña janáangun lábugiñe lariaajan ában wügüri gíriti Sáulo, ába jachámuragun dübü luágun Estéban. ⁵⁹ Súnti añája lan achámuragua dübü luágun, ába layúmuragun Estéban lun Jesúsu, ába lariñagun.

—Nabúreme Jesúsu, resíbiboún nuwáni.

⁶⁰ Lárigiñe, ába lájuduragun, ába lagúaragun.

—Nabúreme, míchigabá dúru jawágun lueígiñe figou le.

Lárigiñe lariñaguni le, ába loúnwen.

8

Leibaajaniña Sáulo ja afiñebaña luágu Crístu

¹ Sáulo, gúndaatiti láu láfarún Estéban.

Wéyu, méme ligía, ába lagúmeserun ában oúnwenbun eibaajouni jawágun ja afiñebaña luágu Jesucrístu, Jerusalén. Ába janúragun lídoun buri lirájúñü fulásu Judéa lúma Samária le mibetiña gürígia ñi, apóstolugu rügüñanu manúrajan. ² Ába jayábin wügüríña ja deréguatiña jóungua lun Búngiu, ába jábununi Estéban láu sarágu íruni luágu loúnwen. ³ Ábati lasígirun Sáulo eibaajaña afiñetiña, ábaja lebélorun tídoun sun muna lun laságaruniña wügüríña jáma würíña adúrujeina, ába loúnajaniña furísunrugun.

Lapúrichijóun ugánu buíti luágu asálbaruni Samária

⁴ Apúrichija jamúti ja anúrajabaña Jerusaléngiñe ugánu buíti luágu chülü lan Jesucrístu lun lasálbaruniña sun gürígia, sun le ñi lumuti jóudin. ⁵ Ába lídin ában jádaangiñe, gíriti Felípe, lídoun ában ubúrugú Samária, ába lagúmeserun adímureja joun ja ñibaña luágu Crístu. ⁶ Ábaja jóundaragun gürígia, ru jagía jarijei lun le ladímurejabei Felípe, aríja jamei buri giñe miláguru le ladáagubei. ⁷ Ladüga sarágu buri gürígia ja gawágutiña espíritu wuriñatiña, areídaguatiña, ába buri jáfuridun espíritu wuriñatiña jagía agúarajeina jádaangiñe, areídagua jagía sarágu derégüdaaña jamá, meíbuguntiña. ⁸ Súnti gürígia lídan fulásu ligía, gúndaatiña luágu cátei le.

⁹ Ñiñein ában wügürí lídan fulásu ligía, gíriti Simón, gabíñarajati meja, lüñajaali ayéjeña gürígia Samariána láu laríñagun joun luágu máma lan furúmiegurügü gürígia ligía. ¹⁰ Agáambaja jamútitíja sun gürígia buídu, jámagiñe ja gudémegutiña dagá jámoun ja weirigutiña, ába jariñagun.

—Íbija lumúti gürígia le oúnwenbun lubáfu Búngiu.

¹¹ Adügatiñatiña gásu láu, ladüga lüñajaali ayéjeña láu labíñarajan. ¹² Dan le jafíñerunbei luágu ugánu le líchugubei Felípe joun luágu larúeijan Búngiu lúma luágu Jesucrístu, dándu wügüríña quei würiña, ába jabásterún. ¹³ Simón meme ligía ába giñe lafiñerun, ába giñe labásterún, ába lagúmeserun afálarei Felípe, le luweírín lanígi láu buri oúnwenbun buri miláguru lúma seíni le ladáagubei Felípe.

¹⁴ Dan le jagáambunbalin apóstolugu ja Jerusalénbaña luágu resíbi jamáali lan Samariána lerérún Búngiu, ába jóunajani Pédro lúma Juan ñi. ¹⁵ Dan le jachülürünbei, ába jayúmuragun jawágu afiñetiña ja Samariána lun liábiba Sífiri Sándu jádoun, ¹⁶ ladüga miábingili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesúsú. ¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu nübin lan Sífiri Sándu jádoun gürígia dan le jíchuguni apóstolugu jájabu jawágu, ába lálugun lagáñijani ubáfu ligía jámagiñe láu seínsu. ¹⁹ Ába laríñagun joun.

—Rújumei giñe ubáfu le nun, lun dánme lan níchuguni nújabu luágu furúmiegurügü, lun giñe lerésibiruni Sífiri Sándu.

²⁰ Ábati laríñagun Pédro lun.

—Beíba máfiogatin láu sun biseínsun, ladüga jarítaguatibu luágu gayára lan lagáñijóun cátei le ledéweejan Búngiu. ²¹ Maríchatibu, mafánran bugúya lídan wesériwidun lun Búngiu, ladüga múaraantu banígi ligíbugiñe Búngiu.

22 Ígirabei buríban le, ayúmuraguabá lun Búngiu, lun ferúduna lánibu luágu luríban barítangun. 23 Ladüga aríja numúti luágu buin tíña lan banígi láu wuríbani, áni ragúñu liñálibu Máfia.

24 Ábati lariñagun Simón.

—Ayúmuragua jumá lun Búngiu nuágu lun masúseredun lan ni cáta nun lídaangiñe le jariñagubei.

25 Láriigiñe jíchugun fe luágu Jesucrístu lúma jadímurejani lerérun Búngiu lídan fulásu ligía, ába japúrichijani apóstolugu ugánu buíti luáguti lasálbaruniña Jesucrístu güriigia lídaangiñe jafígoun lídan sarágu lirájúñü fulásu Samária, luágu jaweíyasun járigoún Jerusaléoun.

Felípe lúma wügüri le Etiopíana

26 Láriigiñe cátei le, ába lariñagun lání Wabúreme Búngiu ánjeli lun Felípe.

—Aráansebá, beíba luágun sur lídaangiñe üma le arárirubei Jerusalengiñe lun ubúrugin Gáza.

Ligía üma le ásügürübei lídaangiñe fulásu mageírawati. 27 Ába laráanserun Felípe, ába lídin. Luágu leíbuguniwágu, ába ladárirun ában wügüri Etiopíana lubá lubá. Wügüri ligía siñáti garaü lan, ában wügüri weiriguti, ligía giñe gamánijaribeí láu sun tiseínsun Candáce ton lurúeite Etiopía. Liábiñati wügüri ligía Jerusalengiñe láriigi lídin ájuduragua lun Búngiu. 28 Lagíribuduñáti lageíroun, ñun tídan ában cárü, alíjeinaloún lilíburun proféta Isaías. 29 Ábati lariñagun Sífiri Sándu lun Felípe.

—Yaráfabá tuágun cárü túra.

30 Ába leíbaagun tuágun cárü, ába lagáambuni lalíjaña lan tídan lilíburun Isaías, ába lariñagun lun.

—¿Gunfaráanda bumútisan le balíjabei?

31 Ába lariñagun wügüri ligía lun.

—¿Ída lubági gunfaráanda náani, úaga cába lan afúnraanguágüdei nun?

Ába lariñagun lun Felípe lun ládinun lúmoun lun lañúurun loúbagiñe.

32 Niján buri dimúrei le lalíjabei.

Quei mudún, lanügüwa lun lafarún jilágubei, ítara quei leréderun mudún maníñu jagíbugiñe ja ásarubalín líyu, ítara líña giñe maríñagun lan ni cáta.

33 Ünabuti lanügün, áni michugúnwati lirícha lun, siñábei ladímurejoún jawágu ladügawagun, ladüga gumúja lan labágaridun uboúagu.

34 Ába lariñagun wügüri ligía lun Felípe.

—Adügabei fuleisei nun, aríñagabei nun, ¿cáteisán le uágubei lariñagei wügüri le abürüjabei dimúrei le, luóúgua, ódi luágu ámu?

35 Ábati lagúmeserun Felípe arúfudajei Lerérun Búngiu lun, lúmagiñe le ñígiñe lubeí lagúmesera alíja, ába líchuguni ugánu luáguti Jesúsu lun. 36 Dánti le jásügürünbei lídaangiñe ában fulásu le ñí lubei dúna, ába lariñagun wügüri ligía.

—Nijántia dúna, ¿siñátisan nabásterun?

37 Lariñaga Felípe lun.

—Ánjein affíne bubeí luágu Jesucrístu táu sun banígi, gayáraati babásterun. Lariñaga wügüri ligía lun.

—Afiñetina luágu Jesucrístu lan Liraübei Búngiu.

³⁸ Ábati laráramagüdüñun cárü, ába jarárirun biángubei jagía dúnarugún, ába labásterágüdüñi Felípe. ³⁹ Dan jamúdeirun dúnarugugíñe, ába lanügüñi láni Búngiu Espíritu Felípe ñígíñe, ába maríjin láali lan wügüri ligía. Ába lasígiruni leibugun, gúndaañu. ⁴⁰ Ába ladáriragun Felípe lúngua Azóto, ába lídin lídaangiñeina fulásu apúrichijeinalei ugánu luáguti Cristu dari lachülürün Cesaréa.

9

Lerésibiruni Sáulo Cristu queisi lasálbaragüle

¹ Sun dan ligía, merédeti lasiadiruniña Sáulo afiñetiña luágu Jesucristu. ² Ligía lídinbei lúmoun fádiri íñutimaati lídan jafiñen juríu amúriaja gárada láutu ubáfu lun lídin tídan buri jalígilisin juríu to Damáscoboun áluajaña ja afálarubalin lémeri Cristu lun lanügüñiña adáüragua Jerusalén, dándu wügüriña quei würiña. ³ Luágu leibuguniwágu, dan yaráfaali lun Damáscu, sódini ába ladúnraagun ában larúgounga siélugíñe, geyégua láu. ⁴ Ábati laburujan Sáulo múarugún, ába lagáambun lariñagun ában umálali lun.

—Sáulo, Sáulo, ¿ca uágu beibaajana?

⁵ Ábati lariñagun Sáulo.

—¿Cátabusan Nabúreme?

Ába lariñagun umálali ligía.

—Jesúsu áu, le méme beibaajabei. ⁶ Sarába, belúba ubúrugun, lariñawagúba bun ñi cába lan badüga.

⁷ Wügüriña ja úarabaña lúma Sáulo lídan luweíyasun, ába jaráramun láu luweírín janígi ladüga agáamba jamúti umálali, áni maríjin jamúti le adímurejabei. ⁸ Ába lásaarun Sáulo múarugugíñe, dan le léfegechúnbalin lágu, maríjinjali. Ábati jarügüdüñi lújabu, ába janügüñi ubúrugun Damáscu. ⁹ Ába leréderun úrúwa wéyu ñi maríjina, meígin líña, mátun ni cáta.

¹⁰ Ñiñein ában afiñeti luágu Jesucristu ñi Damáscu gíriti Ananías, le únbei layáwadagua Wabúreme Jesúsu, ába lariñagun lun.

—¡Ananías!

Ába louñabun.

—Anája ya, Nabúreme.

¹¹ Ábati lariñagun Jesúsu lun.

—Beiba guetó guetó luágu úma le gíribei Surúti, danme le bachülürün lúbiñe Júdas, bálügüdjame luágu ában wügüri Társona gíriti Sáulo. Badárirubei ñi ayúmuragua lun Búngiu, ¹² áni ayáwadaguaali ában wügüri gíriti Ananías lun, ába líchuguni lújabu luágu lun gayára lan laríjin.

¹³ Dan lagáambunbalin Ananías cátei le, ába lariñagun.

—Nabúreme, gíbeeñátia abájüdagutiña nun luágu wügüri ligía lúma luágu sun wuríbani le ladáagubei joun ja afiñebaña buágu, Jerusalén. ¹⁴ Guetó, liábiña ñájoun láu ubáfu jámagíñe jábutigu fádirigu lun ladáüraguniña sun ja bánígubaña.

¹⁵ Ába lariñagun Jesúsu lun.

—Beiba, ladüga anúadira náali wügüri ligía lun ladímurejan nuágu joun gürija ja mámabaña juríu lúma joun jarúeitegu, lúma gíñe joun Israelítagu.

¹⁶ Narúfudubei sarágu cátei le lúnbei lasúfuriruni nuegíñe lun.

¹⁷ Ábati lídin Ananías lídoun fulásu le ñi lubei Sáulo. Ába lebéllurun múnadoun, ába líchuguni lújabu luágu, ába lariñagun lun.

—Nidúje Sáulo, loúnajañadina Wabúreme Jesúsu le arúfudagubei lúngua bun luágu úma le ñígiñe lubei biábin, lun gayáraaya lan baríjin, lun gíñe berésibiruni Sífiri Sándu.

¹⁸ Lídan óra ligía, ába leíquadun camá jamuga arúraü lueígiñe lágu, ábaya laríjin. Lídan óra ligía, ába labásterún. ¹⁹ Lárigiñe, ába leígin, ábaya lejíredun, ába leréderun átiri wéyu jáma afíñetiña ja aganoúbaña Damásco.

Lapúrichijan Sáulo Damásco

²⁰ Ába lagúmeserun Sáulo apúrichija tídan buri jalígílisin juríu, lariñaga luágu Jesúsu lan Liraúbei Búngiu. ²¹ Súnti ja agáambubalín, ába laweíridun janígi, jariñagati.

—¿Másan niján wügüri léñaja eíbaajabáliña ja afálarubalin Jesúsu Jerusalén? ¿Ma ligía méme le ñúbinbei ya lun lanáanguniña adáúra, lun ledéregeruniña joun jábutigu fádirigu juríu?

²² Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña gürigia lídaangiñe jafígoun, darí lun labúlieidaguágüdün jáu juríu buri ja aganoúbaña Damásco.

Leséfurun Sáulo jawei juríu

²³ Lárigiñe sarágu wéyu, ába jelédegun juríu lun jáfaruni Sáulo jilágubei, ²⁴ ába lasúbudirawagüdüñ le jabúseerubei jadügün lun Sáulo. Wéyuagu, áriebu, jagúrabanja juríu luágu béna le áfuridagülei le láni ubúruгу Damásco lun jáfaruni jilágubei. ²⁵ Ába jíchuguni afíñetiña lídoun ában faniñe weíríti, ába jarárigüdüñi áriebu lueígiñe baríeru le geyégubei láu ubúruгу, ába leséfurun.

Sáulo ubúruгу Jerusalén

²⁶ Dan le lachülürünbei Sáulo Jerusalén, ába yebe lálugun ládaragun lúngua jádoun afíñetiña, sun jagía, janúfudetiña lueí, ladüga maffíñetiñá yebe luágu afíñejali lan luágu Jesucrístu. ²⁷ Ába lanügüni Bernabé jagíbugiñoun apóstolugu. Ába labájüdagun joun luágu laríjini Sáulo Jesúsu luágu leíbuguniwágu, lúma luágu ladímurejan Jesúsu lun, lúma luágu lapúrichijan Sáulo furáangu luágu Jesúsu ubúruгу Damásco. ²⁸ Ábati jerésibiruni Sáulo queísi jánigu, ába leíbugun jáma Jerusalén, ²⁹ apúrichijeina luágu Wabúreme Jesúsu furáangu. Lárigiñe ladímurejan luágu Jesúsu jáma juríu ja adímurejabaña güriégu, asígeneja ligía jáma, ába jabúseerun jáfaruni jilágubei. ³⁰ Dan le jasúbudirúnbalin afíñetiña cátei le, ába janügüni Sáulo ubúrugun Cesaréa, ñígiñe ába jóúnajani Társoun.

³¹ Lídoun buri dan ligía, buíti jóuserúniwa afíñetiña luágu Jesucrístu ja aganoúbaña Judéa, Galiléa, lúma Samária. Ába jedérebugudün lídan jaffíñen luágu Jesucrístu, falájamei le lubeíbei, resibi jagía gurásu lúmagiñe Sífiri Sándu. Ába agánwoundeina jamá afíñerutiña.

Lareídagun Enéas

³² Dan le lebéllujaña lubeí Pédro lídan buri fulásu lun líderaguniña ja afíñeñaabaña luágu Jesucrístu, ába gíñe lídin aríjaña lánigu Búngiu ja ubúrugubaña Lída. ³³ Ñi ladárra ában wügüri gíríti Enéas, wídü írúmu láu gabánarugu láu derégüdaü. ³⁴ Ába lariñagun Pédro lun.

—Enéas, areídagugüda lumútibu Jesucrístu. Sarába, aráanseboún bigábana.

Ába lásaarun Enéas óra ligía. ³⁵ Ába jarjini sun ja aganoúbaña fulásu buri Lída lúma Sarón, ába jígiruni binádu jafiñen, ába jafiñerun luágu Jesúsu.

Táguuyugun Dórcas

³⁶ Lídan meja dan ligía, ñiñoun meja ában afiñetu aganoútu Jópe, gíritu Tabíta, lídan jerérun güriégu, gíritu Dórcas. Würi tugúya, súnwandan táu adüga buíti, íderagua tugúya gudémetiña. ³⁷ Lídoun dan ligía, ába tasándirun Dórcas, ába toúnwen, lárigiñe jagawagüdünun, ába jaríwachaguagüdünun. ³⁸ Yaráfati Jópe lun Lída le ñi lubei Pédro, queíti jagáambuni afiñetiña luágu níjein lan ñi, ába jounajan bián wügüriña aríñaga lun.

—Queímoun Jópe, oúfuda.

³⁹ Ábati lídin Pédro jáma. Dan le lachülürünbei, ába janügüni tídoun rúmu to ñi tubei jiláaru, ába jagúriridágun sun würiña ja jiláguaañabaña úmari láu, ayájuaja tárigi, arúfudajoún buri dínugu túma simísi tó buri tájüchagubouñ Dórcas dán meja mouñwengiru, lun. ⁴⁰ Ába láfuridagüdüniña Pédro sun ja ñibaña, ába lájuduragun, ába layúmuragun lun Búngiu. Ábati larjín tuágun jiláaru, ába laríñagun tun.

—Tabíta, sarába.

Ábati téfegechuni tágu, dan tarjini Pédro, ába tiñúrágun túngua. ⁴¹ Ába lárügüdüni tújabu, ába lásaaragüdünun. Lárigiñe, ába lagúarun joun würiña jagía jáma jíbiri afiñetiña ja ñibaña, ába larúfudunun joun, wínwañu. ⁴² Ába lagaambún cátei le lídan sun ubúruгу Jópe, ába sarágu jamá afiñerutiña luágu Jesucristu. ⁴³ Ába leréderun Pédro sarágu dan lídan ubúruгу ligía, lúbiñe Simón le aráansejabei úraü.

10

Lounajan Cornélio ougei Pédro

¹ Ñiñein ában wügüri ubúruгу Cesaréa gíriti Cornélio, gumándan joun súdaara ja Italiána. ² Wügüri ligía jáu sun lufámilian, derégeguatiña joúngua lun Búngiu, judúguatiña lun Búngiu láu sun máma jamá juríu. Rúti buri giñe sarágu seinsu lun jíderawagún juríu, áni súnwandan layúmuragun lun Búngiu. ³ Luágu ában wéyu, quei buri ladaünrün ürüwa rábounwéyu, ába lasálrágun ában láni Búngiu ánjeli lun, furáangu, ába laríñagun lun.

—¡Cornélio!

⁴ Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, arjalei buri cátei le badügübei lun bíderaguniña gudémetiña. ⁵ Oúnajabá lubeíti wügüriña ubúruгу Jópe lun joúguni Simón, le giñe gíribei Pédro, lun liábin bun. ⁶ Lúbiñe Simón le aráansejabei úraü, le gábanbei laru barána.

⁷ Dan le ñüdünjali ánjeli le adímurejabei luma Cornélio, ába lagúarun joun biáma jádaangiñe lumúsuníña luma ában lisúdaaran, súdaara ligía, ában wügüri derégeguati lúngua lun Búngiu, leménigira Cornélio. ⁸ Ába labájüdaguni sun cátei joun, ába lounajaniña ubúruгу Jópe.

⁹ Larúgan amídirugu, sun ayárafadeina jamá wügüriña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu.

¹⁰ Weírjaliti liláma óra ligía, busénjali leígin. Dan le añája lan aráanserei leígin, ába lasálriragun ában cátei lun ítara. ¹¹ aríja lumúti lánjunrenchun siélu, ába tiábin ában cáatoun camá jamuga gamísa weírítu gürágu lueígiñe gádürü tarígei, tiábin arárrireina múarugun. ¹² Tídan gamísa tugúya, ñíñanu sun jawúyeri anímaalu, gádürüga tugúdi, jéwe, jáma dunúru. ¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beígin.

¹⁴ Ába loúnabun Pédro.

—Uá, Nabúreme, meígiñajágidina ni cáta le wanügubei quei mabuídunti según lilúrudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdün Búngiu, maríñagabá luágu luágu mabuídun lan.

¹⁶ Ūrúwañein weíyaasu lasúseredun cátei le, lárigiñe, ábaya tamúdeirun gamísa tugúya siélu. ¹⁷ Súnti niján lan Pédro láu luweírín arítaguni luágu, asáminara ca lan lanichigubei cátei le laríjubei, ligía jachülürün luwügüríñan Cornélio, álügüdajeína tuágu lúban Simón. ¹⁸ Dan jachülürün tubéneri múna, ába jálügüdajan rein ánjein ñí lubei lagánawa ában gírítu Simón le giñe únbei jaríñaga Pédro. ¹⁹ Queítu buga nijáuga lan Pédro asáminara luágu cátei le asálriragubei lun, ába laríñagun Sífiri Sándu lun.

—Añája ürúwa wügüríña álugabu, ²⁰ raríba, oúfudabá, beíba jáma láu affíñeni ladüga áu lan oúnajabalíña.

²¹ Ábati larárirun Pédro le ñíjin jabeí wügüríña ja loúnajabaña Cornélio, ába laríñagun joun.

—Áu le jáluajabei. ¿Ca gabügürübalün?

²² Ába jaríñagun.

—Loúnajan gumándan le gíríbeí Cornélio wagía, ában wügürí surúti, derégeguati lúngua lun Búngiu, jínsiñeti joun sun juríu. Ñübinti ában ánjei aríñaga lun lun loúnajan ougabun lun bídin lúbiñe, lun lagáambuni le lúnbei baríñaguni lun.

²³ Ábati lebélaagüdüniña Pédro, ába jeréderun lúma ñi árieibu ligía. Larúgan, ába lídin Pédro jáma, ñüdüntiña giñe jádaangiñe affíñetiña ja aganoúbaña Jópe jáma.

²⁴ Larúgan, ligía jachülürün Cesaréa, le ñí lubei Cornélio agúrabajaña jáu lidújeñu jáma jabuídun-ágei lumádagu ja lamísurajabaña. ²⁵ Dan lachülürün Pédro, ába láfuridun Cornélio erésibirei, ába lájuduragun ligíbugiñe láu sarágu inébesei. ²⁶ Ába liñúraguni Pédro, ába laríñagun lun.

—Ráramabá, wügürí giñe áu bíledi.

²⁷ Súnti niján lan adímureja lúma, ába lebélorun, ába ladárirun sarágu gürígia adámuríñu ñi. ²⁸ Ábati laríñagun Pédro joun.

—Subúsi jumúti luágu mája lan waffíñen wagía juríu lun jóúndaragun juríu jáma ja mámabaña juríu quei jugúya, ni lun webélorun tídoun jában lueí wasálrin mabuídunga ligíbugiñe Búngiu. Wel, arúfuda láali Búngiu nun luágu mabúseerun lan lun nouseruniña ja mámabaña juríu queísi gürígia mabuíduntiña. ²⁹ Ligía nánjanrunbei niábin dan le bouñajanbei nuágu. Buséntina jamúgati nasúbudiruni ca lan lébubei jóúnajan nuágu.

³⁰ Ábati loúnabun Cornélio.

—Ûrúwa wéyu guetó, queiburi óra le, ñáñadina núbiñe ayúmuragua lun Búngiu ladaürün ùrúwa rábounwéyu, queísi wéchun, ligía lasálriragun ában wügürí nun táu ában dáüguaü mirítu. ³¹ Ába laríñagun nun. “Cornélio, agáamba láali Búngiu bayúmuragun, jarítaguaaliti luágu buri cátei le badügübei lun bíderaguniña gudémetiña. ³² Oúnajabá lubeíti wügüríña ubúrugu Jópe oúgei Simón le giñe gíribei Pédro, lúbiñe ábanya Simón aráansejati úraü, le gábanbei láru barána, ñi lagánawa.” ³³ Ába lubeíti noúnajan oúgabú furése, áni buítiti badüga biábin. Guetóti awánja sun wagía ya ligíbugiñe Búngiu, buséntiwati wagáambuni le laríñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába laríñagun.

—Subúdi náali guetó luágu ában lan lábu lanügüniña Búngiu sun gürígia. ³⁵ Resíbirügü lumútiña sun ja inébejabúbaña lun áni adüga jamei le buídubei, dándu juríu quei ja mámabaña juríu. ³⁶ Adímurejati Búngiu joun ladügawagun Israél, adímurejeina ugánu luáguti gayára lan jaráandarun gürígia luma Búngiu lídaangiñe Jesucrístu, le Jabúremebei sun gürígia. ³⁷ Jugúya, subúdi jumúti cátei le asúseredubei jageíra juríu buídu, le agúmeserubei Galiléa lárigiñe lapúrichijan Juan, áni abásteragüdaja ligía. ³⁸ Subúdi jumúti luágu rúlaani Búngiu lubáfu Sífiri Sándu lun Jesúsu Nazarétna, luágu meja giñe ladáagun buíti, luma láreídaguügüdüniña ja asúfurirubaña lábugiñe lubáfu Máfia. Ladügünbalin buri meja cátei le, ladüga ñíñein lan Búngiu lúma. ³⁹ Wagía geféentiwa luágu sun cátei le ladügübei Jesúsu Jerusalén luma lídan sun líbiri jageíra juríu. Lárigiñe, ába jáfaruni jilágubei láu jádaraguní luágu ában gurúwa. ⁴⁰ Sarágüda lumúti Búngiu lídaangiñe oúweni luágu lürüwan wéyu, ába larúfudaguágüdüni lúngua winwañu woun. ⁴¹ Marúfudagúnti lúngua joun sun gürígia, lueídügüya woun, wagía le anúadaja láañabaña Búngiu lúmagiñe binárü quei geféentiña luágu lásaarun lídaangiñe oúweni. Joútiwa lúma, gurá wagía luma lárigiñe lásaarun lídaangiñe oúweni lúnya labágaridun. ⁴² Ába louñajaniwa apúrichija joun gürígia luágu, lun giñe waríñaguni luágu rúlaali lan Búngiu Jesúsu méme le lun lagúseragüdüniña ja winwangiñabaña jáma ja jiláguaañabaña dánme le lagíribudun ubouágun. ⁴³ Adímurejaaña meja giñe sun profétagu luágu Jesúsu lúmagiñe binárü, luágu sun lan ja afíñebaña luágu, resíbi jamáni ferúdun luágu jafígoun.

Jerésibiruni ja mámabaña juríu Sífiri Sándu

⁴⁴ Nígili Pédro adímureja, ligía liábin Sífiri Sándu jádoun ja agáambajabalin ladímurejan. ⁴⁵ Játi juríu ja afíñetiña luágu Jesucrístu ja ñübinbaña úara luma Pédro, ába laweíridun janígi láu liábin Sífiri Sándu jádoun ja mámabaña juríu. ⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigin Búngiu. ⁴⁷ Ábati laríñagun Pédro.

—¿Majoúabei funági lun jabásterún gürígia ja, quei resíbi jamáli lubei Sífiri Sándu queígubeirügü wagía?

⁴⁸ Ába líchugun dimúrei lun jabásterun lídan líri Jesucrístu. Lárigiñe, ába jayúmuragun lun Pédro lun leréderun átiri wéyu jáma.

11

Labájüdagun Pédro joun tilana ligílisi to Jerusalénboun luágu le asúseredubei Jópe

¹ Ába jagáambuni apóstolugu jáma jíbiri afiñetiña ja Judéabaña luágu ánjaaña lan giñe ja mámabaña juríu lun láni Búngiu ugánu luáguti Wasálbaragüle, Jesucrístu. ² Dánti le lagíribudun Pédro Jerusaléoun, ába jachúrajani juríu ja afiñetiña, ³ jaríñaga.

—¿Cámesan bídin aríjaña ja mámabaña juríu, áni jou amürü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába laríñagun.

⁵ —Ubúругuñadina Jópe, ayúmuragua lun Búngiu, ligía naríjin ában cátei lasálrágun nun camá jamuga ában gamísa weiritu tarárirun siélugiñe, gürágu luegiñe gádürü tarigei, tiábin chülü le ñí nubei. ⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürügua tugúdi ñi, anímaalugu gáñitiña, jéwe, jáma dunúru. ⁷ Ába nagáambun laríñagun ában umálali nun. “Sarába Pédro, áfarabá jádaangiñe, joubei.” ⁸ Ába naríñagun. “Uá, Nabúreme, ladüga meigiñajágdina ni cáta le wanügubei quei mabuidunti según lilúrudun Moisés.” ⁹ Ábayati ladímurejan umálali siélugiñeti ligía nun, laríñaga nun. “Le cátei le labuíduragüdün Búngiu, maríñagabá luágu luágu mabuidun lan.” ¹⁰ Ürüwañein weíyaasu lasúseredun cátei le, lárigiñe, ábaya tamúdeirun siélun. ¹¹ Lídan óra ligía, ligía jachülürün ürüwa wügüriña tídoun muna to ñí nubei, oúnajóutiña Cesaréagiñe álugana. ¹² Ába laríñagun Sífiri Sándu nun lun nídin jáma láu afiñeni. Ñüdüntiña giñe sísi afiñetiña ja núma. Dan wachülürün Cesaréa, ába webélurun sun wagía lúbiñoun ában wügüri, ¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Oúnajabá wügüriña lun jóudin ubúругu Jópe óugei Simón le giñe giríbei Pédro, ¹⁴ laríñagubei bun ída lúba lan gayára lan basálbarun jáu sun bufámilian.” ¹⁵ Dan nagúmeserünbei adímureja joun, ába liábin Sífiri Sándu jadoun quei meja liábin wádoun furúmiñe. ¹⁶ Ábati narítagun luágu lé meja laríñagunbei Wabúreme. “Inárüni luágu badíseigüda lan Juan láu dúna, ánjein Búngiu, labásteragüdübadün láu Sífiri Sándu.” ¹⁷ Anjeinti ru lubálin Búngiu líbe le líchubei woun, wagía le afiñeelíbei luágu Jesucrístu, joun, ¿cátanañadináti lun neréderubei lan le labúseerubei Búngiu ladüga?

¹⁸ Dánti le jagáambuni afiñetiña ja Jerusalénbaña cátei le, ába jámanichun. Ába jadímurejan luágu luweirigun Búngiu, ába jaríñagun.

—¡Rújali lubei giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin íbágarí magúmuchaditi!

Ligíli to Antioquána

¹⁹ Dan le láfarúnbei Estéban, ába giñe jagúmeserun eibaajaña ja jíbiri afiñetiña, ába janúrajan jíbiri chülü Fenícia, Chípree, luma Antioquía. Ñi jíchigei ugánu luáguti lasálbaruniña Jesucrístu gürígia lídaangiñe jafígoun jóunrügü juríu, máma joun ámu gürígia. ²⁰ Ánjeinti afiñetiña ja Chíprena jáma Cirénena, ába jachülürün Antioquía, ába giñe jadímurejan joun ja mámabaña juríu, ába jíchuguni ugánu luáguti Wabúreme Jesucrístu joun lun jasálbarun. ²¹ Ñiñein lubáfu Búngiu jáma afiñetiña jagía, sarágu ja mámabaña juríu, ába jígiruni binádu jafiñen, ába jafiñerun luágu Jesucrístu.

²² Dan lachülürünbei ugánu le lábun jagáambun afiñetiña ja Jerusalénbaña, ába jóúnajani Bernabé Antioquíoun. ²³ Dan lachülürünbei Bernabé, ába laríjini luágu binílaaña lan Búngiu gürígia ja mámabaña juríu, ába lagúndaarun sarágu.

Ába labímejaniña sùngubei lun jafálaruni Wabúreme Búngiu táu sun janígi. ²⁴ Bernabé, ában meja wügüri buíti, deréguati lúngua lun Sífiri Sándu le gumúti, buin líña gíñe láu affíñeni luágu Jesucristu, ítara líña lagáñeirun sarágu gürígia lun Jesucristu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanügüni Antioquíoun. ²⁶ Ába jeréderun ñi jáma tílana ligílisi ában irúmu, arúfudaja joun sarágu gürígia. Ní Antioquía lagúarúa joun affíñetiña “Cristiánugu” furúmiñe.

²⁷ Lídan dan ligía, ába jóúdingua já buri profétagu Jerusaléngiñe lun Antioquíoun. ²⁸ Ában jádaangiñe, gíríti Ágabo, ába laráramun jádan affíñetiña, ába laríñagun láu le lasúbudirágüdübei Sífiri Sándu lun luágu liábiba lan ában oúnwenbun ilámaü lídan sun ubouú, áni suséreti lídan lidáani larúeijan Cláudio.

²⁹ Ábati jóúndaragun affíñetiña ja Antioquíana lun jóúnajan seínsu joun affíñetiña ja Judéabaña según le jayáraati íchiga. ³⁰ Ítara líña jadügüni, ába jóúnajani seínsu ligía lúma Sáulo joun tábutigu jalígilisin affíñetiña Judéana.

12

Loúnwen Jacóbo lúma ladaürün Pédro

¹ Lídan dan ligía, ába lagúmeserun urúei Heródes eíbaajaña jádaangiñe affíñetiña. ² Ába láfaragüdüni Jacóbo le lamúlen Juan táu efeín, ³ queíti laríjin láu gúnda jamá juríu láu cátei le, ába gíñe lanügüni Pédro adaúra. Lídan buri wéyu le fédu le ídaanbei teigúa fein magánatu ísi lasúsereda cátei le.

⁴ Lárigiñe lanügüni Heródes Pédro adaúra, ába ládaruni furísunrugun jáu díisi-sísi súdaaragu oúnigira gádürü gádürü, larítagun lún yebe laságaruni jagíbugiñe lílana fulásu lárigiñe fédu lun lagúserun. ⁵ Níñein lubeíti Pédro furísunrugu toúnigiwañu buídu, merédeti jayúmuragun tílana ligílisi lun Búngiu luágu.

Leséfuruni Búngiu Pédro furísunrugúgiñe

⁶ Áriebu le lubáragiñe wéyu lé yebe lúnbei laságaruni Heródes Pédro jagíbugiñoun gürígia, larúmuguña Pédro jamídaangua bián súdaara, gürágu ligía láu bián güríngüri, jámaya bián súdaara luágu béna oúnigira. ⁷ Sódini, ligía lasáliragun ában láni Wabúreme ánjeli, ába larúgoungadún furísunrugu. Ába lagúuruni ánjeli ligía loúbawagu, ába lagáguduni, ába laríñagun lun.

—Sarába furése.

Ábati láburujan güríngüri luegiñe lújabu Pédro, ⁸ ába laríñagun ánjeli ligía lun.

—Murúbei bubélitin, daúbounme bigeídin.

Lárigiñe ladügüni Pédro sun líra, ába laríñagun ánjeli ligía lun.

—Daúboun babíte, falábana.

⁹ Ába láfuridun Pédro lárigi ánjeli ligía, ibídiñoun lun ánjein inárüni lubei lúmoun máma lan inárüni cátei le ladügübei ánjeli ligía. Genégetimáati lun camá gewénediñein. ¹⁰ Ába jáségürün jáu furúmiñetiña oúnigirutiña, sügü jamaña jabíaman, dánti le jachülürün luágun béna le gürábu le úmadagiñebei, ába lánjunrenchun lúngua. Ába jáfuridun, lárigiñe jánjiñuragún ában úma, ába lígiruni ánjeli ligía Pédro lábuga. ¹¹ Ligíaaali lárügüdagun Pédro lúngua, ába laríñagun.

—Aná guetó, subúdi náali luágu oúnaja láali lan Búngiu ánjeli lun leséfurunina lueí Heródes lúma luei sun lé yebe jabúseerubei juríu jadügün náu.

¹² Asáminareína ligía Pédro luágu cátei le, ába lídin túbiñoun María to lúguchu Juan Márcos, le ñi jabei sarágu gürígia adámuriñu ayúmuragua lun Búngiu luágu.

¹³ Dan lacaüjan luágu lubéneri bürürü, ába táfuridun ában irájü músu, gírítu

Róde, aríja ca lan agúajabei. ¹⁴ Dan tasúbudiruni luágu Pédro lan luágu lumálali, bulíei tumúti tánjunrenchuni béna, le luweírín tugúndan, ábarúga teibaagun múnadoun awísaja luágu niján lan Pédro bénabu. ¹⁵ Ábati jaríñagun tun.

—¡Lúlújaali báu!

Ába taríñagun joun luágu choúru tan luágu ligía lan. Ába jaríñagun.

—Máma ligía, fágua láfurugu.

¹⁶ Niján mémeti Pédro acaünja luágu béna. Dan jánjunrenchuni, ába laweírídun janígi dan le jaríjini. ¹⁷ Ába líchugun seíni joun láu lújabu lun jámanichun, ába labájúdaguni joun ída líña lan laságaruni Búngiu furísunrugúgiñe, lárígiñe, ába laríñaga joun.

—Abájúdagua jumeí cátei le lun Jacóbo lúma joun jíbiri afíñetiña.

Ábati láfurídun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdaara, ladüga ibídiñeti joun ca lan susérebei lun Pédro. ¹⁹ Ába louñajan Heródes áluajei, quei madári jamáni, ába lálügúdaguniña súdaara já buga oúnigirubalin, lárígiñe, ába láfaraguágúdüniña jilágubei. Lárígiñe, ába láfurídun Heródes Judéagiñe, ába lídin agánawa Cesaréa.

Louñwen Heródes

²⁰ Weíríti ligáñi Heródes jáma gürígia ja aganoubaña Tíro lúma Sidón, ánjein jagía, ába jebélurun lídoun ában arítaguni lun jóunajan wügüríña lun jadímurejan lúma luágu jafúlesein. Dan le jachúlúrün, ába jagáñeiruni Blásto, ában wügürí íñuguti láni Heródes, lun líderaguniña adíljei sun cátei, ladüga lageíragiñe Heródes jabíja eíjini. ²¹ Ába lagúaragüdün Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígiñe lubei lagúmadíja, ába ladímurejan joun. ²² Ábati jagúmeserun gürígia agúaraja.

—¡Máma wügürí adímurejabei, búngiu adímurejabei!

²³ Lídan óra ligía, ába lasándiragüdüni láni Búngiu ánjei Heródes, ladüga lanáangun lúngua luágu jerérün gürígia, míchu lumúti linébase Búngiu lun, ába jeígini jéweraü, ába louñwen.

²⁴ Abúruchagueínatimá ligíati ugánu le láni Búngiu, apúrichijoúati lídan sun fulásu.

²⁵ Dan jagúmuchuni Bernabé lúma Sáulo jawádigimari, ába jagíribudun Jerusaléngiñe barúina jameí Juan Márcos jámagua.

13

Jagúmeseruni Bernabé lúma Sáulo jawádigimari apúrichíjei Lerérün Búngiu

¹ Tídan ligílisi to Antioquíaboun, ñíñanu profétagu jáma maésturugu. Wügüríña jagía. Bernabé, Simón, le únbei jaríñaga Wuríti, Lúcio le Cirénena, Manaén le agúiarúbei úara lúma Heródes le gumádimati Galiléa, lúma Sáulo. ² Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumeí Bernabé lúma Sáulo nun lun wadágimanu le únbei nanúadiráña.

³ Lárígiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóunajaniña luágu jawádigimari.

Japúrichíjan Bernabé lúma Sáulo lídan fulásu le Chípre

⁴ Ítara líña loúnajaniña Sífiri Sándu Bernabé lúma Sáulo, ába jóúdin Seléucia, ñígiñe, jádina lun jóúdin luágun ubóuju le Chípree. ⁵ Dan jachülürün lídan ubúru le gíribei Salamína, líbiri méme Chípree, ába jagúmeserun apúrichijei lerérun Búngiu tídan jalígílisin juríu. Ñüdúnti giñe Juan Márcos jáma, íderaguaaña. ⁶ Eíbuga jamúti sun ubóuju ligía chülú lúmoun fulásu le gíribei Páfos. Ñi jádárira ában juríu gírítí Barjesús, gariyajati wügüri ligía, ye ligía, laríñaga luágu proféta lan. ⁷ Gariyajati ligía lúmañein gumádimati le Sérjio Páulo, ában wügüri janíchiguti. Ába loúnajan gumádimati ligía luágu Bernabé lúma Sáulo ladüga busén lan lagáambuni lerérun Búngiu. ⁸ Ánjein gariyajati ligía, le méme gíribei Elímas, sigéne lumútiña lueí yebe laffínerun gumádimati luágu le jaríñagubei lun luágu Jesucrístu. ⁹ Sáuloti, le méme gíribei Páblo, buin líña láu lubáfu Sífiri Sándu, ába laríaguni Elímas, ¹⁰ ába laríñagun lun.

—¡Yéetibu, buin bíña láu wuríbani, liraü Máfia amürü, lágani sun le buídubeil ¿Ca uágu meréde lubeí beyéejan luágu lémeri Búngiu le surúbei? ¹¹ Guetó láburuja ligáñi Búngiu buágun, berédera maríjinga luágu átiri dan.

Lídan óra ligía, ába labúrigadún láu, ába láluajan cába lan arújei lújabu, ladüga maríjinjali lan. ¹² Dan laríjini gumádimati cátei le, ába laffínerun luágu Jesucrístu, weírítí lanígi láu le jarúfudajabei luágu Wabúreme Jesucrístu.

Páblo lúma Bernabé ubúru Antioquía

¹³ Ába láfayarun Páblo jáma líbirigu Páfosgiñe lun ubúrugun Péрге, le lídaanbei fulásu gírítí Panfília. Ánjein Juan Márcos, ába lígiruniña, ába lagíribudun Jerusaléoun. ¹⁴ Lárígiñe, ába jásügürün Pérgegiñe lun ubúrugun Antioquía, le lídaanbei Pisídia. Ába jebélurun lídan wéyu le eméraaguagülei tídoun jalígílisin juríu, ába jañúurun ñi. ¹⁵ Lárígiñeti talíijóuniwa líburu to lánina lílúrúndun Moisés túma buri líburu to jabúrújaboun proféta, ába jóúnajan ábutigu aríñaga joun.

—Wadújeñu, ánjein níjein lubeí dímuerei lun jaríñaguni joun gürígia ja, aríñaga jumeí guetó.

¹⁶ Ábati lásaarun Páblo, ába ladügün seíni joun láu lújabu lun jámanichun, ába laríñagun.

—Agáamba jumá, wügüriña Israelítagu júma jugúya le ájuduragubei lun Wabúngiute. ¹⁷ Búngiu le Jabúngiute Israelítagu, anúadaja lumútiña meja binádu wagúbürigu lun lánigubaña lan, ába ladügüniña ábanme oúnwenbun násiñun dán meja le añájagua lan agánawa quei teréncha Ejípto, lárígiñe, ába laságaruniña lídaangiñe fulásu ligía láu lubáfu. ¹⁸ Awánda lumúti Búngiu luríban jagáburi lídan fulásu mageírawati quei buri bián-wein irúmu. ¹⁹ Lárígiñe, ába lagúmchaguagdúni sédú násiñun ja aganoútiña Canaán lun líchuguni jafúlusun joun binádu wagúbürigu luára gádürü-san-dímí irúmu. ²⁰ Lárígiñe, ába líchugun gürígia lun jagúseragüdúniña darí lúmoun lidáani proféta Samuél. ²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl joun jarúeiteme luágu bián-wein irúmu, Saúl ligía, liraü Cis, ladügawagun Benjamín. ²² Lárígiñe, ába lagídaruni Búngiu arúejani lueí Saúl, ába líchuguni lun David, le uágubei laríñaga. “Darína David, liraü Isaí, ában wügüri le áubei nagúndaara, áni ladügübei sun le nabúseerubei.” ²³ Jádaangiñe ladügawagun David ligía líábin Jesúsu le loúnajabei Búngiu lun jasálbarun Israelítagu, quei meja laríñaguni. ²⁴ Lubáragiñebei líábin Jesúsu ubóuagun, apúrichijati Juan joun sun Israelítagu, laríñaga joun luágu lúnti lan jasáansiruni jagáburi, badísei jagíame. ²⁵ Dan le layárafadúnbei dan lun loúnwen Juan, ába laríñagun.

“Mámattia áu le uágubei jarítagua luágu áu lan, liábiba ában nárigi, ni cáta áu loúbagiñe, madúnatina ni íbini lun nafáragadunun ligeidin.”

²⁶ ‘Nidújeñu, jugúya le jarájüñübei ladügawagun Abrahám, júma jugúya le mámabei ladügawagun Abrahám, inébejabutün lun Búngiu. wagía güriquia ja únbaña loúnajoúa ugánu le luáguti Wasálbaragüle. ²⁷ Já meja güriquia ja aganoúbaña Jerusalén jáu sun jábutigu, ibídiñeti yebe joun ca lan Jesúsubei, úa ligía gunfaráanda jamáni jerérun profétagu, láu sun aliijoúa lan jerérun tidan jalígilisin ságü luwéyuri eméraaguni, jagía guánarügüti gúnfuli jamúti le bürüwañubei láu jasiádiruni Jesúsu lun loúnwen. ²⁸ Láu sun madári jamá lidúnrun Jesúsu lun gayára lan jáfaruni jilágubei, amúriajatiña lúma Piláto lun láfaragüdüni jilágubei. ²⁹ Dánti le adüga jamáali sun le taríñagubei Lerérun Búngiu luágu, ába jarárigüdüni lueígiñe gurúwa, ába jíchuguni lídoun lumúaja. ³⁰ Ába lásaaragüdüni Búngiu lídaangiñe oúweni lúnya labágaridun. ³¹ Arúfudaguati Jesúsu lúngua winwañu luágu sarágu weíyaasu joun ja ñübinbaña lúma luágu luweíyasun Galiléagiñe lun Jerusaléoun, jagiati geféenbaña luágu joun güriquia guetó.

³² ‘Wíchiguñein lubeíti ugánu le jun, luágu darádu lé meja ladügübei Búngiu jáma binádu wagübürigu ³³ gúnfuli láali woun, wagía le jadügawagun, láu lásaaragüdüni Jesúsu, quei laríñaguni tidan lilíburun, lídan libíaman Sálmo. “Niraú amürü, rúnaali ubáraü le bun uguñe.” ³⁴ Ariñaga láali meja Búngiu luágu lásaaragüdüni Jesúsu lídaangiñe oúweni lun mañáladun lan lúgubu, dan laríñagun tidan líburu to Lerérun. “Níchugubei abíniruni le uágubei nariñaga lun David bun, gayáraati beménigidun luágu.” ³⁵ Laríñaga giñe David lídan ábanya Sálmo. “Mígirunbadibu lun lañáladun lúgubu Biraü le jínsiñebei bun.” ³⁶ David, seríwiti méja joun ja lánina lidáani quei laríñaguni Búngiu lun, lárigiñe, ába loúnwen, ába labunún le ñí lubei jabunúa lagübürigu, ába lañáladun lúgubu. ³⁷ Ánjeinti Jesúsu, sarágüda lumúti Búngiu lídaangiñe oúweni, mañáladunti lúgubu. ³⁸ Nidújeñu, lúnti lubeíti jasúbudiruni luágu lídaangiñe lan Jesúsu ferúdunawa lan wafígoun. Ligía ugánu wanügübei jun. ³⁹ Lídaangiñeti giñe, chibáwaali lubei sun wafígoun, sun wagía le afiñebei luágu, gidáwa ligía wadúnrun ligíbugiñe Búngiu, cátei lé meja siñá lubei lilírudun Moisés adüga. ⁴⁰ Toúnigi jumá lubeíti lueí láburujan ligáñi Búngiu juágun queísi jaríñaguni profétagu dan le jaríñagunbei.

⁴¹ Jugúya le éjerajabei náu, weírilá janígi, áni gumúgua jumá, ladüga áu le Búngiubei, nadügüba cátei weínamaburiti, daríme lun mafiñen jumá, íbini jabájüdaguni ámu jun.

⁴² Dan le láfuridunbei Páblo jáma lánigu tídaangiñe ligílisi, ába jamúriajan jáma lúnya jadímurejan joun luágu buri cátei le lewéñegua dimáasu. ⁴³ Dan lagúmuchun jadámuridagun ligílisirugu, sarágu jádaangiñe juríu jáma buri ja ígirubalin binádu jafiñen lun jafálaruni jafiñen juríu, ába jafálaruni Páblo lúma Bernabé. Ába jadímurejan Páblo lúma Bernabé jáma, ába jaríñagun joun lun jasígrun eménigira luágu lareidun Búngiu.

⁴⁴ Lewéñegua dimáasu, le luwéyuri eméraaguni, ába joúndaragun jíbe-ágei lílana fulásu lun jagáambuni lerérun Búngiu. ⁴⁵ Láu jaríjin juríu sarágu güriquia agáambajei lerérun Búngiu, ába jeméendüjan, ába jagúmeserun asígenerei Páblo, anába jamei líri Jesúsu. ⁴⁶ Ábati jadímurejan Páblo lúma Bernabé manúfudeiga, ába jaríñagun.

—Lúnti yebe wíchuguni ugánu lúmagiñeti Búngiu luágu Wasálbaragüle jun furúmiñe, jugúya le juríu, quei mabúseerun jumá jerésibiruni ugánu ligía, láu líra jarúfuduñein luágu madúna jumáni íbágari le magúmuchaditi, ítara líña weíbugagubeíti apúrichija joun ja mámabaña juríu. ⁴⁷ Ladüga ítara líña laríñaguni Wabúreme woun.

Níchuguñadibu lun bíchuguni larúgounga joun ja mámabaña juríu, lun gayáraabei lan jasálbarun ja aganoúbaña lidan lagúmujoún fulásu ubouágu.

⁴⁸ Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan láni Búngiu ugánu, ába jafiñerun sun ja lúmbaña jafiñerun luágu Jesucrístu, ja lúntiñabaña íbágari le magúmuchaditi.

⁴⁹ Ítara líña lapúrichijoún lerérun Búngiu lídan sun fulásu ligía. ⁵⁰ Ába jadímurejan juríu jáma wúríña gúnfulitiña, inébewa jagía, lúma jáma wügüríña weírigitíña ñi ubúru, ába jínchajániña lun jeíbaajaniña Páblo lúma Bernabé dari lun jabúguñiña lídaangiñe fulásu ligía. ⁵¹ Ábati jáfuruduní calíqui lueígiñe jagúdi, arúfudei luágu mabuídun lan jóuserun lílana fulásu ligía, ába jóudin ubúrugun Icónio. ⁵² Gúndaañu jáña afíñetiña Antioquia luágu jabágari lúma Crístu, weíríti jedéregeragun jóungua lun Sífiri Sándu.

14

Páblo lúma Bernabé ubúru Icónio

¹ Ába jebélurun Páblo lúma Bernabé tídoun jalígílin juríu ubúru Icónio, ába japúrichijan, buíti jadímurejan dari lun jafiñerun sarágu, dándu juríu quei máma juríu, luágu Jesucrístu. ² Juríu ja mafiñebaña luágu Jesucrístu, ába jínchajaniña ja mámabaña juríu, amásiñedagúdaña afíñetiña joun. ³ Ligía jeréderunbei Páblo lúma Bernabé sarágu dan ñi, ába jadímurejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárüni lan cátei le japúrichijabei luágu lareídun, láu líchuguni ubáfu joun lun jadáagun seíni lúma miláguru. ⁴ Fánreinguañu jáña lílana ubúru ligía, jíbiri jámagiñeñanu juríu, jíbiri jámagiñe apóstolugu. ⁵ Játi juríu jáma ja mámabaña juríu, ába jebélurun lídoun ában arítaguni jáma gumádimatiña lun jeíbaajaniña apóstolugu lúma lun jachámuragun dübü jawágun. ⁶ Ánjein Páblo lúma Bernabé, ába jasándiruni, ába jóudin lídoun buri fulásu le gíribei Lístra lúma Dérbé, bíama fulásu le láni méme fulásu le Licaónia, lúma geyégua láu, ⁷ apúrichija jamúti gíñe ugánu luáguti Wasálbaragüle Jesucrístu ñi.

Jachámuragun dübü luágu Páblo lídan fulásu le Lístra

⁸ Ñíñein ában wügürí meíbugunti, Lístra, ñun líña ladüga ítaragubeíñein lan lúmagiñe lagüríajoún, meíbugungubeíti. ⁹ Lagáambajañein wügürí ligía le laríñagubei Páblo, láu laríjin Páblo luágun, ába lasúbudiruni luágu afíñe lan wügürí ligía luágu gayára lan lareídagun. ¹⁰ Ábati laríñagun Páblo lun láu umálali jéreti.

—Ráramabá luágu bugúdi.

Ába lachúbarun wügürí ligía arárama, ába lagúmeserun eíbuga. ¹¹ Dan jaríjini gürígia cátei le ladügübei Páblo, ába jagúmeserun agúaraja lídan jerérun Lícaóniana, jaríñaga.

—¡Raríjaña búngiu quei jagáburi wügüríña wámoun!

¹² Jariñaga luágu Bernabé búngiu Júpiter, luágu Páblo búngiu Mercúrio, ladüga ligía lan adímurejabei. Nújein lúban jabúngiute Júpiter bougudiñoun luei

ubúругu, ¹³ ába liábin lufádirin Júpiter ñígiñe barúina wügüriña bágasu lúma buri fulúri luágun lubéneri ubúругu, busénti yebéti ligía jáma buri gürígia lun jáfaruniña bágasu jagía lun jadágaragüdün joun Páblo lúma Bernabé. ¹⁴ Dan jasúbudiruni Páblo lúma Bernabé cátei lan jabúseerunbei gürígia ja jadügün, ába jajeiridagunun janáangun le luweirin lubéresen cátei le joun, ába jádaragun jóungua jádoun gürígia agúarajeina.

¹⁵ —¡Wügüriña! ¿cámesan jabúseera jadügüni cátei le? Wügüriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wíwanbei, le adügübalin siélu lúma ubou, barána lúma sun cátei le lídaanbei. ¹⁶ Lídan meja dan le sügüjalibe, ígira lumútiña meja Búngiu gürígia lun jadügüni le jabúseerubei, ¹⁷ láu sun, arúfuda láani joun gürígia cáteinein lan láuja buídu le ladügübei joun. Rúti júya woun lúma alúbajani buíti, ru ligía eíginí buídurügüti woun, belúgüda lumúti ugúndani tídoun wanígi.

¹⁸ Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña gürígia luei jáfaruniña bágasu jagía lun jadágaragüdün joun.

¹⁹ Ábati jachülürün juríu Antioquíagiñe lúma Icóniogiñe, ába jagáñeiruni jarítangun gürígia lun jachámuragun dübü luágun Páblo. Lárigiñe, ába jadúrüguduní bougudín luei fulásu, sun jariñagun luágu jíláali lan. ²⁰ Dan le jagüriridágun afñetiña láu Páblo, ába lásaarun, ábaya lebelurun fulásurugún. Larúgan, ligía lídin lúma Bernabé ubúругun Dérbe.

²¹ Lárigiñe lapúrichijaní ugánu luáguti Wasálbaragüle ñi Dérbe, le ñi jabei sarágu gürígia afñerutiña luágu Jesucrístu, ába jagíribudun, ába jóudin Lístra, Icónio lúma Antioquíu. ²² Rútiña gurásu joun afñetiña ja lídaanbaña buri fulásu ligía, aríñaga jagía joun lun jasígirun derégüdagu lídan jafñen, aríñageina jagía joun luágu lúnti lan wasúfurirun sarágu lun gayára lan webélurun lídoun larúeijan Búngiu. ²³ Rútiña giñe ábutigu lídan cáda jadámurin afñetiña. Lásunti jayúmuragun lúma jayúnarun, ába jedéregeruniña lábun laríaajan Búngiu le uágubei jafñera.

Lagíribudun Páblo lúma Bernabé Antioquíoun

²⁴ Lárigiñe, ába jásügürün Pisidiagiñe, ába jachülürün Panfília. ²⁵ Ába japúrichijaní ugánu luáguti Jesucrístu ubúругu Péрге, líbiri méme Panfília, ábati jóudin Atálioun. ²⁶ Ñígiñe jádina, ában jóudin Antioquíoun, le fulásu le ñijin lubei jóunajoúa lábugiñe laríaajan Búngiu adúgei wadágimanu le jagúmuchubei guetó. ²⁷ Dan jachülürün Antioquíu, ába jóundaraguniña tánigu jalígilisin afñetiña, ába jabájüdaguní sun cátei le ladügübei Búngiu jáu joun, lúma luágu lánjunrenchuní Búngiu bēna joun ja mámabaña juríu lun giñe gayáraabei lan jafñerun luágu Jesucrístu lun jasálbarun. ²⁸ Ába jeréderun Páblo lúma Bernabé sarágu dan jáma afñetiña ñi.

15

Adámuridagúni Jerusalén

¹ Ligía jayábin wügüriña Judéagiñe lun Antioquíoun, ába jagúmeserun arúfudaja joun afñetiña luágu lun lan jasálbarún, mósu lan jerésibiruni wügüriña circuncisión, quei lariñaguni lilúrudun Moisés. ² Barúti Páblo lúma Bernabé ában sigénei weíríti jáma luágu cátei ligía, lagúmujoún óra,

ába loúnajoún Páblo, Bernabé, jámaya ámu wügüríña Jerusaléoun lun jóudin aráanserei cátei le jáma apóstolugu jáma tábutigu ligílisi to ñboun.

³ Ja tánigu ligílisi to Antioquíaboun oúnajabaliña, lídaanti jawéiyasun, ába jáségürün loúbawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jafiñen lun jafálaruni Crístu. Ába jagúndaaragun sun afiñetiña láu ugánu le.

⁴ Dan jachülürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájüdagun Páblo lúma Bernabé joun luágu sun le adüga láalibei Búngiu jádaangiñe. ⁵ Ñíñanu jádaangiñe jadámurin fariséogu ja afiñetiña luágu Crístu, ába jaráramun, ába jariñagun.

—Lúnti jerésibiruni wügüríña afiñetiña ja mámabaña juríu circuncisión, lúnti giñe jagúnfulirun lúma lilúruden Moisés.

⁶ Ábati jóúndaragun apóstolugu jáma tábutigu ligílisi lun jatúriajaní cátei le. ⁷ Lárigiñe sarágu dimúrei, ába lásaarun Pédro, ába lariñagun.

—Nidújeñu, subúdi jumúti luágu binárú lan meja lanúadirana Búngiu jádaangiñe lun níchuguni ugánu le lánina asálbaruni joun ja mámabaña juríu, lun giñe gayáraabei lan jafiñerun luágu Jesucrístu. ⁸ Búngiuti, le subúdjábubei tun anígi, arúfuda lumúti luágu resíbi láníña ja mámabaña juríu láu líchuguni Sifiri Sándu joun quei líchuguni woun. ⁹ Manügün lumútiwa Búngiu ámu jawéi, jarúmagüda lumútu giñe janígi láu jafiñen luágu Jesucrístu. ¹⁰ ¿Cáti uágu lalouguada jafiñen guetó luágu le adüga láalibei Búngiu, ru jugúya ában ijürügu jawágun afiñetiña ja, le wásiñerubei wagía guánarügü anüga—ni wagía ni binádu wagübürügu? ¹¹ Afiñetiwa luágu sálbaadiwa lan láurügü wafíñerun luágu Jesucrístu, madügünga wagía ni ámu cátei lun wabíjini, sálbaadiwa láu lareíni Wabúreme Jesucrístu. Ítara méme líña giñe jasálbarun ja mámabaña juríu.

¹² Ábati jámanichúnga, ába jagáambuni sun le jariñagubei Bernabé lúma Páblo joun luágu buri seini lúma miláguru le ladügübei Búngiu jádaangiñe, jagánagua ja mámabaña juríu. ¹³ Dan le lásurun jadímurejan, ába lariñagun Jacóbo.

—Nidújeñu, agáamba jumána. ¹⁴ Abájüdaguaali Simón Pédro woun ída líña lan fuleisei láníña Búngiu ja mámabaña juríu, láu lanúadajan jádaangiñe lun lánigume. ¹⁵ Ítara líña cátei le quei lé meja jabürüjabei profétagu tidan Lerérun Búngiu.

¹⁶ Gumúguaali jarúeijan ladügawagun Davíd, queísigubeirügü tagúmuchagun ában múna eíguadutu.

Lachülürüba wéyu nun, áu le Búngiu, lúnname naríjin jawágun ladügawagun Davíd,

ábame níchuguni ubáfu lun ában jádaangiñe lun larúeijan jádan.

¹⁷ Nadügübei líra lun gayáraabei lan jayábin sun jibiri gürígia lun jáluajanina queísi Jabúreme,

lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña nariñagun, áu le Búngiu, le asúbudirágüdúbalin cátei le lúmagiñe buga binádu dan.

¹⁹ Lígia nariñagunbei luágu moun lání wíchugun sarágu lúru luágu jawágun ja mámabaña juríu, ja ígirubalín binádu jafiñen lun jafálaruni Búngiu, ²⁰ buídurügüti láu labürüjóún joun lun jebé lan jeigin eígin le adágarawagüdüti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigiwarügütiña lugúndun máfuridunti játa jádaangiñe, meígin jagíame játa anímaalu. ²¹ Buíti lun jagúnfulirun lúma buri

cátei le lun jíchugun inébesei joun juríu, ladüga lúmagiñe bugája binádu dan, añájein gürígia apúrichijati lilúrudun Moisés lídan ságü fulásu, alijouáti lúrudu luágu tídan buri jalígilisin juríu ságü luwéyuri eméraaguni.

²² Ábati jarítangun apóstolugu jáma tábutigu ligílisi jáma sun tílana ligílisi janúadajan wügüríña jádaangiñe, lun jounajaniña Antioquía úara lúma Páblo lúma Bernabé. Ába janúadiruni Júdas, le giríbei Barsabási, lúma Sílas, bían wügüríña weírigitíña jádan affíñetiña. ²³ Ába jounajan ában gárada jáma, láriñajare tídan gárada tugúya.

“Wagía le apóstolugu, tábutigu ligílisi, jáma sun jíbiri affíñetiña, mábuga wáña joun wadújeñu lueígiñe Jesucrístu ja mámabaña juríu ja aganoubaña Antioquía, Síria, lúma Cilícia. ²⁴ Agáambaadiwa luágu añájein lan gürígia ñúdúntiña yágiñe íbidiñoun woun ebéreseja jun láu jadímurejan, áni dájaña ámu arítangun jídoun láu jaríñagun jun luágu mósu lan jerésibiruni wügüríña circuncisión, queísi lariñaguni lilúrudun Moisés. ²⁵ Ligía wúwaradúnbei lídan warítangun lun wanúadajan gürígia wádaangiñe lun joudin aríjañ un úara jáma wadújeñu Bernabé lúma Páblo ja jínsiñebaña woun sarágu, ²⁶ ja rújamaalíbei jabágari lídoun pelíguru lueígiñe Wabúreme Jesucrístu. ²⁷ Wounajañanu lubeíti Júdas lúma Sílas jun, jadímurejaba júma lun jafúnraanguagüdüni sun cátei le tídañbei gárada to wounajaboun jun, jun. ²⁸ Maríbaanti larijín lun Sífri Sándu lúma woun, míchugúniwa lan ámu ijürügu jun lueídügüya murúsun cátei le, le lunbei jadügüni. ²⁹ lun meígin jumá úwi le jáni anímaalu ja adágarawagüdútiña joun sándu, meígin jugúyame jítaü, ni úwi le jáni anímaalu ja tigíwarügütiña, madáagun jugúyame cátei buri jama gürígia ja mamárieidúntiña júma. Anjañ areídagua júngua lueí buri cátei le, buídubei jadüga. Buídu lámuga lídin jun.”

³⁰ Lárigiñeti jounajoun luágu jaweíyasun, ába joudin Antioquía. Dan le jachülürünbei ñi, ába joundaraguniña affíñetiña, ába jíchugunun gárada joun. ³¹ Dánti le jalíjanbarun affíñetiña, ába jagúndaarun sarágu luágu gurásu le tíchugubei joun. ³² Quei gíñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun affíñetiña láu jadímurejan joun, ru jagía idérebugu lun jafíñen. ³³ Lárigiñe jásügürün átiri dan ñi, ába jayouragun affíñetiña joun lubá jagíribudun jámoun já meja oúnajabaliña Jerusalén. ³⁴ Anjeinti Sílas, ába leréderun. ³⁵ Reideitiña gíñe Páblo lúma Bernabé Antioquía, ába jasígirun arúfudajei lúma apúrichijei ugánu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárigiñe, ába lariñagun Páblo lun Bernabé.

—Queímounya aríjaña affíñetiña lídan sun ubúru gu buri le ñí lubei apúrichija wamáali lan ugánu luágu Crístu, aríja wamá muga ida jáña lan.

³⁷ Busénti yebe Bernabé janügüni Juan Márcos jámagua, ³⁸ májati Páblo janügüni ladüga meja ígira láaña lan Panfília, masígiti jáma lídan wadágimanu. ³⁹ Lárigiñe sarágu sigénei, múradúntiña luágu cátei le darí lun jafánreinragun jawáriagua. Ába lanügüni Bernabé Márcos, ába joudin Chípree, ⁴⁰ ába lanügüni Páblo Sílas. Lárigiñe jedéregueruni affíñetiña Páblo lúma Sílas lújaburugun Búngiu, ába joudin, ⁴¹ ába jásügürün Síriagiñe lúma Cilíciagiñe, íchaajaina gurásu joun affíñetiña ligílisirugu.

16

Lídin Timoteo úara jáma Páblo lúma Sílas

¹ Ába jachülürün Páblo lúma Sílas lídoun buri fulásu le Dérbe lúma Lístra, le ñi lubei jadárira ában afiñeti gírítu Timotéo, tiraú ában wúri juríu afiñetu luágu Jesucrístu, güriégu lúguchi. ² Afiñetiña ja aganoubaña Lístra lúma Icónio, buítu jadímurejan luágu. ³ Busénti Páblo lun lídiba lan Timotéo jáma, íchigeina ugánu luáguti Crístu, ába lerésibiruni Timotéo circuncisión luei wuríba lan joun juríu ja aganoubaña lídan buri fulásu ligía, quei subúdi jamáni luágu merésibirun láani circuncisión ladüga güriégu lan lúguchi. ⁴ Súnti fulásu le ñigiñe lumúti jásügüra, jasúbudirágüdüni cátei le jaríñagubei apóstolugu jáma tábutigu liglisi ja Jerusalénbaña joun afiñetiña, ába jéredun jawágu lun jagúnfulirun lúma jagúmadin. ⁵ Ába lubeíti jedéraagüdün tílana liglisi lídan jafiñen, ába jagánwoundun afiñetiña ságü wéyu.

Lasáliragun ában wügüri Macedóniana lun Páblo

⁶ Májati Sífiri Sándu lun jíchugubei lan ugánu luágu Crístu Ásia. Ábati jásügürün labádinaguagiñe Frijia luma Galácia, ⁷ ába jachülürün luágu fadáguau le Misia. Ñigiñe yebe jarítagua lun jebélurun loúbawagun Bitínia, májati láni Jesús Espíritu le méme Sífiri Sándu lun jadügüni. ⁸ Ábati jóudin surúrugu Mísioun, ába jarárirun Tróas. ⁹ Ñi lasáliragua ában wügüri Macedóniana lun Páblo, áriebu, rára ayúmuragua lun, lariñaga lun. “Queímoun Macedónia ideragua bámugawa.” ¹⁰ Lárigiñe lasáliragun wügüri ligía lun Páblo, ába waráansejan lun wóudin Macedónia láu wafiñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Páblo lúma Sílas ubúruгу Filípos

¹¹ Ábati wáfayarun Tróasgiñe, ába wóudin sügüllügü luágun ubóju le Samotrácia, larúgan, ligía wachülürün Neápolis. ¹² Ñigiñe ába wóudin Filípos, Filípos lábugiñeñein lagúmadijan Róma, ligía giñe ubúruгу le weírigitimáabei luágu loúba Macedónia. Reídeitiwa átiri wéyu ñi. ¹³ Luágu ában wéyu le luwéyuri eméraaguni, ába wáfuridun bougudin luei ubúruгу, lárün dúna, lídan ában fulásu le ñi lubeíja layúmurawagúa lun Búngiu. Ába wañúurun ñi, ába wíchuguni ugánu luáguti Crístu joun wúríña ja oúndaragubáña ñi. ¹⁴ Ñiñoun ában jádaangiñe, gírítu Lídia, ubúruguna Tiatíra, tífisiute alúguraja gamísa finutu to gúchu tágu. Judúguatu wúri tugúya lun Búngiu, tagáambajañádiwa, ába lánjunrenchunun Búngiu tanígi lun tadügün gásu láu le lariñagubei Páblo. ¹⁵ Ába tabásterun jáu sun tílana túban, lárigiñe, ába tayúmuragun woun ítara.

—Ánjein afiñe jubei luágu afiñe nan le tímatisaati luágu Wabúreme Crístu, reidei jumá ya núbiñe.

Jéretu wawágu, ába weréderun.

¹⁶ Luágu ában dan, dan le wóudiña lan lídoun fulásu le ñi lubeíñaja layúmurawagúa lun Búngiu, ába wadúnragun túma ában irájü gawágutu ában espíritu wuríbatu le íchugubei ubáfu tun lun tasábuijan. Ában idámuni irájü tugúya, íbijatutíja sarágu seínsu joun tabúriña láu tasábuijan. ¹⁷ Ába tagúmeserun irájü to afálarawa, wağia lúma Páblo, agúarajeina tugúya ítara.

—Gürígia ja, jesériwiduña lun Búngiu le íñubei, jadímurejaña luágu úma lánina asálbaruni lidaangiñe figou jun.

18 Gíbeti wéyu táu adügei cátei le darí lun tebéresedun lun Páblo, ába lagáragun, ába lariñagun lun espíritu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

19 Dan le jaríjin tabúriña luágu siñáali lan jagáñeirun seínsu tueígiñe, ába jarügüdüni Páblo lúma Sílas, ába janügüniña jagíbugiñouñ ábutigu lamídaangua ubúrugü. 20 Ába jarúfuduniña jagíbugiñe gumádimatiña, ába jariñagun.

—Wügüriña juríu ja, jachágaraguñein wabúrugute, 21 jarúfudajaña igáburi le wásiñerubei erésibira ni adüga ladüga Rómama waja.

22 Ábati jiñúrágun gürígia jóungua jawágu, ába jarágachaguágüdüniña gumádimatiña, ába jíchugun dimúrei lun jabeichúniwa láu wéwe. 23 Lárigiñe sarágu abeichúni, ába jádaruniña furisunrugún, ába jariñagun lun oúnigiruti adaürütiña lun goúnigi lániña buídu. 24 Dan libíjini oúnigiruti lúrudu le, ába ládaruniña lídoun lagúmujoún tarígeirugü furisun, ába legélenchuni jagüdi.

25 Quei buri luágun amídi áriebu, ññánu Páblo lúma Sílas ayúmuragua lúma erémuja urému lun Búngiu, ja jíbiri, agáambaja. 26 Sódini, ába liábin ában oúnwenbun járabaganáli, ába lánjingichuni tuágaburi furisun. Lídan óra ligía, ába lánjunrenchun sun béna, safá ligía sun güríngüri le jawágubei adaürütiña. 27 Ába lagágudun oúnigiruti, dan larijin luágu júnren líña lan sun tubéneri furisun, ába laságarunun lefeinte lún yebe láfaragun lúngua, sún yebe lariñagun luágu ñüdüngua jamá adaürütiña. 28 Ába lagúaragun Páblo lun.

—Máfaraguabá búngua, awánja ya sun wagía.

29 Ábati lamúriajan oúnigiruti lámpu, ába lebélorun eíbaagueina, adádagareina láu anúfudei, ába láguragun lúngua lubádu jagüdi Páblo lúma Sílas. 30 Ába laságaruniña furisunrugugiñe, ába lariñagun joun.

—Wügüriña, ¿ca cátei lúnbei nadügüni lun nasálbarun?

31 Ába jariñagun lun.

—Affñebá luágu Wabúreme Jesucrístu, ábame basálbarun jáu sun tílana búban.

32 Ába jíchuguni ugánu luáguti Crístu lun jáu sun ja lúbiñebaña. 33 Lídan méme óra ligía, láu sun áriebujali lan buídu, ába lachíbuni bíti buri le jawágubei, ábati labásterun jáu sun lufámilian. 34 Lárigiñe, ába lanügüniña lúbiñoun, ába líchugun eígini joun, imáti lugúndan jáu sun lufámilian láu jaffíñerun luágu Búngiu!

35 Larúgan bináafin, ába jóunajan gumádimatiña polisía aríñaga lun oúnigiruti lun lígiragüdüniña Páblo lúma Sílas. 36 Ábati lariñagun oúnigiruti lun Páblo.

—Oúnajaaña gumádimatiña aríñaga nun lun nígiragüdünnün, gayáaraajali lubeíti jídin darángilañu.

37 Ába lariñagun Páblo joun polisía.

—Láu sun Rómama wamá, beíjamutiwa jagíbugiñe gürígia, míchigunga dan woun lun wadímurejan waweígiñegua, dágua jamáwa furisunrugun, ¿guetó buséntiña jígiragüdüniwa arámudaguárügü? ¡Máfuridunbadiwa! Núbün jamá aságarawa.

38 Ába jabájüdaguni polisía cátei le joun gumádimatiña, ába janúfudedagún gumádimatiña dan le jasúbudiruni luágu Rómama jamá Páblo lúma Sílas. 39 Ábati jóudin amúriaja ferúdnun jáma, ába jaságaruniña, ába jayúmuragun joun lun jáfuridun nígiñe ubúrugugiñe. 40 Dan le jáfuridunbei furisunrugugiñe, ába jóudin túbiñe Lídia, lárigiñe jaríjiniña affñetiña lúma jíchugun idérebugu joun, ába jasígiruni jaweíyasun.

17

Chagáguai ubúruğu Tesalónica

¹ Lídan jawéiyasun Páblo lúma Sílas, sügütiña Anfípolisgiñe lúma Apolóniagiñe, ñígiñe, ába jachülürün ubúrugun Tesalónica le ñí tubei ában jalígilisin juríu.

² Quei léchun Páblo, ñüdünti tidan ligílisi tugúya, adímurejati jáma úruwa dimáasu, ságü luwéyuri eméeraaguni. ³ Arúfudajati joun quei tariñaguni Lerérun Búngiu luágu lúnti lán meja lasúfurirun Crístu, lárigiñeme lan loúnwen, aba lánme lásaarun lídaangiñe ouweni lúnya labágaridun. Lariñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña güri-gia.

⁴ Ábati jafiñerun jádaangiñe juríu, ába júaradun lúma Páblo lúma Sílas. Afíñetiña giñe sarágu ja mámabaña juríu ja judúguatiña lun Búngiu, jáma sarágu würiña weirigutiña. ⁵ Juríu ja mafíñebaña luágu Jesúsu lan Crístubei le lunbei liábin, magúndaantiña láu cátei le, ába jóundaragun wügüriña wuribatiña ja eibugañajádügübaña úmada, ába jachágaraguágüdüniña güri-gia ñi ubúruğu. Ába jaságarajanun lúban Jasón, áluajaña Páblo lúma Sílas lun jaságaruniña lun jedégeruniña jájaburugún güri-gia. ⁶ Queíti madári jamániña ñi, ába janügüni Jasón jáma átiri jádaangiñe afíñetiña jagíbugiñoún gumádimatiña lídan ubúruğu ligía, ába jagúaragun aríñaga.

—Wügüriña ja, ja ebéresejabaña lídan sun fulásu, chülüljaña giñe ñájoun, ⁷ resíbi láaña jáson lúbiñe. Sun jagía dürgüa jamúti lilúrudun Urúei César, ladüga aríñagatiña luágu níjein lan ámu urúei, ában nege gíriti Jesúsu.

⁸ Dan jagáambuni gumádimatiña jáma sun jíbiri güri-gia cátei le, ába jachágaragun. ⁹ Jáson jáma ja jíbiri, ába jafáyeijan, ába jígirawagüdüniwa.

Páblo lúma Sílas ubúruğu Beréa

¹⁰ Furése furése, dan le labúrigadun, ába jóunajaniña afíñetiña Páblo lúma Sílas ubúrugun Beréa. Quei jachülürün ñi, ába jóúdin tidoun jalígilisin juríu.

¹¹ Juríu ja ñibaña, buítimaati jagáburi jawei ja Tesalónicabaña, resíbi jamúti ugánu luáguti Crístu láu ugúndani, ságüti wéyu jalíljanun Lerérun Búngiu lun jaríjini ánjein inárüni lubei le aríñawagúbei joun. ¹² Sarágu jáña lubeiti afíñerutiña jádaangiñe, afíñe jagía giñe sarágu ja mámabaña juríu, dándu würiña weirigutiña quei wügüriña. ¹³ Dan le jasúbudirunbalin juríu ja Tesalónicabaña luágu lapúrichijañein lan giñe Páblo Lerérun Búngiu Beréa, ába jóudin achágaraguágüdaña güri-gia ñi. ¹⁴ Ába jóunajani afíñetiña Páblo furése lun lídin lacóstoun, leréderame Sílas lúma Timotéo Beréa. ¹⁵ Ja ñüdünbabaña láu Páblo, ába jáfayajan lúma chülü ubúruğu Aténas. Lárigiñe, ába jagíribudun barúina jagía dimúrei lun Sílas lúma Timotéo lun jóúdin lárigi Páblo lídan lufúresen.

Páblo ubúruğu Aténas

¹⁶ Sun niján lan Páblo Aténas agúrabajei Sílas lúma Timotéo, medéraguágüdünti larítagnun láu laríjini ubúruğu ligía buin jáu bürübün sándu. ¹⁷ Ligíaja ladímurejaanbei tidan jalígilisin juríu lúma jáma ja mámabaña juríu ja ájuduragubaña lun Búngiu, adímureja ligía buri ságü wéyu jáma güri-gia ja úmadarugubaña, ñi lubei jadámuridagua. ¹⁸ Níñanu jádaangiñe wügüriña ja atúrijabalin jarúfudajan epicúreogu, jáma ja atúrijabalin jarúfudajan estóicogu, ába jadímurejan lúma. Jaríñaga jíbiri.

—¿Cáfunasan lariñagubei wügüri le woun, líbebei ladímurejan? Jaríñaga jíbiri.

—Camátia ladímurejaña jawágu ámu búngiu.

Jaríñagunbeiti ítara ladüga lapúrichijan Páblo joun luágu Jesúsu lúma luágu ásaaruni lídaangiñe ouweni. ¹⁹ Ábati janügüni lídoun ában fulásu gíriti Areópago, le ñi lubeija jóundaragua lun jagáambagun jóungua, ába jaríñagun lun.

—¿Gayáraati wasúbudiruni cátei lan iséri cátei le barúfudajabei? ²⁰ Cátei lé buri baríñagubei woun, terénchati woun, buséntiwati wasúbudiruni ca lan laníchigubei.

²¹ Sun Aténasna, jáma teréncha ja aganoúbaña ñi, marítaguntiña luágu ámu cátei lueídügüya luágu jaríñagun lúma jagáambun cátei iséri.

²² Ábati laráramun Páblo jamídaangua ñi Areópago, ába laríñagun.

—Wügüríña Aténasna, aríja numúti luágu afiñe jumá jawágu jisándun, ²³ ladüga dan le aríaaejina nubálin fulásu buri le ñi lubei jájuduragua joun jisándun, darítina ában latárü le ñi lubei bürüwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebei jun, ligía Búngiu le uágubei nadímureja jun.

²⁴ Ligía Búngiu le adügübalin ubou lúma sun cátei le ubouágubei, ligía labúremebei siélu luma ubou. Maganoúnti tidan ligílisi to jadüga gürgía, ²⁵ memégeirun lumúti giñe le gayáraabei jadügüni gürgía luágu lufúleisein, ligía guánarügü íchugubei íbágari lúma garábali, lúma sun cátei woun, sun wagía.

²⁶ Lídaangiñe ábanrügü wügürí ladügaña sun néchaanigu lun jaganotín lídan sun fulásu, aráanseleí dan le lúnbei jabágariduni lúma fulásu le lúnbei ñíba lan jagánawa. ²⁷ Adüga lumúti Búngiu sun líra lun gayáraabei lan jáluajani gürgía, gayára lámuga jadáriruni láu jáluajani, láu sun inárüni lan luágu madíse lan Búngiu lueí cáda ában wádaangiñe. ²⁸ Ladüga lídaangiñeti Búngiu awánjein lubei, gabágarí wagía, eíbuga wagía ligíbuagu ubou le, quei jaríñaguni poétagu jídaangiñe. “Lirájüñü Búngiu wagía.” ²⁹ Queiti lirájüñü wabei Búngiu, mouñ lumúti wanügüni Búngiu quei ában sándu le gólu, o pláta o dübü le jadüga wügüríña quei jarítagun luágu ítara líña lan Búngiu. ³⁰ Mebéresegúnti méja Búngiu láu cátei le jadügübei gürgía lábugiñe libídiñe joun, ánjein getó, aríñagati joun sun gürgía lídan sun fulásu lun jasáansiruni jóuserun. ³¹ Ladüga anúadajaali Búngiu ában wéyu lun ligíaba lan wéyu lagúseragüdüniña gürgía ja ubouágubaña láu ísuruni láu ában wügürí le anúadaja láalibeí, wügürí ligía, ligía Jesucristubei, arúfuda lumúti woun láu lásaaragüdüni Jesúsu lídaangiñe ouweni lúnya labágaridun.

³² Dan le jagáambubei luágu ásaaruni lídaangiñe ouweni, ñíñanu jádaangiñe, ába jéjerajan láu, jíbiri ába jaríñagun.

—Lídaanbagübei ámu dan wagáambeí badímurejan luágu buri cátei le.

³³ Ábati lígiruniña Páblo. ³⁴ Ába jafiñerun jádaangiñe luágu Jesucristu, ába jafálaruni. Níñein Dionísio jádan, lé meja ában jádaangiñe ábutigu lídan fulásu le giríbei Areópago, túma giñe ában würi gíritu Dámaris, jámaya ámu gürgía.

18

Páblo ubúruyu Corínto

¹ Lárigiñe cátei le, ába láfuridun Páblo Aténasgiñe, ába lídin ubúruyu Corínto. ² Ñi ladárira ában juríu gíritu Aquíla, túma lúmari to giríbout Priscíla, Póntona jagía. Málügili lueígiñe jayábin Itáliagiñe, jayábinbei ñígiñe ladüga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña,

³ queiti ában lan lifsiute jáma—tadáawagun quiámpu—ába leréderun jáma lun jawádigimaridun lídan ában. ⁴ Ságüti wéyu le lidáni eméraaguni, lídin Páblo tídan jalígílisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucrístu.

⁵ Dan jachülürün Sílas lúma Timotéo Macedóniagiñe, ába líchaagun Páblo lúngua le gumúti apúrichijeí Lerérun Búngiu. Aríñagati joun juríu furáangu luágu Jesúsú lan Crístubei le jagúrabajabei lun lasálbaruniña lídaangiñe jafígoun.

⁶ Ánjaña juríu, ába jasígeneruni le lubeíbei, anábagua buri jameí. Abati láfurudunun Páblo labite jawágun, arúfudei joun luágu mínsiñe lan jagáburi lun, ába laríñagun joun.

—Ánjaünme eféridira jídaangiñe, mámaalime nídaangiñeti. Lúmagiñe guetó, neíbuga apúrichija joun ja mámabaña juríu.

⁷ Ába láfuridun tídaangiñe jalígílisin juríu, ába lídin lúbiñoun ában wügüri gíriti Jústo, wügüri ligía, judúguati lun Búngiu, ñi toubagiñe ligílisi lagánawa. ⁸ Críspo, le tábuti jalígílisin juríu, ába lafiñerun luágu Wabúreme Jesucrístu, jáu sun tílana lúban. Sarágu giñe jídaangiñe Coríntona, dan jagáambunbalin ugánu luáguti Jesúsú, ába jafíñerun, ába jabásterún. ⁹ Abati lasáliragun Wabúreme Jesúsú lun Páblo luágu ában áriebe, ába laríñagun lun.

—Manúfudebá, bapúrichija méme, mámanichabá, ¹⁰ ladüga anájein búma, úabei ní ában agúruruti buágu lun ladügün wuríbani bun. Añájein sarágu gürígia lídan ubúru gu le ja lúnbaña nánigubaña lan.

¹¹ Reídeiti lubeiti Páblo ában irúmu dimí ñi Corínto arúfudajei Lerérun Búngiu joun lílana fulásu.

¹² Lídan dan le Galión lan gumándanbei Acáya, ába joúndaragun juríu lun járügüdüni Páblo. Ába janügüni ligíbugiñoun lúru luágu lagúserawagüdün.

¹³ Ába jaríñagun lun gumándan.

—Wügüri le, leréde arúfudaja joun gürígia lun jájuduragun lun Búngiu láu ában igáburi le múaraanbei lúma lúru.

¹⁴ Dán yebe ladímureja lan Páblo, ligía laríñagun Galión joun juríu.

—Lun jamúga ában lan wuríbani o dúru jürüti ladügübei wügüri le, níchaaguña jamúga nungua lun nagáambunün, jugúya juríu, ¹⁵ quei luágu lan dimúrei buri, lúma íri, lúma jílúrudun, aráanse jumeí júngua, ladüga mabúseeruntina nagúseragüdün luágu buri cátei le.

¹⁶ Ába labúgaguniña ñigiñe. ¹⁷ Abati járügüdüni sun güriégugu Sóstenes le tábuti jalígílisin juríu, ába jabúleiseiruni ñi guánarügü ligíbugiñe gumándan. Mebéresegünti Galión láu líra.

Lagríbudun Páblo Antioquíoun, lagúmeseruni lírúwan luweýyasun apúrichija

¹⁸ Lárigiñe líra, ába leréderun Páblo átiri dan ñi Corínto. Lárigiñe, ába layoúragun joun afíñetiña, ába lídin Síria úara túma Priscía lúma Aquíla. Ába lásaruni lídiburi lídan ubúru gu Céncrea lubáragiñe ládinun, lun lagúnfulirun láu ában méja darádu le ladügübei lúma Búngiu. ¹⁹ Dan le jachülürün ubúru gu Éfeso, ába lígiruniña Páblo Priscía lúma Aquíla lun jeréderun ñi lídan ubúru gu ligía. Lubáragiñe lígiruni Páblo Éfeso, ába lídin ligílisirugu adímureja jáma juríu. ²⁰ Ába jamúriajan lúma lun leréderun méme ñi jáma, májati. ²¹ Abati layoúragun joun, laríñaga joun.

—Mósu ñi nan Jerusalén lubá fédu le lúnbei ladügün, nagríbudayaba aríjaün ánjein busén Búngiu.

Ába ládinun, ába lídin Éfesogiñe. ²² TÜRÜTI Cesaréa, ñígiñe ába lídin Jerusalén abúsura joun tílana ligílisi, lárigiñe, ába larágachun Antioquíoun. ²³ Lárigiñe lásügürün átiri dan ñi, ábaya láfuridun, ába leibuguni sun fulásu Galácia luma Fríjia ában ában, íchaajeina dügüdaguaü joun afiñetiña.

Lapúrichijan Apólos ubúruğu Éfeso

²⁴ Lídan dan ligía, ába lachülürün ában juríu gíríti Apólos ubúrugun Éfeso, Alejandríana juríu ligía. Gapúrichijati, áni subúdi lumúti giñe Lerérun Búngiu buídu buídu. ²⁵ Subúditi luáguti Asálbaragülei le lúnbei liábin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsu, inárüni, láu sun lougua lan lasúbudirun luágu, le rügüñein larúfudajabei Juan le abásteragüdjabei luágu Jesúsu le lúnbei liábin lárigiñe, lasúbudira. ²⁶ Luágu ában wéyu, dan le ladímurejaña lan Apólos tídan jalígílisin juríu láu sarágu ichóuruni, ába jagáambuni Priscíla luma Aquíla. Dan lagúmuchun lapúrichijan, ába janügüni Priscíla luma Aquíla jábiñoun lun jafúnraanguagdünitima luáguti Jesúsu le Wasálbaragülebei lun, luma luáguti cátei le larúfudajabei. ²⁷ Dánti le labúseerunbei Apólos lídin loubawagun Acáya, lúmagiñeñanu afiñetiña Éfeso lun lídin, ába jóunajan ában gárada joun afiñetiña ja ñibaña Acáya lun jerésibiruni buídu. Dan lachülürünbei Apólos Acáya, íderagua lumútiña ja lafiñeragüdübaña Búngiu luágu Jesúsu, láu lareíni, ²⁸ arúfuda lumúti joun gürígia láu richaü le siñá jamuti asígenara, luágu marícha lan le jarúfudajabei juríu, arúfudalei joun tídaangiñe Lerérun Búngiu luágu Jesúsu lan Crístu le jagúrabubei lun lasálbaruniña.

19

Páblo ubúruğu Éfeso

¹ Sun niján lan Apólos ubúruğu Corínto, ligía lásügürün Páblo labádinaguagiñe buri fulásu, ába lachülürün Éfesoun ñi lubei ladárrira sarágu afiñetiña. ² Ába laríñagun joun.

—¿Resíbi jumútisan Sífiri Sándu dan le jafiñerunbei luágu Jesucrístu? Jaríñaga lun.

—Uá, magáambungubeígidiwa yebe luágu níjein lan Sífiri Sándu.

³ Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásterágüdün Juan.

⁴ Laríñaga Páblo joun.

—Labásterágüdüniña méja Juan gürígia, arúfudei luágu sáansi jamáali lan jóuserun, aríñagati giñe joun luágu lúnti lan jafiñerun luágu le lúnbei liábin lárigiñe—luágu Jesúsu le Crístubei, le Jasálbaragüle.

⁵ Dan jagáambuni cátei le, ába jabásterun lídan líri Wabúreme Jesúsu. ⁶ Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dí múrei buri teréncha, ába buri ladímurejan Búngiu jayúmulugugiñe. ⁷ Jawáraañanu dúusu wügüriña jádan súngebui.

⁸ Ürüwañein játi láu Páblo abásija tídoun jalígílisin juríu le ñi lubeíja lapúrichija, adímureja ligíaja furáangu luágu larúeijan Búngiu, afiñegüda láña gürígia luágu.

⁹ Ñiñanu giñe, edéreragüdütu janígi, májatiña jafiñerun, adímurejarügü jagía wuríba luágu lémeri Crístu jagíbugiñe gürígia. Ábati ladíreirun Páblo jaweí,

ába lanügüniña ja affiñebaña luágu Jesucristu tídoun ában lescuéla to ñi lubei larúfudaja ában wügüri gíriti Tiránno, ábaja ladímurejan ságü wéyu joun, ñi.

¹⁰ Ítara líña lasígirun luágu bián irúmu, súnti ja aganoúbaña loúbawagu Ásia, agáamba jamúti ugánu luáguti Wabúreme Jesús, dándu juríu quei ja mámabaña juríu. ¹¹ Adügati buríti Búngiu oúnwenbun buri miláguru lídaangiñe Páblo, ¹² dari lun tánügüniwa buri músue o anáanguni to dagáaru luágu lúra joun sánditiña, ábaja jareídagun, furi jaglaja espíritugu wuríbatíña jádaangiñe.

¹³ Ñiñanu juríu eibugañajádügütiña, aságajatiña giñe espíritugu wuríbatíña jawei güriá, álugatiña yebe jayúsuruní líri Wabúreme Jesús lun jaságajaniña, jariñaga buri joun espíritugu.

—Gumádi numúti bu lídan líri Jesús, le uágubei lapúrichija Páblo, lun báfuridun.

¹⁴ Ñiñanu sédü lirájüñü ában juríu gíriti Escéva, jábuti méja fádirigu, jádan ja adügübalin buri cátei le. ¹⁵ Níjein ában jadügüni, ába loúnabuniña espíritugu wuríbatí ligía.

—Subúdi numúti Jesús, subúdi giñe nun cátei lan Páblobei, ánjein jugúya, ¿cátaun?

¹⁶ Ába lachüragun wügüri le láubei espíritugu wuríbatí lúngua jawágun, gabáfuti ságü jáu súngebei, ába labúleiseiruniña buídu, ába jeíbaagun ñígiñe surúsu lúma láu buri bíti jawágu. ¹⁷ Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weíríti linébedun líri Wabúreme Jesús joun.

¹⁸ Sarágu giñe buri jádaangiñe ja affiñerubaña, ába jayábin agúfeserei buri cátei wuríbatí lé meja jadügübei, ¹⁹ sarágu giñe buri jádaangiñe já meja gabíñarajadibaña, ába janügünun jalíburun buri, ába jágudunun jagíbugiñe súngebei. Dan jabájüdünbalin tebégi líburu buri tugúya, gebégitu quei buri dimí-san mílu murúsun seínsu le pláta. ²⁰ Ítara líña abúrchagueína lan ugánu luáguti Jesús, arúfudeinalei lubáfu lun lasáansiragüdüni jagáburí güriá.

²¹ Lárigiñe sun cátei le, ába laráanserun Páblo lun lídin aríjaña affiñetiña Macedónia luma Acáya, lubá lasígiruni luweíyasun Jerusaléoun. Aríñagati giñe luágu lárigiñe lanme lídin Jerusalén, lídiba lan giñe Róma. ²² Ábati loúnajan biáma jádaangiñe ja íderagubalin lubá, Macedónia, wügüriña jagía, Timotéo luma Erásto, ligía, ába leréderun átiriraüya dan Ásia.

Chagáguai ubúruğu Éfeso

²³ Lídan dan ligía, ñíñein ában oúnwenbun acháraguní Éfeso jaweígíñeti ja afálarubalin lémeri Crístu, ²⁴ lídaangiñeti ában wügüri gíriti Demétrio, ladáawagun cátei láuti pláta líffisiutebei. Wügüri ligía, adáaguati tirájüñü ligíli líu pláta to tilígílisin sándu to giriboun Diána, belútiti sarágu seínsu joun ja ñadágimeinbaña lúma. ²⁵ Ábati loúndaruniña ja ñadágimeinbaña lúma úara jáma ámu ja ñadágimeintiña ámu físio le lenége jafísiute, ába laríñagun joun.

—Wügüriña, subúdi jumúti luágu ñulú lan wabágarí láu físio le, ²⁶ agáamba jumáli, aríja jumei ída líña lan lídin Páblo aríñaga luágu máma jamá búngiugu sándu ja jadügübaña wügüriña, áni gíbeeña güriá jafíñeragüdün, mámarügü ya Éfeso, lídan giñe líbe-ágei Ásia. ²⁷ Ñónguati cátei le, ladüga gayáraabei weféridiruni wabísínisin, gayáraabei giñe teféridiruni tilígílisin búngiu Diána tuweírigin, ábame tanügün búngiu Diána to únoun jájuduragua sun güriá Ásia lúma lídan sun ubou quei ni cáta.

²⁸ Dan le jagáambunbalin cátei le, ába jagáñidun buídu, ába jagúaragun.

—¡Weírigutu Diána to jabúngiute Éfesona!

²⁹ Níñeinti ában oúnwenbun achágaraguní lídan sun ubúru gu ligía. Ába járügüdüni Gáyo lúma Aristárco, biáma wügüríña Macedóniana ja úarabaña lúma Páblo, ába jadúruguduniña chülü tuágun múna to ñi lubeíja jóundaragua.

³⁰ Álugatí yebe Páblo lebélorun lun ladímurejan joun gürígia ñi lun ladílirun sun cátei, mígirun jamúti afíñetiña lun lebélorun. ³¹ Níñanu giñe jádaangiñe ábutigu ñi Ásia lumádagu Páblo, oúnajatiña giñe dimúrei lun lun mebélorun lan ñíjin.

³² Níti lídan adámurini, jíbiri agúaragua ában cátei, jíbiri agúaragua ámu, ladüga chagágujaña gürígia, jíbe-ágei, ibídiñeti joun ca lan lébubei jadámuridagun.

³³ Níñanu jádaangiñe gürígia, ába jafúnraanguágüdüni cátei le lun Alejandro, le jádajabei juríu ligíbugiñoún gurírguaü lun ladímurejan luágu jafúleisein. Ába ladügün Alejandro seíni láu lújabu lun jámanichun, lun ladímurejan luágu jafúleisein jagíbugiñe gürígia. ³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weírigutu Diána to jabúngiute Éfesona!

³⁵ Dánti le gálumagüda láaña abürüjati le láni ubúru gu ligía gürígia, ába laríñagun.

—Gürígia Éfesona, sun gürígia subúdi jamúti luágu Éfesona lan oúnigirubárun tilígílisin búngiu Diána, túma tiyáwa to áburujaboun siélu giñe. ³⁶ Quei úa lan ni ában lun lasígeneruni cátei le, gáluma jumá, madüga jumá ni cáta masáminarunga jumei buídu. ³⁷ Wügüríña ja, ja janügübaña ñájoun, míwerun jamágiru jilígílisin, madímurejan jagía wuríbati tuágu jubúngiute. ³⁸ Anjein níjein lubei cátei uáguti labúseera Demétrio jáma ja ñadágimeinbaña lúma líchugun jadúnrun, ligía níjein lubei agúseragüdüti lúma agúseragülei, gayáraati jídin ligíbugiñoún lúru du lun ladímurejan cáda ában lueígiñegua. ³⁹ Anjein ámu lubei cátei jamúriajabei, lúnti laráanserún lídan ában adámurini le richátí, ⁴⁰ ladüga gayáraabei laríñawagúniwa luágu wagúbujaña lan wuríbani ladüga cátei le asúseredubei ugúñe, ibídiñebei woun cába lan wóunabagüle ánjava álügüdüwa luágu chagáguau le.

⁴¹ Lárigiñe laríñaguni cátei le, ába lagúmuchaguagüdüni adámuridaguni.

20

Luweíyasun Páblo Macedónioun lúma Grécioun

¹ Dan le lagúmuchunbei chagáguau Éfeso, ába loúnajan Páblo jawágu afíñetiña lun jayábin lun, gayára lámuga líchugun gurásu joun, ábati loúburuniña, ába layoúragun joun, ába lídin Macedónioun. ² Luágu luweíyasun, chülügüeiña líña jámagiñe afíñetiña lídan burí fulásu le ídaangiñebei lásügüra, ru ligía sarágu dügüdaguaü joun láu lerérun. Ítara líña lachülürün lídoun ageíraü le Grécia. ³ Reideiti úrüwa játi ñi Grécia, ládina yebe ugúnein lun lídin Síria, ligía lagáambun luágu jelédeguña lan juríu lubá. Ábagubeiti laráanserun lun lagíribudun múarugugiñe, sügüina ligíaya Macedóniagiñe. ⁴ Gíbetiña wügüríña ñüdüntiña úara lúma. Sópater, le líraü Pyrrhus, Beréagiñe, Aristárco lúma Segúndo, Tesalónicagiñe, Gáyo, Dérbeigiñe, Tímotéo giñe, lúma giñe Tíquico lúma Trófimo, Ásiana. ⁵ Afíñetiña ja, ába jóudin wabá, ába jagúrabuniwa ubúru gu Tróas. ⁶ Wagía, lárigiñe fédu le teigin fein to magánaboun ísi, ába wáfuridun

Filiposgiñe tídan ugúnein, seíngü wéyu lárigiñe, ligía wátürün Tróas, le ñi lubei wúwarada jáma ja ñüdünbaña wabáragiñe, ába weréderun ñi sédü wéyu.

Bisída láni Páblo ubúruгу Tróas

⁷ Samúdi guñoun, ába jóundaragun affñetiña lun jeigin fein le jarítaguagüle luágu loúnwen Crístu, Páblo arúfudajabei joun. Queíti gaweyíasúnbei lan larúgan, ába lasígirun adímureja joun dari lúmoun amídi áriebu. ⁸ Íñuñanu lídan lürüwan túbanana múna to ñi lubei jóundaragua, ñiñein sarágu lámpu durúngu. ⁹ Ñiñein ában irájü agáambaja, ñun líña luágu funédere, Eútico líribei. Queíti lílubei lapúrichijan Páblo áriebu ligía, ába ladábudun lágu irájü ligía, ába larúmugun ñi, ába leíguadun lídaangiñe lürüwan túbanana múna, múarugun. Dan le jarárirunbei lun jiñúraguni, jílaali. ¹⁰ Ábati larárirun Páblo, ába laróunrun ligíbuagu irájü ligía, ába loúburuni. Ába lariñagun joun affñetiña.

—Madíjeri jumá, gabágariyaali.

¹¹ Ábayati lawárirun Páblo, ába jafánreinragunun fein, ába jeigin. Ábati lasígirun adímureja dari larúgadun, ligíaali lídin. ¹² Irájüti buga ligía, ába janügüni águyu wínwañu, sun jagía láu ugúndani láu.

Weíyaasu lúmagiñe Tróasgiñe lun Milétoun

¹³ Ába giñe wóudin, ába wádinun tídoun ugúnein, ába wóudin chülü Asón, le ñi lubei lúnti lan wabúduni Páblo quei wadáradun, ladüga busén lan lídin Asón múarugugiñe. ¹⁴ Dan le wadúnragun lúma ñi Asón, ába ládinun wáma, ába wóudin Mitiléne. ¹⁵ Larúgan, ába wáfuridun ñigiñe, sügüina wagía ligíbugiñe ubóju Quo, ában wéyu lárigiñe, ligía wachülürün ubóju Sámos. Ába weméraagun ubúruгу Trojílio, larúgan, ligía wachülürün ubúruгу Miléto. ¹⁶ Mátürüntiwa ubúruгу Éfeso luágu waweyiasun ladüga mabúseerun lan Páblo leréderun sarágu dan ageiráü Ásia, busénti lachülürün Jerusalén furése lun ñi lan lubá fédu le Pentecostés ánjein gayára.

Lapúrichijan Páblo joun tábutigu ligílisi, Éfeso

¹⁷ Dánti le Milétojadiwa, ába loúnajan Páblo jawágu tábutigu ligílisi Éfeso lun jayábin Miléto aríjei, ¹⁸ dan le jachülürünbei, ába lariñagun joun.

—Subúdi jumúti ída líña lan nigáburi lúmagiñe furúmiñeti wéyu nachülürün Ásioun. ¹⁹ Sun dan le jagánaguañadina lubei, seríwitina lun Búngiu láu únabuni, láu sarágu águiráü, súfuri áu sarágu láu cátei lé burí jabúseerubei juríu jadügün nun. ²⁰ Merédeti napúrichijan jun luágu cátei le lúnbei buídubei lan jun, arúfudaja áu jun furáangu lídan gurírigaü lúma júbiñe. ²¹ Dándu joun juríu quei joun ja mámabaña juríu, aríñagaadina luágu lúnti lan jasáansiruní jóuserun ligíbugiñe Búngiu, lúma lun jafiñerun luágu Wabúreme Jesucrístu. ²² Guetó lubeíti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi, ²³ lé rügüñein nasúbudirubei, luágu sun lan ubúruгу le ñi lumuti nídin, aríñagati Sífiri Sándu nun luágu nadaürüba lan, nasúfuriruba sarágu, Jerusalén. ²⁴ Úati ni cáta lídaangiñe áuti nebéserera, ni nibágari guánarügü, mebégiti ni cáta nun, adügarügü náali ligía le uágubei loúnajana Búngiu láu ugúndani dari lúmoun lagúmujóün, lun nadímurejani ugánu buíti luágu línsiñejabu Búngiu.

²⁵ ‘Guetó, choúru numúti luágu maríjindügüya láadina lan ni ában jídaangiñe, jugúya lé meja únbei napúrichija luágu larúeijan Búngiu. ²⁶ Ligía nariñagunbei jun ugúñe luágu masándiragun nan núngua láu dúru lueígiñe ni ában jídaangiñe,

²⁷ ladüga subúdigüda náali sun laráansejan Búngiu jun, marámuduntina ni cáta jueí. ²⁸ Touñigigua jumá lubeíti júngua, touñigi jumáñame affñetiña ja líchugubaña Sífiri Sándu lun jotúnigiruniña, ja tánigu lílígilisin Búngiu, ja lagáñijabaña láu líta Liraü guánarügü. ²⁹ Subúdi numúti luágu dánme lan nidin, jayábinba lan ámu áluga jagünrinchaguni jafiñen, quei lebélorun geígusi jádoun mudún áfaraguaña. ³⁰ Ñibaña jádaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña affñetiña. ³¹ Touñigi jumá lubeíti, jarítagua jumei luágu ürüwa lan irúmu náu ewéridijaün wéyuagu áriebu, ayájua buri áu.

³² ‘Guetóti, nidújeñu, derége numútün lun Búngiu lúma lun ugánu le luáguti línsiñejabu, le gabáfubei lun léredagüdüni jafiñen lúma lun líchugun ubáraü jun siélu jádan ja derégeguáañabaña jóungua lun. ³³ Mabúseerun nágili ni líseínsun ni ában, ni lanáangun, ³⁴ lubáragiñe líra, subúdi jumúti luágu ñadágimein nan lun nibjini le nemégeirubei lúma le jemegeirubei ja númabaña. ³⁵ Súnwandan narúfudajan jun luágu ítara líña lan luwádigimariniwa lun jíderawagún ja níjeinbei jemegeirun, luágu giñe lúnti lan larítawagún luágu dimúrei le laríñagubei Wabúreme Jesúsu dan le laríñagunbei. “Gúndaatimáati le íchugubei sügü láu le erésibirubei.”

³⁶ Lárigiñe laríñaguni Páblo cátei le, ába lájuduragun, ába layúmuragun lun Búngiu jáma súngebui. ³⁷ Ába jayájun súngebui láu igárigu, ába jóuburuni Páblo, ába jachúuruni. ³⁸ Jírutíñati ladüga laríñagun joun luágu maríjindügüya jamáli lánme. Ába jóudin íchaajei tuágu ugúnein.

21

Luweiyasun Páblo ubúrugun Jerusalén

¹ Dan le wígiruniña affñetiña, ába wóudin sügülügü lídoun fulásu le gíribei Cos, larúgan, ában wóudin Ródas, ñígiñe Ródasgiñe wóudin lun Pátara. ² Ñi Pátara wadárira ában ugúnein teíbuga Fenícia, ába wádinun tídoun, ába wóudin. ³ Dan wásügürün, ába waríjini ubotúju le Chípre, ába wígiruni lueígiñe wabaúna, ába wasígirun darí wachúlürün Síria. Queíti taráriguágüdüba lan ugúnein lídan ubúругu le gíribei Tíro, ába warárirun ñi. ⁴ Áluaja wamútiña affñetiña ja ñibaña, ába weréderun sedü wéyu jáma ñi. Ába lawísaruniña Sífiri Sándu luágu lasúfuriruba lan Páblo Jerusalén, ába jaríñagun lun lun midin lan. ⁵ Dan lásügürün sedü wéyu ligía, ába wóudin. Sun affñetiña jáu jámarigu jáma jasáanigu, ñúdüntiña íchaajawa chülü bougudi lueí ubúrugü, ñi béyabu ába wájuduragun ayúmuragua lun Búngiu. ⁶ Ábati wóuburagun woúngua jáma, ába wádinun tídoun ugúnein, jagía, ába jagíribudun jábiñoun.

⁷ Ába wagúmuchuni waweiyasun baránaja lúmagiñe ubúrugugiñe Tíro darí Tolemáida, le ñi lubei wabúsuru joun affñetiña, ába weréderun ában wéyu jáma ñi. ⁸ Larúgan, ába láfuridun Páblo wáma, wagía le lúmabei, ába wachúlürün ubúrugü Cesaréa. Ñi wóudin lúbiñe Felípe le apúrichijabalin ugánu luáguti Jesucrístu, ába giñe jádaangiñe sedü wügüríña já meja anúadajoúbaña Jerusalén lun jeténirun lun le jemegeirubei affñetiña, ába weréderun lúma. ⁹ Gasáaniguti Felípe gádürü würiña irájüñü ja máfuridungiña, ibíja jamúti ubáfu lúmagiñe Búngiu lun ladímurejan jayúmulugugiñe. ¹⁰ Átiri wéyu wáu ñi, ligía lachúlürün ában proféta Judéagiñe, gíríti Ágabo, ¹¹ liábiña aríjawa. Ába lanügüni lubélitin Páblo, ába lagüraguni lugúdi guánarü lúma lújabu láu, ába laríñagun.

—Laríñajare Sífiri Sándu luágu ítara lúba lan jagüraguni juríu labúreme béli ti le ubúru gu Jerusalén, ábame jedéreguni joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmuragun lun Páblo lun mídin lan Jerusalén. ¹³ Ába laríñagun Páblo.

—¿Ca uágu jayájua, írudagüdána? Aráansetina mámarügü lun nagürawagún Jerusalén, aráansetina dari lun nouñwen lueígiñe Nabúreme Jesús.

¹⁴ Quei siñá wamani larítagnun agáñeira, ába wígiruni, ába waríñagun lun ladügüniwa lugúndan Búngiu.

¹⁵ Dan le gumújali webélujan ñi, ába waráanserun, ába wouúdin Jerusalén.

¹⁶ Ñüdütiña jádaangiñe affñetiña wáma Cesaréagiñe, ñíñein ában Chíprena jádan, gíriti Mnasón, lújali lueígiñe laffñerun luágu Jesucrístu, lúbiñeba wagánawa.

Bisída láani Páblo Jacóbo

¹⁷ Dan wachülürün Jerusalén, ába jerésibiruniwa affñetiña láu ugúndani.

¹⁸ Larúgan, ába wouúdin lúma Páblo aríjei Jacóbo, ñíñanu gíñe sun tábutigu ligíli Jerusalén. ¹⁹ Ába labúsurun Páblo joun, ába labájüdaguni sun cátei le ladügübei Búngiu lídaangiñe joun, jádan ja mámabaña juríu. ²⁰ Dan le jagáambunbalin ugánu le, ába jadímurejan luágu luweírigin Búngiu. Ábati jariñagun lun Páblo.

—Wadúje, aríjabásan, añájein sarágu mílu juríu affñerutiña luágu Jesucrístu, áni sun jagía, aríñagatiña luágu lúnti lan lasígirúniwa lilúrudun Moisés. ²¹ Aríñawagúaaali joun luágu arúfudaja ban joun sun juríu ja aganoúbaña lídan jageíra ja mámabaña juríu lun madügün jamá gásu luágu lé meja laríñagubei Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu. ²² ¿Cábasan wadúga? Joúndaragubátia juríu dánme le jasúbudiruni luágu chülüjadibu lan, lun jadügün wuríbani bun. ²³ Niján cátei le lúnbei badügüni. Añájein gádürü wügüriña ya wádan, gásu jagúnfulirun ában darádu lúma Búngiu. ²⁴ Barúbaña búmagua, ábame barúmadaguágüdün búngua jáma ligíbugiñe Búngiu según wagáburi, wagía juríu, fáyeibeime le jagástarubei lun jagúnfulirun lúma jadáradun, lárigiñeme gayáraajalíme jásaragüdüni jádiburi. Ítara lúba jaríjini sun juríu luágu iyéeni lan le aríñawagúbei joun buágu, gúnfulirügütibu lan gíñe lúma lilúrudun Moisés quei lubúdubu. ²⁵ Ánjeinti jawágu ja mámabaña juríu áni affñejaña luágu Búngiu, abürüjaadiwa joun lun madíjeri jamá luágu buri cátei le, lúnrügü meigin jamá úwi le dagágüdawaali joun sándu, ni jítaü, ni anímaalu le tigiwarügüti, lun gíñe úa lan ni ában agámariduti würi to mamárieiduntu lúma.

Járügüdüni Páblo adáira tídan témpulu

²⁶ Ábati lanügüniña Páblo gádürü wügüriña jagía, larúgan, ába larúmadaguágüdün lúngua jáma, ába lebélorun témpulurugun awísaja ídaba lan lagúmucha jawéyuri gádürü wügüriña jagía lun jarúmadun, léme lidáni jadágaragüdün cáda ában jádaangiñe lun Búngiu.

²⁷ Dan le yebe yaráfaali lun lagúmuchun sédü wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugun, ába jachágaraguágüdüniña gürígia. Ába járügüdüni Páblo, ²⁸ ába jagúragun.

—¡Wügüriña Israelítagu, íderagua jumáwa! Niján wügüri le eibugubalin sun fulásu arúfudaja joun sun gürígia wuríba luágu wanásíñun, luágu lilúrudun

Moisés, lúma tuágu témpulu to, belúgüdaali gíñe güriquia ja mámabaña juríu témpulurugun awíyedei fulásu sándu le ligíbugiñe Búngiu.

²⁹ Jaríñagunbei itara ladüga meja jaríjini Páblo ubúrugú lúma Trófimo le Éfesona, jarítaguatíñati luágu barúlaani témpulurúgun.

³⁰ Ába jachágaragun sun lílana fulásu, ába jayábin güriquia eíbaagueina. Ábati jarügüdüni Páblo, ába jadúrüguduní bougudin tueí témpulu, ába jadáuraguni béna furése. ³¹ Busénjaña yebe jáfaruni jilágubei, ligía lachülürün ugánu lun gumándan luágu chagágujaña lan sun lílana ubúrugú Jerusalén. ³² Ábati loundaraguniña gumándan lisúdaaranigu jáma jábutigu, ába lachülürün eíbaagueina le ñíjin jabeí güriquia. Dan jaríjini gumándan jáma súdearagu, ába lásurun jabeíchuni Páblo. ³³ Ábati layárafadun gumándan, ába lárügüdüni Páblo, ába lagüraguágüdüni láu bián güringüri, lárigiñe, ába lálügüdajan cátei lan, lúma ca lan lidúnrunbei. ³⁴ Ámuñegueinarügüti cátei jaríñagun güriquia, siñátiti gunfaránda lan gumándan ñi cáta ladüga ireíni le jadügübei, ába lanügagüdüni jábiñoun súdeara. ³⁵ Dan le jachülürünbei luágu testépute múna, ába janügüni súdeara Páblo oúyuajeina lueí jáfaruni güriquia jilágubei, ³⁶ ladüga jayabiña súngubei járigi agúarajeina.

—jilála!

Ladímurejan Páblo lueígiñegua

³⁷ Dan lé yebe jádaraali lan Páblo múnadoun, ába laríñagun lun gumándan le jáubei súdeara.

—¿Gayáraati nadímurejan búma?

Ába laríñagun gumándan lun.

—¿Geréngaditibu güriégu? ³⁸ ¿Máma lubeí bugúya Ejiptona lé meja adügübei ában mabúchajaü luágu ában dan, ába lanügün gádürü mílu wügüriña gáfarajatiña lídoun fulásu mageírawaguti?

³⁹ Laríñagati Páblo lun.

—Máma áu, juríu áu, Társona, ában fulásu weíriguti Cilícia. Adügabá fuleísei nun lun bígirunina lun nadímurejan joun güriquia.

⁴⁰ Ába líchugun gumándan üma lun, ába laráramun Páblo luágu estépu, ába líchugun seíni láu lújabu joun güriquia lun jámanichun. Dan le manígaali, ába ladímurejan joun lídan hebréo, le jerérun juríu, ába laríñagun.

22

1 —Nidújeñu jáma jagübürigu, agáamba jumeí le lúnbei naríñaguni jun nueígiñegua.

² Dan jagáambun ladímurejan joun lídan jerérun, ábatima jámanichaguágüdü. Ábati laríñagun joun.

³ —Juríu áu, le gumúti, ubúrugú Társo louábawagu Cilícia nagüriajouá, ya Jerusalén naweírada. Lábugiñe larúfudajan Gamáiel natúriaja, úrati larúfudajan lúma jalúrudun binádu wagübürigu. Jouchatina súnwandan lun nesériwidun lun Búngiu táu sun nanígi, queígubeirügü ligáburi jadügüni jugúya ugüñe wéyu. ⁴ Áu, eíbaaja numútiña meja lánigu Cristu darí náfaraguniña jilágubei, barügua áu wügüriña furisunrugun. ⁵ Geféenti fádiri íñutimaati jáu sun jábutigu juríu luágu rújama gárada nun joun wapaísanu ja Damáscobaña. Ñüdüntina ñi áluajaña afiñetiña luágu Cristu lun nanügüniña ñájoun lun nasúfuriragüdüniña.

Labájüdaguní Páblo luágu ti lasáansiragun ligáburi

⁶ ‘Dan luáguñadina lubei üma, yaráaadina lun nachülürün Damáscó, queiburi amídirugu, sódini ligía ladúnraagun ában óunwenbun larúgounga siélugiñe náu, ⁷ ába náburujan múarugun. Ába nagáambun lariñagun ában umálali nun. “Sáulo, Sáulo, ¿ca uágu beíbaajanina?” ⁸ Ábati nariñagun. “¿Cátabusan Nabúreme?” Lariñaga nun. “Jesúsu le Nazarétna áu, le méme beíbaajabei.” ⁹ Aríja jamúti ja úarabaña núma larúgounga ligía, ába janúfudedagun, magáambun jamúti lumálali le adímurejabei nun. ¹⁰ Ábati nariñagun. “¿Cábagi nadüga, Nabúreme?” Ába lariñagun nun. “Sarába, beíba luágu buweíyasun Damáscoun, ñíba lariñawagúsa sun le lúnbei badügüni bun.” ¹¹ Queíti marijingüda láadina lubei buga larúgounga ligíra, ába jártügüdüni ja númabaña nújabu darí wachülürün Damáscó.

¹² ‘Ñiñein ában wügüri Damáscó gíriti Ananías, gúnfuliti buídu lúma lilúrudun Moisés, sun juríu ja aganoubaña Damáscó adímurejatiña buídu luágu wügüri ligía. ¹³ Ába liábin Ananías aríjana, dan lachülürün, ába laráramun nubádu, ába lariñagun nun. “Nidúje Sáulo, ibíjayabei baríjin lárigoún.” Lídan méme óra ligía, ába léfegechun nágu, ába naríjini. ¹⁴ Ábati lariñagun nun. “Anúadaja láadibu Jabúngiute binádu wagübürigu lúmagiñe binárü lun basúbudiruni lugúndan, lúma lun baríjini Jesúsu le richáguabei, lun bagáambuni lumálali, ¹⁵ ladüga bíchuguba lan fe luágu Jesúsu joun sun gürígia, abájüdagubeíme le aríja báalibei lúma le agáamba báalibei. ¹⁶ Guetóti, ¿ca uágu badárasaja? Sarába, badíseibá jeménigiñu luágu Wabúreme lun lachíbun bifigoun.”

Labájüdagun Páblo luágu louñajóun apúrichija joun ja mámabaña juríu

¹⁷ ‘Dan nagíribudun ubúrugin Jerusalén, luágu ában wéyu dan le nídin témpulurugu ayúmuragua, ába lasálriragun Nabúreme Jesúsu nun, ¹⁸ ába lariñagun nun. “Furíba yágiñe Jerusaléngiñe, óufuda, ladüga madügünbaña juríu gásu láu le baríñagunbei nuágu lídan fulásu le.” ¹⁹ Ábati nariñagun lun. “Nabúreme, subúdi jamúti luágu ñüdü nán buri méja tídan sun jalígilisin afíñetiña anáajaña ja afíñebaña buágu furisunurugun, bei buri náña. ²⁰ Dan le láfarúnbei Estéban jilágubei, le bánígu lé meja adímurejabei buágu, ñíñadina, gúndaatina láu jáfaruni, áu óúnigirubárun janáangun ja áfarubalín.” ²¹ Ába lariñagun Nabúreme nun. “Beíba, ladüga nouñajadibu díse, apúrichija joun ja mámabaña juríu.”

Páblo lújaburugu gumándan

²² Agáamba jamúti chülü lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumei jilágubei! ¡Maríchatí lun labágaridun!

²³ Queíti jasígirun agúaraja, achüjoun buri janáangun, achüja calíqui íñun le jagáñi, ²⁴ ába lariñagun gumándan lun ladarúniwa Páblo jábiñoun súdeara, ába louñajan abeíchei lun ladímurejan, lun lasúbudirúniwa ca lan uágu jagúaraja gürígia luágu ítara. ²⁵ Dan le gürágua jamáali lun jabeíchuni, ába lariñagun Páblo lun jábuti súdeara le ñíbei.

—¿Garíchatúnsan lun jabeíchun ában wügüri Rómána, magúserunga ligía?

²⁶ Dan le lagáambuni jábuti súdeara cátei le, ába lídin aríñaga lun gumándan.

—Touñigibátia láu le lúnbei badügüni, Rómanatia wügüri le.

²⁷ Ábati lídin gumándan luágun Páblo, ába lariñagun lun.

—¿Inárüni luágu Rómána ban?

Laríñaga Páblo lun.

—Ánja.

²⁸ Ábati laríñagun gumándan.

—Fáyeitina sarágu seínsu lun Rómata nan.

Laríñaga Páblo.

—Ánjein áu, ñi nagüriajóúa.

²⁹ Ába jígiruni já yebe lúnbei jabeíchuni furése, liábin giñe gumándan, dan le lasúbudiruni luágu Rómata lan Páblo, ába lanúfudedagun lueígiñe lagüraguni.

Páblo jagíbugiñe lúrudugu juríu ja íñutimáabaña

³⁰ Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni güringüri lueí, ába loúndaraguágüdüniña jábutigu fádirigu jáma lúrudugu juríu ja íñutimáabaña, ábati laságaruni Páblo, ába líchuguni jagíbugiñe.

23

¹ Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun núngua ligíbugiñe Búngiu chülü lúmoun wéyu le.

² Ábati loúnajan Ananías, fádiri le íñutimaabei, lun jagáyuajan ja yaráfabaña ñi luágun liyúma Páblo. ³ Ába laríñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúseragüdüniña quei laríñaguni lúrudu, ¿cáti uágu bagáyuagüda nuágu, adúraaguei lúrudu?

⁴ Ába jaríñagun ja ñíbaña lun.

—¿Ítara liñásan banábuni fádiri le íñutimaabei le láni Búngiu?

⁵ Ába laríñagun Páblo.

—Nidújeñu, ibidíñeti yebe nun luágu fádiri lan le íñutimaabei, ladüga taríñajare Lerérun Búngiu. “Madímurejaanbadibu wuríba luágu ában agúmadijati bageíra.”

⁶ Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába laríñagun láu umálali jéreti.

—Nidújeñu, fariséo áu, jádaangiñetiña fariséogu nagübürigu, áni jagúseragüdüñadina ladüga afiñe nan luágu jásaaruba lan jiláaña lídaangiñe ouweni lúnya jabágaridun.

⁷ Dan le laríñagunbálin cátei le, ába jagúmeserun fariséogu jáma saduséogu asígeneja jámagua, ába lafánreinragun adámurini. ⁸ Ladüga jaríñajare saduséogu luágu másaarunbaña lan jiláaña lídaangiñe ouweni, úatiña nege giñe ánjeligu, ni espíritugu, ánjañati fariséogu, afiñetiña luágu sun cátei le. ⁹ Jareínchati sùngubei, ába jásaarun jádaangiñe arúfudajatiña lilúrudun Moisés ja ñíbaña, áni fariséogu giñe jagía, ába jaríñagun.

—Wügüri le, úati ni cáta wuríbati ladüga, áni ánjeindügü ában lubeí espíritu adímurejabei lun o ában lan ánjeli, toúni gi wamáti lueí wadárirún oucha weréderuni luwádigimari Búngiu.

¹⁰ Weírjiali sigénei darí lun lanúfudedun gumándan lueí jáfaruni Páblo jilágubei. Ábati loúnajaniña lisúdaaranigu lun jaságaruni Páblo lídaangiñe adámurini lúnya janügüni jábiñoun súdaara.

¹¹ Le ában árieibu, ába lasálriragun Wabúreme Jesúsu lun Páblo, ába laríñagun lun.

—Manúfudebá, Páblo, ladüga ítara quei rújadibu lan fe nuágu ya Jerusalén, bíchuguba gíñe fe nuágu, Róma.

Aráansejani lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu iñaraguni ligíbugiñe Búngiu luágu meiginbaña lan, mátun jagíame ni cáta darí jáfaruni. ¹³ Jougiñe bián-wein wügüríña ja aríñagubalin cátei le.

¹⁴ Ábati jouđin jámoun jábutigu fádorigu lúma jámoun wügüríña weirigutiña jádan juríu, ába jaríñagun.

—Aríñagaadiwa láu iñaraguni luágu meiginbadiwa lan ni cáta darí wáfaruni Páblo jilágubei. ¹⁵ Guetóti, jugúya jáma ja jíbiri lúrudugu iñutimaatiña amúriaja jumá lúma gumándan lun lanügüni jun jarúga, jaríñagame lun luágu lun lántima jálügüdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachülürün.

¹⁶ Ába lachülürün cátei le lábun lagáambun tiraü lítu Páblo, ába lídin jábiñoun súdaara asúbudiragüdei lun Páblo. ¹⁷ Ábati lagúarun Páblo lun ában jádaangiñe jábutigu súdaara, ába laríñagun lun.

—Barübei irájü le lúmoun gumándan, níjein cátei lun laríñaguni lun.

¹⁸ Ába lanügüni jábuti súdaara lúmoun gumándan, ába laríñagun lun.

—Wáti adaürüti Páblo nun, ába lamúriajan núma lun nanügüni irájü le bun ñájoun, níjein nege cátei lun laríñaguni bun.

¹⁹ Ába lárügüdüni gumándan lújabu irájü ligía, ába lanügüni lun jábugua jamá, ába laríñagun lun.

—¿Ca babúseerubei baríñagun nun?

²⁰ Ábati laríñagun irájü ligía lun.

—Belújaña juríu lídoun úarani lun jamúriajan búma lun banügüni Páblo jagíbugiñoun lúrudugu iñutimaatiña lún nege jálügüdünitima luágu lidúnrun.

²¹ Mafiñerabá joun, añájein jougiñe bián-wein jawügüríña arámudagu jabá úmada agúrabejei lun jáfaruni jilágubei. Aríñagaaña láu iñaraguni ligíbugiñe Búngiu luágu meiginbaña lan, mátun darí jáfaruni Páblo, guetó aráanseñu jáña, jagúraba rügüñein bouñabagüle.

²² Ábati louñajani gumándan irájü ligía águyu, aríñageina ligía lun lun maríñagun lan ní ca un luágu abájüdagua láali lan cátei le lun.

Louñajoun Páblo lun gumádimati le Félix

²³ Ába lagúarun gumándan joun bián jádaangiñe jábutigu súdaara, ába laríñagun joun lun jaráanserun bián-san súdaara lun jouđin Cesaréa eibu, úara jáma ürüwa-wein-dísi ja jawágutiña gabáyu, jáma bián-san ja táutiña efeín, lun jouđin ladaünrún nefu güñoun. ²⁴ Aráansegüdáti gíñe gabáyu lun laweínjaniña Páblo, ru ligía dimúrei lun jachülüragüdüni Páblo lúmoun gumádimati Félix láu magádiei. ²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weirigubei, mábuga níña bun. ²⁷ Niján wügüri le, le nouñajabei bun, daújamaali yebe juríu áni jáfaraali yebe jilágubei, dan le nasúbudirünbalin luágu Rómana lan, ába nídin jáu nisúdaaranigu, ába neséfuruni. ²⁸ Queíti nabúseerun nasúbudiruni ca lan lidúnrunbei jarúma, ába nanügüni jagíbugiñoun lúrudugu juríu iñutimaatiña.

²⁹ Lidúnrun jarúma luáguti buri cátei le luáguti jalúrudun, úati iríchaü lun

láfárún jilágubei, ni íbini lun ladaürün. ³⁰ Quei lachülürün lábun nagáambun luágu jaráansejaña lan juríu lun jáfaruni jilágubei, ligía lébubei nouñajani bun madárasajaanga. Aríñagaadina giñe joun ja íchugubaña lidúnrun lun búma lan jaráanserei le jánibei lúma.”

³¹ Ábati janügüni sudaara Páblo quei laríñawagüniwa joun, áriebu, chülü Antípatris. ³² Larúgan, ligía jagíribudun sudaara ja eíbubaña, sudaara ja jawágubaña gabáyu, ába jasígiruni jaweiyasun láu Páblo. ³³ Dan le jachülürünbei Cesaréa, ába jederegerunun gárada lun gumádimati, derége jameí giñe Páblo. ³⁴ Lárigiñe lalíjanun gumádimati gárada, ába lálügüdajan jalíana lan Páblo, dánti le lasúbudirúnbalin luágu Cilíciana lan, ³⁵ ába laríñagun lun.

—Nagáambubadibu dánme le jayábin ja íchugubaña bidúnrun.

Ábati líchugun dimúrei lun líchugüniwa Páblo tídoun palásiu tó meja lábunaguboun Heródes, jáu oúniri.

24

Ladímurejan Páblo lueígiñegua ligíbugiñe Félix

¹ Seíngü wéyu lárigiñe, ába lachülürün Ananías, fádiri le íñutimaabei, ubúrugin Cesaréa jáu wügüríña jádaangiñe juríu weirigutiña, lúma ában wügürí le subúdjabuti lun lúrudu, gíríti Tértulo. Ába jayábin lúmoun gumádimati lun jíchugun lidúnrun Páblo. ² Dan le lanügüniwa Páblo jagíbugiñoún, ába lagúmeserun Tértulo íchiga lidúnrun, laríñaga.

—Luágu bareíni, gumádimati, lújadiwa láu darángilaü ya wageíra, buíti leibugun sun cátei ya fulásurugu súnwandan lábugiñe lichú báu. ³ Ibíja wamúti sun le, áni teíngü wamútibu luágu. ⁴ Lun magídarun wamáni bidáani sarágu, amúriajatina búma lun badügün murúsun fuleísei woun lun bagáambuniwa luágu murúsun óra. ⁵ Níjan wügürí le Páblo, beréseti, lerédera afánreinragüdaña juríu lídan sun fulásu, ligía giñe ában jádaangiñe lichügüdinabei jadámurin nazarénugu. ⁶ Álugati giñe lawíyedagüdünun témpulu ligíbugiñe Búngiu láu lebélaagüdün ában wügürí le mámabei juríu tídoun. Ába wárügüdüni, ába yebe wabúseerun wagúseragüdüni láu ligáburí walúruden, ⁷ ába leméterun gumándan Lísias ñíjin, ába lagídaruni waweí láu érei, ⁸ ába laríñagun luágu ja lan íchugubaña lidúnrun lúnti lan jayábin búmoun. Gayáraati bálügüdaguni Páblo, subúdi bámugei inárüni luágu sun cátei le, le waríñagubei luágu.

⁹ Juríu buri ja ñíbaña, aríñagatiña giñe luágu inárüni lan sun le laríñagubei Tértulo. ¹⁰ Ába ladügün gumádimati seíni lun Páblo lun ladímurejan, ában laríñagun Páblo.

—Lau sun nugúndan nadímureja nueígiñegua bigíbugiñe ladüga subúdi náani luágu lúmagiñe lan sarágu irúmu bagúseragüdajan lídan fulásu le. ¹¹ Gayáraati bálügüdajan ánjein inárüni lubeí le lúnbei naríñaguni bun. Dúsurügügili wéyu lueígiñe nachülürün ubúrugin Jerusalén lun nájuduragun lun Búngiu, ¹² madárirúnwatina asígeneja ni ca úma, ni achágaraguágüdaña gürígia témpulurugu, ni tídan buri tíbiri jalígílisin juríu, ni lídan buri ámu fulásu ubúrugu. ¹³ Gürígia ja, síñáti jarúfuduni luágu inárüni lan ni ában lídaangiñe sun cátei le jaríñagubei nuágu. ¹⁴ Ában cátei naríñagubei bun, luágu nesériwiduña lan lun Jabúngiute nagübürigu quei larúfudajani Jesucrístu, le uágubei jaríñaga luágu marícha lan. Afíñetina luágu sun le bürúwañubei tídan buri líburu to

lánina lilürudun Moisés lúma lé meja jabürüjabei profétagu. ¹⁵ Níjein giñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ja buídubaña quei ja wuríbabaña. ¹⁶ Ligía náfaangunbei súnwandan lun madúnrun nan ligíbugiñe Búngiu lúma jagíbugiñe gürígia.

¹⁷ ‘Lárigiñe átiri dan náu eíbugei ámu buri fulúsa, ába nagíribudun nageírun lun nedégerun seínsu joun gudémetiña Jerusalén lúma lun nadágaragüdün lun Búngiu. ¹⁸ Nadügüñein yebe cátei le témpulurugu lárigiñe narúmudaguagüdün núngua quei le igáburi, ligía jadárirunina átiri juríu loúbawaguna Ásia ñi témpulurugu, úatiña sarágu gürígia ñi, ni chagáguau. ¹⁹ Jagía lúnbaña jayábin arúfudagua jóungua ya lun jaríñaguni le lúnbei jaríñaguni ánjein níjein lubei lúnti jaríñaguni nuágu, ²⁰ jaríñaguni lan ja yábaña ánjein dari jabei nidúnrun dan le ligíbugiñe nubei líñun-ágei lúrudu juríu. ²¹ Siñáti jaríñagun ni cáta nuágu, lueidügüya luágu lan ában wéyu dan le jadaañadina lubei, ába nagáragun aríñaga. “Jagúseragüdúñadina ugúñe lueigiñe afiñe nan luágu jásaaruba lan jiláaña lídaangiñe oúweni lúnya jabágaridun.”

²² Subúsi sarágu luágu larúfudajan Jesúsu lun gumádimati Félix, ítara líña, dan le lagáambunbalin le laríñagunbei Páblo luágu jásaarun jiláaña, ába lagúmchaguagüdüni adámurini, aríñageina ligía.

—Nagúseragüdübei wügüri le dánme le lachülürün gumándan Lisías.

²³ Ábati laríñagun Félix lun jábuti sudaara lun lasígirun Páblo dauwañu, lun furáangu lan lun gayára lan jóudin lumádagu aríjei, eténira lun.

²⁴ Átiri wéyu lárigiñe, ábaya lachülürün Félix túma Drusíla to lúmari, to juríu, ubúrugin Cesaréa, ába lagúragüdün luágu Páblo lun ladímurejan lun luágu Jesucristu. ²⁵ Dan le ladímurejaanbei Páblo lun luágu íbágarí le surúbei, lúma luágu ágüdaagúni únguaü luei le wuríbabei, lúma luáguti wéyu le lúnbei lagúseragüdüniña Búngiu sun gürígia, ába lanúfudedagun Félix, ába laríñagun lun.

—Beíba yebe, dánme le gadáani nan, nagúarayaba bun.

²⁶ Agúrabati yebe giñe Félix lun líchugun Páblo seínsu lun lun lígiragüdüni, ligía, dan méme lubei wájali luágu lun layánujan lúma. ²⁷ Sügüti bián írúmu ítara, ábati lagúmchun lagúmadijan Félix, ába lárügüdüni Pórcio Fésto lufúlasun. Queíti busén lan Félix leréderun buídu jáma juríu, ába lígiruni Páblo dauwañu.

25

Páblo ligíbugiñe Fésto

¹ Ábati lachülürün Fésto lun lárügüdüni lufúlasun queísi gumádimati, ürüwa wéyu lueigiñe, ába lamúdeirun Cesaréagiñe lun ubúrugin Jerusalén. ² Ába jachülürün jábutigu fádírugu níjin jáma juríu ja weírigutimaabaña íchiga lidúnrun Páblo ligíbugiñe Fésto. ³ Ába jamúriajan fuleisei lúma lun loúnajan anügei Páblo Jerusalén. Le jaráansejanbei, lún yebe jáfaruni jilágubei luágu üma. ⁴ Ába loúnabun Fésto luágu Cesaréa lan ladaürüwa Páblo, áni jarítagua lan lídin ñi madíse. ⁵ Ába laríñagun joun.

—Ligía lúnti lubei jóudin ja weírigutimaabaña jidaangiñe Cesaréa úara núma, áni ánjein adúgaali lubei wügüri ligía dúru, gayáraabei jaríñaguni.

⁶ Wídü rügüñein o dísi lan wéyu láu Fésto Jerusalén, ába lagíribudun ubúrugin Cesaréa. Larúgan, ába lárügüdüni lufúlasun lun lagúseragüdün, ába loúnajan luágu Páblo. ⁷ Dan le lebélurunbei Páblo, ába jagúriridágun juríu ja

ñübinbaña Jerusaléngiñe láu, ába jíchugun sarágu lidúnrun le jürüti, áni siñáti jarúfuduni luágu inárüni lan ni cáta lídaangiñe le jariñagunbei. ⁸ Ábati lariñagun Páblo lídan ladímurejan lueígiñegua.

—Madügüngidina ni murúsun dúru ni lun jalúrudun juríu, ni tun témpulu, ni lun urúei César.

⁹ Queíti busén lan Fésto leréderun buídu jáma juríu, ába lariñagun lun Páblo.

—¿Buséntibu bídin Jerusalén lun nagúseragüdünibu ñi?

¹⁰ Ába loúnabun Páblo.

—Ligíbugiñeñadina lagúseragüle urúei César, le ñi lubei lúnti lan nagúserún. Queísi basúbudiruni buídu, madügüngidina dúru joun juríu.

¹¹ Anjein adügaadina lubei dúru le garíchatí lun nafarún jilágubei lueígiñe, mebéresegúntina nouñwen, anjein úa lubei ni cáta lánina inárüni lídan sun le aríñawagúbei nuágu, úati ni ában garíchatí lun ledéregerunina joun juríu. Amúriajatina lun César lan agúseragúdána.

¹² Lárigiñeti layánujan Fésto jáma lánigu cába lan ladüga láu Páblo, ába lariñagun lun.

—Amúriajaadibu lubeígia lun César lan agúseragüdabu, beíbugati lun César.

Páblo ligíbugiñe urúei Agrípa

¹³ Átiri wéyu lárigiñe, ába lídin urúei Agrípa túma Bereníce Cesaréa aríjei Fésto. ¹⁴ Quei reidei jabeí átiri wéyu ñi, ába labájüdaguni Fésto luáguti lagúserun Páblo lun urúei Agrípa, lariñaga lun.

—Níjein ában wügüri lígírún Félix dáüwañu ya. ¹⁵ Dan le Jerusalén nubei, rútiña jábutigu fádirigu jáma wügüriña juríu weirigutiña lidúnrun nigíbugiñe, amúriajatiña núma lun nasiadiruni. ¹⁶ Ába nariñagun joun luágu magáburi láani lúruđu Rómána lun lasiadirun ában gürígia lun ouweni maríjina láña ja íchugubaña lidúnrun ligíbugiñe, lun gayára lan ladímurejan lueígiñegua. ¹⁷ Ligía, lídan lubei le jayábinbei ya úara núma, mefédirúntina dan, larúgan, ába nárügüdüni nufúlasun lídan agúseragülei, ába nouñajan luágu wügüri ligía. ¹⁸ Ja ñübinbaña lun jíchugun lidúnrun, mariñaguntiña ni cátei luágu lídaangiñe lé yebe uágubei narítagua. ¹⁹ Lé buri cátei le jariñagubei luágu, luágu múaradun lán nege jáma luágu ligáburi jafiñen, lúma luágu ában nege wügüri gírítí Jesús—jiláti nege, lariñajare Páblo luágu wínwanya lán nege. ²⁰ Queíti ibidíñe lan nun cába lan nadüga lídan ában cátei líbe le, ába nálügüdüni Páblo anjein busén lubei lídin Jerusalén lun lagúserún luágu cátei le ñi. ²¹ Quei lamúriajan lun urúeiba lan Augústo César agúseragüdeí, ába nariñagun lun lasígírún dáüwañu daríme gayára lan nouñajani lun Augústo César.

²² Ábati lariñagun Agrípa lun Fésto.

—Buséntina giñe nagáambuni wügüri ligía.

Ába lariñagun Fésto lun.

—Bagáambubei jarúga.

²³ Larúgan, dan le jachülürünbei Agrípa túma Bereníce, ába jebélurun láu ouñwenbun uweiriguni múnadoun, jáma jábutigu súdaara jáma wügüriña weirigutiña ñi ubúru. Ába loúnajan Fésto luágu Páblo, ²⁴ ába lariñagun.

—Urúei Agrípa, jáma wügüriña ja adámurígubaña wáma ya, niján wügüri le. adímurejaaña sarágu jádaangiñe juríu wuríba nun luágu, dándu Jerusalén quei ya Cesaréa, áni añájagua aríñaga nun láu sarágu éregu luágu lúnti lan loúnwen. ²⁵ Laganoún nun camá madügüngili ni cáta le lúnti lafarún

jilágubei lueígiñe, áni queíti ligía guánarügü lan amúriajabei lun urúeiba lan Augústo César agúseragüdei, nouñajaali lun. ²⁶ Queíti úa lan cába lan cátei uágu nabürüja lun Augústo luágu wügüri le, ligía nanügübalin jigíbugiñoún, bigíbugiñountimá urúei Agrípa, lun bálügüdaguni, níjein lámuga cába lan nabürüja. ²⁷ Ladüga garábaguati nun lun nouñajan ában adaürüti, mawísajaanga áu ca lan lidúnrunbei.

26

Ladímurejan Páblo lueígiñegua ligíbugiñe urúei Agrípa

¹ Ábati lariñagun Agrípa lun Páblo.

—Gayáraati badímurejan bueígiñegua.

Ába liñúruni Páblo lújabu lun jagáambuni, ába lagúmeserun adímureja, ába lariñagun.

² —Oúnwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le ariñaga jamáalibe juríu nuágu, ³ gúndaatimáatina ladüga subúdi báni jagáburi juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ ‘Subúdi jamúti sun juríu ligáburi meja nabágaridun jádan, nageíra lúma ubúru Jerusalén, lúmagiñe irájügídina. ⁵ Lúja jasúbudirunina, áni gayáraati jamúga jariñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdabei lidan luwúyeri wafiñen, wagía juríu. ⁶ Guetóti, jagúseragüdüñadina luágu eménigini le nuágubei, luágu lásaaragüdübaña lan Búngiu jiláaña lídaangiñe oúweni lúnya jabágaridun, quei meja lariñaguni joun binádu wagübürigu. ⁷ Dúsusugubei família le jadügawagunbei lirájüñü Israél agúrabiña jarijini lagúnfulirun dimúrei le, ligía jájuduragunbei lun Búngiu, seríwi jamei wéyuagu, áriebu. Lueígiñe méme eménigini le, jadárira juríu nidúnrun, urúei Agrípa. ⁸ ¿Mafiñetün funági luágu gayára lan lásaaragüdüníña Búngiu jiláaña?

Labájüdagun Páblo luágu meja leíbaajaniña affñetiña

⁹ ‘Nugúya guánarügü, jarítaguatina méja luágu lúnti lan neíbaajaniña ja afálarunbalin Jesúsu Nazarétna, ¹⁰ áni ítara líña nadügüni ubúru Jerusalén. Láu ubáfu le jíchugubei jábutigu fádirigu nun, dátna sarágu jádaangiñe lánigu Búngiu furisunrugun, áni dan lé buri jasiadirúniwa lun jounwen, nugúya ában jádaangiñe ja abúdujabaña lun ítara lúba lan. ¹¹ Níjeinja dan, súfurigüda numútiña lún yebe jeyéedagun luágu jafiñen luágu Jesucrístu. Adáagua numúti meja cátei le tidan sun jalígilisin affñetiña, áni weíríti meja nigáñi joun darí lun neíbaajaniña chülú lidoun buri ubúru le díseti.

Labájüdagunya Páblo luágu lasálbarun

¹² ‘Ligía yebe cátei le gabügürübalina ubúrugun Damásko ában dan, jounajan jábutigu fádirigu. ¹³ Luágu úma, nurúeite, amídirugu, ába naríjin ában larúgounga siéluñeti, jéreti sügü lau larúgounga wéyu, ába ladúnraagun geyéounga náu jáu sun ja úarabaña núma. ¹⁴ Súngubei wagía, ába wáburujun meúrugun, ába nagáambun ában umálali ariñaguti nun lidan hebréo, le jerérun juríu. “Sáulo, Sáulo, ¿ca uágu beíbaajana? Basúfuriraguagüdüñatia búngua láu bamánjarun nun quei ladüga bágasu dan le líchaagun quíqui luágun cátei gágiriti.” ¹⁵ Ábati nariñagun. “¿Cátabusan, Nabúreme?” Ába lariñagun

nun. “Jesúsu áu, le guánarügü beíbaajabei. ¹⁶ Sarába, ráramabá, ladüga narúfudagunbei núngua bun lun besériwidun nun, lun geféen ban luágu le aríja báalibeí guetó lúma le lúnbei narúfuduni bun. ¹⁷ Neséfurabadibu jaweí juríu lúma jaweí ja mámabaña juríu, ja únbaña nouñajabu guetó. ¹⁸ Nouñajañadibu jámoun lun béfegechagüdüni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Nouñajañadibu joun, afíñe jamámuga nuágu, ferúdunawa lámuga jafígoun, íbija jamámuga alágan jádan ja jarúmagüda láañabaña Búngiu láu jafíñerun nuágu.”

Labájüdagun Páblo luágu luwádigimari

¹⁹ Ítara líña lubeíti, urúei Agrípa, ába nadügüni le laríñagunbei Jesúsu nun lídan le lasáíragunbei nun. ²⁰ Furúmiñe, ába napúrichijan joun ja Damáscobaña, aríñagatina joun lun jaságürijan luágu jafígoun, lun jagríbudun lun Búngiu, lun jadügün cátei buíti, arijúa lámuga luágu saansiguuali lan jagáburi. Lárigiñe, ába napúrichijani cátei méme le joun ja Jerusalénbaña, ja mámabaña juríu. ²¹ Ligía lébubei járügüdünina juríu témpulurugu, ába jálugun jáfarunina jilágubei. ²² Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja weírígubaña queísi ja únabugubaña, chülü lúmoun óra le. Maríñaguntina ní cáta joun gürígia bougudin lueí le uágubei jariñaga Moisés jáma profétagu luágu lasúsereduba lan— ²³ luágu lúnti lán meja lasúfuriruba lan Crístu, luágu lárigiñe lánme louñwen, ligíaba lan furúmiñeti ásaaruti jádaangiñe jiláaña láu íbágarí magúmuchaditi, luágu gíñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafíñeragüdüni Agrípa luágu Jesucrístu

²⁴ Lídan le laríñagunbalin Páblo cátei le burí lídan ladímurejan lueígiñegua, ába lagúaragun Fésto.

—¡Lülüjaali báu, Páblo! Lülügüda sarágu atúriajani báu.

²⁵ Ába louñabun Páblo, ába laríñagun.

—Málülünti náu, gumádimati, inárüni le naríñagunbei. ²⁶ Niján urúei Agrípa le subúdíjábubei lún burí cátei le buídu, ligía gayára lubeí nadímurejan ligíbugiñe, furáangu, ladüga chouuru náni luágu subúdi láani gíñe sun cátei le asúseredubei lun Jesúsu, ladüga máma cátei le adügüti arámudaguarügü. ²⁷ ¿Afíñetibu luágu le jariñagubei profétagu, urúei Agrípa? Subúdi numúti luágu afíñe ban.

²⁸ Ába laríñagun Agrípa lun.

—¿Jarítaguatibusan luágu bafíñeragüdúbadina lan luágu Jesucrístu ítara ufúresen?

²⁹ —Furése yebe, o darása yebe, amúriajatina lúma Búngiu, mámarügü buágu, jawágu gíñe sun ja añájabaña agáambana ugúñe, lun jayábin lun jafíñerun quei nugúya, úouga güiringüri jawágu.

³⁰ Lárigiñe Laríñaguni Páblo cátei le, ába lásaarun urúei, sará gíñe gumádimati úara túma Berenice jáma sun ja núnbaña ñi, ³¹ ába jadíñurun ñígiñe lun jadímurejan luágu cátei le. Jariñagati burí jámagua.

—Wügüri le, madügünti ní cáta le lúnti lafarún jilágubei lueígiñe, moún lumuti ní íbini leréderun furísunrugu.

³² Ába laríñagun Agrípa lun Fésto.

—Lun jamúga mamúriajan lan wügüri le lun lagúseragüdüni Augústo César, gayáraati jamúga lígirawagüdü.

27

Loúnajóun Páblo ubúrugun Róma

¹ Lídan le jaráanserunbei lun jóunajaniwa Itálioun, ába ledéregerún Páblo jáma ja jíbiri adaürütiña lábu laríjin ában súdaara gíríti Júlio, ligía gumándanbei lun jadámurin súdaara le gíríbei “lisúdaaranigu Urúei Augústo.” ² Ába wádinagun tídoun ában ugúnein ñübintu Adramítiogiñe lun Ásioun. Níñein giñe Aristarco wáma, le Tesalónica, Tesalónica ában ubúругu láni Macedónia. ³ Larúgan, ligía wachülürün Sidón, lídan fulásu ligía, buíti louseruni Júlio, le gumándan, Páblo, ígira lumúti lun bisída laniña lumádagu lúma lun jeténirun lun. ⁴ Lídan wáfuridun Sidóngiñe, ába wóudin ünabugiñe libíti ubóuju Chípre ladüga wabánrouñein lan garábali. ⁵ Ába wájiñuraguni barána ligibugiñe lubéyaari Cilícia lúma Panfilia, ába wachülürün lídoun fulásu le gíríbei Míra, ában ubúругu láni Lícia.

⁶ Ñi ladárrira gumándan ában ugúnein Alejandría teíbuga Itália, ába ladinagüdüniwa lun wasígiruni wawéiyasun. ⁷ Áfayajatiwa jámaru luágu sarágu wéyu, láu lénreengun wachülüra ligibugiñe ubúругu le gíríbei Gnído. Queíti wabánroun mémegili lubei garábali, ába wáfayajan ünabugiñe libíti ubóuju Créta, sügüina wagía ligibugiñe Salmón, ⁸ wasígira láu méme lénreengun laru laru, ába wachülürün lídoun ában ubúругu gíríti Buíti Fulásu, yaráfa lun ubúругu Laséa.

⁹ Féridijadiwa sarágu dan, dénychajaliti áfayajani baránaja ladüga yaráfaali lidáani luríbouga, sügüjali jafédun juríu le lánina ferúdu figou. Ligía lewéridirunbaliña Páblo, lariñaga joun.

¹⁰ —Aríja numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei giñe weféridiruni wabágari.

¹¹ Lubáragiñe ladügün gumándan gásu láu le lariñagunbei Páblo, ába lídin láu le lubeíbei tabúreme ugúnein lúma le abúgajabei. ¹² Queíti mabuídun lubei fulásu ligía lun lásügürün luríba dan ñi, ába jarítangun jíbe-ágei luágu buídutima lán yebe lun wáfuridun ñigiñe, lun waríjin ánjein gayára wachülürün Feníce, ában fulásu láni ubóuju Créta, lun wásügürüni luríbaniga ñi. Ñi Feníce, níjein barána lueígiñe núru lúma suédi.

Luríba dan baránaja

¹³ Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun laru laru Créta. ¹⁴ Málüti lueígiñe jáfayarun, ába láfurun ában nodísi jéreti, ¹⁵ ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdüwóungua lun lanügüniwa. ¹⁶ Ába wásügürün ünabugiñe libíti ában liraüraü ubóuju gíríti Cláuda, le ñi lubei mére lan láfujan garábali, ába wádinagüdünun tisálufun wagúne to atoújeina wabóun, láu ában lénreengun. ¹⁷ Lárigiñe wiñúrurun ugúneirugun, ába lásügüragüdüniwa gúrudu tábugiñegiñe ugúnein lun jagúragunun, derébugu támuga. Queíti janúfudebei luei jóudin adágara luágu sándala le gíríbei Síрте, ába jagídaraguní bíra, ába jígiraguágüdüwóungua lun lanügüniwa garábali. ¹⁸ Larúgan, quei jere mémegili lubei dan, ába jagúmeserun achágajei tíla ugúnein baránajóun, ¹⁹ luágu lürüwan wéyu, ába

jachágajani lídaangiñe tumégegung ugunéin baránajoún láu jájabu guánarügü.
²⁰ Maríjintiwa wéyu ni warúguma lídan sarágu wéyu, láuti oúnwenbun luríban dan le, féridi wamáali waffínen luágu weséfuruba lan.

²¹ Queíti sügüjadiwa lubei sarágu dan meíginga, ába laráramun Páblo wádan, ába laríñagun.

—Wügüriña, aríñagatiná yebe jun lun mayábin wamá Crétagiñe, buđutimaati jamúga luei wasúfuriruni dáñu le, áni féridi wamei wálagu.

²² Gagúraasun jumá, úabei ni ában jídaangiñe oúweti, láu sun teféridiruba lan ugunéin. ²³ Chülüjali ában láni Búngiu ánjeli númoun áriebe to, loúnagüle Búngiu le Nabúreme le giñe únbei nesériwida, ²⁴ laríñajare ánjeli ligía nun. “Manúfudedabá, Páblo, ladüga barúfudaguba búngua ligíbugiñe urúei César Augústo, áni badügaba leséfuraña Búngiu sun ja tídaanbaña ugunéin búma luei oúweni.” ²⁵ Gagúraasun jumá lubeiti, ladüga jeménigitina luágu Búngiu, áni choúru numúti luágu ítara lúba lan quei laríñaguni ánjeli luágu nun, ²⁶ láu sun, wadágaruba lan luágun ában uboúju.

²⁷ Bián dimáasu wáu luágu waweíyasun, lubáranarugúñadiwa Ádria, labánreinja mémeñadiwa garábali, ligía, amídi áriebe, ába jasándirun mádulungu luágu achülüreina wáña lan luágun múa. ²⁸ Ába jamísurajani lujúlilin dúna, sanweín ugúdi lujúlilin, ábaya jamísurajan jabáruaguóún mémeraü, gádürü-wein-díisi ugúdi. ²⁹ Léti janúfude luei jabúguchun luágu dübü, ába jágurun gádürü oúnguru tiyúnagiñe ugunéin, ába jagúrabajan larúgadun láu idíjeri. ³⁰ Súnti dan le, añája mádulungu asáminara lun jeséfuragun jóungu láu jeibaagun tídaangiñe ugunéin, ába jagúmeserun aráriragúdoún salúfu dúnarugun, jadüga camá jágura oúnguru tígirigiñe ugunéin. ³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugunéin, jugúya siñábei jeséfurun.

³² Ábati jíbuguni súdaara tugúrurudun salúfu, ába jígiragüdünnun dúnarugun.

³³ Lubá larúgan, ába laríñagun Páblo joun süngubei lun jeígin, laríñaga joun.

—Bián dimáasu guetó lueigiñe marúmugun jumá buídu, meígin sarágu, ladüga idíjeri le juágubei. ³⁴ Ayúmuraguatina jun lun jeígin, líchuguba érei jun lun jeséfurun. Choúru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanügün ában fein lújaburugu, ába líchugun eteíngiruni lun Búngiu jagíbugiñe süngubei. Ábati lagúbachagunun, ába leígin. ³⁶ Ába járügüdün ja jíbiri gurásu, ába giñe jeígin. ³⁷ Bián-sáñadiwa ürüwa-wein-díisi-sísi gürígia tídan ugunéin. ³⁸ Dánti le jóujúña quimúle, ába jáguruni túrigu baránajoun lúntima tawáladagun ugunéin.

Tabúluchun ugunéin

³⁹ Dan le larúgadunbei, ibídiñeti fulásu le ñi jabei mádulungu joun, ába jaríjin ában beidi gebéyaariti, ába jóuchun lun janügünun ugunéin ñíjin. ⁴⁰ Ába jíbuguni lagürüga oúnguru, ába jígiruni baránaja, ába jasílacürüni fágaayu le esériwidubei lun jabúgurunun ugunéin. Ábati jawéinragüdüni lúgubu bíra, ába tagúmeserun ugunéin ayárafajoúa lun láru béya. ⁴¹ Ába tídin lídoun ában fulásu le ñi lubei biángua lan ébeeni, ába tadágarun, siñá lánjingichun tígiri ni murúsun, ába tagúmeserun aboúchagua tiyúnagiñe, le lére lugúdi barána. ⁴² Ába yebe jabúseerun súdaara jáfaraguniña adaürütiña jílagubei luei janúrajan áfulijeina. ⁴³ Ánjein le gumándan, quei busén lubei leséfuruni Páblo, mígirunti

lun jadügüni súaara le jarítagubei. Ábati laríñagun lun lan jachúbaragun ja gáfulijadibaña baránajoun furúmiñe lun jachülürün múarugun, ⁴⁴ jáme jíbiri, jóudinme ligibuagu buri fuláansu lúma buri tife ugúnein. Ítara líña jachülürün sùngubei múarugun séfuñu.

28

Páblo luágu uboúju le gíribei Málta

¹ Dan le séfujadiwa sun wagía láru béya, ligía wasúbudiruni luágu Málta lan líribei uboúju ligía. ² Buíti jóuseruniwa güriía ja aganoúbaña ñi, ába jáfúragun ában oúnwenbun wátu quei dilíga lubei áni niján júya ájuya, ába jamísurajaniwa sun wagía lun wabácharagun. ³ Ábati labúdajan Páblo wátu mábeiti, líchuguñein yebe wáturugun, ligía táfuridun ában jéwe tanúraña lueí lára wátu, ába tárügüdün luágu lújabu, ába tágürüni. ⁴ Dan le jaríjinbarun lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügüri gáfarajati wügüri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúsereduntí ni cáta lun. ⁶ Agúrabiña yebe sùngubei láludun lújabu, o lábúrujan lan ouwe. Lílúwagu jagúrabajan, dan le jaríjinbei luágu masúseredun lan ní cáta lun, ába lasáansirun jarítagun, ába jagúmeserun aríñaga luágu ában lan búngiu Páblo.

⁷ Yaráfa lun fulásu ligía, ñiñein lufúlasun ában wügüri le weírigutimaabei lídan sun uboúju ligía, Públio líribei, resíbi lumútiwa lúbiñe, seríwi láwa buídu luágu ürüwa wéyu. ⁸ Roun líñáti lúguchi Públio láu sándi, abírúau, lúma denési. Ába lídin Páblo aríjei, lásun layúmúragun lun Búngiu luágu, ába líchuguni lújabu luágu, ába lareidagun. ⁹ Lárigiñe lira, ába giñe jayábíngua jíbiri sánditiña ja lídaanbaña fulásu ligía, ába jareidagun. ¹⁰ Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachülürün dan lúnya wádinagun lun wasígiruni wawéiyasun, ába jíchuguni sun le wemegeirubei woun lun wawéiyasun.

Lachülürün Páblo ubúrugun Róma

¹¹ Lárigiñe ürüwa játi wáu luágu uboúju ligía, ába wádinagun tídoun ában ugúnein to eréderuboun ásügürei luríbouga ñi luágu uboúju ligía. Alejandríana ugúnein tugúya, ñiñanu jayáwa bián sándu luágu tigíbu ugúnein tugúya, Cástor lúma Pólux. ¹² Ába wachülürün ubúruyu Siracúsa, ába weréderun ürüwa wéyu ñi, ¹³ ñigiñe wasígira láru láru dari wachülürün ubúruyu Régio. Larúgan, ába láfujan suédi, luágu libíaman wéyu ába wachülürün lídoun líraúraü aüdü le gíribei Puteóli. ¹⁴ Ni wadárira átiri afíñetiña, ába jamísurajaniwa lun weréderun ában dimáasu jáma, lárigiñe, ába wígiragüdün lun ubúrugun Róma. ¹⁵ Agámbaña afíñetiña ja Rómabaña wawágu luágu awánte lan, ába jóudin wabároun, jíbiri chülü lúmoun fulásu le gíribei Fóro, le luágubei úma gíríti Ápio, jíbiri, dúnguatiña wáma lídan fulásu le gíribei Ürüwa Jában Chülüdügütiña. Dan le laríjinbaliña Páblo, ába líchugun eteingiruni lun Búngiu, ába lárügüdün gurásu. ¹⁶ Dan le wachülürünbei Róma, ába ledéreguniña gumándan adaürütiña lun jábuti oúnigirutiña, ánjeinti Páblo, ígira lumúti lun leréderun lábúgua láu ában súaara oúnigirei.

Lapúrichijan Páblo Róma

17 Ūrūwa wéyu lárigiñe lachülürün Páblo, ába loúnajan jawágu juríu weírigutiña ja Rómabaña, dan le adámuriguaña, ába laríñagun joun.

—Nidújeñu, láu sun madúgün nan ni cáta wuríbati joun juríu, ni lun le uágubei jéchuda binádu wagübürigu, derégawatina dáúwañu joun Rómána ubúrugu Jerusalén. 18 Lárigiñe jálügüdagúnina, álugatiñá yebe jígiragüdünina ladüga madári jamá nidúnrun le lúnti náfarúniwa jílágubei lueígiñe, 19 májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásiñun nun. 20 Ligía lubeíti lébubei nouúnajan juágu lun naríjinün lúma lun nadímurejan jun, ladüga lueígiñe cátei le uágubei weménigida wagía Israelítagu anája lubei gürágu láu güiringüri le.

21 Ábati jaríñagun lun.

—Wagía, merésibirúngidiwa ni ában gárada buágu Judéagiñe, úagili giñe ni ában wapaísanu jádaangiñe ja núbinbaña ñígiñe aríñaguti wuríbati woun buágu. 22 Buséntiwa jamúga wagáambuni ca lan harítagebei, ladüga subúdi wamúti luágu adímurejóia lan wuríba luágu iséri adámurini le, le lánina lémeri Jesúsu, lídan sun fulásu.

23 Ábati jírídun ában wéyu lun, ába jachülürün sarágu güriágu le ñí lubei lagánawa Páblo. Ába ladímurejan joun lúmagiñe bináafin darí güñoun luágu larúeijan Búngiu. Loučhun lun laffieragüdüniña luágu Jesúsu lan asálbaragülebei le jagúrabajabei láu layúsuruni lílúruden Moisés lúma le jabürüjabei profétagu. 24 Jíbiri, afíñetiña luágu le laríñagubei Páblo, jíbiri mafíñetiña. 25 Queíti múaradun jamá jámagua luágu jarítagan, ába jagúmeserun ñüdúngua, ábati laríñagun Páblo joun.

—Ligía laríñagunbei Sífiri Sándu joun binádu wagübürigu lídaangiñe proféta Isaías.

26 Beíba, baríñagame joun güriágu ja juríubaña.

Jugúya, jagáambuba ában ugánu sarágu dan, úabei gunfaráanda jumáni laníchigu dímuñe le jagáambubei.

Jaríjuba sarágu cátei, meféenbadün luágu,

27 ladüga deréeru janígi güriágu ja, áni wuríbati jagáambun,

darú jamuti jágu, luei jaríjini laníchigu cátei le jaríjubei,

úati giñe gunfaráanda jamáni cátei le jagáambubei,

derétu giñe janígi,

máluajan jamútina lun nareídaguagüdünun jawáni.

28 Subúdi jumei luágu óunaja láali lan Búngiu ugánu luáguti Jesúsu le méme Wasálbaragülebei joun ja mámabaña juríu, áni jagía, jánjaruba lun.

29 Dan le laríñagunbei Páblo ítara, ába jóúdingua juríu, adímurejeina jámagua luágu cátei le.

30 Reídeiti Páblo bián irúmu dayáruti tídan lúban ájayajoútu, resíbi lumútiña sun ja ñüdünbaña aríjei. 31 Apúrichijati luágu larúeijan Búngiu láu furáangu, arúfudaja ligía luágu Wabúreme Jesucrístu, mebérésejanga ni ában lun.

LIGÁRADAN PÁBLO JOUN RÓMANA

Labürüjan Páblo joun tлана liglisi to Rómaboun

¹ Anája áu, Páblo, nabürüjañoun gárada to jun, jugúya lánigu Búngiu ja aganoúbaña ubúrugú Róma. Aban esériwiduti lun Jesucristu áu, anúadira lumútiña Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le aráanse lálalbei jaba gürigia.

² Sabúdigüda lumúti Búngiu ugánu le lúmagiñé meja binárú jádaangiñe profétagu, bürüwati le jadímurejabei tidan Lerérun Búngiu. ³ Nübinti asálbaruni ligía woun lídaangiñe Wabúreme Jesucristu. Gürigia ubouáguna Jesucristu, Búngiu méme giñe. Queisi gürigia, jádaangiñeti méja lufámilian Urúei Davíd Jesucristu, ⁴ arufudúati luágu Liraü lan Búngiu láu luweírin miláguru le ladügübei láu lásaaragüdüni Jesucristu lídaangiñe ouweni. ⁵ Fuleísei lumútiwa Búngiu lídaangiñe Jesucristu lun loúnajaniwa lídan líri lun wasúbudiragüdün joun gürigia luágu queisi Wasálbaragüle lídan sun fulásu, gayára lámuga jaffñerun luágu, adüga jameíme le lubeíbei. ⁶ Anjünjein jagánagua gürigia jagía, jugúya le únbei lagúara Búngiu lun lánigu jumá Jesucristu.

⁷ Nabürüjaña lubeíti jun, jugúya le aganoúbei ubúrugú Róma, ja jínsiñebaña lun Búngiu, wa ligía jun lun jabágaridun ában ibágari derégeguañu júngua lun. Ibíja jumá abíniruni lúma darángiläü lúmagiñe Wáguchi Búngiu lúma lúmagiñe Wabúreme Jesucristu.

Buséti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírin neteíngiruni Nubúngiute lídaangiñe Jesucristu juágu, sun jugúya, lugúndun adímurejoúati luágu jaffñen luágu Jesucristu lídan sun fulásu. ⁹ Áni Búngiu, le únbei nesériwida táu sun nanígi apúrichijei ugánu luáguti Liraü, geféenti luágu luweírin nayúmuragun juágu súnwandan lídan nayúmuragun lun. ¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubeí lugúndaanbei. ¹¹ Lugúndun buséntina naríjinün lun níderagunün lídan jaffñen, lúntima derégüdagu jumá, ¹² lun giñe wíchugun gurásu wádaangua láu affíneni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álugaadina nídin lun níderagunün lídan jawáanserun lídan jeíbugun lúma Búngiu, queisi naríjini jawáanserun jíbiri affíñetiña lídan buri ámu fulásu. ¹⁴ Lúnti níderaguniña sun gürigia, dándu ja chúlúguatiña queisi ja machúlaaguntiña, dándu chu táu queisi ibídiougua táu. ¹⁵ Lueígiñe lubeíti noubadina, buséntina giñe lun napúrichijani ugánu luáguti Wasálbaragüle jun, jugúya le aganoúbei ubúrugú Róma.

Lubáfu ugánu lánina asálbaruni

¹⁶ Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja affíñebaña luágu, juríu furúmiñe, lárigiñe, ja mámbabaña juríu. ¹⁷ Arúfuda lumúti ugánu ligía woun ída líña lan larícharaguagüdüniña Búngiu gürigia ligíbugiñe, lun gayáraabei lan lerésibiruniña queisi lánigu. luwúyeri igáburi ligía, láurügü laffíñerúniwa

luágu, libijúa. Ítara líña tariñaguni Lerérun Búngiu. “Le gürigia le richáguabei ligíbugiñe Búngiu láu lafiñerun luágu, libíjubei ibágarí magúmuchaditi.”

Jadúnrun gürigia ligíbugiñe Búngiu

¹⁸ Aríja wamúti láburujan lanárime ligáñi Búngiu siélugiñe jawágun sun gürigia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárún Búngiu, lurúma jaríban. ¹⁹ Subúdi jamúti le gayáraabei lasúbudirúniwa luágu Búngiu buídu buídu lugúndun ligía guánarügü arúfuda láali joun, ²⁰ le marijínbei luágu Búngiu, gayáraati lasúbudirúniwa láu buri cátei le ladügübei. Arijúaaali furáangu lúmagiñe lagúmeserun ubou luágu Búngiu lan ligía, luágu giñe Súnti Gabáfu lan ligía lun súnwandan. Gadúnrunjaña lubeíti luágu jaríban, ²¹ lugúndun láu sun subúdi jamáni Búngiu ítara, míchugugiña inébesei lun queisi Búngiu, meteíngirun jameí. Queisi libídiouniga láu ligáburí jarítagan luágu Búngiu, féridi jamúti murúsun larúgounga luágu Búngiu lé meja jabíjibeí. ²² Láu sun aríñaga jamá luágu chu lan jáu, ibídiouguati jáu, ²³ lubáragiñe jájuduragun lun Búngiu le weírigubei, le mouwedadibeí, jájuduraguatüga joun jayáwa gürigia ja goúwedaditiña, lúma giñe joun jayáwa dunúru, jéwe jáma anímaalu ja gádürüga tugúdi.

²⁴ Ligía ígira láaña lubeí Búngiu láu luríban ayúmajani le gádaanbaliña, darí lún buri jadügün cátei buri nibúsigarídünati jámagua. ²⁵ Ítara líña ligáburí jabágaridun lugúndun mafiñerun jamá luágu inárüni luáguti Búngiu, jafiñera luágu iyéeni, jájuduragua láu inébesei lún buri cátei le ladügübei Búngiu lubáragiñe jamúga jájuduragun lun Búngiu, le gadúnabei inébesei súnwandan. Ítaralá.

²⁶ Ligía ígira láaña lubeí Búngiu lun jadaágun cátei nibúsigarídünati, ásta würiña adaágutiña cátei jáma würiña jáledi lubáragiñe jamúga jagámaridun wügüri queisi lubúdubu. ²⁷ Ítara méme giñe ígira jamáali wügüriña jayúsurun würiña lun jayúsuragun joúngua. Adaágutiña wügüriña cátei buri nibúsigarídünati jámagua, ábati jasúfuriruni lafáyeirujaja jawíye jawoúgua.

²⁸ Queisiti mabúseerúnjaña lan jíchuguni lilúgaarun Búngiu lun, ígira láañati láu lagübüri jasáminan, lun jadügüni le mouñ lubei jadügüni. ²⁹ Buin jáña láu sun luwúyeri maríchaü, salúfuri, wuríbani, meménijabuni, iyéreejabüni, gimúgaü, áfarajadi, lanígiwa wuríbu, ayéeraguní, ibíbuni, marásualugu. ³⁰ Adímurejatiña wuríba jawágu jíbiri gürigia, iyéreeguti Búngiu joun, minébenejabutiña, barüguatiña joúngua, pántatiña. Gachügütiña lun jaságarun iséri buri cátei wuríbati, mabájüdün jamútiña jagübürigu, ³¹ ibídiouguati jáu, magúnfulirun jamúti jerérun, mínsiñejabutiña ni ca un, úati ferúduna jamá, magúdemejabutiña. ³² Subúdi jamúti le lariñagubei Búngiu buídu buídu, subúdi jamúti luágu ja lan adügüti buri cátei le, lúnti lan joúnwen lueígiñe. Láu sun líra, adüga méme jamúti, darí lun gúnda jamá dan l jasáminan, lun jadügüni lee jaríjin ámu gürigia adügei.

2

Agúseragüdati Búngiu láu inárüni

¹ Ligía gadúnrun lubeí le adímurejabei luágu le ladügübei ámu, cáteiñein lan, lugúndun dan le ladímurejan luágu wuríbani le ladügübei ámu, lichuguña guánarügü dúru luouúgua, lugúndun líbe méme giñe cátei wuríbati ligía ladügübei. ² Subúdi wamúti luágu láu lan inárüni lagúseragüda Búngiu dan le lasíadiruniña ja adügübalin buri cátei l jasáminan, lun jadügüni lee.

³ Bugúyati le adímurejabei jawágu ja adügúbalin buri cátei wuríbati le, áni ligía méme giñe badügübei, ¿jarítaguatibu funági luágu beséfuruba lan luei ligáñi Búngiu? ⁴ ¿Ódi mebéresentibu láu lareíni Búngiu le magúmuchadibei lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburi, máma lun basígirun affigounja? ⁵ Derétu banígi, májatibu basáansiruni bigáburi. Ligía abúnja lubei agánwoundagüda lafáyeija bífigoun lubáme luwéyuri lagúseragüdün Búngiu dánme liábin lun líchuguni lísiadin le richábei, ⁶ dánme le lafáyeiruni cáda ában según le ladügübei. ⁷ Líchuguba ibágari magúmuchaditi joun ja áluajabalin uweiriguni, inébesi, lúma cátei lé buri magúmuchaditi yágüta siélu láu jadügüni le buídubei súnwandan ya ubouágu. ⁸ Ánjaña sun gürígia ja magáambadibaña lun Búngiu, ja májabaña lun jafálaruni linárün Búngiu, jafálarai wuríbani, lafáyeirubaña Búngiu láu sun ligáñi. ⁹ Níjeinbei asúfuriruni lúma igárigu joun sun ja adügúbalin le wuríbabei, joun juríu furúmiñe, lúma giñe joun ja mámabaña juríu. ¹⁰ Ánjeinti joun sun ja adügúbalin le buídubei, líchuguba Búngiu uweiriguni, inébesi, lúma darángilaü, juríu furúmiñe, lúma giñe joun ja mámabaña juríu. ¹¹ Lugúndun ában lan lanügüniña Búngiu sun gürígia. ¹² sun ja affigounjabaña masúbudirunga jamei lilúrudun Búngiu le ledégerubei joun gürígia lídaangiñe Moisés, jagúserawagüdüba bougudin luei lúrudu ligía, tídiba jawáni máfiougatin. Játi affigounjabaña láu sun subúdi jamáni lilúrudun Búngiu, jagúserawagüdüba láu lúrudu ligía, tídiba giñe jawáni máfiougatin. ¹³ Lugúndun máma ja agáambarügúbalin lúrudu richáguabaña ligíbugiñe Búngiu, anáti ja agúnfulirubalin. ¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadügüni le lubeiñe Búngiu láurügü lariñagun jarítagun guánarügü joun luágu le buídubei lúma le wuríbabei. ¹⁵ Láu jagáburi, arúfuda jamúti luágu níjein lan lilúrudun Búngiu bürüñu tídan janígi, arúfuda tumúti janígi líra, áni lariñagubei jarítagun joun ánjein gadúnrun jabeí lúmoun madúnrun jamá. ¹⁶ Luágume wéyu le lagúseragüdüniña Búngiu sun gürígia lídaangiñe Jesucristu, larítaguba luágu sún buri cátei le, ladüga lagúseragüdübei giñe ásta cátei lé buri arámudagüabei tídan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárüni Bubúngiutebei. ¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei. ¹⁹ Jarítaguatibu búngua luágu gayára lan badúndejan maríjintiña lídoun úma buíti lúma luágu gayára lan bíchugun larúgounga joun ja eibugubaña lídan lubúriga. ²⁰ Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni úma joun ja isérigiñabaña lídan jafiñen, queísi barítagun luágu ibíja báani sun subúdi lúma inárüni lídan lilúrudun Moisés. ²¹ Wel, ánjein lubeiti arúfudaja bubei joun ámu, ¿cági uágu marúfudajan bubei bun guánarügü? Ánjein apúrichija bubei luágu lúnti lan míwerujoún lan, ¿cági uágu bíweruja? ²² Ánjein aríñaga bubei luágu moún lumuti lan jagámaridúniwa jámari gürígia maríeitiña, ¿cámegi badügei? Ánjein iyéreegu lubei cátei lánina sándu bun, ¿cámegi bádaragua búngua lídoun buri cátei jánina sándu láu bíwerujani tirísin jalígílin? ²³ Pántatibu láu lilúrudun Búngiu, ába bíchugun minébesi lun Búngiu láu magúnfulirun báani. ²⁴ Tinárün

Lerérun Búngiu dan le taríñagunbei. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adúga jumúti jugúya juríu igáburi le circuncisión lé meja liseini lidáradun Búngiu jáma lánigu. Buíti igáburi ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá, manügúnti circuncisión ni cáta jun, queígubeirügü madügúniwa lan. ²⁶ Gürígia ja mámabaña juríu, ánjein jadúga buri cátei le lubeíbei lilúrudun Búngiu, janügúba queísi lánigu Búngiu láu sun merésibirun jamáni circuncisión. ²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalíbei circuncisión, ja magúnfulirunbalin Lerérun Búngiu, láu sun jun lan labúrdúwa. ²⁸ Le juríubei le tímataati, máma bougudigiñerügü libíti juríu lan, máma giñe láurügü wadügün cátei le bouguditi wabíti lánigu wamá Búngiu. ²⁹ Láu wafálaruni Búngiu táu sun wanígi, lánigu wagia le tímataati, wafaaguba táu sun wanígi lun wadügüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligía buídubei ligíbugiñe Búngiu íbini jarítagn gürígia luágu mabuídun lan.

3

¹ Queísi ítara líña lubeí, ¿jalíañeinti jagáñiragüle gürígia lueígiñe juríu jamá? ¿o cági lubuidúña lerésibirúniwa circuncisión? ² Sarágu, áni gíbeti giñe lébuna. Furúmiñeti cátei, rúlumuti Búngiu lerérun joun juríu. ³ Ánjaña ñi jádaangiñe juríu, múaraantiña lúma Búngiu, ¿magúnfulirunbei funági Búngiu láu lerérun ladúga líra? ⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia ubouágu. Taríñajare Lerérun Búngiu. Babájúdúba queísi richáti lídan le baríñagubei, áni buídubei báfuridun dánme le bagúserawagúdn.

⁵ Ábanya álügúdajani. ánjein seríwi lubeí luríban wagáburi lun larúfuduni luágu richágu lan Búngiu, ¿cábagi waríñaga? ¿Maríchatí funági Búngiu lugúndun larúfuduni ligáñi luágu luríban wagáburi? (Nadímurejañatia queísi gürígia.) ⁶ ¡Máma líña! Lugúndun lun jamúga múaran lan Búngiu, ¿ída líña jamúgagi lagúseragúdníña gürígia?

⁷ Ánjein giñe seríwi lubeí wayéeni lun weírigutimá lan linárün Búngiu, ¿cáti uágu laríñawagúa wawágu luágu gafígoun wamá? ⁸ ¿Lúnti lubeí jamúga ladügün wuríbani lun laríjouníwa le buídubei? Niján cátei le jaríñagubei sarágu gürígia luágu ligía lan warúfudajabei. Gürígia ja aríñagubaña ítara, lúnti jamúga jasiadirúniwa.

Sun wagía gadúnruntiwa ligíbugiñe Búngiu

⁹ ¿Ída líñági? ¿Buítimaatiwa wagía juríu sügü jáu gürígia ja mámabaña juríu? ¡Uá! Lugúndun arúfuda wamáali luágu dándu lan juríu queísi máma juríu labugiñeñanu lubáfu figou. ¹⁰ Taríñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrügü,

¹¹ úati ni ában ánjaruti lun gunfaránda lan,

úati ni ában áluajati Búngiu.

¹² Yuríguaaña súnigubei, ñúdünjaña lídoun féridi.

Úati ni ában adügüti le buídubei, ni íbini ában.

¹³ Eyéeraguatiña láu jayúma,

júnren líña jayúma lun jadímurejan lagübüri dimúrei le mínsifeguti queísi limínsifegun líjeme umúajaü júnren lárigiñe líchugúniwa jiláali ñíjin. Yúsu jamúti jayúma lun jagádeirun jíri gürígia furése queísi láfarajan lupeísi ní jéwe.

¹⁴ Anábajani rügüñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barüti jagáburi gürínguaü lúma igárigu,

¹⁷ áni ibídiñeti úma lánina darángilaü joun.

¹⁸ Marítagungubeítina luágu lanúfudewa lueí Búngiu.

¹⁹ Subúdi wamúti luágu sun lan le lariñagubei binádu lilúrudun Búngiu, joun lan ja lábugiñebaña lúrudu ligia lariñagei, lun jasúbudiruni gürígia jagía luágu gaffigoun jamá. Ítara líña lubeíti, gadúnrun jamá sun gürígia ligíbugiñe Búngiu, dándu juríu queísi ja mámabaña juríu. ²⁰ Lugúndun úabei ní ában eréderuti richágu ligíbugiñe Búngiu lueígiñerügü ladügüni le lubeíbei lúrudu, lúnrügü lasúbudiragüdüni lúrudu woun luágu gaffigoun wamá lesériwida.

Lídaangiñe afñieni liábin asálbaruni

²¹ Guetóti arúfuda láali Búngiu woun ída lúba lan ligáburi gayára lan weréderun richáguañu ligíbugiñe boúgudin lueí lúrudu lé meja líchugubei lídaangiñe Moisés. Gayáraati wasúbudiruni líra láu walíjanun lílburuna to meme lílúrudun Moisés, túma jalíburun profétagu. ²² Láu wafíñerun luágu Cristu, gayára lan weréderun richáguañu ligíbugiñe Búngiu, áni ában lan ladügüni Búngiu líra joun sun gürígia, ²³ lugúndun afígounjaaña sun gürígia áni siñáti lagúndaarun Búngiu jáu. ²⁴ Láu lareíni Búngiu, resíbi lumútiña sun gürígia queísi lánigu, mafáyeijaanga jagía luágu, lugúndun fáyeijali Cristu luágu waffigoun lun gayáraabei lan weréderun richáguañu ligíbugiñe Búngiu. ²⁵ Adúgati Búngiu lun lébunabei lan ferúdn Cristu láu loúnwen luágu waffigoun, áni lídaangiñe wafíñerun luágu queísi Wasálbaragüle liábin ferúdn woun. Láu loúnwen Cristu queísi afáyeiragülei luágu figoú, ába larúfuduni Búngiu luágu úaragua lan áni iyéreeguti figoú lun. Ába lachíbuni líta Cristu jaffigoun gürígia já meja aganoúbaña lídan dan le sügüjalíbei, le uágubei mafáyeijagüdüni láañabaña lan, ²⁶ chibá lumuti giñe jaffigoun ja aganoúbaña lídan buri dan le, lun larúfuduni luágu úaragua lan, áni sun ja afíñebaña luágu Jesucristu queísi Jasálbaragüle barü lumútiña queísi úaraguatiña.

²⁷ Queísiti ítara líña lubeí, ¿cáti asúseredubei lun japántan gürígia luágu lubuídn jagáburi? Gumúguati. ¿Cági uágu? Lugúndun lun jamúga gayára lan wasálbarun láu lubuídn wagúnfulirun lúma binádu lilúrudun Búngiu, gayáraati jamúga wanáangun woúngua, queísi sálbañu wáña lubeí láurügü wafíñerun luágu Cristu, gumúga lébuna wanáangun woúngua. ²⁸ Subúdi wamáali lubeíti buídu luágu resíbi láani Búngiu gürígia le afíñeti luágu Cristu queísi gürígia richáguati, mebérésengúga ánjein gúnfulijali lubeí lúma lílúrudun Moisés lúmoun magúnfulirungili lan.

²⁹ ¿Juríu rügüñanu funági Gabúngiutei Búngiu? ¿Ma funági giñe Jabúngiute ja mámabaña juríu? Jabúngiute giñe, ³⁰ lugúndun ában rügüñein Búngiu, le erésibirubaliña sun gürígia ja afíñebaña luágu Jesucristu queísi Jasálbaragüle, mebérésenga ligia ánjein resíbi jabálin circuncisión lúmoun merésibirun jamáni. ³¹ ¿Wayúsuruñein lubeíti afíñeni luágu Cristu lun warúfuduni luágu mebégi lan binádu lílúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligia.

4

Jémpulu luágu Abrahám

¹ ¿Cábati waríñaga luágu Abrahám, le binádu wáguchi, wágia juríu? ² Lun jamúga lueígiñe lan ladügün cátei buíti lerésibirei Búngiu queísi ában gürígia richáguati, gébunati jamúga lapántajan, máma ligíbugiñe Búngiu. ³ Tariñajare Lerérun Búngiu. “Afiñetí meja Abrahám luágu Búngiu, luágu lafiñen lerésibirei queísi wügüri richáguati.” ⁴ Dan le ladügün gürígia ában wadágimanu, fáyeiti le libíjubei lebégi luwádigimari, máma edéweejani. ⁵ Ánjeinti gürígia le asábaruti lídaangiñe lifigoun láurügü lafiñerun luágu Búngiu le erésibirubaliña gafígountiña, lerésibirubei Búngiu queísi ában gürígia richáguati luágu lafiñen, anáti líra, edéweejani. ⁶ David guánarügü adímurejati luágu jagúndan gürígia ja lerésibirubaña Búngiu queísi richáguatiña luágurügü jafiñen, mebérésenga ligía ca lan meja jadügübei. ⁷ Laríñajare David.

Gúndaatiña gürígia ja ferúduna lubáña Búngiu jaríban, áni chibáwa ligía jafígoun.

⁸ Gúndaati gürígia le lanügübei Búngiu queísi gürígia mafígounjaangili.

⁹ ¿Joúnti rügüñein funásan ja erésibirubalin circuncisión, ódi joúnti giñe ja merésibirubalin? Joúnti sun jawúyeri gürígia ugúndani ligía. Ariñagaadiwa luágu resíbi láani Búngiu Abrahám queísi wügüri richáguati, luágu lafiñen.

¹⁰ ¿Ída bugági lerésibirei, lárigiñe lerésibiruni circuncisión ligía ódi lubáragiñe? Máma lárigiñe, lubáragiñe. ¹¹ Lárigiñe larúfuduni Abrahám lafiñen luágu Búngiu, ligía lerésibiruni circuncisión queísi seini luágu resíbi láali lan Búngiu queísi wügüri richáguati ladüga lafiñen luágu. Ítara líña giñe liábin Abrahám lun jáguchibeí lan sun ja afiñebaña luágu Búngiu merésibirunga circuncisión, áni resíbi lumútiña giñe Búngiu ítara queísi richáguatiña. ¹² Jáguchi giñe ja resíbi jamáalibeí circuncisión Abrahám, ja afiñebaña luágu Búngiu queísi lafiñerun Abrahám lúmagiñe lubáragiñe meja lerésibiruni circuncisión.

Gúnfuliti Búngiu láu lerérun

¹³ Ariñagati meja Búngiu lun Abrahám luágu líchugubei lan uboú lun jáu sun linébaanfaangu queísi jalágaante, máma ladüga lagúnfuliruni Abrahám lilúrudun Búngiu líchugúa dimúrei le lun, ladüga lafiñerun luágu Búngiu, ába lerésibiruni Búngiu queísi ában wügüri richáguati. ¹⁴ Lun jamúga já rügüñanu lan íchugubalin jeménigi luágu jagúnfulirun lúma lilúrudun Búngiu erésibira alágan, málati lubeíti jamúga jafiñerun ja eménigidubaña luágu jafiñen luágu Búngiu lun jerésibiruni. Málati jamúga giñe dimúrei le líchugubei Búngiu luágu alágan lugúndun lidan linárün cátei, mabáfutiña gürígia lun jagúnfulirun lúma lilúrudun, ¹⁵ barürügü lumúti lilúrudun Búngiu ligáñi jawágun gürígia luágu magúnfulirun jamáni. Ánjein le ñí lumuti úa lan lúrudu, úati giñe dúru luágu ladúraawagún.

¹⁶ Ligía, lun lubeí derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani luágurügüti afiñeni. Mámarrügü joúnti ja lágugiñebaña lilúrudun Búngiu le líchugubei joun juríu lídaangiñe Moisés dimúrei ligía, joúnti giñe sun ja mábabaña juríu áni máma giñe lágugiñeñanu lúrudu ligía, ába jafiñerun luágu Búngiu queísi lafiñerun Abrahám luágu. ¹⁷ Ligíbugiñe Búngiu, ñúbinti lubeíti Abrahám lun wáguchibeí lan sun wágia le afiñebeí luágu Búngiu, queísi tariñagun Lerérun Búngiu. “Adüga náadibu lun jáguchi ban sarágu mútu.” Gabáfuti Búngiu lun ladügüni

líra queísi gabáfu lan lun líchugun íbágari joun jiláañá, njeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaü lan ladüga weíyaali lan, weíya tugúya Sára, affñeti dán meja le laríñagubei Búngiu lun luágu ítara lúba lan jibe ladügawagun queísi warúguma. Ába lasúsereḁun ítara lun jáguchibeí lan sarágu mútu. ¹⁹ Meféridirun lumúti laffñen luágu dimúrei le laríñagubei Búngiu lun, láu sún meja yaráfaali lan lun lagúnfulirun san írúmu, áni weíyaaru gñe Sára lun tagáraüdü. ²⁰ Maloúguadunti laffñen luágu dimúrei le laríñagubei Búngiu lun, weíritimáarügüti laffñen. ²¹ Rúti uweíríguni lun Búngiu láu ában ichouruni le tímatimaati luágu gabáfu lan Búngiu lun ladügüni sun le uágubei laríñaga. ²² Ligía lerésibirunbalin Búngiu queísi wügüri richáguati, luágu laffñen.

²³ Cátei le, luáguti lerésibiruniña Búngiu gürígia luágu jaffñen, mámarügü luágu Abrahám labürüjóa, ²⁴ labürüjóuña gñe wawágu. Lugúndun luágu waffñen, resíbi lumútiwa gñe Búngiu queísi richáguatiña, wagía le affñebeí luágu le ásaarağüdübalin Wabúreme Jesúsu lídaangiñe oúweni. ²⁵ Jesúsu le edéregerúabei lun loúnwen luágu waffigoun, ába lásaarun lídaangiñe oúweni lun larúfuduniwa richáguañu ligíbugiñe Búngiu.

5

Niján lébubei weréḁerun madúnrunga

¹ Queísiti resíbi láadiwa lubeí Búngiu láu waffñerun luágu, lídaanjadiwa dan lúma, lídaangiñe Wabúreme Jesucrístu. ² Ladüga Crístu, biníwadiwa lubeí láu waffñen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírígün Búngiu. ³ Áni máma rügüñein líra, gúndaatiwa gñe lídan wasúfurirun ya ubouágu, lugúndun subúdi wamúti luágu ru lan asúfuriruni gurásu woun, ⁴ buídugüda lumúti gurásu wagáburi, áni láu líra, gayára lan weménigidun lun gafáanranbadiwa lan lídan luweírígün Búngiu yágüta siélu. ⁵ Áni máburujanbei warúna lurúma eménigini le, ladügübei Búngiu le aríñaga láalibeí woun ladüga línsiñejabu woun. Sandí wamaali línsiñejabu, buingüda láaru wanígi láu línsiñejabu, láu Sífiri Sándu le rúlaalibeí woun.

⁶ Ladüga línsiñejabu Búngiu woun, queí meja le mabáfu wabeí lun wasálbaragun woúngua lídaangiñe figou le gádaanbaliwa, ába loúnajani Crístu lídan óra le lanúadirubeí lun loúnwen wawágu, wagía le gaffigounbeí. ⁷ Máma cátei ménrengunti lun loúnwen ában gürígia jawágu ámu gürígia, ni íbini lueígiñe ában gürígia le buídubeí, láu sun njein lan gürígia gayáraati jamúga loúnwen lueígiñe ában gürígia le buíti le tímatimaati. ⁸ Ánjein Búngiu, ába larúfuduni luweírín línsiñejabu woun láu loúnajani Jesucrístu le Liraü lun loúnwen wawágu, láu sún meja gaffigoundiwa lan. ⁹ Guetóti, láu resíbi láadiwa lan queísi gürígia richáguatiña láu loúnwen Crístu wawágu, chouurutimaati luágu weséfuruba lan lueí ligáñi Búngiu le lúnbei láburujan jawágun gaffigountiña lídaanne luwéyuri agúseruni. ¹⁰ Lugúndun ánjein ru lubáliwa Búngiu lídan dan lúmagua láu loúnwen Liraü dán meja le láganigüdiwa, chouurutimaati luágu lasálbarubadiwa lan le gumúti, luágu Liraü le wínwafubeí lúma, siélu. ¹¹ Áni máma rügüñein cátei le, gúndaatiwa gñe lúma Búngiu lídoun buri dan le, lídaangiñe Wabúreme Jesucrístu, le ídaangiñebeí lídaanjadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrügü wügüri le giríbe Adán lebélura figou ubouágun, ába lanügüni figou ouweni lúmagua queísi lafáyeija, itara líña giñe jouweguba lubei sun gürígia lugúndun afígounjatiña súngubei. ¹³ Lubáragiñe meja líchugun Búngiu lilúrudun joun gürígia lídaangiñe Moisés, añájeinjaña méja gürígia afígounjaña ubouágu, láu sun úgali lan lúrudu ligia lun gayáraabei lan jadúraaguni. ¹⁴ Láu sun líra, lúmagiñe meja lidáani Abrahám darí lúmoun lidáani Moisés, jilátiña gürígia luágu jafígoun láu sun máma lan ladüga magáambadi jamá jafígounbei queísi ladügüni Adán le magáambadibei lun lerérun Búngiu lun. Lueigiñe ában oubaü, Adán liyáwa Crístu le lúnbei líabin, ladüga biángubei jagía barütiña som cátei joun gürígia.

¹⁵ ¡Ámuñegueinarügü giñe cátei le janügübei joun gürígia! Barüti Adán ouweni joun sun gürígia láu lafígounjan, ánjeinti Crístu, barüti asálbaruni joun sun gürígia, áni weiriti asálbaruni le líchugubei Búngiu láu lareíni woun lídaangiñe Crístu sügü láu lifígoun Adán. ¹⁶ Weiriti giñe le líchugubei asálbaruni sügü láu le líchugubei lifígoun Adán woun. Ladügarügü ában figou, chülüti ouweni joun sun gürígia, ánjeinti ladüga loúnwen Crístu wawágu, ferúduawati sun wafígoun le gíbebei, resíbi lumútiwa Búngiu queísi gürígia richáguatiña. ¹⁷ Ánjein gabáfu lubei ouweni jawágu sun gürígia ladüga lidúnrun ábanrügü wügüri—Adán, choúrutimaati luágu sun lan gürígia ja lerésibirubaña Búngiu láu lareíni queísi gürígia richáguatiña, jabíjubei ibágari magúmchaditi lúma Búngiu, jarúejaba úara lúma Crístu, ladüga ábanrügü wügüri ligía.

¹⁸ Ítara queísi líchuguniña Adán sun gürígia lábugiñe lisíadin Búngiu lun jouúnwen láu ladügüni le áubei magúndan lan, itara líña giñe lagídaruniña Crístu gürígia lábugiñegiñe asíadiruni ligía, rúlei íbágari magúmchaditi joun láu ladügüni lugúndan Búngiu lun loúnwen jawágu. ¹⁹ Ladüga lubeiti lumágaambadi ábanrügü wügüri, ñübintiña sun gürígia lun jafígounjaba lan, itara méme giñe, ladüga lagaambadi ábanrügü wügüri, gayáraati jayábin sun gürígia lun richágua jamá ligíbugiñe Búngiu.

²⁰ Rúati lilúrudun Moisés woun lun gayáraabei lan wasúbudiruni cátei lan figoubei. Láu sun gíbe lan figou ubouágu, weiritimaabei lareíni Búngiu lun lachíbuni sun figou ligía. ²¹ Ítarati queísi gabáfu lán meja figou lun lanügüni ouweni, itara giñe gabáfuti lareíni Búngiu lun ladügüniña gürígia richágua ligíbugiñe, lúma lun líchugun íbágari magúmchaditi joun lídaangiñe Wabúreme Jesucrístu.

6*Jiláñu wáña lun figou, winwañu lun weséridun lun Crístu*

¹ ¿Cábatí waríñaga? ¿Wasígiruba afígounja lun larúfuduntima Búngiu lídaangiñe lareíni woun? ² ¡Máma lúba! Wagía, jiláadiwa lun figou, ¿ida lubáti gayára lan wasígirun afígounja? ³ ¿Ibídíñeti jun luágu láu lan lídan wamá ában lúma Crístu láu wabásterun, queísigubeirügü jamúga lídaañadiwa lan giñe ában lúma lídan loúnwen, lun mabáfujali lánme figou wawágu? ⁴ Láu wabásterun, queísigubeirügü jamúga bunáwa wamá úara lúma Crístu, áni reídeitiwa jiláñu lun figou. Queígubeirügü sarágüda láani Wáguchi Búngiu Crístu lídaangiñe ouweni láu lueírín lubáfu, sarágüda láadiwa giñe lun isérijali lan wabágari.

⁵ Lugúndun ánjein ñübin wabei lun lídaanbadiwa lan ában lúma Crístu lídan ában ouweni líbe loúnwen, itara wába giñe lídan lásaarun lídaangiñe

oúweni. ⁶ Subúdi wamúti luágu dáwagua lan binádu meja wagáburi lúma Cristu luágu gurúwa lun lagünrinchawagún lubáfu figou lé meja wawágubei, lun merédeediwa lan queísi idámuni eseriwida lun figou queísi wayúbudiri. ⁷ Lugúndun le jiláalibei, furíjali lídaangiñe figou. ⁸ Ánjein jiláadiwa lubei lúma Cristu, gayáraati wafíñerun luágu wabágariduba lan gíñe lúma, ⁹ lugúndun subúdi wamúti luágu sará lan Cristu ában weíyaasu lídaangiñe oúweni, moúnwendügüyaali, mabáfujali oúweni luágu. ¹⁰ Dan le loúnwenbei Cristu, ába lagúmuhaguagüdüni lubáfu figou lun sun dan, áni ibágari le labágaridubei guetó, lun méme leseriwidun lun Búngiu labágaridei. ¹¹ Jugúya gíñe, rúgua jumá júngua queísi jiláguaaña lun figou, áni wínwañu lun jeseriwidun lun Búngiu, lídan ában lúma Cristu Jesúsú le Wabúreme.

¹² Ligía, mígira jumá lubei lun gabáfu méme lan figou juágu, afósuraün lun jadügüni luríban jayúmajan. ¹³ Míchaagua jumá júngua lun figou lun layúsuruni júgubu lun cátei wuríbatí. Lubáragiñe líra, derégegua jumá júngua lun Búngiu queísi gürígia jiláaña, ábaya jabágaridun, derége jumei júgubu lun Búngiu lun layúsuruni lun cátei buíti. ¹⁴ Mabáfujalíme figou juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadügüni lugúndan.

Ában jémpulu luágu idámuni

¹⁵ Queísiti máma lubei lídaangiñe wagúnfulirun lúma lilúrudun Búngiu le líchugubei lun Moisés líabin wasálbarun, lídaangiñe werésibiruni lareíni Búngiu, ¿gayáraati lubeiti wabágaridun lídan figou ladüga líra? ¡Siñáti! ¹⁶ ¿Ibídíñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeiti janúadajan cába lan un jíchaagua júngua, lún yebe figou le íchugubei féridi, o lun lan agáambadi lun Búngiu, le íchugubei ában ibágari richáguati. ¹⁷ Teinqui níña lun Búngiu luágu láu sun lan lidámun jumá meja figou, guetó jídíña láu ligáburi arúfudajani buíti le jagáambubei, táu sun janígi. ¹⁸ Mámaadün idámuni lun figou, lidámunjadün Búngiu. ¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara quei meja lidámun jumá sun luwúyeri figou, guetó lúnti jíabin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figou, mebésereguntün meja lun jabágaridun ában ibágari buíti ligíbugiñe Búngiu. ²¹ ¿Ca mejáti cátei buíti lanügübeí buri cátei ligía jun le áubei buri nibúsigari jumá guetó? Ni cáta buíti, féridi rügüñein lanüga jun. ²² Ánjeinti guetó, mámaadün lábugiñe lugúmadin figou, lidámujadün Búngiu, barütiti cátei le arúmani tun janígi lúma ibágari magúmuhaditi jun. ²³ Lugúndun oúweni lafáyejjabei figou, ánjeinti edéweejani le líchugubei Búngiu woun, ibágari le magúmuhaditi ladüga lídaañadiwa lan ában lúma Wabúreme Jesucristu.

7

Ában jémpulu lídaangiñeti maríei

¹ Nidújeñu, jugúya le subúdiwabúbei lun lúrudu, subúdi jumáli luágu dán rügüñein lan wínwangili ában gürígia, ligía lábugiñeñein lan lúrudu. ² Quei jamúga, ában würi to maríeitu, rulumutu lúrudu lábun lagúmadijan túmari sun dan le wínwangili lan, ánjein oúwe túmari, bougudijaru lueí lúrudu le íchugarun

lábugiñe lagúmadijan túmari. ³ Ánjoun lubeíti agánawa lúma ámu wügüri sun winwangili lan túmari, tadügüña figou le gíribei adultériu, ánjein ouwe túmari, gidáaru lábugiñegiñe lúru lu lía, áni gayáraati tamárieidun lúma ámu wügüri, madügüntu adultériu.

⁴ Ítara giñe jugúya, nidújeñu, láu louñwen Crístu, furíjadün lábugiñegiñe lagúmadijan lilúrudun Moisés queísi würi to jiláali túmari, ába tagámaridun ámu. Guetó, lánijadün Crístu, le saráalibei lídaangiñe ouweni, lun gayáraabei lan jesériwidun lun Búngiu le gumúti. ⁵ Lubáragiñe meja werésibiruni Crístu, seríwiti meja lilúrudun Moisés lun lagáguduni luríban ayúmajani wádan, áni lígia cátei le anügúbaliwa lídoun ouweni. ⁶ Ánjeinti guetó, jiláadiwa lun lúru lu lía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táu sun wanígi, láu ubáfu le líchugubei Sífiri Sándu woun, máma queísi idámuni lun binádu lilúrudun Búngiu le búrwabei.

Igáburi lánina figou le wádaanbei

⁷ ¿Wariñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúru lu asúbudiragüdúbalin figou nun. Ibídíñeti jamúga nun luágu figou lan lawámadirun jamégen ámu ánjein jamúga maríñagunti lúru lu. “Mawámadirabei jamégen ámu.” ⁸ Ladúga méme gumádi le, ába lagáguduni igáburi lánina figou le nídaanbei sun luwúyeri luríban ayúmajani nídan. Lugúndun lun jamúga úa lan lúru lu, larúmuguña yebe lubáfu figou. ⁹ Níjein meja ában dan, lubáragiñe nasúbudiruni laníchigu lilúrudun Búngiu le tímataaati, ába narítangun luágu úaragua lan nigáburi ligíbugiñe Búngiu, dan le nasúbudirubalin laníchigu lúru lu lía, ába nasúbudiruni luágu gaffigoun nan, luágu lídaañadina lan úma lun féridi. ¹⁰ Ítara líña, lúru lu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeiruaja. ¹¹ Lugúndun larügúdnun igáburi lánina figou le nídaanbei lueígiñe lúru lu lía, ába leyéeragunina lun nadügüni le wuríbabei, ába lanügünina lídoun féridi láu meme lúru lu lía.

¹² Sánduti lubeíti lilúrudun Búngiu lídaangua, sánduti giñe sun gumádi le lídaanbei, úaraguati, áni buíti. ¹³ ¿Lígia funásan cátei buíti le anügúbalina lídoun féridi? ¡Máma líña! Níffigoun anügúbalin neféridirun nun, áni ítara líña larúfuduni luágu figou lan, láu cátei le buídubei, le méme lúrudubei, lanúgana igáburi lánina figou le nídaanbei lídoun féridi, áni ítara líña larúfuduni lilúrudun Búngiu luágu wuríba lan figou le tímataaati.

¹⁴ Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügüri garaúwarügüti, alúgurúañu níña queísi idámuni lun lubáfu figou. ¹⁵ Úati gunfaráanda náani ca lan susérebei nun, madügün numúti cátei buíti le nabúseerubei nadügün, nadúgei cátei le iyéeregeubei nun. ¹⁶ Ánjein le lubeí mabúseerun nubeí nadügün lígia nadúga, úaraguati nisáminan lúma lilúrudun Búngiu luágu cátei le buídubei, áni láu líra, arúfuda numúti luágu barúnaani lúru lu quei cátei buíti. ¹⁷ Mámaadina lubeíti áu adügúbalin cátei wuríbati le nadügübei, igáburi lánina figou le nídaanbei, lígia adügúbalin. ¹⁸ Subúdi numúti luágu úa lan ní cáta buíti nídan bougudin lueí Búngiu, áu queísi wügüri garaúwarügüti. Buséntina jamúga nadügüni le buídubei, siñáti nadügüni. ¹⁹ Madügün numúti cátei buíti le nabúseerubei nadügün, nasígirarúga adúgei wuríbati le mabúseerun nubeí nadügün. ²⁰ Ánjein lubeíti le lubeí cátei le mabúseerun nubeí nadügün lígia nadúga, lídan linárün cátei,

máma áu le lání Búngiu adügübalin, igáburi lánina figou le nídaangilibei, ligía adügübalin.

²¹ Niján cátei le asúseredubei nun. dan le busén nan nadügüni le buídubei, wuríbatí rügüñein nadáirira nídan. ²² Lídan nisáminan, jinsíñeti lilúrudun Búngiu nun, ²³ áni aríjatina luágu níñein lan cátei nídan, ageíndaguti lúma nisáminan, cátei ligía, igáburi lánina figou le nídaanbei, le gámabalina adaürüwañu.

²⁴ ¡Fugiábu áu! ¿Cába eséfurana lídaangiñe igáburi lánina figou le nídaanbei, le anügübalina lídoun oúweni? ²⁵ Búngiu gubeirügü, lídaangiñe Wabúreme Jesucrístu. ¡Teíñqui níña lun Búngiu! Gunfaráanda numúti lubeíti luágu áu lan láu náni nungua, úouga lubáfu Crístu nuágu, buséntina jamúga nagúnfulirun lúma lilúrudun Búngiu, siñá numuti ladüga igáburi lánina figou le nídaanbei, seríwirügütina lun figou queisi lídámun.

8

Wabágarí lúma Sífiri Sándu

¹ Guetó, gidáwaali jadúnrun gürígia ja lídaanbaña ában lúma Jesúsú. ² Rúlaali Crístu lání Espírítu woun, áni Espírítu ligía, rúti iséri íbágarí woun, furígüda láadiwa lábugiñegiñe lubáfu figou le anügübalina lídoun oúweni. ³ Mabáfuti meja lilúrudun Búngiu lun lagídaruníwa lábugiñegiñe lubáfu figou ladüga turíban wanígi, wagía gürígia garaüwarügütiña. Ába ladügüni Búngiu le lásiñerubei lilúrudun adüga láu loúnajani Liraü ubouágun queisi gürígia garaüwarügüti le giñe gayáraati lafigounjan (láu sun, mafigounjan lan). Ába loúnwen Liraü Búngiu, le Jesucrístubei, luágu wafígoun, ába lagúmuchaguagdüni lubáfu figou wawágu láu loúnwen. ⁴ Ladügünbalin Búngiu líra, lun gayáraabei lan wadügüniwa gürígame richáguatiña queisi lagúmadijan lilúrudun, gürígia ja mabágaridunjañabaña lídan luríban jagúndan, ja abágaridunbaña guetó queisi lugúndan Sífiri Sándu.

⁵ Ja abágaridubaña queisi jagúndan queisi gürígia garaüwarügütiña, luágu rügüñein cátei le lánina ubou jarítagua, ánjaña ja abágaridubaña queisi lugúndan Sífiri Sándu, luágu cátei le lánina siélu jarítagua. ⁶ Dan le jabágaridun gürígia queisi jagúndan, marítagunga jagía luágu Búngiu, barü lumútiña lídoun oúweni, ánjeinti dan le jabágaridun queisi lugúndan Sífiri Sándu, barü lumútiña lídoun íbágarí tímátimaati lúma darángilau. ⁷ Ja aritagubaña luágu cátei le lánina ubou le, láganiñu Búngiu lugúndan mája jaña, áni siñá ligía jichaagun jóungua lábun lilúrudun. ⁸ Ligía, ja lubei abágaridubaña láu jagúndan queisi gürígia garaüwarügütiña, siñáti jadügüni lugúndan Búngiu.

⁹ Ánjeinti jugúya, mabágaridunjadün lídan jugúndan queisi gürígia garaüwarügütiña, jabágaridunbaña lídan ában lúma lání Búngiu Espírítu, queisi aganoúa lubei jídan. Le úabei lání Crístu Espírítu lúma, máma lánigu Crístu.

¹⁰ Ánjein wíwan lubei lání Crístu Espírítu jídan, wíwanboun juwáni lun sun dan ladüga tarúfudúniwa richáguañu ligíbugiñe Búngiu, láu sun loúweba lan júgubú ladüga figou le lídaanbei ubou le. ¹¹ Ánjein wíwan lubei lání Espírítu jídan, Búngiu méme le ásaaragüdübalin Jesucrístu lídaangiñe oúweni, líchuguba íbágarí iséri lun júgubú le gouwedadibeí, lídaangiñe lání Espírítu le jídaanbei.

¹² Ítara líña lubeíti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queisi gürígia garaüwarügütiña. ¹³ Lugúndan ánjaün abágaridarügü queisi jugúndan, queisi gürígia

garaüwarügütiña, jeféridiruba, mídinbadün siélu, ánjein jáfara igáburi lánina figou le jídaanbei jilágabei, láu lubáfu Sífiri Sándu, jabágariduba lun sun dan lúma Búngiu siélu.

¹⁴ Sun ja ladúndejabaña láni Búngiu Espíritu, lirájüñü Búngiu. ¹⁵ Sífiri Sándu le jerésibirubei, máma ában espíritu lánina idámuni lúnya lanúfudedagüdünün luei láburujan ligáñi Búngiu juágun, Espíritu le jerésibirubei, ligia le adügübalün lun lirájüñü jumá Búngiu. Ligía gayára lubei wagúaruni Búngiu Wáguchi. ¹⁶ Geféenti láni Búngiu Espíritu woun luágu lirájüñüjadiwa lan Búngiu. ¹⁷ Áni ladüga lirájüñü wamá Búngiu, garíchatywa giñe lun alágan siélu le uágubei lariñaga Búngiu woun, le lúnbei gafánran wamá lídaangiñe, lúma Crístu. Ánjein súfuri wabei luágu Crístu ya ubouágu, gafánraanbadiwa lídan luweírigan yágüta siélu.

¹⁸ Jarítaguatina luágu ni cáta lan le wasúfurirubei ya ubouágu lúmoun uweírighi le lúnbei wabíjini siélu. ¹⁹ Láuñein sarágu ayúmajani lúma eménigini sun ubou le ladügübei Búngiu, agúrabei dan le lúnbei jerésibiruni lirájüñü Búngiu jalágaante. ²⁰ Níjein mégeiti luágu sun ubou, máma jamúga ladüga labúseerun, ladüga ítara líña lan labúseeruni Búngiu, ²¹ láu sun líra, súnwandan níjein lan eménigini luágu leséfuruba lan ubou lídaangiñe asúfuriruni lúma agádeiruni le gádaanbalin lun gafánraanbei lan lídan jaweírigan lirájüñü Búngiu. ²² Subúdi wamúti luágu chülü lan lúmoun dan le, sun ubou le ladügübei Búngiu ayájuaati láu igárigu camá ában wúri to agáridutu. ²³ Áni máma rügüñein ubou asúfurira, súfuritiwa giñe, wagía affiñetiña luágu Crístu, láu sun níjeinjali lan Sífiri Sándu wáma queísi lagúmeseraja cátei le lúnbei werésibiruni. Sandítiwa ában oúnwenbun igári, áni agúraba wamúti dan le lúnbei wayábin lun lirájüñüjadiwa lánme Búngiu le tímátimaati, dánme le liséridun wágubu. ²⁴ Ligia lagúdaja wasálbarun. Merésibirun wamágili sun ubuiduni le lúnbei wabíjini queísi lirájüñü Búngiu, agúrabatiwa werésibiruni yágüta siélu. Ánjein jamúga íbija wamáaliti sun le lúnbei wabíjini queísi lirájüñü, mébunaali jamúga wagúrabajan. Magúrabajaantiña gürígia jerésibiruni cátei le íbija jamáalibe. ²⁵ Queíti merésibirun wamágili lubei sun le lúnbei wabíjini queísi lirájüñü Búngiu, lúnti wagúrabani láu gurásu.

²⁶ Ítara méme giñe, íderagua lumútiwa Sífiri Sándu lídan wadébilin. Queísigubeirügü níjein dan, siñáti wayúmuragun lun Búngiu queísi lubúduba. Lídan óra ligía, ába líderaguniwa Sífiri Sándu lun waríñaguni luweírigin cátei le wasándirubei tídan wanígi lun Búngiu lídan ában luwúyeri le siñáti lariñawagún láu dimúrei. ²⁷ Áni Búngiu, le aríjubarun wanígi, subúdi lumúti ca lan labúseerubei Sífiri Sándu lariñagun wádaangiñe, ába louñabuniwa Búngiu lugúndun ayúmuruaguati Espíritu queísi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanügün buíti woun, wagía le jínsiñejabúbei lun, wagía le wájali lan lun lánigu wamá queísi lariñaguni. ²⁹ Lugúndun ja lasúbudirubaña Búngiu lúmagiñe lubáragiñe ladügüni ubou luágu lánigubaña lan, fánrein lumútiña lun ítara jamá queísi Liraü, lun Liraü lan íbugañau joun sun ja lanúadirubaña lun lirájüñü jamá. ³⁰ Játi lanúadirubaña lúmagiñe binárü, wáti giñe joun, resíbi lumútiña giñe lúmagua queísi gürígia richáguatiña, áni ja lerésibirubaña, rúti giñe ufánrani joun lídan luweírigan queísi lirájüñü.

³¹ ¿Cábati waríñaga luágu buri cátei le? Queísi lueígiñeñein lubeí wafúleisein Búngiu, ¿cábagi jabáfu wáganiñu wawágu? ³² Mamájaanti Búngiu lun líchuguni Liraü guánarügü lun loúnwen luágu wafúleisein, lubáragiñe líra, ába ledéregeruni lun loúnwen wawéigiñe, sun wagía, ¿ída lubáti míchugun láani sun líbiri cátei woun queísi líchuguni Liraü woun? ³³ ¿Cági gayáraabei líchugun jadúnrun ja anúdaja láañabaña Búngiu queísi lánigu? Búngiu arúfudubaliña quei madúnruntiña. ³⁴ ¿Cáteiti gayáraabei lasíadiruniwa lun férídi? Crístu guánarügü oúwebei wawágu, ába lásaarun lídaangiñe oúweni, guetó níjein ñun lueígiñe loúnwenren Búngiu Úguchili ayúmuragua wawágu. ³⁵ ¿Cábati gayára lagídaruniwa lueí línsiñejabu Crístu? ¿Liyáraabadiwa funági asúfuriruni, o lénreengúnga, o eibaajotúni, o ílmaü, o manáanguni, o pelíguru, o oúweni? ¡Uá! ³⁶ Laríñajare tídan Lerérun Búngiu.

Yaráfatiwa lun wounwen bueígiñe ságü wéyu, ítara líña jóuseruniwa wáganiñu queísi mudún anügütiña lun jafarún.

³⁷ Lídan sun cátei le, íbja wamúti luweírín lubáfu Crístu, le jínsiñejabúbei woun, lun wagáñeirun lídan sun lénreengúnga. ³⁸ Choúru numúti lubeíti luágu úa lan ni cáta lun lagídaruniwa lueí línsiñejabu Búngiu—ni oúweni, ni íbágari, ni ánjeligu, ni máfianu, ni cátei le guetóbei, ni le lúnbei líábin, ³⁹ ni le siélubei, ni le uboúagubei, ní buri ámu cátei le ladügübei Búngiu—síñáti lagídaruniwa lueí línsiñejabu le larúfudubei woun lídan Wabúreme Jesucrístu.

9

Anúdaja láaña Búngiu Israeltagu lun lánigu jamá

¹ Inárüni le lúnbei naríñaguni guetó jawágu nirásan, áu queísi ában affíñeti luágu Crístu, áni meyéejantina, aríñaga tumúti nanígi nun to úraguaboun lúma Sífiri Sándu luágu inárüni lan. ² Weíríti nírun, áni súnwandan níjein lan gáriti tídan nanígi jawágu nirásan. ³ Buséntina jamúga lun giñe lábugiñe nan líñaragun Búngiu, díseñu lueí Crístu, ánjein jamúga ítara lúba lubeí gayára lan jerésibiruni Jesucrístu queísi jasálbaragüle lun jasálbarun. ⁴ Linébaanfaangu Israél jagía, áni resíbi lumútiña Búngiu queísi lirájüñü. Reideiti meja Búngiu jádan láu sun luweírígún áni rúlumuti giñe darádu buri joun lúma lílúrúdu lídaangiñe Moisés. Arúfudati igáburí joun lun jesériwidun lun, ligílisirugu, áni joun lariñaga luágu loúnajaba lan ában Asálbaragülei. ⁵ Janébaanfaangu Abrahám, Isáac lúma Jacob jagía, lídaangiñe jarásan líábin Crístu, le Búngiubei, le giñe Súnti Gabáfu, le gadúnamabei lun líñurúniwa líri lun sun dan. Ítaralá.

⁶ Mámata luágu jamúga reidei lan lerérun Búngiu joun ladügawagun Israél magúnfulirunga, ladüga máma sun Israeltagu lánigu Búngiu le tímatimaati. ⁷ Máma sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.” ⁸ Arúfuda lumúti líra woun luágu úa lan ni ában liraü Búngiu luágurügü lirásan, ja rügüñanu lirájüñü ladüga jaffíñerun luágu lerérun, jagía anügübaña queísi lirájüñü ja tímatimaatiña. ⁹ Lugúndun niján dímuirei le líchugubei Búngiu lun Abrahám. “Níábinba dánme le lachülürün dan ligía, ábame tagáraüdüñ Sára ában irájü.”

¹⁰ Áni máma rügüñein líra, niján ábanya jémpulu luágu lanúdajan Búngiu. Biángubei meja tirájüñü Rebéca ában jáguchi, le binádu wadúje Isáac, ¹¹⁻¹³ áni dán meja le magüriajoungiña, madügüngiña giñe ni cáta ni buíti ni wuríbati, ába lariñagun Búngiu tun Rebéca. “Lumúsunbei amúleñein le íbugañáü.”

Úraguati giñe líra lúma le aríñawagúbei tídan Lerérun Búngiu. “Jínsiñetí meja Jacób nun, ánjein Esaú, iyéreeguti nun.” Ítara líña guffirümawa lan lirícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, mebésesenga ligía ca lan jadügúbei.

¹⁴ ¿Cábati waríñaga? ¿Waríñaguba luágu múaran lan Búngiu? ¡Siñáti!
¹⁵ Lugúndun lariñajare lun Moisés. “Gareínibadina lun le nabúseerun, gudémejabu áume lun le únti nabúseera.” ¹⁶ Ítara líña lubeítí, máma lídaañein wabúseerún o wáfaagun, lugúdemejabu Búngiu woun, lídaañein lugúndan.
¹⁷ Tídan Lerérun Búngiu, bürüwañu líña dimúrei le lariñagubei lun urúei Ejíptona. “Nadügünbálibu urúeime lun narúfuduni nubáfu buágu, lun giñe nasúbudiragúdúni níri lídan sun fulásu.” ¹⁸ Gudémejabuti lubeítí Búngiu lun le labúseerun gudémejabu lan, derégúdaloún lanígi le únti labúseera ledéreragúdúnun.

¹⁹ Baríñaguba lubeítí nun. “Ánjein ítara líña lubeí, ¿cáti uágu líchiga Búngiu dúru jawágu gürígia? ¿Cági gayáraabei ladügün cátei bouguditi lueí lugúndan Búngiu?” ²⁰ Wel, ¿cátabuñadíbugi lun balégejan lúma Búngiu? ¿Lariñaguba funági sóudieru lun le adügúbalin. “¿Cáme badügana ítara?” ²¹ Garíchatí le adágubei sóudieru lun ladügúni le labúseerun láu lubúñe sóudieru, gayáraati ladügün ában sóudieru le díseguati layúsurun, lúma ában le ayúsurúti lun furúmieguarügü cátei lídaangiñe ában méme ubúñei.

²² Ítara méme líña, gabáfuti Búngiu jawágu gürígia, aráanseñu líña lun larúfuduni luweírín ligáñi jawágu gürígia ja gadúnabaña jagúnrinchawagún. Áfaaga lumúti jaríban láu sarágu gurásu darí guetó ²³ lúnrgü güyára lan larúfuduni luweírín luweírigin woun, wagía le únbaña gudémejabu lan, ja giñe laráanserubaña lúmagiñe binárú lun gafánraanbadiwa lan lídan luweírigin.
²⁴ Wátí Búngiu woun, ¡biri jadaangiñe juríu, ¡biri jadaangiñe ja mámabaña juríu,
²⁵ queísi lariñagun Búngiu tídan lilíburun Oséas.

Já meja mámabaña nánigu, naríñaguba joun. “Nánigu”, gürígia méja ja mínsiñebaña nun, naríñaguba joun. “Jínsiñetün nun”.

²⁶ Áni lídan méme fulásu le ñí lubei lariñawagúa joun. “Máma nánigu jugúya”, ñiba lariñawagúa joun. “Lirájúñü Búngiu le wíwanbei”.

²⁷ Ánjeinti jawágu Israelítagu, ja méme juríubaña, lariñajare Isaías. “Láu sun gíbe jamá ladügawagun Israél quei ságoun láru béya, bíanraürügúbaña jadaangiñe erédera lun jasálbarun, ²⁸ lugúndun lagúnfulirubei Búngiu lerérun ligíbuagu ubouú lun lagúnrinchaguniña ja magáambadibaña lun, lídan ában igáburi le gumúti, le giñe furéseti.” ²⁹ Queísi méja lariñagun méme Isaías.

Lun jamúga meja mígirun lan Súnti Gabáfu jadaangiñe wadügawagun woun, wayábiña jamúga lun ítara wamá queísi ubúrugú buri Sodóma lúma Gomórra.

Juríu lúma ugánu luáguti Crístu

³⁰ ¿Cábati waríñaga? Luágu ja lan mámabaña juríu, ja mibjínbalin lilírudun Búngiu lun jasúbudiruni le buídubei lúma le wuríabei, jagía anügúbaña quei richáguatiña ligíbugiñe Búngiu ladúga jafíñerun luágu.

³¹ Ánjañati ladügawagun Israél, ja áfaagubaña lun jerésibirúniwa queísi gürígia richáguatiña láurügü jagúnfulirun lúma lilírudun Búngiu, siñá jamuti lúrudu ligía agúnfulira, machúlúntiña lun richágu jamá ligíbugiñe Búngiu. ³² ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jafíñen, jadúgeirüga láu cátei le guánarügü jadügúbei. Ligía

jachúgeragunbei luágu Jesucristu queisi “dübü le achúgeraguágülei”, ladüga siñá lan jafiñerun luágu queisi Jasálbaragüle. ³³ Laríñajare tidan Lerérun Búngiu. Rútina ában wügüri le queisigubeirügübei dübü le achúgeraguágülei Sión, dübü giñe le eiguadagüdüti gürigia.

Ánjeinti le afiñeruti luágu, maságürijanbei.

10

¹ Nidújeñu, le cáte le uágubei tayúmaja nanígi, lúma le uágubei nayúmuragun lun Búngiu jawágu Israelítagu, ja méme juríubaña, lun jasálbarun. ² Aríñagatina luágu jafúleisein luágu níjein lan ában oúnwenbun gúnfuli jádan lun Búngiu, máma queisi laríñagun subúdi jagúnfulin. ³ Ibídiñeti joun ida líña lan ligáburi lichuguniña Búngiu gürigia richáguañu ligíbugiñe, láu igáburi le jabúseerubei jáluajan jeréderun richáguañu ligíbugiñe Búngiu, madügünga jamei le labúseerubei. ⁴ Lugúndun Cristu lébejabei lagúnfulirúniwa lilúrudun Moisés, áni adügati lun sun lan ja afiñebaña luágu, jeréderun richáguañu ligíbugiñe Búngiu.

⁵ Luágu lerésibiruniña Búngiu gürigia queisi gürigia richáguañu láu jagúnfuliruni lilúrudun, laríñajare Moisés. “Gürigia ja agúnfulirutiña lúru le gumúti, jabágariduba luágu lúru.” ⁶ Luáguti lerésibiruniña Búngiu gürigia queisi richáguañu ligíbugiñe luágu jafiñen, laríñajare. “Maríñagabá tidan banígi. ¿Cába amúdeira siélun?” —queisigubeirügü barárigüdüñein lan Cristu le Wasálbaragüle siélugiñe. ⁷ Maríñagabá giñe. “¿Cába arárira le ñjin jabei jiláaña?” —queisigubeirügü bamúdeiragüdüñein lan Cristu jádaangiñe jiláaña ítara. Úati ni cáta lun wadügüni lueídügüya lun wafiñerun luágu. ⁸ Cáteiti laríñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein giñe ugánu ligía tidan banígi.” Ugánu le, elun?” —queisigubeirügü barárigüdüñein lan Cristu le ligía ugánu le lánina afiñeni luágu Cristu le Wasálbaragüle, le wapúrichijabei. ⁹ Ánjabu aríñaga láu biyúma luágu Jesúsu lan Babúremebei, afiñe amúru tidan banígi luágu sarágüda láani Búngiu lídaangiñe oúweni, basálbaruba. ¹⁰ Láu bafiñerun luágu Jesucristu táu sun banígi, lerésibirabu Búngiu queisi ában gürigia richáguañu ligíbugiñe, láu bíchugun fe luágu láu biyúma, basálbara.

¹¹ Tariñajare Lerérun Búngiu. “Úati ni ában gürigia le afiñeruti luágu Jesucristu lun laságürijan luágu lárigiñe.” ¹² Ában jáu juríu jáma ja mámabaña juríu, Wabúreme Jesucristu, ligía Jabúremebei súngubei, áni fuleisei lumútiña sun ja agúarubaña lun lun líderaguniña. ¹³ Ítara líña quei laríñawagún tidan Lerérun Búngiu. “Sun ja aguáruti líri Wabúreme, jasálbaruba.” ¹⁴ ¿Ída lubáti gayára lan jagúaruni lun lasálbaruniña ánjein mafiñerungiña lubei luágu? ¿Ída luba giñeti gayára lan jafiñerun luágu, ánjein magáambungiña lubei luágu? ¿Ída lubáti gayára lan jagáambun luágu, ánjein uá jabei apúrichijati ugánu luáguti asálbaruni joun? ¹⁵ ¿Ída lubáti giñe gayára lan japúrichijan gürigia joun ánjein uá cába lan oúnajaña apúrichija? Queisi laríñawagún tidan Lerérun Búngiu. “¡Ma lubuídun jachúlürün ja anügübalin ugánu luáguti aráandaruni lúma Búngiu, apúrichija jamei ugánu buíti luáguti asálbaruni!”

¹⁶ Másutiña gürigia ja agáamba jamáalibei ugánu luáguti asálbaruni ebéresera láu. Queisi laríñaguni Isaias tidan lilíburun. “Wabúreme, mibetiña afiñerutiña

luágu ugánu luáguti asálbaruni le wapúrichijabei.” ¹⁷ Ítara líña lubeíti, lídaangiñe jagáambuni gürígia ugánu luáguti Crístu gayára lan jafíñerun luágu.

¹⁸ Ába nariñagun. ¿Magáambun jamúba giñéti gayára lan jafíñerti funásan ugánu luáguti asálbaruni? ¡Agáamba jamúti! Tariñajare Lerérun Búngiu.

Agaambúaaali jamáali lídan sun fulásu,
chülüjali jerérun lídoun lagúmujoún larígei ubou.

¹⁹ Ába nariñagun. ¿Úagili funásan gunfaráanda jamáni Israelítagu ugánu luáguti Wasálbaragüle? Gunfaráanda jamáali, lugúndun lídan furúmiñeti cátei lariñajare Búngiu liyúmulugugiñe Moisés.

Naméendidagüdúbadün jadüga ában rása ja máma náni,
nagáñidagüdúbadün jadüga ában rása ja ibídiñegidina joun.

²⁰ Ariñagati giñe Búngiu liyúmulugugiñe Isaías.

Darí jamutina ja máluajaanbalina,
arúfudaguatina núngua joun ja málügdajánbaña nuágu.

²¹ Ábaya lariñagun jawágu Israelítagu. “Sun wéyu náu agúaja joun gürígia magáambaditiña, mabuídun.”

11

Israelítagu ja sálbabaña

¹ Ariñagatinati guetó. ¿Májaali funásan Búngiu joun Israelítagu ja lumútuniña? ¡Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámilian Benjamín. ² Barü lumútiña Búngiu Israel-ítagu queísi lánigu lumagiñe meja binárü, guetó, mamájaanti joun. ¿Magáambun jumúti le tariñagubei Lerérun Búngiu luágu Elías, lé meja proféta, luágu líchuguni dúru jawágu Israelítagu lídan layúmuragun lun Búngiu? Lariñaga. ³ “Nabúreme, áfaragua jamá profétagu jilágubei, güríngua jamei buri báni latárü, áu rügáli erédera jádaangiñe bánigu, áni buséntiña giñe jáfarunina jilágubei.” ⁴ Ába lariñagun Búngiu lun. “Anuádajaadina sédü mílu wügüríña nubárua ja májuduragúngiñabaña ligíbugiñe liyáwa búngiu le Baal.” ⁵ Ítara méme giñe lídoun buri wéyu le, reidejaña átiri jádaangiñe juríu ja anuádaja láañabaña Búngiu láu lareíni. ⁶ Ánjeinti láu lubei lareíni Búngiu lanúadiraña, mámaali láu cátei le liyáraati gürígia guánarügü adüga, lugúndun lun jamúga ítara líña lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le jáluajabei, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei afiñeni luágu Búngiu, ába lígiruniña Búngiu táu tidére janígi. ⁸ Queísi tariñagun Lerérun Búngiu. “Adüga lumútiña Búngiu lun deré lan jachügü lun cátei lánina Búngiu, rúti águu le maríjinti joun, arígeirugu le magáambuti. Ítara liñáti chülü lúmoun dan le.” ⁹ Ariñagati David.

Garábagua lámuga jefédujan lun sádarame,
lun jáburujan tídoun, lun jasúfurirun.

¹⁰ Darü lámuga jágu, maríjin jamámuga,
sebúgua lámuga giñe janágan lábugiñe janügün lun sun dan.

Jasálbarun ja mámabaña juríu

¹¹ Nálügúdajaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líña! Lubáragiñe líra, láu jamájarun juríu lun jerésibiruni Crístu, jayábin ja mámabaña juríu lun jabíjubei lan asálbaruni,

lun jáyeijabaña lan Israelítagu. ¹² Ánjeinti seríwi lubei dúru le jadügübei juríu buítíme lun ubou, áni ánjein buíti lubei lanügübei jeféridirun joun ja mámabaña juríu, jsarágume buídutimaabei lan dánme le jasálbarun sun juríu!

¹³ Níjein giñe ában cátei lun nariñaguni jun, jugúya le mámabei juríu. Quei louñajañadina lan Búngiu apúrichija luágu Crístu joun ja mámabaña juríu, weíríti nubéresen láu nuwádigimari, ¹⁴ lun gayára lan jabúseerun nírasan jáyeijanün, lun giñe jasálbarun. ¹⁵ Ánjein ladüga lubei lamájarun Búngiu joun juríu, jayábin ja mámabaña juríu lun jaráandarun lúma Búngiu, çídatimá lubáti dánme le jerésibirúniwa? Ítara lúba joun queisi ásaaruni lídaangiñe ouweni. ¹⁶ Ánjein derégewa tubei furúmiñetu fein to adügütu tídaangiñe fulúwaaru añóundawagutu lun Búngiu, derégewatu giñe sun fulúwaaru ñouñwaguatu to ídaangiñeboun tiábin fein tugúya. Ánjein giñe derégewa lubei tilagüle ában tídibu wéwe lun Búngiu, derégewañu líña giñe tilímun.

¹⁷ Añájein jádaangiñe juríu, queisi tilímun olívo tímatimaati, chaünwatiña, gidáwatiña jagánaguagiñe lumútuniña Búngiu ladüga mafiñeni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olívo to áraabuna. Ítara líña jiábin lun gabára jumá lídan tilagüle lúma lídan tibágarí olívo, resíbi jugúyame labínirun Búngiu, queisi lumútuniña. ¹⁸ Marítagua jumátia luágu buídutimá jumá luei límu le ñígubeibeí méja. Ánjaün arítagua luágu buídutima jumá, jarítagua jumá luágu máma lan jugúya ágüdjabalín ílagülaü, luágu ílagülaü lan ágüdjabalün.

¹⁹ Fágua jariñaguba. “Ánja, ába jagídarúniwa juríu lun wíchugún jawéñegua luágu olívo.” ²⁰ Jinárün luágu gidáwa jamá jagánaguagiñe lumútuniña Búngiu, jagídarúnbei lugúndun mafiñen jamá luágu Wasálbaragüle, jugúya, gabára jubei ladüga jafiñen luágu. Manáangua jumá lubeiti júngua, duárírügü jumá. ²¹ Lugúndun ánjein úa lubei ferúduna lániña Búngiu juríu já meja lanúadajabaña lun lánigu jamá, úabei giñe ferúduna lánün, jugúya le mámabei juríu, ánjaün ñübin lun mafiñen jumá. ²² Arija jumei lubeiti luweírín lareidun Búngiu, derégüdati giñe. Derégüdati joun ja mafiñebaña, areidati joun ja afiñebaña. Lúnti jasígirun lídan lareíni láu sun jafiñen luágu, ánjein madügün jumá ítara, jagídarúba giñe. ²³ Ánjaña ñübin juríu lun jafiñerun luágu Crístu, jíchugúyaba lídoun jabára jagánagua lumútuniña Búngiu, lugúndun gabáfuti Búngiu lúnya líchuguniña járiçóun. ²⁴ Jugúya le mámabei juríu, chaünwatün tueígiñe ában olívo to áraabuna, ába jíchugún tuágun olívo to buítu, gúbume ladügüwa joun juríu ja tilímunbaña olívo buítu ja tímatimaatiña, jíchugúyaba járiçóun tuágun olívo to ñígiñe lubei jagídarúa, nariñaguña luágu lachülürüba lan wéyu lun jerésibiruni juríu Jasálbaragüle.

Jasálbarun Israelítagu le lagúmujoún

²⁵ Nidújeñu, buséntina lun jasúbudiruni cátei le luáguti laráansejan Búngiu, lé meja arámudagúabei, lun mapántajan jumá luágu chu lan jáu lídan le jálügüdagun júngua luágu buri cátei le. Luágu deréraügüda láaru lan Búngiu janígi Israelítagu murúsun lun Jasálbaragüle darírügü dánme le gumújali jerésibiruni ja mámabaña juríu Crístu. ²⁶ Dánme le lasúseredun líra, ábame jasálbarun sun Israelítagu, ja méme juríu, lugúndun tariñajare Lerérün Búngiu. Líábinba Asálbaragüleí Sióngiñe, ábame lagídarun wuríbani jádaangiñe juríu.

²⁷ Nijánba nidáradun jáma,

dánme le nagídaruni jaffigoun.

²⁸ Luágu ugánu le luáguti asálbaruni, barúwatiña juríu queísi láganiñu Búngiu luágu jufúleisein, láu sun líra, jínsiñegiña lun Búngiu lugúndun anúadaja lumútiña binádu jagúbürigu juríu. ²⁹ Lugúndun le cátei le líchugun Búngiu, magída lumúti, gürigia ja lanúadajabaña lun lánigu jamá, lánigumemebaña. ³⁰ Jugúya, magáambaditún meja lun Búngiu, guetó, láu jamájarun juríu jagáambuni, ába gudémejabu lan Búngiu jun. ³¹ Magáambaditiña juríu lun Búngiu guetó, ánjein líra, lúnrüğü gudémejabu lan Búngiu joun queísi gudémejabu lan jun. ³² Ígira lumútiña Búngiu súngubei lun magáambun jamáni, lun gayáraabei lan gudémejabu lan joun.

³³ ¡Luweírín lareídun Búngiu, lúma lichú láu! Siñáti wasúbudiruni larítagun, siña gunfaráanda wamáni lémeri. ³⁴ ¿Cági gunfaráandabalin larítagun Búngiu? ¿Cági arúfudajabei lun? ³⁵ ¿Cági gürigia rújalabei som cátei lun Búngiu furúmiñe lun lerésibirun som cátei fáyeitime lárigiñe? ³⁶ Úati ni ában, lúmagiñe Búngiu liábin sun cátei, ligía giñe ágúdajabalin sun cátei, áni lúngua giñe ladügei. ¡Uweíríguni lun Búngiu lun sun dan! Ítaralá.

12

Ibágarí le derégewati lun Búngiu

¹ Amúriajatina lubeíti júma, nidújeñu, lun jedéregeragun júngua le gumúti lun Búngiu queísi gürigia abágaridutiña lun jesériwidun lun, jarúmañu lan jibágarí ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadügüni lugúndun weírítí lareíni woun. ² Jebé jabágaridun queísi lirájüñü ubou le, lubáragiñe líra, sáansi jumeí ligáburí jisáminan, sáansi lámuga giñe ligáburí jabágaridun. Ítara lúba jiábin lun jasúbudiruni le lugúndaanbei Búngiu jun—le buídubei, le uáraguabei.

³ Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jídaangiñe arítaguti luoúgua weírí sügü láu le ligíabei. Lubáragiñe líra, cáda ában lúnti lasúbudiragun lúngua, según afiñeni le rúlaalíbei Búngiu lun. ⁴ Lugúndun ítara quei gíbe lán burí umégeguni luágu ábanrüğü úgubu, áni máma ában méme lifísiute sun umégeguni ligía, ⁵ ítara wáña giñe, wagía afiñetiña, láu sun gíbe wamá, ában rügüñadiwa úgubu lídan ában lúma Crístu, áni nderaguatiwa woúngua wádaangua queísi lumégegun ában méme úgubu.

⁶ Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu lueígiñe Jesucrístu. Lúnti buídu lan wayúsuruni ubáfu ligía. Ánjein rújali lubeí Búngiu ubáfu woun lun ladímurejan wayúmulugugiñe, lúnti wadügüni según afiñeni le wádaanbei, ⁷ ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani. ⁸ Le gíchigaditi dügúdaguáú joun ámu, lúnti líchaagun lúngua lun ladügüni. Le edéweejati, lúnti magúrabun lan láguyun lun, le ábutíbei, lúnti lagúmadijan láu sarágu duári, le ideraguti gudémetiña, lúnti ladügüni láu ugúndani.

Ligáburí jabágaridun lánigu Crístu

⁹ Jínsiñe jamá jidújeñu lueígiñe Jesucrístu jun láu ínsiñeni le inárúnti. Iyéreegulá wuríbani jun, falájumei le buídubei. ¹⁰ Lúnti jínsiñegua jumá júmagua queísi idújeñu. Furése jumá lun jiñúragüdüni jíri jidújeñu.

¹¹ Mamágualigu jumá lídan luwádigimari Wabúreme, seríwi jumeí táu sun janígi.

¹² Abágarida jumá gúndaañu láu eménigini le juágubei, gagúraasun jumá dan le jasúfurirun, ayúmuragua lun Búngiu, eteingirei, súnwandan.

¹³ Íderagua jumáña afiñetiña lídan jemégeirun, resíbi jumáña ja bisídabalün láu ugúndani.

¹⁴ Amúriaja jumá labínirun Búngiu jawágun ja oúserutün wuríba, amúriaja jumá abíniruni joun, máma wuríbani.

¹⁵ Gúnda jumá jáma ja gúndaabaña, jayájua jáma ja ayájubaña.

¹⁶ Abágarida jumá lídan úaraguni júmawagua. Manáangua jumá júngua, gamádagua jumá jáma ja gudémebaña. Marítagua jumá juoúgua queísi sábiugu.

¹⁷ Mafáyeira jumá wuríbani luágu wuríbani lun ni ában. Áfaagua jumá lun jadügüni le buídubei jagíbugiñe súngubei. ¹⁸ Adúga jumeí sun le juáraati lun jabágaridun lídan dan jáma súngubei. ¹⁹ Nidújeñu jínsiñetiña nun, mágyugüda jumeí wuríbani, ígira jumeí lun Búngiu lan afáyeigüda luágu. Tariñajare Lerérun Búngiu. “Áu lúnbei nafáyeigüdüniña gürígia luágu jariban, líña Jabúreme.”

²⁰ Ariñagati gíñe Búngiu. “Ánjein lamá lubeí bágani, rúba eígini lun, ánjein mágúrabu lubeí, rúba dúna lun, lugúndun láu badügüni líra, lebéloruba busíganu lun luágu luríban loúserunibu.” ²¹ Mígiraguagüdába búngua lun lagáñeirunibu wuríbani lun báguyugüdün wuríbani luágu wuríbani, lubáragiñe líra, gáñibeí wuríbani láu buídu le badügübei.

13

¹ Lúnti jíchaagun súngubei júngua lábun jalúrudun gumádimatiña, lugúndun ítara líña laráansejan Búngiu lun níbei lan lúruđu, áni gumádimatiña ja lídaanbaña jabára, labúseerun Búngiu añajein lubeí ñi. ² Gürígia lubeí le awügüríjóuti lun gumádi, múaraanti láu le laríñagubei Búngiu, áni ja awügüríjóutiña ítara, gadúnruntiña luágu líra áni jafáyeiruba luágu. ³ Máma lúnñanu jíchugun gumádimatiña anúfudei joun ja adügübalin le buídubei, aná joun ja adügübalin le wuríbabei. ¿Buséntibu babágaridun manúfudeiga lueí lúruđu? Buídulá bouúserun, ábame buídu ban lurúma lúruđu, ⁴ lugúndun lesériwiduña lun Búngiu luágu bufúleisein. Ánjein wuríba bouúserun, lúnti janúfude ban, ladúga máma luágu ni cáta gabáfu lan lúruđu lun lafáyeijagüdüñ luágu dúru, quei lesériwiduña lubeí lun Búngiu lun lafáyeijagüdüñ luágu dúru. ⁵ Ligía lúnti lubeí úaragua wamá lúma lilúrudun wageíra, mámarügü lun máburujan lan asúfuriruni wawágun, lúnti ítara lan lun jarúmañu lan warítangun. ⁶ Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cáte le jeténira.

⁷ Ru jumeime le jáni cáda gürígia joun. Fáyei jumeí le lagúburajabei gumádi luágu jufúlasun, lúma buri ámu cáte líbe líra, fáyei jumeí le lúnti jafáyeiruni luágu cáte le ñúbinbei jun bougudigiñe lueí jageíra. Gagámbadi jumá joun gumádimatiña, ru jugúyame inébesi joun queísi lubúdubu. ⁸ Máni jumá dúweiti ni ca úma, lueídügüya lidúweitina ínsiñeni le jadúweirubei júmagua. Le jínsiñejabuti lun gürígia líledi, adúga láali sun le lubeíbei lilúrudun Búngiu láu ladügüni líra. ⁹ Tariñajare Lerérun Búngiu. “Magámaridabá gürígia maríetiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun.” Gúñfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia

biledi bun queísi bínsiñegua búngua.” ¹⁰ Le jínsiñejabúbei, madügünti wuríbati lun ni ában, ánjawa lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburi wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfati maajali óra lun lagíribudun Wasálbaragúle ubouágun sugú láu dán meja le waffínerunbei luágu ugánu luáguti asálbaruni. ¹² Belújali áriebu buídu, yaráfaali larúgadun, ligía lúnti lubeí wígiruni wadügüni cátei wuríbati le adügübei lábugiñe lubúriga, lun wadáurunun wadáuragun queísi súdeara ja lábugiñetiña larúgouna. ¹³ Eibuga wamá queísi lubúdubu ítara queísi gürígia ja buídubaña, úouga ni cáta luágu jagáburi lun jarámudagun lueí jaríjin gürígia. Mabágarida wamá lídan bacháruau, lúma buri lanárime fédu, ni lídan salúfuri lúma iwíyeni, ni lídan gáganiguaú lúma gimúgau. ¹⁴ Lubáragiñe líra, rújumei Crístu guánarügü jubáragiñe lídan sun cátei, masáminara jumá lun jíchugun ugúndani lun lagúburi ayúmajani.

14

Madímurejabá luágu bidúje lueígiñe Jesucrístu

¹ Ánjein débili lubeí ában gürígia lídan laffíñen, resíbi jumeí, maríñagunga ni cáta lun luágu cátei le machourunbei luágu. ² Queí buri, añajein derégudati jaffíñen, jarítaguatiña luágu gayára lan jeigin affíñetiña furúmieguaugü cátei áni jeréderuba jarúmañu ligíbugiñe Búngiu. Añajein jíbiri, débilitiña lídan jaffíñen, meígintiña úwi. ³ Le eígiti furúmieguaugü cátei, moún lumuti únabu lan lanügüni le meiginbalin, le giñe májabei leigin furúmieguaugü cátei, moún lumuti giñe ladímurejan luágu le eígbalin, lugúndun resíbi láali Búngiu gürígia ligía queísi lánigu. ⁴ ¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagúdúni buídu.

⁵ Nijánya ában jémpulu. Añajein gürígia weíríti janügüni ában wéyu lueí ámu wéyu, añajein jíbiri, affíñetiña luágu ában lan lábu sun wéyu. Cáda ában lúnti lachouúruruni le uágubei larítagua. ⁶ Le areídubei som wéyu, ladügüñein lun líchugun inébesi lun Búngiu. Le eígibe furúmieguaugü cátei, leígini lun líchugun inébesi lun Búngiu, lugúndun rúti eteíngiruni lun Búngiu luágu eígini ligía. Le meiginbei úwi ladüga liloúguan laffíñen, lun líchugun inébesi lun Búngiu ladügei, rúti giñe eteíngiruni lun Búngiu luágu cátei le gayáraabei leigin según laffíñen.

⁷ Naríñagubalin líra lugúndun úa lan ni ában wadaangiñe abágariduti lun guánarügü, úa ni ában ouweti lun guánarügü. ⁸ Ánjawa abágarida, wabágariduña lun wadügüni lugúndan Búngiu, ánjawa ouwe, wounweña según lugúndan Búngiu. Ítara líña lubeíti, dándu lídan ibágarí queísi lídan ouweni, lání Crístu wagía. ⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banúgei quei ni cáta? Búngiu rügüñein lun lagúseragüdün, áni sun wagía, waráramaba ligíbugiñe lun wagúserun, ¹¹ queísi taríñagun Lerérun Búngiu. Inárüniti ítara quei gabágarí nan, líña laríñagun Búngiu, luágu jájuduraguba lan sun gürígia nigíbugiñe, áni jasúbudirubadina súngubei ligíbugiñe guríriguaú.

12 Cádi lubeíti ában wádaangiñe, lagúseruba luóúgua lúma Búngiu.

Machúgeraguagüdebé bidúje

13 Ligía, mouñ lubei wadmurejan jawágu wadújeñu lueigiñe Jesucristu. Lubáragiñe líra, derébugulá jaritagun lun madügün jumá ni cáta le gayáraati lachúgeraguagüdüni jíbiri, o lábुरुgüdüni lan lídoun figou. 14 Subúdi numúti luágu úa lan ni cáta le leígibe gurígia lun lawíyeduni ligíbugiñe Búngiu, áni chouuru numúti líra, áu queisi affiñeti luágu Jesucristu. Láu sun líra, ánjein jarítagua lubei ában gurígia luágu marúman lan ában cátei, marúmaanti lun, áni figou lun lun leígini. 15 Ánjeinti bañawurija laffiñen bidúje láu cátei le beígibe, mámaali bagáburiduña láu ínsiñejabuni. Madúgabá lun leferidirun ában gurígia le ueigiñebeí louwe Cristu, ladúgarügü beigin itaga cátei. 16 Míchiga jumá lubeíti lúgaaru lun ladímurejoún wuríba luágu cátei le gayáraabei jadügüni queisi affiñetiña luágu Cristu. 17 Larúeijan Búngiu máma cátei luáguti le eigíbeí o atúbeí, luáguti ában íbágarí le lánina ísuruni, darángilau lúma ugúndani le líchugubeí Sífiri Sándu woun. 18 Le esériwiduti lun Cristu lídan igáburi le, gúndaati Búngiu láu, áni buíti giñe jarúma gurígia.

19 Ítara méme wamá lubeíti áluaja lun lídan lan darángilau sun cátei, lun gayára lan wíderagun wámagua lun wawáanserun lídan cátei le lánina Búngiu. 20 Magúrinchaguabeí luwádigimari Búngiu lídan libágarí ában gurígia láu cátei le beígibe. Inárüni luágu jarúma lan sun eígini ligíbugiñe Búngiu, le wuríbabeí, lun leigín cátei le áburugüdütiña ámu gurígia lídoun figou. 21 Buíti lun meigin ban úwi, matún bínu, madügün ni cáta le achúgeraguagüdüti bidúje, o lábुरुgüdüni lan lídoun figou, o ledébiliragüdüni lan laffiñen. 22 Affiñeni le buágubeí, lúnti buágu guánarügü lan ligíbugiñe Búngiu. jGúndaati gurígia le gayáraabei larinágun luágu buídu lan cátei le ladügübeí, masándiragunga ligía lúngua láu dúru! 23 Ánjeinti le eigíbeí ában cátei láu machouúrni luágu buídu lan leígini queisi affiñeti luágu Cristu, gadúnrunti ladúga leígini, lugúndun meigin lumúti láu affiñeni. Sun le wadügübeí, ánjava arítagua luágu fágua lan moun láani wadügüni, figou woun.

15

Gúndaagüdadá gurígia bíledi, máma amürrü guánarügü

1 Wagía le jerebei lídan waffiñen, lúnti gagúraasun wamá jabá ja louguagiñabaña affiñe, lúnti warítangun luágu le buídubeí joun, mámarügü luágu wíchugun ugúndani wouniwagua. 2 Cádi ában wádaangiñe, lúnti lagúndaaraguagüdüni gurígia líledi láu le buídubeí lun gurígia ligía, lúma láu le gayáraati lagánwoundagüdüni laffiñen. 3 Ni Cristu, míchugunti ugúndani lúniwagua, lubáragiñe líra, suséreti le abürüjoúbeí tídan Lerérun Búngiu lun. “Núguchi, áburujati janábajan ja anábubalibu nuágun.” 4 Sun le aríñawagübeí tídan Lerérun Búngiu lúmagiñe binárü, lun larúfudajoún woun labürüjoúa, bürüwatí meja dimúrei buri ligía lun wanügün gurásu lúma dügüdaguaü lídaangiñe, gayára lámuga weménigiduntima luágu Búngiu. 5 Búngiu le íchugubeí gurásu lúma dügüdaguaü, íderagualaún lun jabágaridun lídan dan jáma jíbiri, queisi ladügüni Jesucristu. 6 Ítara lúba, sun lan wagía lídan ában, láu ábanrügü umálali, wíchuguba uweírugini lun Búngiu, le Lúguchi Wabúreme Jesucristu.

Agáambatiña ja mámabaña juríu luágu Wasálbaragüle

⁷ Resíbigua jumá lubeíti júniwagua quei gíñe lerésibiruníwa Crístu, lun liñurúniwa líri Búngiu. ⁸ Le nariñagubei, luágu liábinbei lán meja Crístu lun lesériwidun joun juríu, lun lagúnfulirun dimúrei le íchugúbei joun binádu wagúbürigu, lun larúfudún luágu gúnfuli láani Búngiu lerérun. ⁹ Liábinbei gíñe lun jíchuguba lan ja mámabaña juríu uweírighuni lun Búngiu luágu lareídun, quei tariñaguni Lerérun Búngiu.

Ligia níchuguba lubei uweírighuni bun jagánaguagiñe ja mámabaña juríu, nerémujaba gíñe luágu buweírighun.

¹⁰ Tariñajare gíñe Lerérun Búngiu.

Gúnda jumá, jugúya le mámabei juríu, úara jáma ja lánigubaña Búngiu.

¹¹ Tariñajare gíñe.

Rújuma sun ja mámabaña juríu inébesei lun Búngiu, adímureja jamá sun gürígia luágu luweírighun.

¹² Lariñajare gíñe Isaiás tidan Lerérun Búngiu.

Liábiba ában ladügawagun Isái, le lúnbei lagúmadiruniña ja mámabaña juríu.

Jagía, jeménigiduba luágu.

¹³ Búngiu, le íchugubalin eménigini woun, buíngüdalaün láu ugúndani lúma darángilaü lídan jafíñerun luágu, lun buíñu jumá láu eménigini, láu lubáfu Sífiri Sándu.

¹⁴ Nidújeñu, choúruguatina núngua luágu buin jíña lan láu areíduni lúma subúdi luágu wafíñen luágu Crístu, luágu gíñe gíchigadi jumá dimúrei buíti joun jibirigu. ¹⁵ Tidan gárada to, abürüjaadina jun láu sun furáangu luágu buri cátei le lun mabúlieidun jumáni. Nadügüñein luágu wadágimanu le rúlaalíbei Búngiu nun láu lareíni, ¹⁶ lun nesériwidun lun Jesucrístu jagánagua ja mámabaña juríu. Seríwi le nadügübei, napúrichijani ugánu lúmagiñeti Búngiu luágu Wasálbaragüle lun nanügübaña lan ja mámabaña juríu lun Búngiu, lun lerésibiruniña queisi gürígia ja jarúmaaru janígi láu luwádigimaridun Sífiri Sándu jádan.

¹⁷ Ítara líña lubeíti, áu queisi ában afíñeti luágu Jesucrístu, gébunati gúnda nan lídan nesériwidun lun Búngiu, ¹⁸ luágu rügüñein buri cátei le ladügübei Crístu guánarügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsu láali Crístu nerérun lúma náfaagun, ¹⁹ luweírín buri seíni lúma buri miláguru le nadügübei láu lubáfu Sífiri Sándu nídan, lun lanügüniña ja mámabaña juríu lúmoun. Láu igáburi le, jóustagüda náali lapúrichijóun ugánu luáguti asálbaruni lídaangiñe Crístu, lúmagiñe Jerusaléngiñe darí loúbawagun Ilírico. ²⁰ Ítara líña áfaaguadina lan lun napúrichijani ugánu luáguti Wasálbaragüle le ní lumuti magaambúngili lan líri Crístu. Mabúseeruntina nuwádigimaridun lun Crístu lídan fulásu le ní lumuti chúlújali lan ámu láu ugánu luágu, nubáragiñe, ²¹ lubáragiñe líra, súnwandan busén nan nagúnfuliruni dimúrei lébei le tariñagubei Lerérun Búngiu. Ja masúbudiringiñabaña luágu, jagáambuba luágu, gunfaráanda jagíame luágu.

Jarítaquati Páblo lídin Róma

²² Ladúga nesériwiduña lan lun Crístu lídan ámu fulásu, siñágili lubei nídin bisídaun, láu sun gíbeeli lan weíyaasu nabúseerun nadügüni. ²³ Guetóti, quei gumúnaali lan nuwádigimari lueígiñe oúbaü le, áni quei lúmagiñe lan binárü nabúseera nídin aríjaun, ²⁴ agúrabatina násügürün bisídaun dánme

le nídin Espáña. Lárigiñeme aríja náadün lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun. ²⁵ Ánjein guetó, neíbuga Jerusalén, barüina cátei joun wadújeñu lueígiñe Jesucristu ñi. ²⁶ Lugúndun wadújeñu ja Macedóniabaña jáma ja Acáyabaña jarítaguaaña joúndarun seínsu jádaangua lun joúnajani joun idújeñu gudémetiña ja Jerusalénbaña. ²⁷ Jarítaguaaña luágu buídu lan lun jadújeñu cátei le, áni richátiña, lugúndun dúwei jamúti joun le tímatimaati, lugúndun ítara quei jafánreinraguni affiñetiña ja juríu jarísin le lánina siélu jáma ja mámabaña juríu, lúnti giñéti jíderaguniña affiñetiña ja mámabaña juríu affiñetiña ja juríu luágu jemegeirun ya ubouágu. ²⁸ Dánme lubeíti gumúnaali cátei le, derége neíme seínsu le joun, ábame nídin lun Espáñoun, bisída naúnme dánme le násügürün. ²⁹ Chóuru numúti luágu dan lánme nachülürün júmoun, nachülürüba lan buin láu abíniruni lúmagiñe Crístu.

³⁰ Nidújeñu, ayúmuragueina jun luágu jínsiñejabu lun Wabúreme Jesucristu, lúma luágu ínsiñeni le íchugubei Sífri Sándu woun, lun júradun núma lídan áfaaguni, ayúmuragueina lun Búngiu nuágu. ³¹ Amúriaja jumá lúma Búngiu lun leséfurunina jawei mafiñetiña ja Judéabaña, lun giñe buídu lan lerésibirúniwa íderawaguni le nanügübei joun wadújeñu ja Jerusalénbaña, ³² lun gúndaabadina lan dánme le nachülürün júmoun eméraagua murúsun, ánjein ligía lubei lugúndaabei Búngiu. ³³ Júmalá Búngiu le íchugubei darángiläü. Ítaralá.

16

Mábugaü lun cáda ában

¹ Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligílisi to Cencreáboun, jun. ² Dánme le tachülürün júmoun, resíbi jumouñ buídu lídan líri Wabúreme, queísi lúnti lan ladügün jádan idújeñu lídan affiñeni. Íderagua jumouñme lídan furúmieguarügü cátei le temégeirun, lugúndun tugúya, sarágujaña tíderagun, íderagua táadina giñe.

³ Mábuga níña tun Priscíla, lúma lun Aquíla ja nidújeñu lídan nesériwidun lun Jesucristu. ⁴ Jagía, rújamuti jabágari guánarügü lídoun lénreengúnga lun jasálbaruni nibágari, teínqui níña lubeíti joun, áni mámarügü áu, sun giñe wadújeñu ja tílana jalígílin ja mámabaña juríu, rújamuti jeteingirun joun luágu líra. ⁵ Mábuga níña giñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebeí nun, le furúmiñebeí affiñeruti luágu Crístu ubúругu Acáya. ⁶ Mábuga níña tun María to ñadágimeinjáruboun sarágu jagánagua, jugúya Rómána. ⁷ Mábuga níña joun nupáisanu Andrónico lúma Junías já meja nibirigubaña furísunrugú, buíti jadímurejan láni Crístu apóstolugu jawágu, jagía giñe affiñerubaña luágu Crístu nubáragiñe.

⁸ Mábuga níña lun Amplías, numáda jínsiñeti nun queísi lánigu Crístu. ⁹ Mábuga níña lun Urbáno, woúba lídan wawádigimari luágu Jesucristu, lúma lun Estáquis, numáda le jínsiñebeí nun. ¹⁰ Mábuga níña lun Apéles, le arúfuda láalibeí lafiñen luágu Crístu sarágu weíyaasu, mábuga níña giñe joun tílana lúban Aristóbulo. ¹¹ Mábuga níña lun nupáisanu Herodión lúma joun tílana lúban Narciso ja affiñebaña luágu Wabúreme. ¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma giñe tun wadúje Pérsida to jínsiñeboun woun, to adúgaaruboun sarágu lídan líri Crístu. ¹³ Mábuga níña lun Rúfo, wügüri le buídubei igáburi le tímatimaati ligíbugiñe

Crístu, mábuga níña gíñe tun lúguchu, to gíñe ítarajarouboun quei ában úguchuru nun. ¹⁴ Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámabaña. ¹⁵ Mábuga níña gíñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu lueígiñe Crístu ja jámabaña.

¹⁶ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun títana liliígílisin Crístu jun.

¹⁷ Nidújeñu, ayúmuraguatina jun lun jaríjiniña cátaña lan ja afánreinraguagüdübaña gürígia, ru jagía achúgeraguágülei lun jafiñen. Múaraanti le jadügübei lúma le arúfudajoübei jun. Dise jumá jawei gürígia jagía, ¹⁸ lugúndun gürígia jagía, mesériwiduntiña lun Wabúreme Jesucrístu, jóungua guánarügü jeseriwida. Jeyéedañati gürígia ja ünabugutiña láu buri líñúlun lúma lubuídun lagaambún jerérun. ¹⁹ Subúdi jamúti sun gürígia luágu ñúdün jumá láu le lubeíbei Búngiu, ligía gúnda nubei, buséntina gíñe lun furése jumá lun jadügüni le buídubei, máma lun le wuríbabei. ²⁰ Búngiu le íchugubalin darángilaü, lagañeiragüdübadün luágu Máfia, furése. Binílaün Wabúreme Jesucrístu.

²¹ Mábuga líña Timotéo jun, le nouba lídan wadágimanu, mábuga jáña gíñe Lúcio, Jasón lúma Sosípater, ja nupaísanu, jun.

²² (Áu, Tércio, le abürüjabarun gárada to, mábuga níña gíñe jun, nidújeñu lueígiñe Wabúreme.)

²³ Mábuga líña Gáyo jun. Naganouña tídan lúban to gíñe lafúrederúboun joun sun títana ligílisi. Mábuga líña gíñe Erásto jun, le ágüdjabalin liseínsun fulásu, lúma gíñe wadúje Cuárto.

²⁴ Binílaün Wabúreme Jesucrístu sun jugúya. Ítaralá.

Rúwama uweíriguni lun Búngiu

²⁵ Guetóti, rúwama inébesi lun Búngiu, le gayáraabei ladügünün lúntima derégüdagü jumá lídan jafiñen, según ugánu luáguti asálbaruni le napúrichijabei, lúma arúfudajani luágu Jesucrístu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun ubou, láu sun abürüja jamá meja profétagu luágu. ²⁶ Guetó, láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jafiñerun luágu, gagáambadi jagíame lun Búngiu.

²⁷ ¡Uweíriguni lun Búngiu le ligíarügüti, ábanrügüti, le ligíarügüti chu áu, uweíriguni lun, lídaangiñe Jesucrístu, lun sun dan! Ítaralá.

FURÚMIÑETU LIGÁRADAN PÁBLO JOUN CORÍNTONA

Labürüjan Páblo joun tìlana liglìsi Corínto

¹ Áu Páblo, wálaadina Búngiu láu lugúndan lun ábanbadina la lání Jesucrístu apóstolu, le méme gíribei ában le loúnajan. Nabürüjañoun gárada to, úara lúma wadúje Sóstenes, jun, ² jugúya le wadújeñu lueigiñe Jesucrístu ja tìlanabaña lílìgilisin Búngiu to ubúruguboun Corínto, ja lánigubaña Búngiu ladúga lídaañadùn lan ában lúma Jesucrístu. Wájali Búngiu jun lun jedéregagun júngua lun le gumúti, queísi wájali lan joun sun ja agúarubalin líri Wabúreme Jesucrístu lídan sun fulásu lun jedéregagun jóngua lun. Jesucrístu Jabúremebei, ligía giñe Wabúremebei. ³ Resibi jumei abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Abíniruni le wánibei lídaangiñe Jesucrístu

⁴ Súnwandan neteñgiruni Búngiu juágu, luágu abíniruni le rúlaalíbei jun láu lareíni, lídaangiñe Jesucrístu. ⁵ Ladúga lídaañadùn lan ában lúma Crístu, rújali Búngiu sun luwúyeri írisini le lánina siélu jun, rújali ában oúnwenbun subúdi jun luougua, lun gayáraabei lan jadímurejan luágu láu ában lichú áu. ⁶ Ítara líña geféen jumá luágu inárúni lan le waríñagubei jun luágu Crístu. ⁷ Láu igáburi le, úati ni cáta jemégeirun lídaangiñe le líchugubei Crístu, sun anjünja lan agúrabajei wéyu le lúnbei lagíribudun Wabúreme Jesucrístu ubouágun. ⁸ Lágüdjabadùn Búngiu deréjüdagu lídan jafiñen darí lúmoun lagúmujoún, lun úa lan ni ában íchuguti jidúnrun luágu ni cáta dánne le liábin Wabúreme Jesucrístu. ⁹ Súnwandan lagúnfuliruni Búngiu lerérun, áni ligía agúarubei jun lun lídan jumá ában lúma Jesucrístu, le Liraü, le Wabúreme.

Fánreinguaü jádan lánigu Búngiu

¹⁰ Nidújeñu, ayúmuraguatina jun luágu líri Wabúreme Jesucrístu, lun júaradun, lun meréde jumá fánreinguañu. Abágarida jumá lídan úarani le gumúti, láu ában méme luwúyeri asáminaruni lúma ayúmajani. ¹¹ Nariñagunbalin le, nidújeñu, lugúndun aríñagaaña ja jádaangiñebaña lufámilian Cloé luágu njein lán nege múarani jagánagua. ¹² Ámuñegueinarügü lán nege cátei lariñagun cáda ában jídaangiñe, añájein nege jídaangiñe, aríñagatiña. “Áu, lánigu Páblo áu”, jariñaga jíbiri. “Áu, lánigu Apólos áu”, jariñaga jíbiri. “Áu, lánigu Pédro áu”, jariñaga jíbiri. “Áu, lánigu Crístu áu”. ¹³ ¿Cámeji sun le? ¿Fánreinwaguati funági Crístu? ¿Dáwaguatina funági luágu gurúwa luágu jufúleisein? ¿Ódi lídan níri jabásterá? ¹⁴ Teínqui níña lun Búngiu luágu mabásteragüdün nan ni ában jídaangiñe lueídügüya Críspo lúma Gáyo, ¹⁵ ítara, úati ni ában lun lariñagun luágu lídan lan níri labásterá lun nánigu lan. ¹⁶ Nariñaguñein guetó luágu badíseigüda náani giñe Estéfanás jáu sun tìlana lúban, marítaguntina ánjein badíseigüda nubei ámu. ¹⁷ Moúnajan lumúтина Crístu abásteragüdaja, loúnajañadina apúrichijei ugánu luáguti lasálbaruniña gürígia, máma láu apúrichijani le weíriguburiti, luei lagídarun lídaangiñe laníchigu loúnwen Crístu luágu gurúwa.

Arijúati lubáfu Búngiu lúma lichú láu lídan Crístu

18 Ítara líña ugánu luáguti loúnwen Crístu luágu gurúwa quei libídiouniga áu joun ja lúnbaña jeféridirun, ánjein woun, wagía le lúnbei wasálbarun, subúdi wamúti luágu lídaangiñe lan ugánu luáguti loúnwen Crístu larúfudei Búngiu lubáfu lun lasálbaruniña gürígia. 19 Bürüwati tídan Lerérun Búngiu. Nagürinchagubei lichú áu le lánina uboué le, nadügubei jafürendeí furéndeitiña lun ni cárame ánjein máma lubeí númagiñe líabin.

20 ¿Cáti un ju lan le chúbei áu, o le arúfudajabei, o le lan gasígenejadibalín buri cátei le lánina uboué le? Úati ju lan lun ni cáta, adüga láali Búngiu lichú láu uboué le lun libídiounigame áu. 21 Láu lichú láu, adügati lun masúbudirun jamáni ja lánigubaña uboué láu lichú áu le jawágubei. Láu giñe lichú láu, ába laráansejan lun lasálbaruniña ja afíñebaña luágu lárigiñe jagáambuni ugánu luágu loúnwen Crístu jawágu, láu sun barü jamaani jíbiri gürígia ugánu le quei libídiouniga áu.

22 Buséntiña juríu jaríjin milágu lun jaffínerun luágu Crístu, ja mámbaño juríu, buséntiña lun láubei lan lichú áu arúfudajani lun gayáraabei lan jerésibiruni. 23 Ánjein wagía, wapúrichija luágu Crístu le ádarawagúbei luágu gurúwa. Jayábiti juríu, siñáti jerésibiruni ában asálbaragúlei le ouwebei láu ában luwúyeri ouweni le busíganudúnati líbe líra, játi mámbaño juríu, janügüni quei libídiouniga áu. 24 Láu sun líra, añájein jádaangiñe juríu jáma ja mámbaño juríu ja agáambubalin lagúarun Búngiu joun lun lánigu jamá. Jagía, gayáraati jaríjini lubáfu Búngiu lídan loúnwen Crístu, lúma lichú láu lun lasálbaruniña ítara. 25 Joun lirájüñü uboué, libídiouniga áu laráansejan Búngiu, wel, weíriti lichú láu Búngiu sügü láu le chútimaabei áu ubouágu. 26 Nidújeñu, lúnti jasúbudiruni luágu wájali lan Búngiu jun, láu sun míbe jamá jádaangiñe chúti jáu segün uboué, áni míbetiña giñe jádaangiñe weirigutiña, o jádaangiñetiña lan família íñugutiña. 27 Anúadaja láaña Búngiu ja íbídiouguabaña áu segün uboué lun lichugun busíganu joun ja chúbaña áu, láu jaríjini luágu ni cáta lan lichú jáu ligíbugiñe Búngiu. Anúadaja láaña giñe ja lanügübaña uboué quei mabáfutiña lun lichugun busíganu joun ja gabáfubaña, láu jaríjini luágu ni cáta lan jabáfu ligíbugiñe Búngiu. 28 Anúadaja láaña Búngiu ja maweirigunbaña ubouágu, ja áubaña mebéresenwa lan, ja ni cátabaño, lun larúfuduni luágu ni cáta lan ja anáangubaña joúngua ubouágu. 29 Úati lubeíti ni ában gayáraati lanáangun lúngua ligíbugiñe Búngiu. 30 Rúládün Búngiu guánarügü jugúya afíñetiña lídoun ában lúma Jesucrístu. Ladüga cátei líra, íbjatiwa lichú áu lúmagiñe Crístu, gayáraati lerésibiruniña Búngiu queísí richáguatiña, derégeguañu woúngua lun, sálbañu. 31 Ítara líña lubeíti adüga wamei quei tariñagun Lerérun Búngiu. “Le busénti ladímurejan luágu uweiriguni, adímurejalá luágu luweírín cátei le adüga lálalibe Wabúreme Crístu woun.”

2

Ugánu luáguti Crístu le ádarawagúbei luágu gurúwa

1 Nidújeñu, dán meja le nídinbei lun nadímurejan jun luágu linárün Búngiu, adüga numúti mayúsurunga dimúrei buri íñuguti. 2 Dan lé meja júma nubeí, máluguntina meja napúrichijan luágu ámu cátei lueídügüya luágu Jesucrístu le ádarawagúbei luágu gurúwa. 3 Ába narúfudagun núngua jun queísí ában wügüri gudémeguti, adádagareina láu anúfudei lueí jamúga níjein lan mégeiti lídan nuwádigimari luágu Wabúreme. 4 Dán meja le nadímurejanbei jun, ába napúrichijani Lerérun Búngiu jun, máluajantina nagáñeirunün láu buri dimúrei

le jadímurejan wügüríña chu táu. Lubáragiñe líra, láurügü lubáfu lání Búngiu Espíritu nadímureja jun, ába jasúbudiruni luágu inárüni lan le nariñagubei jun. ⁵ Ítara líña jafiñerun lídaangiñe lubáfu Búngiu, máma lídaangiñe lichú jáu gürígia.

Arúfudaguati Búngiu lúngua lídaangiñe lání Espíritu

⁶ Láu sun líra, adímurejatiwa luágu ában luwúyeri lichú áu joun ja weínamujañábaña lídan jafiñen. Ánjeinti lichú áu ligía, máma lánina ubou le, máma giñe jáni ja agúmadijabaña ya ubouagu, ja madíseelibeí ánjañame gumúgua. ⁷ Luágu lichú láu Búngiu wadímureja, le áubei laráanseja lúmagiñe lubáragiñe ladügüni ubou lun lasálbaruníwa lun sun dan, gafánran wamámuga lídan sun luweírigin Cristu. Ligía rügüñein meja asúbudirei aráansejani ligía, guetó, subúdigüda láali woun. ⁸ Játi gumádimatiña lánina ubou le, siñáti gunfaráanda jamáni laráansejan Búngiu lubá wasálbarun, lugúndun lun jamúga gunfaráanda jamáni, mádaragun jamúti jamúga Cristu luágu gurúwa. ⁹ Ítara líña queísi tariñaguni Lerérun Búngiu.

Marijñaja jamágili gürígia cátei buíti lé buri laráansejabeí Búngiu joun ja jínsiñejabúbaña lun, magáambuñajagiña gürígia luágu cátei buíti líbeina líra, marítaguntiña ída lúba lan.

¹⁰ Ába lasúbudiragüdüni lání Búngiu Espíritu, le méme Sífiri Sándu, luáguti buri sun lubúidun cátei ligía woun, wagía afñetiña. Aríaa ja lumúti Sífiri Sándu sun cátei, áni subúdi lumúti lujúlilin-ágei larítagun Búngiu.

¹¹ ¿Ca jádaangiñe gürígia gayáraabeí lasúbudiruni ca lan tídaanbei lanígi ában gürígia, lueídügüya espíritu le lídaanbei gürígia ligía? Ítara líña giñe, lání rügüñein Búngiu Espíritu asúbudirei sun cátei le lánina Búngiu. ¹² Wagía afñetiña, máma ában espíritu le lánina ubou werésibirubei, Sífiri Sándu le ñúbinbei lúmagiñe Búngiu, ligía werésibirubei, lun gunfaráanda wamáni le rúlaalibeí Búngiu woun láu lareíni. ¹³ Adímurejatiwa luágu lareíni Búngiu láu buri dimúrei le larúfudajabeí Sífiri Sándu woun, máma láu buri dimúrei le wafúnrendeirun láu lichú wáu, le jáni gürígia. Ítara líña, laú lubáfu Sífiri Sándu, wafúnraanguagüdei linárün Búngiu joun gürígia ja íbjubalin Sífiri Sándu.

¹⁴ Gürígia le mibjimbalin Sífiri Sándu, májati lun larítagun Búngiu le larúfudajabeí lání Búngiu Espíritu jádaangiñe gürígia, lugúndun libídioniga áu lanügüni, siñá lumuti gunfaráanda, lugúndun cátei lán buri le, láu rügüñein lubáfu Sífiri Sándu gayára lan gunfaráandawa lan. ¹⁵ Ánjeinti gürígia le gámati Sífiri Sándu, gáma lumúti larúgounga le líchugubei Sífiri Sándu luágu sun cátei, jayábiti ja lirájñü ubou, siñáti gunfaráanda jamáni cáteiñein lan gürígia le eíbugubei lídan larúgounga le líchugubei Sífiri Sándu. ¹⁶ Queísi lariñawagun tídan Lerérun Búngiu. “¿Ca gunfaráanda jamáalibeí lisáminan Búngiu? ¿Ca gayáraabeí larúfudajan lun Búngiu?” Láu sun líra, wagía afñetiña, níjein lisáminan Cristu wádan ladüga íbija wamáali Sífiri Sándu.

3

Luwádigimari Pábo lun Búngiu lídan ában jáma jíbiri

¹ Láu sun líra, nidújeñu, dán meja le júmañadina lan, siñáti méja nadímurejan jun queísi joun gürígia ja lagúmadirubaña Sífiri Sándu, adímurejatina meja jun queísi joun gürígia ja míchaagugiñábaña jóungua lábugiñoun lagúmadijan Sífiri Sándu le gumúti—queísi joun irájñü—luágu buri cátei le luáguti Cristu. ² Ába

níchugun arúfudajani le ménreengunti jun, queisi líchugúniwa úri lun ában irájú le gurágili lewéñegua eígini le deréguati, lugúndun siñágili lan lájuluchun eígini le deréguati. Siñá jumuti meja líla lujúlilin-ágei larítangun Búngiu gunfaráanda, áni chúlú lúmoun dan le, siñá meme jumágili, ³lugúndun gagáburigidün queisi jagáburi lirájúñü ubou. Nijeingua ligía gimúgaü jidan, gañiguaü, fánreinguaü, máma jigiraguagüdüña júngua lun labúgurunün Sífiri Sándu, áni jadügüñein le jadügübei sun mútu. ⁴Lugúndun láu laríñagan ában. “Lánigu Páblo áu”, laríñagaya ában. “Áu lánigu Apólos”, jadügüña queisi gürígia ja lánigu ubou le.

⁵¿Cátanagi? ¿Cáteigi Apólosbei? Esériwidutiñarügü lun Búngiu wagía, ja idaangiñébaña jiábin afiñera luágu Cristu. Wadágimanu le líchugubei Wabúreme lun cáda ában wadaangiñe, ligía wadügübei. ⁶Áu ábunagubalin Lerérun Búngiu queisi nádü tídoun janígi, Apólos áturaguei nádü ligía láu larúfudajan méme jun luágu Cristu. Búngiu aweíridagüdübalin nádü, ligía edérebügüdübalin jafiñen. ⁷Ni lubeíti le ábunagubei, ni le áturagubei, ni cáta jagía, ánjeinti Búngiu, sun cátei ligía, lugúndun ligía aweíridagüdübarun nádü. ⁸Ában jáu ja ábunagubaña jáma ja áturagubaña, láu sun lafáyeirubei lan Búngiu cáda ában según luwúyeri lesériwidun lun. ⁹Íbirigu wagía lídan wadágimanu esériwida lun Búngiu, jugúya, ítara jíña quei múa le luwádigimaridubei Búngiu.

Ítara jíña gíñe queisi ában múna to lábunaguñounboun Búngiu. ¹⁰Fuleisei láadina Búngiu láu líchugun ubáfu nun lun nuwádigimaridun úara lúma. Niábiti queisi ában wügüri le subúsijabúbei lun labunún wagábu buídu—áú le íchugubalin ébuu lun jafiñen. Ámuti gürígia ábunagubei ligíbuagu ébuu ligía—jagía maésturugu ja arúfudajabaña luágu Jesucristu jun, nárígi. Cáda ában, lúnti goúnigi lan ída líña lan lábunagun ligíbuagu ébuu ligía. ¹¹Rúaali ébuu lun jafiñen, áni siñáti líchugúniwa ámu ébuu. Ébuu ligía, Jesucristu guánarügü. ¹²Gayáraati lábunagun gürígia ligíbuagu ébuu ligía laú cátei gebégiti le siñábei lágudúniwa, queisi gólu, pláta, lúma dübü gebégiti, o gayáraati lábunagun láu cátei le mebégibe sarágu, le gayáraabei lágudúniwa, quei fuláansu, murísi o mabúru. ¹³Lachúlürüba wéyu lun louchuni Búngiu jawádigimari sun gürígia ubouágu lun laríjini ída líña lán meja, ánjein gebégi lubei lúmoun mebégi lan. Louchagubei wawádigimaridun quei láu wátu geméti, aríja lámugei ánjein gayára lubei lawándun, ánjein gebégi lubei. ¹⁴Ánjein buídu lubei wawádigimaridun luágu Búngiu áni madúnamati lun lagünrinchawagúniwa, queisi siñá lan tagünrinchawagúniwa múna to adügütu láu cátei derébuguti, werésibirubei wafáyeiruaia lúmagiñe Búngiu. ¹⁵Ánjein mabuídun lubei wawádigimaridun luágu Búngiu, lagünrinchawagúba sun wawádigimari, weféridirubei sun cátei, wawánirügüba wasálbara, quei le séfugarügüti lúngua lídaangiñe wátu geméti.

¹⁶¿Ibidiñetisan jun luágu lilígilisin lan Búngiu jugúya, áni agánawa lan Sífiri Sándu jidan? ¹⁷Ánjoun lagünrinchagua ában gürígia lilígilisin Búngiu tugúya, lagünrinchagubei gíñe Búngiu gürígia ligía, lugúndun Búngiu jabúremebei tilana lilígilisin, áni jugúya guánarügü tilanabei ligílisi tugúya.

¹⁸Mayéeragua jumá júngua. Le arítaguti luágu sábiu lan según lichú áu le lánina ubou le, lúnti labúleiduni lichú áu ligía, lun lanügúniwa queisi ában ibídiounga táu según ubou, gayára lámuga lerésibiruni lichú áu le tímatimaati le líchugubei Búngiu. ¹⁹Lugúndun lichú áu le lánina ubou le, ában libídiouniga áu lun Búngiu. Tariñajare Lerérun Búngiu. “Áburügüda lumútiña Búngiu ja chúbaña áu según ubou le tídoun lisádaraana jabibun guánarügü.” ²⁰Aríñagatu gíñe.

“Subúdi lumúti Wabúreme Búngiu luágu mála lan jasáminan sábiugu.” ²¹ Ligía moún lubei lun janáangun júngua luágu arúfudajati le jafálarubei, ladüga gürígia rügüñadiwa sun wagia, áni rúlaali Búngiu sun cátei jun lun lesériwidun jun. ²² Rúlaadina jun láu sun Apólos lúma Pédro, lun warúfudajan jun. Rúlaali gíñe sun cátei le ubouágubei jun lun jayúsuruni. Rulumuti gíñe ibágari lúma ouweni jun. Sun le asúserudubei jun uguñe lúma sun le lúnbei lasúseredun jun, jáni. ²³ Jáni sun cátei ladüga lánigu Crístu jugúya, áni Crístu láni Búngiu.

4

Jawádigimari apóstolugu

¹ Lúnti lubeiti janügüniwa queisirügü esériwidutiña lun Crístu, ja íchugúbaña lun jarúfudajani linárün Búngiu lé meja arámudaguabei jun. ² Le lubeiti ibíjiti ában wadágimanu, lúnti ladügüni buídu lun larúfuduni luágu gadüna lan lun leménigidun liyúbudiri luágu. ³ Ánjein luágu noubadina, maweírinti nebéreserun luágu ída líña lan janügüni nesériwidun lun Búngiu, ni jugúya ni furúmieguarügü le ubouáguna. Ni áu guánarügü, siñáti naríñagun ánjein buídu lubei nesériwidun lun, o ánjein níjein lubei mégeiti luágu. ⁴ Láu sun madúnrun nan luágu ni cáta lurúma narítagn, máma luegíñe líra lun madúnrunbadina lan, Nabúreme agúseragüdúbalina. ⁵ Magúseragüda jumá lubeiti luágu buri cátei lubáragiñe dan, agúra jumá lagíribudun Wabúreme Jesucrístu ubouágun lun laságaruni cátei le arámudaguabei lídun larúgouna. Lasúbudiragüdúbei Wabúreme tarítagn cáda ában anígi, ca lan ueigíñe wadüje le buidun le adüga wamáalibe. Ábame ladímurejan Búngiu buíti luágu gürígia le buidubei adüga.

⁶ Nidújeñu, adímurejaadina nuougua lúma luágu Apólos queisi ában jémpulu jun lun gayáraabei lan jafúnrendeirun lídaangiñe le naríñagubei wawougua. Le lúnbei jafúnrendeiruni, lun manügün jumá ában gürígia weíri lueí le lúnbei lanügüniwa, queisi bürüwañu lan, lun gíñe manáangun lan ni ában lúngua luágu ában arúfudajati le lafálarubei, áni lanügeime le ában quei ni cáta. ⁷ ¿Cági adügübalibu buídu jawei jíbiri? ¿Cági cátei búmabei le mámabei líchugun Búngiu bun? Ánjeinti Búngiu lubei íchugubalin sun cátei bun, ¿cáti uágu banáangua búngua camá jamuga íbjárügü bumúti le búmabei láu báni búngua?

⁸ Jaganoún camá jamuga risijadün lídan cátei lánina Búngiu, ibíja jumáli sun le gayáraabei jabúseeruni lídaangiñe le líchugubei. Sandíguatün júngua camá jamuga jarúeijaña lúma Crístu, ígira wagia. ¡Buíti jamúga lun urúeigu jumá le tímátimaati lun jamúga gafánran wamá lídan jarúejan! ⁹ Laganoún nun luágu ígira láadiwa lan Búngiu wagia apóstolugu lídan lagúmujoún ubaráu. Ítara wáña queisi gürígia ja siádiwañabaña lun ouweni, ñübinjadiwa lun ábanbadiwa lan ariawasei lun jariaguniwa sun lílana ubou, dándu ánjeligu queisi gürígia. ¹⁰ Bariwatiwa queisi íbídiougua táu luegíñe wesériwidun lun Crístu, sun jarítaguñu jumá juougua luágu chu lan jáu lídan cátei lánina Crístu. Según jugúya, wagia débilitiwa, jugúya jéretün. Barü jamutiwa gürígia quei ni cáta, ánjein jugúya, inébetün joun. ¹¹ Chülü lúmoun wéyu le, áfagaadiwa ilámaü, mágürabu, lúma manáanguni, wuríbati jouseruniwa gürígia, mábantiwa, ¹² weíriri wawádigimari láu wájabu lun wágüdaagun woungua darí lun labúcharun wawágu. Anába jamútiwa gürígia, ába wounabun láu abíniruni. Eíbaajoúatiwa, awánda wamúti. ¹³ Adímurejatiña wuríba wawágu, rútiwa dimúrei buíti joun láu gurásu. Chülü lúmoun wéyu le, ousera jamútiwa camá ífei láni ubou, quei cátei le mabúseerun jamáli gürígia.

¹⁴ Mára nabürüjañein le jun lun janügün busíganu, nabürüjañein jun lun narúfudajan jun queísi joun nisáanigu jínsiñetiña nun. ¹⁵ Láu sun jamúga añájein lan díisi-mílu maésturugu arúfudajatiña jun luágu Crístu, áu rügüñein júguchi lídan jafiñen luágu, ladúga áu lan anügübalin ugánu jun luágu Wasálbaragüle lun gayáraabei lan jafiñerun luágu. ¹⁶ Amúriajatina lubeíti júma lun jáyeijani nigáburi.

¹⁷ Ligía nouñajaanbalin Timotéo lun líderagunün luágu cátei le. Jínsiñeti nun sarágu, ítara líña queísi ában niraú lídan Jesucrístu, gayáraati neménigidun luágu. Larítaguagüdübadün luágu ligáburi nabágaridun queísi affiñeti luágu Crístu, lun jáyeijani. Niján luwúyeri igáburi le narúfudajabei tídan sun ligílisi lídan sun fulásu. ¹⁸ Añájein jídaangiñe, buin jáña láu anáanguni únguaü, jarítaguatiña luágu mídinbadina lan bisídaün ladúga nanúfudei lun nagágibudagun júma. ¹⁹ Bulíeiguatiña, agúrabatina nídin aríjaün madíse, ánjein busén Wabúreme. Ábameti naríjini ca lan jayáraabei barúgua túngua ja adúga lun jesériwidun lun Búngiu, mámarügü le jaríñagubei. ²⁰ Lugúndun dan le larúeijan Búngiu tídan wanígi, máma láurügüti dimúrei, níjein lubáfu wádan lun wadügüni lugúndan. ²¹ ¿Cáteiti jímein jubeí. lun nabeíchunün dánme le nachülürün, ódi lun nídin aríjaün láu ínsiñeni lúma uálini?

5

Lagúserawagüdüñ ában le adügübei figou

¹ Agaambúaaali luágu níjein lan ában jídaangiñe lagámariduñoun lúmari lúguchi. Ában oúnwenbun iwíyei líra, le majouabei lun ni jádan ja ibídiñejabubaña lun Búngiu. ² ¡Áni laú sun líra, anáanguagídün júngua! ¡Lúntirügü jamúga jírudagun luágu líra! Gürígia le adügübalin lanárime iwíyei le, lúnti labugün jídaangiñe. ³ Láu sun úa nan júma le ñí jubei, anájein júma narítangunrugu, áni darínaali lídúnrun le adügübalin figou le, camá jamuga ñíñadina júma lun nagúseragüdüni. ⁴ Guetó, le lúnbei jadügüni, lun jóundaragun lídan líri Wabúreme Jesucrístu, ñíbadina júma narítangunrugu, ñíbei giñe lubáfu Wabúreme Jesúsu júma. ⁵ Lúnti lubeíti jedéregeruni wügüri ligía lun Máfia láu jaságaruni lídaangiñe jídamurin, lun lagúnrinchawagún lúgubu, sálba támuga luwáni dánme le lagíríbudun Wabúreme Jesúsu ubouágun.

⁶ Moún lumuti janáangun júngua luágu le jadügübei. ¿Magáambun jumágili cátei le. résigüda lumútu murúsun ísi sun fulúwaaru to ídounboun líchugúa? Ítara méme giñe, murúsun figou jagánagua gayáraati lagádeirunün súngubei. ⁷ Gídájumei lubeíti sun iwíyei le lánina binádu igáburi le ígirubei jídan, le ítarabei quei ísi le pasáali. Ábame jarúma jumá le tímatimaati. Ítara júba quei fein to eigíboun lídan fédu le páscua, to adügübon táu fulúwaaru to sún umuti tañoúndawagún, to magánatu ísi. Jarúmaali wadáriragun woúngua ligíbugiñe Búngiu ladúga derége láani Búngiu Crístu lun loúnwen luágu wafígon quei meja ladágaragüdüniwa mudún lídan fédu le páscua luágu figou. ⁸ Ítara líña lubeíti, queísi sálbaadiwa lan, lúnti wagáburidun ában igáburi jarúmati, falá wameíme ínárüni. Igáburi ligía, ítara líña quei fein to magánatu ísi. Moún lumuti wagáburidun queísi meja wagáburidun furúmiñe, moún lumuti woúserun wuriba, ni lun wasígirun láu tiwíye wanígi. Sun igáburi ligía, ítara líña quei ísi pasáali.

⁹ Aríñagatiná meja jun tídan to ában nigáradan luágu moun lan lun jeréderun lídan ában jáma ja abágaridubaña lídan salúfuri. ¹⁰ Mára meja nariñaguña jun lun jadisedun le gumúti jawei sun lirájüñü ubou le, ja salúfuribaña, o ja lan meménijabutiña, o jíwerutiña, o ájuduragutiña joun sándu, lugúndun lun jamúga mánbadün lan ni cáta jáma, gásu jamúga jáfuridun ubouagugiñe. ¹¹ Le nabúseerubei nariñagun jun, lun meméterun jumá lúmoun ni ában le aríñaguti luágu idújei lan lueigiñe Jesucristu áni salúfuriti, o meménijabuti, o judúguati joun sándu, o marásualuguti, bachárua o jíweru. Mouñ lumuti ni lun jeigin lúma idújei le ítarati. ¹²⁻¹³ Mára áu lúnbei nagúseragüdüniña ja bougudibaña luei Cristu, Búngiuba agúseragüdaña. Wagía, lúnti wagúseragüdüniña wadújeñu lueigiñe Jesucristu ánjein jadügüña lubei wuríbati. Ligía gidájumei lubei gafígounti le jagánaguagiñe.

6

Wuríbu buri jagíbugiñe agúseragüdütiña ja máma affíñetiña

¹ Dan le níjein lan cátei lúnti laríñaajan ában jídaangiñe líri ámu, ¿cági uágu jídin jámoun agúseragüdütiña ja ibídiñebei Cristu joun, lubáragiñe jamúga jídin jámoun lánigu Búngiu? ² ¿Ódi ibídiñeti jun luágu jagúseragüdübaña lan lánigu Búngiu lánigu ubou? Ánjeinti jagúseragüdübaña lubei lánigu ubou, ¿siñá jumuti buri cátei ñübüríti le aráansera? ³ ¿Ibídiñeti jun luágu wagúseragüdübaña lan giñe ánjeligu? ¡Gúbuméti gayára lan wagúseragüdün luágu buri cátei lánina ibágarí le! ⁴ Ánjein níjein lubei buri wuríbu jagánagua luágu buri cátei le lánina ibágarí le, ¿cámegi jídin aríñaaja joun ja mafiñebaña luágu Jesucristu, ja málabei lichú áu le jádaanbei ladúga máma lan lúmagiñeti Búngiu? ⁵ Nariñaguñein le lun janügün busíganu. ¿Úati funági íbini ában chu táu jídan le gayáraati laráanseruni ában cátei jádan lidújeñu lueigiñe Jesucristu? ⁶ ¿Lúnti lídin ában idújei aríñaaja líri lidúje joun agúseragüdütiña ja mafiñetiña luágu Cristu?

⁷ Láurügü jawuríbujaan jumagua, ábanjali mabuíduni le gumúti líra. Buítimaati lun jawánduni maríchaü le adügübei jun sügü láu jageíndagun ladúga. Buítimaati lun jígirun lun líwerujoñ jueí. ⁸ Ánjein jugúya, lubáragiñe líra, adúgatün maríchaü, íweruja jugúya, íbini jawei jídujeñu guánarügü.

⁹⁻¹⁰ ¿Ibídiñeti jun luágu ja lan adügübaña wuríbani, mafánranbaña lan lídan larúeijan Búngiu? Sun ja agámaridubaña mamárieidunga, ja ájuduragubaña joun sándu, ja agámaridubaña ja marieitiña, ja wügüríña ja agámaridutiña wügüríña jáledi, jíwerutiña, meménijabutiña, bacháruatiña, marásualugutiña, ja anügübalin láni ámu láu jabíbul—sun ja adügübaña wuríbani líbe buri le, siñábei jebélurun lídoun larúeijan Búngiu síelu. ¹¹ Añájein jídaangiñe, ítara jañá meja, ánjein guetó, chibáwaali jífígoun, derégeguaadün júngua lun Búngiu, áni resíbi láadün queísi lánigu ladúga le ladügübei Wabúreme Jesúsú juágu, lúma sun le ladügübei láni Búngiu Espírítu juágu.

Wágubu, ában cátei derégewati lun Búngiu

¹² Aríñawagúati. “Gayáraati ladügüni gürígia le labúseerun ladúga.” Inárüni líra, áni máma sun cátei lun buídu lan lanügün. Gayáraati ladügüni gürígia le labúseerun, wel, mouñ lumuti lígiraguagüdün lúngua lun lagúmadiruni layúmajan. ¹³ Inárüni le aríñawagúbei luágu ladügüni lan Búngiu eígini lun weígini, adügalei warágeirugu lun ladügüni wadágimanu láu weígin. Inárüni, áni lagúmuchaguagüdübei Búngiu biángubei cátei le, mamégeirun wamáalime.

Ánjeinti wágubu, madügünti lun wadügün salúfuri láu, ladügün wágubu lun Cristu, lun ligiaba lan labúreme, áni ligía íchugubalin ubáfu lun wágubu lun gayáraabei lan wesériwidun lun, láu. ¹⁴ Ítara quei lásaaragüdüni Búngiu Cristu lídaangiñe oúweni láu sun lúgubu, lásaaragüdübadiwa giñe láu sun wágubu, láu lubáfu.

¹⁵ ¿Ibidiñetisan jun luágu líbiri lan cátei le únbei wagúara lúgubu Cristu cáda ában jidaangiñe? ¿Nanúgeiméti núgubu le líbiriabei lúgubu Cristu lun nadügüni líbirime túgubu ában jóru? ¡Madügün nubeí! ¹⁶ ¿Ódi ibidiñeti jun luágu dan lan le leméterun ában gürígia túmoun ában jóru, biángubei jagía ñübintiña lun ítara jabá lan quei ában méme úgubu? Tariñajare Lerérun Búngiu. “Jayábinba biángubei lun ítara jamá quei ábanrügü.” ¹⁷ Ánjin dan le liábin ában gürígia lun lídan lan ában lúma Cristu, ában liábin láni Cristu Espíritu lun ában lan lúma láni gürígia ligía espíritu lun ábanrügü jamá espíritu.

¹⁸ Anúraja jumá lubeiti lueí salúfuri. Mítaraanti salúfuri queísi ámu figou, furúmiñegarügü ámu figou le jadüga gürígia, boágudin lueí jágubu ladüga dáñu, ánjin le agámariduti mamárieidunga, ladügüña figou luágu lúgubu guánarügü. ¹⁹ ¿Ibidiñeti jun luágu lúban lan Sífiri Sándu wágubu, le líchugubei Búngiu woun lun laganouún wádan? Máma wagía labúriñabei wágubu, Búngiu labúremebei. ²⁰ Agáñija lumútiwa Búngiu séru lun lánigu wamá. Ligía lúnti lubeí wíchugun inébesi lun Búngiu dándu láu wágubu quei láu wáni espíritu lugúndun láni Búngiu biángubei.

7

Dimúrei buri luáguti maríei

¹ Guetó nouñabaali lé buri uágubei jálügüdana tídan jigáradan to jabürüjaboun nun. Inárüni luágu buídu lan lun wügüri lun magámaridun lan, ² quei njein lubei sarágu salúfuri, buítimaati lun lagámaridun wügüri, lun giñe tagámaridun würi, súnwandan láu amárieiduni. ³ Lúnti lagúnfulirun wügüri túma lúmari queísi úmari, lúnti giñe tagúnfulirun würi lúma túmari. ⁴ Máma úmari to würi labúremeboun túgubu guánarügü, láni giñe túmari. Máma giñe úmari le wügüri labúremebei lúgubu guánarügü, táni giñe lúmari. ⁵ Mamájara jumá lun jesériwidagun júniwagua, ánjaün gubeirügü adüga darádu lun mayúsuragun jumá júngua luágu átiri dan lun jichaagun júngua lúnrügü jayúmuragun lun Búngiu. Lárigiñe líra, lúntiya jayúsuragun júngua, lueí lásiñerun jágüdaagun júngua, ábame lafigoungüdünn Máfia láu jeméterun jámoun ámu jaweí jámarigu.

⁶ Máma naríñaguña luágu lúnti lan jagámaridun, gayáaraarügüti jáluajan úmari lun jamárieidun jáma ánjaün busén. ⁷ Áu, buséntina jamúga lun sun lan gürígia gayára lan jágüdaagun jóungua lun magámaridun jamá queísi áu. Subúdi numúti luágu siñá lan ítara, rújali Búngiu ámuñegueinarügü ubáfu lun cáda ában, ában luwúyeri joun jíbiri, ámu joun jíbiri.

⁸ Ja mámarigiñabaña, jáma ja jiláañabaña úmari, aríñagatina joun luágu buídu lan jamúga lun jeréderun mámariga queísi áu, ⁹ ánjin siñá lubei jágüdaagun jóungua, buíti lun jagámaridun (súnwandan láu amárieiduni) sügü láu lun jeréderun láu ában luweírín ayúmajani le siñábei jawánduni.

¹⁰ Ánjaña ja maríeiñañabaña, aríñagatina joun lun mígirun táani würi túmari. Gumádi le, lídan lubúdubun máma nugúmadin, lugúmadin Wabúreme. ¹¹ Láu sun líra, ánjin tígira würi túmari, lúnti teréderun mámariga, o taráandarun lan lúma túmari. Mouñ lumuti giñe lígirunun wügüri lúmari.

¹² Joun jíbiri, aríñagatina queísi dimúrei le náni, máma láni Wabúreme, luágu ánjein lan mafiñen tubei lúmari ában le afiñeti luágu Crístu, áni gagúndaantu lun tasígirun agánawa lúma, mouñ lumuti lafánreinragun túma. ¹³ Ánjein giñe mafiñen lubei túmari ában wúri to afiñetu luágu Crístu, áni gagúndaanti lun lasígirun agánawa túma, mouñ lumuti tafánreinragun lúma. ¹⁴ Úmari le mafiñebeí, derégewaali lun Búngiu láu lídaañein lan ában túma lúmari to afiñetu luágu Crístu, úmariti to mafiñetu, derégewaaru giñe lun Búngiu láu lídaañoun lan ában lúma túmari le afiñebeí luágu Crístu. Lun jamúga máma líña lan, ítara jáña jamúga jisáanigu quei jasáanigu ja mafiñebaña, ítara, derégewañu jáña lun Búngiu. ¹⁵ Ánjein busén lubei úmari le mafiñebeí luágu Crístu lun lígirunun lúmari, o wúri to mafiñeboun lun tígiruni túmari, ígiragua jamá. Lídan oubaü líra, mouñ lumuti jafósuruniña úmarigu ja afiñebaña úmarigu ja mafiñebaña lun jeréderun jáma, lugúndun wájali Búngiu woun lun wabágaridun lídan darángilaü. ¹⁶ Ában giñe cátei, ¿cági basúbudirubei, amürü wúri, ánjeindügü gayára lubei basálbaruni búmari láu beréderun lúma? ¿O cági basúbudirubei, amürü wügüri, ánjeindügü gayára lubei basálbarunun búmari láu beréderun túma?

¹⁷ Lídan sun luwúyeri, lúnti labágaridun cáda ában quei líchuguni Wabúreme lun, áni quei lubei meja giñe, dan le lagúarunbei Búngiu lun lun lánigu lan. Ítara líña naríñaguni tídan sun ligílisi. ¹⁸ Ánjein agúara Búngiu lun ában gürígia le resíbi láalibeí circuncisión, lé meja liseíni lídaradun Búngiu jáma lánigu, lúnti leréderun ítara, ánjein giñe agúara lun ában le merésibirungili circuncisión, mouñ lumuti lerésibiruni. ¹⁹ Mebéresenwati ánjein resíbi lubei circuncisión lúmoun merésibirün lán, le busénwabei, lun lagúnfulirúniwa lugúmadin Búngiu. ²⁰ Cáda gürígia lúnti leréderun lídan igáburi lé meja gádaanbalin dan le lagúarunbei Búngiu lun lun lánigu lan. ²¹ Ánjein meja idámuni bubei dan le lagúarunbei Búngiu bun, madíjeribá luágu líra, ánjeinrügü líñáti gayára lubei báfuridun lídaangiñe idámuni ban, adügabei. ²² Lé meja idámunibeí lun labúreme ya ubouágu dan le lagúarúnbei lun lun lafiñerun luágu Crístu, gidáali lueí lubáfu figou lun lesériwidun lun Wabúreme Jesucrístu, ítara méme giñe, lé meja mámabei idámuni lun ában gürígia ubouágu dan le lagúarúnbei lun, lidámunjali Crístu, ligíajali Labúreme. ²³ Agáñija láadün Búngiu luágu ouñwenbun ebégi, mígira jumá lun janügünün wügüríña lidámunne jagúndan, lidámun jumá lugúndan Búngiu. ²⁴ Ítara líña lubeíti, nidújeñu, madíjeri jumá cátañañadün lan bougudigiñe jibíti, reidei jumá ligíbugiñe Búngiu lídan méme igáburi lé meja gádaanbalün dan le lagúarunbei jun.

²⁵ Jawágu gürígia ja mámarigiñebaña, úati ni ában gumádi núma le jamúga lúmagiñeti Wabúreme, naríñagaali le narítangun, áu queísi ában le gadúnati lun lafiñerúniwa luágu, luágu lareíni Wabúreme le rújalibeí murúsun lídaangiñe lichú láu nun. ²⁶ Lídan narítangun, lúnti leréderun gürígia quei lubei, ladúga buri lidére dan le gádaanbaliwa. ²⁷ Ánjein gámari bubei, málugabá bígiragun, ánjein mámari bubei, málugabá bagámaridun. ²⁸ Ánbaju amárieida, máma figou, ánjoun giñe amárieida ában irájü, máma giñe figou, láu sun líra, ñibeí asúfuriruni joun ja gámaribaña, áni buséntina jamúga masúseredun lan líra.

²⁹ Nidújeñu, niján le nabúseerubei naríñagun. Murúsun rügáli dan wabá lun wesériwidun lun Búngiu. Lúmagiñe lubeíti guetó, ja gámaribaña, lúnti jesériwidun lun Búngiu táu sun janígi camá jamuga mámaritiña. ³⁰ Mouñ

lumuti wíchugun dan lun íruni o ugúndani le gádaanbaliwa, o lun umégeguni le wámabei, lun lagídaruníwa lueí wadügüni le lúnbei wadügüni quei esériwidutiña lun Búngiu, ladüga loúguati dan. ³¹ Masáminara jumá sarágu luágu lubuídun cátei lánina ubou le, le jánibei lun jayúsuruni, ladüga ubou le, le waríjibei, lagúmuchaña, lúnti jarítangun luágu cátei le magúmuchadibei.

³² Buséntina lun madíjeri lan jarítangun luágu ni cáta. Dan le mámarí lan ában wügüri, larítangun luágu buri cátei le luáguti Búngiu lúma lun lesériwiduni buídu. ³³ Ánjeinti dan le gámarijali, larítangun luágu buri cátei le lánina íbágari le, lúma lun lesériwidunun lúmari buídu, ³⁴ biánguañein cátei lun leténirun lun— lun lesériwidun lun Búngiu lúma lun latoúnigirunun lúmari. Ámuti gíñe touserun würi maríeitu tueí to mámariboun. To mámariboun, tarítangun luágu buri cátei le luáguti Wabúreme Búngiu, lun derégeguñu tan túngua lun Búngiu dándu láu túgubu queísi táu tanígi. Ánjounti to gámariiboun, tarítangun luágu buri berésegu lánina íbágari le, lúma lun tesériwidun buídu lun túmari.

³⁵ Naríñaguñein le jun luágu jáni fuleísei, máma naríñaguñein lun mamárieidun jumá. Naríñaguñein lun jabágaridun lídan ában igáburi le buíti, esériwideina lun Wabúreme, derégeguñu júngua lun, marítangunga sarágu luágu cátei lánina íbágari le.

³⁶ Agübürigu ja arítagubaña luágu buídutima lan lun tamárieidun jaraü lugúndun taweíyaaduña lan, áni ánjein buítima lubeí líra, lúnti jadügüni le uágubei jarítagua luágu buídu lan—gayáraati jíchugunun lun tadári lun tamárieidun lúma, máma figou líra. ³⁷ Ánjein añájein lubeí ámu agübürigu, derégüdagutiña lídan jarítangun luágu mouñ lumuti lan lun tamárieidun jaraü, áni memégeiruati lun tíchugúniwa, áni gayáraati jadügüni le jabúseerunbei, buíti jadüga lun míchugun jamánun jaraü lun tamárieidun. ³⁸ Ja lubeíti íchugutu jaraü lun tamárieidun, buíti jadüga, ja míchuguntu, buítimaati jadüga.

³⁹ Würi to maríeitu, lábugiñeñoun leréreejan túmari, lurúma lúrudu, sun wínwangili lan, ánjein ouwe túmari, gayáraati tamárieidun lúma le tabúseerun, afíñeti rügáali ligía luágu Crístu. ⁴⁰ Láu sun líra, buítimaabei dan tun ánjounya mamárieidun. Ligía narítangunbei, áni afíñetina luágu ligía lan gíñe larítangunbei láni Búngiu Espírítu.

8

Eígini buri le adágarawagüdüti joun sándu

¹ Guetó nadímureja luágu eígini le adágarawagüdüti joun sándu. Inárüni luágu subúdi wamáni luáguti buri cátei le, queísi jaríñaguni, awáansegüda lumútiwa wasúbudin lídan cátei málati, ánjein ínsiñeni, awáansegüda lumútiwa lídan lubuídun igáburi. ² Le arítaguti luágu níjein lan lasúbudirun, íbídíñegilirügü líña ni cáta lun queísi lubúdubu. ³ Ánjein le jínsiñejabúbei lun Búngiu, subúdi lumúti Búngiu gürígia ligía queísi lánigu.

⁴ Luáguti lubeíti leigín eígini le adágarawagüdüti joun sándu, inárüni luágu ni cáta jamá sándu ubouágu, máma jamá búngiugu ladüga subúdi wamúti luágu ában rügüñein lan Búngiu. ⁵ Añájein mútu ubouágu, jarítaguatiña luágu añájein lan bürübünü búngiugu jáma abúremeigu síelu lúma ubouágu, ⁶ ánjeinti woun, wagía le afíñebei luágu Crístu, ában rügüñein Búngiu, le Wáguchibei. Ligía adügübalin sun cátei, áni ligía le únbei wesériwida táu sun tarúman wanígi. Ában

rügüñein giñe Wabúreme, le Jesucrístu, le ídaangiñebei ladügüwa sun cátei, áni ligía le ídaangiñebei wibíjei íbágari magúmuchaditi.

⁷ Másutiña ja afiñebaña luágu Cristu gayára jafiñerun luágu ni cáta jamá sándu, añájein já meja jéchubaña ájuduragua joun sándu, jou jamágili eíginí ligía queisi cátei adágarawagüdüti joun búngiu. Queíti lougua lubei jafiñen luágu gayára lan jeíginí afiñetiña eíginí ligía, ába mabuídun lan lasándiraguagüdüniña joungua ligibugiñe Búngiu láu jeíginí eíginí ligía. ⁸ Inárüni le jariñagubei luágu máma lan cátei le weígibeí gayáraagüdübalin lerésibiruníwa Búngiu, mabuíduntimaabadiwa ligibugiñe Búngiu lueígiñe weígin, maríbaduntima wagiame lueígiñe meígin wáma. ⁹ Gayáraati jeígin eíginí le adágarawagüdüti joun sándu, lúntirügü góunigi jumá lueí jeíguadagüdüniña jidújeñu lueígiñe Cristu ja louguaña jafiñen ánjein buídu lubei lúmoun mabuídun lan. ¹⁰ Quei jamúga guetó, amürü le subúdíjábubei luágu gayára lan beígin furúmieguarügü eíginí, bañúura eíga lídan ában fulásu le jóunti sándu, laríjabu ában idújei le débiliti lafiñen luágu buri cátei le, ñi, lanügüba gurásu buágu lun giñe leígin lídaangiñe eíginí le, le adágarawagüdüti joun sándu. ¹¹ Ítara, ladüga bisúbudin, féridigüda bumúti bidúje le débilibei lídan lafiñen le giñe ueígiñebei louwe Cristu. ¹² Dan lubeíti le jañáwarijani jarítagan idújeñu ja débilibaña lídan jafiñen, jadügüña lun jafígounjan jidújeñu, áni jugúya guánarügü jafígounjaña giñe. ¹³ Ligía, ánjein lubei náburugüda nidúje lídoun figou ladüga cátei le neígibeí, buítimaati lun meíginidügüya nan úwi lueí nafígounjagüdüni.

9

Lirícha buri ában apóstolu

¹ Áu, furáangutina lun nadügüni le nabúseerubei, garíchatina giñe queisi ában apóstolu, aríja náali Wabúreme Jesúsu, áni jugúya guánarügü asálirubaña lídaangiñe nuwádigimaridun luágu Wabúreme. ² Fágua manügün jabáquina jíbiri queisi apóstolu, ánjeinti jugúya, gásu janügünina queisi apóstolu, lugúndun láu afiñe jumá luágu Cristu, arufuda lumúti líra luágu inárüni lan luágu ában nan apóstolu.

³ Niján noúnabagülebei joun ja adímurejabaña nuágu. ⁴ Garíchatina lun nerésibiruni sun le íchugübei nun lun neíginí lúma lun nátuni queisi nafáyeiruaja luágu nuwádigimari luágu jáni fuleísei. ⁵ Garíchatina giñe lun namárieidun túma ában wúri to afiñetu luágu Cristu, lun giñe nanügünun númagua luágu nuweíyasun quei ladügüni Pédro jáma ja jíbiri apóstolugu, jáma giñe ja lamúlenu Wabúreme. ⁶ ¿Ódi jarítaguatün luágu áu rügüñein lan lúma Bernabé marícha lun werésibirun wágüdaja jumagiñe lun gayára lan wíginu wawádigimaridun láu wájabu lun wapúrichijani Lerérun Búngiu? ⁷ Queisigubeirügü, máma súdaara guánarügü afáyeirubalin cátei lé buri layúsurubei, le ábunagubei beíbei, jóuti tídaangiñe, le oúnigirubei bágasu, guráti lídaangiñe míligi le lamíligijabei. ⁸ Áni marítagua jumátia luágu nariñaguñein lan le queisirügü jarítagan gúrgia, lugúndun aríñaga lumúti giñe lílúrudun Moisés. ⁹ Laríñajare tidan lílburuna lúrudu. “Magüraguabeí liyúma bágasu le lánina wadágimanu lueí leígin lídaangiñe ílaü le léferejabei.” Máma laríñaguñein Búngiu líra jawáгурügü bágasu, ¹⁰ laríñaguñein giñe queisi ában jémpulu woun. Luágu wáni fuleísei labúrüdüwa lúrudu le, lugúndun dándu le awoújabalin múa, queisi le éferejabalin líla nádü, lúnti jadügüni láu eménigini luágu jerésibirubei lan jafánran lídaangiñe alúbajani. ¹¹ Queisi bunágua wamáali lubei Lerérun Búngiu

tídan janígi, ¿gíbeti funági larijín jun lun walúbajan murúsun cátei júmagiñe lun wágüdaagun woúngua? ¹² Ánjein garícha jabeí ámu lun líra júmagiñe, garíchatimáatiwa.

Mayúsu wamúti iríchaü le wawágubei. Lubáragiñe líra, awánda wamáali sun le wemegeirubei lueí lejeñreendun jun agáambeí wapúrichijani Lerérun Búngiu, ladüga wamúriajan wágüdaja júmagiñe. ¹³ Subúdi jumúti luágu ja lan ñadágimeinbaña liglísirugu, lídaangiñe le liglísirugubei jawínwanda. Ja eténirubaña lun latárü le ñi lubei líchugúa adágaragüdüni, jóútiña úwi jádaangiñe anímaalu ja adágarawagüdübaña ñi. ¹⁴ Ítara líña gíñe lariñaguni Wabúreme Jesúsu lun ja lan apúrichijabalin ugánu luágu, lun gíñe jádaangiñe lan ja agáambubalin ugánu ligía jawínwanda. ¹⁵ Áu, mayúsugidina ni ában lídaangiñe iríchaü le, máma gíñe nabürüjañein le jun lun jíchugun som cátei nun. ¡jimein numúti nouñwen niláma lubáragiñe neféridiruni ugúndani le nuágubei láu napúrichijani ugánu luáguti asálbaruni, magúburajanga luágu!

¹⁶ Máma cátei lúnti napántajan luágu láu napúrichijani ugánu luáguti asálbaruni jun, lugúndun mósu nadügüni. ¡Fugiábu áu ánjein mapúrichijan nan ugánu le! ¹⁷ Lun jamúga mínsiñe lan nun lun napúrichijan, láu sun luwúyeri mósu nadügüni ladüga ligía lan wadágimanu le líchugubei Búngiu nun. Queísi apúrichija nan láu sun nugúndan, gafáyeiruajatina, ¹⁸ afáyeiruajaü ligía, lun gayára lan napúrichijan luágu Wasálbaragüle, magúburajanga ni cáta, márügüdünganeí nirícha lun nawínwandun lídaangiñe nuwádigimari queísi apúrichijati.

¹⁹ Láu sun mábuti nan ubouágu lun nagáambuni, rúguaadina núngua jadámunme súngeubei, lun nagáñeirun sarágu gürígia lun Crístu. ²⁰ Dan le jagánagua nan juríu, ába nadügün camá juríu áu, lun nagáñeiruniña lun Crístu. Queísi jabágaridun juríu lábugiñe lilúrudun Moisés, rúguatina núngua lábugiñoun lúrudu ligía lun nagáñeiruniña, láu sun mámañadina lan lábugiñe lúrudu ligía. ²¹ Lun nagáñeiruniña ja mámbaña juríu, ja mabágaridunbaña lábugiñe lilúrudun Moisés, rúguatina núngua quei jagía, láu sun lábugiñeñadina lan lilúrudun Búngiu, quei lábugiñeñadina lubei lilúrudun Crístu. ²² Dan le jáma nan ja louguabaña afiñe luágu cátei le gayáraabei jadügüni afiñetiña, madügüntina ni cáta le uágubei jarítagua luágu mabuídun lan ladügüniwa, lun gayára lan nagáñeiruniña. Rúguaadina núngua queísi cáda jawúyeri gürígia lun añájein lan nasálbarun lídan furúmieguarügü luwúyeri. ²³ Nadügüñein sun le lun lasúbudirúniwa ugánu le lánina asálbaruni, lun gafánraanbadina lan lídan buídu le lanügübei ugánu le.

²⁴ Subúdi jumúti luágu gíbe jamá eibaagutiña lídan ában eibaaguni, áni ában rügüñein jádaangiñe agáñeira. Eíbaagua jumá lubeíti lídan ibágarí le lídan ában luwúyeri lun gayáraabei lan jagáñeiruni ledéweejan Búngiu jun. ²⁵ Sun ja aráansejabaña lun jebélurun lídoun juráraü, jóuchatiña lun madügün jamá ni cáta le gayáraabei lásiferagüdüni jájurerun. Áni jadügüni lun jagáñeirun ában rídi le láuti ubánaü. Ánjeinti wagía, wáfaaguña lun wibíjan ában rídi siélu le lúnti ladúrarun lun sun dan. ²⁶ Áu, neíbaaguña lídan ibágarí le, rúñuneí naríjin luágun ubuíduni le lúnbei líchuguni Búngiu nun, siélu. Mítaraantina queísi ageíndaguti le agáyujabeí garábalirugu, ²⁷ lubáragiñe líra, áfara numúti lugúndan núgubu, fósuneí lun lagáambunina, lueí lubeigia neféridiruba lan lárigiñé buga arúfudajadina lan joun ámu luágu lubuídun üma lun wachülürün lúmoun Búngiu.

10

Dimúrei luágu ájuduraguni joun sándu

¹ Nidújeñu, buséntina lun narítaguagüdünnün luágu lé meja asúseredubei joun binádu wagübürigu lídan lé meja lídan jamá fulásu mageírawati, luágu ñíñein lán meja Búngiu lídan ában juánriñu jóugiñe lun loúnigiruniña. Séfuti giñe lanügüniña sùngubei dan le jáñiñuragunbalin Barána Funáti. ² Ítara líña queísi ában abásteruni joun láu jásügürün labádinaguagiñe barána, lúma juánriñu jóugiñe. Lídaañanu ában lúma Moisés lun jafálaruni ladüga ligía lan abúgurubaliña. ³ Joutiña giñe sun jagia lídaangiñe ában méme eígni le líchugubei Búngiu joun, siélugiñe, ⁴ rúati giñe dúna joun sùngubei lídaangiñe ában dúbü lun játun. Ñíñein Crístu jáma luágu sun jaweíyasun lun fuleísei láníña láu dúna lun játun. ⁵ Láu sun líra, madügün jamúti jíbe-ágei lugúndan Búngiu, ába lamágundarun Búngiu jáma. Ligíati jóüwegunbei lídan fulásu mageírawati.

⁶ Sun le asúseredubei joun, ában jémpulu woun, lun mayúmajan wamá buri cátei wuríbati, queí meja jadügüni. ⁷ Ligía májuduragua jumá lubei joun sándu queí meja jadüga jádaangiñe, queísi tariñaguni Lerérun Búngiu luágu jefédujan joun sándu. “Ába jañúurun güri-gia eíga lúma áta, lárigiñe, ába jásaarun eféduja.” ⁸ Moún lumuti wadügün salúfuri queí meja jadüga jádaangiñe, ába larúfuduni Búngiu luágu wuríba lan le jadügübei láu loúwegüdüniña mílu güri-gia jádaangiñe lídan ában wéyu. ⁹ Moún lumuti giñe wáluajani lében lugúraasun Búngiu woun láu luríban wagáburi, queí jadügüni jádaangiñe, ába jóüwegun láu lágüragüdüniña joun jéwe. ¹⁰ Mamágundara jumá giñe lúma Búngiu queí jadüga jádaangiñe, ába loúnajani Búngiu ánjeli lun láfaraguniña jilágubei.

¹¹ Suséreti sun le joun binádu agübürigu, ába labürüdünnün tídan Lerérun Búngiu queísi jémpulu woun, wagiá le wínwani lídan lagúmujóun dan le, lun wasúbudiruni buídu luágu mínsiñe lan figoú lun Búngiu. ¹² Le lubeíti jarítaguabei luágu derégüdagua lan leíbugun lúma Búngiu, toúnigilá, máburujalá lídoun figoú. ¹³ Oúchwaguni buri le jasúfurirubei, ában láu lúma buri le jasúfurirubei ja jíbiri. Gayáraati jeménigidun luágu Búngiu, mígirunbei lun jibíjin oúchwaguni le jásiñerun awánda. Lubáragiñe líra, dánme liábin oúchwagüni, larúfudubei giñe Búngiu jun ída lúba lan jáfuridun lídaangiñe, ítara lúba gayára lan jawánduni.

¹⁴ Ligía lubeíti, nidújeñu jínsiñetiña nun, mádaragua jumá júngua lídoun cátei le jánina sándu. ¹⁵ Nadímurejaña jun queísi joun güri-gia gunfaráandatiña, samína jumá júngua ánjein buídu lubei le nariñagubei jun, lúmoun mabuídun lan. ¹⁶ Dan le werésibirun, dan le wátun lídaangiñe uníñein le uágubei wíchiga eteñgiruni lun Búngiu, arúfuda wamúti luágu lídaañadiwa lan ában lúma Crístu luágu líta le áwiyurubei, dan lé meja loúnwenbei luágu gurúwa wawágu. Dan le weígin tídaangiñe fein to wagúbachaguboun, arúfuda wamúti luágu lídaañadiwa lan ában lúma Crístu luágu lúgubu le ledéregerubei lun oúweni luágu gurúwa ligía. ¹⁷ Queísi jou wabei tídaangiñe ában méme fein, arúfuda lumúti líra luágu lídaañadiwa lan ában láu sun gíbe wamá.

¹⁸ Aríja jumá lun násiñun le linásiñun Israel. Ja eígabeña lídaangiñe eígni lé buri adágarawagüdüti lun Búngiu luágu latárü, lídaañañu lan ában jámagua, lúma lúma Labúreme latárü. ¹⁹ Mára nariñaguña luágu wínwani jamá sándu, maríñaguntina giñe luágu weírgutima lan úwi le adágarawagüdübei joun sügü láu ámu úwi. ²⁰ Le nariñagubei, luágu dan lan le jadágaragüdünnün ja

ibídiñejabubaña lun Búngiu joun sándu, joun máfianu jadágaragüda, máma lun Búngiu, áni mabúseerúntina lun lídan jumá ában jáma máfianu. ²¹ Siñáti játun lídaangiñe licópun Wabúreme Jesucristu úara lúma játun lídaangiñe jacópun máfianu. Siñáti giñe jeígin luágu lidábulan Wabúreme Jesucristu úara lúma jeígin luágu jadábulan máfianu. ²² ¿Ódi buséntün jeméendügüdüni Wabúreme láu jañúurun luágu jadábulan máfianu? ¿Jéretün funági luei Búngiu lun manúfudebadün lan luei ligáñi?

Lúnti jínsiñejabu jamá lánigu Crístu

²³ Inárüni le aríñawagübei luágu gayára lan jadügüni gürígia le jabúseerun, láu sun líra, máma sun cátei buíti láburujan. Gayáraati jadügüni gürígia le jabúseerun, láu sun, máma lan sun cátei lun líderaguniña ámu gürígia lun jóudin jabáruaguouñ lúma Crístu. ²⁴ Lúnti warítangun luágu le buídubei joun ámu gürígia, mámarügü lan wawouguoun warítagua.

²⁵ Niján le lúnbei jadügüni luágu úwi. Jójuma lídaangiñe sun cátei le alúgurajóubei mágidirugu, málügüdjajanga jugúya ánjein dágüdawa lubei joun sándu lúmoun madágarawagüdün lan, ²⁶ maríbadalá jarítangun luágu, gayáraati jeígin, lugúndun láni Wabúreme múa láu sun le lídaanbei.

²⁷ Ánjaün lamísuraja ában gürígia le maffñeti luágu Crístu lun jídin eíga lúma, gayáraati jídin ánjaün busén. Jójumei le íchugúti jun, málügüdjajanga ni cáta, mebéresen jumá ánjein dágüdawa lubei eígin ligía joun sándu furúmiñe, lúmoun madágaragüdünwa lan. ²⁸ Ánjein aríñawagua jun luágu dágüdawaali lan eígin ligía joun sándu, meíga jumei, luei jadügün dáñu lun le aríñagubalin jun, luei giñe laríbadun larítangun. ²⁹ Nadímurejañatia luágu larítangun le ában, máma luágu barítangun.

Gayáraati jamúga funa laríñangun mútu. “¿Cásan uágu lúnti lubei lafálaruni ában gürígia le larítangun ámu? ³⁰ Ánjein gayára lubei níchugun eteíngiruni lun Búngiu luágu le neígíbei, ¿cábagi uágu jadímureja nuágu lueígiñe neígini?”

³¹ Ánjaün lubeíti eíga o áta o jadügün furúmieguarügü cátei, adúga jumei súngubei lídan ában luwúyeri le íchugubei inébesei lun Búngiu. ³² Míchiga jumá lébuna eíguaduni lun ni ában, ni joun juríu, ni joun ja mámbabaña juríu, ni joun ja lánigu Búngiu. ³³ Áu, jóuchatina lun nagúndaaragüdüniña súngubei lídan sun cátei, máma rügüñein nuougua narítagua, jarítaguatina giñe jawágu jíbiri lun gayáraabei lan jayábin lun jafiñerun luágu Jesucristu lun jasálbarun.

11

¹ Áyeija jumei nigáburí queísi náyeijani ligáburí Crístu.

Würíña lídan jóúndaragun affñetiña

² Nidújeñu, gúndaatina jáu luágu súnwandan lan jarítangun nuágu, lúma luágu falá jumaní arúfudajani le níchugubei jun. ³ Guetó, níjein ámu arúfudajani le nabúseerubei lun gunfaráanda jumáni, luágu Crístu lan lichügüdinabei cáda wügüri, wügüri tichügüdüna lúmari, itara quei Búngiu lan lichügüdinabei Crístu.

⁴ Nibúsigarídünati lun ladáuragun ában wügüri láu lálbulugu dan le layúmuragun lun Búngiu, eteíngirei lídan jadámurin affñetiña, o dan lan le laríñangun ugánu le ladímurejan Búngiu liyúmulugugiñe wügüri ligía, ladúga láu líra, larúfuduñein luágu níjein lan ában wügüri weírigutimaati lanügüni luei lídan adámurini ligía, áni Crístu rügüñein weírigu jádan sun wügüriña. ⁵ Nibúsigarídünati giñe lun madáuragun tan würi láu tábulugu dan le tayúmuragun lun Búngiu, eteíngirei

lídan jadámurin affñetiña, o dan lan le ladímurejan Búngiu tiyúmulugugiñe, ladúga láu líra tarúfuduñein tamájarun lun tanúgüni wügüri weírigu sügü táu, wuríbati líra, queísigubeirügü jamúga lasarún tídiburi queísi wügüri. ⁶Ánjoun madáuragun ában würi láu tábulugu, buítimaati lun tásaruni sun tídiburi, áni ánjein busíganudúna lubeí tíbuguni würi tídiburi o tásaruni lan tábulugu, darúguatá láu tábulugu. ⁷Moún lumuti ladáuragun wügüri láu lábulugu lídan jadámurin affñetiña lugúndun liyáwa Búngiu ligía, áni arúfuda lumúti luweírigan Búngiu. Ánjounti würi, arúfuda tumúti luweírigan wügüri, ⁸lugúndun dan le ladügünbalin Búngiu wügüri, máma tídaangiñe würi ladúgei, würi ladügüboun lídaangiñe wügüri. ⁹Adúga lumútu Búngiu würi lun wügüri, máma wügüri tun würi. ¹⁰Ligía lúnti lubeí tadáuragun würi láu tábulugu lídan jadámurin affñetiña queísi liseini derégüdaguau lábugiñe lagúmadijan wügüri, lúma lun jagúndaarun ánjeligu láu tagúfurumadun. ¹¹Láu sun líra, lídan wabágari queísi affñetiña, mégei lumútu wügüri würi, mégei tumúti giñe würi wügüri. ¹²Queísi inárüni lubeí luágu lídaangiñe lan wügüri tadúgüwa würi, itara líña giñe inárüni lan luágu würi lan íchugubalin wügüri ubouágu, áni sun cátei lúmagiñe Búngiu líabin.

¹³Ítara líña lubeíti, samína jumá júngua ánjein buídu lubeí lun tayúmuragun würi lun Búngiu lídan adámurini madáuragunga láu tábulugu. ¹⁴Jéchutiwa wagía gürígia lun warítagan luágu busíganu lan lun migínagu lan lídiburi wügüri. ¹⁵Ánjoun würi, ában uwéndeni tun lun migínagu lan tídiburi, ligía líchugünbei ídiburi migínaguti tun lun tadáuragun láu tábulugu. ¹⁶Ánjein níjein lubeí buséti ladijenejan luágu cátei le, lúnti lasúbudiruni luágu ni lan wagía, ni já buri jíbiri tílana lílígílisin Búngiu masúbudiruntiwa ámu igáburi lueí líra.

Luríban jagáburi affñetiña dan le jeígin luágu lidábulan Wabúreme Jesucrístu

¹⁷Nabürüja jun guetó luágu ában cátei le siñábei nariñagan luágu buídu lan jadügüni, lugúndun genege lumúti luágu adúga lán buri joúndaragun dáñu jun lubáragiñe jamúga ladügün buíti. ¹⁸Furúmiñeti cátei, aríñawagúati nun luágu dan lan le joúndaragun, níjein lan fánreinguaü jídan, áni affñetina luágu níjein lan inárüni lídan le aríñawagúbei. ¹⁹¡Fágua lúnti ñi lan fánreinguaü jídan lun lasúbudirúniwa cátaña lan affñetiñabaña ja tímatimaatiña! ²⁰Láu buri fánreinguaü le, dan le joúndaragun lun jeígin luágu lidábulan Wabúreme Jesucrístu, siñáti jeígin láu ában igáburi le íchugubei inébesei lun, ²¹lugúndun dan le lachúlürün óra lun jeígin, meígtüntün nege lídan ában. Lubáragiñe líra, cáda ában, ába loufudajan eígei eígin le lanügübei. Ja siñábei janügün gíbetei, ába jeréderun láu jaláma. Jayábiti jídaangiñe, ába játun sarágu darí lun jabácharuadun. ²²¿Mábantün funági lun jeígin lúma lun játun ñi? Láu igáburi le, barü jumutiña tílana lílígílisin Búngiu quei ni cáta, rújumaña ja úabei ni cáta jáma lídoun busíganu. ¿Cábagi nariñaga jun luágu líra? ¿Lúnti nagúndaarun jáu? ¡Luágu líra siñáti!

Adíneruni le arítaguagülei luágu loúnwen Wabúreme

²³Lúmagiñe guánarügü Wabúreme Jesucrístu nerésibirei igáburi le warítaguagüle luágu loúnwen, lé meja níchugubei jun. Queísi le nubeíbei jun, luágu le lan árieibu le lalúgurünbei Wabúreme, ába lanügünun fein lújaburugu, ²⁴lásun líchugun eteíngiruni lun Búngiu tuágu, ába lagúbachagunun lun lafánreinragunun jádan lánigu, ába lariñagan. “Joújuma, núgubu le, le nederegerubei luágu jufúleisein. Adúga meme jumei cátei le, jarítaguagüleme

nuágu.” ²⁵ Ítara gíñe, lásun jeígin, ába lanügüni cópu táu diweín lújaburugu, ába lariñagun. “Cópu le táu diweín to, liseíni iserí lidáradun Búngiu júma, le achoúrurúabei láu níta le lúnbei láwiyurun lidaangiñe núgubu juágu. Ságüme játuni, adüga jumeí lun jarítangun nuágun.” ²⁶ Ítara líña lubeíti, daríme le lagíribudun Wabúreme uboúagun, ságüme jeígin fein, gurá jugúya diweín to jarítaguagüle luágu Jesúsu, jarúfuduñein luáguti loúnwen Jesúsu wawágu.

Ligáburi leigín eígini le arítaguagülei luágu Jesúsu

²⁷ Furúmiegurügü le eígitu fein tugúya, guráloun diweín to láni Wabúreme Jesucrístu lídan ában igáburi le míchuti inébesei lun Búngiu, ladügüña figou ladüga líchuguña lan minébesi lun lúgubu Wabúreme lúma líta. ²⁸ Ítara líña lubeíti, cáda ában lúnti lasúbudiragun lúngua buídu ánjein jarúma tubeí lanígi lubáragiñe lerésibirun. ²⁹ Lugúndun ánjein erésibira marítangun luágu laníchigu lánina lúgubu Wabúreme, labeíchubei Búngiu. ³⁰ Ligía añájein lubeí sarágu jídaangiñe, sánditiña, débilitiña, jílágua jíbiri. ³¹ Ánjawa jamúga asúbudiragua woúngua buídu lubáragiñe werésibirun, mabeíchun lumútiwa jamúga Wabúreme ítara. ³² Dan le labeíchuniwa Wabúreme, ladügüñein líra lun wasúbudiragun woúngua, gayára lámuga wasáansiraguni wagáburi lueí wefériDIRUNME úara jáma lirájúñü ubou.

³³ Ítara líña lubeíti nidújeñu, dan le jóundaragun lun jerésibirun, agúrabagua jumá júngua. ³⁴ Ja lamátiña, jóújama jábiñe, mabeíchun lámugaña Búngiu luágu luríban ligáburi jóundaragun. Lé buri líbiri cátei naráanserubei dánme le nídin aríjaün.

12

Ubáfu buri le líchugubei Sífiri Sándu lun cáda afñeti

¹ Nidújeñu, níjein buri cátei nabúseerun lun jasúbudiruni luáguti buri ubáfu le líchugubei Sífiri Sándu lun cáda afñeti luágu Jesucrístu.

² Subúdi jumúti buídu luágu dan lán meja le mámagidün lánigu Crístu, ádajouátün meja lun jeíbugun járigi sándu ja mariñagadibaña. ³ Ligía nabúseerunbei naríñagun jun guetó lun gayára lan jasúbudiruni ánjein lubáfu lubeí Sífiri Sándu ádajabálin ában gürígia lun ladímurejan lúmoun lubáfu lan espíritu wuríbati. Siñáti ládajani Sífiri Sándu ában gürígia lun lanábaguni Jesúsu láu lariñagun luágu máma lan Liraü Búngiu, espíritu wuríbati ádajabalin lun ladügüni líra. Áni láu rügüñein lubáfu Sífiri Sándu gayára lan lariñagun ában gürígia luágu Jesúsu lan Wabúremebei.

⁴ Níjein sarágu luwúyerigu ubáfu le gayáraati lerésibiruni gürígia le afñebei luágu Jesucrístu, áni ában méme Sífiri Sándu íchugubalin. ⁵ Níjein sarágu luwúyeri ligáburi esériwiduni lun Wabúreme Jesucrístu láu ubáfu buri le líchugubei Sífiri Sándu woun, áni lun méme ában Abúremein wesériwida. ⁶ Lídan gíñe sarágu luwúyeri wayúsurei ubáfu buri le rúaalibeí woun, áni ában méme Búngiu le íderagubaliwa lun wayúsuruni ubáfu ligía. ⁷ Arúfudaguati Sífiri Sándu lúngua wádaangiñe láu ubáfu le líchugubei woun, lun gayára lan wíderaguniña jíbiri afñetiña. ⁸ Añájein jíbiri, rúti Sífiri Sándu ubáfu joun lun gayára lan jadímurejan láu lichú áu, añájein úntiña líchiga ubáfu lun jadímurejan láu sarágu subúdi. ⁹ Jíbiri resibitiña ában afñeni weíríti lúmagiñe méme Sífiri Sándu ligía, jíbiri resibitiña ubáfu lun jareídaguagüdün sánditiña. ¹⁰ Añájein resibitiña ubáfu lun jadügün miláguru, jíbiri resibitiña ubáfu lun ladímurejan

Búngiu jayúmulugugiñe. Joun jíbiri, rúti ubáfu lun jasúbudiruni ánjein Sífiri Sándu lubei ádajabalin ában gürígia lun ladímurejan o ámu lan luwúyeri espíritu, jíbiri ibíjatiña ubáfu lun jadímurejan ámuñegueinarügü luwúyeri dimúrei luei jerérun. Añájein ibíjatiña ubáfu lúmagiñe Sífiri Sándu lun jafúnraanguagüdüni le aríñawagübei lídan buri dimúrei teréncha ligía. ¹¹ Sún buri cátei le, ában méme Sífiri Sándu le ábanrügübei, ligía adügübalin, le afánreinjabalin ámuñegueinarügü ubáfu ligía lun cáda gürígia queísi labúseerun.

Lánigu ában méme úgubu súnigubei

¹² Gíbeti umégeguni lídan wágubu, áni sun umégeguni ligía ában rügüñein úgubu ladüga. Ítara líña giñe le únbei wagúara lúgubu Crístu, cáda ában afiñeti ában lídaangiñe lumégegun lúgubu Crístu. ¹³ Sun wagía afiñetiña—juríu, máma juríu, idámuni, máma idámuni, furúmieguarügü le wawúyeribeí—láu wabásterun, ába ladügüniwa Sífiri Sándu lun ában wamá jáma sun jíbiri afiñetiña, áni sun wagía, resíbi wamúti méme Sífiri Sándu ligía.

¹⁴ Níchiga ában jémpulu jun luágu wágubu láu sun lumégegun lun jasúbudiruni luágu ítara wáña lan queísi lumégegun lúgubu Crístu. Wágubu, máma rügüñein ában umégeni luágu, gíbeti umégeguni luágu. ¹⁵ Ánjein jamúga aríñaga ugúdi. “Máma nugúya líbiri úgubu lugúndun máma nan újabu”, máma lueígiñe líra lun mámabei lan líbiri úgubu, ¹⁶ ánjein lan jamúga aríñaga arígei. “Máma nugúya líbiri úgubu lugúndun máma nan águu”, máma lueígiñe líra lun mámabei lan líbiri úgubu. ¹⁷ Lun jamúga águu lan sun úgubu, ¿ída líña jamúgagi wagáambun? O lun jamúga arígeirugu lan sun úgubu, ¿ída líña jamúgagi wirímichun? ¹⁸ Rúlaali Búngiu cáda lumégegun úgubu le ñí lumuti labúseera. ¹⁹ Lun jamúga ában rügüñein lan umégeni luágu úgubu, moustarunti jamúga úgubu ligía. ²⁰ Láu sun gíbe lan lumégegun úgubu, ában rügüñein úgubu.

²¹ Siñáti laríñagun águu lun újabu. “Memégeirun numútibu”, siñáti giñe laríñagun ichügü lun ugúdi. “Memégeirun numútibu.” ²² Lubáragiñe líra, le buri lumégegun úgubu le laganounbei camá débiliti, ligiatima buri mégeiwabei, ²³ le buri lumégegun úgubu le wanügübei quei ni cáta, ligiatima wadáüraguagüdübei láu uwéndeni. Le buríti líbiri lumégegun wágubu le arámudaguabei, ligiatima wouserunbei láu goúnigi, ²⁴ le madügünwabei lún buri líbiri lumégegun wágubu. Ítara líña laráanseruni Búngiu úgubu lun le lán buri líbiri umégeguni le anügübei quei ni cáta, ligiatima lan weírigu, ²⁵ lun níjein lan ában úarani luágu úgubu lídan le luwádigimaridun sun umégeguni lídan ában, láu ában toúnigi joúniwagua. ²⁶ Ánjein asúfurira ában lídaangiñe lumégegun úgubu, súfuriti giñe buri le líbiri, ánjein giñe ouserúa ában lídaangiñe buídu, ába lagúndaarun le buri líbiri lídan ában.

²⁷ Ítara méme líña giñe, lúgubu Crístu jugúya, cáda ában jídaangiñe, lumégegun úgubu ligía. ²⁸ Rújali Búngiu wadágimanu jun tídan liliğilisin lun juwádigimaridun luágu ában queísi luwádigimaridun lumégegun úgubu. Furúmiñetiña, apóstolugu líchuguniña Búngiu lun jesériwidun joun jíbiri afiñetiña, jabíaman, profétagu, jürüwan, arúfudajatiña luágu cátei láni Búngiu, lárigiñe, ja adáagubaña miláguru, lárigiñe, ja areidaguagüdübaña sánditiña, ja ídejabaña, ja láubaña gumadí, jáma ja íbíbubaña ubáfu lun jadímurejan dimúrei buri le teréncha. ²⁹ ¿Apóstolugu funági súnigubei? ¿Profétagu funági súnigubei? ¿Arúfudajatiña súnigubei? ¿Ódi sun jagía adáaguatiña miláguru? ³⁰ ¿Gabáfutiña súnigubei lun jareidaguagüdün sánditiña? ¿Adímurejatiña súnigubei dimúrei buri teréncha? ¿Gayára jamúti súnigubei míni

lán buri dimúrei ligía aríñaga? Uá. ³¹ Buíti lubeíti lun jáfaagun lun jibjijini lubuidun-ágei buri ubáfu lúmagiñe Búngiu, áni níjein ában cátei lun jáfaagun lun jibjijini, buítimaati sügü láu sún buri ubáfu ligía, ínsiñeni cátei ligía, narúfudaja jun luágu.

13

Ínsiñeni

¹ Ánjawa jamúga gabáfu lun wadímurejani sun luwúyeri dimúrei le adímurejoúbei uboúagu lúma sun luwúyeri dimúrei le jadímurejabei ánjeligu, áni mínsiñejabutiwa, málati jamúga wadímurejan. Ítara wáña jamúga quei ában garánwoun le adaúnjati, o quei lan ában asiedu le areínchuti. ² Ánjein jamúga gayára ladímurejan Búngiu wayúmulugugiñe, subúdi wameí sún buri lujúliilin-ágei inárúni arámudaguati áni níjein sun luwúyeri subúdi wáma, áni weíri ligía wafíñen darí jamúga lun gayára lan wagídaruni ában wübü lídaangiñe lubára láu affiñeni ligía, sun líra áni mínsiñejabutiwa, ni cáta wagía. ³ Ánjein wíchiga sun le wámabei murúsun murúsun joun gudémetiña darí lagúmuchun, madügünga wameí láu ínsiñejabuni, mesériwinti woun lun ni cáta. Lun jamúga weíri lan wesériwidun lun Búngiu darí lun wágudúniwa jilágubei luágu, mesériwidunga wagía láu ínsiñejabuni, málati giñe woun.

⁴ Le jínsiñejabúbei gagúraasunti, areídati, áni magímugati, mapántati, manáangun ligía lúngua. ⁵ Manárimeguti, máma rügüñein luóúgua laritagua, magáñidunti, mágyugüdünti wuríbani luágu wuríbani. ⁶ Magúndaarunti láu jafígoun ámu, lagúndaarun dan le janügün gürígia ában üma le richábei. ⁷ Awánda lumúti sun cátei, affiñeti buídu jawágu süngubei, affiñeti luágu gayára lan leménigidun jawágun gürígia lun jarúfuduni lubuidun jagáburi, úati ni cáta lun gayára lan lagídaruni línsiñejabu.

⁸ Lachülürüba dan, dánme le lagíribudun Jesucrístu uboúagun, lun madímurejan lánme Búngiu jayúmulugugiñe gürígia, madímurejoún ligíame dimúrei buri teréncha, memégeirunwalime giñe subúdi. Ánjeinti ínsiñeni, leréderuba lun sun dan. ⁹ Guetó, murúsun rügüñein wasúbudirun, murúsun rügüñein giñe wafúraanguagüdüni dimúrei le ladímurejabei Búngiu wayúmulugugiñe. ¹⁰ Ánjeinti dánme le lagíribudun Jesucrístu, wasúbudirubei sun cátei le gumúti. Murúsun ubáfu le wabíjibe guetó, memégeirunwabei, lagúmuchaguba.

¹¹ Dán meja le irájüñügidiwa, quei meja irájüñü wadímureja, quei meja irájüñü wasáminara, quei giñe meja irájüñü warítagua, ánjeinti dan le wügüriñajadiwa, ába wígeruni le jáni irájüñü. ¹² Guetó, loúguati wasúbudirun luágu Búngiu lúma luágu luwádigimari, waríjini camá buri cátei le marijinti buídu tídan ában isúbusein. Lachülürüba wéyu lun waríjini Búngiu furáangu. Guetó, loúguati wasúbudiruni buri cátei, wasúbudirubei Búngiu le gumúti lídanme wéyu ligía queisi lasúbudiruniwa Búngiu guetó. ¹³ Affiñeni, eménigini lúma ínsiñeni ladúraruba lun sun dan, áni ínsiñeni, weíritimaabei lídaangiñe úrúwagubei.

14

1 Ítara líña lubeíti, lubáragiñe sun cátei, áfaagua jumá lun jínsiñejabu jumá, ayúmaja jumá giñe lun líchugun Búngiu ubáfu le líchugubei joun affiñetiña lídaangiñe Sífiri Sándu jun, létima ubáfu lánina ladímurejan Búngiu jayúmulugugiñe gürígia. 2 Buítimaati lun jáluajan ladímurejan Búngiu jiyúmulugugiñe sügü láu jáluajan jadímurejan dimúrei teréncha, lugúndun gürígia le adímurejati dimúrei buri teréncha, lun Búngiu ladímureja máma joun gürígia, lugúndun Búngiu rügüñein asúbudirei líla dimúrei le ladímurejabei. Le laríñagubei, lídaangiñe Sífiri Sándu laríñagei, ánjeinti laníchigu, arámudaguati luei jasúbudin gürígia. 3 Ánjeinti le iyúmulugugiñebei ladímureja Búngiu, adímurejati láu jerérun ja agáambubalin lun lawáanseragüdúniña lídan cátei lánina Búngiu, lun líchugun dügüdaguau joun lúma gurásu. 4 Le adímurejati dimúrei teréncha, lúngua rügüñein líderagua lídan leibugun lúma Búngiu, ánjeinti le iyúmulugugiñebei ladímureja Búngiu, awáansegüda lumútiña lánigu Búngiu lídan jeibugun lúma.

5 Buséntina jamúga lun gabáfu jumá sun jugúya lun jadímurejan dimúrei teréncha, laú sun, buséntimaatina jamúga lun gayára lan ladímurejan Búngiu jiyúmulugugiñe, lugúndun buítimaati líra sügü láu ladímurejoún dimúrei teréncha, ánjein gubeirügü aríñawagua ca lan míni lan le aríñawagúbei lídan dimúrei ligía lun gayára lan jawáanserun tílana ligílisi lídan jeibugun lúma Búngiu. 6 Ligía lubeíti nidújeñu, ánjana ñüdün bisídaün, ábame nadímurejan jun láu dimúrei teréncha, mesériwinbei líra jun lun ni cáta, ánjana gubeirügü giñe adímureja jun lídan werérun luágu cátei le lasúbudiragüdün Búngiu woun, o níchugun lan ában subúdi luáguti inárüni jun, o ában lan arúfudajani, o ladímurejan lan Búngiu jun niyúmulugugiñe.

7 Rúwamei jálagu áfarutiña quei ában jémpulu. Ílagu buri ligía, mabágariti, quei buri fidu, gidára, ánjein wásiñera asúbudira furáangu ca lan nóta afarúbei, ibídiñebei woun ca lan urému le wagáambajabei. 8 Ánjein mínwirun fidu ában ínwiruni furáanguti wuríburugu, úabei ní ában aráanseruti lun lídin ageíndagua. 9 Ligía méme giñe asúseredubei wáma. Ánjawa maríñagun dimúrei le gayáraati gunfaráandawa lan, ¿Ída lubági lasúbudirúniwa ca lan waríñagubei? ¡Wadímurejaña lun garábali! 10 Gíbeti luwúyerigu dimúrei ubouágu, áni sún buri dimúrei ligía richáti joun ja gunfaráandabalin, 11 ánjein úa lubei gunfaráanda náni dimúrei le áubei ladímurejoúa nun, terénchabadina lun gürígia le adímurejabei nun, áni terénchabei giñe gürígia ligía nun. 12 Ligía, quei weíri lubei jayúmajan lun jibíjin lídaangiñe ubáfu le líchugubei Sífiri Sándu joun affiñetiña, áfaagua jumá jibíjini ubáfu buri le gayáraabei lawáanseragüdúniña tílana ligílisi.

13 Gürígia lubeíti le adímurejati dimúrei teréncha, lúnti lamúriajan lúma Búngiu lun líchugun ubáfu lun lun lafúnraanguagüdüni le laríñagubei lídan dimúrei ligía. 14 Ánjana ayúmuragua lun Búngiu láu dimúrei teréncha, inárüni luágu nayúmuraguña lan láu náni espíritu, líla le naríñagubei, ibídiñeti nun. 15 ¿Cáteiti lúnbei wadügüni? Lídan adámurini gayáraati wayúmuragun láu dimúrei teréncha, lúnti giñe wayúmuragun láu dimúrei le gunfaráandawati. Gayáraati werémujan láu dimúrei teréncha, lúnti giñe werémujan láu dimúrei gunfaráandawati. 16 Ánjein badímurejaña lubei lun Búngiu luágu luweírigan láu dimúrei teréncha, gürígia únabugutiña ja agáambubalibu siñábei júaradun búma, lugúndun úati gunfaráanda jamáni le baríñagubei. 17 Gayáraati ában lan eteíngiruni buíti le bíchugubei lun Búngiu láu dimúrei teréncha, míderagun

lumútiña jíbiri gürígia láu líra. ¹⁸ Teínqui numúti Búngiu luágu gayára lan nadímurejan dimúrei teréncha sügü jáu sun jugúya, ¹⁹ áni jímein numúti naríñagun seíngü dimúrei le gunfaráandawati lídan jóundaragun tilana ligílisi, lun gayára lan jafúnrendeirun númagiñe, lubáragiñe naríñagun díisi-mílu dimúrei teréncha le úati gunfaráanda láni ni ában.

²⁰ Nidújeñu, masáminara jumá quei irájüñü luágu buri cátei le. Ítara jumá quei irájüñü lún buri cátei le wuríbati, ítara jugúyame queisi weínamujaña lídan ligáburi jasáminarun. ²¹ Laríñajare tidan lilíburun lúrudu. “Nadímurejaba joun lílana fulásu le lídan ámu luwúyeri dimúrei, lúma jayúmulugugiñe teréncha, ni ítara, mebéresenbaña náu, líña laríñagun Jabúreme Búngiu.” ²² Ubáfu lubeíti lun ladímurejoñiwa ámuñegueinarügü dimúrei, seríwiti liseínime lubáfu Búngiu joun ja mafiñebaña, máma joun ja afiñebaña. Ánjeinti ubáfu lun ladímurejan Búngiu jayúmulugugiñe gürígia, seríwiti liseínime lubáfu Búngiu joun affiñetiña luágu Jesucrístu, máma joun ja mafiñebaña. ²³ Dan lubeíti le oúndaragua jamá sun tilana ligílisi, ánjein jadímurejaña lubei sun jugúya dimúrei teréncha, ába jebélurun mafiñetiña jánwoun, o gürígia lan ja ibidíñegilibei luágu ubáfu le joun, ¿ma jariñaguba luágu lülüjali lan jáu? ²⁴ Ánjein ladímurejaña lubei Búngiu jiyúmulugugiñe, ába lebélorun ában le mafiñeti, ladáriraguba lúngua luágu gafígoun lan dánme le lagáambuni le jariñagubei. ²⁵ Ítara lúba lafúnraangudun cátei arámudaguati le tídaanbei lanígi, ábame lajúduragun íchiga inébesei lun Búngiu, aríñaga ligíame luágu níjein lan Búngiu júma le tímatisaati.

Adüga jumei sun cátei lídan lubúdubu

²⁶ Nidújeñu, niján lubeíti igáburi le lúnbei jóuseruni lídan jidámurin. Dan le jóundaragun lun jájúduragun lun Búngiu, añájeinbaña jidaangiñe láu urému o arúfudajani, o cátei le lasúbudiragüdün Búngiu jun, o adímurejani lídan dimúrei teréncha, o lafúnraanguagüdüniwa adímurejani ligía, sun líra adüga jumei lun méme jawáanserun tilana ligílisi lídan cátei le luáguti Búngiu. ²⁷ Dan le ladímurejoñun lídan dimúrei teréncha, biámarügü jamá gürígia adímureja, o úrüwa, áni ában ábanlá giñe jadímurejan, lúnti giñe níjein lan ában lun lafúnraanguagüdüni le jariñagubei. ²⁸ Ánjein úa lubei ni ában le gayára lumúti afúnraanguagüda, buítimaati lun madímurejoñun lan lídan dimúrei teréncha lídan adámurini, ladímureja cáda ában lúmagua lúma lun Búngiu. ²⁹ Ánjein giñe luáguti lubei ladímurejan Búngiu jayúmulugugiñe gürígia, biámarügü o úrüwa jamá gürígia adímureja, ja jíbiri lun jaríjin ánjein lúmagiñeti lubei Búngiu le aríñawagúbei límoun máma lan lúmagiñeti. ³⁰ Ánjein asúbudiragüda Búngiu ában cátei lun ámu gürígia le ñun umúti lun líchuguni lun guririguau, lúnti lámánichun le adímurejabei lun líchugun dan lun, lun ladímurejan. ³¹ Ítara, sun jugúya le iyúmulugugiñebelei ladímureja Búngiu, gayáraabelei jadímurejan ában ában lun jafúnrendeirun sùngubei, ragü jugúyame gurásu. ³² Ja iyúmulugugiñebaña ladímureja Búngiu, lúnti jágüdaagun jóungua darí lachülürün jadáani lun jadímurejan, ³³ lugúndun Búngiu le íchugubalin ugánu ligía joun, lánina darángilau, máma lánina chagáguau.

Queisi jagáburi jíbiri wadújeñu lídan wafiñen dan le jadámuridagun, ³⁴ moún lumuti jadímurejan würiña lídan jadámurin affiñetiña lugúndun majoúati lun cátei le. Lúnti gagáambadi jamá queisi laríñaguni lilúrudun Búngiu. ³⁵ Ánjein busén jabei jasúbudirun ában cátei, álügüda jamei jámari jábiñe, lugúndun mabuídunti laríaañoñun lun tadímurejan ában würi lídan jadámurin affiñetiña.

³⁶ Ánjaün magúnda láu nerérun, lúnti jasúbudiruni luágu máma lan júma lagúmesera Lerérun Búngiu, áni mámarügügdün gíñe jugúya erésibirei. ³⁷ Le jarítaguabei luágu gabáfu lan lun ladímurejan Búngiu liyúmulugugiñe, o jarítagua lan luágu ru lan Sífiri Sándu ámu ubáfu lun, lúnti lasúbudiruni luágu ában lan lugúmadin Wabúreme Jesucrístu cátei le nabürüjabei jun. ³⁸ Ánjein manügün lan ítara, reideilá lídan libídiouniga láu.

³⁹ Ítara líña lubeiti nidújeñu, áfaagua jumá lun gayára lan ladímurejan Búngiu jiyúmulugugiñe, mamájara jumá lun ladímurejóun lídan dimúrei teréncha, ⁴⁰ adügarúga jumei sun cátei lídan lubúdubun.

15

Lásaarun Crístu lídaangiñe óuweni

¹ Guetóti nidújeñu, buséntina lun jarítagan luágu ugánu lé meja apúrichija náalibei jun luágu Jesucrístu le Wasálbaragüle. Niján ugánu ligia le jerésibirubei, le gíñe ídaanbei derégüdagu lan jafiñen. ² Sálbatün gíñe lun sun dan ladüga jafiñen luágu ugánu le, ánjein jafálara le uágubei napúrichija jun, ánjein gíñe láu lubei jinárün jafiñera.

³ Furúmiñeti cátei, arúfudaja náali le furéndeí náalibei luágu Wasálbaragüle jun, luágu jilá lan Crístu luágu wafígoun, queisi taríñaguni Lerérun Búngiu luágu lúnti lan lasúseredun. ⁴ Lárigiñe meja louñwen, ába labunún, ába lásaarun lídaangiñe óuweni luágu lürüwan wéyu queisi taríñaguni Lerérun Búngiu luágu le lúnbei lasúseredun. ⁵ Ligia larúfudagun lúngua lun Pédro, lárigiñe, ába larúfudagun lúngua joun jíbiri apóstolugu. ⁶ Lárigiñe, ába larúfudagun lúngua joun sügü jáu seingü-san afiñetiña ja oúndarañubaña lídan ában, áni añájeingua sarágu jádaangiñe, wíñwangiña chülü lúmoun dán le, ja jíbiri, jilágu. ⁷ Lárigiñe, ában larúfudagun lúngua lun Jacóbo, lárigiñe, joun sun apóstolugu.

⁸ Agúmujóuni, járigiñe súngebui, ába gíñe larúfudagun lúngua nun, láu sun ítara níña lan quei ában le agúriajóuti lídan ában igáburi le múaraanti, ⁹ lugúndun áu lan ni cátatimáabei jádan apóstolugu, madúnatina ni lun nanügün quei apóstolu, lugúndun eíbaaja numútiña méja títana lilígilisin Búngiu. ¹⁰ Áu le áubei guetó lugúndun lareidun Búngiu nun, áni merédeti lareíni nun maságarunga ni cáta buíti nídaangiñe, lubáragiñe líra, ñadágimeinjaadina sügü jáu jíbiri apóstolugu, láu sun máma lan áu ñadágimeinbei, Búngiu le núbabei láu lareíni, ligia ñadágimeinbei nídaangiñe. ¹¹ Mebéresentina ca lántima ñadágimeinjañabaña, jagía lan o áu lan, niján ugánu le wapúrichijabei luágu lásaarun Crístu lídaangiñe óuweni, áni niján gíñe uágubei jafiñera.

Jásaarun jiláaña lídaangiñe óuweni

¹² Queisi wapúrichijan luágu saráali lan Jesucrístu lídaangiñe óuweni, ába jerésibiruni, ¿ída líñáti añájein lubei jádaangiñe aríñagatiña luágu másaarun jamá jíbiri jiláaña? ¹³ Ánjein másaarun jabei jíbiri jiláaña, másaarunti lubei gíñe Crístu lídaangiñe óuweni, ¹⁴ áni ánjeinti másaarun lubei Crístu lídaangiñe óuweni, málati ugánu le wapúrichijabei luágu asalbaruni, málati gíñe afiñeni le juágubei. ¹⁵ Ánjein ítara líña lubei, waríñaguña iyéeni luágu Búngiu, lugúndun aríñagaadiwa lan luágu sarágüda láani Búngiu Crístu lídaangiñe óuweni, ánjein máma lubei inárüni luágu sará jamá jiláaña, máma gíñe inárüni luágu sarágüda láani Búngiu Crístu lídaangiñe óuweni. ¹⁶ Lugúndun ánjein másaarun jabei jiláaña, ni Crístu, másaarunti gíñe lídaangiñe óuweni, ¹⁷ áni ánjeinti jiláñugili lubei Crístu,

mesériwinti jafiñen lun ni cáta, lídaangidün jiffigoun ligíbugiñe Búngiu. ¹⁸ Áni ánjein itara líña lubeí, féridiñu jáña giñe ja ouwegubaña láu jafiñen luágu Crístu. ¹⁹ ¡Ánjein lúntirügü lubeí ibágari le wemenigi luágu Crístu, fugiábu wagía jádaangiñe súngubei!

²⁰ Le inárunitibeí, saráti Crístu lídaangiñe ouweni lúnya labágaridun, ligía furúmiñetibeí ásaaruti lídaangiñe ouweni lun mouñwendügüyaali lan, áni itara lúba jásaarun sun lánigu. ²¹ Itara quei lídaangiñe lan ában wügüri lagúmesera ouweni ubouágu, lídaangiñe giñe ában wügüri lagúmesera jásaarun jiláaña. ²² Itara quei jouwegun súngubei ladüga lídaangiñe lan Adán jayábin, itara lubá giñe gabágaríya jamá súngubei lárigiñe ouweni ladüga lánigu jamá Crístu. ²³ Lúnti lásaarun cáda ában lídan lídáani. furúmiñeti meja ásaaruti, Crístu, lárigiñeme, dánme le lagríbudun Crístu ubouágun, ligíame jásaarun lánigu lídaangiñe ouweni. ²⁴ Ligiabati líabin lagúmuchagüle sun cátei, ábame lagúnrinchaguni Crístu sun líbiri luwúyeri arúejani, ubáfu, lúma érei le ubouágubei, ábame ledéregeruni arúejani lun Búngiu Úguchili. ²⁵ Larúejíaba Crístu daríme gáñeigüda láali Búngiu wuríbu lun jawágu sun láganiñu, ²⁶ ouweni, ligíaba lagúmujoún ágani agúnrinchawagúti. ²⁷ Rúlaali Búngiu sun cátei lábugiñoun lubáfu Crístu, dan le tariñagun Lerérun Búngiu luágu rúa lan sun cátei lábugiñoun lubáfu, subúdiwati luágu úa lan Búngiu lábugiñe lubáfu, lugúndun Búngiu íchugubalin sun cátei lábu lubáfu Crístu. ²⁸ Dánmeti le reidejiali sun sun cátei lábugiñe lubáfu Crístu, ábame leréderun Crístu, le Liraü Búngiu, lábugiñe lubáfu Búngiu, le íchugubalin sun cátei lábugiñoun lubáfu Crístu. Búngiurügüba urúei, le Súnti Gabáfu.

²⁹ Añájein jídaangiñe, abásterutiña jewéñegua ja ouwetiña mabásterunga. ¿Cámeji jadúgei lira? Ánjein másaarun jabeí jiláaña, ¿cámeji ju lan jabásterun jewéñegua?

³⁰ Ánjein siñá jásaarun jiláaña, málati wapúrichijan súnwandan lúnrügü weíbaajoún lueígiñe. ³¹ Ságü wéyu yaráfa wamá lun woúnwen, ináruniti líra nidújeñu, queísi ugúndani le nasándirubei juágu queísi afiñetiña luágu Wabúreme Jesucrístu. ³² Ageíndaguatiña wügüriña ja ítarabaña quei anímaalugu janárimetiña ya Éfeso núma, ladüga mínsiñe lan cátei le napúrichijabei joun, ¿cági nagáñeirubei láu líra? Ánjein jamúga inárüni lubeí luágu úabei lan íbágari lárigiñe ouweni, richátiña jamúga ja aríñagubaña. “Jouwama, guráwama, lugúndun jarúga wouwegua.”

³³ Mayeedúa jumá. Aríñawagúati. “Féridigüda jamúti jagübüri umádagu lubuídun igáburi.” Inárüni líra. ³⁴ Darígua jumá júngua, giríbu jumá lun ában íbágari le surúti, mafígouja jumá. Añájein jídaangiñe, íbídiñeti Búngiu joun. Nariñaguñein le lun janügün busíganu.

Ída lúba ligáburi jásaarun jiláaña

³⁵ Fágua níjeinbei álügüdajati. “¿Ída lúbasan ligáburi jásaarun jiláaña? ¿Cábasan luwúyeri úgubu jawágu?” ³⁶ Libídiouniga láu álügüdajani líra. Dan le labunún ában ílaü, gásu lañáladun lábugiñe múa furúmiñe lubá gayára lan labouçhun. ³⁷ Máma nádü le lúnbei lájüchün abunúbei, ílaü abunúbei, furúmieguárügü le luwúyeribeí. ³⁸ Lárigiñe labunúniwa, jilá ligía, ába íchuguni Búngiu úgubu le labúseerubei luágu ílaü ligía, ába íchuguni úgubu le lúnbei cáda ílaü. ³⁹ Máma ában lábu sun úgubu, ámu luwúyeri jágubu gürígia, ámu jágubu anímaalú, ámu jágubu dunúru, ámu jágubu úduraü. ⁴⁰ Níjein giñe buri cátei siéluna queísi wéyu,

játi, warúguma, queísigubeirügü njein lan ubouáguna, ámu lubuídunmeraü buri le siéluna luei le ubouáguna. ⁴¹ Ámu larúni wéyu luei larúni játi, ámu giñe jarúni warúguma, áni jádaanguanarügü warúguma, ámuñegueinarügü jarúni jawáriuagua. ⁴² Ítara líña giñe lídan jásaarun jiláaña, ámubei jágubu, labunúa ában úgubu le gañáladaditi, lásaarame le moúnwenjali. ⁴³ Labunúa ában úgubu le mabuídunjali, lásaarame ában le buídumeraüti. Labunúa ában úgubu le débiliti, lásaarame ában le jéreti. ⁴⁴ Labunúa ában úgubu le ídaanbei wabágarida ya ubouágu, lásaarame ában úgubu le ídaanbei wabágarida yágüta siélu. Ánjein ibíja wabei wágubu lánina ubouú, wibíjibeí giñe wágubu lánina siélu.

⁴⁵ Ítara líña taríñagun Lerérun Búngiu. “Adán le furúmiñeti wügüri, ában meja wügüri wínwanti”, ánjeinti Crístu, le gíribeí giñe lagúmujoún Adán, ában espíritu ligía le íchugubei ibágari. ⁴⁶ Furúmiñe ibíja wamúti ibágari le ubouáguna, larigiñe, ábame wibíjini ibágari le lánina siélu. ⁴⁷ Lé meja furúmiñeti wügüri le adügübei láu múa, ubouáguna meja, libíaman wügüri le Wabúreme Jesucrístu, siéluna. ⁴⁸ Sun gürígia ubouágu ítara líña jágubu quei lúgubu Adán le adügübei láu múa, sun lánigu Crístu, jabíjuba jágubu quei lúgubu Crístu, le siélunabei. ⁴⁹ Wágubu guetó, líbe lúgubu Adán, le lánina ubouú, lachülürüba wéyu lun wibíjin ámu luwúyeri úgubu líbe lúgubu Crístu, le lánina siélu.

⁵⁰ Le nariñagubei, nidújeñu, luágu siñá lan jebélurun gürígia láu jágubu le ubouáguna lídoun larúeijan Búngiu siélu, lugúndun cátei le goúwedadibeí siñáti gabára lan lídan fulásu le ñi lubei úa lan ouweni. ⁵¹ Buséntina lun jasúbudirini cátei lé meja arámudaguabei le. Mاما sun lánigu Crístu lun jouwéguba lan, jasáansirawagüba sùngubei, ánjein wínwangiña lubei dánme lagíribudun Jesúsu o jiláaña lan, ⁵² lídan murúsun óra, furése furése quei ában léfegechun lúma lámurudun águu, dánme le lagaambúniwa lumálali fidu, le liseíni lagúmujoún sun cátei. Línwiruba fidu, ábame jásaarun lánigu Crístu ja jiláañabaña lun moúnwendügüyaaña lan, ja moúnwengiñabaña, ábame jasáansirawagún lídan méme óra ligía. ⁵³ Wágubu le wawágubei le gayáaraabei lañáladun, lasáansiraguba lídoun ában luwúyeri le siñábeí lañáladun, wágubu le goúwedadibeí, lasáansiraguba lídoun le moúwedadibeí. ⁵⁴ Dánme le sáansiguuali wágubu le goúwedadibeí lídoun le moúwedadibeí, ábamei lagúnfulurun le bürüwañubei tídan Lerérun Búngiu. “Gumúja lubáfu ouweni, féridilá wuríbu. ⁵⁵ Ouweni, zjigeígi bubáfu lun bagúmuchaguagüdüniwa? ¿jigeígi agáñeiruni lé nege lúnbei badügüni?” ⁵⁶ Figoú lébunabei ouweni, áni binádu lílúrudun Moisés, ligía arúfudubalin woun cátei lan figoúbei lun wayúmajani. ⁵⁷ Teínqui wáña lun Búngiu luágu lagáñeiragüdüniwa luágu sún buri cátei le, láu lubáfu Wabúreme Jesucrístu.

⁵⁸ Ligía lubeíti nidújeñu jínsiñetiña nun, ítara méme jumá derégüdagu lídan jafíñen, meréderagunga, ñadágimein súnwandan, gánwoun gueínarügü lídan luwádigimari Wabúreme, lugúndun subúdi jumúti luágu máma lan luágu ni cáta jadúgei wadágimanu le jadügübei lídan ában lúma Wabúreme Jesucrístu.

16

Loúndarún seínsu joun idújeñu lueígiñe Jesucrístu

¹ Luágu loúndarún seínsu joun wadújeñu lueígiñe Jesucrístu ja gudémebaña yágüta Jerusalén, adúga jumeí quei narúfudajani tídan sun ligílisi loúbawagu Galácia. ² Ságü wéyu dimáasu, cáda ában jádaangiñe lúnti ladíreirun murúsun lídaangiñe le lagáñeirubei, ábame lareíduni lun dánme lan nachülürün,

merédedünme oúndaragua seínsu. ³ Dánmeti le nachülürün, nouñajabaña gürígia ja janúadajabaña ubúruгу Jerusalén, ábame níchugun gárada joun lun janügüni seínsu le joundarubei joun wadújeñu ja ñíbaña. ⁴ Ánjein giñe lun lubei nídin, jóudiba núma.

Laráansejan Páblo lubá luweíyasun

⁵ Lídan nuweíyasun, násügürüba loúbawagugiñe Macedónia lun neréderun átiri wéyu ñi, nachülürüba lubeíti ubúruгу Corínto lárigiñe. ⁶ Fágua neréderagun júma átiri dan, o násügürüni lan sun juyáabun ñi, gayáaraabeiti jíderagunina lídan nuweíyasun léme ñíjin lumúti nídin lárigiñe nebélujan júmoun. ⁷ Mabúseerúntina chülúguarügü nan aríjaün, buséntina neréderagun átiri dan júma, ánjein busén Wabúreme. ⁸ Neréderuba ya ubúruгу Éfeso dari luwéyuri Pentecostés, ⁹ lugúndun níjein ában oúnwenbun cháansi nuágu lun nadímurejan luágu Wabúreme Jesucrístu ya, áni buídubei lanügün. Añájein giñe gíbetiña gürígia mabúseerúntiña lun nuwádigimaridun luágu Wabúreme ya, ligía siñábei lubei nígiruni Éfeso guetó.

¹⁰ Dánme le lachülürün Timotéo, jóucha jumá lun gúnda lan jagánagua, lun úa lan sarágu samínaü luágu, lugúndun luwádigimariña luágu Wabúreme Jesucrístu queisi áu. ¹¹ Manüga jumei quei ní cáta. Dánme le gumúlaali lidáani júma, jíderagume lun gayára lan lagíríbudun númoun láu ában ugúndani tídan lanígi luágu lubuídun lidáani júma. Nagúrabañañe ya Éfeso jáu sun jíbiri wadújeñu lueígiñe Jesucrístu ja lúnbaña jayábin úara lúma.

¹² Ayúmuraguatina yebe lun Apólos lun lídin jáma jíbiri wadújeñu aríjaün, jénrenguti lídin guetó, lídiba dánme le gayára lan.

Lagúmujoün buri mábugaü

¹³ Ítara méme jumá agágudañu, toúnigiñu luei cátei le jamúga gayáraabei ladíñurunün luei lubuídun úma le gádaanbalün, derégüdagu jumá lídan jafiñen. Agáburida jumá quei wügüríña ja awáanserubaña lídan le inárünibei, manúfudeiga, jere jumá, gáñei jumámuga luágu wuríbani. ¹⁴ Sun cátei le jadügübei, adüga jumei láu insiñejabuni.

¹⁵ Nidújeñu, subúdi jumúti luágu Estéfnas lan jáma sun tílana lúban furúmiñebaña loúbawagua Acáya ígirutiña binádu jagáburi lun jerésibiruni Crístu, luágu giñe derégeguaaña lan jóungua lun jesériwidun joun wadújeñu lídan afíñeni lídan furúmieguarügü cátei le jayáraati. ¹⁶ Buséntina lubeíti lun giñe jíchaagun jóungua joun, lúma joun sun ja ídejabaña, ñadágimein jagía ítara. ¹⁷ Gúndaatina láu jayábin Estéfnas, Fortunáto, lúma Acáico ñájoun. Weiríñajati nisáminan juágu, áni siñáti jíabin sun jugúya, ¹⁸ ába jíchugun wügüríña jagía gurásu nun láu janügün ugánu nun juágu. Afíñetina luágu janügüba lan giñe gurásu jámagiñe luágu jadímurejan jun nuágu. Lúnti jeteñgiruni Búngiu jawágu gürígia ítaratiña.

¹⁹ Mábuga jáña tílana ligílisi buri to loúbawaguboun Ásia jun. Mábuga jáña giñe Aquíla túma Priscíla jáma sun ja oúndaragubaña jábiñe jun, queisi afíñetiña luágu Crístu. ²⁰ Mábuga jáña sun idújeñu ja yábaña jun. Chúgua jumá jóungua lídan líri Wabúreme, arúfuda jumámugei luágu lídaañadiwa lan ában wámagua.

²¹ Áu Páblo, nouñajañe in mábugaü le jun le nabúrújabei láu nújabu lúma nilétüran.

²² Le mínsiñejabuti lun Wabúreme Jesucrístu, reideilá lábugiñe líñaragun Búngiu. ¡Gíríubá furése ubouágun, Wabúreme!

²³ Binílaün Wabúreme Jesucrístu. ²⁴ Oúnaja numúti nínsiñejabu lídan Jesucrístu jun, sun jugúya. Ítaralá.

TIBÍAMAN LIGÁRADAN PÁBLO JOUN CORÍNTONA

Abúsuraguni

¹ Áu Páblo, ában láni Jesucrístu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje lueígiñe Jesucrístu, nabürüjañoun gárada to jun, jugúra le tilanabei ligílisi to ubúruguboun Corínto, lúma joun sun lánigu Búngiu ja loúbawagubaña Acáya. ² Resibi jumá abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Lasúfurirun Páblo

³ ¡Úati quei Búngiu, le Lúguchibei Wabúreme Jesucrístu! Ligía Wáguchibei le gudémejabubei woun, aráanseñu líña lun líchugun gurásu woun furúmieguarügü óra. ⁴ Rúti gurásu woun lídan sun wasúfurirun, lun giñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwúyeri igáburi le líchugubei woun. ⁵ Lugúndun ítara quei luweírín wasúfurirun luágu líri Crístu, ítara giñe werésibirun ában oúnwenbun gurásu lúmagiñe. ⁶ Ligía lébubei wasúfurirun, lun gagúraasun jumá, sálba jugúyame, resibítiwa gurásu lúmagiñe Búngiu lun giñe gayára lan jerésibirun gurásu wámagiñe, subúdi jumeíme Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu. ⁷ Derégúdati wafíñen juágu luágu jasígiramémeba lan derébuguñu lídan jafíñen, láu sun weíri lan jasúfurirun. Subúsiti woun luágu láu sun lan jasúfurirun luágu líri Crístu queísi wasúfurirun, jerésibiruba lan giñe gurásu lúmagiñe Búngiu queísigubeirügü werésibiruni.

⁸ Nidújeñu, buséntiwa lun jasúbudirun luágu sarágu lénreengúnga le wasúfurirubei loúbawagu Ásia. Deréti ouchwagúni ligía, dari yebe lun méreediwa lan lun wawánduni láu wáni woúnga. Jarítaguatiwa yebe luágu woúweguba lán meja lubáragiñe wáfuridun ñígiñe. ⁹ Sandíguaadiwa yebe woúnga queísi gürígia ja síadiwaaña lun joúnwen. Wel, lasúseredunbei líra lun wafúnrendeirun lídaangiñe lun weménigidun luágu Búngiu le gabáfubei lun lásaaragüdüniña jíláaña, máma lun wawoúnga lan weménigida. ¹⁰ Séfu lumútiwa Búngiu dán buri meja ligía le yaráfa wabei lun wounwen, áni leséfuramémeñadiwa lídaangiñe lénreengúnga le gádaanbaliwa guetó, áni rúwamaali weménigi luágu, luágu leséfuramémebadiwa lan, ¹¹ ánjava jíderagua láu jayúmuragun lun Búngiu wawágu. Áni ánjaña ayúmuragua sarágu gürígia wawágu lun Búngiu, sarágubaña íchugutiña eteíngiruni lun Búngiu luágu fuleísei lániwa láu leséfuruniwa.

Ca lan uágu lasáansiragui Páblo larítagun luágu luweíyasun ubúrugun Corínto

¹² Níjein ában cátei agúndaaragüdütiwa. laríñagun warítagun woun luágu gagáburi wamá ában igáburi jarúmati, furáangu, ya uboúagu, jagánaguatima. Íderagua láadiwa Búngiu láu lareíni lun buídu lan wagáburidun ítara, madúgüntiwa ní cátei láu líchú wáu guánarügü. ¹³ Lídan le wabürüjanbei jun tidan wagáradan, úati ní cáta arámudaguati ñi le jásíñerun alíija o gunfaráanda. ¹⁴ Guetó subúdiraüjadün luágu gayára lan jagúndaaragun wáu quei jumáesturungu, chúlü lámuga wéyu lun gayáraabei lan jasándiragun júngua

buídu buídu láu ugúndani wawágu, ítara quei wagía juágu lídaanme wéyu le lagíribudagüle Jesucrístu ubouágun.

¹⁵ Queísi méja affíne nubei luágu gúnda jumá wáu queísi láni Crístu apóstolugu jun, jarítaguatina yebe meja nidin aríjaun furúmiñe, lun nagúndaaragüdünün láu bisída nánün bián weíyaasu— ¹⁶ jarítagutiná yebe nachúlaagun aríjaun lídan nuweíyasun Macedónioun, dan jamúga le nagíribudun Macedóniagiñe, ábaya jamúga nachúlaagun aríjaun. Ítara líña jamúga gayára lan jideragunina lun nasígiruni nuweíyasun Judéoun. ¹⁷ Madügün numúti. ¿Jálügüdaguñaasan júngua ca lan ueígiñe madügün nubálin? ¿Masáminarun numúti funásan quei lubúdubu dan lé meja naríñagubei jun luágu nadügübei lan cátei le? ¿Jarítaguatün luágu ítara níña lan queísi lirájüñü ubou ja aríñagubaña ában cátei áni magúnfuliruntiña láu jerérun? ¹⁸ Geféenti Búngiu luágu maríñagun wamá ában cátei jun magúnfulirunga wagía láu. ¹⁹ Sun wagía—Silváno, Timotéo, áu—apúrichijatiwa jun luágu Jesucrístu, le Liraü Búngiu. Áni mítaraanti Crístu quei gürígia ja aríñagubaña ában cátei áni magúnfuliruntiña láu jerérun, Crístu, súnwandan ladügüni le laríñagubei. ²⁰ Gúnfuli lumúti Crístu sun lídaradun Búngiu jáma lánigu, woun. Ligía lébubei dan lan le lásurun wadímurejan lúma Búngiu luágu luweírigan, ayúmuragua wagía lun, ába waríñagun “ítaralá” lun warúfuduni wafíñerun luágu ladügüwaba lan lídan líri Jesucrístu. ²¹ Búngiu adügübei lun derégüdagu wamá, wagía júma, lídan wafíñerun luágu Jesucrístu, ligía anúadajabaliwa lun wesériwidun lun. ²² Rúlaali Sífiri Sándu wádoun lun larúfuduni luágu lánigu wamá. Sífiri Sándu le wádaanbei, ligía queísibei lasúbudiraja le lúnbei werésibiruni queísi lánigu Búngiu. Queísi ítara líña lubei, ¿gayáraati funásan ítara wamá queísi gürígia ja aríñagubaña ában cátei áni magúnfuliruntiña láu? Siñáti.

²³ Mídingidina Corínto aríjaun luágu nuweíyasun ñájoun Macedónioun quei yebe narítaguni lugúndunrügü mabúseerun nan nírudaguagüdünün láu ában ébechuni, geféenti Búngiu luágu líra. Ánjein máma lubei líña, aráansetina lun nouñabun láu nibágari guánarügü. ²⁴ Máma jamúgati wabúseeruña waríñagun jun. “Nijánba jaffínera”, derégüdaguaadün lídan jaffíne, busénrügütiwa wíderagunün lúntima lagánwoundun jagúndaarun.

2

¹ Ligía mídyna nubei bisídaun lun nírudaguagüdünün. ² Lugúndun ¿ída lubásan gayára lan jamúga nagúndaarun larígiñe níchuguni íruni joun gürígia ja agúndaaraguagüdübalina? Siñáti jamúga. ³ Ligía nabürüjanbei jun ítara, lun gayára lan jaráanseruni cátei le mégeibei jídaangua lubáragiñe nachülürün júmoun, dánme lámuga nachülürün, mibíjin námuga íruni júmagiñe, jugúya le lúnbei nibíjin ugúndani júmagiñe. Subúdi numúti luágu láu lan jamúga nasándirun ugúndani, jasándiruña lan jamúga giñe ugúndani. ⁴ Dán meja le nabürüjanbarun gárada tugúya jun, weíríti meja nidíjeri juágu darí lun nayájun lídan le nabürüjabanun. Máma meja lun nírudaguagüdünün nabürüjoun jun ítara, nabürüjanun lun jasúbudiruni luweírigan nínsiñejabu jun.

Ferúndun lun lé meja afigounjabei

⁵ Le rújalibei íruni láu luríban leménerun, máma rügüñein nun líchiga íruni, rúlmuti giñe jun lídan ában luwúyeri. Naríñagunbei “lídan ában luwúyeri” lun maweírín lan naweírídaguagüdüni jun. ⁶ Abeíchuni lé meja jaríñagubei lídan jadámurin lun líchugúniwa luágu gürígia ligía, buídurúgaali. ⁷ Guetó, lúnti

ferúduna jumáni, ru jugúyame gurásu lun luei ladügün sarágu íruni wuríbati lun. ⁸ Ligía nayúmuragunbei jun lúnya jarúfuduni jínsiñejabu lun. ⁹ Abürüjatina jun luágu cátei le lun giñe nasúbudiruni ánjein aráanse jubei lun jadügüni le nubei bei jun. ¹⁰ Guetóti, le únti ferúduna jumá furúmieguarügü cátei, ferúduna nubei giñe, ánjein giñe níjein lubei cátei le lúnti ferúduna náni gürígia ligía luágu, ferúduna numúti ligíbugiñe Crístu, juei giñe. ¹¹ Lídán ában cátei líbe líra, mabúseerúntiwa wíchugun lúgaaru lun Máfia lun lanügün ában gürígia le máma láni lárigoún lídoun lubáfu, subúdiwati lumáñaan Máfia buídu buídu.

Madárangilan lan larítagun Páblo ubúru gu Tróas

¹² Dán meja le nachülürünbei ubúru gu Tróas lun napúrichijani ugánu luáguti Crístu, ába nibíjin ában oúnwenbun cháansi ñi lun nuwádígimaridun luágu Wabúreme. ¹³ Madárangilaanti narítagun lugúndun madári náni wadúje Títo Tróas lun nagáambun lúma juágu. Ligía nayóuragunbei joun wadújeñu ja Tróasbaña, ába nídin loúbawagun Macedónia lun nadúnragun lúma Títo ñi.

Gáñeitiwa láu lubáfu Crístu

¹⁴ Buíti lasálirun sun cátei. Teínqui wamúti Búngiu le anügübalíwa lídoun sun fulásu, amáhareina wagiá lágugiñe lagúmadíjan Wábuti Jesucrístu, le súnwandanbei lagáñeiragüdüniwa lídan sun lénreengúnga. Yúsu lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lírímichúniwa líjeme cupáli. ¹⁵ Lugúndun ítara wáña quei cupáli le lágudajabei Crístu lun Búngiu, ñüdüntiwa láu ugánu luáguti Crístu, le quei bei líjeme cupáli, joun ja lúnbaña jerésibiruni ugánu ligía lun jasálbarun, jáma giñe ja lúnbaña merésibirun jamáni ugánu ligía lun jeféridirun. ¹⁶ Joun ja merésibirunbalin ugánu ligía, ítara líña quei ában íjemeni le gáfarajati, ánjein joun ja erésibirubalin, ítara líña quei ában árani le areídaguagüdüti. ¿Cáti gabáfubei lun lasúbudiragüdüni ugánu luáguti Crístu? ¹⁷ Wagiá le loúnajabei Crístu, gabáfutiwa, ladúga mítaran wamá queísi arúfudajatiña yéetiña jagánagua, ja asáansiragubalin linárün Búngiu quei jabúseerun lun jaríjin cába lan jagáñeira lídaangiñe. Lubáragiñe líra, apúrichija wamúti Lerérun Búngiu quei lubei, ligíbugiñe Búngiu, wagiá queísi loúnajan Búngiu ja lídaanbaña ában lúma Crístu.

3

Ugánu luáguti iséri darádu

¹ Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawóungua? ¿Ódi gásu funági warúfudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruníwa, o wamúriajan lan gárada júmagiñetu joun ámu mútu, quei jadúga jíbiri mútu? ² Uá, lugúndun jugúya afíñetiña, ítara jíña queísi ában gárada to adímurejatu luágu lubuídun wawádígimaridun jagánagua, ítara jíña quei ában gárada to bürüwañutu tidan wanígi, to gayáraaboun jalíjanun sun gürígia, asúbudiragüdei cátawa lan. ³ Ítara jíña queísi ában gárada to labürüjan Crístu guánarügü, to wedéregeruboun, ában gárada jugúya to abürüjóuboun láu láni Búngiu le wínwanbei Espíritu, máma láu tinta, áni tidan janígi ladúgei Espíritu ligía wadágimanu, máma luágu dübü.

⁴ Gayáraati waríñagun luágu buídu lan wesériwidun lun Crístu ladúga wadügüni jeménigiñu luágu Búngiu lun líchuguni ubáfu woun lídaangiñe Jesucrístu. ⁵ Mabáfutiwa lun ni cáta láu wáni woúngua, sun le wayáraabei

adüga, lúmagiñe Búngiu liábin. ⁶ Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mítaraanti quei lé meja binádu, lé meja lánina lúrudu búrwati le lúnbei lagúnfulirúniwa láu, lánina ában ibágari le erésibirúti lúmagiñe Sífiri Sándu. Lúrudu ligía, le lilúrudun Moisés, arúfudarügü lumúti wafígoun ligíbugiñe Búngiu, figou ligía, ouweni lafáyeijabei. Ánjeinti Sífiri Sándu, rúti ibágari joun sun ja ánjabaña lun.

⁷ Lilúrudun Moisés le, abürüjoiati luágu dübü. Dan le lerésibirubalin lúrudu ligía lúmagiñe Búngiu lun líchuguni joun Israelítagu, ñíñein ában ouñwenbun larúgounga lúmagiñeti Búngiu ligíbuagu darí lun siñá lán meja jariaguni gürígia jagía ligibu Moisés, lugúndun weíríti lámiridun ligíbu. Láu sun líra, ába éñegucheina lan larúgounga ligía murúsun murúsun. Ánjein láu lubei sarágu uweíríguni liábin lúrudu ligía le asíadijabei gürígia lun ouweni, ⁸ ¡weírítimaati luweírígoun ugánu le lanügübei Sífiri Sándu woun luágu Wasálbaragüle! ⁹ Ánjein weírí lubei luweírígoun meja lúrudu le esériwidubei lun larúfuduni wadúnrun ligíbugiñe Búngiu woun, ¡weírítimaati luweírígoun ugánu luágu Wasálbaragüle le adügübalíwa richágua ligíbugiñe Búngiu! ¹⁰ Ni cáta luweírígoun lilúrudun Moisés ligíbugiñe luweírígoun Wasálbaragüle. ¹¹ Ánjeinti weírígu lubei meja darádu le lúnbei ladúrarun murúsunrügü dan, weírítimaati luweírígoun darádu le lúnbei ladúrarun lun sun dan.

¹² Ladüga níjein lan eménigini le wawágu, luágu siñá lan leféridiruni ugánu luágu ti Cristu luweírígoun, wapúrichijánbei furáangu. ¹³ Madügüntiwa quei meja Moisés, adáuragua láu ligíbu táu ában bélu lun maríjin jamáni Israelítagu léñeguchun larúgounga ligía le siñábei ladúrarun, marámudaguntiwa láu ugánu lánina wasálbarun ni murúsun. ¹⁴ Derétu janígi Israelítagu jagía lun laníchigu lilúrudun Moisés joun, queisigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiñe líburu to lilúrudun Moisés, bélu méme tugúya to luáguboun jasáminan, mígirun tumútiña lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lidan Cristu le Wasálbaragüle. ¹⁵ Chülü lúmoun dan le, dan le jalíjanun líburu buri to labürüjabout Moisés, darúguatu ában bélu láu jachügü luei gunfaráanda jamá. ¹⁶ Ánjeinti dan le lígiruni ában gürígia binádu ligáburu lun leibugun lúma Cristu, ába tagídarán bélu tugúya luei. ¹⁷ Wabúreme Cristu, ligía Espírítu le íchugubei ibágari. Láu Espírítu ligía (le méme Sífiri Sándu) wádan, sálbatiwa, máfaagunga wagía lun wagúnfulirun láu lilúrudun Moisés. ¹⁸ Ligía sun lubei wagía afíñetiña luágu Cristu, gidáwaaru bélu luei wasáminan, subúdi wamúti Cristu furáangu, láu sun luweírígoun. Ítara wáña quei ában isúbusein to arúfudubalin luweírígoun Wabúreme Cristu, áni láu wasígirun íchigei warítagun luágoun, sáansiguagüda lumútiwa láni Espírítu murúsun murúsun lun ítara wamá quei ligía.

4

¹ Mábujurjalá lubeíti warúna, lugúndun rúlaali Búngiu wadágimanu le lábun waríajaan, láu lareíni. ² Mayúsuruntiwa íbíbuni lun wafíñeragüdüníña gürígia luágu Cristu, rúwamuti wanágan luágoun cátei le adügübei arámudaguarügü, le nibúsigarídünabei. Masáansiragun wamei Lerérun Búngiu, inárúni rügüñein waríñaga. Ítara líña jasúbudiruni sun gürígia cátawa lan ligíbugiñe Búngiu. ³ Ánjein mafúraangun lubei werérun luágu ti Wasálbaragüle, joun rügüñein

ja lúnbaña jeféridirun mafúraangun lan. ⁴ Quei maffiñen jabeí luágu werérun, darúlaali Máfia, le lubúngiutebei ubouú le, jarijin lun siñá lan larúgoungadagüdüni ugánu luáguti Crístu le weírígubei, le liyáwabei Búngiu wínwanti, jasáminan. ⁵ Dan le wapúrichijanbei, máma wawouúgua wapúrichija, luágu Jesucrístu wapúrichija, queísi Wabúreme, wariñagati wawouúgua luágu eseriwidutiñarügü lan wagía jun, luágu wínsiñejabu lun Jesús. ⁶ Lugúndun Búngiu, le méme íchugubalin lámpu siélu lun lagídarúniwa lubúriga, ligía giñe adúnraaguagüdúbalin lilámpun tídan wanígi, lun gayáraabei lan wasúbudiruni luweírigan Búngiu le waríjibeí lídan Jesucrístu.

Abágariduni láu eménigi luágu Búngiu

⁷ Larúgounga le wibíjubei luágu luweírigan Búngiu le lídaanbei Crístu, ítara líña quei ában irisini woun. Barü wamuti irisini ligía lídan fugiábu wágubu, le ítaraabei quei ában soudieru, lun larijiniwa luágu lúmagiñe lan Búngiu liábin oúnwenbun ubáfu le wawágubei, máma wámagiñe. ⁸ Ítara, láu sun sáfuri wamá sun luwúyeri lénreengúnga, súnwandan larúfudun Búngiu ában úma woun lun wáfuridun lídaangiñe furúmieguaugü lénreengúnga. Níjein dan, weiriti wadíjeri luágu cába lan wadüga, máburujaanti warúna, lugúndun íderagua lániwa Búngiu. ⁹ Eíbaajouátiwa, mígirun lumútiwa Búngiu joun wáganiñu. Gayáraati jájuchuruniwa, ígira jamáwa múarugu quei jiláaña, siñáti jagúmchaguagüdüniwa. ¹⁰ Le ñílumuti wouúdin, busentiña wáganiñu jáfaraguniwa jilágubei quei jáfaruni láganiñu Jesús jilágubei. Lúnti ítara lúba lan lun gayáraabei lan larijiniwa lubáfu Crístu le wínwantei wadaangiñe. ¹¹ Wagía, sun awánja lan abágarida, yaráfañu wáña lun wounwen furúmieguaugü wéyu luegiñe Jesús, lun gayára lan larijiniwa libágarí Jesús wadaangiñe. ¹² Ítara líña lubeíti, láu yaráfañu wamá lun ouweni lun wíchuguni ugánu jun luágu Wasálbaragüle, resíbi jumúti íbágarí magúmchaditi.

¹³ Laríñajare David tídan Lerérun Búngiu. “Affiñetina, ligía nadímurejánbei”, ítara giñetí affiñetiwa luágu Búngiu láu méme ligáburí affiñeni le meja luágubei David. Ligía wapúrichijánbei luágu. ¹⁴ Lugúndun subúdi wamúti luágu Búngiu lan le ásaaragüdúbalin Jesús lídaangiñe ouweni, lásaaragüdúbalíwa lan giñe lúnya wabágaridun, úara lúma Jesús, ábame lanúgüniwa úara júma ligíbugiñoun. ¹⁵ Luágu jáni fuleísei nasúfurirei sun cátei lun gayára lan jagíbedun ja áñarubaña lun lareíni Búngiu joun, gíbe jamámuga giñe íchugutiña eteíngiruni lun luágu lareíni. Ítara lúba íñurúañu lan líri Búngiu.

¹⁶ Ligía máburujan lubei warúna. Oúwedeina líña wágubu murúsun murúsun, wawáni, tedérebuguduña ságü wéyu. ¹⁷ Ni cáta le wasúfurirubei lídan íbágarí le, lídan le wasáminarun luágu oúnwenbun ugúndani le lúnbei wibíjini yágüta siélu dánme le ñi wamá lúma Crístu lídan luweírigan. Maweírinti lídáni wasúfurirun woun ya ubouúgu dan le wasáminarun luágu lúntibeí lan dan magúmchaditi wagúndan siélu. ¹⁸ Marítagutiwa sarágu luágu cátei lánina ubouú le, ladüga murúsuráü lan dan ladúrarun. Le uágubei wíchigei warítagan, luágu cátei lánina siélu, ladüga cátei ligía, lúnbei sun dan ladúrarun.

5

¹ Subúdi wamúti lubeíti luágu gayára lan wounwen lubáragiñe lagíribudun Jesucrístu ubouúgun, gayáraati loúnwen wágubu quei teíguadun ában múna weíyaaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan.

Úgubume ligía, mámabei lánina ubouú quei ában múna adügütu láu újabu, ábanbei úgubu lánina siélu. ² Buchá wawágu láu úgubu le wawágubei guetó, buséntiwa jamúga tadáurawagún wawáni láu iséri wágubu le lánina siélu. ³ Láume iséri úgubu ligía wawágu, mítaranbádiwa quei uwáni to úati úgubu táu. ⁴ Sun awánja lan abágarida láu úgubu le wawágubei, darítiwa mégeiti luágu, sandígua wagía woungua láu idíjeri. Mára jamúga wabúseeruña wounwen lun weréderun quei uwáni úouga úgubu táu, le wabúseerubei, lun lasáansiragun wágubu le gagúmuchadibei furése furése lídoun wágubu le magúmuchadibei, motúnwenga wagía. ⁵ Búngiu aráanserubaliwa lun gabágari wamá le magúmuchaditi, áni rúlaali Sífiri Sándu woun queisi larúfudajan luágu ítara lúba lan.

⁶ Gúndaatiwa lubeíti súnwandan, láu sun subúdi wamá luágu sun lan awánjaga lan ubouúga abágarida lídan wágubu, bogudiñadiwa lan tuei wában yágüta siélu, máma lan lúmañadiwa Wabúreme. ⁷ Ya ubouúga, siñáti waríjini Cristu, gayáaraarügüti wafíñerun luágu. ⁸ Gúndaatiwa láu furúmieguarügü cátei le gádaanbaliwa, láu sun jamúga jímein wamáni lun wígiruni ibágari le ya ubouúga lun wouúdin agánawa lúma Wabúreme Jesucristu siélu. ⁹ Ligía wáfaagunbei lun wadügüni lugúndan Wabúreme súnwandan, ya wagía yebe ubouúga, yágüta wagía yebe siélu. ¹⁰ Lugúndun sun wagía, waráramaba ligíbugiñe Cristu lun werésibiruni cáda ában le lúnbei werésibiruni, según buíti o wuribati lé meja wadügübei dán meja le ubouúgagüdiwa.

Ugánu lánina darángiláü

¹¹ Ligía, quei subúdi wabálin lanúfudewa luei lagúseragüdüin Wabúreme, áfaaguatiwa lun wafíñeragüdüniña sun gürígia. Subúdi láali Búngiu cátawa lan, áni agúrabatina lun giñe subúdi jumáni. ¹² Mára wadímurejañaya buídu wawouúga, wíchuguña ában cháansi jun lun jasándiragun júngua gúndaañu wáu, lun gayára lan jóunabuniña arúfudajatiña jagánaga ja apántajabaña luágu lubuídun jarúfudagun jóungua bougudi jabíti, áni tidan janígi mabuíduntiña. ¹³ Ánjein weiri lubei wesériwidun lun Búngiu dari lun waríjin camá lúlüñein wáu, ladüga luweírin wínsiñejabu lun Búngiu lasúsereda. Ánjein genége lubálin luágu wesériwiduña lan lun Búngiu láu ában lidíli ichügü, ladüga luweírin wínsiñejabu jun wadügei. ¹⁴ Mósu nesériwidun lun Cristu táu sun nanígi larígiñe larúfuduni luweírin linsíñejabu woun láu loúnwen lídan wafúlasun súngubei. Queisigubeirügü jamúga jilá jamá sun gürígia úara lúma dán meja le loúnwenbei. ¹⁵ Jiláti Cristu jawágu súngubei, lun sun lan ja ánjabaña lun jerésibiruni ibágari lídaangiñe, mámaali lámuga joun guánarügü jabágarida, lun jabágaridun lun Cristu le ouwebei jawágu, sará ligía lídaangiñe ouweni. ¹⁶ Ligía manügün wabei ni ában quei janügün lirájüñü ubouú gürígia, según bougudi jabíti. Luágu méja ában dan, barú wamuti meja Cristu quei janügüni lirájüñü ubouú, mítaranjaali guetó. ¹⁷ Le lubeíti lídaanbei ában lúma Cristu, ábanjali gürígia iséri, gumúja sun cátei le lánina binádu ligáburi, labágariduña ában iséri ibágari lúma Cristu.

¹⁸ Adüga lumúti Búngiu sun cátei le. Gáganiguatiwa meja lúma ladüga wafígoun, ába loúnajani Cristu lun lachíbuni wafígoun, gayára lámuga gamádaga wamá luma. Rúlumuti wadágimanu ligia woun lun waráandaragüdüniña sun gürígia lúma. ¹⁹ Le naríñagubei, láu loúnwen Cristu lídan wafúlasun, arúfudati Búngiu ában úma woun lun gayára lan lagidarúniwa wadúnrun luágu wafígoun ligíbugiñe, gayára lámuga gamádaga wamá lúma. Oúnaja lumútiwa lun waríñaguni le joun sun gürígia. ²⁰ Wayábiña lubeíti queisi wügüríña ja loúnajabaña Cristu, queisigubeirügü jamúga layúmragun Búngiu

guánarügü jun wádaangiñe. Ayúmuraguatiwa lubeíti jun lueígiñe loubadina Crístu. aráandara jumá lúma Búngiu. ²¹ Madügünti Crístu ni ában figou, rulumuti Búngiu sun lidúnrun wafigoun luágun Crístu lun láu lan lídan wamá ában lúma, lun wachülürün abágaridei ibágarí lánina ísuruni le labúseerubei Búngiu lun wabágaridun.

6

¹ Wagía, queísi ñadágimeintiña úara lúma Búngiu, ayúmuraguatiwa jun lun jarúfuduni láu lubuídun jigáburí luágu máma lan luágu ni cáta jerésibirei lareíni Búngiu jun. ² Laríñajare Búngiu tídan Lerérun.

Nagáambubei bagúajan nun lídan nidáani lun fuleíseijabu nan joun gürígia, níderagubadibu lídan nuwéyuri lun nasálbarun gürígia.

Chülújali lídáani Búngiu lun fuleíseijabu lan joun gürígia, niján buri wéyu le luwéyuribeí Búngiu lun lasálbaruniña gürígia.

³ Áfaaguatiwa lun úaragua lan wagáburí lúma wapúrichijan, lueí jamúga jeréderúniwa gürígia lueí jagáambuniwa. Mabúseerúntiwa jamúga wanügün minébesi lun luwádigimari Búngiu láu wagáburí, ⁴ busénrügütiwa warúfuduni lídan sun cátei luágu esériwidutiña lan lun Búngiu wagía, láu luweírín wagúraasun lun wawánduni asúfuriruni, mégei, lúma lénreengúnga.

⁵ Beíjamaadíwa, dáújamáwa, ínhajouátiña gürígia lun jeíbaajaniwa, jéreti wawádigimari lun Búngiu darí lun wasándirun oúnwenbun lubúcha uágu. Reídeijadiwa marúmugunga, áfaaga wagía ilámaü. ⁶ Arúfuda wamúti gíñe luágu esériwidutiña lan lun Búngiu wagía láu larúman wabágarí, láu lisúbudin linárün Búngiu woun, láu wagúraasun lúma wareíni, láu warúfuduni lubáfu Sífiri Sándu le wádaanbei, láu wínsiñejabu le tímatimaati, ⁷ láu wáni ugánu le lánina inárüni, lúma láu lubáfu Búngiu wádan. Yúsu wamúti lárumatena lubuídun ibágarí, dándu lun wóúdin jabárun wáganiñu quei lun waráramuniña dan le jayábin wabároun. ⁸ Níjein dan íbjatiwa inébesi, níjein dan anábawaguatiwa. Níjein dan adímurejouáti buídu wawágu, níjein dan adímurejouáti wuríbati. Níjein dan, oúsera jamútiwa quei yéetiña, níjein dan quei wügüriña ja aríñagutiña inárüni. ⁹ Níjein dan, oúsera jamútiwa quei íbídiñewatiña, níjein dan quei subúdiwatiña buídu, níjein dan, agúrabañu wáña lan wóunwen, awánjagua wínwanlu, ígirati Búngiu lun wasúfurirun, lun wafúnrendeirun lídaangiñe, ¹⁰ mouñwentiwa lídaangiñe asúfuriruni ligia. Láu sun níjein lan cátei lun lírudaguagüdüniwa, níjein gíñe ugúndani lúmagiñe Búngiu tídan wanígi. Láu sun gudéme wamá según ubou, aríñagatiwa joun gürígia luágu irisini inárüni le gayáraabei jadáriruni lídan Jesucrístu, láu sun úa lan ní cáta wáma según jarítagn lánigu ubou, íbija wamúti sun cátei lídaangiñe Crístu.

¹¹ Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírín jínsiñe nun. ¹² Masáansiragúnti wínsiñejabu jun, láu sun afíñetina luágu sáansigua lan jínsiñejabu woun. ¹³ Ayúmuraguatiwa jun quei layúmuragun ában úguchili joun lirájüñü lun jínsiñejabu jumá woun le gumúti, queísi wínsiñejabu jun.

Aganoúati Búngiu wádan

¹⁴ Magámarida jumá gürígia ja maffíñetiña luágu Crístu, lugúndun janügüba ában ibágarí le múaraanti. Mamádaguati ísuruni lúma wuríbani, siñáti gíñe gamádagua lan larúgounga lúma lubúriga. ¹⁵ Siñáti níjein lan úarani lídan Crístu lúma Máfia, siñáti gíñe lúradun ában afíñeti luágu Crístu lúma ában le

mafiñeti. ¹⁶ Siñáti gadúnama jamá sáundu tídan lúban Búngiu, áni lúban Búngiu le wíwanbei wagía, quei lariñagun Búngiu guánarügü.

Naganouba jagánagua, eíbuga áume jagánagua, ába Jabúngiute, jagíame nanígu.

¹⁷ Ligía giñe lariñagunbei Wabúreme Búngiu.

Furíjuma jagánaguagiñe ja mafiñebaña nuágu, díse jumá jaweí, líña Jabúreme. Mádaragua jumá júngua lídoun le wíyebeyi.

Ábame nerésibirunün,

¹⁸ ábame ában nan úguchili jun,

jugúyame nirájünü, líña lariñagun Jabúreme, le Súnti Gabáfu.

7

¹ Ítara líña lubeíti, nidújeñu jínsiñetiña nun, niján buri dimúrei le líchugubei Búngiu woun. Ligía lúnti lubeí wachíbuni sun luwúyeri iwíyeni wawárua, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladúga luweírin inébeseyi le wawágubei lun Búngiu.

Lasáansiragun jagáburí Coríntona

² ¡Rújuma ában ubáraü woun tídan janígí! Madügüngidiwa dáñu lun ni ában, maríbadagüdün wagía ni ában, mayéedagun. ³ Máma naríñaguñein le lun níchugun jidúnrun, lugúndun quei buga naríñaguni jun, tídaañadün nanígí, lídaañadiwa ában ínsiñejabúni le mébejati, lídan yebe íbágarí o lídan yebe ouweni. ⁴ Weírítí nafiñen lúma nugúndan jáu, labáadinagua sun le nasúfurirubei, sandítina dügüdaguaü, áni buin níña giñe láu ugúndani, jueígiñe.

⁵ Lúmagiñé meja wachülürün Macedónioun, meméraagüngidiwa, darírügütiwa lénreengúnga lídan sun fulásu geyéguá wáu, geyéguati wuríbu wáu, weírítí wadíjeridun juágu. ⁶ Ánjeinti Búngiu, le íchugubei gurásu joun ja magúraasunbaña, ába líchugun gurásu woun láu lachülürün Títo, ⁷ áni mámarügü láu lachülürün, lugúndun giñe gagúraasun lan juágu. Aríñagati woun luágu luweírin jabúseerun jaríjiniwa, abájüdagua ligía woun luágu íruni le juágubei luágu le asúseredubei lúma luágu luweírin jabúseerun lun joudin láu nerérun jun. Ábatima nagúndaarun láu líra.

⁸ Láu sun jírugua jumá tadúga gárada to nabürüjaboun jun, maságüríjaantina luágu, guetó. Aságüríjatiná meja furúmiñe láu nasúbudiruni luágu jírugua jumá tadúga gárada tugúya luágu murúsun dan. ⁹ Guetó gúndaatina, máma ladúga jírudagun, ladúga sáansiguagüda láni írudaguni ligía jigáburí. Áfaga jumúti íruni ligía lídan ában igáburí le áubei lagúndaara Búngiu, ítara líña lubeíti madügúntiwa ní murúsun dáñu jun. ¹⁰ Lugúndun dan le wíchugun úma lun Búngiu lun layúsuruní íruni le wawágubei ladúga luríban wagáburí lun lasáansiraguni wagáburí, barü lumútiwa lídoun asálbaruni le magúmchaditi, maríbaanti íruni ligía woun. Ánjein wanúga íruni ligía queísi janügüni lirájünü ubou, magáraragunga wagía lun Búngiu, lanügúbadiwa lídoun féridi lun sun dan. ¹¹ Awánda jumúti íruni queísi labúseeruni Búngiu, áni jaríja jumeíti le asúseredubei guetó lídaangiñe jawánduni íruni ligía! Tadúga gárada tugúya, ába jatátirun asáminara buídu cába lan jadúga láu wügüri le afígounjabei jagánagua. Arúfuda jumúti luágu magúndan jumá láu figou le ladügübei, áni gáñitün luágu busígánu le líchugubei jun, janáfudetün lueí jamuga jabeichúniwa lueígiñe. Ába jabúseerun jaríjinina lun nasúbudiruni jínsiñejabu nun. Weírítí jabúseerun lun jadügüni le richábei, lun jabeichuni le adügübalin figou, adúga jumáli sun

le lúnbei jadügüni lun jaráanseruni cátei le. Madúnrunjadün guetó. ¹² Dan lubeíti le nabürüjanbarun meja gárada tugúra jun, mámadügüya jamúga ladüga nasáminaruña lan sarágu luágu güriáia le adügübalin wuríbani, ni luágu le asúfurirubalin lueígiñe, nabürüjanbarun lun geféen júma ligíbugiñe Búngiu luágu luweírín jínsiñejabu woun. ¹³ Ligía ragüguaaadiwa lubei woúngua.

Lánwoun sun gurásu le barü wamáalibei juágu, oúnwibun wagúndan láu waríjini luágu gúnda lan Títo, nderagua jumáli sun jugüya lun lasándirun darángiláü. ¹⁴ Adímurejatina bugája buíti juágu lun Títo, áni gúnfuli jumúti nerérun juágu. Quei sun lan le aríñaga wamáalibei jun, inárüni, ítara líña giñe inárüni lan le waríñagubei lun Títo, luágu gunda wamá jáu. ¹⁵ Áni weírítimaati jínsiñe lun dan le larítapun luágu jadügüni sun jugüya le lamúriajabei júma, lúma luágu jerésibiruni láu ában inébesei lúma idíjeri luei jamúga jemégeiruba lan lídan jagúnfulirun láu lerérun. ¹⁶ Gúndaatina láu gayára lan nafiñerun juágu le gumúti.

8

Wichugun joun gudémetiña

¹ Guetó, nidújeñu, buséntina nabájüdagun jun luágu lareíni Búngiu joun tílana sun ligílisi burí to louábawaguboun Macedónia. ² Láu sun ában lan oúnwibun oúchwaguni lun jafiñen lénreengúnga le jadárirubei, gúndaatiña buídu, áni láu sun gudéme jamá, rújaña lídan jíderawagún ja gudémebaña Jerusalén camá jamuga risítiña. ³ Geféentina luágu rújamaali lan sun le jayáraabei láu sun tarúman janígi, ru jagía sügü láu lé yebe jayáraabei. ⁴ Ayúmuraguatiña sarágu woun lun wígruniña lun jíchuguni jafáran lídan jíderawagüniwa idújeñu lueígiñe Jesucrístu. ⁵ Adügatiña sügü láu lé yebe wagúrabubei jadügün, furúmiñe, ába jedéregeragun jóungua le gumúti lun Wabúreme Jesucrístu, larígiñe ába jedéregeragun jóungua woun, queisi lugúndan Búngiu. ⁶ Weíríti jabúseerun jíchugun, darí lun wayúmuragun lun Títo lun lagíríbudun júmoun lun gayáraabei lan lagúmuchaguagüdüni labúdajoún seínsu lé meja lagúmeserubei jídan. ⁷ Jugüya ubáraubei lídan sun cátei—lídan jafiñen, lídan jisúbudin luágu Lerérun Búngiu lúma jubáfu lun jarúfudajani furáangu joun ámu, lídan jabúseerun jesériwidun lun Crístu, lúma lídan ínsiñejabuni woun—lúnti lubeíti giñe ubaráü jumá lídan ídejani le.

⁸ Mára nariñaguñein le jun quei ában gumádi, busénrügütina jasúbudiruni jabúseeruni ja jíbiri jídejan, lun gayáraabei lan giñe jarúfuduni jínsiñejabu láu jíchugun táu sun janígi quei jagía. ⁹ Jarítagua jumá luágu lareíni Wabúreme Jesucrístu woun. risíti bugája dan le siélu lan, ába lagúdemedun láu líabin ubóudagun ladüga línsiñejabu woun, lun gayáraabei lan wayábin lun warísidun lídaangiñe lugúdeme.

¹⁰ Luágu jáni fuleísei nariñagei narítapun jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adüga jumúti giñe táu sun janígi. ¹¹ Guetó lubeíti, ítara méme jumá darí jagúmuchuni abúdajani luágu, láu méme ugúndani lé meja juágubei lúmagiñe furúmiñeti, íchigeina según le júmati. ¹² Lugúndun ánjein íchiga ában güriáia sun le liyáraati según le lúmabei, láu sun lugúndan, gúndaati Búngiu láu, áni resíbi lumúti le líchugubei güriáia ligía, mamúriajan lumúti Búngiu le úati jáma güriáia.

¹³ Mára lun jáfagun mégei ladüga jíderagun ámu, ¹⁴ le busénwabei, lun ñi lan úarani jídan. Guetó, níjein júma lun jabúinchagüdüni le jemégeirubei ámu,

lídaanne ámu dan, níjeinbei jáma lun jabuínchagüdüni le jemégeirubei. Ítara lúba ñi lan úarani, ¹⁵ quei tariñagun Lerérun Búngiu. “Le gibebei úma, mígiragunti lúma, le míbebei úma, memégeirunti lun.”

Tító jáma líbirigu

¹⁶ Teínqui numúti Búngiu luágu líchuguni ayúmajani méme le líchugubei nídown tídown lanígi Tító lun líderagunün. ¹⁷ Gúndaati Tító lúnya lídin aríjaün quei namúriajani lúma, áni affíetina luágu weíri lan labúseerun lúnya laríjinün dari jamúga lun lídin láu láni lúngua maríñagunga áu ni cáta lun.

¹⁸ Úara lúma Tító, wounajaña ában idújei le uágubei buídu lan jadímurejan tílana sun ligílisi, luágu lubuídun luwádigimari lun labúruchagun ugánu luágu Wasálbaragüle. ¹⁹ Áni mámarügü líra, anúadaja jamúti gíñe tílana buri ligílisi idújei ligía lun ladügün weíyaasu wáma lun líderagun lídan loúndarún seínsu le. Wadügüñein wadágimanu le, le lánina ídejani, lun wíchugun ugúndani lun Búngiu, lun gíñe warúfuduni luágu busén jamá affíñetiña lun jíderaguniña jadújeñu ja gudémebaña. ²⁰ Waráanseruñein sun cátei lébei lun míchugun wamá lúgaaru lun ladímurejóun wuríba wawágu lueígíñe loúndarun seínsu le wadügübei. ²¹ Wáfaaguña lun wadügüni sun cátei láu arúmani, mámarügü ligíbugiñe Wabúreme, jagíbugiñe gíñe gürígia.

²² Wounajaña gíñe ábanya jádaangiñe wadújeñu lúma Tító lúma le ában. Wügüri le, arúfuda láalíbei luweírín labúseerun lesériwidun lun Crístu woun lídan sarágu luwúyeri, guetótima láu oúnwenbun afíñeni le luágubei luágu jíchuguba lan sarágu seínsu láu sun jugúndan. ²³ Le álügüdajati libügürü Tító, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álügüdaja jabügürü bíama idújeñu lueígíñe Jesucrístu ja lúmabaña, jaríñagame joun luágu jóunajan lan tílana ligílisi buri, luágu jíñúrágüdúñein lan líri Crístu láu lubuídun jagáburi. ²⁴ Ítara líña lubeíti, resíbi jumaña láu ában ínsíñeni le tímatimaati lun gayáraabei lan jaríjini wügüriña jagía luágu inárüni lan lubuídun werérun juágu, áni lun gíñe jasúbudirun sun jíbiri tílana buri ligílisi luágu ínsíñejabuni le juágubei jádaangiñe wügüriña jagía.

9

Loúndarún seínsu joun idújeñu ja gudémebaña

¹ Luágu loúndarún seínsu joun idújeñu lídan afíñeni, memégeirunwati lun nabúrijan jun, ² lugúndun subúdi náali lubuídun jugúndan lun jídejan. Súnwandan nariñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan írúmu le sügújalíbei, áni jíbe-ágei Macedóniana ragújaña gíñe dügüdaguau láu jagáambun luágu luweírín jáfaagun luágu ídejani le. ³ Láu sun líra, nouñajaña idújeñu jun nubáragiñe lun jaráanseruni luáguti labúdajoún seínsu, lun mámabei lan iyéeni, buíti le nariñagubei juágu libügürü cátei le, lun abúdajóuali lan sun seínsu lubáragiñe nachülürün jumóun, ⁴ ñüdündügü jañein jádaangiñe Macedóniana núma, jadáriráunme maráanserunga. Líchuguña jamúga líra bisiganu woun, juintima, lárígiñe rúwamaali lan sarágu wafíñen juágu. ⁵ Ligía narítangunbei namúriajan jáma idújeñu ja lun jóudin bisídaun nubáragiñe, lun gíñe jíderagunün abuíchagüdei seínsu le uágubei jaríñaga jóúndarun. Ítara, aráanseñu lúba seínsu le jóúndarubei lun jarúfuduni jareíni, máma quei ában cátei le lúnti wafósurunün luágu.

⁶Jarítagua jumá luágu cátei le. Le louúguati lábunagun, louúguabei giñe lalúbajan, le gíbete lábunagun, gibebei giñe lalúbajan. ⁷Cáda ában jídaangiñe, lúnti líchugun queísi ligáburí larítangun, máma láu magúndani ni ladúga aríñawagúta lan jun lun jíchugun, lugúndun jínsiñejabuti Búngiu lun le íchugubei láu ugúndani. ⁸Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligíame giñe sarágu júma lun jídejan. ⁹Taríñajare Lerérun Búngiu luágu gürígia le íchugubei sarágu.

Rújali sarágu joun gudémetiña, áni reídeiti cátei buíti le ladügúbei lun sun dan.

¹⁰Búngiu, le íchugubalin ílaü lun lábunún, ában lalúbajagúdun sarágu lídaangiñe lun gayára lan weígin buídu, líchuguba giñe jun lun gayáraabei lan jedéweejan sarágu joun gudémetiña queísigubeirügü ílaü le ábunúbei. Ábame laweíridagúdúni Búngiu murúsun fuleíse le jadügúbei joun, daríme lun jabíjin oúnwenbun abíniruni lúmagiñe Búngiu queísi ában oúnwenbun alúbajani.

¹¹Jugúya, jíbíjuba sarágu súnwandan lun gayáraabei lan jíchugun sarágu, áni dánme le jerésibiruni wadújeñu seínsu le lúnbei jóunajani joun wáma, weírubei jateíngiruni Búngiu. ¹²Lugúndun láu wíchuguni íderawaguni le joun wadújeñu, máma wíhiga rügüñein seínsu le jemégeirun joun, wadügüña giñe lun jíchugun sarágu eteíngiruni lun Búngiu láu líra. ¹³Jíchuguba uweírugini lun Búngiu lugúndun arufúda lumúti ídejan le joun luágu adúga jumáni le lubeíbei Crístu, jíchuguba giñe uweírugini lun Búngiu luágu íderawaguni le jíchugubei joun lúma joun súngebei. ¹⁴Ábame jayúmuragun lun Búngiu juágu láu sarágu ínsiñejabuni jun luágu luweírín lareíni Búngiu le larúfudubei jídaangiñe. ¹⁵¡Teíncui wáña lun Búngiu, luágu rújali lan ában oúnwenbun cátei woun le siña wabeí adárra dimúrei le buidurügüti ubuídun lun wadímmurejan luágu! Cátei ligía, Líraü.

10

Lubáfu Páblo queísi apóstolu

¹⁻²Aríñawagúati luágu gudémege nan dan le júma nan, ánjein lan dan le díse nan jueí, derégüda lan nóuserun júma. Áu Páblo, ayúmuruagutina jun láu ában únabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdünnun luágu wuríbati le jadügúbei, dánme le nachülürün júmoun. Sáansi jumeí ligáburí jarítangun wawágu, jugúya le aríñagubei luágu lun lan waríjin cába lan waságara lídaangiñe weseríwidun lun Crístu. Ánjein madügün jumá, aráansetina lun nagágibudagun júma. ³Inárüni luágu ubouáguna wamá láu sun jadébilin gürígia ubouáguna, máma queísi wügüríña lánina uboué le wawúrribuja luágu wuríbani. ⁴Máma ubouáguna áruma to áboun wawúrribuja, larúmate Búngiu wayúsuruboun lun tagünrinchagun érei. ⁵Ítara líña lubeíti, láu lubáfu Búngiu güríngua wamúti sun arítangun le múaraanbei lúma linárün Búngiu, lúma sun cátei le abúseerúbei leréderuni lasúbudirúniwa Búngiu. Sun giñe jasáminan gürígia ubouágu rúwamuti lábugiñoun lubáfu Crístu lun lúaraduba lan láu le lubeísei. ⁶Áni larígíñe jíchaagun júngua le gumúti lábugiñoun lagúmadíjan Crístu, aráanseñu wáña lun wasúfuriragúdúniña ja magáambadigiñabaña lun.

⁷Barú jumuti cátei queí laríjiniwa bougudigiñe libíti. Aríñagatina jun luágu ánjein lan chouúrquia lubeí ában gürígia lúngua luágu lánigu lan Crístu, lúnti giñe lasúbudiruni luágu ítara méme líña lan lánigu wamá giñe Crístu. ⁸Fágua jarítangun luágu néredun murúsun lueí le lubúdubu luágu nubáfu queísi láni

Crístu apóstolu, úabei nibúsigari nan luágu líra, lugúndun Búngiu guánarü rúlaali ubáfu le nun lun nawáanseragüdünün lídan cátei lánina Búngiu, máma lun nagünrinchaguni jafíñen, queísi jadügüni arúfudajatiña jagánagua guetó. ⁹ Mabúseerúntina lun jarítangun luágu náluguña lan nebélaagüdün anúfudei jídoun táu nigáradan. ¹⁰ Ariñagatiña náganiñu luágu abürüja nánun gárada queísi ában gürigia láuti sarágu ubáfu, áni derégúdati nege nerérun jun tídan, dan le júma nan, débilitiná nege, áni mínsiñegu lán nege ligáburí nadímurejan. ¹¹ Furúmieguarügü le aríñagubalin cátei le, lúnti gíñe lasúbudiruni luágu ítara lan quei nubei láu dimúrei díse juei, ítara núba lan gíñe dánme le júma nan.

¹² Míchaaguntiwa woúngua jámoun ja adímurejabaña buídu jawoúgua, mítaraantiwa quei jagía. Jagía, adügatiña ában libídiouniga áu láu jamísuraagun jóungua láu guánarügü jamísuraagüle lúma láu jíchaagun jóungua jámagua. ¹³ Wagía, mapántajaanbadiwa luágu wawádigimaridun lun Búngiu lídan ában fulásu le ñilumuti míchugun lan Búngiu úma woun lun wesériwidun lun ñi, queísi jadügüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía áñarubei lun wachülürün júmoun ubúrugin Corínto. ¹⁴ Ligía mídin wabeí sügü láu le labúseerubei Búngiu wadüga lídan le wáfaagun lun wíderagunün, ladüga wagía anügübalin ugánu luáguti Crístu jun furúmiñe. ¹⁵ Mapántajaantiwa láu wadágimanu le jadügübei ámu, camá jamuga wadüga. Agúrabarügütiwa lun quei lan lagánwoundun jafíñen, gayáraabei lan wawádigimaritima jagánagua, súnwandan quei lugúndan Búngiu. ¹⁶ Lárígíñeme, jarítaguatiwa wadíseduntima lun wapúrichijani ugánu lánina asálbaruni lídan buri fulásu le díseti juei, le ñi lumuti magáambungiña lan luágu Crístu, luei wapántajan luágu wadágimanu le jadügübei ámu, camá jamuga wadüga.

¹⁷ Le busénti ladímurejan luágu uweíríguni, ladímureja luágu luweírígun Crístu, máma luágu luweírígun guánarü. ¹⁸ Lugúndun gürigia le buídubei, máma le adímurejabei buídu luoúgua, le uágubei buídu lan ladímurejan Wabúreme Crístu, ligía buídubei.

11

Páblo jáma yéetiña ja aríñagubaña luágu apóstolugu jamá

¹ ¡Buséntina jamúga lun jawánduni libídiouniga náu murúsun! Awánda jumá, ² lugúndun eméendütina jáu láu ában eméendüni le lúmagíñeti Crístu, luei jamuga jígiruni Crístu. Áu asúbudiragüdübalin Crístu jun, ába júaradun lúma, áni le nabúseerúbei, lun gayáraabei lan nedéregerunün lun quei ában irájü jarúmatu to amáriedutu lúma ábanrügü wügüri. ³ Ítara quei layéedunun Máfia Éva, janúfudetina luei gíñe jígiraguagüdün júngua lun jeyeedün lídan jarítangun, luei jesériwidun lúnrügü Crístu táu sun tarúman janígi. ⁴ Naríñagubalin le, ladüga resíbi jumáaña ja ñübintiña adímureja iyéeni jun luágu Crístu, áni bulíeiguatün luei cátei inárüniti le warúfudajabei jun. Resíbitün gíñe ában espíritu láu ugúndani ámu luei Sífiri Sándu le resíbi jumáalibei láu warúfudajan jun, resíbitün gíñe ában ugánu lánina asálbaruni jámagíñe le ámu luei ugánu lánina asálbaruni le agáamba jumáalibei wámagiñe. ⁵ ¡Afiñetina luágu múnabun nan sügü jáu súper-apóstolugu ja jafálarubaña! ⁶ Fágua ibídiouguati láu ligáburí nadímurejan, mabídiounigati láu nisúbudin, áni arúfuda wamáali le jun súnwandan lídan sun le adüga wamáalibei.

7 ¿Ódi wuríbati nadüga napúrichijani ugánu lánina asálbaruni jun magúburajanga áu ni cáta, únabudaguagüda núngua ítara lun niñúragunün lídaangiñe binádu jigáburí? 8 Barútina seínsu jámagiñe títana ámu buri ligílisi láu nerésibiruni le jafáyeirubei nun, lun nayúsuruni esériwida jun magúburajanga naún. 9 Áni dan lé meja níjein lan nemégeirun dan le júma nubeí, merédetina quei ijürügu lun ni ában, idújeñu ja ñúbinbaña Macedóniagiñe, jagía íchugubalin le nemégeirubei nun. Ítara líña náfaagun lun mámbadina lan ijürügu jun lídan ni cáta, áni ítara méme lúba nadüga. 10 Ítara quei chóuru náni luágu subúdi náni linárün Crístu, ítara líña giñe nasúbudiruni luágu manúgübadina lan seínsu lúmagiñe ni ában lídan sun Acáya, lueí jamuga lagídarúniwa lébuna ugúndani le nuágubei, lun gayára lan nesériwidun jun magúburajanga. 11 ¿Cásan uágu nadímureja ítara? ¿Ladüga funásan jimísíñe nun? Subúdití luweírín jínsíñe nun lun Búngiu.

12 Nadüga mémebei le nadügübei lun míchugun nan lúgaaru joun arúfudajatiña jagía ja álujabaña lun gayáraabei lan jariñagun luágu ítara méme líña lan jesériwidun jun queisi wagía. 13 Máma Crístu ouñajabaliña yéetiña jagía jagánaguóun láu sun jafámurun camá lánigu Crístu apóstolu jagía. 14 Áni máma cátei terénchati le, lugúndun Máfia guánarügü arúfudaguati lúngua quei ánjeli le íchugubalin larúgounga, 15 ligía giñéti jafámurubei ja esériwidubaña lun queisi gürígia ja adügütiña buíti. Wel, lachúlürüba wéyu lun jerésibiruni le jadúnabei luágu wuríbani le jadügübei.

Lasúfurirun Páblo luágu lesériwidun lun Crístu queisi apóstolu

16 Nariñaguñaya jun. Úa la ni ában arítaguti luágu ladüga lan lülü lan náu nadímurejanbei jun ítara, ánjein jarítagua jubálin ítara, ígira jumána lun nadímurejan jun quei ában lülü táu, lun giñe gayára lan napántajan murúsun. 17 Dan le nadímurejan buíti nuóüga, madímurejaantina láu ában únabuni quei ligáburí ladímurejan Crístu, nadímurejan quei jadímurejan íbídiouguatiña áu. 18 Queisi japántajan arúfudajatiña jagánagua láu buri cátei le lánina ubou le, napántajaba giñe. 19 ¡Quei lanárimébei lichú jáu, awánda jumútiña lülü táu láu ugúndani! 20 Lugúndun awánda jumútiña ja afósurubalün lun jesériwidun joun, jáma giñe ja aságarubalin le júmati, ja anügübalün jánime, ja ouserubalün quei ni cáta, ja agáyuajabaña jigíbuagun. 21 Láu sun nibúsigari nan lun nariñaguni, ¡weírítí buga wedébilin lun wadügüni cátei líra!

Ánjeinti le uágubei gayára lan janáangun jóünga, gayáraati giñe nanáangun núngua luágu (nadímurejaña méme queisi ában lülü táu). 22 ¿Jarásan Hebréona jagía? Áu sun. ¿Linásiñuna Israél jagía? Áu sun. ¿Linébaanfaangu Abrahám jagía? Linébaanfan giñe áu. 23 ¿Esériwidutiña lun Crístu jagía? Sügütimaatina jáu láu sun nadímurejaña lan queisi ában lülü táu dan le nariñaguni. Nadágimeinjaadina sügü jáu, beíwaadina sügü jáu, dáüwaadina sügü jáu, sarágujali weíyaasu yaráfa nan lun nouñwen. 24 Seíngüjali weíyaasu jabeíchunina juríu láu darándi-néfu beíti. 25 Ürüwa weíyaasu jíchaagun Rómána wéwe nuágu, ában weíyaasu jachúragun juríu dübü nuágu. Ürüwa weíyaasu tabúluchun ugúnein to ídaanboun náfayaja náu, ában weíyaasu sügütina ában áriebu lúma ában wéyu anágu baránaja lárigiñe tabúluchun ugúnein náu. 26 Aweíyasujaadina sarágu luágu luwádigimari Wabúreme, áni luágu buri weíyaasu ligía daríguaadina núngua lídan pelíguru dúnarugu, jádan jíwerutiña, jádan nupáisanu, lúma jádan teréncha. Daríguaadina núngua lídan pelíguru ubúruugu, áraabu, lúma baránaja,

lúma lídan pelíguru jádan gürígia aríñagutiña luágu idújeñu jamá lueígiñe Jesucrístu, le jayéeni. ²⁷ Deréti nuwádigimaridun láu sarágu lénreengúnga, reideijadina marúmugunga sarágu weíyaasu, súfurijadina ilámaü lúma mágürabu, ayúnaraadina gíbe, súfurijadina lidíliga lúma tiloúgua anánguni.

²⁸ Bougudi lueí buri cátei le lúma buri ámu cátei, ságü wéyu nasándiruni lijürü nidíjeri jawágu tílana sun ligílisi. ²⁹ Ánjein débili lubeí ában gürígia, sandítina camá jamuga áu débilibei. Ánjein áburuja ában gürígia lídoun figoú, weíríti nigárigu luágu. ³⁰ Ánjein lúnti lubeí napántajan lun gayáraabei lan jerésibirunina queísi apóstolu, napántajaba láu buri cátei le, le arúfudubalin nidébilin. ³¹ Búngiu, le Lubúngiute áni Lúguchi Wabúreme Jesucrístu, le únbei lúnti lan líchugúniwa uweíríguni lun sun dan, subúdi lumúti luágu inárüni lan nariñagubei. ³² Dán meja le ubúrugu nubeí Damásko, ába líchugun gumádimati le esériwidubei lun urúei Arétas oúnigirutiña luágu buri lubéneri fulásu ligía lun janügünina adáüra. ³³ Ába jaráriragüdünina numádagu lídan ában faníñe lídaangiñe ában funédere láni lubárierun ubúrugu, ítara líña neséfurun jájaburugugiñe náganiñu.

12

Labájüdagun Páblo luágu buri cátei le larúfudubei Jesucrístu lun

¹ Magáñeirunti gürígia ni cáta láu ladímurejan buídu luoúgua. Láu sun líra, nabájüdagua jun guetó luágu buri cátei lé meja larúfudubei Jesúsu nun. ² Catoúrusu írúmu guetó lueígiñe nanügúniwa lídoun lürüwan siélu, áu le afíñebeí luágu Cristu. Ibidiñeti nun ánjein láu sun lubeí nügubu nídin, lúmoun máma lan láu, Búngiu asúbudirubalin. ³ Subúdi numúti luágu barúwa nan lídoun lürüwan siélu, le méme gíribei paraíso, ibidiñeti nun ánjein láu sun lubeí nügubu o máma lan láu sun nügubu, Búngiu rügüñein asúbudirei. ⁴ Ñi siélu, arúfudati Búngiu cátei nun lé buri uágubei siñá lan nadímurejan ni ca un ladüga arámudaguati buri cátei ligía lueí jasúbudin gürígia. ⁵ Gayáraati jamúga napántajan luágu narijini buri cátei líra, láu sun líra, siñáti napántajan nuoúgua, nadímurejanrügü luágu luweírín mabáfu nan nurúmawagua. ⁶ Láu sun ánjana lan jamúga busén nadímurejan buídu nuoúgua, máma jamúga libídiouniga áu líra, lugúndun inárüni lan jamúga le nariñagubei luágu le asúseredubei nun. Madügün nubeí lun úa lan ni ában anügütina weírí sügü láu laríjinina o sügü lan láu le lagáambubei nariñagun.

⁷ Buídu buríti bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámabei lan lúba, ába líchugun ában sándi nuágu camá jamuga ában jíyu charúñu nuágu, liábin quei ában lumégen Máfia lun lasúfuriragüdünina. ⁸ Úrúwaali weíyaasu namúriajan lúma Nabúreme Cristu lun lagídaruni sándi ligía nueí, ⁹ laríñaga Nabúreme nun. “Anájein búma láu nínsiñejabu, áni buídúrügüti líra lun bawánduni sun asúfuriruni, buítimaati laríjín nubáfu jawágu gürígia dan le débili jamá.” Gúndaatina lubeíti láu nidébilin, lun larúfuduni Cristu lubáfu nuágu. ¹⁰ Ligía nagúndaarúnbei láu débili, anabúni, mégei, eíbaajóuni, lúma buri lénreengúnga le nasúfurirubei luágu nesériwidun lun Cristu, lugúndun dántima le débili nan, weírítimaabei nasándiruni lubáfu Cristu nuágu.

11 Ábanjadina lülü táu láu nadímurejan buíti nuoúgua, áni jugúya adúgagüdübalin nun, lugúndun jugúya yebe lúnbei jadímurejan buídu nuágu, máma áu. Múnabuntina sügü jáu súper-apóstolugu ja jafálarubaña, láu sun ni cáta nan. 12 Lídan wadágimanu le nadügübei láu sarágu gurásu jagánagua, arúfudúati láu seíni lúma miláguru weíríti le nadügübei luágu ában lan apóstolu tímatimaati áu. 13 Mouserun numútün ünabu jaweí tilana tíbiri ligilisi, ánjein gubeírügü láu lubeí meréde nan quei ában ijürügu jun. ¡Ferúduna jumána luágu líra!

14 Guetó aráanseedina lun nídin bisídaün lürüwan weíyaasu, áni mámadadina ában ijürügu jun. Máma náluguñein le júmabei, jugúya nálugubei lun jedéregeragun júngua le gumúti lun Crístu. Ítara jíña nun queísi isáanigu, áni agübüriugu lúnbaña jóundarun seínsu jabá jasáanigu, máma isáanigu jabá agübüriugu. 15 Nagástarubei le númabei láu ugúndani juágu, daríme lun níchagun núngua le gumúti luágu jufúleisein lun gayáaraabi lan jeíbugun buídu lúma Crístu, láu sun genége láni luágu dántima lan le jínsiñe jumá nun, mínsiñetimaatina jun.

16 Añájein, láu sun subúdi jamáni luágu meréde nan quei ában ijürügu jun, aríñagatiña luágu barü nan seínsu júmagiñe lídan ámu luwúyeri láu íbíbuni. 17 ¿Ayéeda numútün funági láu ában jádaangiñe güriágu ja nouñajabaña jun lun lanügüni seínsu júmagiñe nubá? 18 Amúriajatina lúma Títo lun lídin bisídaün, ouñaja áu ában idújei lúma. ¿Yéegua lumútün funági Títo? ¿Ma ában láu wouserun wagía biángubei, áni ában méme Sífri Sándu abúgurubalíwa?

19 Fágua jarítaguatün luágu weséfuraguña lan woúngua jigíbugiñe, máma líña. Lubáragiñe líra, wadímurejaña ligíbugiñe Búngiu queísi lánigu Crístu. Sun le aríñaga wamáalibeí, waríñaguñein lúnrügü jawáanserun lídan jeíbugun lúma Búngiu, nidújeñu jínsiñetiña nun. 20 Nidíjeritina lueí dan lánme nídin aríjaün, fágua madárirun nubádün agáburida queísi nabúseerun jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina lueí nadárirunün ageíndagua, láu gimúgaü, lúma igáñi tídan janígi, láu jáfaagun lun jawáanserun láu júnabudagüdüniña jidújeñu lueígiñe Jesucrístu, láu marásualugu, agúseragüdüña jidújeñu, láu pántaü, lúma lídan chagáguau. 21 Nidíjeritina lueí lídan lánme nídinya bisídaün, lanügagüdünnina Nubúngiute busíganu jáu, lueí gíñe nayájun jawágu sarágu jídaangiñe ja affígonjañabaña lúmagiñe binárü áni mígirun jamágili iwíyei, salúfuri, lúma buri ámu luwúyeri wuríbani.

13

Ewéridjani lúma lagúmujoún buri mábugaü

1 Nijánme lürüwan weíyaasu nídin bisídaün. Dánme le nachülürün júmoun, lagúseragüdüwaba cáda ában le gadúnrunti ánjein añájein lubeí bíama o úrüwa geféentiña luágu lidúnrun. 2 Luágu meja libíaman nuweíyasun júmoun, wéridi numútiña meja ja adáagubaña wuríbani lun jasáansiraguni jagáburi. Láu sun díse nan jueí guetó, nariñaguñaya joun sun ja asígirubaña adáagua wuríbani, luágu dánme lan nídin bisídaün lürüwan weíyaasu, nasúfuriragüdübaña lan láu ában érei weíríti. 3 Narúfudubeiti jun luágu adímureja lan Crístu nídaangiñe. Áni medébilinti Crístu lídan ligáburi louserunün, arúfudarügü lumúti luweírín lubáfu jagánagua. 4 Inárüni luágu jíla lan luágu gurúwa queísi débiliti, ába labágaridun láu lubáfu Búngiu. Débilitiwa giñe queísi ligía dán meja le

laganoúnbei ya uboúagu, áni quei sará lan Crístu lídaangiñe ouweni láu sun lubáfu Búngiu luágu, wachülürüba júmoun láu sun lubáfu Búngiu wawágu ladüga lídaañadiwa lan ában lúma Crístu.

⁵ Jouchagua jumá júngua lun jarijini ánjein lánigu jubeí Crístu le tímatimaati, jouchagua jumá júngua, mouchugua jumána. ¿Ibídíñeti jun luágu níjein lan Crístu jidan ánjein affíne jubeí le tímatimaati luágu? ⁶ Agúrabatina jasúbudiruni luágu affíne wamá luágu Crístu le tímatimaati, áni níjein lan agánawa wádan láu sun lubáfu, ⁷ ladüga mabúseerun wamá warúfuduni wabáfu quei apóstolugu láu wasúfuriragüdünün luágu luríban jigáburí. Busénrügütiwa lun buídu lan jeibugun lúma Búngiu láu sun jamúga ígirúa wamá marúfudunga wabáfu quei apóstolugu. ⁸ Dan rügüñein múaran lan lagáburidun gürígia lúma linárün Búngiu, labúseerúa larúfudúniwa nubáfu queísi apóstolu lun nasúfuriragüdúni gürígia luágu lifigoun, dan le buídu lan jóudin lúma Búngiu, mabúseerúnwati narúfuduni nubáfu láu abeíchuni. ⁹ Gúndaatina lun naganóun quei mabáfuti ánjein buídu lubeí jigáburí, áni wayúmuraguamémeba lun jíabin lun jabuídurun le gumúti. ¹⁰ Nabürüjañoun gárada to jun lubáragiñe nídin aríjaün, lun gayáraabei lan jasáansiruni jigáburí lubáragiñe nachülürün júmoun, lun memégeirúniwa lan narúfuduni nubáfu juágu quei apóstolu láu nasúfuriragüdünün. Lugúndun rúlumuti Búngiu ubáfu nun queísi apóstolu lun nawáanseragüdünün lídan jeibugun lúma, máma lun neréderunün lueí.

¹¹ Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburí, ragújuma dügüdaguaü, abágarida jumá lídan úarani lúma darángilaü. Ítara lúba júmabei lan Búngiu láu lidárangilan lúma línsiñejabu. ¹² Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua. ¹³ Mábuga jáña sun wadújeñu lídan affíñeni jun.

¹⁴ Resíbi jumeí labíniragüle Jesúsu, lúma línsiñejabu Búngiu, sandí jumeíme Sífiri Sándu júmagua. Ítaralá.

LIGÁRADAN PÁBLO JOUN GALÁCIANA

Labürüjan Páblo joun títana liglisi burí to Galáciaboun

¹ Anája áu Páblo, le lání Jesucrístu apóstolu. Máma gürígia anúadirubalina lun apóstolu nan, máma giñe gürígia oúnajabalina apúrichija luágu, Jesucrístu guánarügü lúma Wáguchi Búngiu le ásaaragüdúbalin lídaangiñe ouweni, jagía oúnajabalina quei apóstolu. ² Áu jáma sun wadújeñu lueígiñe Jesucrístu ja núbabaña ya, wabürüjañoun gárada to jun, jugúya le títana sun liglisi to Galáciaboun. ³ Binílaün Wáguchi Búngiu lúma Wabúreme Jesucrístu, íbija jumá giñe darángiláü jámagiñe. ⁴ Rúlumuti Jesúsu libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina uboué le, queísi labúseeruni Búngiu. ⁵ ¡Uweíriguni lun Búngiu lun súnwandan! Ítaralá.

Ában rügüñein luwúyeri ligáburi wasálbarun

⁶ ¡Weíríti nanígi láu lufúresen jígiruni Búngiu le agúarubei jun lun lánigu jumá luágu le ladügübei Crístu juágu, láu luweírín línsiñejabu! Furéseti jasáansiruni jafiñerun afálara ámu arúfudajani lún nege jadáriruni jasálbarun lídaangiñe, ⁷ iyéeni arúfudajani ligía. Chülújaña wügüríña jagánaguóun, ja buséntina jañáwurijani jarítangun lun jafálarun ában úma le maríchati—ámu lueí jafiñerunrügü luágu Jesucrístu lun jasálbarun. ⁸ Wel, furúmieguarügü gürígia le ñübinbei adímureja jun luágu ámu luwúyeri asálbaruni lueí le arúfudaja wamáalibeí jun, cáteiñein lan gürígia ligía, ¡reídeílá lábugiñe líñaragun Búngiu lun sun dan, áu yebe, ában yebe ánjeli siélugiñe! ⁹ Ariñaga náali meja áni naríñagayaali guetó. Ánjein ñübin ában gürígia arúfudaja ámu luwúyeri ligáburi asálbaruni lídaangiñe figou jun lueí le resíbi jumáalibeí, ¡reídeílá lábugiñe líñaragun Búngiu!

¹⁰ Dan le naríñaguni le, ¿náluguña neréderun buídu jagíbugiñe gürígia, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe gürígia? Lun jamúga ligía lan nabúseerúbei, mámaadina jamúga ában esériwiduti lun Crístu.

Ligáburi lachüllürün Páblo lun ábanbei lan lání Jesúsu apóstolu

¹¹ Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe gürígia liábin, ¹² máma lúmagiñe ni ában gürígia nibíjei, máma giñe larúfudajan ni ában gürígia nun, Jesucrístu guánarügü asúbudiragüdúbalin nun.

¹³ Agáamba jumáali ída líña lán meja nigáburi dán meja le gúnfuligidina lúma Búngiu láu luwúyeri jagúnfulirun juríu, subúdi jumáali ída líña lán meja lanárime neíbaajaniña títana líligilisin Búngiu, áfaagua áu lun nagúmuchaguagüdúniña. ¹⁴ Lídan ligáburi jagúnfulirun juríu lúma Búngiu, furésetina meja sügü jáu sarágu jádaangiñe nupaísanun ja madíseguati jagúriajoún núma, ladúga derégúdatimáatina meja lídan nagúnfulirun láu jagáburi binádu nagübürigu. ¹⁵ Ánjeinti Búngiu, anúadira láadina méja lubáragiñe nagúriajoún lun nesériwidun lun, ába lagúarun nun luágu luweírín línsiñejabu lun lánibadina lan. ¹⁶ Lídan lidáani, ligía lugúndanbei Búngiu lun lasúbudiragüdúni Liraü nun lun gayáraabei lan napúrichijani lubuídun ugánu joun ja mámbabaña juríu luágu ligía lan Wasálbaragülebei. Lárigiñe nasúbudiruni

Jesucrístu, mídintina álügüdaja ni ca úma, ¹⁷ mídin áu Jerusalén aríjaña ja apóstolubaña nubáragiñe, lubáragiñe líra, ába nídin furése louábawagun Arábia. Lárigiñe, ábaya nagíribudun ubúrugun Damáscu.

¹⁸ Darí úrúwa irúmu lárigiñe, ligía nídin Jerusalén, ligíati nasúbudiruni Pédro, ába neréderagun queínsi wéyu lúma. ¹⁹ Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesúsu. ²⁰ Ninárün jáu ligíbugiñe Búngiu luágu inárüni lan le nabúrújabei jun.

²¹ Lárigiñe líra, ába nídin louábawagun Síria lúma Cilícia. ²² Ja wadújeñu lueígiñe Crístu ja tídaanbaña lilígílisin Crístu to louábawaguboun Judéa, maríjin jamáginá meja lídan dan ligía, ²³ agáambarügütiña laríñawagún. “Wügüri lé meja eibaajabaliwa, lapúrichijañe uganu le lánina afiñeni luágu Crístu queisi Wasálbaragüle guetó, áni ligía lé meja busénbei lagünrinchaguni wafiñen luágu Crístu.” ²⁴ Ába jíchugun uweíríguni lun Búngiu luágu lasáansiraguni nigáburu ítara.

Resíbi jamúti jíbiri apóstolugu Páblo

2

¹ Catoúrusu irúmu lárigiñe, ábaya nídin Jerusalén úara lúma Bernabé, barú numuti giñe Títo númagua. ² Nídinbei ñi ladüga arúfuda láali lan Búngiu nun luágu lúnti lan nídin. Ñi Jerusalén, ába nadámuridagun jáma ábutigu afiñetiña, ába nabájüdaguni joun ída líña lan narúfudajan joun ja mámabaña juríu luágu wasálbarun, nadügünbalin líra lun gayára lan jánjarun lun le narúfudajabei, lueí leréderun le adüga náalibei lúma le nadügübei quei ni cáta. ³ Resíbi jamúti, áni ni Títo, le nouábabei, mafósurun jamúti lun lerésibirun circuncisión, láu sun máma lan juríu. ⁴ Inárüni luágu añájein lan eyejatiña luágu idújeñu jamá lueígiñe Jesucrístu, ádaragutiña jóungua wagánaguóún arámudaguarügü, buséntiña lun líchugúniwa gumádi luágu lúnti lan lerésibiruni Títo circuncisión ánjein busén lubei lun láni lan Búngiu. Belútiña yeétiña jagía quei aríajatiña lun jaríjini ída líña lan wagáburi bougudi lueí lílúrudun Moisés lídan wóundaragun lúma Jesucrístu, buséntiña jamúga lúnya wayábin lun idámunime lun lírudu ligía. ⁵ Mígiraguagüdüntiwa wóungua joun ladüga busén wamá lun ñi méme lan inárüni le lánina uganu luáguti asálbaruni júma, jugüya le mámabei juríu, meméterunga ámu buri cátei lánwoun le lúnbei jadügüni lun jasálbarun lueídügüya lun jafiñerun luágu Jesucrístu.

⁶ Ja asúbudirúabaña queísi ábutigu—láu sun, mebérese nan láu cátañañanu lan ladüga magúseragüdünti Búngiu luágu cátei le genégerügüti—míchuguntiña ábutigu jagía ni ában iséri luwúyeri arúfudajani nun lun níchuguni jun lánwoun le napúrichijabei. ⁷ Lubáragiñe líra, ábarüga jasúbudiruni luágu Búngiu lan íchugubalin wadágimanu le lánina lapúrichijóun uganu luáguti asálbaruni joun ja mámabaña juríu nun, ítara queí buga líchuguni wadágimanu lun Pédro lun lapúrichijani uganu méme ligía joun juríu. ⁸ Aríja jamáli luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan giñe ñadágimeinbei nídaangiñe quei apóstolu jádan ja mámabaña juríu.

⁹ Queísi subúdi jamáni Jacóbo, Pédro lúma Juan, ja anügübaña quei weírigitimaatiña, luágu Búngiu lan fuleíseibalina lun líchuguni ubáfu le nun, ába jíchuguni jájabu woun, áu lúma Bernabé, quei jánigu lídan luwádigimari Crístu, luágu giñe gúnda jamá lun wóudin ñadágimein lídan jageíra ja mámabaña juríu, sun añája lan jagía ñadágimein lídan jageíra juríu. ¹⁰ Amúrijarügütiña wáma

lun warítagun jawágu gudémetiña, áni nijánti cátei le nouchubei nadügün láu sarágu goúnigi.

Ladeínjan Páblo lun Pédro ubúrgu Antioquia

¹¹ Dan le lídinbei Pédro ubúrgu Antioquia, ába nadeínjan lun ligíbuagun, lugúndun mabuídun lan le ladügübei. ¹² Furúmiñe meja, jóuti meja jáma afiñetiña luágu Crístu ja mámabaña juríu (ja mebéresenbaña láu circuncisión lúma buri ámu gumádi lídan lilúrudun Moisés). Anjeinti lárigiñe jachülürün gürígia loúnajan Jacóbo, ligía lagúmeserun Pédro adíseda jawei ja mámabaña juríu, ába meíginjali lan jáma ladüga lanúfude luei le gayáraabei jariñagun ja afiñebaña luágu lúnti lan jerésibiruni wügüríña circuncisión lun jasálbarun, lun giñe meígin jamá juríu lídan ában jáma ja mámabaña juríu. ¹³ Játi jíbiri juríu ja afiñebaña luágu Crístu, ába júaradun lúma Pédro lídan cátei mabuídunti le ladügübei, ába giñe lúaradun Bernabé jáma lídan cátei ligía. ¹⁴ Dan le naríjinbei luágu meibugun jamá úara lúma inárüni le larúfudajabei ugánu luáguti asálbaruni (luágu man lan asálbaruni ni cátei lúma lilúrudun Moisés), ába nariñagun lun Pédro ligíbugiñe sun adámurini. “Amürü le juríu, berédera abágarida quei ja mámabaña juríu, mabágariduntibu quei juríu. ¿Ída liñáti babúseerúnbei bafósuruniña ja mámabaña juríu lun jabágaridun quei juríu?”

Sálbawatiña juríu, queísigubeirügü sun gürígia, luágurügü jafiñen luágu Jesu-crístu

¹⁵ Ába nasígirun aríñaga joun.

—Juríu wagía lúmagiñe wagüríajoun, aríñagatiwa luágu mafígoun wamá, luágu mítaran wamá quei ja mámabaña juríu ja agüríajoubaña bougudi luei lilúrudun Búngiu. ¹⁶ Láu sun líra, subúdi wamúti luágu úabei lan ni ában eréderuti richágu ligíbugiñe Búngiu luágu ladügüni le lubei bei lilúrudun Moisés, láurügübei lafiñerun luágu Jesucrístu lerédera richágu ligíbugiñe Búngiu. Ligía giñe lébubei wafiñerun luágu Jesucrístu, wagía le juríubei, lun gayáraabei lan weréderun richágu ligíbugiñe Búngiu lidaangiñe afiñeni le, máma lidaangiñe wadügüni le lubei bei lilúrudun Moisés, lugúndun úabei ni ában eréderuti richágu ligíbugiñe Búngiu lueigiñe ladügüni le lubei bei lilúrudun Moisés.

¹⁷ Ítara líña lubeíti, quei wáluajan weréderun richágu ligíbugiñe Búngiu lidaangiñerügü Jesucrístu, ába waríjin luágu gafígoun méme wamá queísi ja mámabaña juríu ladüga wabágariduña lan giñe guetó bougudi luei lilúrudun Moisés, ¿gayáraati wariñagun lueigiñe líra luágu Crístu lan gafígoungüdübaliwa? ¡Ni cátei líbe líra! ¹⁸ Lubáragiñe líra, lun jamúga wagiribudun lun weménigidun luágu wagúnfulirun lúma lilúrudun Moisés lun wasálbarun lárigiñe weménigidun luágurügü wafiñerun luágu Crístu, warúfuduñein luágu magúnfulirun wamá lúma linárün laníchigu lúru luágu, áni gafígountiwa. ¹⁹ Áu, queígubeirügü jiláadina lan lun lilúrudun Moisés, lúru méme ligía ouwedagüdübadina lun, lun gayára lan nabágaridun lun Búngiu. ²⁰ Rúguatina núnga quei jiláadina lun figou, dáwaguafu luágu gurúwa lúma Crístu. Mámaadina lubeíti áu méme abágaridubei nidaangua, Crístu abágaridubei nídan. Ibágarí le nabágaridubei lídan núgubu, nabágariduñein láu sun nafínen luágu Líraü Búngiu le jinsifiñejabübei nun, ába ledéregeragun lúnga lun loúnwen nuágu. ²¹ Mabúseerúntina lubei namájarun lun lareíni Búngiu láu nagiribudun lún buri igáburi lánina lilúrudun Moisés, lugúndun lun jamúga gayára lan

leréderun gürígia richágu ligíbugiñe Búngiu láu lagúnfulirun lúma lúru lu ligía, úati jamúga ju lan loúnwen Crístu.

Lúru lu ódi afiñeni

3

¹ ¡Jugúya Galáciana, magáambaditún giñe! ¿Ca abíñaragubadún lun magáambun jubei lan ugánu le inárünibe libügürü wasálbarun? Lídan meja wapúrichijan jun, arúfuda wamúti laníchigu loúnwen Crístu luágu lugúruwan jun, furáangu. ² Aríñaga jumei cátei le nun. ¿Lueígiñe jagúnfulirun lúma lilúrudun Moisés jerésibirei Sífiri Sándu ódi lueígiñe jafiñerun luágu le jagáambubei luágu Crístu? ³ ¿Ída líña ítara lubei jumágaambadi? Gumésétún eíbuga lúma Crístu láu lubáfu Sífiri Sándu, ¿guetó jarítaguatún funági luágu buitimaabei lan jeíbun lun jígiruni Sífiri Sándu lun jagúnfulirun lúma jagáburi juríu? ⁴ ¿Marúfudajaangili sun le jasúfurirubei jun? ¡Arúfudajaali lámuga jun! ⁵ Dan le líchuguni Búngiu láni Espíritu jun, adúga ligía miláguru jagánagua, ¿cásan uágu ladúgei líra? Máma lugúndun adúga jumáni le lubeibei lilúrudun Moisés ladúgei, ladúgünbalin lugúndun afiñe jumá luágu le jagáambubei luágu Liraü.

⁶ Jarítagua jumá luágu Abrahám. Rulumuti meja sun lafiñen luágu Búngiu, luágu lafiñen, ába lerésibiruni Búngiu queisi ában wügürí richáguati. ⁷ Ligía lubeiti jugúya, lúnti jasúbudiruni luágu ja lan afiñebaña, jagía lan linébaanfaanbaña Abrahám tímatimaatiña. ⁸ Queisi subúdi láni Búngiu lubáramegiwa luágu ñibaña lan jádaangiñe ja mámabaña juríu lun jayábiba lan lun jeréderun richágu ligíbugiñe láu jafiñerun luágu Jesucrístu, ába laríñaguni ugánu buiti lun Abrahám lubáramegiwa, queisi bürúwañu lan tídan lilíburun. “Jabínirúba sun gürígia uboúagu bídaangiñe.” ⁹ Ítara líña lubeiti, ja afiñebaña, biníwatiña úara lúma Abrahám le afiñerubei luágu Búngiu.

¹⁰ Ja afiñerubaña luágu jasálbaruba lan láu jagúnfulirun lúma lilúrudun Moisés, bulíeiguatiña, lábugiñeñanu líñaragun Búngiu, lugúndun taríñajare Lerérun Búngiu. “Sun ja magúnfulirunbalin sun le bürúwañubei tídan lilíburun nilúrudun le nichugubei lídaangiñe Moisés, lábugiñeñanu níñaragun.” ¹¹ Furáanguti lubeiti luágu úa lan ní ában eréderuti richágu ligíbugiñe Búngiu luágu ladúgüni le laríñagubei lilúrudun Moisés, lugúndun taríñajare Lerérun Búngiu. “Láu lafiñerun gürígia luágu Búngiu lerédera richágu ligíbugiñe, ibíjaleíme ibágarí magúmuchaditi.” ¹² Ánjein lilúrudun Moisés máma cátei lánina afiñeni, lánina cátei le adügüwarügüti ladúga laríñajare lúru lu ligía. “Láu rügüñein jamúga lagúnfulirun gürígia láu sun igáburi lánina lúru lu le, libíjei ibágarí magúmuchaditi.”

¹³ Wagía queisi gürígia garaüwarügütiña, mabáfutiwa lun wagúnfuliruni sun lúru lu ligía. Ába laséfuruniwa Crístu lídaangiñe líñaragun Búngiu lé lúnbei yebe láburujan wawágun lueígiñe magúnfulirun wamáni sun lilúrudun Búngiu le líchugubei woun lídaangiñe Moisés. Barü lumuti Crístu líñaragun Búngiu luougua wewéñagua lídan le loúnwenbei luágu gurúwa, lugúndun taríñajare Lerérun Búngiu. “Íñarawagúati sun le ádarawagúti luágu gurúwa.” ¹⁴ Adúga lumúti loúnwen Crístu lun liábinba lan abíniruni le uágubei laríñaga Búngiu lun Abrahám, lídaangiñe Jesucrístu joun giñe ja mámabaña juríu, lúma lun werésibiruni, sun wagía, Sífiri Sándu le uágubei laríñaga Búngiu, láu wafiñen.

Lilúrudun Moisés, lúma lerérun Búngiu lun Abrahám

¹⁵ Nidújeñu, níchiga ában jémpulu jun lídaangiñeti jabágari gürígia. Dan le ladügün wügüri ában darádu, ába laseiniruni, úati ni ában lun gayára lan lagúluuduni ni lun líchugun ni cátei lánwoun. ¹⁶ Ítara líña giñe, rúlumuti meja Búngiu lerérun lun Abrahám lúma lun linébaanfan. Maríñaguntu Lerérun Búngiu “binébaanfaangu”, camá jamuga jawáguti sarágu gürígia, tariñajare “lun binébaanfan”. Laníchigu líra, “ábanrügü gürígia”, le Crístu. ¹⁷ Niján le naríñagubei. Adúgati Búngiu ában darádu lúma Abrahám, ába lachouúruruni, gádürü-san darándi irúmu lárigiñe, ába líchuguni lilúrudun lun Moisés lun lafúnraanguagüdüni joun gürígia. Ligía darádu lubei lé meja ladügübei Búngiu lúma Abrahám siñáti lagúluudúniwa láu ában lúrudu le ñübinbei gádürü-san darándi irúmu lárigiñe, lun ligiruni lerérun Búngiu lun Abrahám mebégiga. ¹⁸ Lun jamúga lídaangiñeti lan agúnfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúnfulirún láu lerérun. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibeí cátei ligía madügünga ni cátei lun lagáñeiruni.

¹⁹ ¿Cáti un ju lan lilúrudun Moisés ánjein siñá lubei lasálbaruníwa? Ñübinti lúrudu ligía sarágu irúmu lárigiñe lidáradun Búngiu lúma Abrahám lun larúfuduni jafígoun gürígia joun, lúntirügü ladúrarun darí liábin linébaanfan Abrahám, le Crístu, le giñe úmabei ladügüwa darádu ligía. Rúlumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüdüni lúrudu ligía joun gürígia. ²⁰ Ánjeinti dán meja le ladügübalin Búngiu lidáradun lúma Abrahám lun labíniruniña sun gürígia lídan, mayúsurunti ánjeligu, mayúsurun ligía gürígia, ligía adügübalin sun cátei.

Ca lan uágu njein lubei lilúrudun Moisés

²¹ ¿Laríñaguña funági le luágu múaradun lan lerérun Búngiu lúma lilúrudun le líchugubei lídaangiñe Moisés? Máma líña. Lun jamúga rúa lan ában lúrudu le íchugubei ubáfu woun lun wagúnfulirun láu, gayáraati jamúga jayábin gürígia lun jeréderun richágu ligíbugiñe Búngiu láu jagúnfuliruni le lubeíbei lúrudu ligía. ²² Lídan linárün cátei, mabáfutiwa lun wagúnfulirun lúma lilúrudun Búngiu, le líchugubei lídaangiñe Moisés, queisi laríñagun Búngiu tídan Lerérun. “Sun gürígia lábugiñeñanu lubáfu figou.” Ítara líña lun lídaangiñerügü lan affíñeni luágu Jesucrístu gayára lan jáfuridun gürígia lábugiñegiñe lubáfu figou lun jeréderun richágu ligíbugiñe Búngiu láu jafíñen luágu Jesucrístu, queisi meja laríñagun Búngiu lun Abrahám.

²³ Lubáragiñebei liábin Crístu lun gayáraabei lan wafíñerun luágu lun wasálbarun, lábugiñeñadiwa buga lubáfu lúrudu agúrabaja liábin. ²⁴ Ába lubeíti lanügüniwa lilúrudun Moisés lánime camá jamuga irájüñü wágia lun la-toúnigiruniwa lueí wuríbani darí liábin Crístu lun dánme lan wafíñerun luágu, gayáraajalíme weréderun richágu ligíbugiñe Búngiu. ²⁵ Guetóti, quei chülüjali lubei Crístu, mámaadiwa lábugiñe loúnigirun lilúrudun Moisés.

²⁶ Guetóti lirájüñü Búngiu sun jugúya luágu jafíñen luágu Crístu, lídaañadün ában lúma. ²⁷ Sun jugúya le belújalibeí lídoun ában lúma Crístu láu jabásterun, ibíjaadün ában igáburi líbe ligáburi Crístu. ²⁸ Mámaali cátei lánina lun juríu jumá o máma jumá juríu, o idámuni o máma idámuni, wügüri o würi, ladüga láu lídaañadün lan ában lúma Crístu Jesúsu, sun jugúya ábanrügüñadün. ²⁹ Ánjein

lánigu jubei Crístu, linébaanfaangu Abrahám jugúya, jerésibirubei le uágubei laríñaga Búngiu lun Abrahám quei jalágaante.

4

¹ Niján cátei le nabúseerúbei nariñagun. Dan le loúnwen ában úguchili áni ñúraügili liraü le lúnbei lerésibiruni alágan, mabuíduntimaati dan lun irájü ligía sügü jáu lumúsuniña lúguchi, láu sun ligía lan labúremebei alágan, ladüga siñágili lan layúsuruni. ² Añájein güriquia oúnigiruti, aríja jagía láu lalágaante dari lachülürün dan le líridubei lúguchi lun lerésibiruni. ³ Ítara líña lasúseredun wáma. Lubáragiñebei liábin Crístu ubouágun, lábugiñeñadiwa meja lúruđu lúma buri igáburi le mámabei lúnti ladúrarun lun sun dan. ⁴ Dan le lagúnfulirunbei dan, ába loúnajani Búngiu Liraü, le agúriajoubei tídaangiñe ában würi, ába liábin quei juríu lábugiñe lilúrudun Moisés. ⁵ Liábinbei ítara lun laságaruniwa lábugiñeñe lúruđu ligía, lun lerésibiruniwa Búngiu queisi lirájüñü.

⁶ Lúnti larúfuduni Búngiu luágu lirájüñüjadiwa lan, ába loúnajani láni Liraü Espíritu, le méme Sífiri Sándu, tídoun wanígi, áni agúajati Espíritu ligía wádaangiñe lun Búngiu. “¡Núguchi!” ⁷ Lirájüñü lubeiti Búngiu wagía, mámaadiwa idámuni, áni ladüga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le buídubei joun ja afiñebaña

⁸ Dán meja le ibídiñegili Búngiu jun, jadámuñadün meja “búngiugu” ja mámabaña búngiugu lídan linárün cátei. ⁹ Ánjein guetó, láu subúdi jumáli lan Búngiu, —lídan lirícha cátei, láu subúdi láadün lan Búngiu —¿ída lubáyan gayára lan jarítangun lúnya jíchaagun júngua queisi idámuni lábugiñoun lúruđu lúma buri igáburi le mabáfubei lun ladügün ni cáta jun? ¹⁰ Adáaguatün buri fédu ítaga wéyu, ítaga játi, ítaga dan, ítaga irúmu queisi laríñaguni lilúrudun Moisés lun jeréderun richágu ligíbugiñe Búngiu, lídan jarítangun. ¹¹ Janúfudetina luei masériwidun lan wadágimanu le nadügúbei jagánagua lun ni cáta.

¹² Nidújeñu, ayúmuraguatina jun lun jarítangun queisi áu luágu buri cátei le, ladüga furíjadina lun mámaadina lan lábugiñe lilúrudun Moisés queisi meja mámañadün lan lábugiñe lúruđu ligía. Madügüntün ni ában wuríbani nun lídan meja júma nan, ¹³ quei subúdi jumáni, ladüga meja ában sándi le nuágubei gayára lubei neréderun júma furúmiñeti dan lun napúrichijani ugánu lánina asálbaruni jun. ¹⁴ Sándi ligía lé meja nuágubei, ában meja ochúni nun, múnabunti janügünina luágu líra. Lubáragiñe líra, ába jerésibirunina queisi ában láni Búngiu ánjei, camá jamuga Jesucrístu guánarügü áu. ¹⁵ ¿Ca susébebei lun ugúndani lé meja jasándirubei náu? Gayáraati nariñagun luágu jáni fuleísei luágu ánjein lan jamúga meja lúnti, jaságaruñein lan jamúga jágu lun jíchuguni nun. ¹⁶ Guetó, ¿jáganijadina funági lueiñerügü nariñaguni inárüni jun?

¹⁷ Weíriti juwámaan joun mútu ja, mabuídunti jarítangun jubá. Le jabúseerubei, lun jadísedagüdünün waweí lun ában lánne jawámaadun jun. ¹⁸ Buíti lun juwámadirun joun ámu, ñi áu yebe júma o úaadina lan júma, ánjein láu lubei lubúidun arítangun ladügüwa. ¹⁹ Nirájüñü, nasúfuriruñaya igárigu juágu quei ában úguchuru dan le tagáridun, áni ítara méme núba asúfurira daríme lun jarúfuduni luágu níjein lan Crístu jídan. ²⁰ ¡Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan narítagua juágu!

Jémpulu tuáguti Agár túma Sára

²¹ Jugúya le busénbei jíchaagun júngua lábugiñooun lilúrudun Moisés, aríñaga jumei cátei le nun. ¿magáambun jumágili le lariñagubei lilúrudun Moisés? ²² Lariñajare luágu garájüñü lán meja Abrahám bián irájüñü, ában táu lidámun, le ában táu lúmari to ában würi to máma idámuni. ²³ Le tiraü idámuni, itara líña lagüriajóun quei jagüriajóun sun irájüñü, ánjein le tiraü to máma idámuni, lagüriajóun lun lagünfuliruba lan le uágubei lariñaga Búngiu lun Abrahám. ²⁴ Itara líña cátei le queisi ában jémpulu. Bián würiña ja, itara jáña queisi bián darádu le ladügübei Búngiu. Adügati ában darádu lúma Moisés dan le líchugunbalin lilúrudun lun luágu wübü Sinaí. Darádu ligía, itara líña queisi Agár ladüga sun lan gürigia ja lábugiñebaña lúrudu ligía idámuni lun jagünfulirun lúma, queisi idámuni jamá sun tirájüñü Agár. ²⁵ Wübü le Sinaí lídaañein fulásu le giríbei Arábia (le ñi lubei jagánoua ladügewagun tiraü Agár). Agár liyáwaboun wübü ligía lúma lúrudu le íchugübei ñi. Ubúruge le Jerusalén le guetóbei, itara líña quei wübü Sinaí lídan dan le sügüjalíbei, ladüga ubúruge ligía jáu sun lílana, itara jáña quei idámuni lun igáburi lánina lilúrudun Moisés. ²⁶ Ánjeinti Jerusalén le siélubei, máma lánina idámuni queisi máma lan idámuni lúmari Abrahám, áni lirájüñü Jerusalén le siélubei wagía. ²⁷ Tariñajare Lerérun Búngiu.

Gúndaaguabá, würi marájeitu, amürü to maráuboun, wáguabá láu ugúndani, amürü to ibídiñebei agáriduni bun, lugúndun amürü to áuboun mebéresenwa lan, gibetimaabaña birájüñü sügü táu würi to garaüuboun láu búmari.

²⁸ Nidújeñu, queisigubeirügü Isáac lan irájü le líchugubei Búngiu lun Abrahám lun lagünfulirun láu lerérun lun, wagía afiñetiña ladügewagunbaña Abrahám ja uágubaña lariñaga Búngiu lun. ²⁹ Itara quei meja dan ligía, isáani le agüriajóubei lídan ában igáburi quei furúmieguarügü agüriajóuni eíbaaja lumúti meja isáani le agüriajóubei láu lubáfu Sífiri Sándu, itara líña giñe lasúseredun guetó —ja lábugiñebaña lilúrudun Moisés eíbaaja jamútiña ja mámabaña lábugiñe lúrudu ligía. ³⁰ ¿Cáteisán tariñagunbei Lerérun Búngiu? Tariñajare. “Bugáboun idámuni láu sun tiraü, lugúndun siñáti gafánran lan tiraü idámuni lídan alágan lúma tiraü to mámaboun idámuni.” ³¹ Nidújeñu, mítaraantiwa lubeíti quei tirájüñü idámuni, itara wáña quei tirájüñü würi to mámaboun idámuni.

5

Míchaaguaya jumá júngua idámunime

¹ Furígüda láadiwa Crístu lídaangiñe idámuni wamá lun lúrudu buri lúma igáburigu. Reidei jumá lubeíti le ñi lubei líchugaün Crístu, míchaaguaya jumá júngua idámunime.

² Agáamba jumána. Áu páblo aríñagatina jun luágu ánjaün lan íchaagua júngua lábugiñooun igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun. ³ Nariñagayaali lun furúmieguarügü wügüri le resíbinbalin circuncisión luágu lúnti lan ladügüni sun líbiri le lubei le lilúrudun Moisés lun gayáraabei lan leréderun richágu ligíbugiñe Búngiu. ⁴ Jugúya le jarítaguabei luágu richágu jumá ligíbugiñe Búngiu láu jagünfulirun lúma lilúrudun Moisés, ígira jumáali Crístu, díseedün lueí asálbaruni le láurügüti lareíni Búngiu. ⁵ Wagía, láu lubáfu Sífiri Sándu lúma láu wafiñen luágu Jesucrístu, jeménigitiwa luágu weréderuba lan richágu ligíbugiñe Búngiu. ⁶ Ánjein lídaañadiwa lubeí ában lúma Crístu Jesúsu, málati werésibiruni

circuncisión lúmoun merésibirun wamáni. Le busénwabei, lun afiñe wamá luágu Jesucristu lúma lun warúfuduni afiñeni le wawágubei láu wínsiñejabu joun gürígia wáledi.

⁷ Buíti meja jeíbugun lúma Crístu, ¿ca ígiragüdúbalin lagaambúniwa inárúni jun? ⁸ Máma Búngiu le agúarubei jun adügúbalin líra. ⁹ Mabúlieida jumei luágu furése lan lawáraudagan arúfudajani le maríchatí lun lagünrinchaguni jafiñen sarágu gürígia queísigubeirügü résigüda lánun murúsun ísi sun to ańóundawaguboun láu. ¹⁰ Neménigiduña luágu Wabúreme Crístu lúnya lasáminaragüdünün queísi áu luágu buri cátei le. Áni cáteiñein lan gürígia le añawurijabei jun, labeíchubei Búngiu.

¹¹ Aríñagatiña arúfudajatiña yéetiña jagía luágu apúrichija nan luágu lúnti lan jerésibirun wügüríña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeíbaajana meme juríu? Lun jamúga napúrichijani circuncisión, maríbaanti jamúga láburbujan dimúrei luáguti louñwen Crístu luágu gurúwa joun. ¹² Ánjeinti jawágu ja abúseerúbaña jádaruni jídoni luágu lúnti lan jerésibiruni circuncisión, igúndaatina jamúga lun jíbunun jawáriuwa gumúgubei!

¹³ Ánjeinti jugúya, nidújeñu, agúajati Búngiu jun lun lagídarunün lábugiñegiñe igáburi lánina lilúrudun Moisés, manúga jumeirügü liñáti líra lun lébume gayára lan jasígiruni ugúndani buri le lánina ubou le. Lubáragiñe líra, seríwigua jumá júniwagua láu ínsiñejabuni le jídaanbei jubáruagua, ¹⁴ lugúndun láu jagúnfulirun lúma lúrudu le aríñagubei. “Jínsiñelá gürígia bíledi bun queísi bísiñegua búngua”, gúnfulijadün láu sun lilúrudun Moisés. ¹⁵ Góunigi jumá, ánjañun ageíndagua júmagua, jagúmchaguagüdüba júniwagua.

Ugúndani le lánina ubou, lúma eíbuguni lúma Sífiri Sándu

¹⁶ Niján cátei le naríñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina ubou. ¹⁷ Ugúndani le lánina ubou máma lúmagiñeñein Sífiri Sándu, áni Sífiri Sándu, máma lúmagiñeñein ugúndani le lánina ubou. Gáganiguati ában lúma le ában, ligía lásíferunbei jadügüni jugúya cátei le jabúseerúbei yebe jadügün. ¹⁸ Ánjein Sífiri Sándu lubei abúgurubadün, mámaadün giñe lábugiñe lilúrudun Moisés.

¹⁹ Ménreengúnti laríjiniwa cátei lán buri cátei le jadügübei ja afálarubalin ugúndani lánina ubou. Gámariguatiña jámagua mamárieidunga, adáaguatiña buri cátei wiyeti, uati nibúsigari jamá láu jasálufurin, ²⁰ judúguatiña joun sándu, abíñaraja jagía. Níjein iyéreejabuni jádan, gáganiguau, lúma eméendüni. Ménreengúnti jagáñidun, jawougua rügüñein jarítaagua súnwandan, fánreinguagüda jamúti adámurini. ²¹ Gimúgatiña, gáfarajadi, gátadi, weínamu jeígin, adúga jagía ámu buri cátei lenége líra. Naríñaguñein jun quei naríñaguni lubáramegiwa luágu ja lan adügúbalin cátei le, mebelurunbaña lídoun larúeijan Búngiu.

²² Niján buri igáburi le líchugubei Sífiri Sándu. Ínsiñejabuni, ugúndani, darángilaü, gagúraasuni, areíduni, lubuídun igáburi, úraguni, ²³ manáanguni únguaü, ragúguaü únguaü. Úraguati buri igáburi le lúma furúmieguarügü lúrudu. ²⁴ Ja lánigubaña Crístu, dágua jamáli sun luwámaan cátei le lánina ubou le joun luágu lugúruwan Crístu. ²⁵ Ítara quei wabágaridun lídaangiñe Sífiri Sándu, lúnti giñe wígirun lun labúguruniwa Sífiri Sándu lídan le wadügübei.

²⁶ Moún lumuti wanáangun woúngua, añáwuriatiwa joun wíbirigu ítara, rúti gíñe gimúgäu wádaangua.

6

Íderagua jumá júmawagua

¹ Nidújeñu, ánjañun aríja luágu áburujaali lan ában jídaangiñe lídoun figou, jugúya le eíbugubei lúma Sífiri Sándu lúnti jíderaguni lun lagídarun lídaangiñe figou lígía, adúga jumei láu maweíriguni. Lúnti gíñe goúnigigua jumá júngua luei gíñe jáburujan lídoun figou queísi lígía. ² Íderagua jumá júmawagua lun jawánduni jijürügu, ítara lúba jagúnfulirun lúma lilúrudun Crístu, le lánina insíñejabuni.

³ Lúnti wíderaguñiña wíbirigu lugúndun ánjein anáangua gürígia lúngua áni ni cáta lígía, leyéedaguña lúngua. ⁴ Cáda ában gürígia lúnti lagúserun lúmagua ída líña lan ladiñurun. Ánjeinti adáriragua lúngua buíduñu, lígíaba buídu guánarú lúngua, máma ámu, ⁵ lugúndun sun gürígia gefeñebaña lun Búngiu jawoúgua, máma jawágu ámu.

⁶ Le únbei larúfudajouá Lerérun Búngiu lúnti lafánreinjani sun luwúyeri íbíjini lúma le arúfudajabei lun.

⁷ Mayéedagua jumá júngua, siñáti jéjerajan láu Búngiu. Le lábunagubei gürígia, lígíaba gíñe lalúbaja. ⁸ Ánjein ábunagua ában gürígia cátei le íchugubei ugúndani le lánina ubou lun, le méme lábunagubei, líchuguba ában alúbajani le lánina féridi lun. Ánjein ábunagua ában gürígia cátei le íchugubei ugúndani lun Sífiri Sándu, líchuguba Sífiri Sándu ában alúbajani le lánina íbágarí magúmuchaditi lun. ⁹ Moún lumuti lubeiti labúchadun wawágu adúgei cátei le buídubei, lugúndun ánjawa ítara méme adúgei, walúbajaba buíti dánme le lachúlürün dan lun werésibiruni. ¹⁰ Lígía, adúga wamei lubei le buídubei joun súnugubei ságü gayára lan, jóúntima wadújeñu lueiñe Crístu.

Ewéridijani lúma lagúmujoún ayoúraguni

¹¹ Aríja jumá luweínamu létera le áubei nabürüja jun guetó láu nújabu guánarügü. ¹² Ja abúseerúbaña jafósurunün lun jíchaagun júngua lábugiñoun igáburi le lánina circuncisión jadügüñein lúnügü jeréderun buídu jagíbugiñe jurí, lun meíbaajoúniwa jamá lueiñe jamúga jaríñagun luágu lídaangiñe rügüñein lan loúnwen Crístu wasálbara. ¹³ Ni ja íchaagubaña jóungua lábugiñoun igáburi le lánina circuncisión, madügün jamúti sun le laríñagubei lilúrudun Moisés, busénrügütiña lun jerésibiruni jugúya circuncisión lun gayára lan japántajan luágu jafósurunün lun jibíjini circuncisión. ¹⁴ Ánjeinti áu, mabúseerúntina napántajan ni ca uágu, ában rügüñein cátei uáguti nadímureja weíri—luágu loúnwen Wabúreme Jesucrístu luágu lugúruwan wawágu. ¡Lídaangiñe lugúruwan Crístu jílaañu líña cátei le lánina ubou nun áni jílaañu níña gíñe lun cátei le lánina ubou! ¹⁵ Lun Búngiu, ni cáta ánjein íbija wabálin circuncisión lámoun míbijn wamáni, le busénwabei, lun iséri wamá gürígia. ¹⁶ Sun ja abágaridubaña ítara, jagía lánigubaña Búngiu le tímatimaati, resibi jamá lubeiti darángilaü lúma gudémejabu lúmagiñe.

¹⁷ Lúmagiñe dan le uguñe, mabúseerúntina lun níbijn lénreengúnga ni ca úmagiñe. Arúfuda lumúti lárigi burí bíti le nuágubei luágu ában nan esériwiduti lun Nabúreme Jesúsu.

¹⁸ Nidújeñu, binílañ Wabúreme Jesucrístu, sun jugúya. Ítaralá.

LIGÁRADAN PÁBLO JOUN ÉFESONA

Labürüjan Páblo joun títana liglisi to Éfesoboun

¹ Anája áu Páblo, le láni Jesucrístu apóstolu láu lugúndan Búngiu, nabürüjañoun gárada to jun, jugúya le lánigubei Búngiu ja afñebaña luágu Crístu Jesúsu lídan ubúругu le Éfeso. ² Binílaün Wáguchi Búngiu lúma Wabúreme Jesucrístu, ibíja jumá gñe darángilaü jámagiñe.

Abíniruni le wánibei lugúndun lídan wamá ában lúma Jesucrístu

³ Rúwama uweírighuni lun Búngiu, Lúguchi Wabúreme Jesucrístu, lugúndun láu lídan wamá ában lúma Wabúreme Jesucrístu, biní laadiwa láu sun luwúyeri abíniruni le lánina siélu. ⁴ Lubáragiñebeí meja ladügüni Búngiu ubou, anúadira lumútiwa lun lánigubadiwa lan láu le lúnbei ladügüni Crístu wawágu, lun weréderun madúnrunga ligíbugiñe, derégeguñu woúngua lun. ⁵ Fánrein lumútiwa lúmagiñe binárü, láu línsiñejabu, lun lerésibiruniwa queísi lirájüñü lídaangiñe Jesucrístu, ladüga ligía lan lugúndaanbei woun. ⁶ Ligía súnwandan lubeí wíchugun uweírighuni lun Búngiu luágu luweírín lareíni le áubei labínirawa dan le lídan wamá ában lúma Liraü le jínsiñebeí lun. ⁷ Láu luweírín lareíni Búngiu, sálba láadiwa láu líta Liraü le áwiyurubei wawágu dan le loúnwenbei luágu gurúwa, ferúdunaleí waffgoun. ⁸ Arúfuda láali Búngiu lareíni woun le tímátimaati láu líchugun sun luwúyeri subúdi lúma gunfaráandaü woun, ⁹ subúdigüda láali layúmajan lé meja arámudaguabei woun, o arítaguni lan le lasáminarubei ladügün. ¹⁰ Según arítaguni le, le lúnbei lagúnfulirun quei lubúdubu dánme le lachülürün lidáani, ladúnraguagüdübei Búngiu sun cátei labúgiñe lagúmadijan Crístu, dándu lé buri siélubei quei le ubouágubei.

¹¹ Láu lídaañadiwa lan ában lúma Crístu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lídaañein lugúndan Búngiu le adügübalin sun cátei quei labúseeruni. ¹² Anúadira lumútiwa lun wabágaridun, wagiá le afñebeí luágu Crístu furúmiñe, lun líñurúniwa líri Búngiu luágu luweírighun. ¹³ Jugúya gñe, dan le jagáambunbalin ugánu le lánina inárüni—ugánu le anügübalin asálbaruni jun—ába jafiñerun luágu Crístu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sífiri Sándu le uágubei laríñaga, jun. ¹⁴ Sífiri Sándu ligía ában lichoúrún Búngiu woun luágu werésibirubei lan alágan le lúnbei líchuguni Búngiu woun dánme lagúmuchuni lasálbaruniwa, wagiá le lánigubei, lun líñurúniwa líri luágu luweírighun.

Lamúriajan Páblo lúma Búngiu lun líchugun subúdi joun afñetiña

¹⁵ Ligía dan le lubeí nagáambunbei luágu afñeni le jídaanbei luágu Wabúreme Jesúsu, lúma luágu ínsiñejabuni le juágubei joun sun ja lánigubaña Búngiu, ¹⁶ másuti neteíngiruni Búngiu juágu dan le narítagun juágu lídan nayúmuragun lun. ¹⁷ Amúriajatina lúma Lubúngiute Wabúreme Jesucrístu, Úguchili Weírighuti, lun líchugun subúdi íñugiñeti jun lun gunfaráanda jumáni le lasúbdiragüdübei jun, lun gñe jasúbdirunitima Búngiu buídu. ¹⁸ Amúriajatina lúma Búngiu lun larúgoungadagüdüni jisáminan lun jasúbdiruni ca lan uágubei lagúara jun lun jeménigidún luágu, lúma lun jasúbdiruni ída líña lan luweírighun lúma lírisin alágan le líchugubei Búngiu joun lánigu. ¹⁹ Amúriajatina gñe lúma lun

lasúbudiragüdüni jun ída líña lan luweírín lubáfu le mébejabei le ñadágimeinbei wádan, wagía le afíñebei luágu. ²⁰ Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe oúweni, ába lañúuragüdüni lueigiñe loúnwenren yágüta siélu. ²¹ Rúlumuti lougiñe sun gumádi, ubáfu, érei lúma arúejani lé buri siélubei, lúma lougiñe sun le gayáraabei liriidún, dándu lídan dan le queísi lídan le lúnbei liábin. ²² Rúlumuti sun cátei lábun lubáfu Crístu, rúlei giñe Crístu guánarügü lun ligiaba lan ichügüdinaiú joun sun güriquia ja lánigubaña, ja gíribaña lilígilisin. ²³ Güriquia jagía, ja méme lúgububaña Crístu, buin jáña láu libágari Crístu (láu lubáfu láni Espíritu), áni Crístu guánarügü adügübalin sun catei áni ágüdajalei.

2

Sálbaadiwa láu lareíni Búngiu

¹ Rújali Búngiu ibágari magúmchaditi jun úara lúma Crístu le lásaaragüdübei lídaangiñe oúweni, láu sún meja jiláñugidün lan lun cátei le luáguti Búngiu, lurúma wuríbani lúma figou buri le gádaanbalün. ² Lídan meja dan ligía, falá jumuti láni ubou le jémpulu, adúgei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu. ³ Ítara líña meja giñe wabágaridun, sun wagía, luágu ában dan, afálarei wayúmajan, agúnfulira lúma lugúndan wagáburi lúma lugúndan wasáminan, queísi güriquia garaúwarügütiña. Ligía lúnti lubei yebe láburuan lanárime ligáñi Búngiu wawágun queísi ja jíbiri. ⁴ Weíríti lugúdemejabu Búngiu, ⁵ ába larúfuduni luweírín linsíñejabu woun láu sún meja jiláñugidiwa lan lun cátei le luáguti Búngiu lurúma wafígoun. Ába ladáraruni lubéneri ibágari magúmchaditi woun láu lásaaragüdüni Crístu lídaangiñe oúweni. Sálbatiwa lubeiti láu lareíni Búngiu. ⁶ Sarágüda lumútiwa giñe Búngiu lídaangiñe oúweni lánina figou láu lásaaragüdüni Crístu lídaangiñe oúweni, ába líchuguni wabára woun lúma Crístu yágüta siélu, lúma uweíríguni lánina ubáraü ligía. ⁷ Ladügünbalin líra lun larúfuduni luweírín wínsiñe lun lúma lareíni woun lídan Crístu Jesúsu lídounme dan le lúnbei liábin. ⁸ Sálbawádiwa luágu lareíni Búngiu, luágu wafíñen luágu. Mára jamúga ában cátei le wagía guánarügübei adügübalin, Búngiu íchugubalin wasálbarun woun. ⁹ Mára lídaangiñeti cátei le jamúga ladúga mútu, lun úa lan ní ában apántajati lueigiñe. ¹⁰ Lugúndun Búngiu adügübaliwa, iséri güriquia wagía lídan Crístu Jesúsu lun wadügün cátei buíti, quei larítaguni lúmagiñe binárü.

Waráandarun lúma Búngiu lídaangiñe Crístu

¹¹ Jarítagua jumá lubeiti luágu ída jíña lán meja furúmiñe. Mára meja lídaangiñetün jarásan juríu, ligía lébubei güriquia ja juríu, ja erésibirubalin circuncisión, ába jagúarunün, “güriquia ja merésibirubalin circuncisión”, o güriquia ja mámabaña lánigu Búngiu. ¹² Lídan meja dan ligía, ibídiñegili meja Crístu jun, mámagidün meja lílana linásiñun Israél, ja lumútumiñabaña Búngiu, bougudiñadün meja luei lídáradun Búngiu joun lánigu lúma sun le lúnbei líchuguni joun lábugiñe darádu ligía. Jabágariduñá meja ubouágu meménigiga, ibídiñega Búngiu le inárütibeí jun. ¹³ Ánjeinti guetó, quei lídaañadün lan ában lúma Crístu Jesúsu, jugúya meja le dísebei luei Búngiu, guetó yaráfaadün lun, láu loúnwen Crístu. ¹⁴ Barú laadiwa Crístu lídoun aráandaruni, ladúga adúga láaña juríu jáma ja mámabaña juríu lun ában méme jamá mútu, güringua lumúti gáganiguaü lé meja afánreinragubaliña. ¹⁵ Gumúguagüda lumúti cátei le

lilúrudun Moisés láu sún buri gumádi lánina lúrudu ligía láu loúnwen, adúgeina láña juríu jáma ja mámabaña juríu lun ában mémebaña lan lídan. Ítara líña ladúgüni aráandaruni wádaangua. ¹⁶ Láu loúnwen Crístu luágu gurúwa, ába lagúmuhaguagüdüni wuríbu lé meja jádaanbei juríu jáma ja mámabaña juríu, ába laráandaragüdüniña biángubei lúma Búngiu, adúgeina láña biángubei lun ábanrügü lan mútu—lumútuniña Búngiu jagía.

¹⁷ Núbinti Crístu, ába lapúrichijani ugánu buíti luáguti aráandaruni lúma Búngiu joun sun gürígia, dándu jun, jugúya le mámabei juríu já meja dísebaña lueí Búngiu, quei woun, wagía juríu já meja yaráfabaña lun Búngiu. ¹⁸ Lídaangiñe Crístu, sun wagía, juríu máma juríu, gayáraati wayárafadun lun Búngiu láu lubáfu ában méme Espíritu, le Sífiri Sándu. ¹⁹ Ligía mámaadün lubei teréncha lun larúeijan Búngiu, lílanaadün larúeijan quei sun ja lánigubaña. Lufámiliangu Búngiu jugúya. ²⁰ Sun wagía afiñetiña, dándu juríu quei máma juríu, ítara wáña quei ában ligíli to ligíbuaguboun wagábu le jábunubei apóstolugu jáma profétagu. Cátei lé buri jarúfudajabei, ligía wagábubei, Jesucrístu meme ligía dübü le weírigitimaabei lídan ébuu ligía. ²¹ Luágu ébuu ligía le Crístubei tiñúrawagua múna tugúya (wagía afiñetiña), aráanseñu sun tumégeggun buídu darí lun tiábin lun ában tan ligíli to derégewatu lun Crístu, to gíñe lídaantu ában lúma. Ítara wáña wagía le afiñebeí luágu Crístu. ²² Ítara líña lubeiti, jugúya gíñe le mámabei juríu, lídaañadün ában lúma Crístu, oúndaraguatün jáma sùngubei ja jíbiri lun wayábin sun wagía lun ítara wamá quei ában múna to ñí lubei lagánawa Búngiu láu láni Espíritu.

3

Luwádigimari Páblo lun lapúrichijan luágu Crístu joun ja mámabaña juríu

¹ Ligía lébubei nayúmragun, áu Páblo, lun Búngiu juágu. Daúwañu níña lueígiñe luwádigimari Crístu le adúga náalibeí jagánagua, jugúya le mámabei juríu. ² Mósu subúdi jumáali lan luágu rúlaali lan Búngiu wadágimanu le nun láu laareíni, luágu jáni fuleísei. ³ Queísi nabürüjan jun, adúga lumúti meja Búngiu ában aráansejani juágu, jugúya le mámabei juríu, arámudaguati aráansejani ligía, ába lasúbudiragüdüni nun. ⁴ Láu jalíjani le nabürüjabei, jasúbudirubei luágu gunfaráanda náni laráansejan Búngiu luágu Crístu, lé meja ligiarügübei asúbudirei. ⁵ Masúbudirawagüdünti aráansejani ligía lun ni ában lídan meja dan le sügüjalibeí, ánjeinti guetó, láu lubáfu Sífiri Sándu, arúfuda láali Búngiu joun láni apóstolugu jáma profétagu ja deréguabaña jóungua lun le gumúti. ⁶ Niján aráansejani ligía. Lídaangiñe ugánu le lánina asalbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lúgubu Crístu, gafánraantiña gíñe lídan méme dimúrei le líchugubei Búngiu joun juríu luágu gayára lan weréderun richágu ligíbugiñe Búngiu lídaangiñe Jesucrístu. ⁷ Fuleísei láadina Búngiu láu líchugunina lun napúrichijani ugánu ligía láu lubáfu, laú sun madüna náni yebe fuleísei ligía. ⁸ Ünabutimaatina sügü láu le ünabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírin jarísin lídan Crístu le mébejabei. ⁹ Rúlaadina Búngiu, le adügübalin sun cátei, lun nafúraanguagüdüni joun sun gürígia ída líña lan lanügün aráansejani ligía lé meja arámudaguabei fulásu. ¹⁰ Arámudaguati meja aráansejani ligía lun guetó lan gayára lan jayábin sun láni Búngiu ánjeligu ja arúeijabaña siélu lun jasúbudiruni líchú láu Búngiu lídan sun luwúyerigu jádaangiñe afiñetiña, ja líligílisinbaña Crístu. ¹¹ Úraguati

sun le lúma larítagun Búngiu le larítagubei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu. ¹² Lídaangiñe Crístu, gayáraati wayárafadun lun Búngiu láu eménigini le líchugubei wafiñen luágu Jesucrístu woun. ¹³ Ligía nayúmurgunbei jun lun máburujan lan jarúna lueigiñe le nasúfurirubei juágu, lugúndun weírirügüti cátei líra jun.

Línsiñejabu Crístu

¹⁴ Ligía lubeiti lébubei nájuduragun ligíbugiñe Lúguchi Wabúreme Jesucrístu, ¹⁵ le Jáguchibe sun lufámilian Búngiu ubouágu lúma siélu. ¹⁶ Amúriajatina lúma Búngiu lun líchugun érei lúma ubáfu jun según luweírín ubáfu le lúmabei, lun jídin jubáruaguoún láu Sífiri Sándu le jídaanbei. ¹⁷ Amúriajatina giñe lúma lun jíchugun fulásu tídan janígi lun laganouún Crístu ñi, láu sun jaffiñen luágu, ¹⁸ lun giñe láu lan ában ínsiñeni weíríti, derégüdagu jídan, gayára lan gunfaráanda jumáni lítulen, limígifen, lujúlilin lúma líñun línsiñejabu Crístu buídu, jáma sun jíbiri affiñetiña. ¹⁹ Amúriajatina lubeiti lun jasúbudiruni ínsiñejabuni le, le weírítimaabei luei sun le wayáraabei asúbudira, lun lúma jumá Búngiu le gumúti.

²⁰ Guetóti, iñurúalá líri Búngiu le gabáfubei lun ladügün giñe sügü láu le wamúriajabei o le lan wasáminarubei, láu lubáfu le ñadágimeinbei wádan. ²¹ ¡Arijúalá luweírigin Búngiu lídaangiñe sun le ladügübei jádan lánigu lúma lídan Crístu Jesúsu luágu sun sígulu lúma sun dan! Ítaralá.

4

Lídaañadiwa ában láu lubáfu Sífiri Sándu

¹ Ladüga sun le adüga láalibe Búngiu jun, ligía namúriajabei júma, áu le adaürübei lueigiñe luwádigimari Crístu, lun jóuseragun júngua quei lúnti lan jadügüni ja únbaña wájali lan Búngiu lun lánigu jamá quei lagúarun jun. ² Ünabugu jumá, jínsiñejabu, gagúraasun jumá, areída jugúyame joun jíbirigu. ³ Jóucha jumá lun lídan jumá ában súnwandan láu lídejan Sífiri Sándu, efbuga jumá lídan darángiläü júmaga, ítara lúba lídaanbadün lan ában súnwandan. ⁴ Lúnti wanáangun woúngua lídan ában, lúma jáma jíbiri lánigu Búngiu ladüga lumégegun lan ában méme úgubu le giribe lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme eménigini luágu walágaante lídaangiñe. ⁵ Ligía méme Abúremein Wabúreme sùngubei, ligía méme wafiñen luágu Jesucrístu, badíseitiwa sun wagía lídan líri Abúremein ligía. ⁶ Ában rügüñein Búngiu Jáguchi sùngubei, jóugiñeñein sùngubei, ñadágimeinti jáu sùngubei, áni níjein jádan sùngubei.

⁷ Rújali Crístu sarágu luwúyeri ubáfu joun lánigu, rúlaali ubáfu le labúseerubei líchugun lun cáda ában wádaangiñe, woun. ⁸ Ligía laríñawagunbei tídan Lerérun Búngiu luágu Crístu.

Múdeiti siélun barúina láña adaürütiña lúmaga, ába buri líchugun ubáfu joun gürígia.

⁹ ¿Cáti míni lan “múdeiti”? Míni lan luágu rarí lan furúmiñe lídoun ubáraü buri le únabutimáabei ubouágu. ¹⁰ Crístu le arárirubei lun ubouágun, ligía méme giñe le amúdeirubei lídoun líñun-ágei siélu láu sun luweírigin lun labuínchagüdüni sùngubei láu guánarügü. ¹¹ Ába líchugun ubáfu lun cáda ában jádaangiñe affiñetiña luágu. Añájein rúti joun lun apóstolugu jamá, jíbiri lun ladímurejan Búngiu jayúmulugugiñe, jíbiri lun jóudin apúrichijeí ugánu

buíti lánina asálbaruni joun ja magáambun jamágilibei ugánu ligía, jíbiri lun jafádirijan lúma lun jarúfudajani Lerérun Búngiu. ¹² Ítara líña laráanseruniña lánigu lun gayáraabei lan jesériwiduni buídu, ¹³ lun jedérebudagüdüniña jíbiri lun lidan Crístu daríme wachülürün sun wagía lun lidan wamá ában lidan wafíñen luágu Jesucrístu, le Liraü Búngiu, lúma lidan lisúbudinwa. Ítara lúba gürigia wamá weínamujaña lidan weíbugun lúma Crístu, ítara lúba wagáburidun queisi lagáburidun Crístu. ¹⁴ Mítaraanjádiwame quei irájüñü lun ménreengun lan wasáansijan lun ladúurujaniwa ligábalin furúmieguarügü iséri luwúyeri arúfudajani lun wáburujan lídoun jayéeni gürigia bíbutiña ja abúseerúbaña janügüniwa lídoun úma le maríchabei. ¹⁵ Lubáragiñe líra, wadímorejabei inárüni láu ínsíñeni lun wawáanserun lidan sun luwúyeri lidan ában lúma Crístu le ichügüdináubei joun sun lánigu ja gíribaña lúgubu. ¹⁶ Sun wagía le lúgubu Crístu, úraguatiwa lidan ában lágubiñe lagúmadijan Crístu, cáda ában wádaangiñe gayáraati wíderaguniña ja wíbirigu. Ítara lúba gayára lan wawáanserun súngubei lidan weíbugun lúma Crístu, awáanse wagíame lidan ínsíñeni.

Iséri ibágari lidan Crístu

¹⁷ Niján lubeíti cátei le naríñagubei jun lidan líri Wabúreme. lun jebé lan jabágaridun quei ja ibídiñejabubaña lun Búngiu, ja abágaridubaña úragua lúma jasáminan le málabei. ¹⁸ Darúgu líña láu jasáminan, úati ibágari le ñúbinbei lúmagiñe Búngiu jádan lugúndun ibídiñeti ni cáta joun lurúma tidére janígi. ¹⁹ Féridi jamáali jabúsigari, derégeguaaña jóungua lun wuríbani, adügatiña sun luwúyeri iwíyei láu ugúndani. ²⁰ Ánjeinti jugúya, máma líña jafúnrendeirun lúmagiñe Crístu, ²¹ ladúga inárüni lan luágu agáamba jumá luágu Crístu, arúfudajoúati inárüni lé meja larúfudajabei, jun. ²² Ánjeinti luágu binádu ligáburí jabágaridun, arúfudajoúati jun lun jígiruni binádu meja jigáburí le mabuídunjalibei láu jagúnfúlrin lúma luríban ayúmajani le gayéeraguadibei, ²³ arúfudajoúati jun lun iséri jumá lidan jáni espíritu lúma lidan jisáminan, ²⁴ lun iséri lan jigáburí, buíduñu, jarúmañu le gumúti queisi ligáburí Búngiu.

²⁵ Ligía jebé lubei jayéejan, adímureja jumei inárüni jáma jíbiri lugúndun lánigu ában méme úgubu sun jugúya, le lúgubu Crístu.

²⁶ Moún lumuti jagáñidun le lánina afígoujani, moún lumuti giñe jálüdüñ sarágu dan aritagua luágu cátei le agáñidagüdübalün— ²⁷ míchiga jumá lúgaaru lun Máfia ítara.

²⁸ Le jíwerubei, jebé líwerujan, luwádigimarida láu ában arúmani lun lagüriaragun lúngua, lun giñe gayára lan líderaguniña ja gudémebaña.

²⁹ Madímureja jumá liwíye dimúrei, jarúmalá jadímurejan lun gayára lan jíderaguniña ja agáambubalün, ibíja jagíame abíniruni lídaangiñe jerérun.

³⁰ Majírudaguagüda jumei Sífiri Sándu, lugúndun nájain Sífiri Sándu jídan lun jasúbudirúniwa queisi lánigu Búngiu daríme lachülürün wéyu lun jasálbarun le gumúti.

³¹ Ígira jumei sun magúndani, sun iyéreejabuni, sun agúaraguní lánina igáñi, sun anábajani, lúma sun wuríbani. ³² Buídu jumá, gudémejabu jugúyame júmagua, ferúdnagua jumá júmagua ítara quei ferúdnua lánün Búngiu lidan Crístu.

5

Ída lúba lan ligáburí jabágaridun lirájüñü Búngiu

¹ Quei lirájũñũ jubei Búngiu ja jĩnsiñetiña lun, jóucha jumá lun ítara lan jigáburu quei ligáburu. ² Jĩnsiñegua jumá júniwagua ítara quei wĩnsiñedun lun Crĩstu, ába lederegeragun lúngua wawágu queĩsi ában mudún le adágarawagüdũti lun Búngiu. Ítara líña lĩnsiñejabu Crĩstu woun queĩsi cupáli le buĩti líjeme, le águdajoũbei lun Búngiu, resĩbi lumúti láu ugúndanu.

³ Quei lánigu jumá Búngiu, moún lumuti ni lun jadímurejan luágu salúfuri, ni ámu luwúyeri iwíyeyi, ni luweĩnamu águu. ⁴ Mawíyelá jiyúma, marĩñagun jugúyame libĩdiouniga áu, ni dimúrei málati, ladũga mabuĩdunti buri cátei le. Lubáragiñe jadímurejan cátei líbeina líra, yúsu jumei jiyúma lun jíchugun eteĩngiruni lun Búngiu. ⁵ Subúdi jumúti luágu le lan agámariduti mamárieidunga, o ladügün lán buri cátei wiyeti, o labágaridun lídan luweĩnamu águu—le queisigubeirügũbei lanügũni irĩsini lisáندانme—siñáti gafánran lan lídan jarúeijan Crĩstu luma Búngiu. ⁶ Mayéedagualaún ni ában láu lagúbũri buri dimúrei, lugúndun ladũga buri cátei wurĩbati le, láburuja lanárimel ligáñi Búngiu jawágun ja magáambadibaña lun. ⁷ Dírei jumá jawei jibe gürígia jára.

⁸ Lídaañadũn meja lubúriga, ánjein guetó, quei lídaañadũn lan ában luma Wabúreme, lídaañadũn larúgounga. Ítara líña lubeĩti agáburida jumá queĩsi gürígia ja eĩbugubaña lídan larúgounga. ⁹ Gürígia jagía, areidatiña, surúti jabágari, jĩnsiñeti inárũni joun. ¹⁰ Jóucha jumá jafúnrendeiruni ca lan jĩnsiñebei lun Wabúreme. ¹¹ Mádanlaún buri cátei málati le jadügũbei ja lánigubaña lubúriga, sagárügũ jumei lídoun larúgounga láu lubuĩdun jigáburu. ¹² Rúti busíganu íbini lun ladímurejoũniwa luágu buri cátei le jadügũbei arámudaguarügũ, ¹³ dan le larúfuduni larúgounga luágu wuriba lan jagáburu, ába jasúbudiruni luágu inárũni lan, gayáraati jayábin ja lídaañabaña lubúriga lun lídoun larúgounga. ¹⁴ Ligía laráñawagúnbei. Agáguduabá, bugúya le arúmugubei, sarába jádaangiñe jiláaña, ábame larúgoungadágüdünu Crĩstu báu.

¹⁵ Tóunigi jumá lubeĩti buĩdu ída líña lan jóuserun. Mabágarida jumá quei ibídiougu táu, jabágarida quei chu táu. ¹⁶ Yúsu jumei jidáani lídan cátei buĩti, lugúndun nĩjein sarágu wurĩbani lídoun buri dan le. ¹⁷ Ligía mabídiouniga lubei jáu, jóucha jumá gunfaráanda jumáni ca lan lugúndaanbei Wabúreme. ¹⁸ Mabácharuada jumá, lugúndun barũ lumútiña líra gürígia lídoun féridi, lubáragiñe líra, buĩnjuma láu Sífiri Sándu. ¹⁹ Adímureja jumá júmagua luágu luweĩrigun Búngiu, erémuja jumá luágu, jerémuja táu sun janígi lun Wabúreme. ²⁰ Rújuma eteĩngiruni lun Búngiu Úguchili súnwandan luágu sun cátei lídan líri Wabúreme Jesucrĩstu.

Igáburu le lúnbei wagáburiduni jáma ja wábiñebaña

²¹ Derégegua jumá júniwagua, ítara lúba jarúfuduni linében Crĩstu jun.

²² Lúnti derégeguñũ tan wũri túngua lun túmari quei lun Wabúreme Jesucrĩstu, ²³ lugúndun wügũri tichügüdinabei lúmari ítara quei Crĩstu lan tichügüdinabei lilígilisin. Crĩstu giñe Jasálbaragũlebei gürígia ja gĩribaña lilígilisin, ja méme giñe gĩribaña lúgubu Crĩstu. ²⁴ Ítara quei jagáambadi afĩñetiña lun Crĩstu, ítara líña giñe lúnti lan gagáambadi jamá wũriña joun jámarigu lídan sun cátei.

²⁵ Jĩnsiñetá lúmari wügũri lun quei luweĩrin wĩnsiñe lun Crĩstu, wagía le lilígilisin, ába líchuguni libágari wawágu. ²⁶ Ladügünbalin líra lun

larúmadagüdüniwa lídaangiñe le binádubei láu wabásterun lúma giñe láu lerérun, ²⁷ lun larúfuduniwa ligibugiñe queisi ában würi to ayárafaduboun lun túmari—buidumeraütu, jarúmañu, aráanseñu, ni cáta mégeiti tuágu, ában würi derégüdaguatu, úraguatu. ²⁸ Ítara líña lúnti lan tínsiñedun lúmari wügüri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladüga ábanjali lan láu jágubu. ²⁹ Úati gürígia mebéresenti láu lúgubu guánarügü, jóugüdarügü lumúti, toúnigileí. Ítara líña giñe ladüga Crístu tun lilígilisin, ³⁰ ladüga lúgubu tan, áni wagía líbiri úgubu ligía, ábanjadiwa lúma. ³¹ Laríñajare tidan Lerérun Búngiu. “Ligía lígirubei lubeí wügüri lúguchi túma lúguchu lun lamárieidun túma lúmari, ábame jayábin jagía biángubei lun camá jamá ábanrügü.” ³² Níjein ában oúnwenbun inárüni arámudaguati lídan dimúrei ligía. Aríñagatina luágu luáguti lan lúradagun Crístu jáma lánigu ja giribaña lilígilisin. ³³ Laríñaguña giñe dimúrei ligía luágu cáda lan ában jídaangiñe lúnti lan jínsiñe tan lúmari lun quei línsiñegua lúngua, lun giñe inébe lan túmari würi tun.

6

¹ Isáanigu, le lúnbei jadügüni queisi afíñetiña lun gagáambadi jumá joun jagübürigu, lugúndun ligía richábei. ² Niján ában gumádi weíríti lídaangiñe ligúmadin Búngiu le anügübei buíti woun láu wagúnfulirimi. “Inébelá búguchi túma búguchu bun lun buídu lan dan bun, ³ gabágarí amürüme migífe ya ubouágu.”

⁴ Jugúya agübürigu, magáñidagüda jumáña jisáanigu, agüriajarügü jumáña buídu lun gagáambadi jamá, arúfudajeina joun lun jafíñerun luágu Wabúreme.

⁵ Músu, gagáambadi jumá joun jiyúbudirigu ya ubouágu láu inébesi, láu anúfudei, lueí ñi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida. ⁶ Seríwi jumáña buídu, mámarügü dan le aríagu jáña lan jun lun jeréderun buídu jáma, seríwi jumáña buídu súnwandan quei esériwidutiña lun Crístu, adúgeina lugúndan Búngiu táu sun janígi. ⁷ Adüga jumeí juwádigimari láu ugúndani, camá jamuga lun Wabúreme jadügei máma joun gürígia, ⁸ ladüga subúdi jumáali luágu cáda lan ában jídaangiñe, dándu idámuni quei máma idámuni, lafáyeirubei Wabúreme según buíti le ladügübei.

⁹ Jugúya iyúbudirigu, buídulá giñe jóuseruniña jumúsuniña, masíadira jumáña. Jarítagua jumá luágu dándu lan jugúya quei jagía, lábugiñeñadün lagúmadijan Wabúreme le siélubei, áni ában lan láu lanügüniña Búngiu sun gürígia.

Cátei lé buri áubei wageíndagua lúma Máfia

¹⁰ Guetóti nidújeñu, jere jumá lídaañu ában lúma Wabúreme, láu lére le gabáfubei. ¹¹ Daújumoun sun daüguau to líchuguboun Búngiu joun sun lánigu lun derégüdagu jumá lueí leyéedagunün Máfia. ¹² Lugúndun máma jáma gürígia ja láutiña ügürügü lúma ábuu wageíndagua, jáma buri espíritugu gabáfutiña ja lánina wuribani yágüta íñu lúma jáma espíritugu ja gáambaña gumádi, lúrudu lúma érei luágu buri cátei lánina lubúriga lídan ubou le wageíndagua. ¹³ Ligía ragújumoun lubei sun daüguau to líchuguboun Búngiu jun lun gayára lan jawánduni wuribani lídan wéyu le jabúseerubei espíritugu jagía jageíndagun júma, áni lárigiñeme jawánduni, ábame jeréderun derégüdagu. ¹⁴ Derégüdagu jumá lubeíti, daügu táu láni Búngiu daüguau queisi ában lisúdaaran. Daügua jumá láu inárüni queisi láu ában béliiti le gürágu umúti buídu luágu jiránaagua,

areidúañu láu ísuruni quei láu cátei le adáuragubei láu laníguagu súdaara. ¹⁵ Aráanseñu jumá lun japúrichijani ugánu luágu Wasálbaragüle, le íchuguti darángilaü, queísi laráanserun súdaara dan le ladáurunun lisábadun. ¹⁶ Louígiñe sun cátei, barújumei jafíñen quei lárügüdüni súdaara cátei láuti gürábu ligíbugiñe, lun jaráramunun sun gimára durúnguatu to lachüüjaboun Máfia juágun. ¹⁷ Barújumei jeménigidun luágu jasálbarun quei ladáüruni súdaara lubúnidin lun latoúnigiruni lábulugu, barü jumeíme Lerérun Búngiu quei efein to líchuguboun Sífiri Sándu jun. ¹⁸ Adüga jumeí sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúañu jumá, máburujalá jarüna, ayúmuragua jumá jawágu sun ja lánigubaña Búngiu. ¹⁹ Ayúmuragua jumá giñe nuágu lun líchugun Búngiu dimúrei nun dan le nadímurejan, lun giñe nadímurejan láu manúfudei lun nasúbudiragüdüni ugánu luagu gayára lan giñe jasálbarun ja mámabaña juríu queísi ja juríubaña. ²⁰ Oúnaja láadina Búngiu lun napúrichijani ugánu le, le ueígiñebei nadaürüwa guetó. Ayúmuragua jumá lun napúrichijani ugánu le láu manúfudei, queísi lubúdubu.

Lagúmujoún buri mábugäü

²¹ Tíquico, wadúje jínsiñeti woun, le íderagubaliwa buídu lídan luwádigimari Wabúreme, ligiaba íchiga ugánu jun nuágu lúma luágu le nadügübei. ²² Ligía nouñajaanbalin jun lun laríñaguni jun ída wáña lan, lun líchugun gurásu jun.

²³ Rúlá Búngiu Úguchili lúma Wabúreme Jesucrístu darángilaü lúma ínsiñeni láu afiñeni jun, wadújeñu lueígiñe Jesucrístu, ²⁴ biní láñame Búngiu sun ja jínsiñejabúbaña lun Wabúreme Jesucrístu láu ában ínsiñeni le masáansiraguati. Ítaralá.

LIGÁRADAN PÁBLO JOUN FILÍPOSNA

Labürüjan Páblo furísunrugugiñe joun tilana liglisi to Filíposboun

¹ Anája áu Páblo lúma Timotéo, esériwidutiña wagía lun Jesucrístu, wabürüjañoun gárada to jun, sun jugúya fádirigu jáma esériwidutiña liglísirugú ja ubúrugaña Filípos, jáma jíbiri lánigu Búngiu ja lídaañabaña giñe ában lúma Cristu Jesúsu. ² Binílaun Wáguchi Búngiu lúma Wabúreme Jesucrístu, ibíja jumá giñe darángilaü jámagiñe.

Layúmuragun Páblo jawágu afiñetiña

³ Ságü narítagan juágu neteingiruni Nubúngiute. ⁴ Súnwandan nayúmuragun lun Búngiu juágu láu ugúndani, ⁵ Láu narítagan luágu luweírin jíderagunina abúruchaguagüdei ugánu le lánina asálbaruni lúmagiñe wéyu le jagáambubalin chülü lúmoun wéyu le ugúñebei. ⁶ Chóuru numúti luágu Búngiu lan le agúmeserubei adúgei lubuidun luwádigimari jídan, lasígira mémeba lan adúgei daríme wéyu le liábingüle Jesucrístu. ⁷ Richáti lun narítagan juágu ítara lugúndun weíruti jinsiñe nun, lugúndun giñe gafánran jumá lídan abíniruni le nánibeí dan le furísunrugúñadina lan luágu nesériwidun lun Cristu, o dan lan le naráramun ligíbugiñe lúruđu lun nadímurejan lueígiñe loúbadina ugánu le lánina asálbaruni lun nachóururuni joun luágu inárüni lan. ⁸ Subúdi lumúti Búngiu luágu weíri lan nálugun juágu lugúndun jinsiñetün nun queísigubeirügü jinsiñe jumá lun Jesucrístu.

⁹ Amúriajatina lídan nayúmuragun lun Búngiu juágu lúntima laweíridun jinsiñejabu láu sarágu subúdi lúma gunfaráandaü lídan sun cátei, ¹⁰ lun gayára lan janúadajani cátei le buídubei súnwandan. Ítara lúba jabágaridun ában íbágarí jarúmati, madúnrun jumámuga dánme liábin Cristu. ¹¹ Amúriajatina lúma Búngiu lun buin jumá láu lubuidun igáburí, láu lubáfu Jesucrístu le jídaanbei, lun líchugúniwa uweíriguni lun Búngiu luágu.

Cristu íbágaribeí nun

¹² Nidújeñu, buséntina jasúbudiruni luágu cátei lán buri le susérelibeí nun, ñübinjali lídan linárün lun líderagun lídan lapúrichijoún ugánu le lánina asálbaruni. ¹³ Subúdi jamúti lubeíti sun tísúdaraana lúban urúei jáma sun ja jíbiri luágu nadaürüña lan lueígiñe nesériwidun lun Cristu. ¹⁴ Játi jíbiri idújeñu, láu jarijin luágu nadaürüña lan lueígiñe napúrichijani ugánu luágu Cristu, ragújaña anígi lun japúrichijani méme ugánu ligía manúfudeiga, láutima afiñeni luágu Cristu.

¹⁵ Inárüni luágu añajein lan adímurejatiña luágu Cristu ladüga jagímugan, busén jagía janügüniña gürígia jánigume. Ánjaña jíbiri, japúrichijan luágu Cristu láu lubuidun arítaguni. ¹⁶ Gürígia jagía, luágu ínsiñejabuni japúrichija, lugúndun subúdi jamáni luágu lueígiñe lan nadímurejani ugánu le lánina asálbaruni nadaürüña lan. ¹⁷ Ánjaña ja jíbiri, máma láu janárün japúrichija, lun jarijiniwa weírigu jadúgei, lúma lun jíchugun líbe samínaü nun guetó le nadaürüña lan. ¹⁸ Wel, úati cátei luágu líra, lídan sun luwúyeri, láu yebe janárün o máma lan láu, luágu Cristu jadímureja, áni gundaatina luágu líra.

Áni nagúndaarúba giñe, ¹⁹ lugúndun subúdi numúti luágu buídubei lan nasálirun lídan sun cátei le, ladüga jayúmuragun lun Búngiu nuágu lúma

ladüga líderagunina láni Jesucristu Espíritu. ²⁰ Cátei le nabúseerúbei lúma le nagúrabubei, lun madügün nan ni cáta lun jamúga nanügün busíganu luágu, gayáaraarügü lámuga nadímurejan manúfudeiga, arijúa mémetima lámuga luweírigan Cristu nuágu guetó quei súnwandan, wínwañu áu yebe, jiláñu áu yebe. ²¹ Lugúndun ánjana abágarida méme, lúnba Cristu nabágarida, ánjana ouwe, buítimaabei nun lugúndun lúmounbadina Cristu. ²² Ánjein gayára lubei nasígirun ñadágimein luágu láni nabúreme Cristu fuleísei láu nasígirun abágarida, ibídiñeti nun ca lan buítimaabei, ánjein lun lubei nasígirun wínwañu ódi lun nouñwen. ²³ Jénreenguti nun lun nanúadajan lídan bián cátei le. lídan ában oubaü, buséntina jamúga nouñwen lun nídin erédera lúma Cristu, lugúndun buítimaati jamúga líra nun, ²⁴ lídan le ában oubaü, buítimaati jun lun nasígirun abágarida. ²⁵ Áni quei choúru náni cátei le, subúdi numúti luágu nerédera mémeba lan júma lun níderagunün lun jasígirun jubáruaguóun, lun giñe jagúndaaruntima lídan jafiñen. ²⁶ Ítara lúba jiñúrágüdüni líri Cristu Jesúsú luágu lagíribudagüdüna júmoun.

²⁷ Joúcha jumá lun úaragua lan ligáburu jabágaridun lúma larúfudajan Cristu. Ítara lúba, ánjana ñüdün aríjaün o ánjein díseñu níña lubei juei lun agáambarügü nan juágu, gayára lámuga nasúbudiruni luágu derégüdagu meme jíña lan áni lídaañadün lan giñe ában, áfaagua súngubei lídan ában lun labúruchagun affíñeni luágu Jesucristu queísi Wasálbaragüle, ²⁸ mígiraguagüdünga júngua lun janúfudedagun jawei jáganiñu. Ladüga jáganiñu lan güriía jagía, arúfuda lumúti líra furáangu luágu joudiña lan lídoun güriinguaü, arúfuda lumúti giñe jasálbarun jugúya le affíñebei, áni lúmagiñe Búngiu líabin cátei le. ²⁹ Ladüga Cristu, gayáraati mámarügü lun jafiñerun luágu, gayáraati giñe jasúfurirun lueigiñe. ³⁰ Jugúya núma, lídaañadiwa ában méme áfaaguni. Aríja jumáli meja ida líña lan náfaagun, guetó agáambatün luágu ida líña méme lan náfaagun.

2

Lünabugun Cristu lúma luweírigan

¹ ¿Sandítünsan dügüdaguau ladüga lídaañadün lan ában lúma Cristu? ¿Barútünsan gurásu luágu línsiñejabu jun? ¿Eíbugatünsan sun jugúya lúma Sífiri Sándu? ¿Subúdi jumútisan lugúdemejabu Cristu jun lúma laleidun? Affíñetina luágu ítara líña lan. ² Ligía lébubei namúriajan júma lun jaganouñ lídan úarani lúma ínsiñejabuni júmawagua, lun ában lan jaritagun, ában lan giñe jáfaagun luágu buri cátei le láni Cristu. Láu jabágaridun ítara, buin lúba nugúndan jáu. ³ Madüga jumá ni cáta juoúguarügü lun janügüniwa weíri, ni luágu pantaü, adüga jumei cátei láu ünabuguni. Buidulá janügüniña ámu güriía juei guánarügü. ⁴ Mámarügülá cátei le buídubei jun jáluaja, áluaja jumei giñe le buídubei joun ámu.

⁵ Ítaramemelá ligáburu jasáminarun quei meja ligáburu lasáminarun Cristu Jesúsú. ⁶ Láu sún meja Búngiu Irájü lan ligía, málugunti larügüdüni lírícha quei Búngiu. ⁷ Lubáragiñe líra, ába lígiruni le lánibeí, ába ladügün quei músu láu lagúriajóun quei wügüri. ⁸ Dánti le ítarajali quei wügüri, ába lünabudaguagüdüntima lúngua, áni ladüga lagáambadi, ába louñwen luágu gurúwa láu sun nibúsigaríduna lan ouweni luágu gurúwa. ⁹ Ligía líchugunbalin Búngiu líñun-ágei uweírigan lun lúma íri le weirigutimaabei lídaangiñe súngubei, ¹⁰ lun dan lan jagáambuni sun ja siélubaña, ja múarugunbaña, jáma ja lábugiñebaña múa líri Jesúsú, lun jájuduragun lun, ¹¹ lun giñe jasúbudiruni

súngubei, aríñaga jagíame luágu Jesucrístu lan Wabúremebei, lun líñurún líri Búngiu Úguchili.

Ítara jáña lánigu Crístu quei larúgounga ubouágu

¹² Ítara líña lubeíti nidújeñu jínsiñetiña nun, ítara quei agáamba jumánina súnwandan dan lé meja júmañadina lan, agáambatima jumána guetó dan le díse nan. Eibuga meme jumá jubáruaguouún lídan lémeri Crístu láu únabuguni lúma inébesei lun Búngiu daríme jebélurun siélun. ¹³ Búngiu íchugubalin lubuídun ayúmajani jun lun jeíbugun lúma, íderagualaún lun jadúgüni quei labúseeruni.

¹⁴ Adúga jumeí sun cátei láu ugúndani, masígenejaanga, ¹⁵ madárirúniwa lámuga dúru juágu, ni mégeiti, lirájüñü jumámuga Búngiu jarúmatiña jagánagua gürígia wuríbatiña, magáambaditiña lun Búngiu. Jugúya, jarúgoungadagúdatún jagánagua gürígia jagía quei warúguma lídan ában fulásu búrigati, ¹⁶ íchigeina ugánu luáguti íbágari magúmuchaditi joun. Láu jigáburidun ítara, gúndaabadina juágu dánme le lachúlürün wéyu le liábingüle Jesucrístu, láu nasúbudiruni luágu máma lan luágu ni cáta nuwádigimarida jagánagua. ¹⁷ Íbini lun lan níchuguni nibágari guánarügü lun loustarun jafiñen, le queísibeí ában edéweejani buíti lun Búngiu, gúndaabadina úara júma luágu lubuídun wedéweejan lun Búngiu. ¹⁸ Lun jamúga lasúseredun ítara lun nouñwen luágu nesériwidun lun Crístu, lúnti gíñe jagúndaarun úara núma.

Timotéo lúma Epafrodíto

¹⁹ Ánjein busén lubei Wabúreme Jesucrístu, nouñajabei Timotéo aríjaún madíse, lun gayáraabei lan nagúndaarun dánme le lagíríbudun láu ugánu nun juágu. ²⁰ Úati ámu núma le asáminaruti quei áu, le áfaaguti lun buídu lan lídin jun, ²¹ súngubei jawougua rügüñein jarítaqua, mebéréseguntiña láu le labúseerubei Crístu Jesúsu. ²² Ánjeinti Timotéo, subúditi ligáburi jun, ída líña lan lesériwidun núma lídan lapúrichijoún ugánu le lánina asálbaruni queísí ában isáani le íderaguti lúguchi. ²³ Agúrabatina lubeíti nouñajani aríjaún lárígíñeme nasúbudiruni ánjein náfuriduba lubei furísunrugugiñe, ²⁴ láu sun afíñe nan luágu niján lan lugúndaanbei Búngiu, lun nídin aríjaún núngua madíse.

²⁵ Genége lumúti gíñe nun luágu lúnti lan nouñajani nibíri Epafrodíto lárigoún júmoun. Quei jasúbudirun, ligía nouíbabei lídan luwádigimari Crístu lúma lídan áfaaguni, le jounajabei jugúya guánarügü nun lun leténirun lun le nemegeirubei. ²⁶ Weíríti labúseerun laríjinün áni gíbeti laritagun ladúga jagáambun luágu lasándirun. ²⁷ Inárüni luágu sándi lán meja, yaráfa lun louñwen, ába gudémejabu lan Búngiu lun lúma nun lun mabíjin nan íruni lánwoun le núagubei, ába lareídaguagüdüni. ²⁸ Ligiatima nabúseerúnbei nouñajani lun jagúndaarun láu jaríjini. ²⁹ Resibi jumeí láu sun ugúndani queísí idújei lueígiñe Wabúreme Jesucrístu, áni jínsiñe jagíame sun ja ítaraña quei ligía jun súnwandan, ³⁰ quei chülü lubei yaráfa lun louñwen ladúga lesériwidun lun Crístu. Derégeguati lúngua, mebérésegunga cába lan asúsereda lun, lun lesériwidun nun, cátei le jásíñerubei adúga lugúndun díseñu jíña lan nueí.

3

Ūma le inárüti lun weréderun richágu ligíbugiñe Búngiu

¹ Lagúmujouún cátei, nidújeñu, gúnda jumá lídan Wabúreme. Mabúchati nuágu abürüjei le abürüja náalibeí jun, lugúndun buíti jun. ² Cátei ligía, lun

toúnigigua jumá júngua jawei ja ítarabaña ouserun quei ouñli, ja adügübalin le wuribabei, ja íbagubalin úgubu. ³ Ariñagatiña yéetiña jagía luágu lúnti lan jerésibiruni wügüríña circuncisión lun lánigu jamá Búngiu, iyéeni líra. Lirájüñü Búngiu le tímatimaati wagía le agúnfulirubei lúma láu lubáfu láni Espíritu le wádaanbei, wagía le gúndaabei láu lánigu wamá Cristu Jesúsu áni míchu wamúti weménigi luágu cátei boúgudinti luei lun wasálbarun. ⁴ Lun jamúga gayára lan wasálbarun luágu cátañañadiwa lan boúgudin luei Jesucrístu, garíchatina jamúga lun neménigidun luágu buri cátei ligía, úati jamúga ni ában garíchati nuei lun leménigidun luágu buri cátei ligía. ⁵ Wídü wéyu lueígiñe nagüriajouñ, ligía nerésibiruni circuncisión lugúndun jarásan israelitagu áu, jádaangiñetina lufámilian Benjamín, hebréo áu lúmagiñe nagüriajouñ, hebréogu giñe nagübürigu. Fariséo meja áu lídan ligáburi gunfaráanda náni jalúrudun juríu, ⁶ janárimeti meja neméendün darí neíbaajaniña affiñetiña luágu Jesucrístu. Luáguti lísurun íbágarí según jalúrudun juríu, úati meja ni ában lun gayára lan laríñagun ni cáta nuágu. ⁷ Ánjeinti guetó, sún buri meja cátei le, lé meja weíritíbei cátei nun, barü numuti quei ni cáta lun gayáraabei lan nasígiruni Cristu. ⁸ Sügü láu líra, sun cátei le gayáraabei jamúga níjein lan núma, rúnumuti quei ni cáta ligíbugiñe ouñwenbun agáñeiruni le luágubei nasúbudiruni Wabúreme Cristu Jesúsu. Féridi náali sún buri cátei le ladúga nasúbudiruni Cristu, áni barü numuti sun le quei ífei lun nagáñeiruni Cristu, ⁹ lun nadáriragun núngua lídan ában lúma. Guetó, gumúja náfaagun lun neréderun richágu ligíbugiñe Búngiu luágu lubuídun nagúnfulirun lúma lilúrudun, lugúndun barúlaadina Búngiu richágu ligíbugiñe láu nafiñerun luágu Jesúsu. Richáguáü ligía ában cátei le lídaangiñeti affiñeni, máma adügüni. ¹⁰ Le nabúseerúbei, lun nasúbudiruni Cristu buídu buídu, lun nasándiruni lubáfu meme Búngiu le ásaaragüdübalin Jesúsu lídaangiñe ouweni nuouúga, lúma lun nasúfurirun luágu queísi lasúfurirun nuágu, ¹¹ lun ítara nan quei ligía lídan louñwen láu eménigini luágu násaaruba lan lídaangiñe ouweni quei ligía.

Áfaaguni lun lachülürün lídoun lébeja

¹² Máma nariñaguña luágu chülüjadina lan lúmoun lébeja lídan sun cátei le, maríñaguntina giñe luágu buídujali lan nigáburi lídan sun cátei, le nadügübei, nubáruaguouñnadina méme lun ítarabadina lan queísi meja labúseerun Cristu lun ítarabadina lan dán meja le lasálbarúnbalina. ¹³ Nidújeñu, maríñaguntina luágu íbija náali lan sun cátei le, le nadügübei, nabúleiduni sun le eréderubei árigi lun náfaagun lun nárügüdüni le nigíbugiñebei, ¹⁴ lun nachülürün lúmoun lébeja eíbaaguni ligíbuagu uboué le, lun nagáñiruni le lúnbei líchuguni Búngiu siélu joun sun ja lídaanbaña ában lúma Cristu Jesúsu.

¹⁵ Sun wagía le weínamujalíbei lídan wafiñen, lúnti wasáminarun ítara. Ánjañun asáminara lídan ámu luwúyeri lídan som cátei, larúfudubei giñe Búngiu cátei le jun. ¹⁶ Luágu sun luwúyeri, lúnti wasáminarun lúma lun wabágaridun úaragua lúma cátei le furéndeí wamáalíbei.

¹⁷ Nidújeñu, amúriajatina júma lun ában lan jarítangun lun jafálaruni náni jémpulu, aríja jumáña giñe ja abágaridubaña según jémpulu le wíchugubei jun. ¹⁸ Ariñaga náali jun sarágu weíyaasu áni nariñagayaali jun láu águiraü, luágu añájein lan sarágu ja aríñagatiña luágu affiñe jamá luágu Cristu, abágaridutiña queísi láganiñu Cristu le ouwebei lun larúmadagüdüniwa. ¹⁹ Lídaanme lagúmujouñ dan, gürínguabei cátei joun—jasúfuriruba luágu jafígoun lun sun dan. Lé buri cátei le wámaabei joun, ligía jabúngiutebei, apántajatiña láu

buri cátei le jamúga lúnbei nibúsigari jamá láu. Luágu rügüñein buri cátei ubouáguna jarítagua. ²⁰ Ánjein wagía, siéluna wagía, áni wagúrabuña liábin Wabúreme Jesucrístu le Wasálbaragüle siélugiñe. ²¹ Lídaanme wéyu ligía, lasáansirubei wágubu le emégeirubei sarágu lun ítara lan quei lúgubu, le úabei lemégeirun. Áni ladügübei láu méme ubáfu le luágubei lun líchuguni sun cátei lábugiñe lagúmadijan.

4

Gúnda jumá súnwandan lídan Wabúreme

¹ Ligíati nidújeñu jínsiñetiña nun, ítara méme jumá derégüdagu lúma Wabúreme.

Oúnwenbun nabúseerun naríjinün, jugúya nugúndanbei lúma nafáyeirujaja luágu nesériwidun lun Crístu.

² Ayúmuraguatina tun Evódia túma Síntique lun jebélurun lídoun úarani queisi idújeñu lueigiñe Crístu. ³ Ánjein bun, nouba buíti lídan wadágimanu, amúriajatina búma lun bíderaguniña ítunu ja lun gamádagua jamá, lugúndun áfaaguatiña noubagiñe lídan lapúrichijoún ugánu le lánina asálbaruni, úara lúma Cleménte jáma buri jíbiri ja ñadágimeinbaña meja núma. Bürúwaali jíri sun jagía tídan lílburuna íbágarí magúmchaditi.

⁴ Gúnda jumá súnwandan ladüga lídaañadün ában lúma Wabúreme. Aríñagaya numúti. ¡Gúnda jumá! ⁵ Subúdiwa jumá quei gürígia areídatiña ladüga madíseeli liábin Crístu.

⁶ Magíbedalá jarítapun luágu ni cáta, aríñagarügü jumei sun cátei lun Búngiu súnwandan dan le jayúmurapun lun, amúriaja jumá lúma, mabúlieidagunga lun jíchugun eteingiruni lun. ⁷ Ábameti líchuguni Búngiu lídarángilan jun, darángilau le, weíritimaabei lubáfu lun lagídarun jídíjeri sügü láu jubáfu lun jarítapuni cátei le lúnbei jadügüni, áni darángilau ligía, loúnigiruboun janígi lúma sun jisáminan luei idíjeri lídan le jeménigidun luágu Búngiu lídaangiñe Crístu Jesúsú.

Samína jumá luágu le buídubei

⁸ Lagúmujoún cátei nidújeñu, samína jumá luágu sun le inárütibeí, sun le gadúnabei inébesei, sun le richábei, sun le jarúmabei, sun le gúndaawabei láu, sun le uágubei buídu lan ladímurejóua. Samína jumá luágu sun le buídubei lúma sun le gadúnabei uweírugini.

⁹ Falájumei sun le arúfuda náalibeí jun lúma sun le resíbi jumáalibeí númagiñe. Gúnfuli jumá láu le naríñagubei jun, áyeija jumei nigáburi. Ábame júma lan Búngiu láu lídarángilan le líchugubei.

Jedéweejan Filíposna seínsu lun Páblo

¹⁰ Oúnwenbun nugúndan lídan Wabúreme luágu jarítaguayaadün lan nuágu. Maríñaguntina luágu bulíei jumáadina lán yebe, madárirügü jíñáalin ligáburi ída lúba lan líderagunina. ¹¹ Mabúseerúntina jamúga jarítapun luágu nadímurejañein lan lueigiñe nemégeirun, lugúndun furéndeíjadina lun gúndaañu nan láu le númati, ¹² subúdi numúti labágaridúniwa lídan gudémeín, subúdiñeí gíñe gámawa lan gíbe. Furéndeíjadina lawandúniwa furúmieguarügü igáburi, ilámaú yebe o quimúle, nújein lan darí lun lígiragún o úa lan ni cáta. ¹³ Úati cátei jénrenguti nun ladüga lídaañadina ában lúma Crístu le íchugubei ubáfu nun. ¹⁴ Láu sun líra, buíti jadüga láu jíderagunina lídan lénreengúnga nun.

¹⁵ Queísi gíñe jasúbudiruni, jugúya Filíposna, lárigiñe meja napúrichijani ugánu le lánina asálbaruni jun, ába náfuridun Macedóniagiñe, jugúya rügüñadün tílana ligílisi oúnaja seínsu nun quei ateíngiragülei luágu nesériwidun jun.

¹⁶ Sun meja anájagua lan ubúrgu Tesalónica, oúnajatün edéweejani nun, mámarügü ában weíyaasu, lun le nemégeirubei. ¹⁷ Mára jamúga nasáminarun lun gubeírügü nibíjin som cátei, le nabúseerúbei, lúntima lagánwoundun le lúnbei jibíjini lúmagiñe Búngiu. ¹⁸ Au, resibi náali súngubei lúma sügü láu lé yebe lúnbei nerésibiruni, láu le jóúnajabei nun lúma Epafrodító ígiraguaali núma. Le jóúnajabei nun, ítara líña quei líjeme cupáli le águdajóuti lun Búngiu, ában edéweejani le lerésibirubei láu ugúndani. ¹⁹ Líchugubei lubeíti Nubúngiute sun le jemégeirubei jun queísi buri luweirigun lírisin, lídaangiñe Crístu Jesús. ²⁰ ¡Uweírighuni lun Wáguchi Búngiu lun sun dan!

Lagúmujoún buri mábugä

²¹ Rújumei numábugä lídan líri Jesucrístu joun sun ja lánigubaña Búngiu. Mábuga jáña wadújeñu lueígiñe Jesucrístu ja yábaña núma jun. ²² Sun ja yábaña Róma ja lánigu Búngiu, játima tílana lúban urúei, mábuga jáña gíñe jun.

²³ Binílaün Wabúreme Jesucrístu sun jugúya. Ítaralá.

LIGÁRADAN PÁBLO JOUN COLÓASNA

Labürüjan Páblo joun tílana ligísi to Colóasboun

¹ Anája áu Páblo, le ában lání Jesucrístu apóstolu láu lugúndan Búngiu. ² Úara lúma Timotéo le wadúje lueígiñe Jesucrístu nabürüjañoun gárada to jun, jugúya le lánigu Búngiu ja gúnfulibaña lúma Crístu le uágubei jafiñera, ja ubúrugubaña Colósas. Binílaün Wáguchi Búngiu, ibíja jumá giñe darángilaü lúmagiñe.

Layúmuragun Páblo jawágu afñetiña lun Búngiu

³ Súnwandan weteíngiruni Búngiu, le Lúguchi Wabúreme Jesucrístu, dan le wayúmuragun lun juágu. ⁴ Agáambaadiwa luágu jafiñen luágu Crístu Jesúsú lúma luágu jinsiñejabu joun sun ja lánigubaña Búngiu, ⁵ ladúga eménigini le juágubei luágu le areidúañubei jubá siélu. Chülütün árügüdei eménigini le lárigiñe jagáambuni ugánu le inárütibe, ugánu le luáguti asálbaruni. ⁶ Ugánu méme le, lé meja apúrichijóubei jun, labúruchaguña lídan sun ubouú, lasáansiraguña jagáburi gürígia ítara quei lasúseredun jídan lúmagiñe jagáambuni ladímurejóun luágu línsiñejabu Búngiu, ába jasúbudiruni luágu inárüti lan ínsiñejabuni le. ⁷ Ligía cátei le larúfudajabei Epáfras jun, le ñadágimeinjalibe wáma. Jínsiñeti woun, subúdi wamúti luágu gayára lán meja weménigidun luágu lun lesériwiduni Crístu buídu jagánagua wawéñegua. ⁸ Barüjali ugánu woun juágu lúma luágu jínsiñejabu le rúlaalíbe Búngiu jun.

⁹ Ligía lúmagiñe lubei wéyu le wasúbudirunbalin cátei le, merédeti wayúmuragun lun Búngiu juágu, lúma wamúriajan lúma lun lasúbudiragüdüni lugúndan jun buídu, ru ligíame sun luwúyeri subúdi lúma gunfaráandaü jun luágu cátei le larúfudajabei lání Espírítu jun. ¹⁰ Ítara lúba gayára lan jagáburidun queisi lúnti lan jagáburidun lánigu Wabúreme, adúgei le áubei lagúndaara súnwandan, arúfudeina ában alúbajani le lánina sun luwúyeri cátei buíti, lun giñe jasúbudirunitima Búngiu. ¹¹ Amúriajatiwa lúma lun léredagüdünnün láu luweírín lubáfu lun gayára lan jawánduni sun cátei láu sarágu gurásu lúma ugúndani, ¹² lun giñe jeteíngiruni Wáguchi Búngiu luágu aráanse láadiwa lan lun werésibiruni wafánran lídaangiñe le lúnbeí líchuguni joun lánigu lídaanme larúeijan le lánina larúgounga. ¹³ Séfu lumútiwa Búngiu lídaangiñe lubáfu lubúriga, ába líchuguniwa lídoun larúeijan Liraü le jínsiñebeí lun, ¹⁴ le asálbarubaliwa láu loúnwen, chibálei wafígoun.

Aráandaruni lúma Búngiu láu loúnwen Crístu

¹⁵ Wáguchi Búngiu le siñábeí jaríjini gürígia, ába liábin ubouágun lídan ában luwúyeri le gayáraati jaríjini gürígia lídan Liraü le Jesucrístu, le weírigitimaabei lídaangiñe sun cátei le níjeinbeí. ¹⁶ Lídaangiñe Crístu ladúgei Búngiu sun cátei le siélorugubei lúma le ubouágubei, dándu buri cátei le maríjínbeí quei le arijúabei. Lídaangiñe Crístu ladúgei arúejani, gumádi, lúrudu buri lúma buri ubáfu le jáni ánjeligu, áni lun giñe Crístu ladúgüwa. ¹⁷ Lubáragiñebeí sun cátei, níjeinjali meja Crístu, áni láu lubáfu, níjein lubeí sun cátei lídan lubára. ¹⁸ Lougiñe sun lira, Crístu jachügüdinabeí lánigu, ja gíribaña lúgubu, ja giñe gíribaña lílígílisin. Ligía le íchugubei íbágarí lun úgubu ligía, ligía furúmiñebeí ásaara lídaangiñe ouweni lun moúnwendügüyaali lan, lun ligía lan láu furúmiñeti ubáraü lídan sun cátei. ¹⁹ Ítara líña labúseeruni Búngiu lun níjeinbeí lan sun

le ligíabei lídan Crístu. ²⁰ Lídaangiñe Crístu, ába laráandaragüdüni Búngiu sun ubouú dayárugubei lúmagua, dándu buri cátei le ubouúagubei quei lé buri siélubei, ladügüni aráandaruni ligía láu loúnwen Crístu luágu gurúwa.

²¹ Jugúya, teréncha buri meja jugúya lun Búngiu, lágani buri meja Búngiu jugúya tídan janígi ladüga buri cátei wuríbati le jadügübei. ²² Ánjeinti guetó, aráandaragüda láadün Búngiu lúmagua láu loúnwen Crístu lun larúfudunün jarúmañu, madúrunga, queísi lánigu ligíbugiñe. ²³ Ítara méme lúba giñe ánjaün asígira derégüdagu lídan jafiñen, ragüñu buídu luágu Crístu, mígirunga jumeí eménigini le juágubei le íchugubalin ugánu lánina asálbaruni le jagáambubei. Ligía ugánu le apúrichijoubei lídan sun ubouú, le giñe napúrichijabei, áu Páblo.

Rúlumuti Búngiu Páblo lun lesériwidun joun títana buri ligílsi

²⁴ Guetó gúndaatina láu le nasúfurirubei juágu, lugúndun láu igáburi le, gayáraati níderagun láu núgubu guánarügü lun loústaragüdüniwa le lúngilibei lasúfuriruni Crístu jawágu lánigu, jawágu lilígilisin ja lúgubu. ²⁵ Núbínjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei juríu, lun napúrichijani ugánu le láni Búngiu jun quei lubúdubu. ²⁶ Ugánu ligía, cátei lé meja arámudañu lubei Búngiu lúmagiñe sarágu dan, áni guetó subúdigüda láali joun lánigu. ²⁷ Joun lánigu Búngiu labúseera lasúbudiragüdüni luweírín irisini le lídaanbei cátei arámudaguati le, le júnbei jugúya le mámabei juríu dándu joun ja juríubaña. Cátei arámudaguati ligía, luágu níjein lan Crístu jídan, juríu yebe, máma yebe juríu, áni ligía le ídaanbei jíchigei jeménigi luágu uweíriginu le lúnbei jibíjini siélu.

²⁸ Luágu Crístu wapúrichija, aríñagatiwa joun sun gúrgia lun jarügüdüni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu. ²⁹ Ligía nuwádigimaridunbei, áfaagueina láu sun érei lúma ubáfu le líchugubei Crístu nun.

2

¹ Buséntina lubeíti lun jasúbudiruni luágu luweírín lidíjери narítagnun juágu, lúma jawágu afíñetiña ja Laodicéabaña, lúma jawágu sun jíbiriagu afíñetiña ja maríjin jamáginabaña. ² Weíríti nayúmagan lun gagúraasun jumá tídan janígi, lun lídan jumá ában láu línsiñejabu Crístu juágu joun jíbiriagu, lun gunfaráanda jumáni linárün Búngiu buídu buídu lun derégüdagu jumá lídan le uágubei jafiñera, gayára lámuga jasúbudiruni laráansejan Búngiu lé meja arámudaguabei, le luágu Crístu guánarügü. ³ Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibeí ában oúnwenbun irisini woun. ⁴ Nariñaguñein buri cátei le jun lun mayéedun lánün ni ában láu buri dimúrei buíduburiti. ⁵ Láu sun úa nan jigíbugiñe lun gayára lan jamúga jaríjinina, anájein júma lídan espíritu, áni gúndaatina láu naríjini luágu lídaañein lan dan sun cátei jurúma áni derégüdagu jíña lídan jafiñen luágu Crístu.

⁶ Ligía, ítara queísi jerésibiruni Wabúreme Jesucrístu láu sun jafiñen luágu, lúnti ítara lan jabágaridun lídan ában lúma, ⁷ lun ragüñu lan jibágari luágu lídan le jídin jubáruaguóun lúma, derégüdagu lídan jafiñen ítara queísi larúfudajouñiwa jun, láu eteingiruni lun Búngiu súnwandan.

Iséri íbágari lídan Crístu

⁸ Touñigi jumá, mígiraguagüda jumá júngua joun ja busénbaña jayéegan láu buri arúfudajani málati. Máma lúmagiñeti Crístu cátei le jarúfudajabei, lúmagiñeti

jagáburi binádu mútu lúma buri ligáburi jarítagun gürígia lánina ubou le luágu cátei.

⁹ Níjein sun le Búngiubei lídan Crístu, ¹⁰ áni jugúya, buin jíña láu Búngiu lugúndun lídaañadún ában lúma Crístu. Jéreti Crístu luei sun lúruđu lúma ubáfu le ubouágubei lúma le siélubei. ¹¹ Láu gíñe lídaañadún lan ában lúma Crístu, queisigubeirügü resibi jumáali lan circuncisión lé meja jerésibirubei binádu juríu lun jarúfuduni luágu lánigu jamá Búngiu. Circuncisión le jíbíjubei, máma le adügúbei láu bíti luágu úgubu, jáni circuncisión, láu jasálbaran lídaangiñe figou le áubei jíabin ubouágun. Niján luwúyeribei ladügüniwa Crístu lun lánigu wamá Búngiu. ¹² Láu jabásterún, arúfuda jumúti luágu bunáwa jumá lúma Crístu lun ibágari le binádubei, sarátún gíñe lúma lun ibágari le iséribei ladúga jafíñerun luágu lubáfu Búngiu le ásaaragüdübalin lídaangiñe ouweni. ¹³ Luágu meja ában dan, jílañu jíña meja lun cátei lánina Búngiu ladúga jífigun, ladúga gíñe jabágariduña lan queisi gürígia bouguditiña luei lílúrudun Búngiu, agúnfulireina lúma sun luríban layúmajan júra. Ánjeinti guetó, rújali Búngiu iséri ibágari jun úara lúma Crístu. ¹⁴ Láu loúnwen Crístu, ferúduna láali Búngiu sun wafígoun, ába lagúmuchaguagüdüni Búngiu lílúrudun Moisés lúma buri sun gumádi le lánina lúruđu ligía le áubei mabáfu wamá lun wagúnfulirun, queigubeirügü jamúga dágua láni Búngiu lúruđu ligía luágu lugúruwan Crístu. ¹⁵ Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbati, ába lúnabudagüdüniña ligíbugiñe guríriguaü, ába lanügüniña quei adaürütiña lun.

Áluaja jumei buri cátei le lánina siélu

¹⁶ Úa la ni ában añáwarijati jarítagun luágu buri arúfudajani lánina cátei le lúnbei jeígini o le lan lúnbei játuni lun jagúnfulirun lúma Búngiu, o luágu lán buri fédu le jarítaguagüle luágu iséri írúmu, lúma iséri játi, o luágu lan wéyu le eméraguagülei. ¹⁷ Sún buri cátei le, lúntirügü lagúnfulirúniwa lúma darí meja líabin Crístu ubouágun, liyáwa rügüñein le lúnbei líabin, Crístu ligía linárünbei. ¹⁸ Mígiraguagüda jumá júngua joun ja afámurubaña quei únabugutiña, ja ájuduragubaña joun ánjeligu, lun janügüni jagáñirun jueí. Weíríti jadímurejan luágu nege buri cátei le ayáwadaguti joun, ába buri janáangun jóungua luágu ligáburi jasáminan, le jáni gürígia. ¹⁹ Mámañanu lídan ában lúma Crístu, le ichügüdinäu joun sun lánigu ja giribaña lúgubu, le ágüdjabalin úgubu ligía, le awáanseragüdübadiwa lídan cátei le lánina Búngiu, ru ligía ubáfu woun lun gayáraabei lan lídan wamá ában queisi labúseeruni Búngiu. ²⁰ Jugúya, ígira jumáali binádu jigáburi, queisi lídaañadún lan ában lúma Crístu, gidáadún lídaangiñe ligáburi jarítagun gürígia luágu buri cátei. ¿Cáti uágu jabágaridunbei camá jamuga lánigugidún ubou, ²¹ íchaagua júngua lun ligáburi ubou lun jagúnfulirun lúma Búngiu quei buri jamúga lúruđu le aríñagubei. “Magúurabei le, meígabei líra, márügüdadei cátei ligía”? ²² Sún buri gumádi le, luáguti buri cátei le gagúmuchaditi láu layúsúrún, áni máma ámu cátei luei gumádi buri lúma arúfudajani le jáni gürígia. ²³ Inárüni luágu gayára lan genége láni buri cátei lánina subúdi lugúndun labúseerúniwa agúnfuliruni lúma únabuni lun lagúnfulirúniwa láu, áni deréti líra woun. Láu sun líra, mabáfuti lúruđu buri ligía lun lídejan luágu luríban jayúmajan gürígia.

3

¹ Queisiti jabágariduña lan ában ibágari iséri ladúga lídaañadún lan ában lúma

Crístu, áluaja jumei buri cátei le lánina siélu, le ní lubei Crístu ñun lueígiñe loúnwenren Búngiu. ² Samína jumá luágu buri cátei le lánina siélu, máma luágu buri le lánina ubou. ³ Jilátún lúma Crístu lun ubou le, guetó, níjein jibágari le tímatisaati lúma Crístu le yágútabei siélu lúma Búngiu. ⁴ Dánme lagíribudun Crístu, le úmabei lídan wamá ában, wachúlaaguba giñe lúma, ábame gafánran wamá lídan luweírigun.

Binádu ibágari lúma iséri ibágari

⁵ Ígira jumei sun le jigáburibe le láninabei ubou le. Úa la ni ában jidaangiñe agámariduti mamárieidunga, madügün jugúyame cátei wíyeti, mafálara jumei luríban ayúmajani, maweínamulá jágu luágu cátei le máma jáni, le méme ájuduraguni joun sándu. ⁶ Lueígiñe buri cátei le, láburujan lanárime ligáñi Búngiu jawágun ja madügünbaña gásu láu. ⁷ Jugúya, adúga buri jumúti meja cátei le lídan meja binádu jibágari, ⁸ ánjeinti guetó, ígira jumei sún buri cátei le. igáñi, iyéreejabuni, wuríbani, anábajani, lúma buri dimúrei wíyeti. ⁹ Maríñaga jumá iyéeni júmagua quei ígira jumáali lan binádu jigáburu lúma lé buri meja jadügübei. ¹⁰ Isérijali jigáburu le isérideinábei quei méme ligáburu Búngiu guánarügü le adügübalin, daríme jasúbudiruni Búngiu buídu buídu. ¹¹ Iséri ibágari ligía, mámaali cátei lánina juríu jumá o máma jumá juríu, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machúlaaguntiña, idámuni, máma idámuni, Crístu, ligía sun cáteibe, áni níjein giñe jádan sun lánigu láu láni Espíritu.

¹² Jínsiñetün lun Búngiu, anúadaja láadün lun lánigume. Ítara líña lubeíti, abágarida jumá queisi lánigu, láu gudémejabu, areíduni, manáanguni únguáü, gagáambadi, lúma gagúraasuni. ¹³ Gagúraasun jumá jubáruagua, ferúdunagua jugúyame júmawagua, ítara quei ferúduna lánün Crístu, ítaralá giñe jadúga. ¹⁴ Louígiñe sun cátei, jínsiñejabu jumá, ligía cátei le íchugubalin sun cátei lídan ában, áni jóustagüdalei lubuídun jigáburu. ¹⁵ Abúguralei lidárangilan Búngiu sun le jadügübei, ladúga ligía lagúarunbei Búngiu jun lun ábanrügü jumá úgubu, abágarideina láu darángiláü. Geteíngiradi jumá giñe.

¹⁶ Buíngüdalouün láni Crístu ugánu janígi le gumúti. Arúfudaja jumá júmawagua, aríñagagua jugúyame júmawagua láu lichú áu. Jerémuja luágu luweírigun Búngiu láu eteíngiruni lun tídan janígi. ¹⁷ Furúmieguarügü cátei le jadúga o le lan jaríñagun, adúga jumei lídan ában luwíyeri le íchuguti inébesi lun Wabúreme Jesucrístu, eteíngireina Búngiu Úguchili lidaangiñe Jesucrístu.

Igáburu le lúnbei wagáburiduni jáma ja wábiñebaña

¹⁸ Wúríña, gagáambadi jumá joun júmarigu, ligía cátei buíti le lúnbei jadügüni queisi affíñetiña luágu Wabúreme Crístu. ¹⁹ Wügüriña, jínsiñe jamá júmarigu jun, magáñida jumá jáma. ²⁰ Isáanigu, agáamba jumáña jagübürigu lídan sun cátei, ladúga ligía jínsiñebele lun Búngiu. ²¹ Agübürigu, másügüragualá jagúmadiruniña jisáanigu, ragü jáñein magúraasuni. ²² Esériwidutiña, gagáambadi jumá joun jiyúbudirigu lídan sun cátei, mámarügü dan le aríagu jáña lan jun lun jeréderun buídu jagíbugiñe, adúga jumei súnwandan táu sun janígi ladúga luweírin linében Búngiu jun. ²³ Furúmieguarügü cátei le jadúga, adúga jumei láu ugúndani, camá jamuga jadügüñein lun Wabúreme Crístu máma joun gürígia. ²⁴ Subúdi jumáali luágu líchugubele lan Búngiu alágan jun queisi jafáyeiruaa, ladúga lun Wabúreme Crístu le Jabúreme le tímatisaati

jeseriwida. ²⁵ Ánjeinti le adügüti wuríbati, lerésibirubei lafáyeiruaja wuríbati le ladügübei, áni ában láu lanügüniña Búngiu sun güriúa.

4

¹ Iyúbudirigu, lúnti buídu lan jigáburi jáma jumúsuniña, oúsera jumáña láu úarani lúma iríchaü, jarítaua jumá luágu níjein lan giñe ában Jabúreme yágüta siélu.

² Ítara méme jumá ayúmuragua lun Búngiu sarágu, agáguduañu, eteíngireinei Búngiu. ³ Ayúmuragua jumá giñe wawágu lun ladáranun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ñi lan Crístu jádan lánigu, juríu yebe, máma yebe juríu. Lueígiñe napúrichijani cátei le, nadaürüwa. ⁴ Ayúmuragua jumá lun nasúbudiragüdüni furáangu quei lubúdubu.

⁵ Buídulá jóuserun jáma ja mafíñebaña, yúsu jumei jidáani lídan cátei le buídubei. ⁶ Lúnti gúndaawa lan láu jiyáanu súnwandan, lúnti giñe semé lan, lúnti giñe jasúbudiruni ída lúba lan jóunabuniña güriúa.

Lagúmujoún buri mábugaü

⁷ Laríñaguba wadúje Tíquico nuágu jun. Jínsiñeti wügüri ligía woun sarágu, ligía ában ídejati buíti le giñe eseríwidubei lun Wabúreme Crístu núma. ⁸ Ligía noúnajaanbalin jun lun laríñagun jun ída wáña lan, lun giñe líchugun gurásu jun. ⁹ Níngira giñe Onésimo lúma, wadúje úraguati le jínsiñebei woun, le jupaísanun. Jagíaba abájúdagua jun luágu sun le asúseredubei ya.

¹⁰ Mábuga líña Aristárco le nouba furísunrugu jun, mábuga líña giñe Márcos le lidúje Bernabé jun. Aríñawagúaaali jun luágu Márcos, ánjein ñüdün aríjaün, resíbi jumei buídu. ¹¹ Mábuga líña giñe Jesúsú, le giñe gíribei Jústó, jun. Jagía rügüñanu jádaangiñe juríu afíñetiña ja ñadágimeinjáñabaña núma luágu larúejjan Búngiu, áni jayábin nun quei ában oúnwenbun dügüdaguau. ¹² Mábuga líña Epáfras le jupaísanun, le eseríwidubei lun Crístu, jun. Ligía, súnwandan layúmuragun juágu lídan layúmuragun lun Búngiu lun derégüdagu jumá lídan jafíñen áni derégeguñu júngua buídu buídu lun jadügüni lugúndan Búngiu. ¹³ Geféentina luágu jarítaua lan Epáfras juágu, lúma giñe jawágu ja ubúrugubaña Laodicéa lúma Hierápolis. ¹⁴ Mábuga líña Lúcas, le wasúrusian, le jínsiñebei woun, jun, lúma giñe Démas.

¹⁵ Mábuga níña joun idújeñu lueígiñe Crístu ja ubúrugubaña Laodicéa. Rújuma giñe mábugaü tun Nínfas lúma joun sunagun juágu lídan layúmuragun lun Búngiu lun derégüdagu jumá lídan jafíñen áni derégeguñu júngua buídu buídu lun jadügüni lugúndan Búngiu. afíñetiña ja oúndaragubaña túbiñe lun jájuduragun lun Búngiu. ¹⁶ Lásunme jalíjanun gárada to júmagua, jóunajounme lun jalíjanun tílana ligílisi Laodicéa, alíja jumóunme giñe gárada to achülüríboun jun Laodicéagiñe to nabürüjaboun. ¹⁷ Aríñaga jumá lun Arquípo lun ladügüni wadágimanu le rúlaalíbei Wabúreme Crístu lun, buídu.

¹⁸ Niján numábugaü le nabürüjabei jun láu nújabu guánarü —áu Páblo. Jarítaua jumá luágu nadaürüña lan. Binílaün Búngiu. Ítaralá.

FURÚMIÑETU LIGÁRADAN PÁBLO JOUN TESALÓNICANA

Labürüjan Páblo jáma líbirigu joun títana ligílisi to ubúruguboun Tesalónica

¹ Áu Páblo lúma Silváno láu Timotéo, wabürüjañoun gárada to jun, jugúya títana ligílisi to Tesalónicaboun, ja lánigubaña Wáguchi Búngiu lúma gíñe Wabúreme Jesucrístu. Resíbi jumei abiniruni lúma darángiláü jámagiñe.

Jémpulu lánina afiñeni lé meja jarífudubei Tesalónicana

² Súnwandan weteíngiruni Búngiu juágu, sun jugúya, jarítagua wagía juágu súnwandan lídan wayúmuragun lun Búngiu. ³ Jarítaguatiwa ligíbugiñe Wáguchi luágu lubuídun jesériwidun lun Jesucrístu ladüga jafiñen luágu, lúma lubuídun jóuseruniña wánigu ladüga buin tíña lan janígi láu ínsiñejabuni, lúma lubuídun jawánduni sun asúfuriruni ladüga jeménigidun luágu Wabúreme Jesucrístu le ídaangiñebei lan jachülúra siélun. ⁴ Nidújeñu, jínsiñetün lun Búngiu, áni subúdi wamúti luágu anúadaja láadün lan. ⁵ Lugúndun dán meja le wapúrichijanbalin ugánu luáguti asálbaruni jun, merésibirun jumúti queísirügü dimúrei, ñadágimeinti tídan janígi, láu lubáfu Sífiri Sándu, lun lasáansiraguni jigáburi. Resíbi jumúti meja ugánu ligía láu ichoúrui le tímatimaati luágu inárüni lan. Subúdi jumúti lubuídun wóuserun jagánagua, lun ábanbadiwa lan jémpulu buíti jun.

⁶ Ába jáyeijani wagáburi, lúma ligáburi Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barü lan jerésibiruni Crístu asúfuriruni jun. ⁷ Ítara líña jíabin lun ábanbadün lan jémpulu joun sun afiñetiña ja loúbawagubaña Macedónia lúma Acáya. ⁸ Burúguaali ugánu luágu Wabúreme Jesucrístu júmagiñe, mámarügü loúbawagu Macedónia lúma Acáya, burúguaali lídan sun fulásu, áni subúdiwaali luágu afiñeni le jibíjubei luágu Búngiu lídan sun fulásu. Memégeirunwati wabájüdagun luágu jafiñen joun güri-gia, ⁹ lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruniwa, lúma luágu jígiruni jájuduragun joun sándu lun jafálaruni Búngiu, ába jagúmeserun esériwida lun Búngiu le wínwanbei, le gíñe tímatimaatibei. ¹⁰ Abájüdaguatiña gíñe juágu luágu jagúrabajañein lan lagíribudun Liraü Búngiu siélugiñe—Jesúsu le lásaaragüdübei Búngiu lídaangiñe óuweni, le asálbarubáliwa luei lanárima afáyeiruajaü luágu figóu le lúnbei líabin.

2

Luwádigimari Páblo Tesalónica

¹ Jugúya guánarügü, nidújeñu, subúdi jumúti luágu máma lán meja luágu ni cáta wóudin aríjaün. ² Queísi jasúbudiruni, wuríbbati meja jóuseruniwa güri-gia ja Filíposbaña, ába wayábin júmoun ladügarügü líchugun Búngiu anígi woun lun wadügüni. Ába wapúrichijani ugánu le lánina asálbaruni jun, mebésesenga wagía láu le lúnbei wasúfuriruni jámagiñe güri-gia ja mísiñejabubaña lun ugánu ligía. ³ Máma wapúrichijaña ladüga jamúga bulíeiguauü, queísi jaríñaguni wáganiñu, ni láu luríban arítangun, ni lun wayéedagunün. ⁴ Lubáragiñe líra, aríja lumúti Búngiu luágu buídu wamá, ába líchuguniwa lun wapúrichijani ugánu le

lánina asálbaruni, ítara líñati wadímurejan lun wagúnfulirun lúma eménigini le lánbei Búngiu wawágu. Máfaaguntiwa lun gúnda jamá gürígia wáma, wáfaagun lun gúnda lan Búngiu wáma, le asúbudirubarun wanígi. ⁵ Queísi jasúbudiruni, siñáti laríñawagún luágu adímureja wamá meja jun láu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le. ⁶ Máluajantiwa lun wibíjin uweíriguni jámagiñe ámu gürígia, ni júmagiñe, láu sun gayára lan jamúga wásandiragúdúni lijúrú wagúmadíjan queísi láni Crístu apóstolugu. ⁷ Lubáragiñe líra, ouserarügü wamútün láu ában uálini queísi ában úguchuru to agüriajabaliña tirájüñü, ouñigira táña. ⁸ Weíriti jínsiñe woun darí lun máma rügüñein lan jamúga láni Búngiu ugánu wabúseera wíhugun jun, buséntiwa jamúga wíhuguni wabágarí guánarügü jun, le luweírín jínsiñe woun. ⁹ Nidújeñu, jarítağa jumúti ligáburi wawádigimari lúma ligáburi wáfaagun lun wawínwandun. Ñadágimeintiwa meja wéyuagu áriebu lun mámbadiwa lan ijürügu lun ni ában jídaangiñe, sun awánja lan apúrichíjei láni Búngiu ugánu jun.

¹⁰ Geféentün, geféenti giñe Búngiu luágu reídei wamá meja láu ában igáburi le jarúmati áni surú jídan, jugúya le afíñebei, míchugunga wagía lúgaaru lun ni ában lun íchugun wadúnrun. ¹¹ Subúdi jumúti giñe ída líña lan wíhugun gurásu jun lúma derégüdaguáú lun jafíñen, cáda ában jídaangiñe, quei ladüga ában úguchili joun lirájüñü. ¹² Aríñagaadiwa jun lun buídu lan jóuserun quei lúnti lan jóuserun lánigu Búngiu le agúarubei jun lun gafánran jumá lídan larúeíjan lúma luweírigin.

¹³ Ligía, súnwandan lubei weteíngiruni Búngiu, lugúndun dán meja le jagáambunbalin láni Búngiu ugánu le wapúrichijabei jun, resíbi jumúti queísi ugánu láni Búngiu, máma queísi ugánu jáni wügüríña. Áni inárüni luágu láni lan Búngiu ugánu, le íchugubalin ubáfu jun lun jagáburidun buídu, jugúya le afíñebei. ¹⁴ Nidújeñu, dan le jeíbaajanbalün jupaísanun, suséreti jun quei méme le asúseredubei joun tílana buri ligíli to Judéaboun, ja lánigu Búngiu lídaangiñe Jesucrístu, eíbaaja jamútiña giñe juríu ja japaisanun. ¹⁵ Juríu, jagía áfarubalin Wabúreme Jesúsu jílágubei, áfaragua jamaña profétagu, áni bugá jamutiwa giñe bougudin lueí jageíra. Magúndaanti Búngiu jáu, jáganiñu giñe sun gürígia. ¹⁶ Dan le wabúseerun wadímurejan joun ja mámbaña juríu lun giñe jasálbarun, májatiñá yebe juríu lun wadügüni. Láu igáburi le, gánwoungugáda jamúti jafígoun. Ánjeinti guetó, liábindügürüga lanárime ligáñi Búngiu jawágun.

Busényati Páblo lídin aríjaña Tesalónicana

¹⁷ Nidújeñu, murúsun dan lárigiñe wígirunün (láu sun ajünja méme lan tídan wanígi) ouñwenbun wabúseerun wouđinya aríjañ. ¹⁸ Jóuchatiwá yebe wouđin, áu Páblo, sarágu weíyaasu yebe noučhun nídin, áni ságü noučhun nadügüni, mígirun lumútina Máfia. ¹⁹ Ladüga jugúya guánarú íchugubalin ugúndani woun, jugúyaba arúfudei lubuídun weseríwidun lun Wabúreme Jesucrístu le uágubei gayára lan weménigidun lun werésibiruni wafáyeiruaja dánme le lagíribudun, áni jugúyaba wagúndaaragüle dánme le jaráramun ligíbugiñe. ²⁰ Jugúya lébunabei wagúndan, áni rújadün lébuna wadímurejan buíti joun ámu juágu.

3

¹ Dán meja le siñá wamaali awánda masúbudirunga ída líña lan sun cátei júma, ába warítágun luágu buídutima lan lun weréderun Aténas, áu lúma Silváno, ² lúma lun lídin wadúje Timotéo, le ában eseríwiduti lun Búngiu lídan lapúrichijoún ugánu luágu Crístu le Wasálbaragüle, aríjañ. Oúnaja wamúti

júmoun lun líderagunün arárama buídu lídan jafiñen, ru ligía gurásu jun, ³ lun úa lan ni ában eíquaduti larúna lueígiñe buri lénreengúnga le lasúfurirubei luágu lafiñerun luágu Crístu. Jugúya guánarügü subúdi jumúti luágu lúnti lan wagúrabajani asúfuriruni líbe le. ⁴ Dán meja le awánjagua lan júma, aríñagatiwa meja jun luágu lúnti lan wagúrabajani asúfuriruni luágu líri Jesucrístu, áni ítara líña lasúseredun, quei jasúbudiruni. ⁵ Ligía lébubei dán meja le siñánaali lan awánda, ába nouñajan álügüdaja ída jíña lan lídan jafiñen, ladúga nanúfude lueí jamuga línchajanün Máfia lun jígiruni jafiñen luágu Crístu, ába jamúga liábin wawádigimari jídan lun ni cáta me.

⁶ Guetó, giríbujali Timotéo Tesalónicagiñe, áni barúti ugánu buíti woun luágu jafiñen lúma jínsiñejabu. Laríñajare woun luágu jarítagua jumá wawágu láu insiñeni súnwandan, luágu giñe luewéirin jabúseerun jaríjiniwa, ítara giñe quei busén wamá waríjinün. ⁷ Ítara líña lubeiti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le wasúfurirubei guetó. ⁸ Ítara líña quei iséri ibágari woun wasúbudiruni luágu derégüdagu jíña lan lúma Búngiu. ⁹ ¿Ída lubá funasan wíchugun eteíngiruni buídurügüti lun Búngiu juágu, lúma luágu sarágu ugúndani le rújumaalíbe woun? ¹⁰ Wéyuagu, áriebu, wayúmuragun lun Búngiu lun gayáraaya lan waríjinün, gúnfuli lámuga le mégeibeí lídan jafiñen.

¹¹ Buséntiwa lun líderaguniwa Wáguchi Búngiu lúma Wabúreme Jesucrístu lun gayára lan woúdin aríjañ, ¹² lun giñe laweíridagüdüni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun. ¹³ Derégeguagüda lámugañ Wabúreme Búngiu júngua lun le gumúti, madúnrunga jugúyame ligíbugiñe dánme liábin Wabúreme Jesúsú jáu sun lánigu.

4

Igáburi le áubei lagúndaara Búngiu

¹ Nidújeñu, subúditi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuraguatiwa jun láu líri Wabúreme Jesucrístu lun ítaramemetima lan jagáburidun queísi labúseeruni Búngiu.

² Jarítaguatün luágu arúfudajani le wíchugubei jun láu lugúmadin Wabúreme Jesúsú. ³ Le labúseerúbeí Búngiu, lun jabágaridun derégeguañu júngua lun, lun úa lan ni ában agámariduti mamárieidunga, ⁴ lun cáda lan ában lálujanun lúmari lau lubuídun aritaguni queísi labúseeruni Búngiu, lídan lubúdubu, ⁵ máma láu luríban ayúmajani quei jadügüni gürígia ja ibidiñejabubaña lun Búngiu. ⁶ Úa la ni ában adügüti wuríbaní lun lidúje láu lagámaridunun lúmari, jéreti labeíchuni Búngiu le adügüti cátei le, queísi waríñaguni jun. ⁷ Máma lun wabágaridun lídan iwíyeni lagúara Búngiu woun lun lánigu wamá, busénti lun wabágaridun derégeguañu woúngua lun. ⁸ Ítara líña lubeíti, le amájaruti lerésibiruni arúfudajani le, máma lun ni ában wügüri lamájara, lun Búngiu lamájara, Búngiu le íchugubalin Sífiri Sándu woun.

⁹ Luágu jínsiñejabu joun lánigu Búngiu, úati ni cáta lun nabürújani jun lugúndun arúfudajaali Búngiu guánarügü jun lun jínsiñegua jumá, ¹⁰ áni ítara líña jadügüni joun sun jidújeñu lueígiñe Jesucrístu ja lídaanbaña sun ubúругu Macedónia. Láu sun líra, nidújeñu, ayúmuraguatiwa jun lúntima lagánwoundun jínsiñejabu. ¹¹ Joucha jumá jabágaridun darángilañu, beréseguñu lídan le

lúnbei jadügüni. Ñadágimein jumá lun janúriragun júngua, quei waríñaguni jun, ¹² inébe jumámuga joun ja mafiñebaña luágu Jesucristu, úa lámuga giñe jemégeirun.

Liábin Crístu

¹³ Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, luei jajirudagun quei ja meménigidunbaña luágu níjein lan ában ibágari lárigiñe ouweni. ¹⁴ Ítara quei afiñe wamá luágu jilá lan Jesúsu áni sará ligía lídaangiñe ouweni, ítara líña giñe afiñe wamá luágu lásaaragüdübaña lan Búngiu ja ouwegubaña afiñeñu luágu Jesúsu.

¹⁵ Ligía wariñagunbei jun queisi larúfudajan Wabúreme Jesúsu, luágu wagía lánme le wíngangilíbei dánme liábin, mámaba wagía ñúðun jabáragiñe ja jiláguaañabaña. ¹⁶ Dánme le arárireina lan Wabúreme Jesúsu siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lífidun Búngiu. Gürígiameti ja ouwegubaña afiñeñu luágu Crístu, jagíaba ásaara furúmiñe. ¹⁷ Lárigiñeme, ábame wásaarun, wagía afiñetiña ja wíngangiñabaña, ábame wanügüniwa úara jáma lídoun juánriñu lun wadúnragun lúma Wabúreme Jesúsu garábalirugu. Ábameti weréderun lúma Wabúreme Jesúsu lun sun dan. ¹⁸ Ligíati rújuma lubei gurásu júngua láu dimúrei buri le.

5

¹ Ánjeinti luágu cába lan dan lasúsereda buri cátei le, nidújeñu, mabúseerúnwati nabürüjan jun. ² Subúdi jumáli buídu buídu luágu lachülürüba lan wéyu ligía dánme magúrabúniwa lan, queisi liábin ában íwerujati áriebe. ³ Dánme añája lan gürígia aríñaga. “Lídaañein dan sun cátei áni úati mégeiti”, ligíame liábin gürínguaü jawágun sódini quei liábin agáriduni tun würi dageínatu, siñábeiti jeséfurun. ⁴ Ánjeinti jugúya, nidújeñu ja afiñebaña luágu Jesucristu, máma lídaañadün lubúriga luágu cátei lánina Búngiu lun lárügüdüñu luwéyuri liábin Crístu quei lárügüdüñ ában jíweruti. ⁵ Lídaañadün larúgounga sun jugúya, máma wagía lánina áriebe lúma lubúriga. ⁶ Ligía mouñ lubei lun maráanserun wamá quei ja mafiñebaña luágu Jesucristu, lúnti deréñuma wamá lubá lagiribudun, lídan wagíame lubuídun wachügü. ⁷ Ja arúmugubaña, áriebe jarúmuga, ja abácharuadubaña, áriebe jabácharuada. ⁸ Ánjein wagía le lánina wéyuagu, lúnti lídan wamá lubuídun wachügü. Lúnti wadáuragun woungua láu afiñeni lúma láu ínsiñeni queisi ladáuragun súdaara láu laníguagu lun loúnigiruni. Lúnti giñe jeméni wamá luágu wasábarun le ítarahei quei bunídi le áubei ladáurei súdaara lábulugu lun loúnigiruni. ⁹ Máma lun labeíchuniwa Búngiu lanúadajawa, lun wibíjini asálbaruni lídaangiñe Wabúreme Jesucristu lanúadajawa. ¹⁰ Jiláti Jesucristu wawágu lun wabágaridun úara lúma, wínowañu wagía yebe, jiláñu yebe wéyume le liábin. ¹¹ Ligía rúmeme jumá lubei gurásu lúma érei júniwagua ítara quei jadügüni guetó.

Lariñaguni Páblo joun afiñetiña ída lúba lan jagáburidun

¹² Nidújeñu, ayúmraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja jagía jun lídan líri Crístu. ¹³ Lúnti jínsiñe jamá jun sarágu luágu wadágimanu le jadügübei. Abágarida jumá lídan dan jáma jibirigu.

¹⁴ Aríñagatiwa gíñe jun, nidújeñu, lun jerérun joun ja májatiña jawádigimaridun, lun jíchugun gurásu joun ja magúraasunbaña, lun jidéraguniña ja débilibaña lídan jafiñen, lun giñe gagúraasun jumá jabá sùngubei.

¹⁵ Úa la ni ában afáyeiruti wuríbani luágu wuríbani. Joúcharügü jumá jadügün buíti jagánagua, lúma joun sun gürígia.

¹⁶ Gúnda jumá súnwandan. ¹⁷ Ayúmuragua júma lun Búngiu sun dan. ¹⁸ Teínqui jumei luágu sun le asúsereduti—buíti, wuríbati, niján le labúseerúbei Búngiu júmagiñe, queísi afiñetiña luágu Jesucrístu.

¹⁹ Merédera jumei luwádigimari Sífiri Sándu tídan janígi. ²⁰ Mamájara jumá lun dimúrei le laríñagubei Búngiu jayúmulugugiñe jidújeñu lueígiñe Jesucrístu. ²¹ Joúcha jumei sun arúfudajani aríja jumeime ánjein lúmagiñeti lubei Búngiu, ábame jeréderun lau le inárünibeí. ²² Dise jumá luei sun luwúyeri wuríbani.

²³ Búngiu guánarügü, le íchugubei darángilaü, derégeguagüdalaün júngua lun le gumúti, areída jóme juwáni, janígi luma júgubu dayárugu, jarúmañu, lubá liábin Wabúreme Jesucrístu. ²⁴ Úaraguati Búngiu le agúarubei jun lun lánigu jumá, lagúmuchubei ladügüni sun cátei buíti le jídan.

Lagúmujoín buri mábugä lúma abíniruni

²⁵ Nidújeñu, ayúmuragua jumá lun Búngiu wawágu.

²⁶ Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷ Aríñagatina jun lau lugúmadin Wabúreme, lun jalíjanun gárada to joun sun wadújeñu lueígiñe Jesucrístu.

²⁸ Binílaün Wabúreme Jesucrístu. Ítaralá.

TIBÍAMAN LIGÁRADAN PÁBLO JOUN TESALÓNICANA

Labürüjan Páblo jáma líbirigu joun títana liglisi to Tesalónicaboun

¹ Áu Páblo lúma Silváno láu Timotéo, wabürüjañoun gárada to jun, jugúya tílana liglisi to ubúruguboun Tesalónica ja lánigubaña Wáguchi Búngiu lúma Wabúreme Jesucrístu. ² Resíbi jumeí abíniruni lúma darángilaü jámagiñe.

Lagúseragüdübaña Búngiu gafígountiña dánme liábin Crístu

³ Nidújeñu, teínqui wamúti Búngiu súnwandan juágu, queísi lúnti lan wadügüni, lugúndun laweíriduña jafiñen sarágu, áni ínsiñeni le jidaanbei jubáruagua aweírideinatima líña súnwandan. ⁴ Adímurejatiwa buíti juágu tídan buri lilígilisin Búngiu, luágu gurásu lúma afiñeni le jarúfudubei lídan sun eibaajóuni lúma idíjeri buri le jasúfurirubei lueígiñe Crístu. ⁵ Arúfuda lumúti lubuídun jawándun luágu úragua lan Búngiu lídan ligáburi lagúseragüdün, láu lanügünün quei garíchatíña lun jebélurun lídoun larúeijan, le uágubei jasúfurira.

⁶ Ladüga giñe úragua lan Búngiu, lachülürüba wéyu lun lasúfuriragüdüniña ja asúfuriragüdübalün, ⁷ lúma giñe lun líchugun eméraagni jun, jugúya le asúfurirubei itara quei wagía, lídaanme wéyu le lúnbei lachülaagun Wabúreme Jesúsu siélugiñe lídan wátu geméti jáu láni ánjeligu ja gabáfubaña. ⁸ Liábinba lun labeíchuniña ja masúbudirunbalin Búngiu, madügün jagía gásu láu ugánu luáguti asálbaruni le wabíjibeí lídaangiñe Wabúreme Jesúsu. ⁹ Agúnrinchawagúni le magúmuchaditi, ligába jabeichúagüle, jabugúba díse lueí laríjin Búngiu lúma luweírigin lúma lubáfu. ¹⁰ Dánme le liábin Crístu, laríjüba luweírigin jádan lánigu, ábame laweíridun janígi sun ja afiñeñabaña luágu, áni jugúya, jádaanbadün gürígia jagía queísi afiñeedün lan luágu le waríñagubei jun luágu.

¹¹ Ligía lébubei súnwandan lan wayúmuragun juágu, amúriaja wagía lúma Wabúngiute lun jarúfuduni luágu garícha jumá lun jádaanbadün lan ja únbaña lagúara. Ayúmuraguatiwa giñe lun Búngiu lun lagúnfulirun sun jayúmajan lun buídu lan jigáburi, láu lubáfu, lúma buri sun wadágimanu le jadügübei ladüga jafiñen. ¹² Láu igáburi le, líchugúba uweíriginuni lun líri Wabúreme Jesúsu lídan jibágari, ábame líchugún uweíriginuni jun luágu lareídun Wabúngiute lúma Wabúreme Jesucrístu.

2

Le lúnbei lasúseredun lubáragiñe lagíribudun Jesucrístu ubouágun

¹ Guetóti, nidújeñu, libügürü liábin Wabúreme Jesucrístu, dánme liábin oúndaraguawa lúma, ² amúriajatiwa júma lun masáansirun jumáni ligáburi jarítangun itara uménrengun, masústarun jugúyame luágu ní ában ugánu, o dímuerei buri le uáguti laríñawagua luágu lúmagiñeti lan Búngiu, ni tuágu gárada to uáguboun jaríñaga luágu wámagiñetu lan, to aríñaguboun luágu chülüjali lan luwéyuri Wabúreme lun lagíribudun ubouágun. ³ Mígiraguagüda jumá júngua lun jeyeedúniwa itara. Lugúndun lubáragiñeme lachülürün wéyu ligía, njeinbei awúribujani lúma Búngiu, lachülaaguba giñe lágani Crístu, le lunbei lagúnrinchawagún. ⁴ Ligía láganibeí Búngiu, liñúraguba lúngua luágu sun cátei

le luáguti Búngiu, lachülürüba giñe añúura tídan lilígilisin Búngiu, camá jamuga Búngiu ligía, ligía guánarügü aríñagati luágu Búngiu lan.

⁵ ¿Marítangun jumútisan luágu aríñagañaja náni méja buri cátei le jun dán meja le anájeingua lan júma? ⁶ Subúdi jumúti giñe ída líña lán meja nadímurejan luágu ában ubáfu le lúnbei leréderuni liábin lágani Crístu lubáragiñe lídaáni. ⁷ Luwádígimariña wuríbani guetó, arámudagu, áni lúnti lagídarúniwa le eréderubalin lágani Crístu ligía lubáragiñe gayára lan láfuridun lídoun larúgounga. ⁸ Ligíaba larijóuniwa, áni lagünrinchagubei Wabúreme Jesúsu ágani ligía láu ában dimúrei, lúma láu luweírigin le áubei liábin. ⁹ Ladúgaba Máfia liábin lágani Crístu ligía, lachülürüba láu sarágu ubáfu, ladúgüba buri miláguru yéeti lun layéedaguniña gürigia. ¹⁰ Layúsuruba sun luwúyeri wuríbani lun layéejaniña ja lídaanbaña úma lun güringuaü, quei mája jabeí lun jerésibiruni inárüni luáguti Crístu lun jasálbarun. ¹¹ Ligía líchugunbáliña Búngiu lídoun bulíeiguaü lun jeyeedúniwa lúma lun jafíñerun luágu iyéeni, ¹² lun jasiadirúniwa lun máfiougati sun ja májabaña jafíñerun luágu Crístu, jínsiñerügü ligía wuríbani joun.

Anúadajoútiña lun jasálbarun

¹³ Ánjein jugúya, wadújeñu jínsiñetiña lun Crístu, súnwandan teínqui wamúti Búngiu juágu lugúndun anúadaja lumútün lúmagiñe lagúmeserun dan lun jasálbaruba lan láu Sífiri Sándu le arúmadagüdúbarun janígi, lúma inárüni luágu wasálbarun lídaangiñe Jesucrístu, le uágubei jafíñera. ¹⁴ Ligía lagúarunbei Búngiu jun, lun jasálbarun láu ugánu le wapúrichijabei, lun gafánraanbadün lan lídan luweírigin Wabúreme Jesucrístu.

¹⁵ Ítara líña lubetí nidújeñu, derégüdagu meme jumá, mabúlieidagun jugúyame lueí buri arúfudajani le rúwamaalibei jun láu dimúrei lúma táu gárada. ¹⁶ Wabúreme guánarügü Jesucrístu lúma Wáguchi Búngiu, le arúfuda láalibei línsiñejabu woun láu lareídun, ¹⁷ ru ligía ámalijouni le magúmuchaditi woun lúma ában eménigini buíti, rúla dügüdaguaü tun janígi, derégüdaguaüda laünme lun jaríñaguni lúma lun jadügüni sun le buídubei.

3

Amúriajati Páblo jáma lun jayúmuragun lun Búngiu luágu

¹ Lagúmujoún cátei, nidújeñu, ayúmuragua jumá wawágu, burúgua lámuga ugánu luáguti Wasálbaragüle furése lídan sun fulásu, resíbiwa ligíame láu ugúndani queísi lasúseredun jagánagua. ² Ayúmuragua jumá giñe lun gayára lan weséfurun jaweí wügüríña wuribatiña, lugúndun máma sun gürigia ubouágu affíñetiña luágu Crístu. ³ Ánjeinti Búngiu, gayáraati wafíñerun luágu, luágu lagúnfuliruba lan láu lerérun, lárügüdúbadün derégüdagu, goúnigilaünme tueí lisádarán Máfia. ⁴ Jeménigitiwa luágu Wabúreme Búngiu luágu adúga jumáni le wariñagubei jun áni luágu jadúga mémebei lan. ⁵ Íderagualaün Búngiu lun jasadíruni lísiñejabu jun, lúma lun gagúraasun jumá quei Crístu luágu jasúfurirun.

Lúnti wawádígimariidun

⁶ Nidújeñu, aríñagatina jun lídan líri Wabúreme Jesucrístu lun jadísedun lueí furúmieguarügü jídaangiñe le májati luwádígimariidun, le mabágaridunti úaragua lúma arúfudajani le jibíjubei wámagiñe. ⁷ Subúdi jumúti ída lúba lan luwúyeri wabágaridun jagánagua lun jafálaruni wáni jémpulu, merédetiwa

mawádigimariga jagánagua. ⁸ Meígin wamúti jeígin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebe, lun mámabadiwa lan ában ijürügu lun ni ában jídaangiñe. ⁹ Láu sun garícha wamá yebe lun wamúriajan júma lun jíderaguniwa, ñadágimeinrügütiwa lun wíchugun ában jémpulu jun lun jafálaruni. ¹⁰ Dán meja le júma wamá, rúwamuti meja gumádi le jun. “Le májabei luwádigimaridun, meígalá.” ¹¹ Agáambatiwa luágu añájein lan jídaangiñe májatiña jawádigimaridun, jerédera madügünga ni cáta, eténira lun le moún lubei jeténirun lun. ¹² Waríñaguña jóun buri güriquia jagía láu lugúmadin Wabúreme Jesucrístu lun jawádigimaridun darángilañu lun jagáñeirunun jeígan fein.

¹³ Nidújeñu, mabúchadalá juágu adüga buíti. ¹⁴ Ánjein ñi ában le madügünti gásu láu le waríñagubei tídan gárada to, aríja jumei cátei lan, memétera jumá lúmoun, barü lámuga busíganu. ¹⁵ Manüga jumei quei ágani, erérarügü jumá lun queísi idújei.

Lagúmujoún abíniruni

¹⁶ Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

¹⁷ Áu Páblo, nabürüjañein mábugaü le jun láu guánarü nújabu lúma nilétüran. Ítara lúba jasúbudiruni luágu áu lan oúnajabarun gárada to. ¹⁸ Binílaün Wabúreme Jesucrístu sun jugúya. Ítaralá.

FURÚMIÑETU LIGÁRADAN PÁBLO LUN TIMOTÉO

Labürüjan Páblo lun Timotéo

¹ Áu Páblo, láni Jesucrístu apóstolu áu, nouñajoún láu lugúmadin Búngiu le Wasálbaragüle lúma Wabúreme Jesucrístu, le uágubei weménigida lun webélurun siélun. ² Nabürüjañoun gárada to bun, Timotéo, niraú le tímatimaati lídan wafñien luágu Jesucrístu. Resíbibeí abíniruni, gudémejabu lúma darángilaú lúmagiñe Wáguchi Búngiu lúma lúmagiñe Jesucrístu le Wabúreme.

Ewéridijani lueí arúfudajani le maríchabei

³ Queí meja nayúmuragun bun dán meja le nídinbei Macedónia, reídeimemebá ubúrugu Éfeso lun baríñagun joun itaga gürígia lun marúfudajan jamá cátei le maríchabei, ⁴ meténi jagfame lún buri úraga le magúmuchaditi jawágu jenébaanfaangu binádu mútu. Cátei buri le, barürügüti sigénei le málati, ani míderagun lumútiña gürígia lun jesériwiduni Búngiu láu jafiñerun luágu.

⁵ Le lúnbei barúfudajani joun afiñetiña jagía, lun jínsiñegua jamá jámagua lugúndun jarúmaaru tan janígi, míchujali jarítangun dúru jawágu, áni buídujali jafiñerun. ⁶ Añájein, adíreirutiña lueí buri cátei le, ába jíchaagun joúngua lídoun buri sigénei málati. ⁷ Buséntiña buri lun arúfudajatiña jamá lídan lúrudu le líchugubei Búngiu lun Moisés, úati gunfaráanda jamáni ni le guánarügü jariñagubei ni le jarúfudajabei luágu lúrudu ligía láu sarágu afiñeni.

⁸ Subúdi wamúti luágu buídu lan lúrudu, yúsuwarúgaali ligía quei lubúdubu. ⁹ Lúnti lasúbudirúniwa luágu máma lan joun ja adügübalin le buídubei ladügüwa lúrudu, lúrudu joúnti ja wuríbabaña, ja magáambadibaña, ja mebéresenbaña láu Búngiu, ja gaffigounbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña, ¹⁰ joun ja agámaridubaña mamárieidunga o ja agámaridubaña wügüriña jáledigu, joun ja íwerujabaña gürígia, joun ja yéebaña, jáma ja áfiñurubaña luágu iyéeni. Joúnti giñe sun ja adügübaña ámu cátei múaradunti láu arúfudajani jarúmati. ¹¹ Arúfudajani jarúmati le, úrati láu ugánu buíti luáguti asálbaruni le loúnajabadina Búngiu, le weírígubei, le fuleísei láalibeí gürígia, apürichija.

Eteñgiruni luágu lugúdemejabu Búngiu

¹² Teínqui numúti Wabúreme Jesucrístu, le íchugubei ubáfu nun lun wadágimanu le, luágu lanügünina queísi ában wügüri derégúdaguati, lúma luágu líchugunina lun nesériwidun lun. ¹³ Adüga láali sun cátei lé buri nun láu sún meja anábagua náni, eíbaaja numútiña meja ja afálarubalin, adüga numúti meja sun le nuáraati lun nagúmuchaguagüdüni jafiñen. Ába gudéme nan lun Búngiu lugúndun mámagidina meja afiñeti luágu Jesucrístu áni ibídiñeti meja nun ca lan nadügübei. ¹⁴ Ligía luweírinbei nasándiruni labínirunina Búngiu, úara lúma afiñeni lúma ínsiñejabuni le giñe wawágubei luágu lídaañadiwa lan ában lúma Jesucrístu.

¹⁵ Inárüni cátei le, le tímatimaati, áni lúnti jafiñerun súngubei luágu inárüni lan. luágu “liábin lan Jesucrístu ubouágun lun lasálbaruniña gaffigountiña”, áu furúmiñeti jádaangiñe. ¹⁶ Ligía nagúmededunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gaffigountiña.

Ítara líña niábin lun ábanbadina lan jémpulu joun ja lúnbaña jaffiñerun luágu, lun jabíjini ibágari magúmuchaditi. ¹⁷ ¡Ligía rúwama lubei uweiriguni lúma inébesei lun Búngiu le Warúeitebei lun sun dan, súnwandan, le mouwedadibei, siñá ligía laríjiniwa, le Búngiu le ábanrügüti, le sábiu! Ítaralá.

¹⁸ Timotéo, niraü, rúnumuti gumádi le bun lun bageíndaguni luwúribun Búngiu buídu, quei meja laríñaguni Búngiu jayúmulugugiñe wadújeñu lueígiñe Jesucristu bun, ragüñubei inárüni lánina asálbaruni, adúgeina le basúbudirubei luágu richá lan. ¹⁹ Añájein gürígia, féridi jamúti jafiñe ladúga madügün jamá gásu láu le jasúbudirubei luágu richá lan. ²⁰ Ítara líña lasúseredun lun Himenéó lúma Alejandro ja nederegerubaña lun Máfia lun jafúnrendeirun lun manábagun jamáni Búngiu.

2

Arúfudajani libügürü ayúmuraguni lun Búngiu

¹ Furúmiñeti cátei, amúriajatina lun ladügüniwa ayúmuraguni lun Búngiu jawágu sun gürígia. ² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágari darángilati, le derégewati lun Búngiu, le giñe inébewati lídan sun luwúyeri. ³ Buíti cátei le, gúndaati giñe Búngiu le Wasálbaragüle láu, ⁴ le busénbei lun jasálbarun sun gürígia, lun giñe jayábin lun jasúbudiruni inárüni lánina wasálbarun. ⁵ Ában rügüñein Búngiu, ában rügüñein giñe gayára ladímurejan waweígiñe ligíbugiñe Búngiu, wügüri le Jesucristubei. ⁶ Derégeguati Jesucristu lúngua lun loúnwen lun lafáyeiruni lebégi jasálbarun sun gürígia, ában lasúbudirawagüdün cátei le lídan lidáani. ⁷ Lun cátei le, loúnajana Búngiu lun narúfudajan joun ja mámabaña juríu libügürü inárüni le, lun gayára lan jafiñerun luágu Cristu queisi Jasálbaragüle. Áu, queisi ában affiñeti luágu Cristu, inárüni nariñagubei, mayéejatina.

⁸ Ligía nabúseerúnbei lun jayúmuragun wügüriña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmuragun lun Búngiu. ⁹ Manárimelá tuwéndegun jadáuragun würiña, lun máma lan láu amúriguni janárimeguti jaráanseragua jóungua, ni láu gólu, pérlas, o daüguaü séruburitu, ¹⁰ lun láu lan lubuídun igáburi jadáuragua jóungua quei lúnti lan jadügün würiña ja derégeguañabaña jóungua lun Búngiu. ¹¹ Lúnti maní jamá würiña dan le larúfudajoiñiwa joun, lúnti jerésibiruni arúfudajani ligía láu ában ünabuni. ¹² Májatina lun tarúfudajan würi lídan jadámurin affiñetiña, ni lun tagúmadiruni würi wügüri, lúnti teréderun maníñu. ¹³ Lugúndun Adán ladügübei Búngiu furúmiñe, lárigiñe, ladügoun Éva. ¹⁴ Máma giñe Adán leyédubei Máfia, würi ayeedúaboun, áni láu tayeedúniwa, ába táburujan lídoun figoú. ¹⁵ Láu sun líra, jasálbaruba würiña láu jagúnfulirun láu le lúnbei jagúnfuliruni queisi úguchuru, ánjein ítara méme jafiñerun luágu Cristu, arúfuda jagía ísiñejabuni lúma arúmani láu igáburi buíti.

3

Ligáburi ída lúba lan jóuserun fádiringu

¹ Inárüni cátei le. Ánjein abúseera ában gürígia lun fádiribeí lan, ában wadágimanu buíti labúseerúbei ladügün. ² Lun fádiribeí lan ában gürígia, lúnti labágaridun ában ibágari le míchuti lúgaaru lun ladeinjoúniwa lun. Lúnti túmari lan ábanrügü würi, lúnti giñe lanügün ában ibágari sériuti, buíti lichügü,

inébewa. Lúnti aráanseñu lan sun dan lun leresibirun bisída lúbiñe, lúnti buídu lan larúfudajan, ³ moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, dilí ligíame, manígi ligíame seínsu. ⁴ Lúnti gayára lániña tílana lúban agúmadira buídu, lun giñe ladügün lun gagáambadi jamá lirájüñü, inébejabu. ⁵ Lugündun ánjein magúmadirun lubáliña wügüri tílana lúban, ¿ída lubági gayára lan laríjin jáu tílana lilígilisin Búngiu? ⁶ Moún lumuti lubeíti fádiri lan ában iséri affíneruti luei lanáangun lúngua sarágu luágu lubára, ábame láburujan lábugiñoun íñarawaguni le gádaanbalin Máfia. ⁷ Lúnti buídu lan ligáburi, lúnti giñe inébe lan joun ja mafiñebaña luei ladímurejoún wuríba luágu, ábame láburujan tídoun lisádarán Máfia lun lagünrinchawagúniwa lubuídun líri.

Ligáburi ída lúba lan jóuserun ja esériwidubaña ligílisirugu

⁸ Ja giñe esériwidubaña ligílisirugu lúnti wügüriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsíñedun seínsu joun. ⁹ Lúnti járügüdüni inárüni lánina affíñeni le arúfuda lálalibe Búngiu woun, buídu, lun giñe jarúma tan janígi. ¹⁰ Lúnti jouchún, lárigiñeme, ánjein úa lubei mégeiti luágu lubuídun jagáburi, ligíaba gayára lan jesériwidun ligílisirugu. ¹¹ Würíña ja esériwidubaña ligílisirugu, lúnti giñe inébewa jamá, moún lumuti marásualugu jamá, lúnti sériu jamá, derégüda lídan sun cátei. ¹² Ában esériwiduti ligílisirugu, lúnti túmari lan ábanrügü würi, lúnti giñe lagúmadiruniña lirájüñü buídu jáu sun tílana lúban. ¹³ Lugündun esériwidutiña ligílisirugu ja adügübalin jawádigimari buídu, buídubei ladímurejoúniwa jawágu, áni ragútimaatiña anígi lun jadímurejan luágu jaffíñen luágu Jesucrístu.

¹⁴ Agúrabatina nídin aríjabu madíse, ¹⁵ nabürüjaní buri cátei le bun lun ánjana lan adárasaragua, lun subúdi bání ída líña lan lun louuserun gürígia jádan lufámilian Búngiu, to lilígilisinboun Búngiu le wínwanbei lun sun dan. Lilígilisin Búngiu ágüdajabalin linárün, toúnigitei inárüni ligía buídu. ¹⁶ Siñáti lasgenerúniwa luágu weírugu lan Wasálbaragüle Jesucrístu, le subúdigüda lálalibe woun.

Arúfudaguati Búngiu lúngua queísi gürígia lídan Jesucrístu, arúfudalei Sífiri Sándu luágu úaragua lan Jesucrístu.

Aríja jamei ánjeligu.

Apúrichijouáti luágu joun lílana sun fulásu,

affíñewa luágu lídan sun fulásu,

resíbiwa ligía siélu.

4

Ja lúnbaña jígiruni jaffíñen

¹ Furáanguti laríñaguni Sífiri Sándu luágu lídoun lánme lagúmujoún dan, añájeinbaña lan gürígia ígiruti jaffíñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu. ² Jagáambajaba arúfudajani jámagiñe gürígia biángua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu sítu. ³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eíginí moún lumuti leigin, láu sun ladüga lan Búngiu eíginí buri ligía lun jeígini ja affíñebaña jáma ja subúdibalin inárüni, láu ateingiruni lun Búngiu luágu. ⁴ Sun cátei le ladügübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adüga lálalibe, teínqui wameíme luágu. ⁵ Lugündun

láu wamúriajan lúma Búngiu lun labíniruni sun weígin, ñúbinti lun labuídurun láu lerérun, lúma láu wayúmuragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágúdajouba buwáni láu buri dimúrei le lánina wafíñen, lúma arúfudajani buíti le falábaalíbei. ⁷ Meféridirabei bidáani asígeneja luágu buri libídiegun úraga le ni cáitati ligíbugiñe Búngiu, lubáragiñe líra, áfaaguabá lun bagúnfulirun lúma Búngiu. ⁸ Láu sun ju lan lánjingichún úgubu, jútimaati bánjingichagun búngua lídan bagúnfulirun lúma Búngiu, lugúndun barúti cátei buíti woun lídan íbágarí le lúma lídan íbágarí le lúnbei wabjini. ⁹ Inárüni cátei le, áni lúnti jafíñerun súngubei luágu. ¹⁰ Ligía lébubei wawádigimaridun, súfuri wagía anabúni, lugúndun rúwamaali lan weménigi luágu Búngiu le wíwanbei, le aráansejaalíbei asálbaruni joun sun gürígia, áni ja afíñebaña luágu, jerésibirubei asálbaruni ligía.

¹¹ Ligía buri cátei lúnbei barúfudajani lun jagúnfulirun gürígia láu. ¹² Sériulá bigáburi lun manügüniwa ban quei ni cáta lueígiñe ñúraügídi bu lan, lubáragiñe líra, lúnti ában ban jémpulu buíti joun ja afíñebaña, lídan ligáburi badímurejan lúma bouserun, lídan ínsiñejabuni, lídan bafíñen luágu Búngiu, lúma lídan larúma bíbágarí. ¹³ Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachülürün. ¹⁴ Yúsubeí ubáfu le íchugubei Búngiu bun dán meja le jíchugunbalin tábutigu ligíli jájabu bábulugu, adímurejeina jagía dimúrei lúmagiñe Búngiu bun.

¹⁵ Deréguabá búngua lún buri cátei le, lun gayára lan larijiniwa bawáanserun lídan cátei láni Búngiu. ¹⁶ Goúnigiguabá búngua, lúma láu le barúfudajabei, ítaramemebá derégúdagu lídan sun cátei. Ánjein badüga ítara, basálbaruba, sálba jagíame gíñe ja agáambubalibu.

5

Ída lúba lan ligáburi louserun Timotéo jáma afíñetiña

¹ Madeínjabá lun ában weíríei mútu, lubáragiñe líra, adímurejabá lun camá jamuga lun búguchi, ousera báñame wügüríña ñúbürigiña queísi bamúlenu. ² Oúsera báña weíyaaña würíña quei bouserunun búguchu, ousera báñame würíña irájüñü quei bítonu, láu lubuídun arítaguni.

³ Íderagua báña würíña ja jiláañabaña úmari, ja arijúabei luágu mégei jamá iderúni. ⁴ Ánjein garájüñü tubei ában würi to jiláali túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámilian lúma lun jáguyugüdüni ínsiñejabuni le jadúweirubei joun jagübürigu, lugúndun buíti cátei le, gúndaati gíñe Búngiu láu. ⁵ Würi to jiláali túmari, to eréderuboun tábugua le tímimaati, rútumuti teménigi luágu Búngiu, merédeti gíñe tayúmuragun lun Búngiu árie bu, wéyuagu. ⁶ Ánjounti to edéregeraguboun túngua lun ugúndani lánina ubou le, jiláñu tíña lun cátei lánina Búngiu cáta sun wíwanjiru lan. ⁷ Aríñagabei buri gíñe cátei le joun, úa lámuga ni cáta lun ladeinjoun joun luágu. ⁸ Le marítaguntí jawágu lánigu, játima lidújeñu, magúnfulinjali lúma lafíñen, wuríbatimátatí sügü láu ában gürígia le mafíñeti.

⁹ Lun labürüdüniwa tíri würi to jiláalíbei túmari tídan gárada lánina íderawagüni, to rügüboun níjeinjali lúmagiñe ürüwa-wein irúmu táu, lun gíñe

ábanrügügli lán meja túmari. ¹⁰ Lúnti tasúbudirúniwa luágu buíti le tadügübei quei buri jamúga ánjein meja agúriaja tubáliña tirájüñü buídu, ánjein buídu lubei touserun jáma ja achülürübaña túbiñe, ánjein seriwi tubáliña idújeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adüga tubei furúmieguarügü ámu cátei buíti.

¹¹ Wúriña ja jiláaña úmari ja ñübürigiña, mabürüdabeí jiri tídan gárada, lugúndun lachülürüba dan lúnya jabúseerun jámari. Ábamei jígiruni jesériwidun lun Búngiu ligíliserugu lúnya jamárieidun. ¹² Ábamei jadímurejan gürígia jawágu ladüga jadúraaguni jadáradun lúma Búngiu le lánina jesériwidun lúnrügü súnwandan. ¹³ Ába jayábin lun jamágualigudun, mámarügü jamágualigudun, ába giñe marásualugu jamá, eméteja lídoun sun cátei, adímureja cátei le moún lumuti. ¹⁴ Ligia nabúseerúnbei lun jamárieidunya ja ñübürigiñabaña, lun garájüñü jamá, lun jounígirunun jában, lun míchugun jamá lúgaaru joun ja mafiñebaña lun jadímurejan wuríba jawágu. ¹⁵ Añájein wúriña, ígira jamáli Búngiu, ába jafálaruni Máfia.

¹⁶ Ánjein añájein jabeí wúriña ja jiláalibei jámari jádan lufámilian ában afiñeti wúri o wügüri, lúnti líderaguniña, mígirun ligíame lun ában jamá ijürügu tun ligílisi, ítara lúba gayára lan jíderaguniña túlana ligílisi wúriña ja busénbaña jíderawagún.

¹⁷ Fádirigu ja lábugiñeñounboun jaríaajan ligílisi, ja adügübalin jawádigimari buídu, lúnti inébewa jamá sarágu, játima gafisiutebalin apúrichijani lúma arúfudajani. ¹⁸ Tariñajare Lerérun Búngiu. “Magúragua jumei liyúma jilügün bágasu le lánina wadágimanu luei lásiñerun leigin lídaangiñe tubúñe fulúwaaru le uágubei ladügúragua lun lagídaruni túra.” Aríñagatu giñe. “Garíchatí ñadágimeinti lun libíjin lafáyeiruaja.”

¹⁹ Madügabá gásu luágu líchugún lidúnrun ában fádiri ánjein úa jabeí biáma o ürüwa lun jíchugun fe luágu lidúnrun. ²⁰ Ánjaña ja asígirubaña lídan figou, lúnti badeinjan joun jagíbugiñe sun afiñetiña lun janúfudedun súngubei luei jafígounjan. ²¹ Ayúmuraguatina bun ligíbugiñe Búngiu lúma Wabúreme Jesu-crístu, lúma jagíbugiñe ánjeligu ja lanúadirubaña, lun bagúnfulirun lúma buri gumádi le, lun ában lan láu janúgüniwa sun gürígia. ²² Míchigabádügabá gásu luágu líchugún lidúnrun ában fádiri ánjein úa jabeí biáma o ürüwa lun jíchugun fe luágu lidá ni ában queisi fádiri tídan ligílisi lídan loufudagun, lúnti batúriajani ligáburi buídu lueidügü gafígoun lan, larijwameti camá gúndaatibu láu lifígoun. Dísebá luei sun le wuríbabeí.

²³ Quei súnwandan lan gári lan burágeirugu, mátabá dúnarügü, gurába giñe murúsun diweín.

²⁴ Lídan le báluajaniña wügüriña lun jesériwiduni Búngiu ligíliserugu, jarítaguabá luágu añájein lan gürígia arijúati jafígoun furáangu lubáragiñe jagúserun, añájein giñe, marijinti jafígoun dari lárigiñe. ²⁵ Ítara méme líña giñe, cátei buíti le jadügübei gürígia, arijúati furáangu, áni íbini marijín lan, siñati leréderun arámudaga lun sun dan.

6

¹ Afiñetiña ja músubaña, lúnti weiri lan jinében jayúbudirigu joun, lun madímurejóun lan wuríba luágu líri Búngiu, ni luágu cátei le warúfudajabei.

² Ánjein añájein lubei esériwidutiña gayúbudiritiña afiñetiña, moún lumuti lougua lan jinében joun ladúgarügü jadújeñu jamá lueígiñe Crístu. Lubáragiñe

líra, lúnti jesériwiduniña buídutima, lugúndun ja erésibirubalin lubuídun jesériwidun, affiñetiña, idújeñu giñe jínsiñegutiña. Arúfudajabei cátei le, apúrichjabeíme.

Arúfudajani maríchatu lúma irísini inárüni

³ Ánjein arúfudaja ában gürigia cátei maríchatu áni múaraanti lúma larúma arúfudajani le lání Wabúreme Jesucrístu le íderagubaliwa agúnfulira lúma Búngiu, ⁴ ában barúgua túngua gürigia ligía, le ibídiñeti ni cáta lun. Ganígiti lasígenejan luágu buri dimúrei, lídaangiñeti asígenejani le liábin buri gimúgaü, gáñiguau, anábajani, maffiñeni joun gürigia, ⁵ lúma buri wuríbu magúmuchaditi. Jíbiri gürigia ja, wuríbati jasáminan, ibídiñejabutiña lun inárüni, jarítaguatiña luágu lébuna lan lagáñeirun irísini agúnfuliruni lúma Búngiu. Disebá jawei gürigia ja ítarabaña. ⁶ Inárüni luágu ában lan oúnwenbun irísini agúnfuliruni lúma Búngiu lun le gufúrumabei láu le lúmabei. ⁷ Manügúntiwa ni cáta wámagua ñájoun ubouágun, siñábei giñe wanügün ni cáta yágiñe, ⁸ ánjein geigin wabei, ganáangun, lúnti gufúruma wamá láu líra. ⁹ Ánjaña ja busénbaña jarísidun, mawándun jamúti ouchwagúni, ába jáburujan tídoun lisádaraana sarágu lagúbüri ayúmajani le málati, le ásiñeragüdübei gürigia jebélurun siélun, ába jóudin máfiougatin. ¹⁰ Línsiñegu seínsu ligía lílagülebei sun luwúyeri wuríbani, áni añájein sarágu gürigia ladüga jóuchun jabíjin seínsu, ába jígiruni jafíñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le lání affiñeni

¹¹ Ánjabuti amürü, Timotéo, queísi ában ban wügüri derégeñuti lun Búngiu, anúrjabá luei buri cátei le. Barüba ában ibágari le lánina ísuruni, le lánina gúnfuli lúma Búngiu, le lánina affiñeni, le lánina insiñeni, le lánina gagúraasuni lúma areíduni. ¹² Áfaaguabá buídu luágu lání waffiñen fuleisei, ábame bagáñeiruni ibágari le magúmuchaditi, lun líra lagúara Búngiu bun dán meja le barúfudunbalin jagíbugiñe sarágu gürigia luágu aráanseñu bíña lan lun bafálaruni Crístu. ¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja giñe geféenbei luágu le inárünibei ligíbugiñe Piláto, ¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoúa bun, darí liábin Wabúreme Jesucrístu. ¹⁵ Dánme lachülürün dan ligía, le lanúadajabei Búngiu, lagribuduba Crístu ubouágun, Búngiu rügüñein weírigu, Súnti Gabáfu, Jarúeite urúeigu, Jabúreme abúremeinigu. ¹⁶ Ligía rügüñein mouwedadi, le abágaridubei lídan larúgounga le ñíjin lubei mayárafadun lan ni ában. Maríjin lagíli ni ában gürigia Búngiu, siñáti giñe larijñiwa. ¡Rúalá uweíriguni lun, arúfudualá lubáfu lun sun dan! Ítaralá.

¹⁷ Ja gámabaña irísini lánina ubou le, aríñagabá joun lun manáangun jamá jóungua luágu, míchugun jameíme jeménigi luágu irísini ligía, lugúndun machourunti, lun jíchuguni jeménigi luágu Búngiu, le wínwanbei, áni rúlei sun cátei woun gíbe lun wagúndaarun luágu. ¹⁸ Ariñagabá joun lun jadügüni le buídubei, lun buídu lan jóuserun le tímatimaati, lun aráanseñu jamá lun jíchuguni lúma lun jafánreinruni le jámabei. ¹⁹ Ítara lúba jóundaragun irísini jóungua siélu le adúrarubei lun sun dan, ítara lúba jabíjini ibágari tímatimaati le magúmuchaditi.

Lagúmujóun dimúrei lun Timotéo tídan gárada to

²⁰ Timotéo, touñigibeí le íchugúbei lábugiñe baríaaan. Magáambabá dimúrei buri le lánina lisúbudin ubou, ni sigénei le lánina cátei le gíridügübei subúdi, ²¹ añájein jádaangiñe ja afálarubalin luwúyeri subúdi le, ígira jamáali jaffñen. Bini lábu Búngiu. Ítaralá.

TIBÍAMAN LIGÁRADAN PÁBLO LUN TIMOTÉO

Labürüjan Páblo lun Timotéo

¹ Áu Páblo, láni Jesucrístu apóstolu áu, loúnajañadina Búngiu láu lugúndan lun gayáraabei lan nídin aríñagei ugánu buíti joun gürígia luágu ibágari le líchugubei joun ja lídaanbaña ában lúma Jesucrístu. ² Nabürüjañoun gárada to bun, Timotéo le nanügúbei queisi niraü le jinsiñebei nun, resibibá abíniruni, gudémejabu, lúma darángiláü lúmagiñe Wáguchi Búngiu, lúma lúmagiñe Wabüreme Jesucrístu.

Adímurejani luágu Crístu

³ Dan le nayúmuragun lun Búngiu buágu ságü nayúmuragun áriebu lúma wéyuagu, teínqui numúti Búngiu le únbei nesériwida láu tarúma nanígi quei jadügüni binádu nagübürigu. ⁴ Súnwandan narítangun luágu bayájun dán meja le nígirunibu, buséntina jamúga naríjinibu lun nabuínchun láu ugúndani. ⁵ Jarítaguatina luágu afíñeni inárúnti le buágubei, Lóida to bagütü, túma Euníce to búguchu, jagía meja gawágubalin afíñeni le furúmiñe, áni choúru numúti luágu níjein lan gíñe buágu.

⁶ Ligía naríñangunbei bun lun bayúsuruni méme ubáfu le líchugubei Búngiu bun dán meja le níchugunbalin nújabu bábulugu. ⁷ Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadügüni furúmiegurügü cátei, ínsiñeni, lúma ubáfu lun wasáminarun buídu líchugubei woun. ⁸ Mabúsigaribá lubeiti lun bapúrichijani le larúfudajabei Crístu, mabúsigaribá gíñe náu, áu le adaürübei lueígiñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawánduni. ⁹ Sálba lumútiwa Búngiu, wa ligía woun lun wanügün ában ibágari le derégewati lun, máma jamúga lueígiñe níjein lan cátei buíti wadüga, ladüga ítara líña lan laráanseruni lubáragiñe ladügüni ubou lun larúfuduni lareídn lúma línsiñejabun woun lídaangiñe Jesucrístu. ¹⁰ Guetó larúfudei ínsiñeni le láu loúnajani Jesucrístu le Wasálbaragüle lun lagünrinchaguni lubáfu ouweni, ru ligía ubáfu woun lun wibíjini ibágari magúmuchaditi láu werésibiruni ugánu buíti luágu.

¹¹ Rúlumutina Búngiu lun napúrichijani ugánu le, oúnaja lána quei apóstolu lun narúfudajan joun ja mámabaña juríu. ¹² Ligía nasúfurirunbalin sun cátei le. Láu sun líra, úati nibúsigari nan, lugúndun subúdiiti nun ca lan uágu níchigei naffíñen, áni choúru numúti luágu gabáfu lan lun loúnigiruni le líchugubei lágugiñe nariáajan daríme lachúlürün wéyu ligía lun lagíribudun Crístu ubouágün.

¹³ Mígirabei luwúyeri arúfudajani jarúmati le níchugubei bun, abágaridabá láu bafíñen luágu Crístu, arúfudeina ínsiñeni joun sùngubei ladüga lídaañadiwa ában lúma Jesucrístu. ¹⁴ Láu lubáfu Sífiri Sándu le wádaanbei, goúnigibeí arúfudajani le líchugubei Búngiu lábun bariáajan lun madarúniwa lan iyéeni lídoun.

¹⁵ Queísi basúbudiruni, ígira jamáadina sun affíñetiña Ásiana nábugua, níjein Figélo jádan, lúma Hermógenes. ¹⁶ Gudémejabulá Búngiu joun lufámilian Onesíforo, lugúndun barújeiti gurásu nun sarágu wéyuasuu, úati gíñe nibúsigari lan láu nadaürüña lan, ¹⁷ lubáragiñe líra, dan le líábinbei ubúrugú Róma, merédeti lálaujanina darí ladárirunina. ¹⁸ Darí lámugei lugúdemejabu Búngiu

lídaanme wéyu ligía le lagíribudagüle Wabúreme Crístu ubouágun. Subúsiiti gíñe bun buídu ída líña lan líderaguníwa ubúruğu Éfeso.

2

Ában lisúdaaran Jesucrístu buíti

¹ Ánjeinti amürü, niraü, resíbibá érei lídaangiñe abíniruni le wibíjibeí láu lídaañadiwa lan ában lúma Jesucrístu. ² Le cátei lánina wafíñen le agáamba báalibeí nariñagun jagíbugiñe sarágu geféentiña arúfudajabeí joun wügüríña ja afíñewati jawágu, ja gayáarati jarúfudajani joun ámu.

³ Awándabeí lubeiti sáfuri quei ában lisúdaaran Jesucrístu buíti. ⁴ Úati súdeara le esériwiduti ádaraguti lúngua lídoun ámu cátei lueí le lánina súdeara, lugúndun gásu leréderun dayáruğu lábugiñe lerénjan lugúmandan. ⁵ Ítara líña gíñe, ában gürígia le ádaraguti lúngua lídoun juráraü, siñábei lagáñeirun ánjein máfaagun quei lubúdubu. ⁶ Le ábunagubei, garíchatí lun ligía lan furúmiñe íbijeí lufánran lídaangiñe alúbajani. ⁷ Samínabá luágu ürúwa jémpulu le, ábame gunfaráandagüda láni Wabúreme súngebueí bun.

⁸ Jarítaguabá luágu Jesucrístu. ligía ában gürígia wáledi, jádan linébaanfaangu urúeí David, áni sarágüda lumúti Búngiu lídaangiñe ouweni. ⁹ Niján ugánu le lánina asálbaruni le napúrichijabeí, áni lueígiñe napúrichijani, awándatina asúfuriruni darí lun nagürawagún láu güríngüri camá ában gürígia wuríbati áu. Siñáti leréderúniwa labúruchagun láni Búngiu ugánu, ¹⁰ ligía nawándunbalin sun cátei, luágu jáni ja anúadaja láñabaña Búngiu fuleísei, lun gíñe jayábin lun jabíjini asálbaruni lúma uweírighuni magúmuchaditi siélu ladüga lídan jamá ában lúma Jesucrístu.

¹¹ Inárüni cátei le.

Ánjein jláadiwa lubeí lúma Crístu, wabágariduba gíñe lúma,

¹² ánjawa awánda sáfuri lueígiñe, gafánraanbadiwa lídan larúeijan.

¹³ Ánjawa múaran, ligía úaramemebei, lugúndun ítara líña ligáburí Búngiu.

Ában ñadágimeinti buíti

¹⁴ Jarítaguagüdbeí cátei le joun ja afíñebaña, áni aríñagabá joun ligíbugiñe Wabúreme lun masígenejan jamá luágu buri cátei luáguti dimúrei. Mabuidun buríti sigénei le lun ní cáta, añáwurijarügü lumútiña ja agáambajabaña. ¹⁵ Jouchabeí sun bubáfu lun barúfudagun búngua ligíbugiñe Búngiu queísi ában ñadágimeinti buíti, le úati cába lan uágu labúsigarida, le ayúsurubalin ugánu lánina inárüni quei lubúdubu. ¹⁶ Dísebá lueí dimúrei buri málati le lánina ubou le, lugúndun ja adímurejabaña ítara, joudintimaaña lídoun wuribani, ¹⁷ ábame labúruchagun jarúfudajan quei cánser. Niján le susérebei lun Himenéu lúma Filéto, ¹⁸ ígira jamáali inárüni, jaríñaga luágu sügüjali lan lidáni ásaaruni lídaangiñe ouweni, jagünrinchaguñeiti jafíñen sarágu gürígia ítara. ¹⁹ Wagía afíñetiña, wagía liliğilisin Búngiu láu ébuu derégüdati le rúlaalíbei Búngiu, siñáti lánjingichúniwa. Bürúwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagubaña luágu lánigu jamá Crístu, lúnti jadísedun lueí wuribani.”

²⁰ Tídan ában múna weírítu, máma rügüñein umégeni gólu o pláta ñi, níjein gíñe le láuti fuláansu lúma láuti múa, níjein lúnti luweírín-ágei ayúsuruni, níjein lúnti furúmieguarügü yúsu. ²¹ Lun lúnti lan ában ayúsuruni weírighuti ában gürígia le derégeguati lúngua lun Búngiu, ju ligía lun, lúnti jarúma lan libágari,

díse ligía luei sun le wýebei, ítara lúba ju lan lun furúmieguaügü wadágimanu buíti.

²² Anúrajabá lubeíti luei jayúmajan wügüríña ñübürigiña, barüba ában ibágari le lánina Ísuruni, affíneni, ínsiñejabuni, lúma darángilaü, úara jáma sun ja agúarubalin Wabúreme Crístu táu anígi jarúmatu lun líderaguniña. ²³ Madügabá gásu láu sigénei málati, subúdi báali luágu barü lan líra wuríbu. ²⁴ Moún lumuti gádan lání wuríbu ában esériwiduti lun Crístu, lubáragiñe líra, lúnti buídu lan jáma sun gürígia. ²⁵ Lúnti ában lan arúfudajati buíti ligía, lúnti gagúraasun lan jáma ja múaradúntiña lúma, lúnti larúfuduni joun táu anígi únabugutu luágu marícha jamá, ladüga gayára lan lasáansiruni Búngiu ligáburi jasáminarun lun gayáraabei lan jánjarun lun le inárünibeí. ²⁶ Gayáraati jadáriragun jóungua lun jeséfurun tídaangiñe sádara to gádaanbaliña lurúma Máfia lun ladügüni labúseerun jáu.

3

Ída jába lan gürígia lídoun búrime lagúmujoún wéyu

¹ Lúnti giñe basúbudiruni luágu liábin buríba lan wéyu jénreenguti lídounme lagúmujoún dan. ² Jóungua rügübei buri gürígia jabúseera buíti, jínsiñe seínsu joun, pánta jagía, barügua jóungua. Jadímurejaba wuríba luágu Búngiu, magáambun jabáña jagúbürigu, meteíngiradibaña, minébeme cátei lánina Búngiu joun. ³ Mínsiñejabubaña joun jarájüñü, magúdemejabu, marásualugubaña, siñábei jarügüdagun jóungua, janárimebaña, láganibaña sun le buídubei. ⁴ Jalúgurubaña jamádagu, jadügüba buri cátei mabuídunti mebéresenga jagía cába lan asúsereda lárigiñe, janárimebeí janáangun jóungua, jáluajabei jagúndan guánarügü lubáragiñe jamúga jáluajani Búngiu. ⁵ Jafámuruba camá gúnfulitiña lúma Búngiu áni larijüba luágu iyéeni lan láu ligáburi jabágaridun.

Meméterabá jámoun jíbe gürígia ja. ⁶ Jádun buri gürígia ja, añájein já buri ebélurubaña jábiñoun mútu ayéedaña würiña ja débilitiña, já buri buínbaña láu figou lúma láu sun luwýeri ayúmajani. ⁷ Ába jafálaruniña yéetiña jagía lun jafúnrendeirun iséri cátei, siñáti jayábin lun gunfaráanda jamáni inárüni. ⁸ Ítara quei jawügüríjoun Jánes lúma Jámbres, ja gabíñarajadibaña, lun Moisés, ítara líña giñe jawügüríjoun wügüríña ja lun inárüni. Wügüríña buri ja, wuríbati jasáminan, garábaguaaña luágun wafínen. ⁹ Mawáanserunbaña sarágu, ladüga geféenbei sun ubou luágu ibídiougua lan jáu, quei lasúseredun joun bián jagúra ja awügüríjoúbaña lun Moisés.

Lagúmujoún dimúrei lúmagiñe Páblo lun Timotéo tídan gárada to

¹⁰ Ánjein amürü, falábaali narúfudajan buídu lúma ligáburi nagáburidun. ¹¹ Subúdi báali narítangun lúma nafínen, aríja báali nugúraasun lúma nísíñejabu, lúma ída líña lan nawánduni eíbaajoúni lúma súfuri lúma líbiri lénreengun le nasúfurirubei lídan buri fulásu quei buri ubúru Antioquí, Icónio lúma Lístra. Subúsiti giñe bun ída líña lan leséfurunina Wabúreme Búngiu lídaangiñé buri sun cátei le. ¹² Inárüni luágu jeíbaajoúba lan sun ja busénbaña jabágaridun derégeguañu jóungua lun Jesucrístu. ¹³ Ánjaña ja wuríbabaña jáma ja gayéejadibaña, jaríbadatimaaba, ítara mémejaba ayééja lúma ayeedúa.

¹⁴ Ánjein amürü, ítaramemebá derégüdagu lídan le bafúnrendeirubei, le uágubei affíneedíbu lan. Subúdi bumúti luágu inárüni lan le bafúnrendeirubei ladüga

gayára lan bafñerun jawágu ja arúfudajabalin bun. ¹⁵ Subúdi bumúti Lerérun Búngiu lúmagiñe ñúraügidibu. Tídan Lerérun Búngiu, ladárirúa sun lichú áu le busénwabei lun gayára lan jasálbarun güriña, láu jafñerun luágu Jesucrístu. ¹⁶ Sun le bürüwañubei tídan Lerérun Búngiu, Búngiu guánarügü íchugubalin jaritagunrugun wügüriña lun jabürüdüni. Jútu líburu tugúya lun tarúfuduni le inárñubei lúma giñe lun tarúfuduni le marichabei, adüगतु lun jígiruni güriña cátei le mabuídunbei luágu le buídubei, arúfudajatu joun güriña lun jabágaridun surúñu. ¹⁷ Líburu tugúya, jemégenboun güriña ja esériwidubaña lun Búngiu lun jadügüni sun luwúyeri wadágimanu le lúnbei jadügüni lun.

4

¹ Ligíbugiñe Búngiu lúma Wabúreme Jesucrístu, le lúnbei liábin quei urúei agúseragüdaña wínwangiña jáma jiláguaaña, nariñaguña bun lun bapúrichijani Lerérun Búngiu, ² aráanseñubá lun bapúrichijani, busén jagía güriña jagáambuni, mabúseerun. Afñegüda báña, adeínjabá, eréra amürüme, arúfudajabá joun láu gurásu. ³ Lugúndun lachülürüba dan dánme le mawándun jamáni güriña arúfudajani jarúmati, lubáragiñeme líra, jáluajabei arúfudajani le gúnfulibe lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerúbei jagáambun joun. ⁴ Íchugubei janágan luágun inárñuni, ábame jadügün gásu láu sun luwúyeri úraga. ⁵ Ánjein amürü, buídulá bisáminan súnwandan, awándabei asúfuriruni, rúguabá búngua lun bapúrichijani ugánu le lánina asálbaruni, gúnfulibá buídu láu buwadígimari.

⁶ Áu, sandíguatina núngua luágu nadügüñein lan lagúmujoún le nuáraati lun Búngiu, yaráfaali lórate nouñwen. ⁷ Ageíndagua náali luwúribun Crístu buídu, eíbaguaadina chülü lúmoun lébeja, adüga náali sun le rúlaalíbe Búngiu nun lun nadügüni, areída náali arúfudajani le lánina wafñen jarúmañu. ⁸ Guetó, lagúrubañadina nafáyeiruaja le lebégi ában ibágarí le lánina ísuruni, afáyeiruajaü le lúnbei lichuguni Nabúreme nun, le agúseragüdüti le úraguabei, lídaanme wéyu ligía. Áni mámarügüba nun líchigei afáyeiruajaü ligía, líchugubei giñe joun sun ja agúrabajabaalin liábin láu ínsiñejabuni lun.

⁹ Jouchabá biábin aríjana furése. ¹⁰ Ígira láadina Démas, jínsiñetimaati cátei le lánina ubou le lun, ñüdünjati ubúrugin Tesalónica. Ñüdünja Crescénate loubwagun Galácia, ñüdün Títo loubwagun Dalmácia. ¹¹ Lúcas rügüñein núma ya. Áluajabei Márcos, banügeime búmagua, gayáraabei líderagunina lídan wadágimanu. ¹² Oúnaja nan Tíquico ubúrugin Éfeso. ¹³ Dánme biábin, banügonme cápa to nígiruboun lúbiñe Cárpo yágüta Tróas nun, barúbounme giñe buri líburu, nigáradan burítima. ¹⁴ Adügaali Alejandro, le ñadágimeinbei gürábu, sarágu wuríbani nun, lafáyeirubei Búngiu quei ligáburi cátei le ladügübei. ¹⁵ Touñiguabá búngua lueí, lugúndun garábaguaali luágun ugánu le wapúrichijabei.

¹⁶ Dan le furúmiñeti nadímurejan nueígiñegua ligíbugiñe lúrudu, úati ni ában íderagutina, ígira jamútina sùngubei. Agúrabatina lun mabájüdüñ láni Búngiu cátei le joun. ¹⁷ Láu sun líra, íderagua lumútina Wabúreme Jesucrístu, ába líchugun érei nun, ítara líña lubeíti gayára lan napúrichijani ugánu le lánina asálbaruni, agáambagüdanéi joun sun güriña ja mámabaña juríu. Ítara líña leséfurunina Nabúreme lueí yebe ouweni, ¹⁸ áni leséfurubadina lueí sun

wurɪbani, areída láname lubá larúeijan siélu. ¡Rúalá uweíríguni lun súnwandan! Ítaralá.

Lagúmujoín buri mábugaü lúma abíniruni

¹⁹ Mábugaü tun Prisca lúma lun Aquila lúma joun lufámilian Onesíforo.
²⁰ Reídeija Erásto ubúrugu Corínto, ígira numúti Trófimo láu sándi Miléto.
²¹ Joúchabá biábin lubáragiñe laríbougadun. Mábuga líña Eubúlo bun, Pudénte, Líno, Cláudia jáma sun wadújeñu lueígiñe Jesucrístu. ²² Búma lámuga Wabúreme Jesucrístu, biní laúnme Búngiu sun jugúya ja alíjibarun gárada to. Ítaralá.

LIGÁRADAN PÁBLO LUN TÍTO

Labürüjan Páblo lun Títo

¹ Áu Páblo, le abürüjabarun gárada to, ában esériwiduti lun Búngiu áu, ában giñe láni Jesucrístu apóstolu. Oúnaja lumútina lúntima níchugun dügüdaguau lun jafiñen ja anúadaja láñabaña Búngiu quei lánigu, lun giñe gayáraabei lan jasúbudiruni inárüni lánina wafiñen, gayára lámuga jabágaridun ában ibágari derégewati lun. ² Ítara lúba gayára lan jeménigidun lun jabágariduba lan súnwandan lúma Búngiu. Búngiu, le mayééjanbei, aríñaga lumúti luágu líchugubei lan ibágari magúmchaditi le woun lúmagiñe lubáragiñe ladügüni ubou. ³ Guetóti, queisi chülüjali lan dan, subúdigüda láali ugánu lánina asálbaruni woun, ábati louñajanina Búngiu le Wasálbaragüle, lun napúrichijani ugánu ligía. ⁴ Nabürüjañoun gárada to bun, Títo, le nanügübei queisi niraü le tímátimaati, lídan ában wafiñerun luágu Crístu. Ayúmajatina lun bibíjin abíniruni lúma darángilau lúmagiñe Wáguchi Búngiu, lúma lúmagiñe Wabúreme Jesucrístu le Wasálbaragüle.

Luwádigimari Títo luágu ubouju Créta

⁵ Léubei nígirunibu luágu ubouju le gíribei Créta, lun baráanseruni le mégeigilibe lun laráanserún, lúma lun bíchugun fádírigo lídan ságü fulásu queisi naríñaguni bun. ⁶ Ában fádiri lúnti labágaridun buídu, úa lámuga ni cáta uáguti lererúa lun. Lúnti ábanrügü tan lúmari, lúnti affiñe jamá lirájüñü luágu Crístu, gagáambadi, lun giñe buídu lan jouserun lirájüñü luei gayára lan líchugúniwa jadúnrun. ⁷ Lábugiñeñein laríajaan fádiri luwádigimari Búngiu, ligía lúnti lubei labágaridun ában ibágari le úaraguati. Lúnti derégeguañu lan lúngua joun ámu, maríbanme lijéniute, mouñ lumuti gátadi lan, manígi ligíame wuríbu, mínsiñelá seínsu lun sarágu. ⁸ Lubáragiñe líra, lúnti aráanseñu lan súnwandan lun lerésibirun bisídatiña lúbiñe, lúnti ában lan wügüri le jínsiñejabuti lun le buídubei, lun buídu lan líchügü, buídume louseruniña sun gürígia, derégeguañu lúngua lun Búngiu, láu ubáfu lun lárügüdagun lúngua. ⁹ Lúnti lárügüdün luágu ugánu inárüni le uágubei gayára lan weménigidun, le arúfudajoubei lun, lun gayára lan líchugun dügüdaguau joun ámu láu arúfudajani le richábei, lun giñe lafiñeragüdüniña ja asigenerubalin.

¹⁰ Lugúndun añájein sarágu magáambaditiña, jádaantima jarásan juríu, ja arúfudajabaña libídiouniga áu, ayéeda jamáña gürígia. ¹¹ Lúnti ladaurúniwa jayúma ja, ladüga chagáguagüdatiña sarágu família láu jarúfudajani le mouñ lubei, lun jagáñeirun seínsu láu múarani.

¹² Aríñagati meja ában chu táu Crétana, le ní bubei guetó, jawágu lupáisanun. “Gürígia Crétana, súnwandan yé jama, machúlaaguntiña, jalíluatiña, magáli.”

¹³ Áni inárüni laráñagubei. Ligía lubeiti, badeínja joun jére, lun jouñin láu arúfudajani le richábei luágu wafiñen, ¹⁴ lun giñe mebéresen jamá láu buri úraga le jádagun juríu, ni láu le jaríñagubei gürígia, játima íchugubalin janágan luágun inárüni.

¹⁵ Queisi laríñawagúniwa, jarúmati sun cátei joun ja jarúmabaña anígi, ánjein joun gürígia ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyeti jasáminan, wíyeti giñe janígi.

¹⁶ Aríñagatiña luágu subúdi lan Búngiu joun, láu buri cátei le jadügübei,

arúfuda jamúti luágu ibídiñe lan Búngiu joun, lugúndun mínsiñejabutiña, magáambaditiña, mayáraatiña lun jadügüni le buídubei.

2

Arúfudajani inárüiti rúti ibágari buíti

¹ Ánjeinti amürü, Títo, lúnti barúfudajani luwúyeri igáburi le lúnbei jagáburiduni afiñetiña luágu Crístu, ában ibágari le úaraguabei lúma inárüni le lúmagiñebei Búngiu. ² Lúnti mátun jamá wügüriña weíyaaña mútu, inébewa jagíame, buídu jachügü, derégüdagu lídan jafiñen luágu Crístu, buin láu ínsiñejabuni lúma gurásu. ³ Würiña gíñe ja weíyaaña, lúnti gíñe buídu lan jóuserun queísi lánigu Búngiu, lúnti mamárasualugu jamá, mabácharuadun jagíame. Lúnti jíchugun jémpulu buíti láu jabágaridun lúma jerérun, ⁴ lun jarúfudajan joun würiña ñübürigiña jawei lun jínsiñe jamá jámari joun, jínsiñe jarájüñü joun, ⁵ lun buídu lan jachügü, jarúma jagía, aráanseja jagía jábiñe, areída jagía, gagaambadi jagíame lun jámari. Lúnti itara lan jabágari würiña, lun úa jamá ni ában adímurejatiña wuríba luágu ugánu le láni Búngiu luágu asálbaruni láu afiñeruni luágu Jesucrístu.

⁶ Arúfudajabá joun wügüriña irájüñü lun buídu lan jachügü, ⁷ rúba ában jémpulu buíti joun lídan sun cátei. Arúfudajabei lérügü inárünibeí joun láu ában igáburi derégüdati, ⁸ adímurejeina láu ában igáburi magádieta le uáguti lásiñera ladárirún mégeiti. Itara lúba janügüba báganiñu busíganu luágu luríban jóuserun áni siñábei jadímurejan wuríba buágu.

⁹ Ariñagabá joun esériwidutiña lun gagaambadi jamá joun jayúbudirigu lídan sun cátei, moúnabagun jamáñame, lun buídu lan jesériwidun joun, ¹⁰ lun míwerujan jamá, lun jarúma lan jagáburi le gumúti jáma jayúbudirigu lun larijiniwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹ Arúfudajabei cátei le, Títo, lugúndun arúfuda láali Búngiu lareídun woun, le ídaangiñebei gayára lan jasálbarun sun gürígia lídaangiñe luríban jagáburi. ¹² Arúfudaja láali Búngiu woun láu lareídun lun wígiruni wuríbani lúma ayúmajani lánina ubou, lun wabágaridun ában ibágari le buíti ligíbuagu ubou le, ragúguañu woúngua, derégeguañu woúngua lun Búngiu. ¹³ Niján luwúyeri igáburi le lúnbei wagáburidun lídan le wagúrabajaña lan lagúnfulirun lubuídun cátei le uágubei laríñaga Búngiu—lagiribudun Wabúngiute, Wasálbaragüle Jesucrístu ubouágun láu sun luweirigun. ¹⁴ Derégeguati lúngua lun lounwen wawágu, lun lasálbaruniwa lídaangiñe sun wuríbani lúma lun larúmadagüdüniwa le gumúti, lun láni wamá, aráanseñu lun wadügüni le buídubei.

¹⁵ Ligía buri cátei le lúnbei barúfudajani, íchigeina dügüdaguaü, arérejeina láu sun ubáfu. Míchigabá lúgaaru lun banügüniwa quei ni cáta.

3

Cátei lé buri lúnbei jadügüni afiñetiña

¹ Jarítaguagüda baña afiñetiña luágu Crístu, luágu lúnti lan jagúnfulirun jáma gumádimatiña lúma jáma ja oúnajabaliña, lun gagaambadi jamá joun, aráanseñu jagíame lun jadügün furúmieguaügü cátei buíti, ² lun madímurejan jamá wuríba luágu ni ában, lun dilí lan jóuserun, areída jagíame, lun ünabugu jamá lídan jóuserúniwa sun gürígia.

³ Lugúndun wagía affñetiña, ibídiouguati meja gíñe wáu, magáambadi wagía meja lun Búngiu, barútiwa meja ában ũma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adüga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun. ⁴ Ánjeinti dan le larúfudunbalin Búngiu Wasálbaragüle lareíni lúma línsiñejabu joun gürígia, ⁵ ába lasálbaruniwa, máma jamúga ladüga wadügün som cátei buíti, ladüga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágari woun lun gayáraabei lan wabágaridun queísi labúseerun. ⁶ Lugúndun rúlaali Búngiu Sífiri Sándu woun lídaangiñe Wasálbaragüle Jesucrístu, lun wámabei lan láu sun luweírin lubáfu. ⁷ Láu larícharaguagüdüniwa Búngiu ligíbugiñe láu lareíni, gayáraabei werésibiruni ibágari magúmuchaditi le wagúrabajabei lúmagiñe Búngiu sieílu. ⁸ Inárüni cátei le.

Buséntina lun barúfudajani buri cátei le láu ában éregu, lun ja lan affñebaña luágu Búngiu, lun súnwandan lan jíchaagun jóungua lun jadügüni cátei le buídubei. Buíti cátei le, áni buíti lanügün joun sun gürígia. ⁹ Dísebá lueí sigénei buri le málati, úraga buri jawáguti binádu mútu, fáreinguaü buri, lúma buri wuribu lueígiñe lilúrudun Moisés. Sún buri cátei líra, manügünti buíti lun ni ában.

¹⁰ Ánjein ñí lubei ában tílana ligílisi le adügübalin fáreinguaü, ererabá lun ában o bián weíyaasu, ánjein madügün gásu báu, ígirabeí lúngua. ¹¹ Subúdi báali luágu ígira láali lan wügüri ligía ũma le surúbei láu luwúyeri labágaridun.

¹² Dánme nouñajani Artémas o Tíquico lan lun lárügüdüni bubára ñi, buséntina bíabin aríjana Nicópolis lugúndun ñíba násügürei lidáni luríbouga. ¹³ Íderaguabeí Zénas, le subúdiwabúbei lun lúrudu, lúma Apólos lídan sun le buáraati, rubeíme le jemégeirubei joun lun jasígiruni jaweíyasun. ¹⁴ Furéndeí jamá gíñe sun wánigu lun jadügüni cátei le buídubei, ideja jagíame dan le mégeiwa lan, ju lámuga jabágari lídan Crístu.

Mábugaü

¹⁵ Mábuga jáña sun ja númabaña bun, mábuga wáña joun ja jínsiñejabúbaña woun queísi idújeñu lueígiñe Crístu. Binílaün Búngiu sun jugúya ja alíjabarun gárada to. Ítaralá.

LIGÁRADAN PÁBLO LUN FILEMÓN

Labürüjan Páblo lun Filemón

¹ Áu Páblo, le nadaürüñabei lueígiñe napúrichijan luágu Jesucrístu, nabürüjañoun gárada to, úara lúma Timotéo, le wadúje lueígiñe Crístu, bun, Filemón, le weíribei ínsiñe woun, le giñe woúba lídan wadágimanu. ² Gárada to, joúntu giñe tilana ligílisi ja oúndaragubaña búbiñe, queísi tun wadúje Ápia, lúma lun Arquípo, le wámabei lídan áfaaguni lídan luwádigimari Crístu. ³ Resíbi jumá abíniruni lúma darángilau lúmagiñe Wáguchi Búngiu lúma lúmagiñe Wabúreme Jesucrístu.

Línsiñejabu Filemón lúma lafiñen

⁴ Teínqui numúti Búngiu súnwandan lídan le narítapun buágu lídan nayúmuragun lun, ⁵ lugúndun agáambaadina luágu ínsiñejabuni lúma afiñeni le buágubei lun Jesúsú lúma joun sun ja lánigubaña Búngiu. ⁶ Amúriajatina lúma Búngiu lun ja lan afiñeñabaña luágu Crístu ladúga bafiñen, lun jayábin lun gunfaraánda jamáni sun abíniruni le wabjibeí lúmagiñe Jesucrístu, buídu. ⁷ Nidúje, oúnwenbun nugúndan lúma dügúdaguaü le nídaanbei luágu bínsiñejabu, lugúndun darángilajaru janígi ja afiñeabaña luágu Crístu, bugúndun.

Lamúriajan Páblo ában fuleísei lun idámuni Onésimo

⁸ Láu sun garícha nan queísi ában láni Crístu apóstolu lun nariñaguni le lúnbei badúgüni bun, ⁹ jimein numúti ayúmuraguarügü nan bun luágu ínsiñejabuni le wádaanguabei woúniwagua. Áu Páblo, weíyaadina, guetó nadaürüña lueígiñe napúrichijan luágu Jesucrístu. ¹⁰ Amúriajatina ában fuleísei búma lun Onésimo, le ítarajalíbei queísi niraü lídan Jesucrístu lárigiñe lerésibiruni Crístu láu nadímurejan lúma ya furísunrugu.

¹¹ Lídan meja dan le sügüjalíbei, ában meja idámuni moúnti Onésimo bun, ánjeinti guetó, gebégiti bun queísi nun. ¹² Noúnajañein bun lárigoún, resíbibeí lubeíti láu ugúndani lugúndun láu noúnajani bun, queígubeirügü jamúga noúnajañoun lan nanígi, le lueweírin línsiñe nun. ¹³ Gúndaatina jamúga lun leréderun núma ya, lún jamuga lesériwidun nun bewéñegua, sun anája lan adaürüwa lueígiñe napúrichijani ugánu le lánina asálbaruni. ¹⁴ Mabúseerúntina nadügün ni cáta magúndaga amürü láu, lun máma lan láuti afósuruni fuleísei le badúgübei nun láu jamúga bígiruni núma, lun láuti lan bugúndan guánarügü. ¹⁵ Fágua lanúurunbei Onésimo bueí luágu átiri dan lun búmabei lan guetó lun sun dan, ¹⁶ guetó mámarügü queísi ában idámuni, queísi cátei buitimaati lueí idámuni—queísi ában idúje jínsiñeguti. Weíríti línsiñe nun, lúnti jínsiñetima lan bun, mámarügü queísi wügüri, queísi giñe ában idújeí lueígiñe Crístu.

¹⁷ Ánjein lubeíti barü bubáalina queísi ában boúba lídan wesériwidun lun Crístu, resíbibeí queísigubeirügü jamúga áu lan berésibirubei. ¹⁸ Ánjein adúgaali lubeí dáñu bun, o ánjein dúwei lubálibu, agúburaja bána. ¹⁹ Áu Páblo, nabürüjañein murúsun cátei le láu nújabu lúma nilétüran. nafáyeirubei bun, láu sun, gayára lan jamúga narítaguagüdüni bu luágu dúweigua ban giñe búngua nun lugúndun áu lan asúbudiragüdübalin Wasálbaragüle bun. ²⁰ Ánja, nidúje,

adügabei fuleísei le nun queísi afíñeti luágu Crístu, ámalijaboún nanígi queísi idújei lueígiñe Crístu.

²¹ Nabürüjaña bun lugúndun choúru nan luágu bagáambadi, áni subúdití nun luágu badügüba lan sügü láu le uágubei namúriaja búma. ²² Aráansejabá gíñe ubáraü nubá, lugúndun agúrabatina luágu lídan lánme loúnabuni Búngiu jayúmuragun lun náfuridun furísunrugugiñe, lánjaruba lun nídin aríjaün.

Mábugaü lúma lagúmujoún abíniruni

²³ Mábuga líña Epáfras bun, le nouba furísunrugu lueígiñe lapúrichijan luágu Jesucrístu, ²⁴ mábuga líña gíñe Márcos bun, Aristárco, Démas, lúma Lúcas, ja ñadágimeinbaña úara núma.

²⁵ Binílaün Wabúreme Jesucrístu. Ítaralá.

GÁRADA JOUN JA ADÍMUREJABALIN HEBRÉO

Adímurejaali Búngiu lídaangiñe Liraü

¹ Lídan meja dan le sügüjalibei, adímurejati meja Búngiu joun binádu wagübürigu sarágu weíyaasu lúma lídan sarágu luwúyeri, jádaangiñe profétagu, ² guetó, lídoun buri lagúmujoún dan le, adímurejaali woun lídaangiñe Liraü. Lídaangiñe Liraü le, ladügei ubou, áni rúlaali sun cátei lun. ³ Arúfuda lumúti Liraü Búngiu luweírigun Lúguchi luougua, ligía méme Búngiubei, ligía ágúdajabalin sun cátei láu lerérun le gabáfubei. Lárigiñe lachíbuni wafígoun, ába lañúurun lueígiñe loúnwenren lála Búngiu, le Súnti Gabáfu, siélu.

Weíriguti Liraü Búngiu sügü jáu ánjeligu

⁴ Nñibinjali Liraü Búngiu lun weírigubei lan jaweí ánjeligu, resíbijali ában ubáraü íñugutimaati jaweí queísi lalágaante queísi Liraü Búngiu. ⁵ Maríñagunti Búngiu ní ában weíyaasu lun ní ában ánjeli.

Niraü amürü,
rúnaali ubáraü le bun ugúñe,
maríñagun ligía luágu ní ában ánjeli.

Áuba Búguchi,
amürüme nisáni.

⁶ Ánjeinti dán meja le loúnajaabalin Liraü le ábanrügüti ubouagun, aríñagati. Judúgua jamá sun náni ánjeligu lun.

⁷ Lariñaga jawágu ánjeligu.

Adúgatina lun ítara jamá náni ánjeligu camá garábali,
adúga áu lun ítara jamá camá wátu geméti,
oúnagüleigu jagía ja esériwidubadina.

⁸ Ánjeinti lun Liraü aríñagati Búngiu ítara.

Búngiu, lúntibei súnwandan bañúurun luágu bála lun barúeijan,
láu ában úaraguni bagúmadija.

⁹ Jínsiñeti le richáguabei bun, iyéreeguti le wuríbabei bun,
ligía níchugunbei, áu le Bubúngiute, gíbetima ugúndani bídoun sügü jáu bíbirigu.

¹⁰ Áriñagati gíñe.

Amürü le Abúremein, lídan lagúmeseseja, adúga bumúti ubou,
láu bújabu badügei siélu.

¹¹ Lagúmuchuba siélu lúma ubou, ánjein amürü, beréderuba lun sun dan.

Líabiba siélu lúma ubou lun laweíyadun quei anáanguni,

¹² babáruchagubaña quei ában daúguaü,
jasáansirúaba quei anáanguni.

Ánjein amürü, ában mémebadibu, magúmuchunbei bibágarí.

¹³ Maríñagunti Búngiu ní ában weíyaasu lun ní ában ánjeli.

Núrúba lueígiñe noúnwenren darí lun nagáñeiragüdüñibu jawágu báganiñu,
ru náñame bújaburugun.

¹⁴ Sun ánjeligu, espíritugu esériwidutiña lun Búngiu jagía, oúnajóutiña lun jideraguniña ja lúnbaña jerésibiruni asálbaruni lídaangiñe jafígoun.

2

Lúnti woúnigiruni wasálbarun

¹ Queí itara líña lubeí luweírigin Liraü Búngiu, lúnti lubeí weténiruntima lun ugánu le agáamba wamáalibeí luágu, lun madíreirun wamá lueí ūma. ² Chourúati lilúrudun Búngiu lé meja íchugúbei joun gürígia jádaangiñe ánjeligu lídan meja ámu dan, áni ja adúraagubalin, madügün jagía gásu láu, áburujati ligáñi Búngiu jawágun láu íríchaü. ³ Gúbuméti wafáyeija luágu wafígoun ánjein moúnigirun wamá oúnwenbun asálbaruni le resíbi wamáalibeí lúmagiñe Jesucrístu le Wasálbaragüle. Wabúreme Jesucrístu guánarügü adímurejabeí luágu asálbaruni le furúmiñe, lárigiñe, ja agáambubalin, ában jásügüragüdüni woun láu ában achoúruruni luágu inárüni lan. ⁴ Núrügüda láali gíñe Búngiu ugánu ligía woun láu buri seíni lúma sarágu buri miláguru lúma láu Sífiri Sándu le líchugubei woun láu amúñegueinarügü luwúyeri ubáfu queísi labúseeruni.

Jesucrístu queí libíriña

⁵ Míchugun lumúti Búngiu ubou líte le uágubei wadímureja lábun jagúmadijan ánjeligu, ⁶ lubáragiñe líra, laríñajare tídan Lerérun. Búngiu, ¿cáteiñeinsan wügüri lun barítaguba lan luágu? ¿Cáteiñein wügüri gouwedaditi badíjeridunbei láu? ⁷ Rúbumuti ünabu jaweí ánjeligu luágu murúsun dan, daüguagüda bumúti láu uweírigin lúma inébesei, ru amürü ubáfu lun luágu sun cátei le badügübei, ⁸ rúbumuti sun cátei lábugiñoun lagúmadijan. Dan lubeíti le líchuguni Búngiu sun cátei lábugiñoun lagúmadijan gürígia, mígirunti ní cáta lun mámbabei lan lábugiñe. Láu sun líra, aríja wamúti luágu mámagili lan sun cátei ñúdünti láu le lubeibeí wügüri. ⁹ Ánjeinti lídan Jesucrístu, aríja wamúti lagúnfulirun sun dimúrei le, ligía meja ában gürígia le líchugubei Búngiu ünabu jaweí ánjeligu luágu murúsun dan. Láu luweírín línsiñejabu Búngiu woun, ánjati lun loúnwen Crístu jawágu sun gürígia, áni guetóti, daügu líña láu uweíriginu luágu oúweni le lasúfurirubei.

¹⁰ Sun cátei níjein lun Búngiu, áni lídaangiñeti gíñe, áni busénti Búngiu lun gafánran jamá sun lirájüñü lídan luweírigin. Ligía lúnti lubeí buga lasúfurirun Liraü Búngiu, le Jesucrístu, queísi ában gürígia lun ligíaba lan ában asálbaragülei gumúti láu asúfuriruni. ¹¹ Ja edéregerúbaña jarúma lun Búngiu lúma Liraü le edéregerubaliña itara, sun jagía ában meme Úguchili—Búngiu. ¹² Ligía úa lubeí nibúsigari lan Liraü Búngiu lun lagúaruniña lamúlenu jáma lítunu dan le laríñagun lun Búngiu, queísi bürúwañu lan tidan Lerérun Búngiu.

Nadímurejaba buágu joun namúlenu jáma nítunu, nerémujaba luágu buweírigin lagánagua adámurini.

¹³ Aríñagati gíñe.

Neménigiduba luágu Búngiu.

Aríñagati gíñe.

Anája, jáma isáanigu ja líchugubaña Búngiu nun.

¹⁴ Ja jasáanigu ában familia, ában meme jítaü jagía, itara gíñe, wügüri meja gíñe garaüwarügüti Jesúsú, lun meja gayáraabei lan loúnwen, gayára lámuga lagünrinchaguni lubáfu Máfia le ídaangiñebeí liábin oúweni joun gürígia. ¹⁵ Ítara líña gidá lumuti Jesucrístu janúfude gürígia, já meja aganoubaña queí idámuni lun anúfudeí lueí oúweni. ¹⁶ Masáliragunti Crístu queísi ánjeli lun líderaguniña

ánjeligu, salíti queísi wügüri garaüwarügüti lun líderaguniña güriña líledi, ja linébaanfaangu Abrahám, ja lúnbaña jafiñerun luágu. ¹⁷ Lúnti líra, gásu meja ítara lúba lan queísi libíriña, lun liábinba lan lun ábanbei lan fádiri íñutimaati, le úraguati, láu gudémejabu joun güriña, lun giñe lachíbuni jaffigoun güriña láu ledéregagun lúngua luágu gurúwa. ¹⁸ Áni queíti sáfuri lan, áni ouchagualeí Máfia, guetó gayáraati giñe líderaguniwa lídan le wouchawagún.

Weírigutimaati Jesúsu luei Moisés

3

¹ Ítara líña lubeíti, nidújeñu derégeguatiña jóungua lun Búngiu, quei jádaangiñetún lan ja únbaña wájali lan Búngiu lun jaganouñ lúma siélu, téni jumá buídu lun Cristu le louñajabei Búngiu, le giñe fádiri íñutimaati le lánina afiñeni le wawágubei. ² Úraguati Jesúsu lúma Búngiu lídan sun wadágimanu le únbei lanúadirei, queísi meja giñe úragua lan Moisés lídan sun lesériwidun jádan lufámilian Búngiu. ³ Gadúnatimaati Jesúsu uweírighuni sǔgü láu Moisés ítara quei resíbitima lan le adügübei ában muna uweírighuni sǔgü táu muna to ladügüboun. ⁴ Sun muna adügarügü lumútu som güriña, áni Búngiu adügübalin sun cátei le níjeinbei. ⁵ Ítara líñáti, úraguati meja Moisés lídan lesériwidun jádan lufámilian Búngiu queísi ában esériwiduti lun Búngiu, wadágimanu lé meja ladügübei, ában liyáwa inárüni le lúnbei lasúbudiragüdüniwa lídan dan le lúnbei liábin. ⁶ Ánjeinti Cristu, úraguati queísi isáani jádan lufámilian Búngiu, áni jádaangiñetiwa famílija jagía ánjawa derégüdagu méme, ánjawa giñe afiñe dari lúmoun wouñwen, gúndaañu lídan eménigini le wawágubei.

Eméraaguni joun lumútuniña Búngiu

⁷ Ligía lubeíti, lúnti wagáambuni le lariñagubei Sífiri Sándu tídan Lerérun Búngiu.

Ánjein jagáamba le lariñagubei Búngiu uguñe,

⁸ medéreratí janígi queí meja tedérerun janígi

magáambaditiña ja ouchagubalin Búngiu lídan fulásu mageírawati.

⁹ Lídan bián-wein irúmu le jáubei ñi,

jouchagua jamútina binádu jagübürigu lídan fulásu ligía, líña Búngiu,

láu sun aríja jamáni buri cátei le nadügübei.

¹⁰ Ligía nagáñidunbei jáma güriña jagía,

ába naríñagun. “Súnwandan charárañu jamá tídan janígi,

májatiña jafálaruni úma le narúfudubei joun.” ¹¹ Ligía nagáñidunbei jáma,

ába nafíñurun luágu mebélubaña lan lídoun fulásu lé yebe aráanse náalibeí jabá lun jeméraagun ñi.

¹² Nidújeñu, toúnigi jumá lueí tedérerun janígi lun jadisedun lueí Búngiu le wínwanbei láu mafiñerun jumá luágu. ¹³ Lubarágiñe líra, rújuma gurásu júniwagua sǔgü wéyu, sun níjangua lan dan. Toúnigi jumá lueí leyéedagunñ figou, edéreragúdounme janígi, ¹⁴ lugúndun ánjawa ítara méme derégüdagu dari wouñwen lídan afiñeni le wawágubei lúmagiñe furúmiñeti, gafánraanbadiwa lúma Cristu.

¹⁵ Níjangua dimúrei le, le giñe wouñbei, wagía le wínwanbei lídoun buri dan le.

Ánjein jagáamba le lariñagubei Búngiu guetó,

medéreratá janígi quei jagüra ja magáambadibaña lun Búngiu.

¹⁶ ¿Cátañati agáambubalin lumálali Búngiu, lárigiñe, ába jagáñidagüdüni láu luriban jagáburi? Sun ja laságarubaña Moisés Ejiptogiñe. ¹⁷ ¿Cáti úma lagáñida Búngiu bián-wein irúmu? Jáma ja afigounjabaña, ja ouwegubaña lídan fulásu mageírawati, ába ligirúniwa jábu ñi. ¹⁸ ¿Cáti un láfiñura Búngiu luágu mebélubaña lan lídoun fulásu lé yebe aráanse lálalibe joun lun jeméraagun ñi? Joun ja adúraagubalin le lubeíbei. ¹⁹ Ítara líña lubeíti, gounigi jumá lun jafiñerun meme dari lúmoun joúnwen, lugúndun ladüga mafiñeni le jawágubei binádu wagübürigu, siñá lubeí meja jebélurun lídoun fulásu le aráanse lálalibe yebe Búngiu jabá.

4

¹ Guetó lubeíti njeingua béna júnren woun lun gayára lan webélurun lídoun eméraaguni le aráanse lálalibe Búngiu woun siélu, lúnti gounigi wamá, siñádügü liñeín lebélorun ában wádaangiñe, dánme lachülürün óra lun woúnwen.

² Lugúndun apúrichijoúali giñe ugánu luáguti asálbaruni woun queísigubeirügü joun binádu wagübürigu, mesériwinti lun ni cáta joun jagáambuni ugánu ligia lugúndun agáamba jamúti, mafiñerunga luágu. ³ Anjeinti wagía le afiñeelibe, wagíaba ebélura lídoun eméraaguni le, le uágubei laríñaga Búngiu.

Ligia nagáñidunbei jáma,

ába náfiñerun joun luágu mebélubaña lan lídoun fulásu le aráanse náalibe yebe jabá lun jeméraagun.

Ítara líña lerérun Búngiu jawágu binádu wagübürigu. Aráanserúati fulásu lánina eméraaguni joun lúmagiñe wéyu le lagúmuchi Búngiu ladügüni ubou, ⁴ queísi labürüdüniwa tidan Lerérun Búngiu luágu lisédün wéyu.

Ába leméraagun Búngiu lídaangiñe sun luwádigimari luágu lisédün wéyu.

⁵ Aríñawagúaya ligia tidan Lerérun tugúya itara.

Mebélubaña lídoun fulásu le aráanse náalibe yebe jabá lun jeméraagun.

⁶ Láu dimúrei buri le, subúdi wamúti luágu aráanserúañu lan fulásu lánina eméraaguni jabá gürigia, ja binádu wagübürigu, ja furúmiñebaña agáambe ugánu lánina asálbaruni, mebélutiña ladüga mafiñeni le jawágubei lun Búngiu.

⁷ Ligia laráanserunbei Búngiu ámu dan lun gayáraabei lan jebélurun iséri gürigia lídoun jeméraagun, lugúndun adímurejati Búngiu lídaangiñe lé meja laríñagubei David sarágu dan lárigiñe, tidan Lerérun Búngiu.

Ugúñe, láu jagáambuni le laríñagubei Búngiu,

medéreratá janígi lun.

⁸ Lun jamúga fulásu lan lé meja ñijn lubeí lanügaña Josué Israelítagu fulásubei lánina eméraaguni le uágubei ladímureja Búngiu, madímurejaanyati jamúga Búngiu sarágu irúmu lárigiñe jebélurun Israelítagu lídoun jageira luágu “ugúñe lan dan” lun jagáambuni Búngiu, gayára lámuga jebélurun lídoun jeméraagun.

⁹ Ítara líña lubeíti, njeingua ában eméraaguni le gumúti joun lánigu Búngiu, ¹⁰ lugúndun le ebéluruti eméraagua lúma Búngiu siélu, eméraaguti luei luwádigimari itara quei leméraagun meja Búngiu luei luwádigimari lárigiñe ladügüni ubou. ¹¹ Lúnti lubeíti wafiñerun le tímaitaati luágu Jesucristu lun gayára lan webélurun lídoun eméraaguni siélu, faládügü liñálin ában wádaangiñe jáni já meja mafiñerunbaña jémpulu, ábame leféridirun.

¹² Lugúndun mítaraantu Lerérun Búngiu queísi ában cátei le jilálalibe, lubáragiñe líra, gabáfuti lun lasáansiraguni wagáburi. Belútu tidoun wanígi

queísi ában efeín to biángua tamána, belú tugúya chülü túmoun wawáni lúma wáni espíritu. Furáangugüda tumúti sun warítagn lun lúma sun wayúmagan, arúfuda tugúya cátañañadiwa lan. ¹³ Úati ni ában gürígia le ladügübei Búngiu lun gayára lan larámudagn lueí laríjin Búngiu, furáanguti sun cátei lun, le únbei lúmaba lan wagúsera.

Jesúsu wafádirínebei le tímatimaati

¹⁴ Jesúsu le Liraü Búngiu, ligía wafádirínebei le tímatimaati, le belújalíbei siélun lun laráramun ligíbugíne Búngiu abúyeija luágu wafúleisein. Ligía lúnti lubei derégüdagu méme wamá lídan ligáburí wafíñen. ¹⁵ Gayáraati gudémejabu lan Jesucrístu le wafádirínebei woun luágu wadébilin, lugúndun ligía guánarügü súfuriti sun luwúyeri ouchawaguni quei wagía, mafígounjaanti. ¹⁶ Ligía lúnti lubei wayárafadun lun Búngiu le jínsínejabúbei woun, láu afíñeni, lun gudémejabu lan woun, nderagua láwame láu lareíni lídan wemégeirun.

5

¹ Según wagáburí, wagía juríu, ságü ában fádíri le íñutimáabei anúadajoúati wádaangiñe lun ligíaba lan wachügüdüna ligíbugíne Búngiu, lun gíñe líchuguni edéweejani lun Búngiu lueígiñe jóubadina gürígia, lúma adágaragüdüni luágu lífígoun lúma luágu jafígoun jíbirí gürígia. ² Quei débili lan fádíri guánarügü quei furúmieguarügü gürígia, gayáraati gudémejabu lan joun gaffígountiña jáma acháragadutiña, ³ áni ladüga lídébilin guánarügü queísi furúmieguarügü gürígia, gásu gíñe ladágaragüdüni luágu lífígoun guánarügü queígubeirügü luágu jafígoun jíbirí gürígia.

⁴ Síñáti ladáagun ában gürígia lúngua fádírime le íñutimaabei láu láni lúngua, Búngiu anúadirubalin, rúlei ubáraü le lun queísi meja lasúseredun lun Aarón lé meja furúmíñeti fádíri le íñutimaabei. ⁵ Ítara líña lasúseredun lúma Crístu, máma ligía íchaagubei lúngua fádírime íñutimaati láu láni lúngua, Búngiu íchugubalin ubáraü weírígiti le lun quei buga laríñaguni lun.

Niraü amürü,
rúnaali ubáraü le bun ugúñe.

⁶ Aríñagati gíñe tídan méme líburu to Lerérun Búngiu.

Fádíri amürü lun sun dan,
le líbe Melquisedéc.

⁷ Dán meja le laganounbei Crístu ya ubouágu, ayúmuraguati meja láu umálali jéreti lúma sarágu águirau lun Búngiu le gabáfubei lun leséfuruni lídaangiñe ouweni le lúnbei lasúfurirun. Ába lagáambuni Búngiu ladüga derégeguñu líña lan Crístu lúngua lun lugúndan Búngiu. ⁸ Láu sun Liraü lan Búngiu Crístu, chülüti dan lun larúfuduni lagáambadi láu lawánduni asúfuriruni. ⁹ Nübinti lun ábanbei lan asálbaragülei le gumúti láu lasúfurirun, lun gíñe ligíaba lan íchigei asálbaruni le magúmuchaditi joun sun ja ñüdüntiña láu le lubeíbei. ¹⁰ Ába lanügüni Búngiu Crístu quei fádíri íñutimaati líbe Melquisedéc.

Wuríbani le líchugubei lígríniwa afíñeni

¹¹ Gíbeti lúnti waríñaguni jun luágu Crístu lúma Melquisedéc, jénreenguti laríñawagún furáangu, lugúndun síñá lan gunfaráanda jumáni. ¹² Sügüjali sarágu dan lúmagiñe jasálbarun, lúnti jamúga gayáraajali lan jarúfudajani Lerérun Búngiu joun ámu, áni busén mémegidün narúfudajaniya burí cátei létima ménreengünbei lídaangiñe Lerérun Búngiu jun. Irájüñügüdün lídan jafíñen, queísi irájüñü ja gásubaña játun míligi lubáragiñe jamúga jeígin

eígini le dŭgŭdati. ¹³ Afŭñetiña ja buséngiñabaña larúfudajouñiwa cátei létima ménreengúnbei tidaangiñe Lerérun Búngiu joun, ítara jáña quei irájũñũ ja gurágiña—úagili gunfaráanda jamáni Lerérun Búngiu buídu. ¹⁴ Ja weĩnamujañábaña lídan jafŭñen, subúdi Lerérun Búngiu joun buídu, subúdi jameĩ arúfudajani le buídubei lúmoun le mabuĩdunbei.

6

¹ Queĩmoun méme lubeĩti wabáruaguóun lídan wasúbudin luágu Lerérun Búngiu, ígira wamámugei arúfudajani le ménreengúnbei libŭgŭrũ Crĩstu lun watŭriajani lujúlilin-ágei. Maritagua wamá luágurŭgũ lébu wafŭñen, quei buri ligirún binádu igáburu le málati, lúma buri afŭñeni luágu Búngiu, ² arúfudajani luágu badisei, líchugúniwa újabu jábulugu afŭñetiña, jásaarun jiláaña lídaangiñe oúweni, lúma lagúmujoún lagúseragúđũniña Búngiu gŭrígia, ³ queĩmoun wabáruaguóun lídan wasúbudiruni lujúlilin-ágei Lerérun Búngiu, láu lubáfu wawágu.

⁴ Gŭrígia ja resibi jamáalibei larúgounga ában weĩyaasu, resibi jameĩ Crĩstu quei si jasálbaragŭle, resibi jameĩ giñe Sífiri Sándu, ⁵ geféentiña luágu ugúndani le jasándirubei láu jalíjanun Lerérun Búngiu, lúma lubáfu Búngiu le siélubei jawágu ya ubouágu— ⁶ ánjein jíchiga janágan luágun Crĩstu lárigiñe sun cátei líra, ába jagřiribudun járigóun lídoun binádu jagáburu, siñáalime jaságŭřijan, siñáalime giñe lánigu jamá Crĩstu. Lun jamúga jichuguni janágan luágun Liraũ Búngiu lárigiñe jafŭñerun luágu, quei sŭgubeirŭgũ jamúga jádaraguñeinya lan luágu gurúwa, jéjerajaña giñe láu jagĩbugiñe gŭrígia. ⁷ Gŭrígia ja eĩbugubaña buídu lúma Crĩstu, ítara jáña quei múa le achúurubalin júya le áburujabei luágun, ában líchugun múa ligía ában alúbajani buĩti joun ja ñadágimeinbalin, ladúga binílaali lán buga Búngiu múa ligía. ⁸ Gŭrígia ja íchugubaña janágan luágun Crĩstu, ítara jáña quei múa le ñĩ lumuti lájũcha jíyu lúma lagŭbŭri jĩduru, úati ju lan lun ni cáta. Láburrjaba lábun líñaragun Búngiu, ábame lagudún.

Eménigini le adũgũbei lun derégũdagu wamá

⁹ Láu sun wadímurejan ítara, nidújeñu jĩnsiñetiña nun, afŭñetiwa luágu ítara júba lan quei múa le íchugubei inádiri buĩti, áni jibĩjubei sun abíniruni le ñũbinbei woun luágu wasálbarun. ¹⁰ Lugúndun úraguati Búngiu, áni mabúlieidun lubei le adũga jumáalibei, lúma ínisiñejabuni le arúfuda jumáalibei lun láu jíderaguniña jidújeñu luágu afŭñeni, cátei le anjŭnjaguabei adũgei. ¹¹ Buséntiwa lun ítara méme lan cáda ában jídaangiñe, arúfudei afŭñeni le dari lúmoun jóunwen, lun gayáraabei lan jibĩjini le jagúrabubei—lun jebélurun siélun. ¹² Mabúseerúntiwa lun jamáqualigudun lídan cátei le lání Búngiu, busénrŭgúntiwa lun jáyejeani jagáburu já meja afŭñebaña buídu buídu luágu Búngiu, awánda jameĩ sun asúfuriruni luágu, ába jerésibiruni le uágubei laríñaga Búngiu luágu líchugubei lan jun.

¹³ Dán meja le laríñagubei Búngiu lun Abrahám luágu labínirubei lan, fiñúti luágu guáñarŭgũ líri ladúga úa lan ámu weĩrgutimáati luei lun láfiñurun luágu, ¹⁴ ába laríñagun. “Nabínirubadibu sarágu, níchuguba giñe sarágu adũgawaguni bun.” ¹⁵ Agúrabajati Abrahám láu gurásu, ába lerésibiruni le uágubei laríñaga Búngiu lun. ¹⁶ Dan le jáfiñurun gŭrígia, luágu ában le weĩrgutimáati jawei jáfiñura, áni chouřujaña ligfati ában cátei láu fiñún, úaali ámu cátei lun laríñawagún. ¹⁷ Ligía lachouřurunbalin Búngiu lerérun láu fiñún, lugúndun busén lan larúfuduni furáangu woun, wágia le lúnbei werésibiruni lalágaante

Abrahám, luágu lagúnfulirubei lan lerérún luágu wasálbarun, masáansirunga ni cáta lidaangiñe. ¹⁸ Rúlaali Búngiu lerérún woun, rúlei láfiñurun luágu, bián cátei ligia, gayáraati wemenigidun luágu, ladüga siñá lan leyéjean Búngiu. Áni láu cátei ligia, sun ja ñúbinbaña lun Búngiu lun jasálbarun, gayáraati janügun gurásu, gayáraati jasúbudiruni le tímatimaati luágu jasálbaruba lan áni jebéluruba siélun. ¹⁹ Ágüdaja lumútu eménigini le wawáni derégüdagu, choúruñu, queisi lágüdajanun oúnguru ugúnein derégüdagu. Choúruwañu líña eménigiruni le wabíjibeí buídu buídu, ragúñu líña luágu Búngiu lídan fulásu sándutimáati siélu, ²⁰ le ñíjin lubeí lebélera Jesúsu ában weíyaasu wawágu lun ladáraruni úma wabá. Níjein ñi guetó afádirija wawágu ligíbugiñe Búngiu queisi ában fádiri íñutimáati le líbe Melquisedéc.

7

Jesúsu fádiri líbe Melquisedéc

¹ Melquisedéc le, urúei lídan meja fulásu le gíribeí Sálem, lufádirinein giñe Búngiu le íñutimáabei. Dan le lagíribudunbei Abrahám wuríburugugiñe lárigiñe lagáñeiruni wuríbu jawágu urúeigu, ába láfuridun Melquisedéc lubároun, ába labíniruni, ² ába líchuguni Abrahám ában lidaangiñe cáda díisi lidaangiñe le lagáñeirubei lídan wuríbu lun. Míni lan íri Melquisedéc lídan furúmiñeti cátei, “urúei richáguati” quei mejati lurúeite lubeí Sálem, áni “darángilaü” míni lan Sálem, ítara líña lubeíti “lurúeite darángilaü” Melquisedécei. ³ Ibídíñewati ca lan lagúbüri gubaña, ibídíñeti giñe ca lan linébaanfaangubaña, ibídíñewati ni cáta libügürü lagüríajoún ni libügürü loúnwen, liyáwa Liraü Búngiu ligia, ában fádiri lun sun dan.

⁴ Aríja jumeíti luágu weírigu lán meja Melquisedéc. Abrahám guánarügü lé meja binádu wadúje, rúlumuti ában lidaangiñe cáda díisi lun lidaangiñe le lagídarubei jawéi urúeigu lídan wuríbu. ⁵ Según lilúrudun Moisés, fádirigu ja linébaanfaangu Leví lúnti jagúburajani ában lidaangiñe cáda díisi jamagiñe gürígia lidaangiñe sun cátei, láu sun jadújeñu jamá, linébaanfaangu Abrahám jáledi. ⁶ Ánjeinti Melquisedéc, láu sun máma lan linébaanfan Leví, agúburaja lumúti ában lidíisin cátei lueí Abrahám, lé buga erésibirubalin dimúrei lúmagiñe Búngiu. Ítara líña labíniruni Melquisedéc Abrahám, ⁷ áni siñátí lasígeneruni ni ában luágu weírigitima lan le abínijabei sügü láu le abínirúabei. ⁸ Ya wádan, fádirigu ja erésibirubalin cáda lidíisin cátei, wügüríña goúwedaditiña, ánjeinti luágu Melquisedéc, tadímurejan Lerérún Búngiu luágu quei luágu ában le wínwangili. ⁹ Áni gayáraati laríñawagún luágu Leví jáu sun fádirigu ja linébaanfaangu ja agúburajabalin cáda lidíisin cátei guetó, luágu fáyei jamáni giñe lun Melquisedéc lídan óra le lafáyeirunbalin Abrahám lun, ¹⁰ lugúndun lídan ában oúbaü, barü lumutiña buga Abrahám linébaanfaangu ja magüríajoúngiñabaña lídan lúgubu dan le láfuridunbei Melquisedéc lubároun.

¹¹ Jádaangiñe fádirigu ja linébaanfaangu Leví jerésibirei Israelítagu lilúrudun Moisés, áni Aarón furúmiñetibeí jafádirin. Gürígia ja afálarubalin lúrudu ligia, lun jamúga gayára lan jasálbarun le tímatimaati lueígiñe, memégeirunwali jamúga lachúlaagun ámuja fádiri, máma líbe Aarón, líbe Melquisedéc. ¹² Lugúndun dan le liábin fádiri lidaangiñe ámu adúgawaguni, sáansiwati giñe lúrudu lé buga lábugiñebeí lafádirija. ¹³ Wabúreme Jesucrístu, queisi fádiri lidaangiñe ámu adúgawaguni queisi Melquisedéc, sáansiguati giñe lúrudu le lábugiñebeí lafádirija. Tariñajare Lerérún Búngiu luágu lidaangiñeti lan ámu

liraü Israél lueí Leví liábin Cristu—ában adügawaguni le úagilibei ni ában jádaangiñe afádirijati. ¹⁴ Lugúndun subúdiwati buídu luágu jádaangiñe lan linébaanfaangu Judá liábin Wabúreme Jesucristu, áni maríñagunti Moisés ni cáta jawágu adügawaguni ja dan le ladímurejaanbei jawágu fádirigu.

¹⁵ Áni furáangutimáati le dan le liábin Jesucristu lun lafádirijan queísi Melquisedéc, ¹⁶ máma láu ában lúrudu le aríñagubei cába lan idaangiñe adügawaguni liábin, liábin lun fádiribeí lan lugúndun gabáfu lan lun labágaridun lun sun dan. ¹⁷ Niján le laríñagubei Búngiu luágu Jesucristu.

Ában fádiri amürü lun súnwandan,
le líbe Melquisedéc.

¹⁸ Gumúguati lubeíti binádu gumádi le lilúrudunbei Moisés, le lábugiñebeí jafádirijan Levítagu, lugúndun nírein lan mégeiti luágu, ¹⁹ mabáfuti lúrudu ligía lun lasálbaruniña gürígia lídaangiñe jafígoun. Lewéñeguati, níjein ában iséri aráanseruni le buítimaati, le idaangiñebeí gayára lan wayárafadun lun Búngiu.

²⁰ Áni láu ában fiñún ladúgei Búngiu aráanseruni le lun Jesúsuba lan wafádiriñe. ²¹ Ja jíbiri fádirigu, máfiñurunwati dan le líchugunbei jafúlasun joun, ánjeinti luágu Jesúsu, le láubei fiñún líchugúa lufúlasun lun, laríñajare tídan Lerérun Búngiu.

Áu Búngiu le Abúremeinbei, fiñújadina bun,
masáansiragun nubeí narítangun.

“Ában fádiri amürü lun súnwandan,
le líbe Melquisedéc.”

²² Ligía Jesúsu lubeí ahoúrurubei ában darádu buítimaati lueí le furúmiñeti.

²³ Já meja jíbiri fádirigu, chülütiña agíbedagua lugúndun quei ába lán buri jóunwen, siñáti jasígirun, ²⁴ ánjeinti Jesúsu, quei mouñwen lan, másügürunbei líffisiute queísi fádiri lúmoun ámu. ²⁵ Ligía gayára lubeí lasálbaruniña ja ayárafadubaña lun Búngiu lídaangiñe le tímatimaati lun súnwandan, lugúndun gabágariti súnwandan lun layúmuragun lun Búngiu jawágu.

²⁶ Jesúsu lubeíti fádiribeí íñutimáati le wabúseerúbei. Jarúma ligía, úati wuríbani lídan, ní figoú, máma ligía ában jáma gafígountiña, iñurúa ligía íñutima lueí sun cátei siélu lun lañúurun lúma Búngiu. ²⁷ Mítaraanti quei jíbiri fádirigu íñutimaatiña ja gásubei jáfarun anímaalu lun jadágaragüdüniña quei sacrificisiu ságü wéyu, furúmiñe luágu jafígoun guánarügü, lárigiñe luágu jafígoun jíbiri gürígia. Lubáragiñe líra, adúga lumúti Jesúsu sacrificisiu ábanrügü weyaasu dan le líchaagunbei lúngua lun loúnwen luágu jafígoun gürígia. ²⁸ Wügüríña ja débilibaña, jagía líchugubaña lilúrudun Moisés queísi fádirigu, ánjeinti lárigiñe lídáani lúrudu, ába láfiñurun Búngiu luágu Liraü lun ladügüni fádirime, le buídubei adügün le gumúti lun súnwandan.

Jesúsu búyei lun ában iséri darádu

8

¹ Le buítimaabei lídaangiñe sun le waríñagubei, luágu ítara líña lan wafádirin le íñutimaabei, áni ñurújali lueígiñe loúnwenren Búngiu siélu, ² áni lesériwiduñta queísi fádiri lídan fulásu le sándutimáabei le ladügubei Wabúreme Búngiu yágüta siélu, máma fulásu le sándutimáabei le jadügubei gürígia ya uboúagu. ³ Sun fádiri íñutimaati líchugúniwa lun líchugun edéweejani lúma adágaragüdüni lun Búngiu, ligía gásu lubeí giñe níjein lan som cátei lúnti ladágaragüdüni Jesucristu lun Búngiu. ⁴ Lun jamúga yáñein lan Jesucristu uboúagu, mámañein jamúga fádiri,

lugúndun añájeingua fádirigu adágaragüdütiña le uágubei laríñaga lilúrudun Moisés. ⁵ Fádirigu ja, jadügüni jawádigimari láu buri cátei le liyáwarügüti lé buri siélubei. Subúdi wamúti luágu iyáwaü lan, lugúndun le lubábei ladügünun Moisés lúban Búngiu, ába laríñagun Búngiu lun. “Adügabeítia sun cátei queísi iyáwaü to narúfuduboun bun luágu wübü.” ⁶ Weiriguti lafádirijan Jesucrístu sügü láu jafádirijan fádirigu ubouágu, queísigubeirügü buitima lan darádu le uágubei labúyeija lúma Búngiu luágu jáni gürgia fuleísei ubouágu, áni buitimaati cátei le líchugubei iséri darádu ligía.

⁷ Lugúndun lun jamúga meja buídu lan furúmiñeti darádu le gumúti, le ladügübei Búngiu jáma binádu wagübürigu lídaangiñe Moisés, memégeirúnwati jamúga ábanya libíaman darádu. ⁸ Magúndaati buga Búngiu laü furúmiñeti darádu ladüga mabáfu jamá binádu wagübürigu lun jagúnfulirun lúma darádu ligía. Ába laríñagun tídan Lerérun.

Laríñajare Jabúreme Búngiu. Lachülürüba wéyu lun nadügün iséri darádu jáma buri linásiñun Judá lúma Israél.

⁹ Mítaraanbei quei darádu le nadügübei jáma binádu jagübürigu le wéyu le nárügüdünbalin jájabu lun naságaruniña Ejíptogiñe, magúnfulirun jamúti meja nidáradun ligía, ligíati nígirunbáliña jóungua, líña laríñagun Búngiu.

¹⁰ Niján darádu le lúnbei nadügüni jáma linásiñun Israél lárigiñeme buri wéyu ligía, líña laríñagun Jabúreme.

Níchugubei nugúmadin lídoun jarítagun, ábame nabürüjani tídan janígi.

Áubati Jabúngiute, jagíame nánigu.

¹¹ Memégeirúnwabei lun larúfudajóuniwa nuágu, maríñagunbei wügüri ni lun lidúje ni lun libíri lun jasúbudiruni Búngiu le Jabúremebei,

lugúndun jasúbudirubadina súngubei, lúmagiñe le ñúraütimaabei darí lúmoun le weiritimaabei jádaangiñe.

¹² Ferúduna nubei wuríbani le jadügübei, nabúlieidubei jafígoun lun sun dan.

¹³ Adímurejaali ligía Búngiu luágu ában iséri darádu, rúlaalírügü líña le furúmiñeti quei binádu, áni cátei le binádujalabei, mayúsurunwadügüyaali.

9

Lúban Búngiu to ubouáguna túma Lúban Búngiu to siéluna

¹ Lídan meja le furúmiñeti darádu le ladügübei Búngiu jáma binádu wagübürigu, rúlumuti meja gumádi joun ída lúba lan jájuduragun lun, ñíñoun giñe ában múna to sánduboun ya ubouágu to lúbanboun Búngiu. ² Ítara líña ligáburu taráanserún múna tugúya. Múnada, ñíñein bián rúmu, lídan furúmiñeti rúmu le giríbei Fulásu Sándu, ñíñein lébu sanúdelu lúma dábula le ní tubei fein to biníwaboun. ³ Ñíñoun ában bélu labádinagua bián rúmu ligía, Fulásu le Sándutimáabei líribei libíaman rúmu. ⁴ Lídan rúmu ligía, ñíñein ában latárü gólu lun lágudajóun cupáli ñi, túma bágüsi to lánina darádu, gólu sun toúba. Turágeirugu bágüsi tugúya, ñíñein ában ágeidinaü gólu le gádaanbalin eíginí le giríbei maná, ñíñein giñe luwénwen Aarón le ájúchagubei, lúma dübü le uágubei labürüjóua díisi gumádi le líchugubei Búngiu lun Moisés. ⁵ Tougiñe bágüsi tugúya, ñíñoun jayáwa querubínes, ja queísigubeirügübaña ánjeligu, arúfuda

jamúti querubínes jagía luágu ñíñein lan Búngiu lídan fulásu ligía. Darúguatiña táu bágüsi tugúya, le ñí lubei ferúdunawa lan figou, láu jarüna. Mabúseerúntiwa wadímurejan sarágu luágu buri cátei le guetó.

⁶ Aráanseñu líña buri cátei ítara, belútiña fádirigu lídoun Fulásu le Sándubei ságü wéyu lun jafádirijan. ⁷ Ánjeinti lídoun Fulásu le Sándutimáabei, fádiri rügüñein ññutimáati ebélura ñíjin ában weíyaasu lídan irúmu, áni dan le lebélorun, gásu lanügün játa anímaalu lun ladágaragüdün luágu lifígoun guánarügÜ lúma luágu jafígoun gürígia. ⁸ Láu cátei le, larúfudajaña Sífiri Sándu woun luágu sun lan seríwigili lan Fulásu le Sándubei lúma buri sun igáburi le adügübei ñí, madárarúngili úma lídoun Fulásu Sándutimáati. ⁹ Sun igáburi lé meja adügüwabei lábugiñe binádu lidáradun Búngiu, liyáwa iséri lidáradun Búngiu wáma le seríwigilibeí lídan dan le. Cátei lé buri meja íchugübei lun Búngiu, lúma cátei le adágarawagüdüwabei lun lábugiñe binádu darádu, siñáti meja larúmadagüdünun jawáni ja agúnfulirubaña lúma Búngiu ítara. ¹⁰ Lúruđu buri lánina binádu darádu luágu jagúnfulirun lúma Búngiu, luáguti eígini le lúnbei jeígin gürígia, uníñein le lúnbei játuni, lúma buri igáburi lánina arúmaduni, mabuíduragüdün lumútu buri cátei líra uwáni, lúntirügü lesériwidun darí lasáansiruni Búngiu sun cátei láu liábin Crístu.

¹¹ Láu liábin Crístu, guetó ligía fádiri ññutimáabei luágu iséri darádu le íchugubei ubuíduni woun sügü láu le binádubei. Lúban Búngiu le ñí lubei lafádirija, buítimaatu sügü táu tó meja ubouáguboun. úati mégeiti tuágu, ladüga máma jadüga gürígia múna to siéloboun, to uáguboun nadímureja. ¹² Belújali Crístu lídoun Fulásu Sándutimáati siélu le ñí lubei Búngiu, máma lun ladágaragüdün játa gábara jáma bágasu ññübürigiña luágu jafígoun gürígia, dagágüda lumúti líta guánarügü. Láu ábanrügü lebélorun, ligía íbjaali asálbaruni magúmuchaditi woun. ¹³ Inárüni luágu lábugiñe lan binádu darádu, gabáfuti meja játa bágasu jáma gábara, lúma jabáligin bágasu ññübürigiña, lé buri áturawagübei jawágun ja marúmanbaña, lun ledéreguniña lúma lun larúmadagüdüniña bougudigiñe jabíti ligíbugiñe Búngiu. ¹⁴ Áni ánjein ítara líña lubei, igübumégia gabáfutima lan líta Crístu! Lídaangiñe Sífiri Sándu le magúmuchadibeí, rúguati Crístu lúngua lun Búngiu quei ában adágaragüdüni luágu wafígoun le úati dáseiti luágu, áni jarúmagüda lumútu líta wawáni, gidá lumútiwa lídaangiñe lidíjerei arítangun luágu wagúnfulirun lúma binádu darádu, adüga lumútiwa lun wabúseerun wesériwidun lun Búngiu le wínwanbei.

¹⁵ Ligía Jesucrístu lubei búyeibeí lun ában iséri darádu le adüga láalibeí Búngiu wáma. Louñwenbei Crístu lun ferúdunawa lan figou le adügübei lábugiñe binádu darádu, lun gíñe ja lan únbaña wájali lan Búngiu lun lánigu jamá, gayára lámuga jerésibiruni labínirun Búngiu le laríñagubei luágu líchugubei lan queísi alágan. ¹⁶ Lugúndun dan le líchugun ában gürígia lújabu árigi tuágu ában gárada luágu alágan, mabáfutu gárada tugúya darí lun lasúbudirúniwa luágu jiláali lan gürígia ligía. ¹⁷ Mebégitu gárada tugúya dan le wínwangili gürígia ligía, darí dan le jiláali. ¹⁸ Ligía gíñe láu lubei léserun jítaü ladügüwa furúmiñeti lidáradun Búngiu jáma lumútuniña. ¹⁹ Subúdigüda lumúti Moisés sun lugúmadina lúruđu joun sun gürígia, lárigiñe, ába lanügün gamísa funátu lúma lílímun isópo, ába ladüduragüdüni lídan dúna lúma játa bágasu ññübürigiña jáma gábara, ába labájchagunun lílímuruna lúruđu jáma gíñe sun gürígia. ²⁰ Ábati laríñagun joun. “Niján jítaü le achoúrurubalin lidáradun Búngiu júma.” ²¹ Bajígua lumútu gíñe Moisés Lúban Búngiu lúma sún buri cátei le ayúsurubei lídan jájuduragun lun.

²² Según lúrudu ligía, jarúmagüdüwati sun líbe-ágei cátei láu jítaü, áni úati ferüdunawa lan figou ánjein úa láwiyurun jítaü.

Lachíbuni loúnwen Cristu wafígoun

²³ Busénwati lubei mejati ladágaragüdüniwa játa anímaalu lun larúmadawagüdüni buri cátei le, sun líra, iyáwaü rügüñein lun cátei le inárüniti le siélubei, le ní tubei Lúban Búngiu tímatisaatu, áni busénwati ladágaragüdüniwa jítaü le buídutimaati sügü láu játa anímaalu luágu cátei lánina siélu. ²⁴ Mebéluti Cristu tídon Lúban Búngiu tugúra to jadúga wügüriña ya ubouágu, to meja tiyáwarügüboun Lúban Búngiu to tímatisaatu siélu, siéluun méme lebélura, le ní lubei larúfudagua lúngua guetó ligíbugiñe Búngiu lun lafádirijan luágu wafúleisein. ²⁵ Belúti fádiri íñutimaati le juríu lídon Fulásu Sándutimaati ában weíyaasu lídan irúmu lun ladágaragüdüni jítaü le máma líta, ánjeinti Cristu, míchaagunti lúngua quei adágaragüdüni sarágu weíyaasu lun lachíbuni figou. ²⁶ Lun jamúga ítara líña lan, gásu jamúga loúnwen sarágu weíyaasu lúmagiñe ladügün ubou. Masúseredunti ítara, lubáragiñe líra, dan le lagúnfulirúña lán buri dan, chülüguaali Cristu ábanrügü weíyaasu, íchaagueina lúngua lun lagídaruni figou. ²⁷ Ítara quei sun lan gürígia lúnti lan jounwen ábanrügü weíyaasu, lárigiñeme ábame jagúserawagüdüni, ²⁸ Ítara líña giñe líchaagun Cristu lúngua ábanrügü weíyaasu lun lagídaruni jafígoun gürígia. Lachülürüba wéyu lun lagíribudun Cristu ubouágun, mámaalime lun lagídaruni figou líabin, líabinba lun lanügüniña sun ja agúrabubalin líabin siélun lun jabíjini sun cátei lánina jasálbarun.

10

¹ Lilúrudun Moisés liyáwa rügüñein méja buri cátei buíti lé meja lúnbei lanügüni Cristu joun gürígia, le lásíñerubei lúrudu íchiga joun. Ja lubeiti ayárafadubaña lun Búngiu lídaangiñe játa anímaalu le adágaragüdüwabei lun Búngiu según lilúrudun Moisés, lé buri adágaragüdüwabei ságü irúmu, siñáti meja jadáriruni jabuidurun le gumúti ítara. ² Lun jamúga gayára lan labuiduragüdüniña lúrudu le gumúti ligíbugiñe Búngiu, ába jamúga madügünjali lan adágaragüdüni buri le, lugúndun ja adügübalin, láu jamúga jarúmadun ában weíyaasu lídaangiñe jafígoun lun súnwandan, masándiragunjaña jamúga jóungua láu dúru luágu figou. ³ Seríwiti adágaragüdüni buri le lun larítaguagüdüniña luágun jafígoun ságü irúmu, ⁴ quei siñá lubei lagídaruni játa bágasu lúma játa gábara figou.

⁵ Ligía laríñagunbei Cristu lun Búngiu dan le lebélurunbei ubouágun. Mabúseerúntibu adágaragüdüni ní anímaalu íchugúti bun, aráanserügütibu ában úgubu nun lun nedéregeruni bun.

⁶ Magúndaantibu láu buri jagudún anímaalu luágu latárü bun, ní buri láu adágaragüdüni lun ladáuragun figou.

⁷ Ábati naríñagun. “Ñúbinjadina ubouágun lun nadügüni bugúndan, Nubúngiute,

ítara queisi bürüwañu líña lan nuágu tídan Berérun.”

⁸ Furúmiñe, laríñaga luágu mabúseerun lan Búngiu, magúndan ligía, láu adágaragüdüni, ní jáu anímaalu íchugúti lun, ní anímaalu gudáwati luágu latárü, ní adágaragüdüni lun ladáuruni figou, láu sun lán buri cátei le uágubei laríñaga Búngiu lídaangiñe Moisés joun gürígia lun jadügüni. ⁹ Laríñaga Cristu lárigiñe. “Ñúbinjadina lun nadügüni bugúndan, Búngiu.” Laníchigu líra, ñúbinjali

Crístu ubouágun lun lagúmchaguagüdüni igáburi le ladágaragüdüniwa anímaalu, lun líchaagun lúngua lewéñegua. ¹⁰ Ligía lugúndanbei Búngiu, lun larúmadagüdüniwa ligibugiñe láu loúnwen Jesucrístu ában weíyaasu lun sun dan luágu wafígoun.

¹¹ Sun fádírigu juríu, ságü wéyu jadügüni buri ában méme adágaragüdüni, láu sun siñá lan lagídaruni adágaragüdüni ligía figou. ¹² Ánjeinti Jesucrístu, ában rügüñein weíyaasu líchaagun lúngua luágu figou lun sun dan, ábati lagíribudun siélun, ába lañúurun lueígiñe loúnwenren Búngiu. ¹³ Níjein ñi guetó agúrabaja líchuguniña Búngiu láganiñu lábugiñoun lubáfu. ¹⁴ Láu loúnwen ábanrügü weíyaasu, ába labuíduragüdüniña lánigu Búngiu, le gumúti, lun sun dan. ¹⁵ Choúru lumúti giñe Sífiri Sándu cátei méme ligía woun, lugúndun laríñaga le laríñagunbei Búngiu.

¹⁶ Darádu le lúnbei nadügüni jáma lárigiñeme buri wéyu ligía, ítara lúba, líña laríñagun Búngiu.

Níchugubei nugúmadin tídoun janígi, ábame nabürüdüni jarítangunru.

¹⁷ Lárigiñe laríñaga.

Marítagundügüyaadináme luágu jafígoun ni luágu wuríbati buri le jadügübei.

¹⁸ Dan lubeíti le ferúdnawaali figou lun sun dan, memégeirunwali ámu adágaragüdüni luágu figou.

Lúnti wayárafadun lun Búngiu

¹⁹⁻²⁰ Ligía lubeíti nidújeñu, láu loúnwen Crístu luágu wafígoun, gayáraajali wayábin ligibugiñe Búngiu manúfudeiga. Úaarú bélu lun teréderuniwa lueí webélurun lídoun Fulásu le Sándutimáabei, le ñi lubei Búngiu, gidá lumutu Crístu bélu tugúya láu loúnwen. Junrénti ában iséri úma woun lúmoun Búngiu, ában úma le anügübalíwa lídoun ibágari magúmchaditi. ²¹ Jesúsú wafádirifebei íñutimaati tídan Lúban Búngiu siélu, ²² ligía lúnti lubei wayárafadun lun Búngiu láu tarúma wanígi, lúma láu sun wafiñen derégüdagú luágu. Jarúmagüda láaru wanígi lun masándiragun wamá woungua láu dúru luágu figou lárigiñe lachibúniwa, badísejadiwa láu dúna jarúmati. ²³ Ítara méme wamá derégüdagú lídan wafiñen, masáansiragúnga, lugúndun gayára lan wemenigidun luágu Búngiu lun lagúnfuliruni lerérun lun líchuguni ibágari magúmchaditi woun. ²⁴ Lúnti giñe wáfaagun wíderaguniña wíbirigu lun jínsiñejabu jamá, lúma lun jadügüni le buídubei. ²⁵ Mouñ lumuti wafálaruni jémpulu jáni ja jéhubaña lun midin jamá lídan wadámuridagun, wagía afiñetiña, le lúnbei wadügüni, lun wíchugun gurásu joun wíbirigu, guetótima láu aríja wamáni luágu yaráfaali lan luwéyuri Wabúreme Jesucrístu lun lagíribudun ubouágun.

²⁶ Lugúndun ánjawa afígounja láu wíchuguni wanágan luágu Crístu lárigiñe wasúbudiruni luágu ligía rügüñein lan agídareí figou, úaali ámu luwúyeri lun wasálbarun lídaangiñe wafígoun. ²⁷ Ában rügáali cátei lun wagúrabajani, lun lagúseragüdüniwa Búngiu láu ában lanárime igáñi, ábame wagúnrichawagún jáu sun jíbiri láganiñu Búngiu lídan wátu geméti. ²⁸ Dan le ladúraaguni ában gürígia lílúrudun Moisés, áni añájein bíama ó úrúwa gefeéntiña luágu, ába laríñagun lílúrudun Moisés luágu lúnti lan loúnwen gürígia ligía, magúdemejabuti lúrudu lun. ²⁹ Weíritimaati sáfuri le jadúnabei ja mebéresenbaña láu Liraü Búngiu, mebéresen jagía láu líta, anába jameí Sífiri Sándu le jínsiñejabubei joun. Líta Jesucrístu, ligía achoúrurubalin lídaradun

Búngiu wáma, le adügübaliwa jarúma ligíbugiñe. ³⁰ Subúdi wamúti ligáburi Wabúreme Búngiu le aríñagubei. “Áu le lúnbei labeíchaguniña gürígia, áu le lúnbei lafáyeigüdüniña luágu jafígoun.” Aríñagati gíñe. “Nagúseragüdübaña numútuniña.” ³¹ ¡Fugiábu gürígia le uágunti láburuja ligáñi Búngiu le winwanbei lun sun dan!

³² Jaritagua jumá luágu buri wéyu le sügüjalibei dán meja le jerésibirubalin larúgonga luágu Jesucrístu. Weíríti meja jasúfurirun lídoun meja dan ligía, áni awánda jumúti sun cátei láu gurásu. ³³ Añájein jídaangiñe, anabúatiña, ouserúa jagía wuríba ligíbugiñe guríriguaü ladüga jeibugun lúma Crístu, jíbiri, súfuritiña ladüga gamádagua jamá jáma ja wuríbabaña ouserúniwa. ³⁴ Gudémejabutün meja joun ja furísunrugubaña, ásta láu ugúndani ígiraguagúdatün júngua lun lagídarún le júmabei jueí, subúdiñu jumeín luágu níjein lan cátei júma siélu le buítimaati, le siñábei lagídarún jueí. ³⁵ Guetóti, meféridira jumeín lubeíti jeménigi luágu Búngiu, lugúndun jerésibiruba lan ában oúnwenbun afáyeiragülei siélu. ³⁶ Gagúraasun jumá, lun lárigiñeme lan jawánduni asúfuriruni queísi labúseerun Búngiu, gayára lámuga jerésibiruni le lúnbei líchuguni Búngiu jun, siélu. ³⁷ Taríñajare Lerérun Búngiu luágu lagíribudun Crístu ubouágun.

Málüjali ánjein ñübin le lúnbei liábin, madárasarunbei sarágu dan.

³⁸ Le nerésibirubei queísi richáguati nigíbugiñe, labágariduba láu lafiñerun nuágu, líña laríñagun Búngiu.

Ánjein leféridira lafiñen, magúndaanbadina lúma.

³⁹ Wagía, mítaraanbádiwa queí gürígia ja eféridirubalin jafiñen luágu Búngiu, ába jeféridirun, wasígiruba láu sun wafiñen luágu daríme wounwen, belú támuga wawáni siélun.

Luáguti afiñeni

11

¹ ¿Cáteigi afiñenibei? Afiñeni, achoúrurúni le gumúti luágu wabíjibei lan le wagúrabubei, lúma wachóururuni le gumúti luágu nreín lán buri cátei láu sun maríjin wamáni. ² Niján luwúyeribei meja jafiñen jídaangiñe binádu wagübürigu luágu Búngiu, ába lagúndaarun jáma.

³ Láu wafiñen, wasúbudirei luágu Búngiu lan adügübalin ubou láurügü lerérun, le lubeíti ubou le waríjubei guetó, máma lídaangiñe cátei lé meja arijúabei ladügüwa.

⁴ Láu lafiñen Abél, dagágüda lumúti le labúseerúbei Búngiu sügü láu le ladágaragüdübei Caín, ligía lerésibirubalin Búngiu queísi richáguati, ába lerésibiruni ladágaragüdüñ lun. Láu sun lubeíti jilá lan Abél, nijángua luwúyeri lafiñen queísi jémpulu woun.

⁵ Láu lafiñen Enóc, lanügüwa siélun moúnwenga, áni madárirúnwati lügubu lugúndun barü lani meja Búngiu. Áni taríñajare Lerérun Búngiu luágu, luágu lubáragiñebeí lán meja lanügün Enóc, gúndan lan Búngiu láu ya ubouágu.

⁶ Ánjeinti wagía, siñáti gúndan lan Búngiu wáu ánjein mafiñen wabeí luágu, lugúndun lun wayárafadun lun, gásu wafiñerun luágu níjein lan áni líchuguba jafáyeiruája ja álujabalin.

⁷ Láu lafiñen Noé, dan le lawísarubalin Búngiu luágu ladágaruba lan ában oúnwenbun gúnran, láu sun maríjiñajagili lan gúnran, ába ladügüni le lubeíbei Búngiu, ába ládaragun ában oúnwenbun ugúnein lun lasálbarun jáu lufámilian.

Arúfuda lumúti lafiñen Noé óunwenbun mafíñeni le jawágubei jíbiri gürigia ubouágu. Ába lanügüni Búngiu Noé queísi ában wügüri richáguati lúma, luágu lafiñen.

⁸Láu lafiñen Abrahám, dan le lagúarunbei Búngiu lun lun lígiri lageíra lun lídin lídoun ámu fulásu le lúnbei láni lan, ába ladügüni le lubeíbei Búngiu, ába láfuridun lageíragiñe, ibídiñounga lun jalíñounbei lan. ⁹Ába laganouñ lídan iséri fulásu ligía, láu sun teréncha lan ñi, ladüga lafiñen luágu lererun Búngiu lun luágu líchugubei lan fulásu ligía lun. Laganouña tidan múna adügütu láu jára anímaalu, ligía méme giñe jadügübei Isáac, le liraü, lúma Jacób, le libári, ladüga jalágaante lan fulásu ligía lúmagiñe Búngiu. ¹⁰Adüga lumúti Abrahám sun líra ladüga agúrabaja lan lebélorun lídoun lubuídun ubúruyu siélu le ladügübei Búngiu, le adúrarubei lun sun dan.

¹¹Láu giñe tafiñen Sára, láu sun meja weíyaaru tan lun tagáraüdü, resíbi tumúti ubáfu lúmagiñe Búngiu lun tagáraüdü, garaütu ában irájü ladüga tafíñerun luágu lagúnfulirubei lan Búngiu le laríñagubei. ¹²Láu sun lubeíti weíyaali lan Abrahám lun garaü lan, ñúbinti lun ganébaanfaangubei lan sarágu, quei warúguma ja siélubaña, quei giñe lágu buri ságoun le lárubei béya le siñábei labájüdü.

¹³Jiláguatiña Abrahám jáma lirájüñü láu jafiñen luágu Búngiu, merésibirunga jameí sun le uágubei laríñaga Búngiu luágu líchugubei lan joun, subúdi jamúti luágu lídaanme lan dan le lúnbei liábin, lagúnfuliruba lan Búngiu láu lererun, ába jagúndaaragun luágu. Subúdi jamúti luágu máma lan jageíra ubou le, jayábin rügüña ebéluja queísi teréncha ya. ¹⁴Gürigia ja arítagubaña ítara, arúfuda jamúti luágu jáluaja mémeña lan ában ageíraü lun jageírame. ¹⁵Lun jamúga fulásu lan le ñigiñe lubei jáfurida ageíraübei le jáluajabei, gayáraayati jamúga jagíribudun járiçoun ñijin. ¹⁶Ában buga ageíraü buitimaati jabúseerúbei, ageíraü le siélubei. Ladüga níjein lan jarítagun luágu cátei le lánina siélu, ligía úa lubei nibúsigari lan Búngiu lun Jabúngiutebei lan, ába laráanserun ában fulásu joun siélu.

¹⁷Dán meja le louchagunbalin Búngiu Abrahám láu laríñagun lun lun láfaruni liraü le Isáac jilágubei lun ladágaragüdüni lun, afíne mémeti luágu Búngiu, rúguati yebe lúngua lun ledégeruni liraü le ábanrügüti, ¹⁸láu sun aríñagaali lán buga Búngiu lun luágu sarágubaña lan linébaanfaangu lídaangiñe Isáac. ¹⁹Subúdirügü liñáli Abrahám luágu gabáfu lan Búngiu ásta lun lásaaragüdüni Isáac lídaangiñe otúweni, áni itagaráyebe ladügüni Búngiu láu líchuguni Isáac lárigoún lun Abrahám lubáragiñe yebe láfaruni.

²⁰Afiñeti Isáac luágu ladügübei lán Búngiu le laríñagubei, ába laríñagun joun lirájüñü ja Jacób lúma Esaú luágu labínirubaña lan Búngiu lídan dan le lúnbei liábin. ²¹Láu lafiñen Jacób, dán meja le louwe lan, bini lumuti cáda ában jádaangiñe lirájüñü José, ába ladímurejan luágu luweírigun Búngiu, ragüñu luágu lígiri lubádun. ²²Láu lafiñen José, lubáragiñe louñwen, aríñagati luágu jáfuriduba lan Israelítagu Ejiptogiñe, aríñaga ligía lun janügüni lábu jáma dánme le jígiri fulásu ligía.

²³Láu jafiñen lagübüriçu Moisés, dan le lagüriajouñbei, ába jarámuduni luágu ürúwa játi, ladüga jaríjin luágu buídumeraü lan, janúfudetiña luei lúruu le líchugubei urúei lun jañáradawagüdüniwa wügüriña irájüñü. ²⁴Láu lafiñen Moisés, dan le wügürijali, májati lun lanügüniwa queísi tiraü liraü lúruéite Ejipto, ²⁵jímein lumúti lasúfurirun jáma lánigu Búngiu lubáragiñe laganouñ buídu tidan lúban urúei, to lánina figou. Subúdi lumúti luágu madúra lan

luwúyeri ugúndani ligía sarágu dan. ²⁶ Rísitimaati lasándiragun lúngua láu lasúfurirun únabuni lueígiñe Cristu le lúnbei liábin, sügü láu laganouñ lidan sun lirisin Ejipto, lugúndun luágu afáyeiruajáü le lúnbei lichuguni Búngiu lun, lichigei larítangun. ²⁷ Láu lafiñen Moisés luágu Búngiu, ába lígiruni Ejipto, manúfudeiga lueí ligáñi urúei, reideiti derégüdagu lidan larítangun camá jamuga ariágu líña lun Búngiu le marijñbei.

²⁸ Láu lafiñen Moisés ladúgei fédu le giríbei páscua, ába louñajan abájichaguei tubéneri jában Israelítagu láu jítaü lun dánme lan le lásügürün ánjeli le lánina ouweni, máfarun lámuga ni ában jaraü Israelítagu le ibugañaü. ²⁹ Ladúga jafiñen Israelítagu luágu Búngiu, ába ladügün Búngiu úma joun lídaangiñe dúna le giríbei Barána Funáti, lun gayára lan já sügürün eíbugeina camá jamuga múa le mábeiti. Dánti le jabúseerúnbei Ejiptona lun giñe já sügürün quei jagía, ába ladáuragan dúna jáu, ába jañáradangun.

³⁰ Láu jafiñen Israelítagu luágu Búngiu, ába jamácharun geyégua láu lubárierun ubúru gu Jericó ságü bináafin luágu sedü wéyu, ába leíguadun louba lubárierun ubúru gu ligía. ³¹ Afiñetu Raháb, tó meja jóru, luágu Búngiu, ába tarámuduniña Israelítagu ariáajatiña túbiñe. Ladúga cátei le, máfarúnwatu lidan le jáfarawagún magáambaditiña lun Búngiu lidan fulásu ligía.

³² ¿Cába ámu cátei nariñaga? Louguabei dan nun lun nabürüjan luágu Gedeón, Bárac, Sansón, Jefte, David, Samuél luma jawágu profétagu. ³³ Láu jafiñen, siríguatiña buri fulásu, agúmadija jagía buídu, íderagua lumútiña Búngiu queísi lariñaguni joun. Darú lumuti Búngiu jayúma liñún jaweí, ³⁴ ñegútiña wátu geméti janárimeti, séfutiña lueí jáfarawagún jilágubei táu efeín. Ába jeredun ja mérebaña, ñübintiña lun gabáfubaña lan wuriburugu, ába jásiiragúniña jáganiñu. ³⁵ Ñiñanu wúriña ásaaragúdüwatiña jadújeñu lídaangiñe ouweni joun.

Añájein giñe jíbiri, jiláguatiña lidan luweírín asúfuriruni ladúga jamájan jíchuguni janágan luágun Búngiu lun jamúga gayáraabei lan jígirawagúdüniwa. Jimein jamúti jáfarawagún jilágubei luágu líri Búngiu lun gayáraabei lan já sügürün lídaangiñe ouweni lídoun ában íbágarí le buídutimaati siélu. ³⁶ Jíbiri, áfagatiña léjerajouñ jáu, abeichúni, agürawagúni láu güringüri, luma adaürüni furísunrugu. ³⁷ Áfarawagúatiña láu dübü, asíarajouátiña jamídan jámagua, ouchawagúatiña lun jígiruni Búngiu, áfarawagúatiña táu efeín, anúrjatiña jábiñegiñe, ába jeréderun eíbugañajádügü, darúgu jougua láurügü jára mudún luma jára gábara, fugiábugu, láu idíjeri, ouserúa wuríba. ³⁸ Güri gía buri jagía ja ní lubei ubou madúna lumútiña, eíbugañajádügü jáña buga lidan buri fulásu mageirawati, áraabu, lidan buri lilúlun dübü weinamuti luma lidan buri júyu le múaruguti. ³⁹ Sun jagía, láu sun buídu lan affiñeni le jawágubei ligíbugiñe Búngiu, merésibirun jamúti lé buga uágubei lariñaga Búngiu luágu lichugubei lan joun lumútuñiña, ladúga machülü lan Wasálbaragüle ubouágun lidan jadáani, ⁴⁰ labúseerun Búngiu lun lídaanrügüba lan ában wáma jayábin lun jerésibiruni abíniruni le lichugubei Cristu joun lánigu.

12

Rúwamei warjín luágun Jesúsu

¹ Ítara líña meja jagáburidun sun jíbe güri gía jagía lidan dan le sügüjalíbei, láu jafiñen luágu Búngiu. Ában jémpulu jagía woun lun ítara méme lan wagáburi. Íbágarí le, queísigubeirügü ában eíbaaguni, gidáwamei sun le erédejabiliwa wawáriu, luma figou le agüragubaliwa, adúga wameí eíbaaguni

le wabáragiñebei láu gurásu, láu sun wafiñen luágu Jesucristu. ² Rúwamei waríjin luágun Jesúsu, le idaangiñebei liábin wafiñen, le giñe abuíduragüdúbalin wafiñen le gumúti. Súfuriti Jesúsu luágu gurúwa, mebéresenga ligia láu nibúsigarídúna lan luwúyeri ouweni ligía, lugúndun subúdi lání luágu lásun lánme lasúfurirun, lagúndaaruba lan, ába lañúurun luegiñe louñwenren Búngiu.

³ Lídan le jóuchawagúniwa, samína jumá lubeíti luágu lání Jesúsu jémpulu, luágu lawánduni sarágu súfuri jamagiñe gaffigoutiña, ligía mabúchadalá lubei juágu, máburujan ligíame jarúna. ⁴ Machülügídün lúmoun ouweni lídan jageíndagun lúma figou quei ligía. ⁵ ¿Bulíei jumásan dimúrei le líchugubei Búngiu jun queisi lirájüñü? Láriñajare tídan Lerérun.

Nirau, míchigabá mabájüdüni luágu abeichúni le líchugubei Babúreme Búngiu buágu lídan le wuríba lan bigáburu, máburujan ligíame barúna dan le ladeíjan bun.

⁶ Lugúndun arúfudajati Búngiu joun ja jinsiñebaña lun, beílumutiña giñe ja lerésibirubaña queisi lirájüñü.

⁷ Áfaga jumei abeichúni lúmagiñe Búngiu, lugúndun louuseruñadün queisi lirájüñü. ¿Níjein funági isáani mabeichun lumúti lúguchi? ⁸ Ánjaün mabeichun lan Búngiu, queisi labeichuniña sun lisáanigu, mámarügü jíña lisáanigu ja tímataatiña, bástadi jugúya. ⁹ Dán meja le ñúbürigidiwa, beíjamutiwa meja wagúbürigu, áni inébetiña meja woun. Lúntimaati wagáambuni Wáguchi le siélubei, lun gabágaribadiwa lan. ¹⁰ Jabeichuniwa meja wagúbürigu ya ubouágu lúnrügü murúsun ibágaru le, lun jagúriajaniwa buidu según jabáfu, ánjeinti Búngiu, lun waságarun buíti lídaangiñe labeichúniwa, labeichawa lun ladügüniwa lun buídu wamá ítara quei buídu lan. ¹¹ Inárüni luágu úa lan abeichúni áuti wagúndaara lídan le werésibiruni, gárirügüti woun, ánjeinti ja afúrendeirubaña lídaangiñe abeichúni, ibíjatiña ában ibágaru lánina ísuruni lúma darángilau lídaangiñe abeichúni ligía, lárigiñe.

Mamájara wamá lun Búngiu

¹² Rújuma lubeíti iséri érei lun jarúna le bucháalibei uágu lárigi asúfuriruni, lúma lún buri jigáchürügü le débíljalibei, ¹³ áluaja jumei úma le surúbei. Mígira jumá lébuna chugéguau lídan úma luei jeíguadun ja débiligíñabaña lídan jafiñen, íderaguarügü jumáña lun jóúdin jabáruaguouñ lídan jafiñen.

¹⁴ Jóúcha jumá lun lídan jumá darángilau jáma sun gürígia, abágarideina ában ibágaru le jarúmati, lugúndun le wíyebei igáburu, siñábei lachülürün lúmoun Búngiu. ¹⁵ Tounígi jumá luei níjein lan ában jídaangiñe meíbugunti buídu lúma Búngiu, ábame leféridiragüdüni jafiñen jíbiri queisi ladügüni jíduru gífiti le abíñaragubalin sun le agúrubei luágu. ¹⁶ Úa la ni ában jídaangiñe agámariduti mamáriedunga, míchugun ligíame mebéreseni luágu cátei le lánina Búngiu. Ligía cátei le meja ladügübei Esaú, ába lalúguruni lirícha queisi íbugañau luágu ában asíedu eígini. ¹⁷ Subúsiti jun luágu lárigiñe lán buga ladügüni, buséngili yebe lerésibiruni labínirun lúguchi queisi íbugañau, mabíjin láali, siñáali lasáansiraguni lúguchi le adúga láalibei láu sun layájuañan Esaú láu igárigu.

¹⁸ Jugúya, mayárafaduntün lun cátei le gayáraabei jasándiruni queisi lasúseredun joun Israelítagu dán meja le jerésibiruni binádu lidáradun Búngiu jáma. Yaráfatiña meja lun wúbü le Sión, le durúngubei láu wátu geméti, le ní lubei níjein lán meja lubúriga lúma luríbouga, ¹⁹ magáambun jumúti giñe lamúri fídu lúma lumálali Búngiu le adímurejabei joun. Ja agáambubalin umálali ligía,

ayúmuraguatiña lun jebé lan ladímurejan joun. ²⁰ Jadügünbalin líra lugúndun luweírin janúfude lueí lagúmadijan Búngiu, ladüga lariñajare. “Le íchuguti lugúdi luágu wúbü, afarúalá jilágubei láu dübü o tau lan ában efeín, íbini ában lan anímaalu”, ladüga fulásu ligía, níjein Búngiu ñi. ²¹ Weíriti lanúfunejabu cátei le jaríjubei, darí lun lariñagun Moisés guánarügü. “Nadádagaruña láu anúfudei.”

²² Ánjein jugúya, lábugiñe iséri darádu, ñübinjadün lun cátei weíriti sügü láu le únbei jayábin já buga lábugiñebaña binádu darádu. Yaráfaadün lun wúbü Sión le siélubei, lílanaadün lubúrugute Búngiu le wínwanbei, le ában Jerusalén le siélubei, le ñi lubei jagánawa sun ánjeligu, ja ájuduragubaña lun jíchugun uweíriguni lun Búngiu. ²³ Lídaañadün jadámurin lirájüñü Búngiu ja bürüwañubaña íri siélu. Lun Búngiu le agúseragüdübañi sun gürígia jayárafada, lídaañadün ában jáma ja ouwegubaña ja buídubaña igáburu ubouágu, áni buíngüda lumúti Búngiu lubuídun jagáburu siélu. ²⁴ Nübinjadün lun Jesúsu, le búyei lun iséri darádu, bajíwaguaadün láu líta Jesúsu lun lachibúniwa jifigoun, le ábanbei cátei weírítimaati sügü láu le labúseerúbei líta Abél—lun lagúseragüdüniwa Cain luágu láfaruni Abél jilágubei.

²⁵ Ligía mamájara jumá lubeí jagáambuni Búngiu. Meséfujaña ligía meja Israelítagu ja mebéresenbaña láu Búngiu, dán buri meja lerérunbei joun lídaangiñe Moisés, le ábanbei lílana ubouú, gúbume siñá lan weséfurun ánjein wíchiga wanágan luágun Búngiu lídan le ladímurejan woun lídaangiñe Liraü, le lílana siélu. ²⁶ Jingígüda lumúti meja lumálali Búngiu ubouú lídan dan ligíra, ánjeinti guetó lariñajare. “Nánjingichagüdübeiya mámarügü ubouú, ásta giñe siélu.” ²⁷ Dan le lariñagun “nánjingichagüdübeiya”, míni lan luágu lagídarúba lán buri cátei le márügüdünbei luágu ébuu derébuguti, ábame leréderun le siñábei lánjingichúniwa. ²⁸ Arúejiani le líchugubei Búngiu woun siñáti lánjingichún. Rúwama lubeíti eteíngiruni lun Búngiu luágu líra, judúga wamá lun láu inébesi lúma gúnfuli queisi labúseerun. ²⁹ lugúndun lagúmuchaguagüdübei Wabúngiute sun cátei le mabuídunti queisi lagúmuchaguagüdün wátu geméti cátei.

13

Ída líba lan wagúndaaragüdüni Búngiu

¹ Jínsiñegua méme jumá júmaga queisi idújeñu lueígiñe Jesucrístu. ² Mabúlieida jumei lun jebélaagüdüniña achülürütiña júbiñoun láu ugúndani. Sarágu jáña gürígia, rújaña ubáraü joun ánjeligu láu jadügüni cátei le, íbídiñoun joun.

³ Jarítagua jumá jawágu adaürütiña, queisigubeirügü jamúga giñe jadaürüña lan jáma. Jarítagua jumá jawágu ja ouserúbaña wuriba, quei níjein lan giñe ában úgubu juágu le gayáraati lasúfurirun.

⁴ Buíti cátei lun jagámaridun, áni lúnti júmaga jumá darí lun jóunwen. Ja asáansijatiña jámari lagúseragüdübaña Búngiu, lagúseragüdübaña giñe ja adügübaña salúfuri.

⁵ Míchiga jumei jínsiñejabu luágun seínsu, gúnda jumá láu le júmati, lugúndun líchugubei Búngiu le jemégeirubei jun. Aríñagaali. “Natoúnigirubadibu, mígirun nábume.” ⁶ Gayáraati lubeíti waríñagun láu afíñeni.

Nabúreme Búngiu íderagubalina, manúfudebadina.

Siñáti jadügün gürígia ni cáta náu ánjeingubeirügü busén Búngiu.

⁷ Jarítagua jumá jawágun ja arúfudajañaña jun, ja apúrichijabalin ugánu láni Búngiu jun, samína jumá luágu buíti le ñúbinjalibei lídaangiñe jabágari, falájumei jémpulu le láni jaffiñen.

⁸ Masáansiragunti ligáburi Jesucrístu, ligía meme gúñaarü, uguñe, lúma súnwandan. ⁹ Mafálara jumá arúfudajani le ámuñegueinarügüti luei le larúfudajabei Jesúsu. Resibítá wawáni érei lúmagiñe línsiñejabu Búngiu, siñáti terésibirun wawáni ni cáta lúmagiñe lúrudu buri luágu ti eigini. Igáburi ligía, miábinti lun ladügüba lan buíti joun ja afálarubalin.

¹⁰ Wagía affiñetiña luágu Crístu, ibíjatiwa giñe ában latárü, le gurúwabei le uágubei louwe Crístu luágu wafígoun. Ja asígirubaña láu binádu jagáburi juríu, siñáti gafánran jamá lídan le lichugubei louñwen Crístu. ¹¹ Jafádirin juríu le íñutimaabei belúgüda lumúti játa anímaalu lídoun Fulásu Sándutimaati quei adágaragüdüni luágu figoú, jágubu anímaalugu jagía, bougudi luei ubúругu lágudúa. ¹² Ítara líña giñe jiláti Jesúsu bougudi luei ubúругu lun lachíbuni wafígoun láu líta guánarügü. ¹³ Queímoun lubeíti lun Jesúsu, bougudin luei fulásu, bougudin luei binádu igáburi, asúfurireína ünabuni luágu líri queísi lasúfurirun wawágu. ¹⁴ Lídan uboú le, úati ni ában fulásu wáma le adúruruti lun sun dan, wálujañein ubúругu le lúnbei ñíjinbadiwa lan lárigiñe íbágari le. ¹⁵ Ligía lúnti lubei wíchugun eteíngiruni lun Búngiu súnwandan lídaangiñe Jesucrístu le wafádiriñebei. Eteíngiruni ligía, ligía luwúyeribei adágaragüdüni le labúseerúbei Búngiu wamágiñe. ¡Rúwama lubeíti uweiriguni lun láu wayúma! ¹⁶ Mabúlieida jumá jadügüni le buídubei, lúma lun jafánreinruni júmati jádan ja mabíjinbaña, lugúndun niján buri cátei le áubei lagúndaara Búngiu.

¹⁷ Gagáambadi jumá joun ja arúfudajabaña jun, derégegua jumá júngua joun, lugúndun jagía oúnigirubarun juwáni, áni quei jasúbudiruni, gásu jagúserun ligíbugiñe Búngiu luágu jatouñigirunún. Joucha jumá lun medéreragüdün jumáni jawádigimari, lugúndun mabuídunbei jamúga giñe líra jun.

¹⁸ Ayúmuragua jumá lun Búngiu wawágu, choúru wamúti luágu darángilañu líña lan waritagun quei busén wabei buídu lan woúserun lídan sun cátei.

¹⁹ Amúriajatina júma lun jayúmuragun lun Búngiu lúnya gayáraabei lan nídin aríjañ madíse.

Abíniruni buri lúma lagúmujoún buri mábugäi

²⁰ Ayúmuraguatina lun Búngiu, le íchugubalin darángilaü, le giñe ásaraagüdúbalin Wabúreme Jesucrístu lídaangiñe ouweni, lun líchuguni sun ubáfu le busénwabei jun, lun jadügüni lugúndan. Wabúreme Jesucrístu ában le atouñigiruti lumútuniña buídu queísi ában atouñigiruti mudún. Ítara líña ladüga líta, le achoúrurubalin lídáradun Búngiu, le adúrurubei lun sun dan, wáma. ²¹ Ayúmuraguatina giñe lun Búngiu lun luwádigimaridun jídan, lídaangiñe Jesucrístu, lun gayáraabei lan jíchugun ugúndani lun. ¡Uweiriguni lun Crístu lun sun dan! Ítaralá.

²² Nidújeñu, ayúmuraguatina jun lun jerésibiruni dimúrei le abürüja náalibei jun tídan murúsun gárada to. ²³ Niján ában ugánu jun— ¡furíjali wadúje Timotéo furísunrugugiñe! Ánjein ñúbin yájoun, nanügübei númagua dánme le nídin aríjañ.

²⁴ Mábuga níña joun sun tábutigu ligílisi lúma joun sun jíbiri wadújeñu lídan wafíñen. Mábuga jáña wadújeñu ja Ítalianu jun.

²⁵ Binílaün Búngiu sun jugúya, ítaralá.

LIGÁRADAN SANTIÁGO

Labürüjan Santiágo joun tilana ligílisi buri ja chagágubaña

¹ Áu Santiágo, eseríwiduti lun Búngiu lúma lun Wabúreme Jesucrístu áu, mábuga níña joun ja jadúgawagubaña dúusu lirájüñü Israél ja chagágubaña lídan sun ubou.

Subúdi le ñiübinbei lúmagiñe Búngiu

² Nidújeñu, lúnti gúndan jumá dan le jasúfurirun furúmieguarügü ouchwagúni. ³ Subúdi jumáli luágu dan lan le louchwagún jafiñen, furéndeitimaatün gagúraasuni. ⁴ Ítara líña lubeíti, maríbadalá jarítangun lueígiñe joúchwagún, lubáragiñe líra, ígira jumei ouchwagúni ligía lan líchugun lánwoun jugúraasun, lun loustarun lubuídun jigáburi, úouga mégeiti luágu.

⁵ Dan le ibídiñe lan jun cába lan jadúga lídan ában lénreengunga, amúriaja jumá lúma Búngiu, ábame lasúbudiragüdüni jun cába lan jadúga. Rulumuti Búngiu subúdi le jamúriajan lánigu lúma joun, quei jamúriajani, maríñagunga ni cáta joun luágu. ⁶ Lúnti jamúriajan láu afiñeni luágu líchugubei lan Búngiu le jemegeirubei jun, máma láu liloúguan afiñeni, le lougua tafíñen, ítara líña quei ában lugúdi barána le lanügübei garábali lueígiñe ában oúbaü lun luágun ámu. ⁷ Gürígia le medéraaguagüdünti lafiñen, marítagonalá luágu libjuba lan ni cáta lúmagiñe Wabúreme. ⁸ Lugúndun gürígia le afiñe líñabei, mafiñen, siñáti lasígirun ában igáburi le derégúdaguati luágu ni cáta.

⁹ Idújei le gudémebei, majirudalá luágu, gúndaalá luágu irisini le siélubei lubá. ¹⁰ Léti idújei le rísibei, manáangualá lúngua luágu, gúndaalá luágu larúfuduni Búngiu lun luágu mebégi lan lirisin lun ni cáta lídan cátei le lánina siélu. Lugúndun ítara líña rísiti quei lufúlurin jiduru, le siñábei ladúrarun. ¹¹ Dan le láfuridun wéyu, ába lásüdün sarágu, ába lásaurün jiduru, ába leíguadun lufúlurin, ába lagúmuchun lubuídunmeraü. Ítara lúba giñe rísiti. lachülürüba wéyu lun louñwen, ábame lígiruni sun láfaagun luágu seínsu.

Oúchwagúni lúma adúndejojúni lun wuríbani

¹² Gúndaati gürígia le awándubalin ouchwagúni láu gurásu, lugúndun dánme le láfuridun láu buídu, libjubei ibágari magúmuchaditi le uágubei lariñaga Búngiu luágu líchugubei lan joun ja jínsiñejabúbaña lun, queisi ában afáyeiruajáü, queisi ában rídi. ¹³ Dan le lebélorun lun ában gürígia lun ladügün cátei wuríbati, marítagonalá luágu Búngiu lan ádarubalin cátei ligía lídoun, lugúndun mebéluti lídoun Búngiu lun ladügün wuríbani, máda lumúti giñe jádoun gürígia lun jadügüni. ¹⁴ Lubáragiñe líra, dan le lacháwajani luríban layúmajan mútu, ligía láburujan lídoun ladügün le wuríbabei. ¹⁵ Lídaangiñe buri luríban ayúmajani le, liábin figou, ában ibágari lánina figou barüti ouweni.

¹⁶ Nidújeñu jínsiñetiña nun, mayéedagua jumá júngua arítagua luágu lúmagiñe lan Búngiu liábin wuríbani. ¹⁷ Lubáragiñe líra, sun buíti le íchugübei woun, le úabei mégeiti luágu, lúmagiñe Búngiu le adügübalin lilámpuna siélu liábin. Búngiu súnwandan ligía méme lan, úati sáansiguaü lídan quei lilámpuna siélu le gabúlubudadíbei. ¹⁸ Ligía lugúndaabei lun ladügüniwá lirájüñüme láu wafíñerun luágu lerérun le inárünibei, lun ítara wamá quei furúmiñeti alúbajani le íchugúti lun Búngiu lídaangiñe buri cátei le ladügübei.

Ligáburi agúnfuliruni lúma Búngiu le áubei lagúndaara

¹⁹ Ligía lubeíti, nidújeñu jinsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagáñidun, ²⁰ lugúndun gürígia le gáñibeí, madügün lumúti le áubei lagúndaara Búngiu. ²¹ Ígira jumeí lubeíti sun iwíyeni lúma luríban igáburi le jídaangilibeí, resíbi jumeí ugánu le bunáwaalibeí tídan janígi láu únabuni, lugúndun gabáfuti ugánu ligía lun lasálbarunun juwáni.

²² Adüga jumeí le taríñagubei Lerérun Búngiu, máma lun agáambarügü jumáni. Ánjein jarítagua jubeí luágu buidurügü lan lúnrügü jagáambuni Lerérun Búngiu, jeyéedaguña júngua. ²³ Le agáambarügübalin, madügün lumúti le lubeibeí, ítara líña quei ában gürígia le ariagubei lúngua tídan ában isúbusein. ²⁴ Aríja lumúti ída líña lan, áni quei lídin, ítara labúlieiduni ída líña lán buga. ²⁵ Ánjeinti gürígia le jéchubei atúriajei Lerérun Búngiu le úabei mégeiti lídan, áni furáangugüda láwa lueígiñe figou, mabúlieidun lubeí le lubeibeí, adüga lumúti le lariñagubei Lerérun Búngiu áni gúndaati le tímatamati.

²⁶ Gürígia le jarítagubei luágu gúnfuli lan lúma Búngiu áni siñá lumutu liñéñe erédera, leyéedaguña lúngua áni úati ju lan ligáburi lagúnfulirun lun ni cáta. ²⁷ Niján agúnfuliruni le jarúmabeí, le áubei lagúndaara Wáguchi Búngiu. lun wíderaguniña magübürigujaaña jáma würiña ja jiláaña úmari lídan jadíjeri, lúma lun madáseirun wamá láu buri cátei wuríbati le láni ubou le.

2

Lúnti ában lan láu janügün sun gürígia

¹ Nidújeñu, queísi jugúya lan gürígia ja afíñebaña luágu Wabúreme Jesucristu le weirigubei, mouñ lumuti ámu lan janügün ában gürígia jaweí jibiri. ² Queí buri jamúga, lun jamúga lebélorun ában wügüri lídoun jadámurin láu bágü gólu túma anáanguni finutu, belú ligía giñe ában gudémeti táu anáanguni juchécheeru, ³ ánjaün eténira lun le fínubei anáangun buídu, lun jaríñagun lun. “Ñurúba ya lídan ubáraü buíti”, jaríñaga lun le gudémebeí. “Amürü, reideibá rára, o ñurúba ya múarugu”, ⁴ janügüña ában gürígia ámu lueí le ában, áni jagúseragüdüña láu luríban arítaguni.

⁵ Nidújeñu jinsiñetiña nun, agáamba jumeí cátei le. anúadaja láaña Búngiu ja gudémebaña lídan ubou le lun risi jamá lídan jaffñen, lun giñe jerésibiruni arúejiani le uágubei lariñaga Búngiu joun ja jinsiñejabúbaña lun luágu líchugubei lan joun queísi jalágaante. ⁶ Ánjeinti jugúya, rújumutiña gudémetiña lídoun busíganu. ¿Máma funági risitiña ja wuríbabeí jouuserunün, áni barújamaün adúruujeina ligíbugiñoun lúruðu? ⁷ ¿Máma jagía adímurejabaña wuríba luágu líri Cristu, le inébebeí jun, le únbei jedéregeragua júngua?

⁸ Ánjein inárüni lubeí luágu gúnfuli jumáni líñun-ágei lúruðu queísi taríñaguni Lerérun Búngiu. “Jinsiñelá gürígia bíledi bun quei bínsiñegua búngua”, buíti jadüga. ⁹ Ánjein máma lubeí ában láu janügüniña sun gürígia, jadügüña figou, dúrügua jumúti lilúrudun Búngiu. ¹⁰ Lugúndun ánjein agúnfulira ában gürígia láu sun lúruðu, ígira lagúnfulirun ában lídaangiñe, gadúnrunti luágu ladúraaguni sun lugúmadin lúruðu. ¹¹ Lugúndun Búngiu méme le aríñagubei. “Madügabá salúfuri”, aríñagati giñe. “Máfarajabá.” Ánjein lubeíti madügün gürígia salúfuri, áni áfarajati, mídinti láu le lubeibeí lúruðu. ¹² Jugúya, lúnti jadímurejan, agáburida jugúyame queísi lúntiña jagúserawagüdün láu lúruðu le furáangugüdabaliwa lueí

lubáfu figou. ¹³ Ja magúdemejabubaña joun ámu, magúdemejabubei giñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáni agúseruni.

Afiñeni lúma wadágimanu

¹⁴ Nidújeñu, ¿cásan ju lan laríñagun gürígia luágu afiñe lan luágu Crístu ánjein madügün ni cáta lun larúfuduni? ¿Gayáraati funági lasálbaruni afiñeni ligía?

¹⁵ Quei jamúga guetó, njein ában idújei wügüri o würi emégeiruti anáanguni lúma eígini, ¹⁶ laríñaga ában jídaangiñe lun. “Buídulá lídin bun, darúguabá bougua, jou amürüme,” áni míchu lumúti le lemégeirubei lun, ¿cági ju lan líra?

¹⁷ Ítara líña lasúseredun lúma afiñeni. ánjein marúfudun jamá gürígia láu cátei le jadügübei, afiñeni labugarügü, Ítara líña quei ában cátei jiláali.

¹⁸ Fágua njeinbei aríñaguti. “Amürü afiñetibu, áu adúga numúti le buídubei.” Áu Santiágo aríñagatina lun idújei ligía. “Arúfudabeíti bafiñen nun bougudin luei buíti le badügübei, narúfudeime nafiñen bun láu buíti le nadügübei.”

¹⁹ Afiñetibu luágu ában rügüñein lan Búngiu, buíti badüga, afiñetiña giñe máfianu luágu líra, adádagara jagía láu anúfudei luei. ²⁰ ¿Májatibu bafiñerun, ibídiougua táu amürü le, luágu jiláñu líña lan lafiñen gürígia ánjein marúfudun lan láu le ladügübei? ²¹ Resíbi lumúti Búngiu Abrahám, le binádu wáguchi, queisi richáguati ligibugiñe luágu le ladügübei dan le lánjarun lún yebe láfaruni Isáac le liraü jilágubei queisi adágaragüdüni lun Búngiu. ²² Aríja báali luágu arúfuda láni Abrahám lafiñen láu cátei le ladügübei, áni ñübinti lafiñen lun dayárubei lan láu cátei le ladügübei. ²³ Ítara líña lagúnfulirun le bürüwañubei tidan Lerérun Búngiu. “Afiñeti Abrahám luágu Búngiu, áni luágu lafiñen, ába lerésibiruni Búngiu queisi wügüri richáguati ligibugiñe.” Áni aríñawagúati luágu Abrahám, “lumáda Búngiu.”

²⁴ Aríja jumáli lubeíti, luágu resíbi láni giñe Búngiu wügüri luágu buíti le ladügübei, úara lúma lafiñen, áni mámarügü luágu lafiñen. ²⁵ Ligía méme meja asúseredubei tun Raháb, to jóru lídan dan le sügüjalibei. resíbi lumútu Búngiu queisi richáguatu ligibugiñe dán meja le tarúfuduni tafíñen luágu láu cátei le tadügübei—safá tumútiña loúnagülegu Josué, ába tíderaguniña lun jagíribudun lídaangiñe ámu úma. ²⁶ Ítara quei jiláñu líña lan úgubu ánjein úa tubei uwáni lídan, jiláñu líña giñe jafiñen ánjein marúfudun jumá láu cátei buíti le jadügübei.

3

Lúnti wabúgurunun wañéñe wayúmulugu

¹ Nidújeñu, moún lumuti añájein lan sarágu jídan ja adáagutiña jóungua arúfudajatiñame lánina Lerérun Búngiu lugúndun subúdi jumáli luágu wagía lan le arúfudajabei, derégúdatimaabei lan wagúserawagüdün. ² Sun wagía adügatiwa cátei charáti, ánjein njein lubei ában gürígia madügünti ni murúsun charáti lídan le laríñagubei, ában wügüri buíti le gumúti ligía, le giñe gayáraabei labúguruni sun lúgubu. ³ Dan le wagürüni jayúma anímaalugu lun jagáambuniwa, gayáraati wabúguruni sun jágubu. ⁴ Aríja jumoún buri giñe úgúnein, láu sún buri weínamu tan áni jéreburi garábali le ádajabarun, abúgura lumútu abúguruti láu ában liraúraü simúnu le ñíjin lumúti labúseera. ⁵ Ítara líña giñe lasúseredun lúma wayúma, ában cátei ñúraúraüti, áni gayáraati ladügün sarágu buri cátei weínamuti. ¡Láu murúsun wátu geméti, gayáraati lágudún ában oúnwenbun áraabu! ⁶ Ítara líña wayúma quei ában wátu geméti. Gayáraati

wadügün sarágu wuríbani láu, gayáraati lagádeiruni sun le wagíabei. Gayáraati líchuguniwa lídoun wuríbani lídan sun wabágari, Máfia guánarü lébunabei sun le. ⁷ Gayáraati lagídaruni wügürí jagáñi sun jawúyeri anímaalugu gáñitiña—dunúru, jéwe, jáma anímaalugu baránajana—áni adüga láali. ⁸ Úati ni ában lun gayára lan lagídaruni ligáñi wayúma. Ában wuríbati ligía le mígiraguagüdünbei lúngua, áni buin líña láu peísini le gáfarajati. ⁹ Láu méme wayúma wadímureja buíti luágu Wáguchi Búngiu, láu giñe wiñaraguaña gürígia ja ladüga Búngiu lenéje. ¹⁰ Lídaangiñe méme ában iyúmaü láfurida dimúrei buíti lúma íñaraguni. Nidújeñu, moún lumuti ítara lan cátei le. ¹¹ ¿Gayáraati funági láfuridun dúna bímeti lúma dúna básuati lídaangiñe méme ában? Siñáti. ¹² ¿Gayáraatisan tagíndun ában tídibu fígi fáluma, ódi gayáraati tagíndun tídibu bebei fígi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibe

¹³ Ánjein níjein lubeí ában chu táu jídan, gunfaráanda ligía, arúfudaleí láu lubuidun louserun, láu ünabugubuni le líchugubei lisúbudin lun. ¹⁴ Ánjein níjein lubeí gimúgaü tídan janígi, áni jadügüni cátei láu jarítangun juágun guánarügü, moún lumútti janáangun júngua luágu jisúbudin, lugúndun iyéeni líra. ¹⁵ Máma niján luwúyeri subúdi le ñubinbei lúmagiñe Búngiu, ában subúdi le lánina uboú líra, le lánina jasáminan gürígia, le láni méme Máfia. ¹⁶ Lugúndun le ñi lumuti gimúgaü lúma marítawaguni jawágun ámu, níjein chagáguaü ñi lúma sun luwúyeri wuríbani. ¹⁷ Ánjaña ja gámabalin subúdi le lúmagiñebei Búngiu, furúmiñe níjein ában ibágari jarúmati jawágu, gálumatiña, areidatiña, gagáambaditiña, gudémejabutiña, adüga jamúti le buídubei, ában lábu janügüniña sun gürígia, furáangutiña. ¹⁸ Ja áluajabalin darángilaü, bunáguatiña ílaü lun lalúbajoúniwa ában ibágari le richáguati jádan, lúma jádan ámu.

4

Gamádaguaü lúma uboú

¹ ¿Cá buri ueígiñe jabúseera jawúribujan, lúma jageíndagun? Ladüga buri lagübüri ayúmajani le jídaanbei súnwandan. ² Buséntün som cátei, queíti siñá jumani ibíja, ába jáfarajan. Gimúgatün luágu som cátei, queíti siñá jumani ibíja, ába jageíndagun. Mibíjin jumúti le jabúseerúbei lugúndun mamúriajan jumáni lúma Búngiu. ³ Ánjein jamúriaja, mibíjin jumúti lugúndun luríban jamúriajani, jabúseeruni lun jagástaruni luágu lagübüri jugúndan. ⁴ ¡Gürígia múaraantiña! ¿Ibídinetísan jun luágu ánjein lan gamádagua jubeí lúma uboú, jáganiñein lan Búngiu? ⁵ ¿Jarítaguatünsan luágu mála lan le tariñagubei Lerérun Búngiu luágu buri cátei le? ¿Jarítaguatün funági luágu Espíritu lan le lagánawagüdübei Búngiu wádan ában lan espíritu le lánina gimúgaü? Uá. ⁶ Íderagua lumútiwa Búngiu láu lareíni, láu líchuguni ubáfu woun lun wáfaruni gimúgaü le wádaanbei jilágubei. Tariñajare Lerérun Búngiu. “Rúlumuti Búngiu lanágan jawágun ja barúguabaña joúngua, áni íderagua lumútiña ja ünabugubaña, láu lareíni.” ⁷ Rúgua jumá júngua lábugiñoun leréreejan Búngiu, rára jumá derégüdagu láu lubáfu Búngiu, mabáfu lámuga Máfia juágu, ábame lanúrajan jueí. ⁸ Yaráfa jumá lun Búngiu, ábame giñe layárafadun jun. Jugúya le busénbei jesériwidun lun Búngiu lúma lun uboú, gafígounjadün, ítara líña lubeíti, jarúmagüda jumeí jigáburí túma giñe janígi. ⁹ Lídan le jayárafadun lun Búngiu, aságüríja jumá luágu jifígoun láu águiraü. Gáritá janígi luágu luríban jigáburí lúma Búngiu, sáansigualá jugúndan

lun íruni luágu jifígoun. ¹⁰ Ûnabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹ Nidújeñu, madímureja jumá wuríba jawágu jíbirigu. Le adímurejati wuríba luágu lidúje, o ladárirun lan lidúnrun, ladímurejaña wuríba luágu lilúrudun Cristu le aríñagubei luágu moun láni ladügüniwa, áni ladáriruña mégeiti luágu. Ánjein jadüga líra lubáragiñe jadügüni le lubeíbei lúruđu, jíchaaguña júngua queísi agúseragüdüti. ¹² Ában rügüñein agúseragüdüti, le íchugubalin lúruđu ligía, le Crístubei méme, lérügü gabáfubei lun lasálbajan o lun lagúnrinchagun. Ánjein bugüya, ¿cátabuñadíbugi lun badárirun lidúnrun ámu?

Machoururunwalá luágu jarúga

¹³ Guetó, agáamba jumei cátei le, jugüya le aríñagubei. “Ugüñe o jarúga wouídiba lídan ítaga fulásu, ábame webélujan ñi ában írúmu, wawádigimaribei waseínsun lun wabíjin lánwoun.” ¹⁴ ¿Ída líñásan jasúbúsuruni cába lan asúsereda jarúga? ¿Cáteiñeigi jibágari? Ítara líña quei jeméeređu le asálrageubei luágu murúsun dan, lárigiñe ába lagúmuchagun. ¹⁵ Aríñagarügütün jamúga. “Ánjein busén Búngiu, wabágariduba, ábame wadügüni le o líra.” ¹⁶ Ánjeinti jugüya, jadímurejan láu pántaü luágu cátei le jarítageubei lun jadügüni, áni sun pántaü le, mabuídunti. ¹⁷ Afiñetina luágu ánja jumá lun sun le, wel, le subúdíjabubei lun ladügün buíti áni madügün lumúti, ladügüña figou.

5

Ewéridijani joun rísitiña

¹ ¡Agáamba jumei cátei le, jugüya rísitiña le wuríbabei igáburi! Chülüjali óra lun jayájuajan, wágua jugúyame luágu buri lamíselu le lúnbei jasúfuriruni. ² Ñaláali buri jírísín, jou jamáaru jamútiri janáangun to fínuboun. ³ Gájüjali jigólun lúma jáni pláta, áni láu cátei méme le, arijúati jarügüren, ábame jagúnrinchawagún lueígiñe camá jamuga láu wátu geméti. Oúndaraguaadün sarágu irisini lídoun buri lagümüjoún dan le. ⁴ ¿Ánti fáyeiti le míchu jubei joun ja ñadágimeinbalin jichári? Ánjein jamúga gayáraati, lagújaña jamúga fáyeiti ligía luágu jidúnrun, agáamba láali Búngiu jamúriajan ñadágimeintiña jagía juágu. ⁵ Rúguaadün júngua lun ában íbágarí lánina wéndeí lúma ugúndani ya ubouágu, íbija jumáali sun le jabúseerúbei quei jadíbunedagüdüniwa anímaalu lubá jáfarun, yaráfaali gíñe jagúnrinchawagún sun jugüya. ⁶ Rújadün jadúnrun ja madúnrunbaña, áfaragua jumáña jilágubei, madügünga jagía ni cáta le lébuna jáfaraguniña.

Gurásu lúma ayúmuraguni lun Búngiu

⁷ Ligía lubeíti, nidújeñu, gagúraasun jumá daríme liábin Wabúreme Jesúsú. Ábunaguti le agúrabubei ladügün alúbajani buíti, lúnti lagúrabajani furúmiñeti júya luágun líla línádirigu lúma lagümüjoún júya luágun lun láfunadun. ⁸ Gagúraasun jumá gíñe, máburujan ligíame jarúna, lugúndun madíseeli liábin Wabúreme. ⁹ Nidújeñu, mequejera jumá jawágu jidújeñu lueígiñe Jesucristu, magúserawagüdün jumámuga, yaráfaali lidáani Búngiu lun lagúseragüdün. ¹⁰ Nidújeñu, barü jumaña profétagu já meja adímurejabaña lídan líri Wabúreme queísi ában jémpulu lánina gurásu luágu asúfuriruni. ¹¹ Wagía, barü wamutiña ja awándubalin asúfuriruni queísi gürígia gúndaatiña. Agáambaadün

luágu lugúraasun Job, áni subúdi jumáli gíñe ída líña lan fuleísei láni Búngiu lagúmujoún óra, lugúndun areídati Búngiu, gudémejabu.

¹² Lougíñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachoururuni jerérún. Dánme le jariñagun “ánja”, lun ánja lan, dánme gíñe le jariñagun “uá”, lun gíñe uá lan, míchugun lámuga Búngiu jidúnrun.

¹³ Ánjein lasúfuriruña lubeí ában jídaangiñe, lúnti layúmuragun lun Búngiu.

¹⁴ Ánjein sándiñein lubeí, lúnti lagúarun joun tábutigu liglisi lun jayúmuragun lun Búngiu luágu, lúma lun jájurudaguni láu áili lídan líri Wabúreme. ¹⁵ Dánmeti le jayúmuragun láu afiñeni, ábame lareídagun sánditi, áni ánjein gíñe afigounjaali lubeí, ferúdunawabei lifigoun. ¹⁶ Ligía, gúfese jumeí lubeí jiffigoun joun jidújeñu lueígiñe Jesucrístu, áni ayúmuragua jugúyame jawágu lun jareídagun. Weíriti lubáfu ayúmuraguni lun Búngiu le ladügübei gürígia le buíti táu sun lanígi. ¹⁷ Proféta Elías ában meja wügüri quei wagía, dan le lamúriajanbei lídan layúmuragun lun Búngiu lun májuyun lan júya, reídeiti júya májuyunga ürúwarúmu-dimí. ¹⁸ Lárigiñe, dánya le layúmuragun, ábaya lájuyun júya, ábaya tájüchün sun inádirigu ubouágu.

¹⁹ Nidújeñu, ánjein egéyeda ában jídaangiñe lueí üma le richábei, liábin ámu lun lagíribudagüdüni, ²⁰ subúdi jumeí luágu furúmieguarügü lan agíribudagüdüti le afigounjabei lídaangiñe luríban lémeri, lasálbaruboun lan luwáni afigounjati ligía lueí tídin máfiougati, áni ferúdnagüdaleíme sarágu lifigoun gürígia lé yebe acháragadubei.

FURÚMIÑETU LIGÁRADAN PÉDRO

Labürüjan Pédro joun afiñetiña ja chagágubaña bougudi luei jageira

¹ Áu Pédro, ában láni Jesucrístu apóstolu áu, nabürüjañoun gárada to jun, jugúya lánigu Búngiu ja chagágubaña bougudi luei jageira louñawagu Pónto, Galácia, Capadócia, Ásia, lúma Bitínia. ² Nidújeñu, anúadaja láadün Búngiu Úguchili lúmagiñe meja binárú lun lánigu jumá, áni subúdi lumúti meja luágu lachülürüba lan ában wéyu lun ítara lúba lan, ladüga ligía lan lugúndaanbei. Ligía larúmadagüdañajañoun lubei Sífiri Sándu janígi láu líta Jesucrístu, adügalaün lun gagáambadi jumá. Ibija jumá lubeiti sarágu abíniruni lúma darángilau lúmagiñe Búngiu.

Louchawagüba jafiñen, ábame liábin buíti lídaangiñe

³ Rúwama uweírighuni lun Búngiu, le Lúguchibeí Wabúreme Jesucrístu, luágu luweírín lugúdemejabu woun. Rújali iséri ibágari woun queisi lirájüñü láu lásaaragüdüni Crístu lídaangiñe ouweni lúnya labágaridun. ⁴ Queisi lirájüñü wabeí, gayáraati weménigidun le gumúti luágu wabíjubei lan ubuíduni le aráanse láalibeí wabá, gayáraati weménigidun luágu werésibirubei lan alágan le areídañu lubei Búngiu wabá, siélu—ában alágan le lúnbei ladúrarun lun sun dan, le siñábei ladáseirun, le siñábei leféridiruni lubuídun. ⁵ Gounigi lumútiwa Búngiu láu lubáfu lugúndun afiñe wamá luágu, lun gayáraabei lan wabíjini asálbaruni lídaangiñe asúfuriruni lánina ubouú le, le aráanseñu lubei wabá larígiñeme lagúmuchun ubouú.

⁶ Ligía lébubei buin jíña lan láu ugúndani, láu sun lúnti lán funa jasúfurirun sarágu ouchawagúni luágu murúsun dan. ⁷ Lúnti jasúfuriruni ouchawagúni ladüga ítara líña lan jafiñen quei gólu—lúnti louchúniwa láu wátu geméti lun larijiniwa ca lan luwúyeribeí. Afiñeni le awánduti ouchawagúni ligía, buíti sügü láu gólu, lugúndun gagúmuchaditi gólu. Láu lubeiti jawánduni louchawagún jafiñen, ladímurejaba Jesucrístu buíti juágu dánme le lagíribudun ubouágun, jibíjuba giñe uweírighuni lúma inébesei lúmagiñe.

⁸ Jínsiñeti Jesucrístu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában ouñwenbun ugúndani le siñá jumuti aríñaga láu dimúrei. ⁹ Ladüga méme luweírín jafiñen luágu Crístu, jerésibiruñein tasálbarun juwáni.

¹⁰ Lídan meja dan le sügüjalibeí, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe. ¹¹ Subúdigüda lumútiija láni Crístu Espírítu joun wügüriña jagía le lúnbei lasúfuriruni Crístu lubáramegiwa, lúma uweírighuni le lúnbei liábin larígiñe. Jagíati, ábaja jóuchun jasúbudiruni cátei lan gürígia ligía, lúma ídaba lan lasúsereda cátei le, le uágubei lariñaga Sífiri Sándu le jádaanbei joun. ¹² Ába lasúbudiragüdüni Búngiu joun luágu mámaba lan lídan jádáani lagúnfulirúa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija gürígia jun lídoun buri dan le, láu lubáfu Sífiri Sándu le nübinbei siéluigiñe. Ásta ánjeligu, buséntiña jamúga giñe gunfaráanda jamáni buri cátei le.

Busénti Búngiu lun wabágaridun ában ibágari le jarúmati

¹³ Quei jagúrabajañein lubei jerésibiruni jalágaante siélu, gidájumei samínaü málati jaritagunrugugiñe, lubáragiñe líra, derégüdagulá jaritagun, rújumei sun jeménigi luágu asálbaruni le lúnbei líchuguni Búngiu jun láu lafeini dánne le lagíribudun Jesucristu ubouágun. ¹⁴ Queisi isáanigu gagáambaditiña, mabágarida jumá quei meja ligáburu jabágaridun lubáragiñe meja jasúbudiruni Búngiu. ¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei. ¹⁶ Taríñajare Lerérun Búngiu. “Jarúma jumá, lugúndun áu, jarúmatina.”

¹⁷ Queiti janügüni Búngiu quei Júguchi, Búngiu le ábanbei lábu ligáburu lagúseragüdüni jagáburu sun gürigia, lúnti júaradun lúma láu ában goúnigi sun dan le lúnbei jabágariduni ya ubouágu. ¹⁸ Sálba láadün Búngiu lídaangiñe lagübüri ibágari le meja jafúnrendeirubei jámagiñe binádu jagübürigu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queisi buri gólu o pláta, ¹⁹ láu líta Cristu le gebégibeí sügü láu sun cátei lafáyeirúa. Derégewati Cristu lun louñwen luágu wafigoun quei ában mudún le buídubei lídan sun luwúyeri, sálba wamámuga. ²⁰ Lúmagiñe lubáragiñe buga ladügüni Búngiu ubou, ába laráanserun lun Crístuba lan Wasálbaragüle, luágu lubeiti wafúleisein lachúlaagua Cristu lídoun lagúmujoún dan le, lun lasálbaruniwa. ²¹ Lídaangiñe Cristu, ába jiyábin lun jaffínerun luágu Búngiu le ásaaragüdübalin Cristu lídaangiñe ouweni, ru ligia uweiriguni lun, itara líña jiyábin lun jaffínerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu luegiñe Jesucristu jun le tímatimaati. Lúnti lubeiti jínsiñegua jumá júngua láu sun tarúman janígi, lúma láu sun jére, ²³ lugúndun iséri gürigia jugúya. Mámaadün jasáanigu agübürigu ja gouwedaditiña, lirájüñüjadün Búngiu láu jagáambuni lerérun le íchugubei ibágari, le giñe adúrarubei lun sun dan. ²⁴ Taríñajare Lerérun Búngiu.

Ítara jáña sun gürigia quei jíduru,
liábin jaweírigun quei lufúlurin jíduru.
Dan le lásaurün jíduru, ába láburujan lufúlurin,

²⁵ ánjein Lerérun Búngiu, duráti lun sun dan.

Áni dimúrei le, ligia ugánu le lánina asálbaruni le uágubei laríñawagúa jun.

2

¹ Ligia, queisi lirájüñüjadün lubei Búngiu, ígira jumei lubeiti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu. ² Ítara quei jabúseeruni irájüñü figigiña míligi jarúmati lun gayáraabei lan jaweínamudun, ítaralá giñe busén jumá lun jatúriajani Lerérun Búngiu buídu lun gayáraabei lan ledérebugudun jaffínen luágu Cristu. ³ Subúdíjadün murúsun luáguti luweírin lubuídun louseruniwa Cristu, lúnti líchugun subúdi ligia ában ouñwenbun ayúmajani jídoun lúntima jasúbudiruni Cristu.

⁴ Ayárafajoúa jumá lubeiti lun Cristu le gabágaribeí. Rútiña gürigia mebéreseni luágu, ánjeinti lun Búngiu, itara líña Cristu quei ában dübü le gebégiti sarágu, le lanúadirunbei lun ligiaba lan ébuu tun lilígilisin, áni sun ja afíñebaña luágu Cristu, jagía lilígilisinbaña Búngiu. ⁵ Ítara líña lubeiti, ígiraguagüda jumá júngua lun Cristu le rúlaalíbei ibágari magúmuchaditi jun, lun tadügüniwa

ában témpulu buítu lun Búngiu jídaangiñe, lun giñe ítara jumá quei fádirigu ja derégeguaña joúngua lun Búngiu, ja íchugubalin cátei le áubei lagúndaara lun, lídaangiñe Jesucrístu. ⁶ Ligía giñe taríñagunbei Lerérun Búngiu.

Noúnajañein Crístu lun ligíaba lan dúbü le weírigutimaabei tuágu nilígilisin lídan fulásu le gríbeí Sión.

Áni ja afiñerutiña luágu, buídubei lídin joun.

⁷ Weírítí lebégi Crístu jun, jugúya le afiñebei luágu, ánjeinti joun ja mafiñebaña, mebégití quei dúbü le únbei jamájara ábunagutiña. Láu sun líra, gúnfulijali le taríñagubei Lerérun Búngiu.

Dúbü le únbei jamájara ábunagutiña, ñübinja lun ligíaba lan furúmiñeti lídan bunáguañ.

⁸ Joun ja mafiñebaña luágu Crístu, gúnfulití giñe le aríñawagúbei.

Ában dúbü achúgeraguágülei ligía, le eíguadagüdüti gürígia.

Ja madügünbaña gásu láu ugánu lánina asálbaruni lídaangiñe Crístu, chugéguatiña luágu, fériditiña giñe lun sun dan, queisi laráanseruni Búngiu.

Ja lánigubaña Búngiu

⁹ Ánjeinti jugúya le afiñebei luágu Crístu, ában família anúadajoúatiña jugúya, fádirigu ja esériwidutiña lun urúei le Búngiu, gürígia lánigu Búngiu ja derégeguaña joúngua lun. Ítara líña cátei le, lun jadímurejan luágu buri cátei buíti le ladügübei Búngiu, le aságarubalin lídaangiñe lubúriga lun lídoun luewéirin larúgounga le líchugubei Búngiu. ¹⁰ Mibíjintün meja ában abúremein lun latoúnigirunün, guetó lánigujadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jesériwidun lun Búngiu

¹¹ Nidújeñu jínsiñetiña nun, jugúya queisi teréncha lídan uboú le, aganóutiña boúgudi lueí jageira, ayúmuraguátina jun lun mígiraguagüdün jumá júngua lun lagübüri buri ayúmajani le ageíndagubei túma juwáni. ¹² Buídulá jóuserun jádan ja ibídiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadügübei, ábame jíchugun uweíríguni lun Búngiu dánme lachülürün wéyu lun lagúseragüdün.

¹³ Queisi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya uboúga. Gúnfuli jumá lúma lugúmadin urúei, quei ligía lántima íñubei ufúlasun, ¹⁴ gúnfuli jumá giñe lúma jagúmadin gumádimatiña ja loúnajabaña lun jafáyeiragüdüniña ja múaradúnbaña lúma lúrudu, lúma lun jíchugun uweíríguni joun ja adügübaña buíti. ¹⁵ Busénti Búngiu lun jadügüni le buídubei, lun jámanichagüdüniña ja ibídiougaña áu, ja busénbaña jadímurejan wuríba juágu.

¹⁶ Queisi lirájüñü jumá Búngiu, ousera jumá queisi gürígia ja mámabaña idámuni lun ní ában gürígia, máma lueígiñe líra lun jadügüni le wuríbabeí, lubáragiñe líra, abágarida jumá queisi lidámun Búngiu. ¹⁷ Inébe jamá sun gürígia jun queisi lubúdubu, jínsiñe jamá jidújeñu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

¹⁸ Umúsuniña, inébe jamá jiyúbudirigu jun queisi lubúdubu, mámarügü ja buídubaña júma, ásta giñe ja wuríbabaña. ¹⁹ Lugúndun labínirubei Búngiu gürígia le awándubei asúfuriruni le mébunati láu larítangun luágu Búngiu.

²⁰ Ánjaun adüga cátei wuríbati, jafáyeira luágu, málati gagúraasun jumá luágu líra, ánjaun asúfurira lueígiñe jadügün cátei buíti, ába jawánduni láu gurásu, buíti líra ligíbugiñe Búngiu. ²¹ Lun luwúyeri igáburi le lagúara Búngiu juágu, quei sáfuri lubei Crístu juágu láu gurásu, íchiga ában jémpulu jun lun jafálaruni. ²² Madügünti Crístu ni ában figóu, meyéeragun ligía gürígia ni ában weíyaasu. ²³ Dan le janábuni, moúnabunti láu anábajani, dan le jasúfuriragüdüni, masiadirun lumútiña, lubáragiñe líra, derégeguarügüti lúngua lun Búngiu le agúseragüdübei lau ísuruni. ²⁴ Barü lumuti Crístu guánarügü wafígoun luóúgua luágu gurúwa lun weréderun quei jiláñu lun figóu, lun wabágaridun ában ibágari le lánina ísuruni. Buleíseiwati lun wareídagun. ²⁵ Ítara jíña meja quei mudún ja féridijaña, ánjein guetó, ñübinjadün lun Crístu le oúnigirubalün queísi jóuniri mudún, toúnigiloún juwáni.

3

Ligáburi jabágaridun maríeitiña

¹ Ítara giñe jugúya würiña gámaritiña, derégegua jumá júngua joun júmarigu, lun ánjein lan mánjagiña lubei lun ugánu lánina asálbaruni, gayára lámuga jayábin lun jafíñerun luágu Crístu, maríñagunga jugúya ni cáta joun luágu asálbaruni, ² láurügü jarjini lubuídun jóuseruniña láu inébesi lúma larúman igáburi. ³ Mámala láu buri cátei boúguditi jibíti jewéndeda, quei buri lanárime aroúrugini, arígeilaü lúma buri bángüli le gólu, anáanguni wéndegutu. ⁴ tídaanlá janígi jewéndeda, le ábanbei ubuíduni le meféridirawadíbei. Ában igáburi bímeti, darángila, ligía cátei gebégíbei sarágu ligíbugiñe Búngiu. ⁵ Ítara liñá meja ligáburi jewéndedun würiña já meja derégeguañabaña jóungua lun Búngiu lídan meja dan le sügüjalíbei. Jeménigitiña meja luágu Búngiu, derégegua jagía jóungua joun jámarigu. ⁶ Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadüga le buídubei, manúfudeiga luei ni cáta.

⁷ Jugúya giñe wügüriña, áfaagua jumá lun gunfaráanda jumániña júmarigu. Rújumei jafúlasun joun, mámarügü lueígiñe mére tántima würi, lugúndun giñe rúlaani Búngiu ibágari méme magúmchaditi le líchugubei jun láu lareíni, joun. Adüga jumei ítara, úa lámuga ni cáta lun leréderunün luei jayúmuragun lun Búngiu.

Ja asúfurirubaña lueígiñe jadügüni le buídubei

⁸ Abágarida jumá sun jugúya lídan úarani lúma láu gudémejabu jídaangua, jínsiñegua jugúyame júngua queísi idújeñu lueígiñe Jesucrístu. Areída jumá, únabu ligíame janáangun júngua. ⁹ Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abíniruni, lugúndun lun jerésibirun abíniruni lúmagiñe Búngiu lagúaraün. Lugúndun tariñajare Lerérun Búngiu.

¹⁰ Le busénti labágaridun ában ibágari buíti, lúma giñe ában ibágari lánina ugúndani,

lúnti loúnigiruni liyúma luei ladímurejan wuríbani, maríñagun ligíame iyéeni.

¹¹ Lúnti ladísedun luei wuríbani lun ladügüni buíti, lálujani darángilaü lun labágariduni súnwandan.

12 Lúnti ítara lan ligáburí, ladüga toúnigi lumútiña Wabúreme Búngiu ja richáguabaña ligíbugiñe, agáambaleí jayúmuragun lun.

Ánjein ja adügübaña wuríbati, magúndaati Búngiu jáu.

13 ¿Cábagi gayára ladügün wuríbati jun, ánjaün íchaagua júngua lun jadügüni buíti súnwandan? 14 Áni íbini jasúfurirun ladüga lísurun jibágari, gúnda jumá ladüga fuleiseiwa jumá lidan le jasúfurirun luágu Crístu. Manúfude jumá lueí ní ában, madíjeri ligíame jarítagun. 15 Derégeguarügü jumá júngua le gumúti lun Crístu quei Jabúreme, aráanseñu jumá súnwandan lun jounabuniña ja álügüdütün ca lan ueígiñe jeménigida luágu Crístu, láu maweíriguni lúma láu inébesei. 16 Buídulá jóuserun, darángilañu támuga janígi, lun ja lan adímurejabaña wuríba luágu lubuidun jigáburí queisi affíñetiña luágu Crístu, nibúsigari jamámuga luágu jerérun guánarügü. 17 Buítimaati lun jasúfurirun lueígiñe jadügün buíti, ánjein ítara líña lubeí labúseeruni Búngiu, sügü láu lun jasúfurirun lueígiñe jadügün wuríbati.

18 Jarítagua jumá luágu luweírín lasúfurirun Crístu dán meja le loúnwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagía le wuríbabei, lun lanügüniwa lun Búngiu. Áfarúati jilágubei, wínwantu láni Espírítu. 19 Quei Espírítu, nüdúnti gíñe apúrichija joun espíritugu ja lídaanbaña jafúlasun jiláaña. 20 Espíritugu jagía, gürígia ja wínwanbaña lídan meja lidáani Noé, magáambaditiña meja gürígia jagía lun Lerérun Búngiu láu sun arúfuda láni Búngiu luweírín lugúraasun joun lídan le lagúrabajani tagúmchún árcá to ladügüboun Noé. Mánjatiña jagáambuni Búngiu, ába jasálbarun wídürügü gürígia lídaangiñe luweírín gúnran ligía. 21 Dúna ligía, ítara líña quei lidúnarina badísei guetó, le idaangiñebei wanügüwa lun wasálbarun. Máma lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu wafíñerun luágu Crístu, luágu gíñe sálbaadiwa lan láu lásaarun Crístu lídaangiñe ouweni lúnya labágaridun. 22 Múdeiti Crístu siélun, áni níjein guetó ñun lueígiñe loúnwenren Búngiu jáu sun ánjeligu jáma sun jíbiri ubáfu siélu labúgiñe lubáfu.

4

Wesériwidun láu ubáfu le líchugubei Crístu woun

1 Ligía, ítara quei súfuri lubeí Crístu ya ubouágu wawágu, lúnti gíñe aráanseñu wamá lun wasúfurirun láu gurásu luágu. 2 Le súfurijalíbei luágu Crístu, ígira láali figou lun labágariduni líbiri libágarí queisi lugúndan Búngiu, máma lun líchugun ugúndani lun lagübüri ayúmajani. 3 Lídan meja dan le sügüjalíbei, adüga jumúti meja luríban burí cátei le jínsiñebei joun ja íbídiñejabubaña lun Búngiu, jaganouña meja lídan íbágarí nibúsigarídünati, gúnfulitün meja lúma luríban jayúmajan, abácharuada, adáagua fédu, átagua sarágu, ájuduragua joun sándu, le mouñbei ladügüniwa. Buídürügaali dan le abágarida jumáalíbei ítara. 4 Guetó, weírítu janígi já meja jumádagubaña láu mafála jumáaña lan lídan lagübüri íbágarí le, ligía jadímurejanbei wuríba juágu. 5 Ánjeinti jagía, jagúfeseeruba ligíbugiñe Búngiu, le aráanseñubei lun lagúseragüdüniña wínwangiña jáma jiláguaaña, madíse. 6 Ligía apúrichijoua lubeí meja luáguti asálbaruni joun ja jiláguañaña guetó, lun gayáraabei lan gabágarí tan jawáni láu libágarí Búngiu, láu sun jilá lan jágubu queisi lasúseredun joun sun gürígia.

⁷ Yaráfaali lagúmuchun ubouú, ligía lúnti lubeí aráanseñu jumá, ragúgua jugúyame júngua, derégegua jugúyame júngua lun ayúmuraguni lun Búngiu. ⁸ Lougíñe sun cátei, níjeinlá sarágu ínsiñeni jídan joun jíbirigu, lugúndun ánjaün jínsiñejabu, ferúduna jubeí jafígoun ámu juágu, láu sun gíbe lan. ⁹ Resíbi jumáña gürígia júbiñe láu sun jugúndan. ¹⁰ Rújali Búngiu ában ubáfu lun ságü afiñeti lágu Crístu, itara líña lubeíti, seriwi jumá joun jíbirigu láu ubáfu le rúlaalíbei Búngiu jun, queísi ouñiri buítiña lánina ubáfu buri le líchugubei Búngiu. ¹¹ Le gabáfubei lun lapúrichijan, lúnti ladügüni queísi ában le adímurejati dimúrei lúmagíñe Búngiu. Le esériwiduti, adügaleí láu sun érei le líchugubei Búngiu lun. Sun cátei le jadügübei, adüga jumeí lídan ában igáburi le lúnti líchugúniwa uweírighuni lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweírighuni lun sun dan. Ítaralá.

Wasúfurirun queísi lánigu Crístu

¹² Nidújeñu jínsiñetiña nun, maweíridalá janígi láu buri lidíjeri ouchwagúni le jibíjubei, camá jamuga ába cátei ámuti asúseredubei jun. ¹³ Lubáragíñe líra, gúnda jumá luágu gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu ubouágun láu sun uweírighun. ¹⁴ Fuleiseiwatün ánjaün anabúa lueígíñe lánigu jumá Crístu, lugúndun arúfuda lumúti líra luágu níjein lan Sífiri Sándu, le weírigubei, jídan. ¹⁵ Ánjein asúfurira ában jídaangiñe, lun máma lan lueígíñe láfarajan, o lueígíñe lan líwerujan, ni lueígíñe ladúraaguni líbiri lúrudu, ni lueígíñe leméterun lídoun cátei le miábinti lun, mídin. ¹⁶ Ánjeinti asúfurira mútu lueígíñe lánigu lan Crístu, mouñ lumuti lanügün busíganu, lúnti líchugun eteíngiruni lun Búngiu luágu lánigu lan Crístu.

¹⁷ Chúlújali dan lun lagúmeserun luweírin asúfuriruni, jámagíñe guánarügüba lánigu Búngiu lagúmesera. Ánjeinti lagúmeseruña lubeí asúfuriruni itara wámagíñe, weírítimaabei jasúfurirun ja mánjabaña jerésibiruni lerérun Búngiu. ¹⁸ Ánjeinti jénreengu lubeí jasálbaran ja buídubaña, ¿cábagi asúsereda joun ja wuríbabaña, jáma ja gafígounbaña? ¹⁹ Ja lubeíti asúfurirubaña queísi labúseeruni Búngiu, lúnti itara méme jáma adügei le buídubei, derége jamouñme jawáni lújaburugun Búngiu le adügübalíña, lugúndun gayáraati weménigidun luágu Búngiu lun lagúnfulirun láu lerérun.

5

Lerérun Pédro joun afiñetiña

¹ Níchuguñein nerérun jun, jugúya ja ábutigubaña lídan jadámurin afiñetiña, queísi ábuti lan gíñe áu quei jugúya, áni geféentina gíñe luágu lasúfurirun Crístu, áni gabárabadina gíñe quei jugúya lídan uweírighuni le lúnbei líabin. ² Touñigi jumáña lirájüñü Búngiu ja lábugiñebaña jaríaaan queísi jóunigiruniña jóuniri mudún mudún. Adüga jumeí láu ugúndani queísi labúseeruni Búngiu, máma ladüga jafósuruña lan, adüga jumeí ladüga busén jumá jesériwidun lun Búngiu, máma ladüga línsiñegu seínsu. ³ Mousera jumá camá jamuga jabúriña ja lábugiñebaña jaríaaan jugúya, jóucharügü jumá lun ában jumá jémpulu buíti joun. ⁴ Ítara lúba, dánmeti le líabin Jesucrístu, le jóuniri mudún le tímatimaati, jibíjuba ában uweírighuni le weírighuti le ladúraruba lun sun dan, le mítaraanbei quei ridi le láuti ubánaü le gásaürati.

⁵ Jugúya gürígia ñübürigiña, rúgua jumá júngua lábun jagúmadin weíyaaña mútu. Lúnti jeseríwidagun sùngubei jóunigua láu manáanguni únguaü, lugúndun tariñajare Lerérun Búngiu.

Magúndaanti Búngiu jáu ja barúguabaña jóungua, áni íderagua lumútiña ja manáangunbaña jóungua, láu lareíni.

⁶ Rúgua jumá lubeíti júngua ünabu lábugiñe lújabu Búngiu le gabáfubei, lun gayára lan líchuguni uweíriguni jun dánme le lachülürün dan ligía. ⁷ Madíjeri jumá luágu ni cáta, ígira jumei sun cátei lun Búngiu, lugúndun laríjiña jáu le tímatimaati.

⁸ Agáguduañu jumá, ragúguañu jumá júngua, lugúndun eíbugañajádügü líña Máfia le jágani queisi líñún gáñiti áluaja cába lan lagünrinchagua.

⁹ Mígiraguagüda jumá júngua lun, derégüdagu jumá lídan jafiñen, subúdiñu jumei luágu ligía méme lan gíñe jasúfurirubei jidújeñu lueígiñe Crístu lídan sun fulásu. ¹⁰ Lárígiñeme sáfurijadün lan luágu murúsun dan, ladügübadün Búngiu lun úa lan mégeiti luágu lubuídun jigáburí, derégüdagu lídan jafiñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírigun le magúmuchadibeí, lídan ában lúma Jesucrístu. ¹¹ Ligía le Súnti Gabáfu lun súnwandan. Ítaralá.

Lagúmujoún buri mábugaü

¹² Noúnajañoun tiraúraü gárada to jun lúma Silváno, le nanügübei queisi ában idújei úaraguati, lun nichugun dügüdaguü lun jafiñen, geféen áume jun luágu abíniruni lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madísedagua jumá lueí línsiñejabu Búngiu ligía.

¹³ Mábuga jáña affiñetiña ja Babilóniabaña jun, ja gíñe lanúadajabaña Búngiu lun lánigu jamá queisi lanúadajanün. Mábuga líña gíñe Márcos jun, le ítarabei camá jamuga niraü. ¹⁴ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.

TIBÍAMAN LIGÁRADAN PÉDRO

Labürüjan Pédro joun afñetiña

¹ Áu Simón Pédro, ában esériwiduti lun Jesucristu áu, ában giñe láni apóstolu. Nabürüjañoun gárada to jun, jugúya le ñübinjalibeí lun gafánran jumá lídan luweírín asálbaruni le wabíjubeí lídaangiñe Wasálbaragüle Jesucristu, le méme Wabúngiute, lugúndun úragua lan. ² Ibíja jumá sarágu abíniruni lúma darángilaü lueigiñe jasúbudiruni Wáguchi Búngiu lúma Wabúreme Jesús.

Igáburi le lúnbei jóuseruni afñetiña

³ Rúlaali Búngiu sun le wemegeirubeí woun lun wabágaridun lúma lun wesériwidun lun, láu lasúbudiragüdüni Jesucristu le agúarubeí woun lun gafánran wamá lídan luweírigin lúma lubuídun cátei le ladügübei. ⁴ Gúnfuliti Búngiu láu lerérun, lídaangiñe Jesucristu, láu líchuguni le buídutimaabei lúma le weírítimaabei woun. Láu líra, gabáfu wamá lun wanúrajan lueí lagübüri ayúmajani lánina ubou le, ibíja wamámugeí ligáburi Búngiu wádan. ⁵ Ligía lúnti lubeí jáfaagun lun jíchugun lubuídun igáburi lánwoun jafiñen, ⁶ subúdi luágu Búngiu lánwoun lubuídun jigáburi, ragüguaü únguaü lánwoun jisúbudin luágu Búngiu, gurásu lánwoun ragüguaü únguaü, edéregeraguni únguaü lun Búngiu lánwoun gurásu, ⁷ areíduni lánwoun edéregeraguni únguaü lun Búngiu, insíñejabuni lánwoun areíduni.

⁸ Ánjein níjein buri lubeí igáburi líra jídan le tímatimaati, mámabei luágu ni cáta jisúbudin luágu Crístu, áni líchuguba jibágari sarágu cátei buíti lun Crístu.

⁹ Ánjeinti le mítaraanbei ligáburi, ítara líña queísí ában marjinti o ában lan madíse tarijin, bulieílá luágu chibáwaali lan binádu lífígoun. ¹⁰ Ligía lubeíti nidújeñu, queí wájali lubeí Búngiu jun, anúadajalaün lun lánigu jumá, áfaagua jumá lun lájüchün buri cátei le jídan, ánjein jadüga ítara, máburujabadün lídoun féridi.

¹¹ Ítara lúba úa lan ni cáta ásiñeragüdüti jebélurun lídoun larúeijan Wabúreme Wasálbaragüle Jesucristu, le magúmuchadibeí.

¹² Ligía narítaguagüda mémebadün lubeí luágu, láu sun subúdi jumáli lan, áni jeíbuguñta lan lídan inárüni ligía. ¹³ Láu sun líra, sun wínwangídina lan, afñetina luágu buídu lan lun nagúaruni jarítangun lun luwúyeri ibágari le lúnbei jabágariduni queísí lánigu Crístu. ¹⁴ Subúdigüda láali Wabúreme Jesucristu nun luágu yaráfaali lan wéyu lun nouñwen, ¹⁵ ítara líña lubeíti, nadügübei nuáraati lun íbini lánme lárigiñe jíladina lan, lun súnwandan lan jarítangun luágu buri cátei le.

Já buri aríjubalin luweírigin Crístu

¹⁶ Arúfudajani le wíchugubeí jun luágu lagíribudun Wabúreme Jesucristu ubouágun láu sun luweírín lubáfu máma meja úraga, aríja wamúti meja luweírigin láu wágu. ¹⁷ Aríja wamúti dan le líchugunbei Búngiu Úguchili inébeséi lúma uweíriginuni lun, ába laríñagun lumálali Búngiu lun lídaangiñe uweíriginuni lánina siélu. “Niraü le jínsiñebeí nun le, le áubeí ouñwenbun lan nugúndan.”

¹⁸ Agáamba wamúti ladímurejan Búngiu ítara luágu Wabúreme Jesucristu dán meja ñíñadiwa lan lúma Wabúreme luágu wübü le biníwabei.

¹⁹ Níjein giñe ában cátei chouúrítimaati wáma luágu liábin Wasálbaragüle ubouágun—ligía ugánu le jabürüjabei profétagu. Buíti jadüga lun jatúriajani

jerérun wügüríña jagía, ladüga líchuguba lan larúgounga tun janígi queísi ában lámpu le adúnraaguti lídan ában fulásu le búrigati. Lesériwiduba jerérun woun itara darime dan le lagribudun Crístu ubouágun, le itara lúbabei queísi larúgadun dan le táfuridun warúguma to lánina bináafin—wasúbudirubei sun cátei lídaanme dan ligía. ²⁰ Lougíñe sun cátei, lúnti jasúbudiruni luágu úa lan ní ában gayáraati ladáriruni laníchigu cátei le búrü jamaalíbei profétagu láu lání lúnga. Busénwati lubáfu Sífiri Sándu lun gunfaráandawa lan, ²¹ lugúndun madímurejaantiña meja wügüríña jagía láu jáni jóungua. Jagía, quei meja wügüríña jabei derégeguatiña jóungua lun Búngiu, dimúrei buri lúmagíñeti Búngiu jadímurejabei lugúndun Sífiri Sándu lan adúndejabaliña.

2

Ja arúfudajabaña iyéeni

¹ Añájein meja yéetiña jádan warásan ja aríñagubaña luágu profétagu jamá, itara lúba gíñe añájeinbaña lan jádan, jádaruba iyéeni lagánagua arúfudajani le inárünibeí lun lagádeiruni jafíñen. Jarúfudubeiti yéetiña jagía láu luwúyeri jabágaridun luágu máma lan Crístu Jabúremebei, láu sun jilá lan Crístu lun lasálbaruniña. Láu cátei líra, janügüba agúnrichaguni furése joun guánarügü.

² Gíbeebaña afálarutiña lídan liwíye jémeri, áni ladímurejóuba wuríba luágu úma le inárünibeí jadüga. ³ Láu línsiñe seínsu joun, jaságaruba seínsu jueí láu jarúfudajan le málabei, le ñúbinbei lídaangíñerügü jachügü, chouúti luágu jagúseragüdúwaba lan luágu luríban jadüga, yaráfati jeféridirun queísi laráanserúniwa jabá lúmagíñe binárü.

⁴ Úati ferúduna láníña Búngiu ánjeligu já meja afigounjabaña, ába lachágaraguniña máfiougatin, ába lígiruniña adaúrúwa lídan lubúriga ñi agúrabajeí wéyu lánina lagúseragüdúniña. ⁵ Úati gíñe ferúduna láníña Búngiu mútu wuríbatíña já meja aganoubaña ubouágu lídan lidáani Noé. Ába louñajani gúnran jawágu gürígia jagía, Noé rügüñen le apúrichijabei joun gafígountiña lun jasaansiruni jagáburi, jámaya sédú gürígia lánwoun asálbara. ⁶ Darí lumuti gíñe meja jadúnrun gürígia ja aganoubaña ubúrugu Sodóma lúma Gomórra. Ába láguduni fulásu buri ligía darí lun ladáagun balígime, lun larúfudajan joun gürígia wuríbatíña ja lúnbaña jayábin járigíñe ca lan lafáyeijabei figou. ⁷ Séfu lumúti meja Lot, ában meja wügürí buíti, le weírubei lidíjeri luágu liwíye jagáburi gürígia wuríbatíña lídan fulásu ligía. ⁸ Ságüja wéyu lasúfurirun wügürí buíti ligía tidan lanígi láu laríjini lúma lagáambuni cátei buri wuríbati le jadügübei. ⁹ Sun le, ában jémpulu luágu ligáburi lasálbaruniña Búngiu ja derégeguabaña jóungua lun lueí ouchwagúni, ígira láña ja wuríbaña lábugiñe asúfuriruni lubá jasiadrúniwa lun sun dan lídaanme wéyu lánina agúserawagüdúni.

¹⁰ Lasúfuriragüdátimabaña Búngiu ja afálarubalin liwíye jayúmajan, ru jagía mebéreseni luágu le lubeíbei Búngiu. Arúfudajatiña magáambaditiña ja jagánaguabaña, barúguatiña jóungua, mebéresentiña láu ní cáta, marúfudun jagía inébesi joun ja weíriguabaña, anábarügü jamaña. ¹¹ Ánjañati ánjeligu, láu sun jéretima jamá, gabáfu jagía sügü jáu arúfudajatiña jagía, míchuguntiña jadúnrun ánjeligu wuríbatíña ligíbugiñe Búngiu, láu anabúni.

¹² Ánjaña arúfudajatiña ja, itara jáña queísi anímaalugu úati gunfaráanda jamá, jagúriajouñ lun járügüdün lun jafarún. Adímurejatiña wuríba luágu buri cátei le úati gunfaráanda jamáni, jóüweguba queísi jóüwegun anímaalugu,

¹³ asúfurireina lueígiñe jasúfuriragüdün ámu. Nibúsigarídünati jabágaridun, adáagua jamúti lagübüri jayúmajan lídan larúgounga, ligíbugiñe laríjin sun ubou, dari lun júaradagun júma lídan jufédun queisi jamúga gürigia buítña, wiyeti jabágarí.

¹⁴ Siñáti jaríjin ában würi lun úa lan suámei jamánun, mabúchati jawágu adáagua figou. Acháwaja jamútiña débilitiña lídoun figou, bíbutiña luágu memeníjabuni. Chouúruti luágu jagünrinchagúba lan. ¹⁵ Féridiña jáña, lugúndun jígiruni úma le surúbei. Falá jamuti láni proféta Baláam, le liraü Beór, jémpulu, lé meja álugubei lagáñeirun seínsu láu ladügüni le wuríbabei. ¹⁶ Ábati ladeñjan ában burígü mariñagaditi lun luágu lifigoun, adímureja ligía lun láu jamálali gürigia, ába mígirun láni lun lasígirun láu lilülün láu.

¹⁷ Ítara jáña arúfudajatiña yéetiña ja queisi w-élu mábeiti, queisi buri juánriñu le lanügün garábali, siádiwaaña lun jasügürün sun dan lídan luweírin-ágei lubúriga máfiougati. ¹⁸ Lugúndun aríñagatiña dimúrei buíduburiti, le málati, aríñaga jagía luágu gayára lan jagúnfulirun, ja afálarubaliña, lúma luríban jayúmajan, adúga jamei furúmieguarügü iwíyei le jabúseerúbei. Ítara líña jacháwajaniña ja sun líñabei jaséfurun lídaangiñe binádu luwúyeri jabágaridun lánina buléiguaü, lun jagíribudun járigouñ lídoun liwíye ibágarí. ¹⁹ Aríñagatiña joun jánigu luágu jabágariduba lan ában ibágarí le ní lumuti gayára lan jadügüni le jabúseerun, ánjeinti jagía guánarügü idámuniñanu lun Máfia, lugúndun sun gürigia lidámuñein cátei le árügüdübalin. ²⁰ Ja subúdi jamáalibeí Wabúreme Jesucrístu le Wasálbaragüle, aní séfujaña lídaangiñe iwíyei le lánina ubou le, ánjanaya áburuja lídoun buri cátei le lúnya larügüdüniña, wuríbatimaabei le lúnbei gádan láníña sügü láu meja furúmiñe. ²¹ Buítimaati jamúga meja joun lun masúbudirungubei jamáni úma le surúbei, sügü láu larigiñe lan jasúbudiruni, ába jígiruni lerérun Búngiu joun. ²² Jawágu lagúnfulira linárün dimúrei le. “Léchun oúnli lun leíginiya lewérajan, léchun búiruju le sun liñábei lágoun jarúmati, lúnya lágoun lídan gubégubeti.”

3

Lagíribudun Wabúreme Jesucrístu ubouágun

¹ Nidújeñu jínsiñetiña nun, nuján tibíaman gárada nabürüjan jun. Tídan biángubei gárada, jóuchatina lun narítaguagüdünün luágu arúfudajani inárüniti le furéndeí jumáalibeí, lun gayáraabei lan jasáminarun buídu luágu. ² Jarítagua jumá luágu buri cátei lé meja jaríñagubei profétagu, lúma luágu lugúmadin Wabúreme Jesucrístu le Wasálbaragüle, lé meja warúfudajabei wagía apóstolugu jun.

³ Lídaangiñe sún buri cátei le waríñagubei, rútima jumei le jarítagunrugun. luágu lídoun lánme lagúmujoún dan, añájeinbaña gürigia éjerajatiña láu buri cátei luáguti Búngiu, jabágariduba queisi laríñaguni luríban jayúmajan joun, ⁴ ábame jaríñagun. “¿Másan jaríñajare luágu liábinyaba lan Crístu ubouágun? ¿Jalíñañeinsan? Lúmagiñe jóúwegun furúmiñetiña afíñetiña luágu Jesucrístu, ítara mémegili sún cátei queí meja lúmagiñe ladügünbei ubou.”

⁵ Mabúseeruntiña jasúbudiruni luágu ladügüni Búngiu sun cátei lídan lidáni lun ladügüniwa. Adúga lumúti meja siélu lúma ubou lúmagiñe binárü láu lugúmadin, adúgaleí múa lídaangiñe dúna, geyégu líña giñe múa ligía láu dúna. ⁶ Ába lachülürün dan lun lagünrinchaguni Búngiu ubou meja ligíra láu lidúnarina gúnran. ⁷ Ánjeinti siélu lúma múa le guetóbei, lareiduñein Búngiu

lubáme wéyu dánme le lagúseragüdün. Lídaanme wéyu ligía, lágudubei Búngiu siélu lúma ubou le gumúti láu lugúmadin. Ja madügünbaña gásu láu Búngiu, jágudúba lídan wátu ligía.

⁸ Mabúlieida jumei gíñe, nidújeñu jínsiñetiña nun, luágu ítara líña lan ában wéyu ligíbugiñe Búngiu quei mílu irúmu, mílu irúmu quei ában wéyu.

⁹ Mára jamúgatiá lugúndun ladárasarun lagúnfulirun Búngiu láu lerérun, queisi jarítagn sarágu, gagúraasunrügúti jába gürígia lugúndun mabúseerúnti lun lefériðirun ni ában jádaangiñe, labúseerun lun jaságüríjan sun gürígia lídaangiñe jáfígoun, gayára lámuga jasálbarun.

¹⁰ Lachülürüba wéyu ligía lun lagíribudun Wabúreme Jesucrístu ubouágun dánme le magúrábúniwa lan, queisi lachülürün jíweruti áriebu. Ábanmeti lagúmuhagun siélu láu ában lanárime ireíni, rürüguagüdaleíme wátu geméti sun cáteí le ñíbeí—játi, warúguma, wéyu—gudáme ubou láu sun cáteí le lídaanbei.

¹¹ Queísiti lagúnrinchaguba lan sun cáteí ítara, lúnti lubeíti jarúma lan jabágaridun, derégeguañu júngua lun Búngiu le gumúti, ¹² agúrabañu jumei lachülürün luwéyuri Búngiu, adügañu jumei le juáraati lun jóufudajani. Lídaanme wéyu ligía, lagúnrinchaguba siélu láu wátu geméti, ábame larürüdagun sun cáteí. ¹³ Ánjeinti wagía, agúraba wamúti iséri siélu lúma iséri ubou le uágubei laríñaga Búngiu woun, sun cáteí ñi, úraguabei, áni buídubei gíñe.

¹⁴ Ligía lubeíti, nidújeñu jínsiñetiña nun, sun anjünja lan agúrabajei buri cáteí le, jóucha jumá lun ladárirunün Búngiu lídan úraguni ligíbugiñe, jarúmañu, úouga mégeiti juágu. ¹⁵ Subúdi jumeítia luágu lagúrabaja rügüña lan Wabúreme Jesucrístu jasálbarun gürígia lubá lagíribudun ubouágun. Ítara líña gíñe labürüjan wadúje Páblo le jínsiñebei woun sarágu, jun, láu subúdi le líchugubei Búngiu lun. ¹⁶ Adímurejati tídan sún buri ligáradan luágu buri cáteí le, láu sun nújein buri lan tídaangiñe, jénreenguti gunfaráandawa tan. Játi ibídouguabaña áu jáma ja loúguabaña affíñe, garábaguati laníchigu labürüjan Páblo según jagía, ítara quei jadüga tún buri tibiri líburu to Lerérun Búngiu. Jefériðiruba lun sun dan ladüga cáteí le.

¹⁷ Ligía lubeíti, nidújeñu jínsiñetiña nun, queisi subúdi jumáli lubei buri cáteí le lubáramegiwa, toúnigigua jumá júngua lueí jeyéedunün gürígia wuríbatíña, ígiragüdei arúfudajani le inárüniti luáguti Búngiu jun. ¹⁸ Jóucha jumá lúntima jasúbudiruni Wabúreme Jesucrístu le Wasálbaragüle, awáanse jugúyame lídan línsiñejabu. ¡Uweíriguni lun, guetó lúma súnwandan! Ítaralá.

FURÚMIÑETU LIGÁRADAN APÓSTOLU JUAN

Dimúrei le lánina ibágari

1 Wabürüjaña jun luágu Búngiu Irájü lé buga njeinjalibei dan le lagúmeserunbei sun cátei. Ába liabin Búngiu Irájü ubouágun queisi ában gürígia, aríja wamúti láu wágu, agáamba wamei ladímurejan. Aríja wamúti sun le ladügübei, gurú wagía luágu láu wájabu. Ligía le idaangiñebei liábin sun ibágari, ligía giñe le gíribei “Dimúrei”. 2 Ába liábin ubouágun, quei nubeiabei jun, aríja wamúti, geféen wagía luágu, áni guetó wabürüjaña jun luágu. Níñein Búngiu Irájü lúma Búngiu Úguchili lúmagiñe furúmiñeti dan, ába liábin ubouágun queisi gürígia lun gayáraabei lan wasúbudiruni. 3 Wafúraanguagüdúñein lubeiti jun le aríja wamáalibei ladügün, lúma le agáamba wamáalibei lariñagun, lun gayáraabei lan jafiñerun le tímatisaati, lídan jumámuga ában wáma lídan cátei lébei, lídaañadünme giñe ában lúma Búngiu Úguchili lúma Jesucristu le Búngiu Irájü, queisi wagía. 4 Ítara lúba dayárubei lan wagúndan, sun wagía.

Ítara líña Búngiu queisi lámpu

5 Niján ugánu le larúfudajabei Crístu woun, le giñe wíchugubei jun guetó. luágu ítara líña lan Búngiu queisi ában lámpu, mánti ni cáta lúma lubúriga. 6 Ánjawa aríñaga luágu lídaañadiwa lan ában lúma áni madügün wamúti le lariñagubei, lídaañagidiwa lubúriga, áni weyéedaguña woúngua láu wariñagun luágu lídaañadiwa lan ában lúma, lugúndun múaran lan wagáburi lúma linárün. 7 Ánjein úaragua lubei wagáburidun lúma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucristu sun wafígoun. 8 Ánjawa aríñaga luágu mafígoun wamá, weyéedaguña woúngua, maríchatí le wariñagubei. 9 Ánjein wagúfesera wafígoun, gayáraabei weménigidun luágu Búngiu luágu ladügübei lan le úaraguabei—ferúduna lubei wafígoun, jarúmagüda lówame lídaangiñe sun wuríbani. 10 Ánjawa aríñaga luágu madügüngidiwa lan figou, wadügüñein Búngiu camá yéeti, áni merésibirun wamágili lerérun tídan wanígi.

2

Adímurejati Crístu lueígiñe wafúleisein ligíbugiñein Búngiu

1 Nirájüñü, nabürüjañein buri cátei le jun lun mafígounjan jumá. Láu sun líra, ánjawa afígounja, ladímurejaba Wabúreme Jesucristu lueígiñe wafúleisein ligíbugiñe Wáguchi Búngiu, ladüga ligía rügüñein richágua ligíbugiñe Búngiu. 2 Lídaangiñe Jesucristu ferúdnawa lan wafígoun, áni mámarügü wafígoun, ferúdnawati giñe jafígoun sun ja affínebaña luágu.

3 Ánjein wagúnfulira lugúmadin Búngiu, wasúbudirubei luágu chülújadiwa lan asúbudirei Búngiu. 4 Ánjein aríñaga ában gürígia. “Subúdi numúti Búngiu”, áni magúnfulirunti táu lugúmadin, yéeti gürígia ligía, ibídiñegili Búngiu lun. 5 Ánjeinti gürígia le adügübalin le lubeiabei Búngiu, chülújali Búngiu insiñeda lun buídu buídu, ítara líña wasúbudiruni luágu lídaañadiwa lan ában lúma. 6 Le aríñaguti

luágu lídaañein lan ában lúma Búngiu, lúnti labágaridun queí meja labágaridun Jesucristu ya ubouágu.

Le iséri gumádi

⁷ Nidújeñu, mámatia iséri gumádi le nabürüjabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úragua lúma ugánu ligía. ⁸ Guetó narítaguagüdúñadün luágu gumádi le lagúarubei Jesucristu iséri gumádi, áni gumádi ligía, lun jínsiñegua wamá wouñiwagua. Ítara líña meja labágaridun Jesucristu, jabágariduña giñe ítara lugúndun jeibuguña lan lídan larúgounga le linárünbei Búngiu, mámaañadün lídan lubúriga.

⁹ Le aríñaguti luágu leíbuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun. ¹⁰ Le jínsiñejabuti joun lidújeñu lueígiñe Jesucristu, lídaañein larúgounga, subúdi Crístu lun, áni úati ni cáta lun láburugdüni lídoun figoú. ¹¹ Ánjeinti le iyéreejabuti lun lidúje, ítara líña queísi gürigia le eíbugubei lídan lubúriga, ibídiñeti lun jalíñounbei lan lugúndun darú lani lubúriga laríjin.

¹² Nirájüñü, nabürüjaña jun lugúndun ferúduna láali Búngiu jifígoun ladüga Crístu. ¹³ Agübürigu, nabürüjaña jun lugúndun subúdi jumáli lan Jesucristu lé meja nýjeinalíbei lúmagiñe furúmiñeti dan. Nñübürigiña, nabürüjaña jun lugúndun gáñei jumáli lan wuríbu luágu Máfia.

Nabürüjanbei jun, nirájüñü, lugúndun subúdi jumáli lan Búngiu Úguchili. ¹⁴ Nabürüjaña jun, agübürigu, lugúndun subúdi jumáli lan Jesucristu lé meja nýjeinalíbei lúmagiñe furúmiñeti dan. Nabürüjanbei jun, nñübürigiña, lugúndun jere jumá, áni resíbi jumáli lerérun Búngiu tídan janígi, lugúndun giñe gáñei jumáli lan wuríbu luágu Máfia.

¹⁵ Mínsiñedalá ligáburí uboú jun, ní buri cátei le lánina uboú. Siñáti lajínsiñedun cátei lánina uboú jun, jínsiñeme Búngiu jun, ¹⁶ lugúndun úati ni cáta lídaangiñe cátei le líchugubei uboú nñübinti lúmagiñe Búngiu, lúmagiñe guánarügü uboú liábin. Luríban jayúmajan gürigia, ayúmajani lun jabíjini cátei le jaríjibeí le uágubei jaritagua luágu buídu lan, lúma pántaú luágu cátei le jabíjibeí, ligía buri cátei le líchugubei uboú. ¹⁷ Áni uboú, agúmucheina líña láu buri sun luríban ayúmajani le lídaanbei, ánjeinti le adügüti lugúndan Búngiu, labágariduba lun sun dan.

Inárüni lúma iyéeni

¹⁸ Nirájüñü, chülújali lagúmujoún dan. Agáambaadün luágu inite lan Láгани Crístu, queí chülúguaaña lubeí sarágu láganiñu Crístu guetó, ligía wasúbudirunbalin luágu lagúmujoúnjali lán buri dan le. ¹⁹ Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun laríjiniwa furáangu luágu máma lan wánigu le tímatisaati.

²⁰ Ánjeinti jugúya, rúlaali Crístu Sífiri Sándu jun, áni subúditün sun jugúya lun. ²¹ Nabürüjanbei lubeíti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan liábin ni murúsun arúfudajani múaraanti lídaangiñe inárüni.

²² Ja arúfudajabalin le múaraanbei, ja aríñagubaña luágu máma lan Jesús Crístubei le loúnajabei Búngiu uboúagun lun lasálbaruniña gürigia, jagía láganibaña Crístu, maffñetiña ni luágu Búngiu Úguchili, ni luágu Búngiu Irájü.

²³ Sun ja májabaña lun jasúbudiruni Jesúsu queísi Búngiu Irájü, ibídiñegili Búngiu Úguchili joun, ja aríñagubaña luágu Jesúsu lan Búngiu Irájü, subúdiți gíñe Búngiu Úguchili joun.

²⁴ Ligía, areída jumeí lubeí ugánu le jagáambubei lúmagiñe furúmiñeti, tídan janígi. Ánjein jadüga ítara, jeréderuba gíñe lídan ában lúma Búngiu Irájü lúma lúma Búngiu Úguchili, ²⁵ jerésibiruba gíñe ibágari le magúmuchaditi, queísi laríñaguni Jesúsu woun. ²⁶ Ligía nerérunbei jun jawágu láganiñu Crístu jagía já yebe busénbaña jayéedagunün. ²⁷ Níjein Sífiri Sándu júma le líchugubei Crístu jun, memégeiruntün lubeíti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabei, máma iyéeni.

²⁸ Ítara líña lubeíti, nirájüñü, ítara méme jumá lídan ában lúma Crístu lun dánme lan le liábin, gayára lámuga wasúbudiruni luágu buídu wamá lúma, úa lámuga busíganu wawágu ligíbugiñe. ²⁹ Queísi subúdi jumáni luágu richágua lan Crístu lídan sun cátei, lúnti gíñe jasúbudiruni luágu lirájüñü lan Búngiu sun ja richáguabaña ligíbugiñe.

3

Lirájüñü Búngiu

¹ Aríja jumá luweírín wínsiñe lun Búngiu Úguchili, darí lun gayára lan lagúarúniwa woun “lirájüñü Búngiu”, áni inárüni luágu lirájüñü wamá. Ligía siñá jabáliwa lánigu ubou gunfaráanda lugúndun ibídiñeti meja Jesucrístu joun lídan linárün cátei dán meja le ya lan ubouágu. ² Nidújeñu jínsiñetiña nun, lirájüñüjadiwa Búngiu guetó, áni marúfudúngili woun cátabadiwa lan lídaanme lagúmujoün, subúdirügü wamúti luágu dánme lan le lagíribudun Crístu, ítara wába lan quei ligía, lugúndun waríjubei ítara quei lubeí. ³ Áni sun le agúrabajabálin buri cátei le, jarúmagüda lumúti ligábari ítara quei jarúma lan ligábari Crístu.

⁴ Ánjeinti sun le afigounjabei, dürügua lumúti lilúrudun Búngiu, lugúndun luágu cátei figoubei ladúraawagún lilúrudun Búngiu. ⁵ Subúdi jumáli luágu lun lan lagídaruni Jesucrístu wafígoun liábin ubouágoun, luágu gíñe úa lan ni murúsun figou luágu. ⁶ Sun lubeíti le lídaanbei ában lúma, máma lídaañein figou, áni sun le lídaanbei figou, maríjin lágili Jesucrístu, masúbudiruni lágili gíñe. ⁷ Nirájüñü, mayéedawagua jumá, ában gürígia richáguati ligíbugiñe Búngiu adüga lumúti le richábei, queísi richágua lan Jesucrístu. ⁸ Ánjeinti le eíbugubei lídan figou, lánigu Máfia, lugúndun afigoujati Máfia lúmagiñe furúmiñeti dan, ába liábin Liraü Búngiu lun lagünrinchaguni luwádigimari Máfia.

⁹ Úati ni ában le liraüti Búngiu asígiruti lídan figou, lugúndun níjein ibágari le líchugubei Búngiu lun lídan, siñáti lasígirun lídan figou lugúndun liraü lan Búngiu. ¹⁰ Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madügünbalin le buídubei, o mínsiñejabu lan lun lidúje lueígiñe Jesucrístu, máma lánigu Búngiu.

Jínsiñe jamá wíbirigu woun

¹¹ Niján ugánu le jagáambubei lúmagiñe furúmiñeti dan. lun jínsiñegua wamá wámagua. ¹² Moún lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuríba lán meja le ladügübei Caín, áni buíti le ladügübei lamúlen, ligía lagímugajanbei.

¹³ Nidújeñu, maweíridalá janígi ánjaün eyéreeguda joun lánigu ubouú.
¹⁴ Wagía, ítara wáña meja queísi jiláaña, guetó ibíjaadiwa ibágari magúmuchaditi, áni subúdi wamúti líra lugúndun jínsiñetiña wadújeñu lueigiñe Jesucrístu woun. Le mínsiñejabuti lun lidúje, jiláñu mémegili. ¹⁵ Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágari lan le magúmuchaditi. ¹⁶ Subúdi wamúti cátei lan ísiñenibeí. Luágu lichuguni Jesucrístu libágari wawágu. Lúnti giñéti wánjarun lun wíchuguni wabágari jawágu wíbirigu. ¹⁷ Ánjein níjein lubeí lúma ában gürígia lun lawínwandun, áni laríja luágu níjein lan lemégeirun lidúje áni míderagun lumúti, ¿ída lubági níjein lan ínsiñeni tídan lanígi lun Búngiu?
¹⁸ Nirájüñü, mouñ lumuti wayumárurügü lan wínsiñejabu, lúnti ában lan ínsiñejabuni le gumúti, lun laríjin lídan cátei le wadúgübeí.

Eménigini ligíbugiñe Búngiu

¹⁹ Ánjawa jínsiñejabu le gumúti, gayáraabei wasúbudiruni luágu lánina wamá afíñeni le inárüntibeí, gayáraabei giñe wasúbudiruni luágu buídu lan weréderun ligíbugiñe Búngiu. ²⁰ Ánjoun jamúga íchiga wanígi dúru wawágu luágu som cátei, subúditimaati luáguti dúru ligía lun Búngiu, lugúndun subúdi lan sun cátei lun. ²¹ Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu weménigi luágu, ²² luágu lichugubei lan sun le wamúriajabei lúma woun, lugúndun gúnfulijadiwa láu lugúmadin áni adúga wamáali le áubei lagúndaara. ²³ Lugúmadin Búngiu, lun wafíñerun luágu Jesucrístu le Liraü, lun giñe jínsiñegua wamá wámagua queísi meja laríñaguni Jesúsú woun. ²⁴ Ja agúnfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbeí woun.

4

Láni Búngiu Espíritu lúma láni lágani Crístu espíritu

¹ Nidújeñu jínsiñetiña nun, mafiñera jumá joun sun ja aríñagubaña luágu Búngiu lan adímurejabei jayúmugugiñe, jóucha jumáña lun jaríjini ánjein Sífiri Sándu lubeí le jádaanbei o máma lan ligía. Lugúndun labuínchuña ubouú jáu yéetiña ja aríñagubaña luágu Búngiu lan adímurejabei jayúmugugiñe áni jayéeni. ² Láu igáburí le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatimaati liábin Crístu ubouúagun, níjein Sífiri Sándu lídan áni láu lubáfu Sífiri Sándu ladímureja. ³ Ánjeinti le aríñaguti luágu iyéeni lan, luágu mayábin lan Crístu ubouúagun queísi gürígia, úati Sífiri Sándu lídan, espíritu le láganibeí Crístu, ligía espíritu le lídaanbei gürígia ligía. Agáambaadün luágu liábinba lan espíritu ligía, níjeinjali ubouúagu.

⁴ Nirájüñü, lánigu Búngiu jugúya, gáñeí jumáña yéetiña jagía ja busénbaña jagáraguagüdüñün lueí arífudajani le inárüntibeí, gáñeí jumáña lugúndun gabáfutimaati Sífiri Sándu le jídaanbei sügü láu láni Máfia espíritu le jádaanbei. ⁵ Lánigu ubouú jagía, lánina ubouú cátei le jarífudajabei, ligía lébubei jagáambuniña ja giñe lánigubaña ubouú. ⁶ Ánjein wagía, lánigu Búngiu wagía. Le subúdíjabubei lun Búngiu, agáamba lumútiwa, le mámabei lánigu Búngiu, májati lagáambuniwa. Ítara líña lubeíti gayáraati wasúbudiruni cátaña lan erésibirubalin linárün Búngiu lúmoun cátaña lan erésibirubalin iyéeni.

Ligáburí Búngiu lun larífuduni ínsiñejabuni

⁷ Nidújeñu jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñejabuni. Sun le jínsiñejabubei, liraü Búngiu, áni subúdiiti giñe Búngiu lun. ⁸ Le mínsiñejabuti, íbídiñegili Búngiu lun, lugúndun ligáburu Búngiu lun larúfuduni ínsiñejabuni. ⁹ Arúfuda lumúti Búngiu wínsiñe lun láu loúnajani Liraü le ábanrügüti ubouágun lun loúnwen, lun gabágari wamá lídaangiñe. ¹⁰ Niján ínsiñenibeí. máma luágu wagiá lan jínsiñejabubei lun Búngiu, luágu ligía lan jínsiñejabubei woun, ába loúnajani Liraü le ábanrügüti lun loúnwen, lun lébuname ferúdnawa lan wafígoun.

¹¹ Nidújeñu jínsiñetiña nun, ánjein jínsiñeediwa lubeí lun Búngiu ítara, lúnti giñe jínsiñegua wamá wámagua. ¹² Úgali ni ában aríjiti Búngiu, láu sun líra, ánjava jínsiñegua wámagua, njein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu. ¹³ Rúlaali Búngiu Sífiri Sándu woun lun lachouúrurum luágu lídaañadiwa lan, áni wádaañein lan giñe. ¹⁴ Wagiá guánarügü aríja wamáali Liraü Búngiu, aríñaga wameí luágu lun lan lasálbaruniwa loúnajei Búngiu ubouágun. ¹⁵ Furúmiéguarügü le afíñerubei luágu Liraü lan Búngiu Jesús, labágariduña lídan Búngiu, áni labágariduña giñe Búngiu lídan.

¹⁶ Ítara líña wayábin asúbudirei lúma afíñera luágu jínsiñe wamá lun Búngiu. Ligáburu Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña giñe Búngiu lídan. ¹⁷ Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragüdüniña Búngiu sun güriága ladüga wagáburiduña lan ya ubouágu queísi Jesucrístu. ¹⁸ Ánjein jínsiñe Búngiu woun le gumúti, manúfudebadíwa luágu le lúnbei ladügüni woun, láu luweírin línsiñe Búngiu woun, gidáti sun anúfudei waweí. Ánjein janúfude wabeí lueí Búngiu, ladüga wagúrúbajaña lan láburujan ligáñi wawágun. Ligía, ánjein janúfude lubeí ában güriága, machülügüliirügü líña Búngiu ínsiñeda lun le tímataimaati.

¹⁹ Wagiá, jínsiñeti Búngiu woun lugúndun wínsiñedun lun furúmiñe. ²⁰ Ánjein aríñaga ában güriága. “Jínsiñeti Búngiu nun”, áni mínsiñeti libíri lun, yéti güriága ligía, lugúndun ánjein mínsiñe libíri ában güriága lun, le aríja lumúti, siñábei giñe jínsiñe lan Búngiu lun, le maríjin lubeí. ²¹ Rúlaali Crístu gumádi le woun. le jínsiñejabuti lun Búngiu, lúnti giñe jínsiñe lan libíri lun.

5

Wagáñeiruni wuríbu lúma ubou

¹ Sun ja afíñebaña luágu Jesús lan Crístubei le loúnajabei Búngiu, jagía lirájüñübaña Búngiu, áni sun ja jínsiñejabubaña lun Wáguchi Búngiu jínsiñejabubaña giñe joun lirájüñü Wáguchi Búngiu. ² Subúdi wamúti luágu dan lan le jínsiñe lan Búngiu woun áni adüga wameí le lubeíbei, jínsiñe jamá giñe lirájüñü Búngiu woun. ³ Ladügüniwa le lubeíbei Búngiu, ligía ínsiñejabunibeí lun, áni majürüti lugúmadin, ⁴ lugúndun sun le liraübei Búngiu, mabáfuti cátei lánina ubou luágu. Wafíñen, ligía cátei le íchigubei ubáfu woun lun wagáñeirun luágu cátei lánina ubou. ⁵ Le afíñebei luágu Jesús lan Liraübei Búngiu, ligía rügüñein gayára lagáñeirun luágu cátei lánina ubou.

Geféenwa lan luágu Liraü Búngiu

⁶ Jesucrístu ligía ñübinbei láu bián seíni luágu ligía lan Liraübei Búngiu. bián seíni ligía, duna le lánina labásterun, lúma jítaü le lánina loúnwen. Mámarügü láu

dúna, láu dúna lúma jítaü. Áni Sífiri Sándu guánarügü geféenti luágu cátei le, ligía arúfudubalin sun inárüni woun. ⁷ Añájein ürüwa geféentiña luágu cátei le siélu. Búngiu Úguchili, Búngiu Irájü, lúma Búngiu Sífiri Sándu, áni ában méme jagía, ⁸ njein gíñe ürüwa cátei geféenti múarugu luágu Jesúsu lan Liraübei Búngiu. Sífiri Sándu, dúna le lánina labásterun Jesúsu, lúma jítaü le lánina louñwen. ⁹ Resibi wamúti le jariñagubei wügüríña, gúbuméti lúnti lan werésibiruni le lariñagubei Búngiu guánarügü luágu Liraü lan Jesucrístu. ¹⁰ Le afíñeti luágu cátei le, choúru lumúti tídan lanígi luágu inárüni lan, le maffínebei, adüga lumúti Búngiu camá yéeti, lugúndun maffínen lan luágu le lariñagubei Búngiu luágu Liraü. ¹¹ Le lariñagubei Búngiu, luágu rújali lan ibágari magúmuchaditi woun, áni lidaangiñe lan Liraü liábin ibágari ligía. ¹² Le njeinbei Liraü Búngiu lúma, njein gíñe ibágari le lúma, ánjeinti le úabei Liraü Búngiu lúma, úati gíñe ibágari le lúma.

Lagúmujoún buri lerérun Juan tídan gárada to

¹³ Nabürüjañein cátei le jun, jugúya le afíñebei luágu Liraü Búngiu, lun jasubudiruni luágu gabágarí jumá le magúmuchaditi.

¹⁴ Jeménigitiwa luágu Búngiu, lugúndun subúdi wamúti luágu ánjava lan amúriaja furúmieguarügü cátei queísi labúseerun, lagáambubadiwa. ¹⁵ Áni ítara quei wasúbudiruni luágu agáamba láni Búngiu wayúmuragun, subúdi wamúti gíñe luágu louñabubadiwa lan.

¹⁶ Ánjein aríja ában gürígia luágu ladügüña lan ában libíri ában figou le mámabei lúnti lanügüni lídoun féridi lun sun dan, lúnti layúmuragun lun Búngiu, ábame líchugun Búngiu ibágari lun gürígia ligía. Njein figou anügüti gürígia lídoun féridi magúmuchaditi, málati lun layúmurawagúniwa lun Búngiu luágu figou ligía. ¹⁷ Sun wuríbani figou, máma sun figou lun lanügüni gürígia lídoun féridi magúmuchaditi.

¹⁸ Subúdi wamúti luágu gürígia lan le anügübalin Búngiu queísi Lúguchi, meíbugunti lídan figou, lugúndun toúnigi lumúti Liraü Búngiu, siñáti ladügün Máfia ni cáta lun.

¹⁹ Subúdi wamúti luágu lánigu wamá Búngiu, luágu lábugiñeñanu lan lubáfu Máfia sun ja lánigubaña ubou.

²⁰ Subúdi wamúti gíñe luágu ñübinjali lan Liraü Búngiu ubouágun, áni rújali lan gunfaráandaü woun lun wasúbudiruni Búngiu le tímatimaati. Wabágariduña le tímatimaati lídan ában lúma Búngiu, queísi lídaañadiwa lan ában lúma Liraü, le Jesucrístubei. Ligía Búngiubei le tímatimaati, ligía gíñe le íchugubei ibágari le magúmuchaditi woun. ²¹ Nirájüñü, mafálara jumáña búngiugu ja mámabaña Búngiu. Ítaralá.

TIBÍAMAN LIGÁRADAN APÓSTOLU JUAN

Inárüni lúma ínsiñeni

¹ Au le weírei mútu, nabürüjañoun gárada to bun, nítu to lanúadiruboun Búngiu lun lániguboun lan, lúma joun birájüñü. Jínsiñetün nun le tímatimaati, áni mámarügü áu, sun gíñe ja afálarubalin Crístu, jínsiñetün gíñe joun sarágu.

² Jínsiñetün woun ladüga jínsiñe lan larúfudajan Crístu le lúnbei wáma lan súnwandan, woun, áni níjein arúfudajani ligía tídan wanígi. ³ Búngiu Úguchili, lúma Wabúreme Jesucrístu le Liraü Úguchili, jabínirubadün, jíchugubei jagúdemejabu lúma jadárangilan jun lídan jabúrchaguagüdüni larúfudajan Crístu lúma ínsiñejabuni.

⁴ Oúnwenbun nugúndan láu nadárirun jádaangiñe birájüñü abágarida queísi lubúdubu, ítara queísi larinágun Wáguchi Búngiu woun lun wabágaridun.

⁵ Guetóti nítu, ayúmuraguatina bun lun jínsiñegua wamá wámagua. Máma gumádi iséri le nabürüjabei bun, ligía méme le wámabei lúmagiñe furúmiñeti dan, dan le wagáambubei luágu Crístu. ⁶ Míni lan ínsiñeni, lun wabágaridun según lugúmadin Búngiu, áni lugúmadin Búngiu lun wabágaridun lídan ínsiñeni, queísi wagáambuni lúmagiñe furúmiñeti dan.

Ja ayéejabaña

⁷ Añájein sarágu ayéejatiña ubouágu ja mafiñebaña luágu quei lan gürígia tímatimaati liábin Jesucrístu ubouágun. Le ítarabei, ligía le yéebey, le láganibey Crístu. ⁸ Duári jumá jaweí, lueí jeféridiruni le ñúbinbey jun lídaangiñe juwádigimari luágu Crístu, resíbi jumeíme fáyeiti le gumúti luágu, siélu.

⁹ Furúmieguarügü le oufudajati sarágu lídoun iséri arúfudajani, áni merédeti láu le larúfudajabei Crístu lun, úati Búngiu lúma, ánjeinti le eréderuti láu larúfudajan Crístu, níjein Búngiu Úguchili lúma Búngiu Irájü lúma. ¹⁰ Ánjein achülúra ában gürígia júmoun máma láu arúfudajani le, merésibira jumeí júbiñe, mabúsurun jugúyame lun, ¹¹ lugúndun le abúsuruti lun, gádan lumúti gíñe wuríbani le ladügübei.

Lagúmujoún buri dimúrei

¹² Níjein sarágu cátey lúnti nariñaguni jun, mabúseerúntina abürüjarügü náni jun, agúrabatina nídin aríjañun lun nayánujan júma, lun lagúnfulirun wagúndan.

¹³ Mábuga jáña tirájüñü bamúlelua bun, to gíñe lanúadiruboun Búngiu. Ítaralá.

TÜRÜWAN LIGÁRADAN APÓSTOLU JUAN

Buíti ladímurejoún luágu wüğüri le gírubei Gáyo

¹ Áu le weírrei mútu, nabürüjañoun gárada to bun, numáda Gáyo, le jínsiñebei nun le gumúti.

² Numáda jínsiñeti nun, nayúmuragun lun Búngiu lun buídu lan lídin sun cátei bun, lun giñe magádie ban ítara queísi buídu lan lídin bun lídan beibugun lúma Crístu. ³ Oúnwenbun nagúndaarun dan le jayábinbei jádaangiñe wadújeñu lueígiñe Jesucrístu, ába jabájüdagun nun luágu bugúnfulin quei babágariduña lubei úragu lúma larúfudajan Crístu. ⁴ Úati ámu cátei agúndaaraguadütina queísi dan le nagáambun luágu jabágariduña lan nirájüñü lídan úarani lúma larúfudajan Crístu.

⁵ Numáda jínsiñeti nun, buíti bouuserun lídan esériwiduni le badügübei joun wadújeñu lueígiñe Jesucrístu, joúntima ja lílana ámu fulásu. ⁶ Abájüdaguatiña ligíbugiñe adamurini le yábei luágu bínsiñejabu joun. Adügabei fuleisei le. Íderagua báña láu le jemégeirubei lun jasígiruni jaweíyasun lídan ában igáburi le áuti lagúndaara Búngiu. ⁷ Furítiña lun jesériwidun lun Crístu, merésibiruntiña ni cáta jámangiñe ja ibídiñejabubaña lun Búngiu. ⁸ Ligía lúnti lubei weténirun joun, lun wíderaguniña lídan lapúrichijoún lerérun Búngiu.

Luríban loúserun Diótrefes

⁹ Abürüjatina buga ában gárada joun tílana ligílisi, májati Diótrefes lídin láu le wabeíbei lugúndun busénti ábuti lan jádan súnwandan. ¹⁰ Ánjana lubeiti ñüdün, neréruba lun luágu le ladügübei, adáagua marásualugu lúma iyéeni wawágu. Bougudin lueí líra, merésibirun lumútiña wadújeñu ja achülürútiña, áni mája ligía lun jerésibiruniña ámu, ja erésibirutiña, ába labúguniña lídaangiñe adamurini le táni ligílisi.

¹¹ Numáda jínsiñeti nun, mafálarabeí jémpulu wuríbati le, adúgamemebei le buídubei. Le adügüti buíti, lánigu Búngiu, ánjein le adügüti wuríbati, ibídiñegili Búngiu lun.

Lubuídun láni Demétrio jémpulu

¹² Buíti jadímurejan súngubei luágu Demétrio, áni inárüni luágu buídu lan ligáburi. Geféentiwa giñe luágu cátei le, áni subúdi jumúti luágu inárüni lan le waríñagubei.

Lagúmujoún buri dimúrei

¹³ Gíbeti yebe lúnti naríñaguni bun, mabúseerúntina abürüjarügü náni, ¹⁴ lugúndun agúrabatina naríjinibu madíse, ábamei wayánujan.

¹⁵ Darángilabá. Mábuga jáña umádagu yána bun, rúbei wamábugaü lun cáda ában jádaangiñe wamádagu ja ñíbaña.

LIGÁRADAN JÚDAS

Labürüjan Júdas joun ja únbaña wájali lan Búngiu lun lánigu jamá

¹ Áu Júdas, esériwiduti lun Cristu áu, áni lamúlen giñe Jacóbo, nabürüjañoun gárada to joun ja únbaña wájali lan Búngiu lun lánigu jamá, ja jínsiñebaña lun, ja areídañu lubaña Jesucristu séfuñu luei buri cátei lánina ubouú le. ² Resíbi jumá sarágu gudémejabu, darángilaü, lúma ínssiñeni lúmagiñe Búngiu.

Ja arúfudajabaña iyéeni

³ Nidújeñu jínsiñetiña nun, weirijali nabúseerun nabürüjan jun luágu asálbaruni le wabíjibe, dándu jugúya queisi áu, guetó sandíguatina núngua luágu lúnti lan nabürüjan jun lun nayúmuragun jun lun jáfaagun luágu afíñeni le ledéregubei Búngiu ában weíyaasu lun sun dan joun lánigu.

⁴ Nariñagubalin le jun lugúndun añájein lan arúfudajatiña yéetiña ádaragutiña joúngua jagánaguóun. Gürígia buri jagía, arúfuda táña Lerérun Búngiu lúmagiñe binárün luágu lúnti lan jasúfuriruni lafáyeiragüle jaríban, buídu. Wügüríña wuríbañiña jagía, minébenti Búngiu joun, arúfudaja jagía luágu gayára lan jadügün gürígia furúmiegurügü cátei mabuídunti, mabeichun lubaña lan Búngiu lueígiñe, ladüga luweírín lareíni, ayéedagua jagía giñe luágu Jesucristu, Wabúreme le ligárügüti, le únbei wesériwida.

⁵ Láu sun subúdi jumáali lan, buséntina narítaguagüdünün luágu láu lan sun sagá láníña meja Búngiu lumútuniña Israelítagu Ejíptogiñe, lárigiñe, ába lagúmuchaguagüdúniña ja maffínerunbaña jádan. ⁶ Ánjeligu ja mareídunbalin jabára, ígírarügü jamei jábiñe siélu lun jagábaraagun luágun Búngiu, añájein adaürüwañu lurúma Búngiu, gürágu lídan lubúriga láu güríngüri magúmchaditi, agúrabajei oúnwenbun wéyu le lánina agúseruni. ⁷ Ja lílana buri ubúruçu Sodóma luma Gomórra, lúma fulásu buri le yaráfabei lun, ába jagábaraagun luágun Búngiu queisigubeirügü ánjeligu ja, ába jíchaagun joúngua lun salúfuri, ába jígiraguagüdün joúngua lun sun luwúyeri wuríbani darí lun lagámaridun wügüri wügüri líledi, würi würi tíledi. Ába lagúmuchaguagüdúniña Búngiu láu wátu geméti. Reideitiña queisi ewéridiruni joun sun gürígia, arúfudei ligáburí ída lúba lan lafáyeijan Búngiu luágu figouú.

⁸ Ánjeinti láu sun jémpulu líra, wügüríña buri giñe ja jagánaguabaña, láu jafálaruni arúfudajani le maríchabei, wíyedaguatiña joúngua, májatiña lun lugúmadin Búngiu, anába jamáña ubáfu buri ja íñugutimaabaña. ⁹ Ánjeinti arcánjel méme Miguél, dan le lasígenejanbei lúma Máfia lueígiñe lúgubu Moisés, mouchunti lun líñaragun láu anabúni, aríñagarügüti lun. “Ébecha lábu Wabúreme Búngiu.” ¹⁰ Ánjaña wügüríña ja, adímurejatiña wuríba luágu buri cátei le úabei gunfaráanda jamáni, lé buri cátei le jasúbudirubei luágurügü jasándiruni queisi jasúbudiruni anímaalu úouga gunfaráanda jamá, ligia buri cátei le jadügübei, ába janügün gürínguaü jawounguoún láu jóuserun.

¹¹ ¡Fugiábugu jagía! Falá jamaali lání Caín jémpulu, arúfudajatiña iyéeni quei Baláam lun jagáñeirun seínsu, áni magáambaditiña, féridi jagía queisi Coré le ouwebei luágu lumágaambadin lun lerérun Búngiu. ¹² Nibúsigaridúniña lídan buri jufédun le lánina jínsiñegua júmagua, le ní lubei jeíga, gurá jagía láu ugúndani, minébenejábuga. Ítara jáña queisi jóuniri mudún ja joúnguarügübei

joúnigiragua. Ítara jáña queísi juánriñu magánati dúna le lanügübei garábali, tídibu wéwe to magínduntu lídan tídáani, ítara jáña queísi tídibu wéwe to ájulutu láu sun tlagüle, úaali ju jamá. ¹³ Ítara jáña queí lanárime buri lugúdi barána, arúfudei jagáburigu le nibúsigarídünati quei jacútaü. Ítara jáña quei warúguma buri ja férídi jamáali jémeri, íñarawagúaaña lun jeréderun lídan líwurin-ágei lubúriga lun sun dan.

¹⁴ Enóc gíñe le jasédün gürígia lárigiñe Adán, adímurejaali dimúrei lúmagiñe Búngiu jawágu arúfudajatiña yéetiña ja dan le laríñagunbei. “Aríja numúti Nabúreme liábin jáma sarágu mílu jádaangiñe láni ánjeligu ¹⁵ lun lagúseragüdúniña sun ja wuríbabaña luágu sun wuríbani le adüga jamáalibeí, lúma luágu buri dimúrei deréti le aríñaga jamáalibeí luágu. Lasíadirubaña sun gafigountiña jagía luágu le jadügübei.” ¹⁶ Arúfudajatiña yéetiña jagía ja jagánaguabaña, magúfurumaditiña, ganígi jagía jadímurejan luágu cátei le jadügübei ámu, lún rügüñein jagúnfulirun lúma lagübüri jayúmajan jabúseera. Aríñagatiña dimúrei buri íñuguti, adímureja jagía buíti jawágu buri gürígia lúnrügü jaságarun cátei buíti joúngua jádaangiñe.

Lererún joun afíñetiña

¹⁷ Jugúyati nidújeñu jínsiñetiña nun, jarítagua jumá luágu le laríñagubei Jesucrístu jádaangiñe láni apóstolugu luágu buri cátei le lúnbei lasúseredun.

¹⁸ Jaríñajare. “Lídoun buríme lagúmujoún dan, añájeinbaña gürígia éjerajatiña láu buri cátei le láni Búngiu, agánawa jagíame úaragua lúma jagúndan le wíyebéi.”

¹⁹ Jadüga buri ja, níjein lubei fánreinguaü, falá jamuti jagúndan le lánina ubou, úati Sífiri Sándu jádan.

²⁰ Ánjaün jugúya, nidújeñu jínsiñetiña nun, derégüdagu méme jumá lídan jafíñen le jarúmabei. Ayúmuragua jumá lun Búngiu láu lubáfu Sífiri Sándu.

²¹ Mabúlieida jumeí luágu jínsiñe jumá lun Búngiu, agúraba jumeí wéyu le lúnbei líchuguni Wabúreme Jesucrístu íbágarí magúmchaditi woun láu lugúdemejabu.

²² Afíñegüda jumáña ja louguabaña afíñe. ²³ Sáiba jumáña jíbirigu camá jamuga jaságaruñanu lídaangiñe wátu geméti lánina máfiougati, gudéme jamá jíbiri gafigountiña jun, láu sun, goúnigi jumá luei jadügüni wuríbani le jadügübei, iyéreegulá jaríban jun queísi gamísa wíyetu, luei gíñe jeíguadun lídoun luríban úma quei jagía.

Lagúmujoún buri ladímurejoún luágu luweírigan Búngiu

²⁴⁻²⁵ Búngiu le ábanrügübei, le sábiubei, le Wasálbaragüle lídaangiñe Wabúreme Jesucrístu, gabáfuti lun loúnigirunün luei jeíguadun lídoun figou, lun gíñe larúfudunün jarúmañu, buin láu ugúndani ligíbugiñe, le weírigubei. Rúwalá íñuguni lun, lúma uweíriguni, ubáfu lúma gumádi lídaangiñe Wabúreme Jesucrístu, méja, guetó, lúma súnwandan. Ítaralá.

CÁTEI LÉ BURI LARÚFUDUBEI BÚNGIU LUN JUAN

Cátei arúfudúati buri lun Jesucristu

¹ Niján buri cátei le larúfudubei Búngiu lun Jesucristu lun lasúbudiragüdüni joun lánigu cátei lé buri lúnbei lasúseredun madise. Subúdigüda láali Jesucristu cátei le lun Juan le esériwidubei lun, láu loúnajani láni ánjeli lúmoun lun larúfuduni lun. ² Aríñaga láali Juan inárüni luágu sun le laríjubei, geféenti luágu láni Búngiu ugánu lúma luágu le aríñaga láalibei Jesucristu.

³ Gúndaatiña gürígia ja alíjabalín jáma ja agáambubalin laliijóun ugánu le, le erésibirúabei lúmagiñe Búngiu, adüga jagía gásu láu cátei le bürüwañubei ya, ladüga yaráfaali dan lun lasúseredun.

Labürüjan Juan joun títana sédügubei liglísi

⁴ Áu Juan, nabürüjaña joun títana sédü liglísi to Ásiaboun. Resíbi jumá abíniruni lúma darángilau lúmagiñe Búngiu le wíwanbei lúmagiñe lubáragiñe furúmiñeti dan, wíwan ligía guetó, wíwan ligíame sun dan. Resíbi jumá giñe abíniruni lúma darángilau jámagiñe sédü espíritugu ja ligbugiñebaña lála, ⁵ lúma lúmagiñe Jesucristu le aríñagubalin cátei le inárüti, le furúmiñebeí asaaruti lídaangiñe oúweni áni gabáfu ligía jawágu urúeigu ja ubouáguabaña. Jínsiñetiwa lun Crístu, áni chibá laadiwa lídaangiñe wafígoun láu líta, ⁶ adüga láadiwa urúeigumé lúma fádirigumé lun wesériwidun lun Lubúngiute, le méme Lúguchibeí. ¡Rúalá uweíríguni lúma ubáfu lun, lun súnwandan! Ítaralá.

⁷ ¡Aríja jumá, líabinba Crístu juánriñurugu, jaríjubei sun gürígia ásta giñe ja áfarubalin! Jayájuba sun gürígia ja ubouáguabaña dánme le jaríjini luágu wuríbani le adüga jamáalibeí. Ítara lúba.

⁸ “Áu lagúmesejabeí sun cátei, áu lagúmuchagülebei, quei létüra ‘A’ lúma ‘Z’”, líña lariñagun Búngiu le Súnti Gabáfu, le wíwanbei lúmagiñe lubáragiñe furúmiñeti dan, wíwan ligía guetó, wíwan ligíame sun dan.

Layáwadaqun Crístu lun Juan

⁹ Áu Juan, jidúje luegiñe Jesucristu áu, gafánraantina júma lídan larúeijan Búngiu, súfurijadina úara júma luágu Crístu, resíbíjadina giñe gurásu lúmagiñe Crístu. Reideitina adaürüwa luágu ubóju le gíribeí Pátmos luegiñe napürichijani Lerérun Búngiu, lúma luegiñe napürichijan luágu Jesucristu. ¹⁰ Luágu ában wéyu dimáasu, ába neréderun lábugiñe lubáfu Sífiri Sándu, ába nagáambun ában umálali reínti nanáangiñe quei lumálali fídu, ¹¹ lariñaga umálali ligía nun.

—Áu furúmiñebeí lúma agúmujóuni, quei létüra ‘A’ lúma ‘Z’. Abürüjabeí sun le baríjubei, ábame bouñajanun gárada tugúya joun títana sédü liglísi to loúbawaguboun Ásia. Éfeso, Esmírna, Pérgamo, Tiatíra, Sárdis, Filadélfia lúma Laodícea.

¹² Ába nagáraragun lun naríjin ca lan adímurejabeí nun, ába naríjin sédü lébu sanúdelu gólu, ¹³ labádinagua sédü lébu sanúdelu ligía ába naríjin ában camá jamuga Wügüri Garaüwarügüti—le Jesucristubeí—táu ában anáanguni chÜlütü luágun lugúdi, lúma ában béliiti gólu yaráfa lun laníguagu. ¹⁴ Jarúti lídíburi quei líyu mudún, quei móuru, ítara líña lágu quei wátu gemetí. ¹⁵ Mirítü

lugúdi quei brónse le írichawagúaaali, le dáwaali lídoun órno, reínti lumálali quei lireín leíbaagun sarágu dúna. ¹⁶ Níñanu sédú warúguma lídan lújabu le louñwenren, níñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásúdün láu sun lére.

¹⁷ Dan naríjínbalin, ába náburujan lubádu lugúdi camá jiláadina. Ába líchuguni lújabu le louñwenren nuágu, ába laríñagun nun.

—Manúfudedaguabá, áu le lagúmesejabei sun cátei, áu lagúmuchaja. ¹⁸ Áu le wínwanbei, jilátina, guetó wíwantina lun sun dan. Níjein ligélen ouweni núma, lúma ligélen fulásu le ní jabei jiláguaaña. ¹⁹ Abürüjabei lubeíti le baríjubei, le guetóbei lúma le lúnbei líabin. ²⁰ Niján laníchigubei jawágti sédú warúguma ja baríjubaña lídan nújabu le nouñwenren, lúma sédú lébu sanúdelu gólu. sédú warúguma, jagía sédú jóuniri tílana sédú ligílisi, sédúti lébu sanúdelu, jagía sédú ligílisi.

2

Ugánu joun tílana sédú ligílisi. Ugánu joun tílana ligílisi Éfeso

¹ ‘Babürüja lun jóuniri tílana ligílisi to Éfesoboun, baríñagame lun lun laríñagun joun gürígia jagía. “Ítara líña naríñagun, áu le jáubei sédú warúguma lídan nújabu le nouñwenren, le giñe eíbugubei labádinagua sédú lébu sanúdelu le gólu. ² Subúdi numúti sun le jadügübei, subúdi numúti lidére juwádigimari lúma jagúraasun, áni subúdi numúti luágu siñá lan jáfaguniña ja wuríbabaña. Subúdi numúti luágu jóuchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá. ³ Gagúraasunjadün, áni súfuri jugúya sarágu lídan juwádigimari nuágu, mabúcharunga juágu. ⁴ Láu sun líra, níjein ában cátei jadúga magúndaantina láu. maweírínjali nínsiñe jun quei meja furúmiñe. ⁵ Ligía lubeíti, jarítauga jumá ída jíña lán meja, sáansi jumei jigáburu, adúga jumei cátei lé meja jadügübei furúmiñe. Ánjein madügün jumá ítara, nídinba juágu furése, ábame nagídaruni lébu jisáandelun lídaangiñe lufúlasun, ábame mámaadün lan tílana nilígílisin, ánjein gubeírügü jasáansira jigáburu, ligíaba madügün náni ítara. ⁶ Láu sun líra, luáguñein jáni fuleisei, liyéreegun cátei lé buri jarúfudajabei nicoláitagu jun lúma buri cátei le jadügübei, le giñe iyéreegubei nun. ⁷ Le garígeirugubei lun lagáambun, agáambalei le laríñagubei Sífiri Sándu joun tílana buri ligílisi. Ja ásiiragúbalin wuríbani, neigagüdúbaña lídaangiñe lin tídibu wéwe to lánina íbágari, to lufúlasunruguboun Búngiu.”

Ugánu joun tílana ligílisi to Esmírnaboun

⁸ ‘Babürüja lun jóuniri tílana ligílisi to Esmírnaboun, baríñagame lun lun laríñaguni joun gürígia jagía. “Ítara líña naríñagun, áu le furúmiñeti lúma agúmujóuni, lé meja ouwebei áni wínwanyaali. ⁹ Subúdi numúti sun le jadügübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti giñe luágu adímureja jamá ja aríñagubaña luágu juríu jamá wuríbati juágu, máma ámu cátei jagía lueídügüya lánigu jamá Máfia. ¹⁰ Manúfude jumá luei le lúnbei jasúfuriruni, ládaraguba Máfia fiú jídaangiñe furísunrugun lun louchawagúniwa jafiñen sun jugúya, áni jasúfuriruba sarágu luágu díisi wéyu. Derégúdagu jumá lídan jafiñen nuágu darí jóunwen, ábame níchuguni íbágari magúmuchaditi jun, jafáyeiruájame. ¹¹ Le garígeirugubei lun

lagáambun, agáambalei le lariñagubei Sífiri Sándu jóun buri tilana ligilisi. Ja ásiiragúbalin wuríbani, másügürnbaña lídaangiñe libíaman ouweni.”

Ugánu joun tilana ligilisi to Pérgamoboun

¹² “Babürüja lun jóuniri tilana ligilisi to Pérgamoboun, baríñagame lun lun lariñagun joun güri-gia jagía. “Ítara líña naríñagun, áu le gámabarun efein to gágiriboun, to biánguaboun amána. ¹³ Subúdi numúti sun le jadügübei, subúdi numúti giñe luágu Máfia lántima gabáfubei jádan güri-gia ja ñi lubei jagánawa, áni láu sun líra, nómamemeñadün. Mígirun jumágili jafiñen nuágu, ni íbini lídan dan le láfarúnbei Antipás le geféenbei buíti nuágu ñi lídan fulásu le ñi jubei, le ñi lubei lagúmadija Máfia. ¹⁴ Láu sun líra, njein buri cátei jadüga, magúndaantina láu. luágu añájein lan fiú güri-gia júma yára Pérgamo ja májabaña jígiruni cátei lé meja larúfudajabei Baláam, le íchugubei dimúrei lun Balác lun lafígoungüdüniña Israelítagu láu jeigin eigin le adágarawagüdüti joun sándu, lúma láu jabágaridun lídan salúfuri. ¹⁵ Ítara méme giñe, añájein ja májabaña jígiruni cátei lé buri jarúfudajabei nicoláitagu júma ñi, cátei le iyéreegubei nun. ¹⁶ Ligía, sáansi jumei lubei jigáburu, ánjein madügün jumá ítara, nídiba juágu madíse, ábame nageíndagun jáma güri-gia ja adügübalin cátei buri le, táu efein to áfuriduboun niyúmugugiñe. ¹⁷ Le garígeirugubei lun lagáambun, agáambalei le lariñagubei Sífiri Sándu jóun buri tilana ligilisi. Le ásiiraguti luágu wuríbani, neígagüdüba lídaangiñe maná le arámudúañubei lun lun líchugun érei tun luwáni, ábame níchugun ában dübü jarúti lun láu ában íri iséri búruwañu luágu le ibidiñeti ni ca un lueídügüya lun le erésibirubalin.”

Ugánu joun tilana ligilisi to Tiatíraboun

¹⁸ “Babürüja lun jóuniri tilana ligilisi to Tiatíraboun, baríñagame lun lun lariñagun joun güri-gia jagía. “Ítara líña naríñagun, áu le Liraü Búngiu, le ítarabei águu quei wátu geméti, liábin lugúdi quei brónse le írichawagúaaali. ¹⁹ Subúdi numúti sun le jadügübei, subúdi numúti jísiñejabu, jafiñen, jesériwidun láu jugúraasun, subúdi numúti giñe luágu jadügüña lan cátei buíti guetó luei meja furúmiñe. ²⁰ Láu sun líra, njein ában cátei jadüga magúndaantina láu. Jígirunun Jezabél to aríñaguboun luágu proféta tan áni máma líña, lun teyéeduniña güri-gia láu tarúfudajan joun nánigu lun jaganoún lídan salúfuri lúma lun jeigin eigin le adágarawagüdüti joun sándu. ²¹ Rújadina dan tun lun tasáansiruni tigáburu, májagiru tígiruni tisálufurin. ²² Ninárün jáu luágu náburugúdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadaagubei, ²³ ábame nafáraguniña tirájüñü jilágubei, ítara lúba jasúbudiruni sun nánigu luágu subúdi náni lében aritáguni lúma tében anígi, ábame nafáyeiruni cára ában jídaangiñe según le ladügübei. ²⁴ Ja jíbiri ja Tiatírabaña, ja mafálarubalin arúfudajani ligía, machüllügiña giñe asúbudirei le ünbei jagúara lujúlilin láni Máfia cátei le arámudaguabei, míchubadina ámu anügüni jawágu. ²⁵ Ragújumei lubuídun jigáburu darí niábin. ²⁶ Ja ásiiragúbalin wuríbani, adüga méme jameime le nabúseerübei ladügün darí lun jóunwen, níchuguba unbáfu joun luágu buri fulásu, ²⁷ ítara quei líchugun Núguchi Búngiu unbáfu nun. Ábame jedéraagüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queisi soudíeru le láuti múa. ²⁸ Níchuguboun giñe warúguma to lánina bináafin joun. ²⁹ Le garígeirugubei lun lagáambun, agáambalei le lariñagubei Sífiri Sándu jóun buri tilana ligilisi.”

3

Ugánu joun títana ligílisi to Sárdisboun

¹ ‘Babürüja lun jouniri títana ligílisi to Sárdisboun, baríñagame lun lun laríñagun joun. “Ítara líña naríñagun, áu le jáubei sédü espíritu lání Búngiu jáma sédü warúguma. Subúdi numúti sun le jadügübei, subúdi numúti luágu jiláñu jíña lan lún buri cátei le nuáguti, láu sun aríñawagúa lan luágu wíwan jumá. ² Agágudúa jumá, rújuma érei lún buri cátei le níjeinguabei, lubáragiñe louñwen, aríja náali luágu múaran lan le jadügübei ligíbugiñe Búngiu. ³ Jarítagua jumei lubeiti le arúfudajóubei jun, falájumei, sáansi jumeime jigáburí. Anjañ magágudun, nídiba juágu quei liábin ában jíweruti ibídiñoun óra jun. ⁴ Láu sun líra, añájein fiú gürígia jagánagua ñi Sárdis ja múaradungiñábaña lúma wuríbani, jagía jeíbuguba núma táu anáanguni jarútu ladüga yúuti joun. ⁵ Ja ásiiragúbalin wuríbani, jadáuraguba anáanguni jarútu, áni magídarun nubei jíri tídaangiñe líburu to gáubalin jíri ja lúnbaña jabíjini ibágarí magúmchaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe lání ánjeligu. ⁶ Le garígeiruguti lun lagáambun, agáambalei le laríñagubei Sífiri Sándu joun títana buri ligílisi.”

Ugánu joun títana ligílisi to Filadélfaboun

⁷ ‘Babürüja lun jouniri títana ligílisi to Filadélfaboun baríñagame lun lun laríñagun joun. “Ítara líña naríñagun, áu le sándubei, le giñe inárünibeí, le gámabalin ligélen urúei Davíd, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei. ⁸ Subúdi numúti sun le jadügübei. Rújadina ában béna júnren jigíbugiñe le lásíñerun ni ában adáura, ladüga láu sun lougua lan jére, adügaadün gásu láu nugúmadin, áni meyéeraguntün luágu nánigu jumá. ⁹ Aríja jumá, nadügüba lun jayábin lánigu Máfia ja yéebaña, ja aríñagubaña luágu juríu jumá áni mabágariduntiña queisi lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numútuniñabaña jínsiñetiña nun, ninárün jáu. ¹⁰ Areída jumáali nugúmadin lun gagúraasun jumá, ligía nareídubadün lubei luei lidáani ouchwagúni le lúnbei liábin luágu sun ubou lun jouchúniwa sun ja ubouagubaña. ¹¹ Madísebei niábin, mígira jumei ni ában lun lagídaruni jafíñen nuágu, meféridirun jumámuga ni cátei lídaangiñe le lúnbei níchuguni jun. ¹² Ja ásiiragúbalin wuríbani, níchugubaña quei wagábu tídan Lúban Nubúngiute, máfuridündügüyaañame nígiñe, ábame nabürüdüni líri Nubúngiute jawágu lun lasúbudirúniwa luágu lánigu jamá, lúma líri ubúru le lání Nubúngiute, le iséri Jerusalén le nübinbei siéluigiñe lúmagiñe Nubúngiute, nabürüdübei giñe iséri níri jawágu. ¹³ Le garígeiruguti lun lagáambun, agáambalei le laríñagubei Sífiri Sándu joun buri títana ligílisi.”

Ugánu joun títana ligílisi to Laodicéaboun

¹⁴ ‘Babürüja lun jouniri títana ligílisi to Laodicéaboun, baríñagame lun lun laríñagun joun. “Ítara líña naríñagun, áu le inárünibeí, le gaféenbei buídu, le aríñagubalin inárüni, le ídaangiñebei liábin sun cátei le ladügübei Búngiu. ¹⁵ Subúdi numúti sun le jadügübei, subúdi numúti luágu madíli jumá lídan jesériwidun nun, másü jugúya. ¡Díligubeijadün jamúga o sújuma! ¹⁶ Quei bachárügü jubei, madílitün, másü, newérejabadün niyúmulugugiñe. ¹⁷ Aríñagatün luágu rísi jumá, luágu buídu lan dan jun, luágu memégeirun jumá ni cáta, áni maríjin jumúti luágu fugiábu jumá, gudémetün, maríjintün, surúsu

jíña. ¹⁸ Ligía níchugunbei dimúrei jun lun jagáñijian gólu le afinjuoúaaali láu wátu geméti númagiñe, lun rísi jumá le túmatimaati, lun gíñe jagáñijian anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jaríjin. ¹⁹ Ébecha numútiña ja jínsiñebaña nun láu idérei, arúfudaja áu joun. Lúnti lubeíti sériu jumá, sáansi jumeíme jigáburi. ²⁰ Anája bénabu, nagúajaña, le agáambuti numálali, ába lánjunrenchuni béna nubá, nebelúruba lúmoun, ábame neígin lúma, jou ligíame núma. ²¹ Ja ásiiragúbalin wuríbani, níchuguba ubáraü joun númagua luágu nála le lála urúei, itara quei násiiraguni wuríbani, ába nañúurun lúma Núguchi luágu lála. ²² Le garígeiruguti lun lagáambun, agáambaleí le laríñagubei Sífiri Sándu joun tilana buri liglísi.”

4

Ájuduraguni lun Búngiu, siélu

¹ Lárigiñe sun cátei le, ába naríjin ában béna júnren siélu, liábinti umálali le itarabe quei lumálali fidu, lé buga adímurejabei nun, ába laríñagun nun.

—Weinba ñájoun, narúfudaali cátei lé buri lúnbei lasúseredun lárigiñe buri le bun.

² Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu. ³ Ítara líña camá ában dúbü miríti, le jáspe o cornalina, ñiñoun ában jerémuuru geyégu láu jalaü ligía, miritu quei ában dúbü le esmerálda. ⁴ Geyégu láu lála urúei ligía aríjayatina ában wein-gádürü lála urúei, ñiñanu wein-gádürü gürígia ja weirigutiña ñun luágu, táu jadáuragun jarútu lúma ridi gólu jábulugu. ⁵ Lueigiñe lála Búngiu ligía áfurijati labíríjanouga lúma wayújururu, ligíbugiñe lála, ñiñein sédü lámpu geméñu, jagía sédü láni Búngiu Espíritugu. ⁶ Ñiñein gíñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégu láu lála Búngiu, ñiñanu gádürü cátaña gabágaritiña buin láu águu, dándu jagíbugiñe quei janágangiñe. ⁷ Le furúmiñeti jádaangiñe, itara líña quei ában liñún, le jabíaman, itara líña quei ában bágasu wügüri, le jürüwan, itara líña ligíbu quei ligíbu ában wügüri, le jagádürün, itara líña quei ában ágila ájamajatu. ⁸ Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougudigiñe quei múnadagiñe jabíti, wéyuagu áriebu jáu agúaraja.

Sándu, sándu, sándu,

Wabúreme Búngiu, le Súnti Gabáfu,

le wínwanbei lúmagiñe lubáragiñe furúmiñeti dan, wínwan ligíame sun dan.

⁹ Ságüti jíchugun cátaña gabágaritiña ja inébesi lúma eteíngiruni lun Búngiu le ñunbei luágu lála, le gabágaribeí lun sun dan, ¹⁰ ábaja jájuduragun wein-gádürü weiyaaña mútu jagía ligíbugiñe, ába jarúfuduni jínsiñejabu lun Búngiu le gabágaribeí lun sun dan, ába jíchuguni jarídin ligíbugiñe, ába jagúarajan.

¹¹ Wabúreme, Wabúngiute, garíchatibu lun berésibiruni uweiriguni, inébesi, lúma ubáfu,

ladüga Amürü adügúbalin sun cátei,

láu bugúndan badügei, láu gíñe bugúndan níjein lubeí sun le níjeinbei.

5

¹ Ábati naríjin ában líburu lújaburugu Búngiu le ñúnbei luágu lála, abürüjóuatu líburu tugúya turágeirugu lúma tigíbuagu, darúatu láu sédü séyu. ² Ába naríjin ában ánjeli gabáfuti, ába lálügüdajan láu umálali reínti.

—¿Ca garíchabei lun ladáranunun líburu lúma lun lajeíridunun tiséyun?

³ Úati ni ában garíchati lun ladáranunun líburu tugúya, ni íbini lun laríjin tuágun, ni siélu, ni múarugu, ni lábugiñe múa, úati ni ában garíchati. ⁴ Ába nayájun sarágu ladüga úa lan ni ában garíchati lun ladáranunun líburu tugúya, ni lun lalíjanun, ni íbini lun laríjinun. ⁵ Ábati laríñagun ában jádaangiñe weíyaaña mútu nun.

—Jebé bayájun, ladüga Jesucrístu, le “líñún” le jádaangiñebei ladügawagun Judá, le linébaanfan urúei Davíd, sirígua lálali wuríbani lun gayára lan ladáranunun líburu lúma lun lajeíriduni sédü tiséyun.

⁶ Lamídaanguati lála Búngiu jáma gádürü cátaña gabágaritiña jagía jáma weíyaaña mútu jagía, ába naríjin ában Mudún rára, camá jamuga áfarúaaali. Sédüñein ligáanchun, sédü lágu, águu buri ligía, láni Búngiu sédü Espíritugu ja oúnajoúbaña lídoun sun ubou. ⁷ Núbinti Mudún ligía, le Jesucrístubei, ába lanügünun líburu tugúya lújaburugugiñe Búngiu. ⁸ Dan le larügüdünbarun líburu, ába jájuduragun gádürü cátaña gabágaritiña jagía jáma wein-gádürü weíyaaña mútu jagía ligíbugiñe. Cáda ában jádaangiñe weíyaaña mútu jagía, ñíñoun ában gidára lúma, lúma cópu le gólu buin láu cupáli, le liyáwabei jayúmuragun lánigu Búngiu. ⁹ Niján urému iséri le jerémujabei.

Garíchatibu lun banügünun líburu, lun bajeíridunun tiséyun,

ladüga áfarúa ban, ába bagáñijaniña gürígia lídaangiñe sun rása, sun luwúyeri dimúrei, fulása lúma néchaani.

¹⁰ Adüga báña urúeigumé jáma fádirigumé lun jesériwidun lun Wabúngiute, lúma lun jagúmadijan ubouágu.

¹¹ Lídan le nariágun, ába nagáambuni jamálali sarágu ánjeligu geyégu láu lála lúma geyégu jáu cátaña gabágaritiña jagía, jáma weíyaaña mútu jagía. Níñanu míñun míñun ánjeligu, ¹² jaríñaga láu umálali jéreti. Yúuti ubáfu lúma irisini, subúdi lúma érei, uweírighuni lúma inébesi, lúma eteíngiruni lun Jesucrístu, Mudún le áfarúbei.

¹³ Agáamba numúti giñe jaríñaguni sun cátei le ladügübei Búngiu siélu, le múarugubei, le lábugiñebei múa, lúma le baránajabei, lúma sun cátei lé buri lídaanbei.

Rúalá eteíngiruni, inébesi, uweírighuni, lúma ubáfu lun Búngiu le ñúnbei luágu lála, lúma lun Mudún, lun sun dan.

¹⁴ Ába jaríñagun gádürü cátaña gabágaritiña jagía.

—¡Ítaral!

Ába jájuduragun wein-gádürü weíyaaña mútu jagía ligíbugiñe le gabágaribei lun sun dan.

6

To sédü séyu

¹ Ábati naríjin dan le lajeíridünbarun Mudún furúmiñetu tídaangiñe sédü séyu tugúya, ába nagáambun laríñagun ában jádaangiñe cátaña gabágaritiña jagía láu ában umálali camá lumálali wayújururu.

—¡Jigábu baríja!

² Ába naríjin ában gabáyu jarúti, le waríñubei luágu, ñíñoun ában arco lújaburugu to áuboun lageíndagua. Rúati ában ridi lánina ásiiraguni lun ladüga lúnbei lan lagáñeiruniña láganiñu. Furíti ageíndagua, ába lásiiragun lídan sun cátei.

³ Dan lajeíridunbarun Mudún tibíaman séyu, ába nagáambun laríñagun jabíaman cátaña gabágaritiña jagía.

—¡Jigábu baríja!

⁴ Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilau ubouágugiñe, lúma lun láfaraguágüdüniña wügüriña jámagua jilágubei, ába tichugún ában oúnwenbun efeín lun.

⁵ Dan lajeíridunbarun Mudún türüwan séyu, ába nagáambun laríñagun jürüwan cátaña gabágaritiña jagía.

—¡Jigábu baríja!

Ába naríjin ában gabáyu wuríti, ñíñein ában baláansu lújaburugu le waríñubei luágu. ⁶ Ába nagáambun laríñagun ában umálali jamídaanguágiñe cátaña gabágaritiña jagía.

—Ábanrügüla kílo türígu luágu lebégi ában wéyu wadágimanu, ürüwa kílo sebáda ligía méme ebégi, áni toúnigi jumeime aili lúma bínu buídu.

⁷ Dan lajeíridunbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—¡Jigábu baríja!

⁸ Ába naríjin ában gabáyu amaríyu, le waríñubei luágu, ouweni líribei, lárígi lárígi liábin jafúlasun jiláaña. Ába libíjin ubáfu luágu ligádürün murúsun lídaangiñe ubou lun láfarajan láu wuríbu, láu ilámaü, láu sándi, lúma jáu anímaalugu janárimetiña ja ubouágubaña.

⁹ Dan lajeíridunbarun Mudún tiseíngün séyu, ába naríjinun jawáni ja áfarawagúbaña lueígiñe japúrichijani Lerérun Búngiu, lúma luágu jadímurejan buíti luágu Jesucristu, lábugiñeñanu latárü. ¹⁰ Jaríñaga láu umálali jéreti.

—¿Darísan ídame, Wabúreme le gúnfuliti láu lerérun, darísan ídame bagúseragüdaña ja mísiñejabúbaña bun ubouágu, luágu woúnwen? ¿Ídamésan bafáyeigüdaña luágu jáfaruníwa jilágubei?

¹¹ Ába jabíjin anáanguni jarúti, ába laríñawagún joun lun jeméragun luágu murúsun dan dari jóustarun jabíriña lídan esériwiduni lun Crístu ja lúngiñabaña jáfarawagúniwa quei jagía.

¹² Lídan le naríjinbei, ába lajeíridunun Mudún tisísín séyu, ába ladágarun ában oúnwenbun járabaganáli. Ába láuridun wéyu quei lúdu, ába láfunadun játi camá jítaü, ¹³ ába jeiguadun warúguma ja siélubaña lun múarugun quei táburujan mángu tueígiñe tídibu dan le lánjingichunun garábali. ¹⁴ Ába lagúmchagun siélu quei ában gárada dan le tabáruchawagún, ába ladíñuragunga sun wúbü lúma ubouju lídáangiñe jabára. ¹⁵ Ába jarámudagun urúeigu ja lánina ubou lídan júyu lúma buri labádinagua dübü le luágubei wúbü, úara jáma ja weirigubaña, gurúnelugu, risitiña, gabáfutiña, jáma sun idámuni, jáma wügüriña ja mabúremetiña. ¹⁶ Jaríñagati lun wúbü lúma lun dübü.

—Jeígua jumá wawágun, arámuda jumáwa lueí laríjin Búngiu le ñúnbei luágu lála, lúma lueí lanárimé ligáñi Mudún.

17 Chülüjali weíriti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawáguti Israelítagu

7

1 Lárigiñe sun cátei le, ába naríjin gádürü ánjeligu rára luágu gádürü larígei ubouú, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídibu wéwe. ² Aríjatina giñe ábanya ánjeli ñúbinti lueigiñe oúbaú le ñigiñe lubei láfuara wéyu láu liséyun Búngiu le wínwanbei. Ába lagúragun ánjeli ligía láu umálali jéreti joun gádürü ánjeligu ja abíjubaña ubáfu lun jadügün wuríbani lun múa lúma barána.

³—Madüga jumá wuríbani lun múa, ni lun barána, ni lún buri tídibu wéwe daríme wíchuguni liséyun Búngiu luágu jerébe lánigu.

⁴ Agáamba numúti átiriñanu lan. san bián-wein-gádürü mílu jádaangiñe linébaanfaangu Israél.

⁵ Dúusu míluñanu jádaangiñe ladügawagun Judá,

dúusu mílu jádaangiñe ladügawagun Rubén,

dúusu mílu jádaangiñe ladügawagun Gad,

⁶ dúusu mílu jádaangiñe ladügawagun Áser,

dúusu mílu jádaangiñe ladügawagun Neftalí,

dúusu mílu jádaangiñe ladügawagun Manasés,

⁷ dúusu mílu jádaangiñe ladügawagun Simeón,

dúusu mílu jádaangiñe ladügawagun Levi,

dúusu mílu jádaangiñe ladügawagun Isacár,

⁸ dúusu mílu jádaangiñe ladügawagun Zabulón,

dúusu mílu jádaangiñe ladügawagun José,

jáma dúusu mílu jádaangiñe ladügawagun Benjamín.

Sarágu gürígia jarútu jadáüragun

⁹ Lárigiñe cátei le, ába naríjin sarágu gürígia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña gürígia jagía dari lun siñá lan jabájüdün, jarútu jadáüragun táu tubána fáluma jájaburugu. ¹⁰ Ába jagúarajan sun jagía láu umálali jéreti, ába jaríñagun.

Weíriti Búngiu, le ñúnbei luágu lála,

weíriti Mudún, luágu asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun, ¹² ába jaríñagun.

¡Ítaralá! Rúalá uweírigu, lichú áu, eteingiruni,

inébesei, ubáfu lúma érei

lun Wabúngiute lun sun dan. Ítaralá.

¹³ Ábati lálügüdünina ában jádaangiñe weíyaaña mútu jagía.

—¿Cátañasan ja, ja jarúbaña adáüragun? ¿Jalíagiñésan jayábin?

¹⁴ Naríñaga lun.

—Amürü jamúga aríñagei nun.

Laríñaga nun.

—Ja súfurijañaña sarágu ja, ja chibá jamaalíbei jafígoun láu líta Mudún, jarúmagüda jamoún janígi láu. ¹⁵ Ligía ligíbugiñeñanu lubei lála Búngiu esériwida lun, wéyuagu áriebu tídan lúban to siélouboun, loúnigirubaña Búngiu láu leréderun jáma. ¹⁶ Máfagun jáñame ilámaü, ni mágürabu, másürün láñame wéyu, mañáurijan láñame lárrouga, ¹⁷ ladüga loúnigirubaña lan Mudún le lubádubei lála Búngiu, ábame lanügüniña lárún dúna le íchugubei íbágari magúmuchaditi, ábame larágajani Búngiu sun águirau lueígiñe jágu.

8

Tisédün séyu lúma lágei cupáli le gólu

¹ Dan lajeíridúnbarun Mudún tisédün séyu to tuáguboun líburu, ába ñi lan maníguau siélu quei buri luágu dimí óra. ² Ába naríjiniña sédü ánjeligu ja rárabaña ligíbugiñe Búngiu, ába líchugúniwa sédü fidu joun. ³ Lárigiñe, ábaya líabin ában ánjeli, ába laráramun ligíbugiñe latárü, ñíñein ában lágei cupáli gólu lújaburugu, ába líchugún bürübün cupáli lun, lun ladágaragüdüni úara lúma jayúmragun sun ja lánigu Búngiu ligíbuagu latárü gólu le ligíbugiñebei lála Búngiu. ⁴ Ába lamúdeirun lugúmulalin cupáli ligía úara lúma jayúmragun lánigu Búngiu lun ligíbugiñoún Búngiu. ⁵ Ábati lanügüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachürüni luágun ubou, ába lagaambún wayújururu, ireíni, labírijaniga, lúma ában jarabaganáli.

Lé buri fidu

⁶ Ábati jaráanserun sédü ánjeligu ja láubaña sédü fidu lun jínwiruni.

⁷ Ába línwiruni furúmiñeti ánjeli lifídun, ába lasáliragun lúbara júya le deréguati lúma wátu geméti, láu giñe jítaü, ába lachágarúniwa luágun ubou. Ába lágudun lürüwan murúsun lídaangiñe ubou, ígirúati bián murúsun mágudúnti, gudáwati giñe lürüwan murúsun lídaangiñe buri tídibu wéwe lúma jídiru.

⁸ Ába línwiruni jabíaman ánjeli lifídun, ába lachágarúniwa ában cátei camá jamuga ában oúnwenbun wübü durúnguati baránajoun, ába lasáliragun lürüwan murúsun lídaangiñe barána jítaüme. ⁹ Jiláguatiña sun úduraü ja lídaanbaña barána le asáliragubei lun jítaüme, gürínguatu giñe sun ugúnein to ñíboun lídan barána ligía.

¹⁰ Ába línwiruni jürüwan ánjeli lifídun, ába teíguadun ában oúnwenbun warúguma siélugiñe, durúngu quei ában tóchi. Táburuja luágun lürüwan murúsun lídaangiñe dúna lúma líseesen dúna. ¹¹ Igífi tíribei warúguma tugúya, ába lagífidun lürüwan dúna, ába jóüwegun sarágu gürígia ladüga lagífidun dúna ligía.

¹² Ába línwiruni jagádürün ánjeli lifídun, ába lagürinchagun lürüwan murúsun lídaangiñe líbiri wéyu, láu sun játi, jáma warúguma. Le oúbaü le agürinchagubei jawágu, ába labúridun, marúgoungadunti wéyuagu ni áriebu.

¹³ Lárigiñe, ába naríjin ában dunúru weíruti ájamaja lamídaangua siélu, aríñageina ligía láu umálali jéreti.

—¡Fugiábugume ja aganoúbaña ubouágu luágu ürüwa lanárimeníga lé buri lúnbei láburuja jawágun dánme jínwiruni ja jíbiri ürüwa ánjeligu jafídun!

9

¹ Ába línwiruni jaseíngün ánjeli lifídun, ába naríjin ában warúguma eíguadutu siéluigiñe lun múarugun, ába líchugún ligélen júyu le mébejabei tun. ² Ába tánjunrenchuni júyu ligia, ába láfuridun gumúlali nígiñe camá lídaangiñe ában oúnwenbun órno, ába labúrigadagüdüni gumúlali ligia wéyu lúma garábali. ³ Lídaangiñe gumúlali ligia ába jachúlaagun chigángaru, ába jájamajani sun ubou, ába jabíjin chigángaru jagia ubáfu líbe jabáfu águru ja ubouágubaña. ⁴ Ába laríñawagún joun lun madügün jamá wuríbani lun jíduru le ubouágubei, ni lún buri nádü, ni lun tídibu wéwe, lueídügü joun gürígia ja úabei liseíni Búngiu jeréberugu. ⁵ Majouáti lun jáfaraguniña chigángaru jagia gürígia, lueídügü lun jásjaniña gürígia luágu seíngü játi, ítara líñati ligári jásjan quei jásjan águru. ⁶ Lídaanme buri wéyu ligia, jáluajabei gürígia ouweni, madárijabei, busén jagia yebéme jouwegun, ladíseduba ouweni jawei.

⁷ Chigángaru jagia, jenge gabáyu ja aráanseñubaña lubá wuríbu, níñein ában cátei jábulugu camá jamuga ában rídi le gólu, ítara líña jagíbu quei ligíbu wügüri. ⁸ Ítara líña jádiburi quei jádiburi würíña, liábin jári, quei lári líñún. ⁹ Darúgu líña jágubu láu ában cátei camá gürábu, ítara líña lamúri jarúna quei tamúri sarágu cárü to jáutu gabáyu dan le teíbaagun wuríburugu. ¹⁰ Gálitiña quei jáli águru le gágiriti. Níñein ubáfu luágu jáli lun jadügün wuríbani joun gürígia luágu seíngü játi. ¹¹ Níñein ában jábuti chigángaru jagia, le ánjeli le láni júyu le mébejabei. Abadón lírabei ánjeli ligia lídan hebréo, lídan güriégu, Apolión o Agünrinchaguti.

¹² Sügüja furúmiñeti lanárimeníga, mégeigili bián.

¹³ Ába línwiruni jasísín ánjeli lifídun, ába nagáambun ában umálali lídaangiñe gádürü larígei latárü gólu le ligíbugiñebei Búngiu. ¹⁴ Ába laríñagun umálali ligia lun jasísín ánjeli le láubei fidu.

—Farára báña gádürü ánjeligu ja güráñubaña láru oúnwenbun dúna le Eufrátes.

¹⁵ Ába jáfaragadún gádürü ánjeligu jagia lun jáfaragun ában jádaangiñe cáda ürüwa gürígia jílagubei, ladüga aráanserúaña lubá óra ligia, wéyu ligia, játi ligia, lúma írúmu ligia. ¹⁶ Ába nagáambuni átiriñanu lan jasúdaaranigu ja luágutiña gabáyu. bián-san míñun.

¹⁷ Ítara líña ligáburi jayáwadagun gabáyu jagia jáma ja waríñubaña jawágu nun. Níñein ában cátei janíguagu, funáti licólorun, dínguti, lúma amaríyu. Ítara líña jábulugu gabáyu jagia quei jábulugu líñún, áfurijati wátu geméti, gumúlali, lúma súfuru jayúmulugugiñe. ¹⁸ Ába láfaraguniña ürüwa wuríbani le áfuridubei jayúmulugugiñe gabáyu jagia ában jádaangiñe cáda ürüwa gürígia jílagubei, ürüwa wuríbani ligia. wátu geméti, gumúlali, lúma súfuru. ¹⁹ Jayúmuluguñein gabáyu jagia jabáfu, lúma luágu jáli, ítara líña jáli camá jéwe gábuluguti, láu giñe jadüga wuríbani.

²⁰ Ja jíbiri gürígia ja mouwegunbaña láu wuríbani le, mígirun meme jamúti jadáaguni cátei lé buri meja jadügübei, mígirun jamei jájuduragun joun esprítugu wuríbatíña lúma joun sándu ja gólu, pláta, brónse, dübü, wéwe—ja siñáti jaríjin, ni jagáambun, ni jeíbugun. ²¹ Mígirun jamei jáfarajan, jabíñarajan, jasálufurijan, lúma jíwerujan.

10

¹ Ábati naríjin ábanya ánjeli gabáfuti, ába larárirun siélugiñe lídan juánriñu táu ában jerémuru lougiñe lichügü. Miríti ligibu quei wéyu, liábin lúruna camá durúngu líña. ² Níñoun ában tiraúraü líburu junréngu lújaburugu. Ába líchuguni lugüdi le loúnwenren lougiñe barána, le lubaúna lougiñe múa. ³ Ábati lagúaragun láu umálali jéreti quei ában liñún dan le lówoujan, dánti le lagúaragunbei, ába lagaambúniwa ladürügüdün sédü wayújururu. ⁴ Lárigiñe ladürügüdün sédü wayújururu ligía, ába yebe nabürüjaali lan le laríñagubei, ába nagáambun laríñagun ában umálali nun siélugiñe.

—Maríñagabei le laríñagubei sédü wayújururu, mabürüjabei gíñe.

⁵ Ánjeli bugáti le naríjubei lougiñe barána lúma lougiñe múa, ába liñúrui lújabu le loúnwenren siélu, ⁶ ába láfiñurun luágu le gabágaribei lun sun dan, le adügübalin ubouú láu sun siélu, barána lúma sun cátei le lídaanbei, ába laríñagun.

—Úadügüyáali darásaü. ⁷ Dánme le lachülürün dan lun lagúmeserun jasédün ánjeli ínwirei lífidun, gúnfuljalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸ Ábaya ladímurejan umálali lé buga nagáambubei siélugiñe, ába laríñagun nun.

—Beíba, banügounme tiraúraü líburu to daráguboun, to lújaburuguboun ánjeli le rárabei lougiñe barána lúma múa.

⁹ Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, jóuboun, bímebei basándirunun biyúmulugu, tagífidame burágeirugu.

¹⁰ Ába nanügünun tiraúraü líburu tugúya lújaburugugiñe ánjeli ligía, ába neiginun, bímeti nasándirunun niyúmulugu camá síruudu, larígiñe neiginun, ába tagífidun narágeirugu. ¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

11

Ja bián geféentiña

¹ Ábati líchugúniwa ában mabúru nun lenége ában wéwe le amísuraagülei, ába laríñagun Búngiu nun.

—Sarába, amísurajaboun lilígilisin Búngiu lúma latárü, abájüda báñame átiriñanu lan ja ájuduragutiña ñi. ² Mamísurajabei bürürü le bougudibei tibiti ligílisi ladüga derégewaali joun ja terénchabaña lun Búngiu, ja lúnbaña jagünrinchaguni ubúruge le sándubei luágu bián-wein-bián játi. ³ Ábame nouñajan bián geféentiña lun jadímurejan nuágu luágu mílu bián-san ürüwe-wein wéyu, táu jadáuragun lúdu.

⁴ Bián geféentiña jagía, jagía gayáwabalín bián tídbu wéwe to olívo lúma bián lébu sanúdelu le ligíbugiñebei Búngiu, le Labúremebei sun ubouú. ⁵ Ánjein ñi abúseerúti ladügün wuríbani joun, ába jígiragüdün wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguarügü le buséti ladügün wuríbani joun. ⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña gíñe lun jadügüni dúna jítaüme, lun gíñe jasúfuriragüdüni ubouú láu sun luwúyeri wuríbani, ságü jabúseerun. ⁷ Dánme le gumú jamaali jawádigimari, lageíndaguba anímaalu le áfuridubei lídaangiñe

júyu le mébejabei jáma, ábame jefédiruni wuríbu, ábame láfaruniña jilágubei. ⁸ Ábame jeréderun riwágu lídan lémeri oúnwenbun ubúruyu le Jerusalén le ñí lubei ládarawagúa Jesúsu luágu gurúwa, fulásu meme le, camá Sodóma lúma Ejipto. ⁹ Ábame jariáguniña gürígia ja lídaangiñetiña sun fulásu, sun rása, sun luwúyeri dimúrei, lúma néchaani luágu úrúwa wéyu dimí, mígirunbaña lun jábunún. ¹⁰ Ábame jagúndaaragun ja ubouágubaña láu jóuwegun, daríme lun jedéweegun cátei jámagua, le jagúndan, ladúga berése jamá meja bián lánigu Búngiu jagía joun. ¹¹ Ába naríjin, áu Juan, luágu lárigiñe lan úrúwa wéyu dimí ligía, ába láguyuguagúdüniña Búngiu, ábaya jásaarun, áni sun ja aríjubaliña, weíriti janúfudedagun. ¹² Ába jagáambun bián geféentiña jagía ában umálali jéreti siélugiñe le aríñagubei.

—Weínjuma ñájoun siélun.

Ába jamúdeirun siélun lídan ában juánriñu, aríagu jáganiñu joun. ¹³ Lídan óra ligía, ába ladágarun ában oúnwenbun járabaganáli, ába tagúluludun ában múna tídaangiñe ságü díisi to ubúruguboun, ába jóuwegun sédü mílu gürígia ladúga járabaganáli ligía. Ja jíbiri gürígia, ába jíchugun inébesi lun Búngiu le siélubei ladúga luweirin janúfude.

¹⁴ Sügüja libíaman lanárimeníga, madísebei le ában.

Le lisédün fídu

¹⁵ Ába línwiruni jasédün ánjeli lifídun, ába lagaambúniwa laríñagun umálali buri jéreti siélugiñe.

Chülújali lidáani Wabúreme Búngiu lúma lidáani Crístu lun jarúejan lídan sun ubou, áni jarúejaba sun dan.

¹⁶ Ábati jélemuchunga weín-gádürü gürígia ja weírigutiña, ja ñúnbaña luágu jála le lála urúei, láu jagíbu múarugu, ába jájuduragun lun Búngiu. ¹⁷ Ába jariñagun.

Teínqui wáña bun, Wabúreme Búngiu,

amürü le Súnti Gabáfu,

amürü le wínwanbei lúmagiñe lubáragiñe furúmiñeti dan, wínwan amürü guetó, wínwan amürüme sun dan.

Teínqui wamútibu ladúga ragúbaali lan oúnwenbun bubáfu.

áni guméseedibu arúeija.

¹⁸ Gáñiburija néchaanigu,

chülúja wéyu lun babeíjan,

chülúja giñe dan lun bagúseragúdüniña jiláguaaña,

ábame bíchuguni jafáyeirua ja báni profétagu joun,

jáma jíbiri ja deréguabaña jóungua bun, jáma sun jawúyerigu gürígia ja íchubaña inébesi lun bíri.

Chülúja óra lun bagünrinchaguniña ja agünrinchagubalin ubou.

¹⁹ Ábati tánjunrenchun lúban Búngiu to siéluboun, ába tarijín gáfu to lágei lidáradun Búngiu jáma lumútuniña ñi tídan lúban. Ába ñi lan labírijaníga, ireíni, wayújururu, ában járabaganáli, lúma lábburujan lúbara júya deréguati le weínamuti.

12

Würi lúma anímaalu le dragón

¹ Ábati lasáliragun ában oúnwenbun seíni siélu. ában würi darúgu líña wéyu táu camá jamuga ában díngugu, láu játi lábugiñe tugúdi, lúma ában rídi jáu

dúusu warúguma tábulugu. ² Würi tugúya dageínañoun, tagúaraja láu igári le lánina agáriduni, ladüga súfuritu lun tagüriajan. ³ Ábaya lasálrugun ábaya seíni siélu. ában oúnwenbun anímaalu le dragón funáti, sédüñein lábulugu, díisi ligáanchun, lúma ában ridi luágu cáda lábulugu. ⁴ Ába ladúrugudun dragón ligía ában jádaangiñe ságü ürüwa warúguma láu líli, ába lajúruniña múarugun. Ába laráramun dragón ligía tigíbugiñe würi to lúnboun tagüriajan, lun leígini tiraü dánme le tagüriajan. ⁵ Ába tagüriajan würi tugúya ában wügüri irájü le lúnbei ledéraagüdün lagúmadijan lídan sun fulásu queísi láu ában murúsun gürábu. Ába lagídarúniwa tiraü tueí, ába lanügüniwa lun Búngiu luágun lála. ⁶ Ába tanúrajan würi tugúya lídoun fulásu mageírawati le ní lubei aráanseeli lan Búngiu ubáraü tubá, lun toúnigirúniwa ñi luágu mílu bián-san ürüwa-wein wéu.

⁷ Lárigiñe, ába ñi lan ában wuríbu siélu, ñi lubei lageíndagua árcanjel Miguél jáu láni ánjeligu lúma dragón. Ageíndaguati dragón jáu láni ánjeligu, ⁸ ába jeféridiruni wuríbu, ába mabáaraña lan siélu. ⁹ Ába lubeiti laságarún oúnwenbun dragón, le binádu jéwe ligíra le gíribeí Máfia, o Satanási, le ayéejabalin sun ubouú, siéluigiñe. Ligía jáu sun láni ánjeligu, ába jachágarún múarugun.

¹⁰ Ábati nagáambun laríñagun ában umálali jéreti siéluigiñe.

—Gáñei láali Búngiu Máfia láu luweírín lubáfu. Chülüjali asálbaruni joun gürígia ubouúgun, chülüjali larúeijan Búngiu lúma lagúmadijan Crístu, ladüga sagáwaali le íchugubei jadúnrun wadújeñu lueígiñe Jesucrístu, le íchigañajábei jadúnrun wéyuagu, áriebu ligíbugiñe Wabúngiute. ¹¹ Sirígua jamáali láu loúnwen Mudún, le Jesucrístubei, lúma láu jíchugun fe luágu láni Búngiu ugánu luágu asálbaragülei, manúfudeduntiña lueí jeféridiruni jabágari, aráanseñu rügütiña lun jóúnwen. ¹² Gúndaalá lubeiti siélu, gúnda jumá jugúya le aganouúbei ñi. ¡Áni fugiábugu ja aganouúbaña ubouúagu, lúma baránaja! Nüdünja Máfia júmoun láu oúnwenbun igáñi, ladüga subúdi lumúti luágu murúsun rügáli lan lidáani.

¹³ Dánti laríjinbei dragón luágu fíwaali lan ubouúgun, ába leíbaajanun würi tó buga agüriajaboun. ¹⁴ Ába líchugún bián larúna dunúru le weínamuti tun würi tugúya lun gayára lan tájamarun lídoun fulásu mageírawati díse lueí dragón ligía, le ñiba lubeí toúnigirúia luágu ürüwa írúmu dimí. ¹⁵ Ába lewérajan dragón ligía sarágu dúna liyúmulugugiñe lun lañáradaguagüdúnun würi tugúya. ¹⁶ Ába líderagunun múa würi tugúya, ába lánjunrenchun múa, ába lachúruni sun dúna le lígiragüdúbei dragón liyúmulugugiñe. ¹⁷⁻¹⁸ Gáñitimaati dragón túma würi tugúya, ába lídin ageíndagua jáma tirájüñü ja ñüdúbaña láu le lubeíbei Búngiu, falájamei ugánu le láni Jesucrístu.

13

Ja mónsturu

¹ Ába naráramun láru béya, ába naríjin lamúdeirun ában mónsturu baránajagiñe, sédüñein lábulugu, díisi ligáanchun. Níñein ridi luágu cáda ligáanchun lúma ában íri le áubei lanábaguei Búngiu luágu cáda lábulugu. ² Mónsturu ligía lenége geígusi, ítara líña lugúdi queísi lugúdi óso, liábin liyúma camá liyúma líñún. Ába líchuguni dragón lubáfu lúma lála lun, lúma sarágu ubáfu lun lagúmadijan. ³ Níñein ában chaúnti luágu ában lídaangiñe lábulugu mónsturu ligía, weíríti lún yebe láfaruni jílágubei, ába lareídagun lichaúntin. Weíríti janígi sun gürígia láu mónsturu ligía. ⁴ Ába jájuduragun lun dragón

luágu líchugun gumádi lun mónsturu, ába giñe jájuduragun lun mónsturu, ába jariñagun.

—Úati ni ában quei mónsturu le, ¿cába gayára láfaruni?

⁵ Ígirúati giñe mónsturu ligía lun ladímurejan dimúrei buíti luouúgua lúma lun lanábaguni Búngiu, lúma lun lagúmadijan luágu bián-wein-bián játi. ⁶ Ába ladügün ítara, adímurejati wuríbati luágu Búngiu, anábalei líri, lúban, jáma ja siélubaña. ⁷ Ígirúati giñe lun lageíndagun jáma lánigu Búngiu dari lásiiragúniña, ába líchugúniwa ubáfu lun jawágu sun rása, fulásu, luwúyerigu dimúrei lúma néchaani. ⁸ Ába jájuduragun sun ja aganoubaña ubouúagu lun mónsturu ligía, ja úabaña jiri búruwañu lúmagiñe ladügün ubou tidan líburu to lánina ibágari, to lúmbabon Jesucrístu, le Mudún le ouwebei.

⁹ Le garígeiruguti lun lagaámbun, agáambalá. ¹⁰ Ja adáürütiña ámu, jadáürawagúba giñe, ja áfarajatiña táu efein, jáfarawagúba giñe táu efein. Ligía busén jabei lánigu Búngiu gurásu lúma afiñeni.

¹¹ Lárigiñe, ábaya naríjin ábanya mónsturu lamúdeirun múarugugiñe. Níñein bián gánchu luágu camá ligáanchun mudún, áni ítara líña ladímurejan camá ában dragón. ¹² Níñein sun ubáfu le láni furúmiñeti mónsturu lúma lun ladügüni cátei lueigiñe loubadina furúmiñeti mónsturu. Ába ladügün lun jájuduragun sun gürigia ja ubouagubaña lun furúmiñeti mónsturu, le lareídaguagüdübei lueigiñe chaúti le luágubei. ¹³ Adügati giñe ouñwenbun buri miláguru, áburujagüdati wátu geméti siélugiñe lun múarugun jagíbugiñe gürigia. ¹⁴ Lídaangiñeti miláguru buri le únbei líchugúa ubáfu lun ladügüni lueigiñe loubadina furúmiñeti mónsturu, ába leyéeduniña ja aganoubaña ubouúagu, ába ladügagüdün ában liyáwa mónsturu le gawágubalin chaúti ába lareídagun, joun. ¹⁵ Ába libíjin jabíaman mónsturu ubáfu lun líchugun ibágari tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun. ¹⁶ Adügati giñe lun sun lan gürigia—weínamujaña, ñübürigiña, rísitiña, gudemetiña, idámuni, máma idámuni—lun labürüdün líri mónsturu luágu jájabu le jouñwenren o luágu lan jerébe. ¹⁷ Úati ni ában gayáraati lagañijan ni cáta ni lalúgurajan ánjein úa líri mónsturu o linúmerun líri luágu. ¹⁸ Buséntitia cátei le lichú áu, le gunfaráandati, atúriajalei linúmerun mónsturu, le ábanbei quei líri wügüri, áni niján número le asálirubei lídaangiñe lilétürana íri ligía. sísi-san ürúwa-wein-sísi.

14

Jerémujan ja san bián-wein-gádürü mílu

¹ Lárigiñe líra, ába naríjini Jesucrístu, le Mudún, rára lábulugu wübü le Sión, le siélubei. Níñanu san bián-wein-gádürü mílu gürigia lúma, ja búruwañubei líri Mudún lúma líri Lúguchi jeréberugu. ² Lárigiñe, ába nagáambun ában amúri ñübinti siélugiñe camá lamúri barána, camá giñe ladürügüdün ában wayújururu le jéreti, ítara líña giñe camá jamuga tamúri sarágu gidára. ³ Ába jerémujan gürigia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürigia ja weirigutiña. Úati ni ában gayára lumúti laníchigu lerérun urému ligía gunfaráanda jaweídügüya san bián-wein-gádürü mílu ja asálbarúabaña jádaangiñe ja ubouagubaña— ⁴ jagía ja mádaragúnbaña joungua jámoun würiña, reídeitiña jarúmañu, falájamei Mudún le ñijin lumúti lídin, sálbawatiña jádaangiñe gürigia quei furúmiñeti edéweejani

lun Búngiu lúma lun Mudún. ⁵ Madárirúnwati ni murúsun iyéeni luágu jayumáru ladüga jarúmatiña ligíbugiñe Búngiu.

Ugánu buri le jíchubei ürüwa ánjeligu

⁶ Abati naríjin ábaya ánjeli ájamaja lamídaangua siélu, ñíñein ugánu le magúmuchaditi lúma lun lapúrichijani joun ja aganoubaña ubouágu—joun sun néchaanigu, rása, luwúyerigu dimúrei lúma sun fulásu. ⁷ Laríñaga láu umálali jéreti.

—Inébelá Búngiu jun, ru jugúyame uweírigu lun, chülüja dan lun lagúseragüdün. Judúgua jumá lun le adügübalin siélu lúma ubou, barána lúma líseesen dúna.

⁸ Ába liábin ábanya ánjeli lárigi, ába laríñagun.

—Jeígua, jeígua Babilónia to weíríguboun, ladüga tabácharuadágüdüni sun néchaani láu bínu le lánina liwíye tayúmajan.

⁹ Ába liábin ábanya jürüwan ánjeli, ába laríñagun láu umálali jéreti.

—Le ájuduraguti lun mónsturu lúma tun liyáwa, ígira ligíame lun labürdúniwa líri mónsturu luágu lújabu o leréberugu, ¹⁰ látubei bínu le lánina lanárime ligáñi Búngiu le lúnbei láburujan le gumúti luágun, ábame lasúfurirun láu wátu lúma súfuru ligíbugiñe Jesucristu lúma jagíbugiñe ánjeligu ja sándubaña. ¹¹ Laweínruba lugúmulin wátu le asúfuriragüdúbaliña lun sun dan, úabei eméraaguni ni wéyuagu ni áriebu joun ja ájuduragubaña lun mónsturu lúma tun liyáwa, o ja bürüwañubei líri jawágu. ¹² Ligía lébubei lúnti lan gagúraasun jamá lánigu Búngiu ja ñüdünbaña láu le lubeíbei áni falájamei Jesúsu surúñu, lun ítara meme jamá derégüdagu lídan jafiñen darí lúmoun jounwen.

¹³ Abati nagáambun laríñagun ában umálali ñúbinti siélugiñe nun.

—Abürüjabei le. “¡Gúnda jamá ja ouwetiña láu jafiñen luágu Jabúreme Jesucristu!” Lúmagiñe óra ligía, jeméraaguba lídaangiñe jawádigimari, ábame lídin le jadügübei úara jáma, líña Sífiri Sándu.

Lalúbajoúniwa múa

¹⁴ Abati naríjin ában juánriñu jarúti, ligíbuagu juánriñu ligía, ñun líña ában lenége Jesucristu, le Wügüri Garaúwarügüti. Ñíñein ában rídi gólu lálubugu túma ában alúbagülei jamánatu lújaburugu. ¹⁵ Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagüle, ladüga chülüja dan lun alúbajani, ladüga funáli nádü.

¹⁶ Ába lásügüragüdünun le ñúnbei luágu juánriñu lalúbagüle múarugugiñe, ába lalúbajan.

¹⁷ Ábayati láfuridun ábaya ánjeli tídaangiñe lúban Búngiu to siéluboun táu gíñe lalúbagüle jamánatu. ¹⁸ Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

—Dáboun balúbagüle to jamánaboun, alúbajaboún tirésini beíbei to múaruguboun, ladüga funáaru.

¹⁹ Ába lásügüragüdünun ánjeli ligía lalúbagüle múarugugiñe, ába lalúbajanun beíbei to múaruguboun, ába líchugunun lídoun ában ágei weíríti lun taríbhawagúniwa. (Míni lan líra, lanárime abeichúni le lúnbei liábin lúmagiñe

Búngiu.) ²⁰ Ába taríbhawagún beíbei bougudi libíti ubúru, ába láfuridun jítaü lidaangiñe tágei chülü lúmoun líñun jafúrenun gabáyu, úrúwa-san kilómetro geyégu.

15

Ánjeligu jáma jagúmujuún sédü ígei

¹ Ába naríjin ábanya oúnwenbun seíni siélu, weírigúdati anígí. sédü ánjeligu jáu jagúmujuún sédü ígei, ja áubaña lagúmucha ligáñi Búngiu.

² Aríjatina gíñe camá jamuga ában barána le bídiriu láu wátu geméti lídan, ñíñanu ja agáñeirubaliña luágu mónsturu, túma liyáwa, lúma luágu linúmerun líri, rára jáña lubádu barána le bídiriu ligía táu gidára to líchuguboun Búngiu joun.

³ Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weírítí áni buítí sun le adúga báalibei,

Wabúreme Búngiu, Súnti Gabáfu,

surúñu líña sun le badúgúbei, úaragua,

amürü le Lurúeitebei sun néchaani.

⁴ ¿Cábasan manúfude bueí, Wabúngiute?

¿Cábasan madímurejan buítí buágu?

Amürü rügüñadibu mafígounjan,

jayábinba lílana sun fulásu, ábame jájuduragun bun,

ladúga arijúaaali luágu buídu lan sun le badúgúbei.

⁵ Lárígíñeti sun cátei le, ába naríjini fulásu le sándutimaabei tídan lúban Búngiu

siélu, fulásu le ñí lubei lerédera Búngiu, júnren lubéneri. ⁶ Ába jáfuridun sédü

ánjeligu ja jáubaña sédü ígei jagía, ñígiñe. Táuñanu janáangun líno to jarúmatu,

mirí, liábin jabélitin, gólu luágu janíguagu. ⁷ Ába liábin ában jádaangiñe cátaña

gabágaritiña jagía, ába líchugun ában cópu gólu lun cáda ában jádaangiñe sédü

ánjeligu jagía, buin líña cáda cópu láu luweírín ligáñi Búngiu le gabágaribei lun

sun dan. ⁸ Ába labuínchun fulásu le sándutimaabei láu gumúlali le ñúbinbei

lidaangiñe luweírigin Búngiu lúma lubáfu. siñátiti lebelúrún ní ában ñíjin darí

jagúmuchun sédü ígei ja jámabaña sédü ánjeligu jagía.

16

Cópu buri le lágei ligáñi Búngiu

¹ Ábati nagáambun laríñagun ában umálali jéreti joun sédü ánjeligu jagía lidaangiñe fulásu le sándutimaabei.

—Jeiba áturei cópu buri láu lanárimé ligáñi Búngiu ubouágun.

² Ába lídin furúmiñeti ánjeli, ába láturuni licópun ubouágun, ába lasálirun gumeín gáriti jawágu sun ja gawágubalin líri mónsturu, judúgua jagía lun.

³ Ába láturuni jabíaman ánjeli licópun baránajoun, ába lasáliragun barána queísi játa jíláaña, ába jóuwegan sun cátaña ja gabágaribaña lídan.

⁴ Ába láturuni jürúwan ánjeli licópun luágun buri dúna lúma líseesen dúna, ába lasáliragun jítaüme. ⁵ Ába nagáambun laríñagun láni dúna ánjeli.

—Úaraguatibu láu bagúseragüdün ítara, Búngiu sándu, amürü le wínwanbei lúmagiñe lubáragiñe furúmiñeti dan áni wínwan amürü guetó, ⁶ ladúga jagía, aseíñeigüda jamúti játa profétagu jáma ja derégeguabaña jóungua bun, guetóti gurágüdaadibu jítaü joun, yúuti joun.

⁷ Agáambatina giñe laríñawagun lueígiñe latárú.

—Ánja Wabúreme Búngiu le Súnti Gabáfu, agúseragüdaadibu láu ísuruni lúma úaraguni.

⁸ Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña gürígia láu lísü, ⁹ ába jachúrarun súngebui. Láu sun lira, masáansiragunti jagáburi, madímurejan jagía buíti luágu Búngiu, anábagnarügü jameí Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lála mónsturu, ába leréderun larúeijan lábugiñe lubúriga. Ába buri jágüragunun gürígia jañeñe láu igári. ¹¹ Ni itara, masáansiragunti jagáburi lun jígiruni wuríbati léñaja jadügubei, anábagnarügü jameí Búngiu le siélubei luágu jagárigu lúma jagúmeín.

¹² Ába láturuni jasisín ánjeli licópun luágun oúnwenbun dúna le Eufrátés, ába lamábeidun lun ñi lan úma lun jásügürün urúeigu ja ñübinbaña lueígiñe oúbaü le ñígiñe lubei laboucha wéyu.

¹³ Ábati naríjin jáfuridun ürúwa espíritugu wuríbatiña liyúmulugugiñe dragón, liyúmulugugiñe mónsturu, lúma liyúmulugugiñe proféta le yéebi, itara jáña espíritugu wuríbatiña jagía quei júa. ¹⁴ Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja ubouágubaña lubá wuribu le lánina oúnwenbun luwéyuri Búngiu le Súnti Gabáfu. ¹⁵ (“Tóúnigi jumátia ladüga sódinibei niábin quei liábin jíweruti áriebu. Gúndaabei le agágudúañubei, nuján lanáangun luágu, lun meíbugun lan surúsu lueí jaríjini gürígia le mabúseerun lubei lun jaríjini luágu,” líña laríñagun Jesucristu.)

¹⁶ Ábati jóúndaraguniña urúeigu lídan fulásu le giribeí Armagedón lídan dimúrei le hebréo.

¹⁷ Ábati láturuni jasadün ánjeli licópun garábalirugun, ába láfuridun ában umálali lídaangiñe fulásu le sándutimaabei le siélubei. Lumálali Búngiu ligía, le ñúnbei luágu lála ñi, laríñaga.

—Adügüwaali.

¹⁸ Ába ñi lan labírijaniga, irefni, lúma wayújururu, ába lánjingichun múa láu ában járabaganáli, jéreti sügü láu sun járabaganáli le dagáalibeí lúmagiñe ñi jamá gürígia ligíbuagu ubou. ¹⁹ Ába lafánreinragun ubúrgu weíriti le Babilónia lídan ürúwa murúsun, ába buri lagúluludun ubúrgu le ubouágubei, ába larítangun Búngiu luágu ubúrgu weíriti le Babilónia lun lájuluchagüdüni bínu le lánina abeichúni le loúnajabei lun lídan ligáñi. ²⁰ Sun ubóju lúma sun wúbü, ába lagúmuchagun. ²¹ Ába giñe láburujan oúnwenbun buri lúbara júya deréguati siélugiñe jawágun gürígia, júrüburiti chülü lúmoun san líburu, ába janábaguni gürígia Búngiu luágu, ladüga ában lan abeichúni janárimeti.

17

Tasiadirúniwa oúnwenbun jóru

¹ Ábati liábin ában jádaangiñe sédü ánjeligu ja láubaña sédü cópu, ába laríñagun nun.

—Jigábu, narúfudaali tabeichún oúnwenbun jóru to ñúnboun ligíbuagu barána bun. ² Agánawaaña urúeigu ja ubouágubaña lídan salúfuri túma, bachárua jagía ja ubouágubaña láu bínu le lánina tisálufurin.

³ Ába lanügünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába naríjin ában würi waríñu luágu ában mónsturu

funáti, bürüwañu líña sun luwúyeri dimúrei le anábaguti Búngiu tuágu, sédũñein lichügü mónsturu le uágubei tañúura, díisi ligáanchun. ⁴ Würi tugúya, gúchu lúma funáti ticólorunbei tanáangun, liábin tuwénden, gólu, dübü buíduburiti, lúma pérla. Nĩñein ában cópu gólu tújaburugu buin láu tisálufurin lúma liwíye tadáagun. ⁵ Bürüwañu líña ában íri teréberugu láu ában aníchigu arámudaguati. Íri le teréberugubei. “Babilónia to weírīboun, jáguchu jóru lúma sun luwúyeri iwíyeni ubouágu.” ⁶ Ába nasúbudiruni luágu bacháruañoun lan würi tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucristu. Dan narĩjinalin cátei le, ába laweíridun nanígi. ⁷ Ábati laráñagun ánjeli ligía nun.

—¿Cá uágu laweírída banígi? Nasúbudiragúdaali míni tan würi to bun, láu sun mónsturu le anügübarun, le sédũbei ichügü, díisi ligáanchun. ⁸ Mónsturu le barĩjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujoún louñwen. Ja aganoúbaña ubouágu, ja úabei jíri bürüwañu tidan líburu to lánina ibágari lúmagiñe ladügün ubouú, laweíriduba janígi dánme jarĩjini mónsturu lé meja gabágaribeí áni úaali, ábaya liábin.

⁹ Níjein cátei ya joun ja gayáraabei gunfaráanda jamáni. Sédũ ichügü ligía, míni lan sédũ wübü le uágubei ñun tan würi tugúya, ¹⁰ sédũ méme ichügü ligía, míni lan giñe sédũ urúeigu. Seíngü jádaangiñe urúeigu jagía, gumújali jarúeijan, ában jádaangiñe, larúeijaña guetó, le ában, miábingili. Dánme liábin jagúmujoún, larúeijaba murúsürügü dan. ¹¹ Le mónsturu lé meja gabágaribeí áni úaali guetó, ligía jawídũnbei urúeigu, láu sun ligía lan ában jádaangiñe sédũ, lárígiñeme, ábame lídin lídoun lagúmujoún louñwen.

¹² Díisi gánchu le barĩjubei, díisi urúeigu ja magúmeserungiñabaña arúeija, jabĩjuba jabáfu urúeigu luágu ában óra úara lúma mónsturu. ¹³ Ában lábu jarítangun urúeigu jagía, jíchugubei jabáfu lúma jarúeijan lun mónsturu. ¹⁴ Jageíndaguba lúma Jesucristu, láfaragubaña jílagubei, ladúga jabúreme sun abúremein ligía, Jarúeite giñe sun urúeigu, áni jagáñeiruba giñe sun lánigu ja lanúadajabaña Búngiu áni derégüdagu méme jáña lídan jafĩñen luágu, úara lúma.

¹⁵ Ába giñe laráñagun ánjeli ligía nun.

—Barána le barĩjubei, le igibuagubei tañúura jóru, fulásu buri, luwúyerigu dimúrei, lúma néchaani. ¹⁶ Áni díisi gánchu le barĩjubei luágu mónsturu, le méme díisibeí urúeigu, teyéereeguduba jóru joun, ábame jígirunun fíwañu, surúsu, jeígubei túgürügü, ábame jágudunun láu wátu geméti. ¹⁷ Rúlaali Búngiu tidoun janígi lun jadügüni le labúseerubei láu júaradun lun jedéregeruni jabáfu queísi urúeigu lun jíderaguni mónsturu daríme lagúnfulirun le laráñagubei Búngiu. ¹⁸ Würi to barĩjuboun, tugúya weíríti ubúrugu le agúmadirubaliña lurúeitegu ubouú, le gíribeí Babilónia.

18

Teíquadun Babilónia

¹ Lárígiñe sun cátei le, ába narĩjin ábanya ánjeli larárirun siéluigiñe láu sarágu ubáfu, ába larúgoungadun ubouú láu límirin. ² Lagúaraguati láu umálali jéreti.

—Gumúgua, gumúgua Babilónia to weírīboun, guetó jábiñejaru máfianu, jarámudaguagüle sun jawúyeri espíritugu wuríbatiña, jádibu dunúru wíyetiña queísi wadúbi. ³ Ladúga sun lan néchaanigu bacháruaaña láu bínu le lánina

tisálufurin, áni agánawaaña lurúeitegu ubouú túma lídan tisálufurin, alúgurajatiña buri ja ubouagubaña, rísijaña lídaangiñe luwénden touseragun túngua.

⁴ Ábayati nagáambun laríñagun ábanya umálali ñúbinti siélugiñe.

—Furíjuma Babilóniagiñe, jugúya le nánigu, mafánran jumámuga lídan tífígoun lúma lídan tabeichúniwa. ⁵ Gíbeguaali tífígoun dari lun lachülürün siélu, áni jaritaguaali Búngiu luágu luríban touserun. ⁶ Adúga jumá tun Babilónia quei tadúga joun ámu, fáyei jumoún dóbüli lueí le tadügübei. Rújuma ában uníñein le jéretimaati bián weíyaasu tun sügü láu le tíchugubei joun ámu. ⁷ Súfurigüda jumoún quei méme tedéregagun túngua lun anáanguni únguau lúma lun agúnrinchaguni, ladúga aríñaga tan tidan tanígi. “Ñun nína ya quei ában urúei, máma nugúya ában jiñáru mámaritu, masúfurirubadina giñe.” ⁸ Ligía liábinba lubeí tabeichún lídan ában meme wéyu—ouweni, íruni, ilámaü—ábame tagudún láu wátu geméti, ladúga gabáfuti Wabúreme Búngiu le asíadirubarun.

⁹ Lurúeitegu ubouú ja aganoúbaña túma lídan salúfuri lúma irisini, jayájuba, gudémegua tugúyame joun dánme jaríjini gumúlali le lánina tagudún. ¹⁰ Ábame jeréderun díse, le janúfudei lueí tabeichún, ábame jaríñagun.

—¡Fugiábu Babilónia, ubúruge le weíríbei, Babilónia ubúruge le gabáfubei, lídaanrügü murúsun óra liábin babeichun!

¹¹ Ja alúgurajatiña buri ja ubouagubaña, ayájuatiña giñe, gudémegua ligía ubúruge ligía joun ladúga úaaña lan cába lan agáñjei ebégidinaü le janáajabei—¹² ebégidinaü lé buri gólu, pláta, dübü buíduburitu, pérlas, gamísa to líno to finutu, séda, colóru buri güchu lúma funáti, lúma giñe sun luwúyeri fuláansu le jémeti, ílagu láuti jari léfan, fuláansu buíduburiti, brónse, gürábu, lúma dübü miríti, ¹³ canéla, cátei lé buri jémeti, cupáli, mírra, ibíñei, bínu, aili, fulúwaaru finutu, lúma türígu, barútiña giñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o güriquia lun jalúgurajoún. ¹⁴ Jaríñaguba lun ubúruge ligía.

—¡Úaaru frúta buri to seméboun búma to jínsiñeñajáboun bun sarágu, féridi báali giñe sun irisini lúma wéndei le búmañajabei, féridiwaali lun sun dan!

¹⁵ Jáñaja alúgurajabálin buri cátei le áni rísijaña lídan ubúruge le, jeréderuba díse le janúfude lueí labeichún, ayájuajaina, aságürijeina. ¹⁶ Ábame jaríñagun.

—¡Fugiábu ubúruge weírítí! Ítara liñá meja quei ában würi táu tadaúragun to líno finutu túma anáanguni to colóru güchu lúma funáti, láu tuwénden gólu, dübü buíduburiti lúma pérla. ¹⁷ ¡Lídan murúsun óra gumúja sarágu irisini!

Sún buri tarúne ugúnein, pasajéruge, mádulungu, jáma sun ja ñadágimeinbaña baránaja, díseti jeréderun. ¹⁸ Dánti le jaríjini lugúmulalin lágudun ubúruge, ába jagúaragun.

—¿Cásan meja ámu ubúruge ñíbei quei óunwenbun ubúruge le?

¹⁹ Ába jíchaagun múa jábulugu, ayájuaja, aságüríja, agúaragua.

—¡Fugiábu Babilónia lé buga weíríbei! Rísijaña yebe sun ja gagúnebaña wapóru baránaja láu lirisin, áni lídaanrügü murúsun óra güriñwagua.

²⁰ Gúnda jumá láu le asúseredubei lun Babilónia, amürü siélu, júma jugúya apóstolugu, jáma profétagu, jáma sun ja lánigu Búngiu, ladúga adúgaali Búngiu güsei jun láu lasíadiruni.

²¹ Ábati liñúrún ában ánjei gabáfuti ában dübü le ítarabei quei ában mulí, ába láguruni baránajoun, ába laríñagun.

—Ítara lúba laráriragüdüniwa Babilónia, ubúругu le weíribei, marijindügüýawalime. ²² Magaambündügüýawalime tamúri gidára, fidu, bémerirugu, úaañame giñe ñadágimeintiña bídan ni ca uwúyeri, magaambúnjalime giñe lamúri dübü le mulí bídan. ²³ Madúnraagúnjalime larúgounga lámpu bídan, magaambündügüýawalime areíñjani le lánina maríei bídan, láu sun gabáfugüda bániña meja báni alúgurajatiña lídan sun ubou, eyéedagua báña sun néchaani láu babíñarajan.

²⁴ Daríwaali játa profétagu, jáma ja lánigu Búngiu, lúma játa sun ja áfarawagúañabaña ubouagu, dariwaali játa sun jagía lídan ubúругu lé meja Babilónia.

19

¹ Lárigiñe cátei le, ába nagáambuni jamálali sarágu gürígia, jagúarajan. ¡Alelúya! Weíriti Wabúngiute le Súnti Gabáfu, ligía asálbarubaliña lánigu.

² Agúseragüdati láu úarani lúma ísuruni, siádi láaru ouñwenbun jóru to agádeirubalin ubou láu tisálufurin, águyugüda láali jáfarawagún lánigu tuágu.

³ Ábaya jagúarajan.

—¡Alelúya! Magúmubei lamúdeirun tugúmulalin.

⁴ Játi weín-gádürü gürígia ja weírigutiña, jáma gádürü cátaña gabágaritiña jagía, ába jélemuchun chülü múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵ Ábati lagaambún laríñagun ában umálali yaráfa lueígiñe lála Búngiu. Rújuma uweírighuni lun Búngiu, sun jugúya ja esériwidubalin, áni inébelá jun, weíyaaña, ñübürigiña.

Fédu siélu

⁶ Agáambayatina camá jamuga jamálali sarágu gürígia, camá lamúri sarágu dúna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadíja.

⁷ Gúndaagua wamá, buñwama láu ugúndani, ru wagiame uweírighuni lun, ladúga chülúja óra lun lídan jamá ában lánigu Jesucristu lúma, le gumúti.

Aráanseña quei ában adári lubá tamárieidun,

⁸ táu tanáangun líno to fínutu, jarúma, áni mirí.

Míni tan líno fínutu, íbágarí le surúti, le jabágarí lánigu Búngiu.

⁹ Ábati laríñagun ánjeli nun.

—Babürüja. “Gúnda jamá ja amísurajoubaña lídoun fédu le lánina lúaradun Jesucristu jáma lánigu.”

Ába laríñagun nun.

—Dimúrei buri inárüni le laríñagun Búngiu le.

¹⁰ Ába nájuduragun ligíbugiñe ánjeli ligía, ába laríñagun nun.

—Madügabei le, esériwiduti áu lun Búngiu quei amürü jáma bibíriña ja afálarubalin láni Jesúsu ugánu derégüdagüñu, lun Búngiu lun bájuduragun.

Ugánu le lanügübei Jesúsu lídoun larúgounga, ligía lébubei sun le jaríñagubei profétagu.

Le aweñjabalin gabáyu jarúti

11 Ábati naríjini siélu junréñu, ába lasálriragun ában gabáyu jarúti, léti aweinjabalin, Gúnfuliti lúma Inárüni, ligía líribei, ladüga láu ísuruni lagúmadija, láu giñe ísuruni lageindagua. 12 Ámirijati lágu camá ligémeri wátu, níñein sarágu ridi lábubugu, níñein giñe ában íri búrwáñu luágu, ligía rügüñein asúbudirei. 13 Anaanguni to luáguboun, feíndiwatu láu jítaü. Lerérun Búngiu líribei. 14 Jafálaréiti súdeara ja siélubaña táu jadáuragun líno to finutu, jarútu, jarúma, wariñu jagía jawágu gabáyu jarútiña. 15 Níñoun ában efein jamánatu liyúmulugugiñe lun láchaunguniña néchaani táu, ábame ledéraagüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárime ligáñi Búngiu joun. 16 Búrwáñu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

17 Ába naríjin ában ánjeli rára lídan wéyu, le agúaragubei láu érei joun sun dunúru ja ájamajabaña juánriñurugu.

—Jigouúgu, oúndaragua jumá lun oúnwenbun ladíneragüdün Búngiu, 18 jou jumámuga jágürügü urúeigu, gumádimatiña, jáma wügüríña ganígitiña, jágürügü gabáyu jáu sun ja aweinjabaliña, jágürügü sun jawúyeri wügüríña dándu ja jóunguatiña quei ja idámuni, dándu nübürigiña quei weínamujaña.

19 Ábati naríjini mónsturu jáma lurúeitegu ubou jáu jánigu oúndaraguaaña lun jageindagun lúma le wariñubei luágu gabáyu jarúti jáma lánigu. 20 Ába ladaürün mónsturu úara lúma proféta yéeti lé buga adügübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígiraguagüdübaña jóungua lun labürüdün líri mónsturu jawágu, judúga jagía tun liyáwa. Dánduti mónsturu quei proféta yéeti ligía, ába jagurün wínwáñu lídoun lagúnu le láubei wátu geméti lúma súfuru. 21 Ja jíbiri, ába jáfarawagún táu efein to liyúmuluguboun le wariñubei luágu gabáyu, ába jaquímuledun sun dunúru buídu láu jágürügü.

20

Le mílu irúmu

1 Lárigiñe, ába naríjin ában ánjeli larárirun siélugiñe láu ligélen júyu le mébejabei, lúma ában oúnwenbun güringüri lújaburugu. 2 Ába lárügüdüni ánjeli ligía dragón, le binádu jéwe, le Máfiabei áni Satanási, ába lagúraguni luágu mílu irúmu. 3 Ába laguruni lídoun júyu le mébejabei le ñi lubei ladáürei. Ába lichugún ában séyu luágu béna lun mayéejandügüya láaña lan néchaanigu darí lásügürün mílu irúmu. Lárigiñeme mílu irúmu ligía, lígiragüdüwaba luágu murúsun dan.

4 Ába naríjini jála buri ja ibíjubaña ubáfu lun jagúseragüdün, ñun jáña luágu. Aríja numútiña giñe jawáni já meja adürürübaña ichügü lueigiñe japúrichijani Lerérun Búngiu lúma lueigiñe jadímurejan luágu Jesucrístu, ja májuduragunbaña lun mónsturu ni tun liyáwa, mígirun jagía lun lichugún líri luágu jerébe o luágu lan jarüna. Ába naríjin jásaarun lídaangiñe ouweni lúnya jabágaridun, ába jagúmadijan úara lúma Crístu luágu mílu irúmu. 5 Ánjeinti ja jíbiri jiláguaaña, másaaruntiña lídaangiñe ouweni daríme lárigiñe mílu irúmu. Niján furúmiñetibeí ásaaruni lídaangiñe ouweni. 6 ¡Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe ouweni! Mabáfuti libíaman ouweni jawágu, lubáragiñe líra, fádirigubaña láni Búngiu lúma láni Crístu, ábame jagúmadijan úara lúma Crístu luágu mílu irúmu.

⁷ Dánme sũgũjali mílu irúmu ligía, ligíame lígirawagũdũn Máfía lídaangiĩe júyu le mébejabei, ⁸ ábame láfuridun lun layéejaniĩa néchaanigu lídan sun ubou. Láfuriduba ayéedaña ubáfu buri le Gog luma Magóg, ábame loundaraguniĩa jánigu, ja gibebaña quei liságonthe barána, lun wuribu. ⁹ Ítara líña lubeiti, ába jáfuridun súdaara jagía lídaangiĩe sun ubou, ába jegéyedaguni fulásu le ñí jabei lánigu Búngiu luma ubúru le jinsiĩebei lun Búngiu, le Jerusalénbei. Ába louñajan Búngiu wátu geméti siéluigiĩe, ába láguduniĩa gumúgubei. ¹⁰ Máfiati le ayéedubaliĩa, ába lágurúniwa lídoun lagúnu le láubei wátu geméti luma súfuru, le ñíjin lubei jágurúa mónsturu luma proféta yéeti. Jasúfuriruba ñi wéyuagu, áriebu lun sun dan.

Wisiyu ligĩbugiĩe oúnwenbun jalaũ jarúti

¹¹ Ábati narĩjin ában oúnwenbun jalaũ jarúti, ñíĩnein Búngiu ñun luágu. Ába lagúmuhagun siélu luma ubou ligĩbugiĩe, ába marijínjali lan. ¹² Ába narĩjiniĩa jiláguaaña, weĩnamujaña jáma ñũbũrigiĩa rára ligĩbugiĩe Búngiu, ába tadárawagún líburu buri túma ábanya líburu to líburu to lánina ibágari. Ába jagúserawagũdũn jiláguaaña luágu buri cátei lé meja jadũgũbei, según le bũrũwañubei tídan líburu buri tugúya. ¹³ Sarátiĩa sun ja añáradagubaña dúnarugu, sun ja jiláguañabaña, ába jásaarun lídaangiĩe ouweni, ába jagúserawagũdũn luágu buri cátei lé meja jadũgũbei. ¹⁴ Ába lágurúniwa ouweni luma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libíamabei ouweni, ¹⁵ ñíjin jagurúa ja úabei jiri tídan líburu to lánina ibágari lun jasúfurirun ñi gumúgua dan.

21

Iséri siélu luma iséri ubou

¹ Lárigiĩe, ába layáwadagun iséri siélu luma ában iséri ubou nun, gumúgua buga furúmiñeti siélu luma furúmiñeti ubou áni úaali buga barána. ² Áu Juan, aríja numúti ubúru buri biniwati le iséri Jerusalén, larárirun siéluigiĩe lúmagiĩe Búngiu. Aráanseñu líña quei ában adári dáũguañu lubá tadári. ³ Ába nagáambun laríñagun ában umálali jéreti siéluigiĩe.

—Aríjabá, agánawati Búngiu jádan gürígia guetó. Laganouba jáma, jagíaba lánigu, Búngiu memeba jáma lun ligía lan Jabũngiute. ⁴ Larágajabei sun jáguira, úaalme ouweni ni ayájuni ni íruni ni igárigu, ladũga sũgũja sún meja cátei le níjeinbei.

⁵ Ábati laríñagun Búngiu.

—Aríjabá, adũga numúti sun cátei isérime.

Aríñagati giĩe.

—Babũrũja, ladũga inárũniti dimúrei buri le, áni gayáraati lafiĩnerún luágu.

⁶ Lárigiĩe, ába laríñagun nun.

—Súnja nadũgũni sun cátei le. Áu lagúmesejabei sun cátei, áu giĩe lagúmujoũnbei, quei létúra ‘A’ luma ‘Z’. Le mágũrabuti, níchuguba lun lun látun lídaangiĩe líeesen dúna le íchugubei ibágari, mafáyeiijaange luagu. ⁷ Ja ásiragũbalin wuribani jerésibirubei sun le lúnbei jabĩjini quei jalágaante quei nirájũũ, áume Jabũngiute, jagíame nirájũũ. ⁸ Ánjañati ja janúfudebaña, ja mafíĩebaña, ja iyéeejabúbaña, ja gáfarajadibaña, ja adáagubaña salúfuri, ja abíĩarajabaña, ja ájuduragubaña joun sándu, jáma ja yéebaña, jágurúba lídoun

lagúnu le sùbei láu wátu geméti lúma sùfuru, le libíamabei ouweni, ligíaba jalágaante.

Iséri Jerusalén

⁹ Ábati liábin ában jádaangiñe sédú ánjeligu ja láubaña sédú cópu buin jáu sédú jagúmujoún Igei, ába laríñagun nun.

—Jigábu, narúfudaali jageíra lánigu Jesucristu bun.

¹⁰ Ába layáwadaguagdúni Sífiri Sándu ában wúbü nun, weíriti, íñu, ába larúfuduni oúnwenbun ubúru gu biníwati le Jerusalén nun, larárirun siélugiñe lúmagiñe Búngiu. ¹¹ Ámirijati ubúru gu ligía láu larúgounga Búngiu, ítara líña límirin quei límirin ában dúbü buídumeraüti, quei dúbü le jáspe, jarúgoungati quei bídiriu. ¹² Níñein ában baríeru weíriti, íñu, láu dúusu béna geyégu láu ubúru gu ligía, ában ánjeli luágu cáda béna, lúma jíri dúusu túribu ladúgawagun Israél bürúwañu luágu buri béna. ¹³ Úrúwañein béna lueígiñe le nígiñe lubei labóucha wéyu, úrúwa lueígiñe nórté, úrúwa lueígiñe sur lúma úrúwa lueígiñe oúbaü le nígiñe lubei lálüda wéyu. ¹⁴ Baríeru ligía, ligíbuaguñein dúusu dúbü lidérebuguñein, láu jíri dúusu láni Crístu apóstolugu bürúwañu luágu.

¹⁵ Níñein ában mabúru gólu lúma ánjeli le adímurejabei núma lun lamísurajani ubúru gu, lubéneri, lúma lubárierun. ¹⁶ Ubúru gu ligía, ába lábu lidábuberen lúma limígífen. Ába lamísurajani ánjeli ligía ubúru gu láu lumáburu, bián-mílu bián-san kilómetros luweírin, ába lábu limígífen lúma líñun, lúma lidábuberen. ¹⁷ Lárígiñe, ába lamísurajani baríeru, úrúwa-wein-gádürü métros luweírin según jamísuraagüle gürígia le layúsurubei ánjeli ligía.

¹⁸ Láu dúbü le jáspe ladúgüwa baríeru ligía, ubúruguti ligía, láuti gólu le tímataaati, miríti queisi bídiriu le jarúmati. ¹⁹ Wéndegüdáwati lébu baríeru ligía láu sun luwúyeri dúbü buíduburiti. le furúmiñeti, láu jáspe, le libíaman, láu safíro, le lürüwan, láu ágata, le ligádürün, láu esmerálda, ²⁰ le liseíngün, láu ónise, le lisisín, láu cornalína, le lisédün, láu crisólito, le liwidün, láu berílo, le linéfün, láu topásio, le lidíisin, láu crisoprása, le liúnsun, láu jasínto, léti lidúusun, láu amatísta. ²¹ Dúusugubei béna ligía, dúusu pérlas, cáda béna láu ábanrügü pérla ladúgüwa. Léti úma buri láni ubúru gu ligía, láuti gólu jarúgoungati quei bídiriu.

²² Maríjintina ni ában ligílisi lídan ubúru gu lídan, ladúga añájein Wabúreme Búngiu le Súnti Gabáfu lúma Jesucristu ñi, mabúseerúnwatu ligílisi le ñi jabei. ²³ Memégeirunti ubúru gu ligía larúgounga lúmagiñe wéyu ni lúmagiñe játi, ladúga le guánarü larúgounga Búngiu rúti larúgounga lun, léti Jesucristu, ligía lilámpunbei ubúru gu ligía. ²⁴ Jeíbuguba sun néchaanigu ja sálbawañabaña lídan lilámpun ubúru gu ligía, ábame janügüni lurúeitegu ubou jaweírigin ñíjin, lun jíchuguni lun Búngiu. ²⁵ Madáurawagunbei lubéneri wéyuagu, úabei gíñe áriebu ñi. ²⁶ Lanügüba jaweírigin néchaanigu ñíjin, láu sun jarisin, ²⁷ mebélobei ni cáta wíyeti ñíjin, ni le adügüti cátei le wuríbati o gayéeraguati. Ja rügübaña bürúwañubaña íri tídan líburu to lánina ibágari to lúmaboun Jesucristu, jagía rügübaña ebélura.

22

¹ Ábati larúfudun ánjeli ligía ában dúna jarúmati nun, le íchugubei ibágari, jarúgoungati quei bídiriu, lídaangiñe lála Búngiu lúma lála Jesucristu láfurida.

² Níñein dúna ligía lamídaangua lémeri ubúru gu ligía, áni luágu bián louba dúna ligía ñi laweírída buri tídibu wéwe le íchugubei ibágari, le agíndubei dúusu

wéiyaaasu lídan irúmu. Ságu játi lagíndun, léti lubána, seríwiti lun lagáranijoún joun néchaanigu. ³ Úaalíme ni cáta ñi lun lábugiñe lan líñaragun Búngiu. Ñíbei lála Búngiu lúma lála Jesucrístu lídan ubúru gu ligía, ábame jájuduragun lánigu lun. ⁴ Jagágibudaguba lúma Búngiu, ñíbei giñe líri jeréberugu. ⁵ Úaalíme áriebu ñi, ja aganoúbaña ñi, memégeirunbaña ligémeri lámpu ni ligémeri wéyu, ladúga larúgoundagüdúba Wabúreme Búngiu jáu, ábame jagúmadijan sun dan.

Madíseeli liábin Jesúsu

⁶ Lárigiñe, ába lariñagun ánjeli ligía nun.

—Inárúnti dimúrei buri le, áni gayáraati lafiñerúniwa luágu, áni Wabúreme Búngiu méme le íchugubei dimúrei joun profétagu oúnaja láadina narúfuduni le lúnbei lasúseredun joun lánigu madíse.

⁷ —¡Aríja jumá! ¡Anáte madíse! líña lariñagun Jesucrístu.

¡Gúndaalá le adügúbei gásu láu ugánu le láni Búngiu le bürúwañubei tídan líburu to!

⁸ Au Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun. ⁹ Ába lariñagun nun.

—Madúgabei le, eseríwiduti lun Búngiu áu quei amürü jáma bibíríña ja profétagu, jáma sun ja adügúbaña gásu láu le bürúwañubei tídan líburu to, lun Búngiu lun bájuduragun.

¹⁰ Aríñagati giñe nun.

—Marámudabeí láni Búngiu ugánu le bürúwañubei tídan líburu to ladúga yaráfaali dan lun lagúnfulirún. ¹¹ Ígirabeí le wuríbabei lun lasígirun adáagua wuríbani, le wíyebai, lun lasígirun lídan liwíye, ánjeinti le buídubei, buídumemelá, áni le wügüri le derégeguabei lúngua lun Búngiu, gúnfulimemelá.

¹² —Ánja, madíseeli niábin, líña lariñagun Jesucrístu, áni barü numuti afáyeiruajaü le lúnbei níchuguni lun cáda ában según buri cátei le ladügúbei.

¹³ Au furúmiñetibeí lúma agúmujoúni, lagúmesaja sun cátei lúma lagúmujoún quei létüra ‘A’ lúma ‘Z’.

¹⁴ Gúndaatiña ja achíbubalin jafígoun lun garícha jamá lun jeígin lídaangiñe lin tídibu wéwe le íchubei íbágari, gayára lámuga jebélurun lueígiñe lubéneri ubúru gu. ¹⁵ Ánjaña ja mafiñeradibaña luágu Jesucrístu, ja abíñarajabaña, ja adáagubaña salúfuri, ja gáfarajadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba bougudi.

¹⁶ —Áu Jesúsu, oúnaja náali náni ánjeli lun lasúbudiragüdüni sún buri cátei le joun buri tílana ligílisi. Áu linébaanfan urúei David, áu giñe queisi warúguma to lánina bináafin.

¹⁷ Aríñagati Sífiri Sándu jáma ja lánigubaña Jesucrístu.

—Jigábu lun Jesucrístu lun basálbarun.

Le giñe agáambubei, aríñagalá.

—Jigábu lun Jesucrístu, sálba bámu ga.

Le mágürabubei, ánjein busén, ñübinlá, gurála lídaangiñe dúna le íchugubei íbágari, mafáyeijaanga luágu.

¹⁸ Sun ja agáambubalin láni Búngiu ugánu le bürúwañubei tídan líburu to, wéridi numútiña lueí cátei le. le íchuguti lánwoun cátei le, lagánwoundagüdúbaña Búngiu ígei ja uágubaña labürüjoúga tídan líburu to, luágu.

¹⁹ Le giñe agídaruti som cátei lídaangiñe láni Búngiu ugánu le bürúwañubei tídan

líburu to, lagídarubei gíñe lufánran lídaangiñe lin tídibu wéwe le íchugubei ibágari, lúma lídaangiñe ubúругu sánderu lé buri búrúwabei uágu tídan líburu to.

²⁰ Le asúbudiragüdúbalin buri cátei le, aríñagati.

—Ánja, madíseeli niábin.

Ítaralá. ijigábu Wabúreme Jesúsu!

²¹ Binílaün Wabúreme Jesucrístu sun jugúya. Ítaralá.